


Mbia Cheẽ



New Testament in Sirionó (BL:srq;Sirionó)

Mbía Cheẽ

New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 25 Nov 2022 from source files dated 29 Jan 2022
eb2687f2-4654-5d43-8ec2-3ee35e8a435e

Contents

SAN MATEO	1
SAN MARCOS	53
SAN LUCAS	84
SAN JUAN	138
HECHOS	178
ROMANOS	232
1 CORINTIOS	256
2 CORINTIOS	279
GÁLATAS	293
EFESIOS	301
FILIPENSES	309
COLOSENSES	315
1 TESALONICENSES	321
1 TESALONICENSES	326
1 TIMOTEO	329
2 TIMOTEO	335
TITO	340
FILEMÓN	343
HEBREOS	345
SANTIAGO	362
1 PEDRO	368
2 PEDRO	375
1 JUAN	379
2 JUAN	385
3 JUAN	386
JÚDAS	387
APOCALIPSIS	389

EL SANTO EVANGELIO SEGÚN SAN MATEO

Jesucristo i ñiinda ainei

¹ Ña ndei Jesucristo i ñiinda ã. David rei ei tuchi. Abraham abe no.

² Abraham ndei Isaac ndu. Isaac ndei Jacob ndu no. Jacob ndei Judá ru no. Judá nongue abe ru.

³ Judá rei Fares ndu. Zara ru abe no. (Tamar rei ñquĩsi.) Fares ndei Esrom ndu. Esrom ndei Aram ndu.

⁴ Aram ndei Aminadab ndu. Aminadab ndei Naasón ndu. Naasón ndei Salmón ndu. ⁵ Salmón ndei Booz ndu. (Rahab ndei esi.) Booz ndei Obed ndu. (Rut rei esi.) Obed ndei Isaí ru.

⁶ Isaí rei David ndu. David ndei ererecua. David ndei Salomón ndu. (Uriás ninisi rei esi.)

⁷ Salomón ndei Roboam ndu. Roboam ndei Abías ru. Abías rei Asa ru.

⁸ Asa rei Josafat ndu. Josafat ndei Joram ndu. Joram ndei Uzías ru.

⁹ Uzías rei Jotam ndu. Jotam ndei Acáz ru. Acáz rei Ezequías ru.

¹⁰ Ezequías rei Manasés ru. Manasés rei Amón ndu. Amón ndei Josías ru.

¹¹ Josías rei Jeconías ru. Jeconías nongue abe ru. Ñquĩ ngue siqui abae judíos rerao mose Babilóniaa nda.

¹² Jeconías rei Salatiel ndu no. Salatiel ndei Zorobabel ndu.

¹³ Zorobabel ndei Abiud ndu. Abiud ndei Eliaquim ndu. Eliaquim ndei Azor ndu.

¹⁴ Azor ndei Sadoc ndu. Sadoc ndei Aquim ndu. Aquim ndei Eliud ndu.

¹⁵ Eliud ndei Eleazar ndu. Eleazar ndei Matán ndu. Matán ndei Jacob ndu.

¹⁶ Jacob ndei José ru. José quia María quereco ñguĩ. María rei Jesús si. Cristo, i equia ee.

¹⁷ Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que

aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

¹⁸ Jesucristo chaacuquia tasenei na jêje. María rei esi. María que siquichõ ndei quia José ninisirã nda. Nyucuaaque ru eã ngue siqui rei ra. Nguiirĩ ngue eteachõ nguie ye ra. Siquĩã ndaque José rese. Espíritu Turã ae que eririĩ mondo erie ye ra.

¹⁹ José turãte que eriqui rei ra. Eireĩte que eriqui mae María rio rese ra. —Seninisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra. María siqui rei ngua emo ndese ee reaẽ.

²⁰ José que ndua ndua quia erese ra. Ndua ndua mose que ángel mo

ndu eque re cuu ra. Ángel que ñee ee ra. —David riirĩ ño nde re. María eisi turã ño neninisirã.

¡Ndeireĩ ngũĩ ño jê! Emo ngue siqui ãte quia erese ra. Espíritu

Turã ae que eririĩ mondo erie ye ra.

²¹ Nguiirĩ nda etea. “Jesús” ere chõ eririĩ je. Ae quia ra mbia sirõ tuchi eicuã si, i que ángel ñee José je

cuu ra.

²² Eĩ nda Dios cheẽ io cote. Ae Dios cheẽ mbuchecuaa mbesa cose nae, ñquĩ nda io cote. Ña ndei embesa ji ã:

²³ ¡Sã jê! Nyucuaaque ruã nda nguiirĩ tea.

Emanuel, i ra eririĩ je.

Dios riqui nanderese co, i ñi Emanuel nde, i que embesa

ji cose ra.

²⁴ José que ñumumba cote ra. Ángel cheẽ ndui si que María rerequia turã cote ra.

²⁵ José que siqui eã mbei erese ra. Nguiirĩ ndea chee. Jesús i que José eririĩ je ra.

2

Mbia aquiatu nyoi Jesús itãquieĩ ndea

¹ Jesús que nyaacuquia Belén nda. Judea, i que hue ibi je ra. Herodes rei hue jenda mbia

rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda. ² Ûqui ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Uremae ngue nyasitata embae rese ra. Ureico mose ure récuaa. Nyebe urechu nguiã erea co. Urecoi rã urenia ndese ñee ee. ¿Ma eriqui mande? i que mbia aquiatu ñee judíos je ra. ³ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁴ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra nyaacuquia” ¿i embesa ji re? i que Herodes ñee ee ra. ⁵ Ûqui ngue ñee Herodes je ra. —Nyaacuquia ra Belén de Judea. I que embesa ji ra:

⁶ Sucha ñetẽ tuchi rei Belén.

Belén de Judea.

Mbia chiicua tuchi ra Belén cote. Hue jenda mo nda mbia rerecuarã tuchi cote.

Ae ra serimba Israel jenda teaquiato tuchi quia cote, i que Dios cheẽ embesa ji ra, i que sacerdotes ñee Herodes je ra.

⁷ Nyebe Herodes “jenyu” i nguiã ùqui mbia aquiatu je. Ñee ngue ùqui Isaa ra. —¿Manosete nyasitata embae rese jemae nde? i que ñee ee ra. ⁸ Herodes que ùqui mbia aquiatu mondochoi Belén cote ra. —Jẽso Belén. Nyaacuquia ramo je rese jẽirandu tuchi. Jẽ erea mose, sembiirandu se. I nda se abe aso mae erese. I nda acoi senia ndese se abe ñee ee, i rei que Herodes ñee ee ra. ⁹ Mbia aquiatu que nyoĩ cote ra. Ae nyasitata rese eriqui mae nyii nae, aque nyasitata que oso bei quia mbia rêta ra. Tiba que ee Belén arõ cote ra. ¹⁰ Nyebe mbia

aquiato ia tuchi nguiã mae mose nyasitata tiba rese cote. ¹¹ Mbia aquiato que ique tuchúaa cote ra. Huee que ãquẽ itãquieĩ ndiqui ee cote ra. Usi rese. María, i equia ee. Ngoi que nguiã ndese eitãquieĩ je cote ra. Ñee turã ngue ee ra. Mbae que esirõ mondo Jesús je cote ra. Oro. Mbae mbushimbua abe no. Mirra abe no. ¹² Dios que ñee mbia aquiato je cote ra. —Jẽsochi nda ñee Herodes mbiirandu jẽ, i que Dios ñee ee cuu ra. Nyebe echoi nguiã Herodes abi nguécuaa.

José nyoĩ uchã Egíptoo

¹³ Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serite equia co. Jẽso uchã. ãquẽ jendao sunuña Egíptoo. Esi rese. Huee jẽingochõ. Acheẽ jee ra ndeje huee, i que Dios ñee José je ra. ¹⁴ José que ñumumba juã cote ra. ãquẽ ngue ecuruchoi isa usi rese ra. Nyoĩ que Egipto quiti ra. ¹⁵ Chi arete que Egíptoo ra. Ererecua Herodes que mano cote ra. Dios cheẽ ngue ique cote ra. Eĩ ngue Dios cheẽ embesa ji ra: Seriirĩ ngue aru Egipto si ra, i que embesa ji ra.

Herodes ãquẽ itãquieĩ iquia ja

¹⁶ Herodes que paama i tuchi cote ra. —Mbia aquiato sembĩrĩ irĩ ñochĩ. Nyebiã ñochĩ ecuaẽ ñee seje, i que ra. Nyebe que soldados mondo mbia riirĩ nacuẽ iquia ja cote ra. ãquẽ itãquieĩ ngu e eiquia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aque mosenda ãquẽ itãquieĩ iquia ja. ¹⁷ Herodes ùqui iquia mose que Dios cheẽ ique cote ra. Ae Jeremías mbesa quia:

¹⁸ Mbia Ramá jenda nyeseo tuchi. Eya eã tuchi nguiirĩ ndese. Emo embia aroneãte.

Eriirĩ nguia mano jate nguĩã ee, i que embesa ji ra.

¹⁹ José chi mose Egipto que Herodes mano nyee ra. Nyebe Dios ángel mo mondo nguĩã ñe e José je. ²⁰ —José, echumumba rã. Jêso Israel cote. ãquẽ abe erao. Esi rese. Ae ãquẽ iquia serĩte quia nae, ũquĩ ngue mano cote ra, i que ángel ñee José je cuu ra. ²¹ José que ñumumba cote ra. Nyoĩ que nyebi Israel quitu cote ra. ãquẽ ngue equerao esi rese ra. ²² Herodes ririĩ ngue siqui Judea jenda rerecuarã cote ra. Arquelao, i que ee ra. José jirandu mose erese que esiquiche cote ra. Oso sereãte que huee cote ra. Dios que ñee ee cuu ra. Nyebe esi nguĩã Galilea cote. ²³ Sucha tubiriã mo ngue chi Galiléaa ra. Nazaret, i que hue je ra. José que nyoĩ bei hue, hue jendarã cote ra. Nyebe Dios cheẽ mbesa ji ique nguĩã cote. f ngue Dios cheẽ nda: Nazaret jenda ra Jesús, i que Dios cheẽ nda.

3

Juan el Bautista Dios chẽ senei senei

¹ Emo mose que Juan el Bautista Dios cheẽ nenei nenei mbia je cote ra. Dios cheẽ ngue esenei senei nguia mbia je turúquiaa ra. ² —Jendua si jẽicuã ndese. Jendua si Dios rese. Dios ra tu mbia rerecuarã tuchi cote, i beite que Juan nguia ñee nda. ³ Sã Isaiás embesa nyii no:

Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eĩ jenyee si chõ nguia jẽ abe icoquiatsu nandererrecua je”, i equia turúquiaa hue,

i que Isaiás embesa ra. Juan nĩ si que embesa ra. ⁴ Quiicuã mbuaera chõ ngue Juan irao ra. Mbae ire chõ ngue enumbicuaa no nda. Tucu mbuae chõ ngue eu quia no nda. Irao quiaa rĩnda abe. ⁵ Jerusalén

jenda que ngaẽ ngaẽ tuchi quia echeẽ andu ra. Judea jenda abe no. Ama Jordán nimia nduinda abe no. ⁶ Mbia huiicuã nenei nenei mose Dios je, ũquĩ mose que Juan ndiqui bautizar i ee ra. Ama Jordán ye.

⁷ Fariseos tubiriã abe que ngaẽ ngaẽ tuchi quia Juan ndea ra. Saduceos tubiriã abe no. Juan ngue ñee asite ũquĩ je ra. —Mbei rã ño jẽingo nguĩã ã. Mbae icuã nda tu mbia je nae, ¿ũquĩ nĩ ño jenyu quia uchã serea co re? ⁸ Jẽ mbae icuã ndecha mose Dios je, mbae turã jẽsaã saã mbei quiatu quia ee cote. ⁹ “Abraham ndiriĩ nducucha chõ nande re. Nyebe ra Dios nandemingo be” jjenyechĩ nda jẽ! Dios Abraham ndiriĩ nducucha chao arõte raque sita je. ¹⁰ Ira rã si chõ mbia riqui nguĩã ã. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacua. Eĩ serĩ serĩ ño Dios nguĩã mbia je co, mbia mbae turã naa eã mose.

¹¹ I je chõ aico nguĩã bautizar i mbia je co. Jẽ ndua ndua si mose Dios rese. Co chi emo ndu quia serui co. Ae quia equiracuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no. ¹² Ae ra mbia umbae mĩ icúe. Eturã achõ ño embae re. Ae embae eã nae, ũquĩ nda eséi cote. Ũquĩ ndeisa ra ua eã mbei tata. Sã mbia quiata a chiqui chiqui no. Sã ea mĩ icúe no. Sã echuruique mombo tátaa no, i que Juan ñee mbia je ra.

Juan bautizar i Jesús je

¹³ Jesús que tu Galilea si cote ra. Tu que Juan ndea Ama Jordán nda. Juan bautizar i sacua ee. ¹⁴ Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús je ra. ¹⁵ Jesús que ñee ee ra. —Bautizar ere rei seje. Dios cheẽ ndui si mbae nandesaa turã

ja quia, i que Jesús ee ra. Juan ngue eno i chee ee ra. ¹⁶ Juan ngue bautizar i ee ra. Jesús que usê oso ama si cote ra. Ibei que nyiequia ee cote ra. Espíritu Turã ngue nguichi nyurushi rã nda. Nguichi que eu Jesús rese ra. ¹⁷ Ibei jenda que ñee nda. —Seriirĩ ño co re. Sechesecua chõ co re. Seyate erese, i que Dios ñee Jesús je ra.

4

Jesús tambücuã, i raque Satanás

¹ Turúquiaa que Espíritu Turã Jesús rerao ra. “Tã tae Jesús je”, i sacüã diablo Jesús je. ² Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. ³ Aque mose tuchi que diablo si ee ra. Embücuã sacüã. —Nde Dios ririĩ mose, mbichae esaã ã sita je. f nda ereu, i rei que diablo ñee ee ra. ⁴ Jesús que ñee ee ra. —Tei. Sã embesa ji ñee no: “Mbia chiu achõ nda mbia mingo eã. Dios cheẽ nguia ra mbia mingo nguia”, i que embesa ji ra, i que Jesús ee ra. ⁵ Aquere que diablo ererao Jerusalén nda. Querao que suruchui ibate Dios chuchua arõ nda. ⁶ Ñee ngue Jesús je ibate ereco mose ra. —Nde Dios ririĩ mose, eo oso íbii no. Dios ra ndereaquiatu. Sã embesa ji riqui i ñee no:

Dios ra ángeles mondo ndereaquiatu sacüã.

Oje ra ndeisi. Nembuquichi mingue rae.

Sita ra cua iã ndei je, i que embesa ji ra, i rei que diablo ñee Jesús je ra. ⁷ Jesús que ñee diablo je ra. —Sã embesa ji ñee no: “‘Ma Dios sereaquiatu. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ⁸ Aquere que diablo ererao ibi ibate mo nda. Ibate tuchi ererao cote. Diablo que ibi teacuquia ja ee ra. Ishonda abe reacucia ja

ee. ⁹ Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra. ¹⁰ Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra. ¹¹ Diablo que oso erecha cote ra. Angeles que ngaẽ Jesús reaquiatu cote ra.

Jesús mbia mbaaquiatu quiatu ramo

¹²⁻¹³ Aque mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabulón abe ji. Neftalí abe ji. Huee que Jesús si siri ra. ¹⁴ Isaías chimbasa Dios cheẽ ngue ique cote ra. Jesús siqui mose huee. Eĩ ngue Isaías embesa cose ra:

¹⁵⁻¹⁶ Mbia hue jenda ja que siqui itondáruu nyii ra.

Zabulón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ñquĩ abe no.

Ñquĩ mbia que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra. ¹⁷ Aque mose bei chõ ngue Jesús riqui ñee mbia je cote ra. —Jendua si Dios rese. Mbia rerecuarã tuchi ra Dios namo jiri, i que Jesús quia ñee mbei mbia je cote ra.

Jẽingo serui, i Jesús uchimbaaquiaturã je

¹⁸ Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. I que eu sira mbuasa mondo mondo ii ra. Sira resenda bei rei ñquĩ.

¹⁹ Jesús que ñee ee ra. —¡Serui bei chõ jëingo jê! Taembaaquiatsu quiatu. Mbia teendu endu bei quia seje cote, i que Jesús ee ra. ²⁰ Nyoï ja que erui ra. Sira mbuasa si que echoi hui ra. ²¹ Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echi ja canoa ye sira mbuasa mbitorõ tirõ nda. —Jëingo serui, i que Jesús Jacobo je ra. Juan je abe. ²² Jesús cheẽ nduibetuchi que echoi erui ra. Canoa ndecha. Ngu abe recha.

Jesús mbia tubiriã mbaaquiatsu

²³ Jesús que ngata tuchi quia Galilea rĩ nda. Mbia que embaaquiatsu quiatu quia mbia chumunua nuãsaa ra. Dios cheẽ turã ngue esenei senei nguia ee ra. Mbia rasi chumumbara que embucherõ cherõ nguia ra. ²⁴ Mbia Siri a jenda que jirandu tuchite chee erese ra. Nyebe eriqui nguia erasi rurucuaẽ cuaẽ jate ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi sayã je abe no. Jesús que embucherõ cherõ ja quia ra. ²⁵ Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uqui jenda siqui ja Jesús rui.

5

Jesús mbia mbaaquiatsu quiatu ibi ibate

¹ Mbia tubiriã ngu e chi Jesús rese ra. Nyebe Jesús nyui nguia ibi ibate mo ndese ra. Ngoi que huee ra. Echimbaaquiatsu que esichã ngaẽ nda. ² Jesús que embaaquiatsu quiatu ra.

Ae eyate riqui

³ Eĩ ngue ñee ee ra:

—Ae siqui mingue quia nae, eya chõ ñquĩ nde. Ñquĩ nda siqui Dios rese.

⁴ Ae nyeseo quia nae, eya chõ ñquĩ nde. Dios ra embia tuchi.

⁵ Ae eseteãte riqui nae, eya chõ ñquĩ nde. Ibi ja ra embae cote.

⁶ Ae siqui turã sete quia nae, eya chõ ñquĩ nde. Dios ra embucuata turã nguia.

⁷ Ae eya eãte riqui mbia rese nae, eya chõ ñquĩ nde. Dios ia eãte ra ñquĩ ndese.

⁸ Ae echiã turãte riqui nae, eya chõ ñquĩ nde. Ñquĩ nda mae Dios rese.

⁹ Ae mbia mingo turã nguia nyiese nae, eya chõ ñquĩ nde. “Seriirĩ” i ra Dios ñquĩ je.

¹⁰ Mbia icuã icuã mose jëturã je, jëya tuchi rae. Jenderecua tuchi chõ Dios riqui nguia co.

¹¹ Mbia ñee icuã mose jëje seriĩ, jëya tuchi rae. Mbia icuã icuã mose jëje seriĩ. Mbia ñee ñooño mose jeni, jëya tuchi rae. ¹² Jeñimbua chõ nguia ñquĩ mose. Dios quia ra mbae turã tuchi mondo jëje ibate. Mbia icuã icuande jëje nyii. Eĩ ngue mbia icuã icuã nguia Dios rimba je nyii no nda.

Tata rendi rã ndei Dios quiato

¹³ Embiquesa rã ño jëingo nguia mbia je ã. Sã embiquesa turãte no. Eise quiachamba mose, eicuã tuchi ra cote. Mbia ra emombo chõ cote. Mbia ra irõ ño erese. ¹⁴ Tata rã ño jëingo nguia mbia Dios quiatoã je ã. Mbia sucha cuasu raã mose ibi ibatee, mbia ra mae ja erese. ¹⁵ Sã nandeico lámpara mendi no. Sã nandeico eatieã no. Sã nandeico emi eã mbaequi re no. Erendi checua chõ nda nandemĩ nguia. Mbia resae ja sacua. ¹⁶ Eĩ jenye si chõ nguia tata turã na. Mbae resae turã mbia je. Eĩ jenye mose ra mbia mae jëturã ndese. Ñee turã nda jendu ibatenda je cote.

Jesús mbia mbaaquiatu quiatu Moisés chimbesa rĩĩ

¹⁷ Dios cheẽ ique ja sacua ño achu nguiã co. Moisés cheẽ mbutiã sacua eã ño ngue achu nguiã. Dios cheẽ mbuchecuasa cheẽ mbutiã sacua eã ño ngue achu nguiã. ¹⁸ Tacheẽ nyecua jėje. Moisés cheẽ nda ique ja. Ibei ra ua. Ibi abe ra ua no. Moisés cheẽ nguiã ra ua eã mbei. Ique ja chee rae. ¹⁹ Dios cheẽ tubiriãte raque mbia je, mbia echeẽ mumbayã sacua. Emo echeẽ mii mumba mose, Dios biãte ra ũqui, Dios siqui mose ererecuarã tuchi cote. “Dios cheẽ mii emumba”, i mose emo, Dios biãte ũqui. Ae echeẽ mumbayãte quia nae, Diosbi tuchi chõ ũqui nde. Ae ñee nguiã mbia je nae, “Dios cheẽ jemumbayã ja” i quia mbia je nae, Diosbi tuchi chõ ũqui nde. ²⁰ Tacheẽ nyecua jėje. Fariseos uturã saã saã tuchi raque. Ijẽ nguiã jẽingo turã tuchi ũqui si jê! Jẽ jẽingo turã eã mose ũqui si, jẽingo eã nda Dios rese, Dios siqui mose mbia rerecuarã.

Paama jenyechĩ nda emo je, i Jesús

²¹ Amei ñee ngue jeñandu rei ra. “Mbia mo nda ereiquiachĩ. Nde mbia mo iquia mose, nde abe ra mbia ndeiquia arõte”, i rei que amei nda. ²² Se quia tacheẽ nyecua jėje. Jẽ paama i chooño mose jenongue je, mbia ra jeiquia arõte. “Ndeaquiatuã nde” jeny mose jenongue je, mbia ra jeiquia arõte. “Ndearacuayã nde” jeny mose jenongue je, jẽso arõte ra tata cuasu. ²³⁻²⁴ Nembae ofrenda rerao mose Dios je, endua rã nyii, emondo nonde ee. Ndenongue mo paama i mose ndeje, ofrenda esecha rã oso ñee ndenongue je. Jeñimbuturã na nguiã nyii. Aquere quiatu eso nyebi ofrenda mee Dios

je cote. ²⁵ Emo mbia rerecu mbuqueta queta mose nderĩĩ, ndeturã ño ee. Echeẽ turã ño ee. Jẽ ae chõ jeñimbuturã jenyue. I nda ndererao icuã eã. Ndererao mose ra ndetarõ mbei cárcel. ²⁶ Huee ra ereico bei. Nembae mondo ja tuchi chee ee.

Emo mae mose cuña mo osei osei, adulterio i ũqui je

²⁷ Amei ñee ngue jeñandu rei ra. “Emo ninisi rese ra jẽingochĩ”, i rei que ra. ²⁸ Se quia tacheẽ nyecua jėje. Emo mae icuã mose cuña mo ndese, “aque rese nda aico raã ña” i mose, ũqui abe eicuãte. Siqui raanguia erese chõ ũqui nde. ²⁹ Nderesa mae mose mbae icuã ndese, echoo mombo. Nderesa nemingo serĩ mose mbae icuã nde se, echoo mombo. Coche nderesa mii eremombo nguiã. I nda nderete osoã tata cuásuu. ³⁰ Ndeo nemingo mose mbae icuã ndese, echisia mombo. Coche ndeo mombo nguiã. Ndequiato cutinda raque. I nda nderete osoã tata cuásuu.

Jeninisi ra jemombochĩ jê, i Jesús

³¹ Amei ñee ngue jeñandu rei ra. “Emo ngũnisi mombose mose, sã emombo chõ. Papel mbesa ji emondo ee”, i rei que amei nda. ³² Se quia tacheẽ nyecua jėje. IJeninisi ra jemombochĩ jê! Jeninisi siqui mose emo ndese, ũqui mose mii ño jeninisi jemombo arõte raque. Jẽ emombo chooño mose, jẽingo jeninisi mingo adulterio rese ũqui. Ae emombo ji quereco cote nae, ũqui abe eicuãte no. Adulterio, i chõ ũqui je re.

Jurar jeny jirichĩ nda jê

³³ Amei ñee ngue jeñandu rei ra. “Jurar jeny mose Dios je, jeñee nda jembuchebichĩ ee”, i rei que amei nda. ³⁴ Se quia tacheẽ nyecua jėje. IJurar jeny eã mbei tuchi jê! Ibei rĩĩ abe jurar jeny eã jê. Dios recua chõ ibei re. ³⁵ Ibi rĩĩ abe jurar

jentye eã jê. Dios ironguia chõ ibi re. Jerusalén nîi abe jurar jentye eã jê. Dios mbae tuchi chõ Jerusalén nde. ³⁶ Jeãquĩ nîi abe jurar jentye eã jê. Jêa mîi mo jembushĩ aroneate. Co mîi jemondei aroneate no. ³⁷ Jurar jentye eã jê! “Ae” jentye chõ. “Tei” jentye chõ. Ũquĩ mîi ño jeñee. Jurar jentye mose, eicuãte ũquĩ.

Emo icuã mose jêje, jêturã ño ee

³⁸ Amei ñee ngue jeñandu rei ra. “Emo nderesa mungue mose, nde abe aque resa emungue. Emo nderẽi siquio mose, nde abe ereĩ esiquio”, i rei que amei nda. ³⁹ Se quia tacheẽ nyecua jêje. Mbae icuã nda jêsaãchĩ mbia icuã je. Emo ucua mose nderitii rese, nderitii ribisho abe eteacuquia ee. ⁴⁰ Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee. ⁴¹ “Sembae mbae usi erao jiri seje”, i mose emo ndeje, peebejiri erao ee. ⁴² Emo ache i mose ndeje, emondo ee. “Mbae mo prestar ere seje” i mose emo, emondo ee.

⁴³ Amei ñee ngue jeñandu rei ra. “Ae eturãte riqui ndeje nae, echesequa erese. Ae ndeucuãyã nguia nae, nde abe eucuãyã” i rei que amei nda. ⁴⁴ Se quia tacheẽ nyecua jêje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderĩ nae, echeẽ turã ño nguia nde ee. Ae eicuãte riqui ndeje nae, ũquĩ nîi eico ñee turã Dios je. ⁴⁵ Eĩ jentye mose ra Ibatenda riirĩ turã tuchi jê. Dios quiarei eturã mbia ja je. Mbiam turã je. Mbiam icuã je abe no. Dios quiarei tenda mbusẽ turã mbei mbiam turã je. Eicuã je abe no. Dios quiarei ama mbuchaaquí turã mbei mbiam turã je. Eicuã je abe. ⁴⁶ Ae eturãte riqui mbia jêje nae, ũquĩ achõ je jêturã mose, eicuãte ũquĩ. Mbiam icuã abe mbae turã saãte uquiato achõ je. Eĩ jentyechĩ

nda jê. ⁴⁷ Jêquiato achõ je jeñee turã mose, aba biãte ũquĩ. Eĩ ño Dios quiatoã abe nguia ñee turã uquiato je. ⁴⁸ Jê nguia jêingo turã mbei mbiam ja je. Sã jendu Ibatenda turã mbei riqui no.

6

Mbae turã jêsaã nyecuayã ño nguia

¹ “Sã mbiam mae ja sechiao turã ndese”, jentyechĩ nda mbae turã naa mose. Mbiam rêsaa achõ nda mbae turã jêsaã saãchĩ jê. Ũquĩ jêsaã saã mose ra jendu Ibatenda mbae turã mee eã jêje. ² Jêingo mose mbae mee mee mbae cha reã jê, jemondo checuayã ño nguia ee. Mbiam mbiirandu randu eã. Ae uturã saã saã nguia nae, ũquĩ na nda jêingochĩ. Dios ra mbae turã mee eã ũquĩ je. “Sã mbiam mae ja sechiao turã ndese”, jentyechĩ nda jê. ³ Mbae turã jêsaã mose, jêsaã mingue chõ. ⁴ Mbae turã jêsaã nyecuayã ño. Jêingo mose mbae turã naa naa nyecuayã, Dios ae ra mae jêturã ndese. Ae quia ra mbae turã mee nyecua jêje cote.

Eĩ jentye chõ ñee Dios je, i Jesús

⁵ Jeñee mose Dios je, jeñee mingue chõ nguia ee. Uturã naa naasa rã nda jêingochĩ. Ũquĩ ndiqui nyoĩ choi mbiásaa ñee sacua Dios je ũquĩ. “Sã mbiam mae ja serese secheẽ mose Dios je”, i equia ũquĩ. Mbiam riqui mae jate raque erese. Dios quia ra mbae turã mee eã ee. ⁶ Nde ñeese mose Dios je, nde ae chõ echeẽ nguia ee ndechuchúaa. “Sa mbiam mae ja serese”, erechĩ nda jê. Nde a e chõ echeẽ nguia ee. Dios ae ra siqui nderese. Dios ae mbae icua ja nguia. Ae quia ra mbae turã mee ndeje cote.

⁷ Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguia ñee ndaque Dios je. “Hue rĩ urecheẽ mbei mose ra

Dios ureandu”, i rei nguiã. ⁸ Ũquĩ na nda jëingochĩ. Ae mbae âte riqui jêje nae, ũquĩ Dios icuate quia co. Jeñee nonde ee. “Mbae embu ure je”, jê i nonde ee. ⁹ Eĩ jenyê chõ nguiã ñee Dios je:

Paba Ibatenda, sã mbia ñee turã mbei quia nderĩ.

¹⁰ Mbia rere cuarã ja sacua echu jei íbii.

Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹ Ae ra ureu namo, ũquĩ embu rã urechiurã.

¹² Ae uresaã icuã icuã ndeje nae, ũquĩ embutiã ná uresi. Sã ureico tesarei mbia icuã icuã mose ure je no.

¹³ “Mbae icuã jësaã” jichĩ nda emo ure je jê!

Urereaquiatsu bei quia mbae icuã si.

Nde mĩ ño mbia rerecuarã nde.

Nde mĩ ño ndequirãcuã nde.

Nde mĩ je mbia ñee turã sacua mbei. Amén.

Eĩ jenyê chõ ñee Dios je. ¹⁴ Mbia icuã icuã mose jêje, jêtesarei chõ esi. Eĩ jenyê mose ra Dios Ibatenda abe jeicuã mbutiã jêsi. ¹⁵ Jêtesarei eã mose mbia icuã si, Dios abe ra jêicuã mbutiã eã jêsi.

“Sã mbia mae ja sere” jenyechĩ nda hui mose jenyiu si

¹⁶ Jenyiu si jêhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jê. Eĩ ño uturã naa naasa nguiã. Mbia nda mae ja rei nguiã erese. Dios quia ra mbae turã mee eã ee. ¹⁷ Ndehui mose ndechiu si Dios je, ndeya chõ eico. ¹⁸ Sã mbia jiranuã nderiãcuã ndese. Sã Dios ae jirandu nderiãcuã ndese. Dios quia mbae icua jate nguiã. Ae quia ra mbae mee ndeje cote.

Jembaerã ibatenda rese quia jëingo ndua ndua

¹⁹ “Mbae turã tamunua nu a sembaerã aa íbii”, jenyechĩ nda jê. Chicuaquiareĩ nda eu arôte. Emo embuquiachã arôte jêsi. Eichoi arõ ndete no. ²⁰ Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã mbei. Ibate quia ra emo embuquiachã eã jêsi. ²¹ Jembaerã chi mose ibate, Dios rese ra jëingo ndua turã. Jembaerã chi mose íbii, ibi jenda mĩ ndese ra jëingo ndua.

Nanderesa mbae resae nanderete je

²² Nanderesa quiarei mbae resae nanderete je. Nanderesa turã mose, nanderete abe ra oso turã. ²³ Nanderesa icuã mose, nanderete abe ra oso icuã icuã no. Tat a rendi rã jëingo bei. Ũquĩ mose ra jëingo jiri jiriã itondáruu.

Mbae isiquia Dios quiato eã

²⁴ Erimba mĩ mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue ra ebite. Eĩ si chõ mbia re. Ae ndua beite quia mbae isiquia rese nae, ũquĩ siqui aroneate Dios rui. Ae siqui beite quia Dios rese nae, ũquĩ nguiarei ndua eã jiri mbae isiquia rese.

Dios uquiato teaquiatsu bei

²⁵ “¿Mbae ra nandeu re?” jenyechĩ nda quicoi coi jê. “¿Matiru ra nandemingue re?” jenyechĩ nda quicoi coi no jê. Mbia chiu ae ra mbia mingo eã. Mbia irao abe ra mbia mingo eã no. ²⁶ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiaru quiaru bei. Jê nguiarei Dios queteamba tuchi nguireĩ si. Dios ae jembuquiaru nguiã jê no. ²⁷ Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae

mbia mbutiarõ nguiã. ²⁸ “¿Ma tiru ra nandemingue re?” jenyechĩ nda pare pare i jẽ. Sã mbae uti no. Sã mbae uti turãte riqui no. Mbae ao ao eã ndaque. Ninyu mburirã ndirã eã ndaque. ²⁹ Dios ae chõ mbae uti mbuturã nguiã. Mbae uti quiarei eturã jiri Salomón si. Salomón turãte raque. ³⁰ Sã Dios quiata mbuturã no. Quiata mano jeite raque. ¿Mañi nda Dios jembĩirao eã jẽ nde no? ¿Mbaerã jẽingo Dios icuayãte re? ³¹ “¿Mbae ra nandeu re?” jenyechĩ nda pare pare i jẽ. “¿Mbae ra nandembei re?” jenyechĩ nda pare pare i jẽ. “¿Ma tiru ra nandemingue re?” jenyechĩ nda eno jẽ. ³² Eĩ ño Dios quiatoã nguiã. Jẽ nguia jendu Ibatenda tesareiã mbeite nguiã jẽsi. ³³ Jẽ nguia jẽingo tuchi Dios rese jenderecuarã. Sã Dios turãte no. Ñquĩ na ño jẽingo. Ñquĩ mose ra Dios mbae mee mee mbei jẽje. Jenyiurã. Jeñimbeirã abe no. Jẽiraorã abe no. ³⁴ “Mbae tiã ñochĩ nda seje isamami nde”, jenyechĩ nda pare pare i jẽ. Isamaminda rese ra jendua nduachĩ namo jẽ. Namonda mĩ ndese jendua namo no. Isamami nguiatu jendua isamaminda rese.

7

“Eĩcuãte que co ra”, jenyechĩ nda emo nĩ

¹ “Co que eĩcuãte ra”, jenyechĩ nda emo nĩ. “Jẽĩcuãte” iã nda Dios jẽje chã. ² Mbia icuã mose, jeñeechĩ nda ee. Jẽturã mose ee, Dios abe ra eturã jẽje. Mbae jemee mee turã mbia je. Dios abe quia ra mbae mee tuchi jẽje cote. Jẽ embisẽ mee mose emo je, Dios abe ra embisẽ mee jẽje no. ³ ¿Mbaerã jẽingo “eĩcuã” i emo je re? Jẽ jẽicuã tuchi mose esi. “Mbae ñetẽ ndiqui nderésaa aque”, jenyechĩ nda emo je, jẽ mbae cuasu rerequia mose jendésaa jẽ nguiatu. ⁴⁻⁵ “Mbae turã

ndese chõ jẽingo”, jenyechĩ nda jẽ jẽicuã mose jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nguia jẽturã jẽsaã saã ñote nguiã aque. Jẽ nane nguia jẽturã ndiqui. Aquere quia jeñee emo mingo turã cote. ⁶ Sã mbia mo ndiqui perro rã si no. Teasu socoi quia rã abe no. Ñquĩ nguiarei mbia icuã mbei Dios cheẽ andure. Dios cheẽ isi teã teã. Dios cheẽ jẽsenei eã ñquĩ je cote. Emo je quia jẽsenei cote.

Jeñee mose Dios je, mbae ra emondo jẽje

⁷ Jeñee mbei mose Dios je, mbae ra emondo jẽje. Jẽ mbae mo ndequia mose, jẽtea rae. Jẽ eiquesa mbuu mbuu mose, ñquĩ mose ra embuquiata jẽje no. ⁸ Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no. ⁹ Jendiirĩ “mbichae embu seje” i mose, ¿sita ra eru mee ee re? ¹⁰ Jendiirĩ “sira embu seje” i mose, ¿mbei ra eru mondo ee re? ¹¹ Mbia icuã nyee mbae turã mondo mondo quia nguiirĩ je ã. Jendu Ibatenda quia ra mbae turã tuchi mee jẽje, jeñee mose ee. ¹² Sã jẽyate riqui mbia siqui turã mose jẽje no. Eĩ jenye si chõ nguia siqui turã mbia je no. Moisés chimbese tuchi chõ ñquĩ nde. Dios quiato cose ndare chimbese ja chõ ñquĩ nde.

Eiquesa chumumbi

¹³ Eiquesa chumumbi rĩ ño jẽso ique jẽ. Aque ñeenda oso quia tata cuasu nae, eicoi chõ aque re. Ae eiquesa ngasẽ nguia tat a cuasu nae, eicoi chõ aque no nde. Hue rĩ mbia tubiriã ndiqui nguiã ñquĩ. ¹⁴ Ñeenda nongue rui quiatu ngasẽ nguiã Dios je. Aque ñeenda quiarei echumumbi. Echumumbi chõ aque ñeenda iquesa re. Mbia

m̃i m̃i ño siqui nguiã aque ñeenda rui. Ûqui nguia ra Dios mingo bei.

Sã ira ae ia ae ae no

¹⁵ Ae Dios cheẽ senei ñooño nguia nae, aba mbĩrĩ irĩsa chõ ùqui nde. Ûqui ndei Dios quiato raã ñooño. Mbia mbĩrĩ irĩsa Dios rĩ. ¹⁶ Sã ira ae e a ae ae no. Uva a rã eã nda nyu a ia no. Ea ae eno nde. Higo a rã eã nda isio rashĩ a no. Ea ae eno nde. ¹⁷ Eĩ si chõ mbia no nde. Mbia turã nda siqui mbae turã ndese. Mbia icuã nda siqui mbae icuã ndese no. ¹⁸ Ira turã mose, ea abe ra eturã. Nyiabi aronea. Ira icuã mose, ea abe r a eicuã no. Ei rã si ra ea. ¹⁹ Ira mo ia turã eã mose, nyisia rae. Mendi rae. ²⁰ Dios cheẽ nenei neneisa chõ jẽicua rã. Dios cheẽ ndui si eriqui turã mose, Dios quiato chõ ùqui nde. Dios cheẽ ndui eã mose, Dios quiato eã ño ùqui no nde.

Mbia ra ique ja eã

²¹ “Sererecua” i rei mbia tubiriã nguiã seje ã. Ûqui nguia nda ique ja eã nguiã serécuaa. Ae siqui Seru Ibatenda cheẽ ndui nae, ùqui m̃i ño nda ique serécuaa. ²² Aque mose ra mbia ñee tuchi seje. “Jesús, ndecheẽ ngue urembuchecua checua tuchi quia mbia je resẽ. Aba checuayã ngue urejea jea tuchi quia mbia si nderĩ ndesẽ. Mbia mae sayã ngue uresaã saã tuchi quia nderĩ ndesẽ”, i tuch i rei ra mbia seje. ²³ Ûqui je ra acheẽ. “Co aico jẽicuayã mbeite co resẽ. Jẽso serecha. Mbae icuã aosa chõ jẽ nde”, ae ra ee.

Tuchua nyeremo

²⁴ Ae siqui serese, ae secheẽ mumbayã nguia nae, ùqui nguiarei eturã tuchi. Tuchua ãtã aosa rã ño ùqui nde. Sã eaquiato mo tuchua ao sita turã arõ no. ²⁵ Ama nyaaqui mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arõ nguia ngue

uchuchu a ao nguiã. Eĩ si chõ secheẽ mumbasa rã a nde. Tuchu a ãtã aosa rã si. ²⁶ Ae secheẽ mumbasa eandu mose nae, eaquiatuã na ño ùqui nde. Sã eaquiatuã mo uchuchuarã ao no. Aque quiarei ibi ribicoi tuchiã. Sita quiishĩ arõchi chõ uchuchua ao nguiã. ²⁷ Ama nyaaqui mose, amandi cuasu ee cote. Quiririã abe ichu ichu tuchua je. Aque quiarei iãcuã mbucoi asi mondo. Eĩ si chõ secheẽ mumbasa re, i que Jesús ra.

²⁸ Jesús que hui ucheẽ si cote ra. Mbia que nyuruira tuchi echeẽ andu ra. ²⁹ Ererecua rã ño ngue eriqui nguiã mbia mbaaquiato quiatu.

8

Jesús mbia leproso mbucherõ

¹ Jesús que nguichi ibi ibate si cote ra. Mbia cuabẽte que siqui erui ra. ² Emo ndasi que tu ee ra. Leproso, i que aque erasi je ra. Tu que ngoi nguiã ndese ñee Jesús je ra. —Sererecua, nde sembucherõse mose, sembucherõ se, i que ñee Jesús je ra. ³ Jesús que oco erese cote ra. —Echerõ cote, i que ee ra. Echeẽ mosebe que nyerõ nda. ⁴ Jesús que ñee ee ra. — ¡Erecheẽchĩ nda mbia mo je jẽ! Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherõ

⁵ Jesús que oso sucha tubiriã Capernaum cote ra. Soldado rerecu a mo ngue tu ñee ee ra. Capitán ngue ae ra. ⁶ —Sererecua, serimba rasite riqui sechuchua huee. Erasi tuchi. Umi umi sayã tuchi, i que capitán ñee Jesús je ra. ⁷ —Taso embucherõ, i que Jesús echeẽ mose ra. ⁸ Capitán ngue ñee Jesús je ra. —Seicuãte aico co, Jesús.

Sechuchua ra ereiquechĩ. Echeeño. Ndecheẽ achõ ño emondo serimba mbucherõ sacua. ⁹ Se abe sererecua riqui co. Echeẽ amumba aroneate quia co. Se abe soldados rerecua aico nguiã co no. Secheẽ abe emumbayãte quia co no. Eso, i mose, secheẽ mumbayãte no. Echu, i mose, secheẽ mumbayãte no. Se neẽ mose serimba je, secheẽ mumbayãte no. Ndequirãcuã na eãte raque se, i que capitán ñee Jesús je ra. ¹⁰ Echeẽ andu mose que Jesús nyuruirate ra. Ñee ngue nguesenda je ra. —Tacheẽ nyecua jêje. Capitán ndiqui seicua tuchite co. Seicua tuchite equia judíos mo si co. ¹¹ Tacheẽ nyecua jêje. Ae judíos eã emo jenda ja nae, ũquĩ tubiriã nda siqui Dios rese. Dios siqui mose mbi a rerecuarã. Ũquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ũquĩ. ¹² Dios quia ra judíos mombo itaicuee. Itondáruu. Huee ra nyeseo tuchi cote. Erasite ra huee cote, i que Jesús ñee judíos rĩĩ nda. ¹³ Jesús que ñee capitán je cote ra. —Eso chõ ndechuchúaa cote. Ereico seicuate co. Nyebe ndecheẽ amumba eã nguiã nderimba mbucherõ, i que Jesús ee ra. Jesús cheẽ mosebe que erimba nyerõ nda.

Jesús Pedro ninisi si mbucherõ

¹⁴ Jesús que oso Pedro chuchua cote ra. I que Pedro chari rasi u nyaara ee ra. Eracu tuchi que ra. ¹⁵ Jesús que oco ari o rese ra. Eracu que ti i cote ra. Ari que juã cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

¹⁶ Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco qui a nae, ũquĩ ndurucuaẽ tuchi Jesús je. Aba checuayã ngue

usẽ usẽ nguia mbia si Jesús cheẽ mose ra. Erasi chumumbara que embucherõ cherõ tuchi quia ra. ¹⁷ Ũquĩ mose que Isaías cheẽ io cote ra. Eĩ ño ngue Isaías embesa cose ra: “Dios rucucha que nandeicuã sirõ nandesĩ ra. Dios rucucha que nanderasi sirõ nandesĩ no nda”, i que Isaías embesa ra. Ũquĩ ngue io cote ra.

Jesús rui taico, i raque emo

¹⁸ Mbia cuabẽte que Jesús mamate ra. Nyebe Jesús ñee nguiã uchimbaaquiato je. —Nyao rã sobei, i rei que ee ra. ¹⁹ Aque mosete que embesasa mo ñee ee ra. —Taico beĩ nderese. Ndeso mose manguiti, se abe ra aso beĩ quia nderese, i rei que ñee Jesús je ra. ²⁰ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbeĩ re, i que Jesús ee ra. ²¹ Echimbaaquiato mo ngue ñee ee ra. —Sererecua, sã paba mano na. Aquere quia ra aico beĩ nderui cote, i rei que Jesús je ra. ²² Jesús que ñee ee ra. —Sã mbia ataque chõ nderu chati. Eico chõ serui nde, i que Jesús ñee ee ra.

Jesús quiririã icuã icuã mbutiba; ama ndebera abe

²³ Jesús que ua canoa ye cote ra. Uchimbaaquiato rese. ²⁴ Ama ndiit e re mose que quiririã icuã icuã ndu ee ra. I rebera que ique ique tuchi quia canoa ye ra. Jesús que uque oso quia canoa ye ra. ²⁵ Nyebe echimbaaquiato Jesús mumba nguiã. —Ürembaaquiatusa, echumumba. Ureraaro nã. Nandemanochĩ nda re, i que ñee Jesús je ra. ²⁶ Jesús que ñee uchimbaaquiato u je ra. —¿Mbaerã jësiquichete riqui re? ¿Seicuyãte equia ã nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe.

²⁷ Echimbaaquiatu que nyuruira tuchi mae Jesús quirācuā ndese ra. —Quiririā echeē mumbayā ñochĩ. Ama abe echeē mumbayā ñochĩ, i que ñee ñee nyue cote ra.

Jesús aba checuayā icuā jea

²⁸ Jesús que ngasē ama ndobei cote ra. Gadara, i que hue ibi je ra. Amei mo nyeremo ngue ngasē Jesús je ra. Mbia raaque tāsā si chō ngue ecuaē ngasē Jesús je ra. Aba checuayā icuā ño ngue siqui tuchi nguiā ũqui ñiangui re ra. Aba checuayā ño ũqui mbūcuā tuchi nguiā. Nyebe mbia mo hue rurubiā mbei nguiā. ²⁹ Ũqui ngue ñee asite cuaē Jesús je ra. —¿Mañi ere ra equia ure je re, Jesús? Dios rucucha chō nde re. ¿Urembasi jei sacua ño erechu aa re? i que ñee tuchi Jesús je ra. ³⁰ Chiasu socoi tubiriā ngue chi quiaru huee rurubi ra. ³¹ Nyebe aba checuayā icuā ñee jate nguiā Jesús je. —Nde urejea mose mbia si, chiasu chiangui re ureso rā, i que aba checuayā ñee Jesús je ra. ³² —Eno, i que Jesús ee ra. Nyebe aba checuayā usē ja nguiā amei ñia si cote. Chiasu chiangui re que echoi ja ra. Chiasu que uchā ja choi nyi-ichere ama nimia mbucu rĩ nda. Ama ndisha ye que echoi ja mano nda. ³³ Chiasu raarōsa mundite que ra. Mae mose erese. Nyoī que mbia mbiirandu jate chiasu rese ra. —Jesús que amei mbucherō nda. Aba checuayā ngue ejea esi ra, i que maesa erese ñee mbia атаque je ra. ³⁴ Nyebe hue jenda nyoī ja nguiā ñee Jesús je. —Eso rā urerecha urerecha si, i jate que hue such a jenda ñee Jesús je ra.

9

Jesús emi sayā mo mbucherō

¹ Jesús que ua canoa ye cote ra. Nyoī que sobei ra. Ngasē ngue uchuchúaa cote ra. ² Mbia

que erasi mo curucuaē quisa ye ee ra. Emi sayāte que ae ra. —Erurucuaēsa riqui seicua ũqui, i que Jesús ñee uchiangui re ra. Nyebe ñee nguiā emi sayā je. —Echimbia chō, Echo. Ndechisaā mbae icuā ambutiā nguia ndesi a, i que Jesús ñee umi sayā je ra. ³ Embesasa que ñee nyue ra. —Jesús riqui Dios ibatenda raā naa ñochĩ co, i que ñee nyue ra. ⁴ Jesús que ũqui ndua ndua icuate quia ra. Nyebe ñee nguiā ee cote. —¿Mbaerā jēingo ndua ndua icuā nde? ⁵ ¿Ma mbaranguiatuā eā jiri jēje re? ¿Mbia icuā mbutiā esi ere? ¿Mbia rasi mbucherō ere no? ¿Ma mbaranguiatuā eā jiri jēje re? ⁶ Dios rucucha rei se. Mbia chiao icuā mbutiā aquiatu chō se re. Sequirācuā tateacuquia jēje, i que Jesús ñee ee ra. Ñee ngue erasi je cote ra. —Ehuā na. Ndechuchua eso cote. Ndequisa abe erao, i que Jesús emi sayā je ra. ⁷ Emi sayā ngue juā asi oso ra. ⁸ Mbia que nyuruira ja u mae emi sayā ngata rese ra. Mbia que ñee turā ja Dios quirācuā nñi cot e ra.

—Serui bei eico, i Jesús Mateo je

⁹ Mateo, i que emo je ra. Ae que impuestos isi isi bei quia mbia rerecua mbaerā nda. Jesús que ngasē ee cote ra. Ngoi que huĩ plata isi isi impuestorā nda. —Serui bei eico, i que Jesús ñee ee ra. Ae Mateo juā oso nguiā erui. ¹⁰ Emo mose que Jesús nyoī quiaru erese ra. Impuestos isi isiquia ata que chi quiaru erese huee ra. Echimbaaquiatu abe rese. Mbia icuā mo abe que chi quiaru erese no nda. ¹¹ Fariseos que ñee icuāte Jesús chimbaaquiatu je ra. —¿Mbaerā Jesús riqui quiaru mbia icuāte rese re? i que ñee nda. ¹² Nyebe Jesús ñee nguiā ee. —Sā mbia rasiā ndiqui aba mbucherōsa requia eāte no. Sā erasi chō ndiqui erequia no. ¹³ ¿Ā embesa ji jēicuayāte re?

“Mbae mo jemee seje”, ae eã nguiã jêje co.

“Jêya eã ño mbia rese”, ae chõ nguiã jêje co,

i que embesa ji ra. Ûquĩ embesa ji jêicua jiri ae. “Jenyu seje”, aeã ngue u nguiã mbia turã je. Mbia i cuã je chõ ngue achu nguiã “jenyu seje” i, i que Jesús ñee ee ra.

Jesús chimbaaquiatsu hui ãte uchü si

¹⁴ Juan ñimbaaquiatsu que ngasẽ ñee Jesús je ra. —Ûre quia ureico nguiã hui hui urechiu si ã. Fariseos chimbaaquiatsu abe hui hui quia uchü si no. ¿Mbaerã ndechimbaaquiatsu riqui hui ãte uchü si ã nde? i que ñee Jesús je ra. ¹⁵ Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchü si aque mose no. Sã eru riqui mano emo mose no. Aque mose quiatsu ra equiato hui uchü si cote. ¹⁶ Sã emo ndiqui tiru yasu mii aroneate tiru ima sorei rese no. Eyasu ra nyaacua quiata eima si. Soro icoi tuchi ra cote. ¹⁷ Sã emo mbaeri rasi ramo nderecoquiatsu eã eriru ima ye no. Mbae ire ima ye ererecoquiatsu aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuaate ra cote. Mbaeri yasu quia nda equerecoquiatsu nguiã mbae ire yasu ye. Soroã sacua, i que Jesús ñee ee ra.

Jesús Jairo riirĩ mbucherõ; ari mo abe mbucherõ

¹⁸ Jesús cheẽ mose que judío rerecua mo ngasẽ ee ra. Jesús jii que ngoi ñee ee ra. —Qui seriirĩ si mano namote qui. Nyao rã erea. Ndeoco mose erese, quera si rae, i que ñee Jesús je ra. ¹⁹ Jesús que juã oso erese ra. Echimbaaquiuiatsu abe nyoĩ erese. ²⁰ Ari rasi mo abe que oso quia mbia ite rĩ nda. Eruqui nda uchẽ mbei quia ee ra. Doce

años nyee. Eruqui nda tibayã mbei ee ra. Ari que tu Jesús quite quitu eriichã nda. Jesús irao ai rese que oco cote ra. ²¹ —Seoco mose Jesús irao rese ra acherõ, i nda ra. ²² Jesús que uba ñee ari je ra. —Coche ñene, Echo. Seicuate que se ra. Nyebe arembucherõ nguiã, i que Jesús ñee ari je ra. Aque mose tuchi que eruqui tiba ee cote ra. ²³ Jesús que ngasẽ nyee judío rerecua chuchua ra. Mbia que nyeseo seo quia ãquẽ ndaaque rese ra. Mbia que irasei rasei eraaque tiquia nonde ra. ²⁴ Jesús que ñee ee ra. —¡Qui jê! Jêso ja itaicuee. Eriirĩ mano eã ño nguiã. Uque chõ ñene, i que ñee mbia je ra. Mbia que iquã iquã echeẽ mose ra. ²⁵ Jesús que mbia mondo ja chee itaicuee ra. Oso que i que eraaque rea cote ra. Eraaque o que eisi ra. Quera si que cote ra. Nyuruã ngue cote ra. ²⁶ Mbia hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

²⁷ Jesús que oso hue si cote ra. Mbia resayã nyeremo ngue nyoĩ erui ra. Ñee mombo mombo que Jesús je ra. —¡Jesús! ¡David rucucha! ¡Ndeyayã ño urerese jê! i que ñee Jesús je ra. ²⁸ Jesús que oso ique tuchúaa cote ra. Ae eresayã nyoĩ nguiã erurubi. Jesús que ñee ee ra. —¿Sequirãcuã jembucherõ arõte reĩ nguiã jêje re? i que Jesús ñee ee ra. —Ae, i que eresayã ñee ja ee ra. ²⁹ Ae Jesús oco nguiã eresa rese cote. —Seicua mose ra jaembucherõ, i que ra. ³⁰ Eresa que nyerõ ja ee cote ra. —Sã mbia jiranua serese, i tuchi rei que Jesús ñee ee ra. ³¹ Eresayã ngue Jesús cheẽ mumba tuchi ra. Nyoĩ que mbia mbiirandu tuchi Jesús rese hue rĩ ja ra.

Jesús echeẽ nguiã mbucherõ

³² Jesús so mose que mbia echeẽ nguiã mo curucuaẽ ee ra. Aba

checuayã icuã ngue siqui aque chianguí re ra. ³³ Jesús que aba checuayã icuã jea esi ra. Echeẽ ngũĩã ngue ñee turã cote ra. Nyebe mbia tubiriãte chi nguiã nyuruira mae erese. —Emo ngue ùqui saã eã mbeite quia aa Israel ra, i que nyuruira jate ra. ³⁴ Fariseos quiatu que ñee icuãte Jesús rĩi nda. — Satanás quirãcuã je chõ Jesús riqui nguiã aba checuayã jea jea mbia si co, i rei que fariseos ñee nda.

Jesús ia eã tuchi mbia tubiriã ndese

³⁵ Jesús que nyoí sucha mbuchesea sea ja ra. Mbía mbaaquiātu quiātu ja ra. Mbía chumunua nuásaa jate. Dios cheẽ ngue esenei senei tuchi quia ee ra. Mbía rasi chumumbara que embucherõ cherõ nguiã ra. ³⁶ Mbía rasi rasi tuchi que ee ra. Mbía ia eã tuchi que ee ra. Mbía quiachã je rã ngue ee ra. Sã oveja riqui quiachã jate eraarõ iriã no. Eĩ si chõ mbía nguiã Jesús je. Nyebe Jesús ia eã tuchi riqui nguiã erese. ³⁷ Jesús que ñee uchĩmbaaquiātu je ra. — Secheẽ andusa reã ndei etubiriã jiri. Secheẽ nenei neneisa quia rei co mĩ jiri. ³⁸ Jeñee nguiã Dios je. “Dios, ndecheẽ nenei neneisa mo emondo tuchi. Mbía mbiirandu randu sacuã”, jenyẽ chõ nguiã Dios je. Sã mbaecha mbía mo mondo mbae a ireĩ ishao shao equiche mose no, i que Jesús ñee ee ra.

10

Jesús mbia doce irabo uchĩmbaaquiātu

¹ Jesús que “jenyu” i uchĩmbaaquiātu doce je ra. Uquirãcuã ngue emee uchĩmbaaquiātu je cote ra. Aba checuayã icuã jea jea sacuã mbía si. Mbía rasi chumumbara mbucherõ cherõ sacuã abe no. ² A ño echĩmbaaquiātu ã nde:

Simón (Pedro, i abe que mbía quia ee ra.)

Andrés (Simón nongue rei Andrés.)

Jacobo (Zebedeo riirĩ ndei Jacobo.)

Juan (Jacobo nongue rei Juan.)

³ Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirĩ ndei Jacobo.)

Lebeo (Tadeo, i abe que ee ra.)

⁴ Simón el Cananista

Judas Iscariote (Aque que Jesús mondo mbía icuã je ra.)

Ūqui ja que Jesús irabo ra.

Jesús uchĩmbaaquiātu doce mondo ucheẽ nenei nenei sacuã

⁵ Jesús que ūqui mondo ja ucheẽ nenei nenei sacuã nda. Emonde nonde que ñee ee ra. —Judíos achõ jembaaquiātu quiātu quia. Jẽsochĩ nda judíos eã je. Samaria jenda chuchua abe ra jẽsochĩ. ⁶ Israel jenda chõ jembuchesea sea oso. Ovejas quiachã je rã ño Israel jenda re. ⁷ Jẽso mose, secheẽ jẽsenei senei mbei quia ee. “Mbía rerecuarã tuchi ra Dios cote”, jenyẽ oso secheẽ nenei nenei judíos je. ⁸ Mbía ire rasi jembucherõ cherõ nguiã. Mbía rasi chumumbara jembucherõ cherõ nguiã. Mbía raaque abe jembuquera quera quia. Aba checuayã icuã abe jẽjea jea quia mbía si. Sequirãcuã ngue amee ñooño jẽje. “Mbae mo jemee na seje eribishorõ”, ae eã tuchi se quia jẽje co. Nyebe jẽ abe mbae turã jẽsaã ñooño mbía je. “Mbae embu se”, iã mbía je. Mbae mo nda jendaochĩ icua jẽso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua. ¹⁰ Mbae riru mo abe ra jendaochĩ no. Jẽirao nongue abe ra jendaochĩ no. Jẽiyao nongue abe ra jendaochĩ no. Jenyitochoquia abe ra jendaochĩ. Ae je ra mbae turã jẽsaã saã nae, sã

ũquĩ ae riqui jembuquiaru quiaru turã mingo. ¹¹ Jengasẽ mose sucha tubiriã mo, mbia turã mo jẽtea huee. Aque chuchua mĩ ño jẽingo uque. Tuchua ra jembuchesea seate chĩ jẽingo mose huee. Ae ra jengue nyii nae, hue tuchua bei chõ jẽingo uque. ¹² Jẽique mose emo nyuchúaa, hue jenda je jeñee turã no. Saludar jenye turã ee no. ¹³ Hue jenda siqui turã mose, Dios quirãcuã jemee ee. Siqui turã eã mose, Dios quirãcuã jẽisibe esi. ¹⁴ Hue jenda jẽisi sereã nea mose, jẽhui chõ esi. Hue jenda jeñee andu sereã mose, jẽso chõ hue si. Jẽi tubi jembutomo tomo ee. ¹⁵ Tacheẽ nyecua jẽje. Ae ra jeñee isi sereã nae, ũquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ũquĩ nguia ra embasi tuchi Sodoma jenda si. Gomorra jenda abe si.

Mbia icuã icuã tuchi ra jẽje, i Jesús

¹⁶ A aico jemondo secheẽ nenei nenei sacuã mbia je a. Sã nyacua icuãte riqui oveja je no. Eĩ si ra mbia icuã icuãte jẽje. Oveja seteã na ño jẽingo. Jẽaracua chõ nguia jẽ! Sã mbei aracuate riqui no. Mbae icuã mo nda jẽsaãchĩ jẽ. Sã nyurushi riqui mbae icuã naa eã mbeite no. ¹⁷ Jã jẽ! Mbia icuã icuãte ra jẽje. Jembĩrĩ irĩ ndae. Jemee mee icuã nda mbia rerecua je. Jẽiruã nua nda mbia chumunuáśaa. ¹⁸ Mbia icuã icuãte ra jẽje seriĩ. Mbia rerecua je ra jenderao icuã. Eĩ jenye mbia rerecua mbiirandu randu seriĩ. Judíos eã abe mbiirandu randu seriĩ. ¹⁹ Jemee mose mbia rerecua je, pare pare jenyechĩ nda jẽ. “¿Manyae ra ũquĩ ñee ndibishorõ nde?” jenyechĩ nda pare pare i jẽ. Dios ae chõ nda jembucheẽ turã nuiã nguia mbia je aque mose.

²⁰ Jẽ ae ra jeñee eã. Espíritu Turã ae nda jembucheẽ nguia mbia je. ²¹ Jenongue ra jemondo chee mbia icuã je. Jẽiquia sacuã. Jendu abe ra jemondo chee mbia icuã je. Jendiĩrĩ abe ra jemondo chee mbia icuã je. Mbia icuã nda jemo iquia iquia chee. ²² Mbia ra jẽucuyã jate seriĩ. Ae ra siqui bei serese, ũquĩ nda Dios mingo bei. ²³ Mbia icuã icuã mose jẽje sucha moo, jẽso chõ sucha tubiriã nónguee. Tacheẽ nyecua jẽje. Achu jeibe ra se. Sucha Israel jenda jembuchesea sea ja eã mose chõ nda achu jei.

²⁴ Jengasu ra jẽsaã saãchĩ sesi jẽ. Se chõ jembaaquiatusa re. Embaquiatusa quia ecuasú jiri echimbaquiatusa si re. Ererecua quia ecuasú jiri erimba si re. ²⁵ Coche jẽingo nguia se rá si. Sã mbia icuã icuãte riqui seje no. Eĩ si ra eicuã icuã jẽje no. Sã mbia “Satanás” i ñee icuã seje no. Eĩ si ra ñee icuã icuã jẽje no. Serimba je no.

Dios riqui jendeaquiatusa bei co

²⁶ Jẽsiquiche quichechĩ nda ñee icuã icuã je si jẽ. Ae mbia saã nyecuyã cuayã nguia nae, ũquĩ nda nyecua ja cote. ũquĩ nda mbia icua ja cote. ²⁷ Ae rĩ aico ñee nyecuyã cuayã jẽje nae, ũquĩ jẽsenei senei turã mbuchecua mbia je cote. Ae asenei senei nguia jẽisaa nae, ũquĩ jẽsenei senei turã mbuchecua mbia je cote. ²⁸ Ae “taiquia” i quia jeniĩ nae, jũquĩ si ra jẽsiquichechĩ jẽ! Ae aba mombo seriĩte quia tata cuasu nae, aque si quiatusa jẽsiquiche. Aque si quiatusa jẽsiquiche tuchi jẽ. ²⁹ Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareia nguireĩ mo si. Nguireĩ mo ngoi mose ibii, Dios riqui eicua jate a. ³⁰ Dios riqui jẽ mĩ mĩ icua jate co. Jẽa mĩ mĩ abe eicua jate quia co. ³¹ Jẽsiquichechĩ nda jẽ. Dios quiatusa

quiteã tuchi nguiã jendese nguireĩ mo si.

Jesús quiato chõ se re, jenyê checua chõ nguia mbia je

³² “Jesucristo quiato chõ se re”, ae i quia mbia je nae, ùquĩ nĩi nda acheẽ turã se abe. “Sequiato chõ ã nde”, ae ra Paba Ibatenda je. ³³ “Jesucristo quiato chõ se re”, ae i ãte quia mbia je nae, ùquĩ nĩi nda acheẽ turã eã se abe. “Sequiato eã ño ùquĩ nde”, ae ra Paba Ibatenda je.

Achu chõ ngue mbia mbuchao chao nyesi resẽ, i Jesús

³⁴ ¿Achu reĩ mbia mbuturã turã sacua serimba je jẽje re? Tei. Achu chõ ngue mbia mbuchao chao nyesi resẽ. Mbua icuã icuã nda uchue seriĩ. Emo emo nda siqui serui. Emo emo nda siqui icuã icuãte ee. ³⁵ Emo nda eicuãte ngu je seriĩ. Cuña mo nda eicuãte usi je no. Acuanĩ mo nda eicuãte uchari je seriĩ no. ³⁶ Tuchua jenda ra nyao nyao nyesi. Emo nda siqui serese serimbarã. Eataque ra nyao nyao esi. ³⁷ Ae nyesequa tuchi quia ngu rese sesi nae, ùquĩ nda serimbarã eã. Ae nyesequa tuchi quia usi rese sesi nae, ùquĩ nda serimbarã eã no. Ae nyesequa tuchi quia nguiĩ ndese sesi nae, ùquĩ abe ra serimbarã eã no. ³⁸ Ae ra siquiã serui, ùquĩ nda serimbarã eã. Æe mano sereãte seriĩ, ùquĩ nda serimbarã eã. ³⁹ Sã mbia nduate quia serese. Ae nduate quia nyiese nae, ùquĩ nda nyoĩ eãte ibate. Ae ndua eãte quia nyiese nae, ùquĩ nguia ra nyoĩ ibate.

Dios ra mbae turã mondo mbia turã je

⁴⁰ Ae ra eturã ndiqui jẽje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguiã. ⁴¹ Ae eturã ndiqui Dios cheẽ mbuchecuasa je nae, Dios ra mbae turã mondo

ee. Sã mbae turã mee ucheẽ mbuchecuasa je no. Ae eturã ndiqui echiã mbuquishĩ ji je nae, ùquĩ je abe ra Dios mbae turã mondo no. ⁴² Tacheẽ nyecua jẽje. Emo sechimbaaquiato isei mbiu turã mose seriĩ, mbae turã abe ra Dios mondo aque je no, i que Jesús ñee uchimbaaquiato je ra.

11

Juan el Bautista mbia mondo ñee Jesús je

¹ Jesús que hui ñee uchimbaaquiato doce je cote ra. Aquere que esi Dios cheẽ nenei nenei hue rurubinda je cote ra.

² Juan ngue chĩ cárcel nda. Hue eñi mose que jirandu Cristo chisaã ndese ra. Uchimbaaquiato nyeremo ngue emondo Jesús rea ra. Ñee sacua ee. ³ —Jẽso ñee Jesús je. “‘Cristo ra tu’, i beite equia ã nae, ¿ae nde re? ¿Cristo ra uresaarõ arõ mbei quia re?” jenyê oso Jesús je, i que Juan uchimbaaquiato mondo erea ra. ⁴ Jesús que ñee Juan nimba je ra. —Ae rese jema nae, ùquĩ jẽsenei oso Juan je. Ae jeñandu nae, ùquĩ abe no. ⁵ Eĩ jenyê chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheẽ turã ngue esenei senei tuchi quia mbaecha reã je ra”, jenyê oso Juan mbiirandu. ⁶ Emo hui eã mbei mose sesi, aque ia tuchi ra siqui cote, i que Jesús ucheẽ mondo Juan je ra.

⁷ Juan ñimondo que nyebi nyoĩ Juan ndea cote ra. Jesús que ñee mbia ja je Juan nĩi cote ra. —¿Mbae rese mae jẽso turúquiaa re? ¿Quiririã idioi ichu ichu rese chõ jẽso mae nde? Quiririã ndese mae eã ngue jẽso resẽ. ⁸ ¿Emo irao turã ndese jẽso mae nde? Ùquĩ ndese eã ngue jẽso mae ndesẽ. Eirao turã siquiã nguiã turuquia ñi. Ae siqui quia mbia rerecua chuchua

nae, ũquí nguia eirao turã ndiqui nguia. ⁹ Juan ndese mae ño ngue jêso turúquiaa resê. Dios cheê nenei neneisa tuchi chõ ae mbia mo si re. Ae chõ mbia mingoquiato quiatu nguia se ñee sacua mbia je. ¹⁰ Sã embesa ji riqui ñee no:

Secheê nderaosa tamondo nde-nonde.

Ae ra mbia mingoquiato ndeje, nde ñee sacua ee,

i que embesa ji ñee nda. Juan nã ño embesa ji riqui nguia ñee. Nyebe Juan ndu nguia senonde. ¹¹ Tacheê nyecua jêje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ũquí nguia ra i tuchi Juan si cote. ¹² Juan Dios cheê nenei nenei namo mosenda bei chõ mbia riqui nguia ngã ngã Dios cheê andu ã. Mbia bite Dios siqui mose mbia rerecuarã. ¹³ Juan tu nonde chõ embesa ji riqui nguia ñee j a serĩ. “Dios rucucha ra tu emo mose”, i serĩ. Sechu eã mose. Juan nane ngue “co eru quia co” i ñee nda. ¹⁴ Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan nã ño eriqui nguia ñee. ¹⁵ Jêisa mose, i secheê jeñandu turã na!

¹⁶ Mbia namonda siqui turã eãte quia aba cheê ndui ã. Mbia riirĩ na ño eriqui nguia ã. Sã mbia riirĩ ndiqui ñumbusarei sarei no. ¹⁷ Sã eriqui ñee ñee nyue no. “Flauta que ambucheê ñee ndei jêje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue ambucheê ñee ndei jêje resê. ¿Mbaerã jêyate erese re?” sã i chõ mbia riirĩ nyue no. ũquí na si chõ mbia riqui nguia aba cheê mumba ã. ¹⁸ Juan el Bautista que tu rei mbia je ra. Mbia que eisi turã e a nda. “Co eriqui quiaru sereãte nanderese co. Co eriqui mbae mbei sereãte nanderese co”, i chõ mbia quia ee ã.

“Aba checuayã ndesenda”, i chõchĩ equia ee ã. ¹⁹ Aquere que achu se abe ra. Aquiaru rei nguia jendese co. Mbae abe ambei rei nguia jendese co. Se abe que seisi turãya nda. “Quiaru tuchi je”, i chõchĩ seje. “Mbae mbeisa”, i abe que seje no nda. “Mbia icua quiato chõ ñene”, i chõ ngue seje no nda. Ae earacuate nae, Dios aracua abe ra eicua.

Jesús ia eã mbia sucha tubirĩa jenda rese

²⁰ Ae mbia je Jesús uquiracua ndeacuquia cuquia tuchi nae, ũquí ngue Jesús isi eã mbei ra. Nyebe Jesús riqui nguia ñee asi asi mbia hue jenda je. ²¹ —Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbia mae sayã ngue asaã saã jêje nae, ũquí naa mose Sidón jenda je, eĩ nda Sidón jenda huiicua secha rei. Eĩ nda Tiro jenda abe huiicua secha rei. Eĩ nda eya eãte rei huiicua ndese. ²² Jê nguia jêicua jêsecha sereãte rei. Nyebe ra Dios jembasi mbasi tuchi ũquí si quiatu. Dios mbia icua mbasi mbasi mose. ²³ Jêcuasu jêsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. Mbia mae sayã ngue asaã saã jêje nae, ũquí naa mose Sodoma jenda je, eĩ nda Sodoma jenda huiicua secha rei. Eĩ nda Dios hue sucha cuasu mbutiã eã ndei. ²⁴ Jê nguia jêicua jêsecha sereãte rei. Nyebe ra Dios jembasi mbasi tuchi Sodoma jenda si. Dios mbia icua mbasi mbasi mose, i que Jesús ñee nda.

Jesús aba quenea mboseĩ

²⁵ Jesús que ñee Dios je cote ra. — Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheê ngue erembuchecu a eã mbia aquiato je ra. Mbia riirĩ naanguia je chõ ngue ndecheê

erembuchecua nguiã. ²⁶ Ūquĩ ño ngue eturã ndeje ra, Paba, i que Jesús ra. ²⁷ —Seru que mbae mondo ja seje ra. Paba mii ño seicua tuchi nguiã. Paba riirĩ mii tuchi chõ se re. Se mii ño Paba aicua tuchi nguiã no. Ae je ra Paba ateacuquia nae, ũquĩ mii ño nda Paba icua tuchi nguiã serese. ²⁸ Jenguenea mose, jenyu chõ seje. Jenguenea tamboseĩ na jěsi. Taembia mingo. ²⁹ Seseteã ño aico nguiã se. Aico mingue chõ nguiã se co. Jeñimbaaquiātu jiri serĩ. Jeñimbucha chõ serese. Eĩ jenye mose ra jeñia pare pare i eã cote. Jěya bei ra jěingo cote. ³⁰ Ae siqui serimbarã nae, ũquĩ iate riqui ã. Secheẽ mbaranguiatuã eãte aba je, i que Jesús ñee nda.

12

Jesús chimbaaquiātu mbae a ishao shao sábadō mose

¹ Sábado mose que Jesús si quia mbiaco ite ite rĩ emo mose ra. Echimbaaquiātu riãcuãte que eriqui ra. Nyebe que quiata a ucua mii mii nyoĩ quia ecuã mose ra. Equiti quitire oo je que echoĩ quia eachãaña cote ra. ² Fariseos mo ngue ñee ee ra. —¿Mbaerã ndechimbaaquiātu riqui mbae ishao shao sábadō mose re? Co mose chõ mbia riqui uquenea ucua resẽ, i que fariseos ñee Jesús je ra. ³ Jesús que ñee ee ra. —¿Embesa ji rese jemaẽ eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ⁴ David que ique Dios chuchúaa aque mose ra. Mbichae Dios chuchua jenda que eu ra. Mee mee ngue nguesenda abe je ra. Eriãcuãte quiātu ngue re. Sacerdote achõ mbaerã ndaque mbichae. ⁵ ¿Moisés chimbesa rese jemaẽ áte sacerdote rĩ nde? Sábado mose que quieĩ quieĩ rei Dios chuchua ra. “Dios cheẽ mumbasa”,

i áte quia mbia nguiã ñee ee. ⁶ Tacheẽ nyecua jěje. Secheẽ nguia i tuchi jiri nguiã Dios chuchua si co. ⁷ Co embesa ji jěicuayãte quia ã. “Sebite jěya eã jěingo mose mbia rese. Sebiãte ofrenda jemee ñooño mose”, i Dios quia co. Jěingo ũquĩ icuayãte ã. Eĩ nda jeñee icuã eãte rei mbia turã je. ⁸ Sábado rerecua bei chõ se re, i que Jesús ñee fariseos je ra.

Jesús emo o tomei mbucherõ

⁹ Jesús que oso mbia chumunuásaa cote ra. ¹⁰ Huee que eo tomei mo ndiqui ee ra. Mbia que Jesús mbucheẽ icuã sete ra. Nyebe ñee nguiã ee. —¿Eicuãte erasi mbucherõ sábadō mose re? ¿I ere? Echeẽ ure je jě, i que mbia ñee Jesús je ra. ¹¹ Jesús que ñee ee ra. —Sã jenimba oveja mo ndiqui jaã no. Ngoĩ oso ibicua mo ye no. ¿Sábado mose ra jenosẽ ibicua si re? Ae. Jenosẽ jei rae. Sábado mose raque. ¹² Dios queteamba tuchi chõ mbia riqui nguiã oveja si ã. Coche nandeico nguiã mbae turã naa naa sábadō mose, i que Jesús ñee mbia je ra. ¹³ Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ¹⁴ Nyebe fariseos paama i nguiã Jesús je. Mbia mbucherõ mose sábadō mose. —¿Mañi nande ra Jesús je re? Nandeiquia rei ra reae, i tuchi que eu ñee nyue ra.

Isaías chimbesa ique Jesús rĩ

¹⁵ Jesús que jirandu ũquĩ ñee ndese ra. Nyebe esi nguiã hue si. Mbia tubiriã ngue nyoĩ erui ra. Jesús que mbia rasi mbucherõ cherõ ja quia ra. ¹⁶ —¿Mbía ra jembiiranduchĩ serese jẽ! i que Jesús ñee ee ra. ¹⁷ Aque mose que Isaías chimbesa ique cote ra. Eĩ ngue Isaías embesa mii Jesús rĩ nda: ¹⁸ Serimba chõ co re. Co que airabo ra.

Sechesequa chõ ae re. Seyate aico erese co.

Espíritu Turã tamondo tuchi ee.

Ae ra secheẽ turã senei senei ja mbia je.

¹⁹ Eicuã icuã eã nda emo je. Ñee icuã eã ndae. Ucuasu ra esaã saã eã mbia je.

²⁰ Siqui turãte ra equia equirãcuã nea je.

Siqui turãte ra equia eaquiata je no.

Mbia ra siqui turã nyee erui erere-cuarã.

²¹ Mbia ja ra ndua turã mbei erese cote, i que Isaías embesa cose ra. Ñquĩ ngue ique cote ra.

Aba checuayã quirãcuã Jesús quereco co, i raque mbia

²² Mbia que eresayã mo curucuaẽ Jesús je ra. Echeẽ aquiataũte abe que ra. Aba checuayã icuã nguiatu ngue siqui nguiã echiangui re. Jesús que embucherõ nda. Nyebe mae turã nguiã cote. Ñee turã abe cote no.

²³ Mbia que nyuruira ja mae erese ra. — David rucucha chõ Jesús riqui re, i chõ ngue mbia quia ndua ndua ra. ²⁴ Fariseos que echandu ja ra. Nyebe ñee icuã icuã nguiã Jesús je. — Ab a checuayã icuã nderecua tuchi chõ Satanás nde. Satanás quirãcuã je chõ Jesús riqui nguiã aba checuayã icuã jea jea mbia si co, i rei que fariseos ñee icuã Jesús je ra. ²⁵ Jesús que ñquĩ ndua ndua icuate ra. Nyebe ñee nguiã ee. — Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno.

²⁶ ¿Mañi nda Satanás aba checuayã jea mbia si re? Erimba chõ nyeresẽ. Satanás icuã icuã mose nyue, equirãcuã nda ua no. ²⁷ “Satanás quirãcuã je chõ Jesús riqui nguiã aba checuayã jea jea mbia si”, jenyẽ chõchĩ nguia seje ã. ¿Aba uquirãcuã mee jenimba je jẽ nde? Aba checuayã icuã jea nonde re. ¿Satanás uquirãcuã mee jenimba

je serese re? ²⁸ Dios quirãcuã je quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenyẽ eã ñochĩ equia ã. ²⁹ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ³⁰ Ae siqui ãte quia serese nae, eicuã ño ñquĩ ndiqui nguiã seje. Ae secheẽ senei senei eãte quia mbia je nae, ñquĩ icuã ño eriqui nguiã seje. ³¹ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espiritu Turã ñii, ñquĩ icuã nguiatu ra Dios mbutiã eã mbei esi. ³² Emo ñee icuã mose serĩ, Dios echeẽ icuã mbutiã arõte. Emo ñee icuã mose Espiritu Turã ñii, ñquĩ icuã nguia ra Dios mbutiã eã mbei. Mbae ua ja mose chee ra Dios ñquĩ ñee icuã mbutiã eã mbei.

Sã ira ae ea ae ae no

³³ Ira turã mose, ea abe ra eturã no. Ira icuã mose, ea abe ra eicuã no. Mbia ira icua mose, ea abe ra eicua. Nyiabiã ndae. Sã ira ae ea ae ae no. ³⁴ Mbei rã ño jẽingo nguiã. Jẽicuã ño jẽingo nguiã. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ñquĩ ñii sí ra ñee. ³⁵ Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nguia ñee icuã nguiã. Echiangui renda quia eicuãte riqui nguiã. Nyebe eriqui nguiã ñee icuã. ³⁶ Tacheẽ nyecua jẽje. Emo ñee ñooño mose, Dios ra ñee asite aque je. Dios mbia icuã ndea rea mose. ³⁷ Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui

renda icuã ño ñene. Nyebe ra Dios ñee asi ñquĩ je, i que Jesús ñee nda.

Mbia mae sayã esaã ure je, i bei mbia Jesús je

³⁸ Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra. ³⁹ Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenyẽ beite equia ã. Mbia mae sayã mui ño nda asaã jẽje. Jonás na si. ⁴⁰ Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie. ⁴¹ Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huĩcuã ndecha Jonás ñee mose ee no. Aico raque ñee jẽje co mosenda je co. Jẽ secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose. ⁴² La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu ishõ si tuchi Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembasi tuchi mbia icuã ndea rea mose.

Aba checuayã icuã nyebi u mbia chianguĩ re

⁴³ Aba checuayã icuã usẽ mose emo ñia si, ngata bei chõ nguia. “¿Mangue ra sequenea aucua que re?” i chõ nguia. Uquenea ucua sacua mo etea eãte. ⁴⁴ “Tasobe rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteã eãte que ee ra. Tuchua tii ji raãte que ee ra. ⁴⁵ Aba checuayã icuã ngue nguesenda siete queru cote ra. Ique

ja que echoi aque chianguĩ re cote ra. Ae chianguĩ re aba checuayã icuã siete riqui nae, aque icuã i i tuchi que eriqui cote ra. Aba checuayã mui ngue siqui eye nyii ra. Etubiriãte cote. Aque icuã tuchi cote nyii si, i que Jesús mbia je ra.

Jesús nongue ngae erea usi resẽ

⁴⁶ Jesús ñee mbei mose que esi ngaẽ ndei ee huee ra. Jesús nongue ja rese. Chichõ ja chõ ngue taicuee ra. Ñee serete que ee ra. ⁴⁷ —Hue ndesi riqui nderequia taicuee huee. Ndenongue rese, i que emo Jesús mbiirandu ra. ⁴⁸ Jesús que ñee umbiirandusa je ra. —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús ñee nda. ⁴⁹ Jesús que o mee uchimbaaquiatu cuti ra. — ã je chõ aico nguia “taĩ” i. ã je chõ aico nguia “senongue” i no. ⁵⁰ Ae Paba Ibatenda cheẽ mumbayã nguia nae, ñquĩ je chõ aico nguia “senongue” i. Ñquĩ je chõ aico nguia “taĩ” i no, i que Jesús ñee ee ra.

13

Emo mbae eĩ mombiquia mbiquia

¹ Aque mose sí que Jesús si usẽ tuchia si ra. Tuchua si que esi ngoi ama ndish a nimíaa nda. ² Mbia que ngaẽ ngaẽ ja quia Jesús rea ra. Nyebe Jesús ua oso nguia ngoi canoa ye. Mbia quiatu que chichõ ama nimíaa ndese ra. ³ Jesús que embaaquiatu quiatu tuchi quia ra. Ejemplos que esaã saã tuchi ee ra. —Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguia. ⁷ Sã emo ndiqui uqui uqui nyu réndaa

no. Sã nyu abe riqui suri erese no. Nyu ruri que echati asi u eriquisã nda. ⁸ Sã emo ndiqui uqui uqui ibi túraã no. Ûquí nguiatu que ia turã nda. Sã emo ia cien no. Sã emo ia sesenta no. Sã emo ia treinta no. ⁹ Jêisa mose, ¡secheẽ jeñandu turã na!

Dios riqui ucheẽ mbiasa jaaja jêje co, i uchimbaaquiatu je

¹⁰ Jesús chimbbaaquiatu que ñee nyecuayã Jesús ísaa ra. —¿Mbaerã ejemplos achõ eresenei senei mbia je re? i que echimbbaaquiatu ñee ee ra. ¹¹ Jesús que ñee ee ra. —Mbía rerecua tuchi quiarei Ibatenda. Ae riqui nguiã ucheẽ mbiasa asa ja jêje co. Mbía ataque quia siqui sereã erese co. Mbía ataque je quia eriqui nguiã ucheẽ mbiasa eã jiri. ¹² Emo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi. ¹³ Nyebe aico nguiã ejemplos achõ nenei nenei mbia je co. Eanduchõ sacua. Eicua turã ndocoĩ. ¹⁴ Mbía eanduchõ mose que Isaías chimbasa ¡que cote ra:

Mbía ra secheẽ ñandu raque.

Ícuayã nguiatu rae.

¹⁵ Eãquí átãte riqui ã.

Secheẽ andu sereãte equia ã.

Mae sereãte equia sechiao rese ã.

Ndua eã mbei equia serese ã.

Nyebe ra ambitirõ eã mbei, i que Dios cheẽ Isaías chimbasa rese ra. ¹⁶ Jẽ nguiatu Dios cheẽ jeñandu turãte nguiã ã. Jẽ nguiatu jemaeserete nguiã Dios chiao rese ã. Nyebe jêyate jẽingo nguiã ã. ¹⁷ Tacheẽ nyecua jêje. Ae jeñandu quia secheẽ ã nae, Dios cheẽ mbuchecua ñiinda ã ñandu serete raque. Mbía turã ñiinda abe ã andu serete raque. Ñandu eã mbeite equia ã. Jẽ ae chõ jẽingo nguiã eandu ã cote. Jẽ ae je chõ echecua riqui nguiã.

Jesús ucheẽ mbiasa uchimbbaaquiatu je mbae eĩ ñii

¹⁸ Secheẽ tambiasa jêje cote. Mbae eĩ mombiquia mbiquia ji riĩ.

¹⁹ Ae uqui uqui ñeenda rui nae, Dios cheẽ andu chooñosa rã ño ñquí nde. Ícua eãte quia ñene. Nyebe diablo ru nguiã Dios cheẽ ndirõ echiangui si. ²⁰ Ae uqui uqui sita arõ nae, mbía mo na ño ñquí no nde. Dios cheẽ andu mose, isi turã ndaque. Eyate raque erese. ²¹ Mbía ícuã ícuã mose ee Dios cheẽ ñii, hui jei chõ nguiã esi. Mbae rao eã naanguia chõ ñquí nde. ²² Ae uqui uqui nyu réndaa nae, mbía mo na ño ñquí no nde. Dios cheẽ andu turã ndaque. Siqui bei eã ño nguiã erui. Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²³ Ae uqui uqui ibi túraã nae, mbía mo na ño ñquí no nde. Ûquí nguiatu Dios cheẽ ñandu turã nguiã. Ícua ícua turã ño nguiã. Nyebe eriqui bei nguiã erese. Ía ia bei raanguia cote. Emo emo ia cien. Emo ia sesenta no. Emo ia treinta no, i que Jesús ucheẽ mbiasa ñee nda.

Mbae ícuã suri trigo turã ndese

²⁴ Jesús que ejemplo nongue senei ee ra. —Sã emo trigo eĩ mombiquia mbiquia úcoo no. Ûquí na ño Dios rimba riqui nguiã ã. ²⁵ Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no. ²⁶ Trigo eĩ ngue obo cote ra. Nyu abe que suri erese ra. ²⁷ Nyebe erimba ñee nguiã echa je. “Trigo eĩ achõ eremombiquia mbiquia reĩ nguiã seje. ¿Mbaerã nyu abe riqui suri suri erese re?” i que ererecua je ra. ²⁸ Ererecua que ñee ee ra. “Seucuayãsa chõ ñquí nde. Nyu eĩ mombiquia mbiquia chõchĩ trigo eĩ mumbara mbara”, i que ererecua

ñee nda. —¿Ureso ra eriqui riqui re? i rei que erimba ñee nguerecua je ra. ²⁹ Ererecua que ñee nda. “Tei. Nyu riqui riqui mose ra trigo abe riqui riquichĩ nde. ³⁰ Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra esei cote. Aquere quia ra trigo a ishao shao erereco quiatu sacua sechuchua cote”, i que echa ñee nda, i que Jesús ñee nda.

Mbae eĩ na ño Dios rimba re

³¹ Jesús que ejemplo mo senei mbia je ra. —Mbae eĩ na ño Dios rimba re. Sã mbia mostaza eĩ tiquia no. ³² Eñetẽ tuchite raque mbae eĩ mo si. Suri oso quia cote. Ecuasu tuchite chee cote. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Uquĩ mĩ ndaque nyii. Nimbeta tuchi cote. Mbae eĩ na, i que Jesús ñee nda.

Levadura rã ño Dios rimba re

³³ Jesús que ejemplo mo senei mbia je ra. —Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, i que Jesús ñee nda.

Jesús ejemplos senei tuchi mbia je

³⁴ Eĩ ño ngue Jesús quia mbia tubiriã mbaaquiatsu quiatu ejemplos je ra. Ejemplos achõ ngue esenei senei mbia mbaaquiatsu sacua nda. ³⁵ Nyebe Dios cheẽ mbuchecua chimbesa ique cote. Eĩ ño echimbese re: Ejemplos je mbia tambaquiatsu quiatu.

Ae mbia icuayã mbeite quia nae, uquĩ tambuchecua mbia je, i que embesa ji ra, i que Jesús ñee nda.

Jesús ejemplo mbuchecua nyu eĩ nĩ

³⁶ Jesús que mbia mondo ja cote ra. Aquere que esi ique tuchu a mondo. Echimbbaquiatsu que ecurebite ñee ee ra. —Ae ejemplo esenei mbia je nyu eĩ nĩ nae, uquĩ embiasa jiri ure je, i que ñee ee ra.

³⁷ Jesús que ñee ee ra. —Ae trigo eĩ mombiquia mbiquia nae, se rã ño ae re. ³⁸ Ae ibii emombiquia mbiquia nae, mbia ja rã ño uquĩ ibi re. Trigo eĩ turã na ño Dios quiato re. Nyu eĩ icuã na ño diablo quiato no nde. ³⁹ Ae mbae eĩ icuã mombiquia mbiquia nae, aba checuayã nderecua rã ño uquĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re. ⁴⁰ Sã mbia riqui nyu mombo mombo tátaa nae, eĩ si ra Dios uquiatoã mombo tátaa ibi ua ja mose no. ⁴¹ Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra uquĩ sirõ ja. ⁴² Serimba ra uquĩ mombo mondo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁴³ Ae Dios mbuturã nae, uquĩ nininya tuchi ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴ Dios cheẽ nguiri nĩ ndei eturã tuchi mbae ja si. Eturã tuchi tesoro si no. Sã amei mo tesoro ati ji rea ibii no. Tesoro turã tuchi que ee ra. Amei ia tuchi que erea mose ra. Sã amei vender i ja umbae je no. Aque ibi isi sacua. Tesoro mĩ ndese ndua.

Dios cheẽ ndei perla turã na

⁴⁵ Dios cheẽ nguiri nĩ ndei eturã tuchi mbae ja si. Sã comerciante mo perlas turã ndequia requia no. ⁴⁶ Perla turã tuchite mo ndea mose, aque mĩ ndese chõ eriqui nguia ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

47 Sira mbua mbua ji rã ño Dios rimba re. Sã emo tarafa mondo ii no. Sira chumumbarate que em-bua ra. 48 Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacuã. 49 Eĩ si ra Dios mbae ua ja mose. Dios ra ángeles mbu mbia icuã mombo sacuã mbia turã si. 50 Eicuã nda emombo tata cuásuu. Nyeseo seo tuchi ra tátaa. Huee ra urei quiti quiti tuchi. 51 ¿Secheẽ jẽicuate rei quia ã nde? i que Jesús ñee mbia je ra. —Ae, i que ñee Jesús je ra. 52 Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

53 Jesús que ñquĩ ejemplos senei ja mbia je ra. Hue si que esi cote ra. 54 Oso que ngasẽ nguecua Nazaret cote ra. Oso que mbia mbaaquiatu judíos chumunuásaa ra. Nyebe mbia nyuruira tuchi nguiã ñee nyue. —¿Mangue eriqui ñimbaaquiatu tuchite re? Nandemae sayã esaã saã tuchi chĩ nguia re. 55 Ira mbitirõ tirõsa ririĩ ño ndaque. María abe ririĩ ño ndaque. José abe no. Simón abe no. Judas abe no. 56 Ñ echari abe riqui ja raque nanderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra. 57 Nyebe mbia hue jenda riqui Jesús isiteã nde. Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Nguecua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguecua jenda je ra. 58 Hue jenda mbia que Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguiã ee huee.

14

Mbia Juan el Bautista iquia

1 Mbia que jirandu ja Jesús rese cote ra. Herodes abe que jirandu erese ra. Ererecua que ae ra. 2 Juan el Bautista Jesús riqui rei ee reaẽ. Ae que ñee ngũimba je Jesús rĩ nda. —Sechĩquia quera si chõchĩ. Juan el Bautista quera si chõchĩ. Nyebe eriqui nguiã mbia mae sayã naa naa co, i que Herodes ñee Jesús rĩ nda. 3-4 Herodes que Juan isi icuã nyii ra. Nyucua que mondo tarõ nda. Paama i nda Juan je ra. —iNde ndenongue ninisi erereco aroneate jẽ! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. 5 —Juan taiquia, i rei que Herodes ñee nda. Mbia ataque quiarei siqui tuchi Juan ndese. Dios cheẽ mbuchecuasa, i chõ mbia nguiã Juan je. Nyebe Herodes siquiche jiri nguiã Juan iquiayã aque mose. 6 Herodes mbae cumpleaños mose, Herodías ririĩ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra. 7 —¿Mbae ra amee ndeje re? Echeẽ ño seje. “Sebite co” nde i mose, aque tamondo ndeje. Acheẽ ñooño eã ño nguiã ndeje a, i que Herodes ñee nyucuaaque je ra. 8 Esi quia ñee ñee nguia nyucuaaque je nyii reaẽ. Nyebe nyucuaaque ñee nguiã Herodes je. —Juan el Bautista ñquĩ emee na seje mbia chiu riru ye, i que nyucuaaque ñee ererecua Herodes je ra. 9 Ererecua chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. Ñ seandu ja chõchĩ. Nyebe ra secheẽ ambuchebi eã ee, i que ererecua uchiangui re ra. —Juan ñquĩ emee ee, i que ngũimb a je

cote ra. ¹⁰—Juan ãquĩ jendoso oso cárcel. Jemondo nyucuaaque je, i que ra. ¹¹—Juan ãquĩ ngue ecucuaaẽ mbia chiũ riru ye cote ra. Mee ngue nyucuaaque je cote ra. Nyucuaaque que emee usi je cote ra. ¹²Juan ñimbbaaquiatsu que ngaẽ Juan ndaaque rea ra. Nyati que suruchoi ra. Nyoĩ que Jesús mbiirandu erese cote ra.

Jesús mbichae tubiriã saã mbichae miije

¹³Jesús jirandu mose Juan ndese que esi turúquiaa ra. Ama ndui que esi canoa ye ra. Mbiam que jirandu randu erese ra. Nyebe nyoĩ ja nguiã eruĩ ibi rĩ. Sucha ja ja jenda. ¹⁴Jesús que usẽ canoa si cote ra. Mbiam tubiriã ndese que mae nda. Eya eã tuchite que erese ra. Erasi que embucherõ cherõ nda. ¹⁵Tenda nyeseco mose que echimbbaaquiatsu ñee ndei ee ra. —Mbae ãte a turúquiaa. Tenda abe nyesecote. Mbiam emondo rã sucha tubiriã nia. Sã echoi bei uchiurã isi, i rei que echimbbaaquiatsu ñee Jesús je ra. ¹⁶—Sã echoi eã. Jeño mbae jemondo ee echiurã, i que Jesús ñee ee ra. ¹⁷—Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbbaaquiatsu ñee Jesús je ra. ¹⁸—Jembu rã seje, i que Jesús ra. ¹⁹Ñee ngue mbiam tubiriã je cote ra. —Jengoi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote ra. Mee ngue uchimbbaaquiatsu je ra. Echimbbaaquiatsu que emee mee mbiam ja je cote ra. ²⁰Mbiam que embuquiaru ja tuchi cote ra. Miãtã tuchi que ra. Mbiam huia tubiriã ngue cote ra. Sira rire. Mbichae rire abe no. Doce iru que mbiam mombisẽ esique sique je ra. ²¹Ae mbichae u sira rese nae, etubiriã

tuchite que ra. Cinco mil ndobei. Cuña abe etubiriã. Mbiam riirĩ abe etubiriã no.

Jesús ngata i arõ

²²Aquere que Jesús uchimbbaaquiatsu mondo ja canoa ye ra. —Jẽ nane jẽso sobei. Mbiam tambui turã na mondo uchuchúaa se nyii, i que ra. ²³Jesús que mbiam tubiriã mbui turã mondo uchuchúaa cote ra. Ae ae que oso sita ibate rĩ cote ra. Ñee sacua Dios je. Huee que ae ae riqui itondaru chee ra. ²⁴Canoa yenda que chi bei quia ama ite rĩ nda. Quiririã ngue tu icuã icuã ee ra. I rebera que tu asi asi tuchi ee ra. ²⁵Ngaira cheẽ mose que Jesús ngasẽ ee ra. I arõ ngue esi quia ngata ra. ²⁶Echimbbaaquiatsu que mae erese ra. Echiã ngue cuaãcuã i tuchi ra. Ngata mose i arõ. —Abachecuayã ño tu nguiã aque, i rei que tasẽ tasẽ nda. Siquiche tuchi que ra. ²⁷—Jẽsiquichechĩ nguiã. Se chõ nyeresẽ, i jeite que Jesús ñee ee ra.

²⁸Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra. ²⁹—Quiatuchu, i que Jesús ñee ee ra. Ae Pedro nguichi nguiã canoa si i rese irõ. Oso nda ngata i arõ Jesús rea chã nde. ³⁰Pedro mae mose quiririã icuã ndese que esiquichete ra. I que oso quia ñiimi nda. —¡Sererecua! ¡Senonosẽ na se! i que ñee Jesús je ra. ³¹Ae Jesús o mondo nguiã eo isi. —Seicuayã ñochĩ. ¿Mbaerã ereico seicuayãte re? i que Jesús ñee ee ra. ³²Ua mose canoa ye que quiririã tiba cote ra. ³³Canoa yenda que ñee turãte Jesús je cote ra. —Dios rucucha tuchi chõ nde riqui re. ¡Ae bei jẽ! i que ee ra.

Jesús mbiam Genesaret jenda mbucherõ cherõ

³⁴Ngasẽ nyee que sobei cote ra. Genesaret, i que hue ibi je ra. ³⁵Hue jenda que jirandu ja erese ra. Hue rurubinda abe que mbiam

mbiirandu erese ra. Mbia que er asi curucuaē cuaē ja Jesús je cote ra. ³⁶ —Sã mbia rasi oco oco rã ndeirao ai rese, i tuchi que mbia Jesús je ra. Ae oco erese nae, ũquí ngue nyerō nyerō ja ra.

15

Mbia chiangui renda ae chõ emb̃icuã nguiã

¹ Aquere que fariseos mo ngaē ñee Jesús je ra. Embesasa mo abe que ra. Jerusalén jenda chõ ũquí ja re. ² ũquí ngue ñee Jesús je ra. —¿Mbaerã ndechimbaaquiātu riqui nanderamei ñee mumba mumba beite re? Echoi quiriã mbei chõ quiaru nguiã, i que ñee asite Jesús je ra. ³ Jesús que ñee ee ra. —¿Mbaerã jẽingo Dios cheē mumba mumba jẽ nde? Jenamei ñee ndese chõte jẽingochĩ nguiã ã. Siqui rocoĩ Dios cheē ndese. ⁴ Dios que ñee mbia je cose ra. “Jẽturã ño jẽingo jendu je. Jẽsi je abe no. Emo ñee icuã mose ngu rĩ, ũquí jẽiquia. Emo ñee icuã mose usi abe rĩ no, ũquí abe jẽiquia no”, i quia que Dios ñee mbia mbaaquiātu cose ra. ⁵⁻⁶ Dios cheē jenyabi tuchi chõchĩ nguia mbia mbaaquiātu quiātu ã. “Ae nda amee neĩ jẽje, ũquí ngue amee ja Dios je ra”, i mose emo ñee ngu je, “coche ñene” jenyẽ chõchĩ nguiã ee. Mbae mee eã mose ngu je. Usi abe je. Nyebe jẽingo nguiã mbia mbaaquiātu icuã icuã ũquí. Jenamei ñee achõ ño jẽsenei senei nguiã mbia je ũquí. Dios cheē nenei nenei ndocoĩ ee. ⁷ Jẽturã jẽsaã ñooño ño nguiã ũquí. Jeni tuchi chõ ngue Isaías embesa nguiã cose. Eĩ ngue Isaías embesa cose ra:

⁸ ã mbia ñee turã ndaque quia seje ã.

Uchiangui re quia eriquiãte nguiã serese ã.

⁹ Ñee turãte raque equia seje ã.

Amei ñee achõ ño esenei seneichĩ nguiã mbia je.

Dios cheē mi nenei nenei ndocoĩ ee,

i que Isaías embesa jeni nda, i que Jesús ñee ucuasu raã naasa je ra.

¹⁰ —Jenyu rã secheē andu, i que Jesús ñee mbia tubiriã je ra. —Secheē jẽicua rã jẽñiangui re. ¹¹ Mbia chiu emb̃icuã eã nguiã. Echiangui renda chõ emb̃icuã nguiã. Echiangui renda chõ usẽ nguiã echuru rĩ echeē mose. ũquí ño emb̃icuã nguiã, i que Jesús mbia mbaaquiātu ra. ¹² Echimbaaquiātu que ngaē ñee Jesús ísaa cote ra. —¿Ereicuayãte ere? Ndecheē ngue fariseos mbupaama ite ra, i que echimbaaquiātu ñee nyecuayã ee ra. ¹³ Jesús que ñee ee ra. —Ae ira Paba Ibatenda chutã eã nae, ũquí nda esiqui ja erao resebe. ũquí ira rã ño fariseos riqui nguiã ã. ¹⁴ Eresayã na ño fariseos riqui nguiã. Sã eresayã mo “ñeenda tateacuquia jẽje” i raque emo je no. Quiachã ja chõ ndae, i que Jesús ñee ee ra. ¹⁵ Pedro que ñee ee cote ra. —Erecheē ngue namo, “ũquí nda mbia mb̃icuã” ere que, ũquí embuchecua rã ndecheē ure je, i que Pedro ee ra. ¹⁶ Jesús que ñee ee ra. —¿Jẽ abe jẽicuayãte quia re? ¹⁷ Ae mbia u quia nae, oso chõ nguiã erie ye. Echii que rui chõ eriqui nguiã oso oso. Usẽ nyee. ¹⁸ Mbia chiangui renda chõ emb̃icuã nguiã usẽ mose echuru rĩ. ¹⁹ Aba chiangui renda quia aba mundua icuã icuãte nguiã. Nyebe mbia riqui nguiã emo icuia. Siqui siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñooño abe no. Ñee icuã icuã no. ²⁰ Mbia chiangui renda ja chõ ũquí nde. ũquí ño mbia mb̃icuã icuã nguiã ũquí ao ao mose. Uchoi quiriã mose quiaru, ũquí nguia ra mbia mb̃icuã eã, i que Jesús ñee nda.

Ari mo Jesús icua

²¹ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. ²² Ari mo Canaán jenda que siqui huee ra. Ae que tu ñee Jesús je ra. —David nducucha chõ nde re, Jesús. ¡Ndeyayã ño serese jẽ! Aba checuayã icuã ndiqui seriirĩ mbasi mbasi co, i tuchi que ari ñee Jesús je ra. ²³ Jesús que ñee ate ee ra. Echimbaaquiatsu que ngaẽ ñee Jesús je ra. —Ari emondo chõ uchuchúaa. Eñi mbeichi ñee nande je a, i que echimbaaquiatsu ñee Jesús je ra. ²⁴ Jesús que ñee ee ra. —Sã ovejas mo quichã no. Ũquĩ na ño judíos riqui nguĩã ã. Judíos achõ je chõ ngue Dios sembu nguĩã, i que Jesús ee ra. ²⁵ Ari que tu ngoi nguĩã ndese ñee Jesús je ra. —Sererecua, seriirĩ embucherõ na seje, i que ari ñee Jesús je ra. ²⁶ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁷ Ari que ñee ee ra. —Aicuate raque se, Sererecua. Mbi-amo ndaque ure. Judíos eã ndaque ure. Ure abe je chõ mbae esaã ae. Seriirĩ embucherõ seje ae, i que ari ñee ee ra. ²⁸ —Seicuate equia co, Ari. Nderiirĩ tambucherõ ndeje, i que Jesús ñee ari je ra. Aque mosechi tuchi que eriirĩ nyerõ nda.

Jesús mbia rasi chumumbara mbucherõ

²⁹ Jesús que oso hue recha cote ra. Oso que equia ama nimia ndui ra. Ama Ndisha Galilea nimia ndui. Hue si que esi sita ibate cote ra. Huee que ngoi huee ra. ³⁰ Mbia que ngaẽ ngaẽ tuchi quia ee huee ra. Erasi chumumbara rurucuaẽ cuaẽ tuchi ee. Ecuatayã. Eresayã. Echeẽ nguĩã. Eo icuã. Mbia que ũquĩ ndasi chono ja Jesús i jii ra. Jesús que ũquĩ mbucherõ ja ra. ³¹ Nyebe mbia riqui nguĩã nyuruira tuchi mae erese. Echeẽ nguĩã ñee turã

mose. Eo icuã mbuturã mose. Ecuatayã ngata turã mose. Eresayã mae turã mose. Nyebe mbia ñee turã ja nguĩã Dios rĩ.

Jesús mbichae tubiriã saã mbichae mui je

³² Jesús que ñee uchimbaaquiatsu ísaa cote ra. —Seyayãte aico ã mbia tubiriã ndese co. A echi arete serese tres días a. Embae mo eate echiurã aa. Eriãcuã amondo sereate echuchúaa. Eriãcuã nda eiquia ñeenda cúa, i que Jesús ra. ³³ Echimbaaquiatsu que ñee ee ra. —Turúquiaa chõ nandeico a resẽ. ¿Mañi nda aba ã mbuguiaru ja re? Mbae eã tuchite a resẽ, i que echimbaaquiatsu ñee Jesús je ra. ³⁴ —¿Manya mbichae jembae re? i que Jesús ee ra. —Siete mbichae. Sira ñetẽ mo ndese, i que ee ra. ³⁵ Jesús que mbia mbucoi ja íbii ra. ³⁶ Mbichae que eisi ja o je ra. Sira ñetẽ abe no. Gracias, i que Dios je ra. Mbichae que esiquio quio mbia je cote ra. Sir a rese. Mee ja que uchimbaaquiatsu je cote ra. Ũquĩ ngue emee mee mbia ja je cote ra. ³⁷ Mbia que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisẽ nyee ra. ³⁸ Mbichaecua rei mbia cuatro mil. Cuña abe abe. Mbia ririĩ abe abe no. ³⁹ Jesús que mbia mondochoi ja cote ra. Jesús que ua canoa ye cote ra. Oso que Magdala quiti cote ra.

16

Mbia mae sayã eteacuquia ure je, i fariseos

¹ —Tã nande rã Jesús je, i que fariseos ñee nyue ra. Saduceos rese. Nyebe ũquĩ ngaẽ nguĩã ñee Jesús je. —Mbia mae sayã esaã na ure je. † nda “Dios chimbu” ure tuchi ndeje, i rei que ñee Jesús je ra. ² Jesús que ñee ee ra. —Ibei jẽicuate raque ũquĩ. Ibei ireĩ ndese jemae mose eresaitõ, “ama nda nyaaquíã” jenyẽ chõ nguĩã eicua.

³ Ibei ireĩ ndese jemae mose eresaitō ndabe, “nyaaqui rae”, jenyechō nguiã eicua ũquĩ no. Ibei jêicuate raque quia ã. Ae Dios teacuquia jêje nae, ũquĩ jêicuayã mbei chōchĩ nguia ã. Ae ra tu icuâte mbia je nae, ¿mbaerã jêingo ũquĩ nguiatu icuayâte re? ¿Mbaerã jêingo jêaracua raã naa nde? ⁴ Mbiambicua ja chō ã nde. Ae siqui ibi rĩ namo nae. Hui jate equia Dios si ã. “Mbia mae sayã esaã ure je”, i chōchĩ equia seje ã. Aque mĩ nda asaã jêje. Jonás na si ra asaã jêje, i que Jesús ñee nda. Oso que erecha cote ra.

Fariseos mbia mbaaquiatu icuã, i Jesús

⁵ Jesús chimbaaquiatu que uchiurã curuchoi eã nda. Tesarei que esi nyoĩ mose sobei ra. ⁶ Jesús que ñee ee ra. —Mbichae mbuchimatãsa rã ndei fariseos cheẽ. Saduceos cheẽ abe no. Ũquĩ ñee ndese ra jêingochĩ jê, i que Jesús ee ra. ⁷ —Mbichae quiatu ngue nanderuã nguia. Nyebe eriqui nguia ñee nande je ũquĩ, i rei que echimbaaquiatu ñee nyue ra. ⁸ Jesús que echeẽ ñee icuate ra. Nyebe ñee nguia ee. —¿Mbaerã jêingo “mbichae nanderuãchĩ” i re? ¿Mbaerã jêingo seicuayâte re? ⁹ Ae rĩ aico ñee jêje nae, ¿ũquĩ jêicuayã mbeite quia re? Se mbichae mbeta mose ¿ũquĩ si jêtesarei chō nde? Cinco mbichae mbeta mose mbia cinco mil je, ¿manya iru jemombisẽ mbichae sique sique je re? ¹⁰ Siete mbichae mbeta mose mbia cuatro mil je ¿manya iru jemombisẽ mbichae sique sique je no? ¹¹ Secheẽ mose jêje nyii, “mbichae mbuchimatãsa rã ndei fariseos cheẽ”, i mose jêje, secheẽ jêicua rã. Mbichae rĩ aico ñee âte jêje co. Fariseos cheẽ ndese jêingo eã sacua ño aico nguia ñee jêje. Saduceos cheẽ ndese abe

jêingo eã sacua, i que Jesús ra. ¹² Echimbaaquiatu que eicua chee ra. —Mbi chae mbuchimatãsa rĩ eã ño eriqui ñee nande je re. Ae fariseos senei senei icuã nguia mbia mbaaquiatu nae, ũquĩ nĩ ño eriqui ñee nde. Saduceo ñee nĩ abe no, i que echimbaaquiatu eicua ramo cotẽ ra.

Cristo chō nde resẽ, i Pedro Jesús je

¹³ Jesús que nyoĩ Cesarea de Filípoo cote ra. Huee que ñee uchimbaaquiatu je cote ra. —Mbiarã ngue achu ibii ra. ¿Aba aico reĩ se mbia je re? i que Jesús ñee ee ra. ¹⁴ Echimbaaquiatu que ñee ee ra. —Juan el Bautista ereico reĩ nguia mbia je co. Elías ereico reĩ nguia emo je no. Jeremías ereico reĩ nguia emo je no. Dios cheẽ nenei neneisa mo ereico reĩ nguia emo je no, i que echimbaaquiatu ñee Jesús je ra. ¹⁵ —¿Aba aico reĩ jêje co re? i que Jesús ee ra. ¹⁶ —Cristo chō nde resẽ. Dios rĩrĩ ño nde resẽ, i que Pedro ee ra. ¹⁷⁻¹⁸ Jesús que ñee Pedro je cote ra. —Ndeyate ereico co, Simón. Mbiammo nembiiirandu eãte quia serese co. Paba Ibatenda mĩ ño nembiiirandu nguia serese. Jonás ndiirĩ ndei nde. Tacheẽ tuchi ndeje. “Pedro” i chō equia ndeje co. “Sita” i ñi Pedro je re. Aque sita arō ño nda sembae iglesia achao. Satanás nda esiquisã eãte. Satanás quirãcuâte raque. Mbiamiquiasa raque ae no. Ae ra sembae iglesia siquisã eã mbei. ¹⁹ Mbae tamee ndeje. Llave tamee ndeje. Aque je ra Dios recua iquesa erembuquiata quiata mbia je. Mbiamique sacua. Ae je ra erembuqui ata, ũquĩ nda ique. Ae je ra erembuquiata eã, ũquĩ nda ique eã, i que Jesús ra. ²⁰ Jesús que ñee uchimbaaquiatu ja je cote ra. —“Jesús rei Dios chimondo” jenyechĩ nda emo mbiirandu jê, i que ee ra.

Mbia ra seiquia, i Jesús

²¹ Aque mose bei que Jesús umano nonde senei senei uchimbaaquiatu je ra. —Paba ra sererao Jerusalén. Huee ra amei seiruã nu a tuchi. Sacerdotes rerecua abe ra sembasi mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra. ²² Pedro que Jesús querao pe jiri ñee sacua ee ra. —Mbia ra jei jeichĩ ndeje jẽ. Mbia ra ndeiquiachĩ jẽ, i rei que Pedro ñee asi ee ra. ²³ Jesús que uba ñee Pedro je ra. —Ehui chõ sesi, Satanás. ¿Mbaerã ereico seriquisã quisã nde? Mbia ndua rã ño ereico nguia ndua. Dios ndua rã eã, i que ñee Pedro je ra.

²⁴ Jesús que ñee uchimbaaquiatu je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote. ²⁵ Emo ndua bei mose nguico rese, ereco ra ua esi. Emo hui mose nguico si seje, ũquĩ nda siqui bei. ²⁶ Emo nguico mumba chooño mose, eya eã mbei rae. Mbaecha rete raque. Emo nguico mumba chooño mose, mbae mo eãte ereco ribishorõ sacua. ²⁷ Dios ra sembu si ibii uquirãcuã je. Ibatenda rese ra achu ángeles. Ae mbae turã saã saã nguia nae, ũquĩ je ra mbae turã amondo se tu mose. Ae mbae icuã saã saã nguia nae, ũquĩ je ra mbae icuã amondo no. ²⁸ Tacheẽ nyecua jẽje. A jengu a nae, jemo nda jemaẽ sechu rese. Achu ra mbia rerecuarã tuchi cote. Jemo jemano eã mose r a achu mbia rerecuarã tuchi cote, i que Jesús ra.

17

Jesús ny#cuabo uchimbaaquiatu resaa

¹ Tenda seis uare que Jesús uchimbaaquiatu mo nderao sita ibátee ra. Pedro. Jacobo. Juan abe no. Jacobo nongue rei Juan.

Ũquĩ ngue equerao ja mbia tiãsaa ra. ² Jesús que ny#cuabo erésaa ra. Eruba que ñimbiasu ra. Tenda nininya rã tuchi que eruba ra. Eirao abe nininya tuchi que ra. Eiraoshĩ nininya tuchi que ee ra. ³ Mbia nyeremo ngue nyecua u ibate si ra. Jesús nininya mose que echi ñee ñee ere se ra. Moisés que enongue ra. Elías que enongue ra. ⁴ Pedro que ñee Jesús je ra. —Sembaaquiatu, nandecu turãte a. Sucha ñetẽ uresaã saã na, ndebi mose. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ⁵ Pedro cheẽ mosete que ibeishĩ ndu eite ñi nda. Abamo ñee mo ngue echandu ibeishĩ qui re ra. —Co rei sebi tuchi seriirĩ co. Seya tuchite aico ere se co. Echeẽ jeñandu bei quia, i que Dios ñee ee ibeishĩ qui re ra. ⁶ Echimbaaquiatu que siquichete eandu mose ra. Echeẽ mose que echoi nyaara nguie quitu ra. ⁷ Jesús que esiichã oco oco ere se ra. —Jẽhuã na. Jẽsiquichechĩ nda jẽ, i que ñee ee ra. ⁸ Echimbaaquiatu soboiba mose que mae Jesús mii ndese cote ra.

⁹ I ecuaẽ nguia nguichi mose sita ibate si que Jesús ñee ee ra. —Ae rese jemaẽ namo nae, ũquĩ nda jẽsenei seneichĩ emo je jẽ. Seraanque quera si mose, aque mose ramo ño jẽsenei senei mbia je cote, i que Jesús ñee ee ra. ¹⁰ Echimbaaquiatu que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra. ¹¹ Jesús que ñee ee ra. —Ae bei. Coche Elías rane tu nguia mbae mbitirõ ja. ¹² Elías que tu ra. Mbia que eicuayãte ra. Mbia icuã icuã jate que eriqui ee ra. Eĩ si ra mbia icuã icuã seje no, i que Jesús ee ra. ¹³ Echimbaaquiatu que Jesús cheẽ icua ramo cote ra. —Juan el Bautista rĩ ño eriqui ñee nde, i que Jesús cheẽ icua ramo cote ra.

Jesús aba checuayã jea mbia riirĩ mo si

¹⁴ Ngasẽ ngue mbia ja je cote ra. Emo ngue ngoi nguĩã ndese ñee Jesús je ra. ¹⁵ —Seriirĩ embucherõ na, Sererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite. ¹⁶ “Seriirĩ embucherõ na”, ae rei ngue nguĩã ndechimbaaquiatu je. Mbiamucherõ aquiatuã ño eriqui re, i que eru ñee Jesús je ra. ¹⁷ Jesús que ñee cote ra. —¿Mañi jenyee quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jêje re? i que Jesús ra. —Eriirĩ jendu rã seje, i que cote ra. ¹⁸ Jesús que ñee asite aba checuayã je cote ra. Aba checuayã ngue usẽ eriirĩ si cote ra. Aque mose tuchi que eriirĩ nyerõ cote ra. ¹⁹ Aquere que echimbaaquiatu ñee Jesús ísaa ra. —¿Mbaerã ureico aba checuayã jea aroneate mbia si re? i que ñee Jesús je ra. ²⁰ Jesús que ñee ee ra. —Seicuayãte jiri quiatu nguĩã ã. Tacheẽ nyecua jêje. Sã mostaza eĩ ñetẽte riqui raque no. Jẽ seicua ñetẽ mose, mbae ra asaã ja jêje. “Eso pe jiri”, jenyee mose co sita ibate je, siri ra oso pe jiri jeñee nguire. Jẽ seicua mose, mbae jẽ saã ja arondete. ²¹ Aba checuayã ngue ajea namo, ãquĩ nda jêjea eã jeñee eã mose Dios je. Ñquĩ nda jêjea eã, jêhui eã mose jenyũ si, i que Jesús ñee ee ra.

Mbia ra seiquia, i si Jesús

²² Galilea rĩ ngue Jesús riqui ngata uchimbaaquiatu rese ra. Jesús que embaaquiatu quiatu quia ra. —Mbiarã ngue achu ra. Mbia ra semee mbia icuã je. ²³ Mbia icuã nda seiquia. Tres nyaashĩ mose r a aquera si, i que Jesús ra. Echimbaaquiatu ia eã tuchi que echeẽ mose ra.

Jesús mbae isiquia mondo impuestos pagar i sacua

²⁴ Ngasẽ ja que Capernaum cote ra. Ae impuestos isi isi quia Dios chuchua jenda nae, ãquĩ ngue nyoĩ ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra. ²⁵ —Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane ngue ñee ee ra. —Í ere, Pedro. ¿Aba je mbia rerecua riqui “impuestos jemee na seje” i re? Í eã nda nguiriĩ je. Mbiamo je chõ nda ñee nguĩã, i que Jesús ee ra. ²⁶ —Ae. Mbiamo si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ. ²⁷ Dios riirĩ ndaque se. Impuestos nandemee ndei Dios chuchua jenda je. Sã mbia ndua icuã eã nande rese. Quiatu ama ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo eretea. Aque emee serao impuestos isi isiquia je. Sembae impuestos sacua. Nmbae sacua abe no, i que Jesús ñee Pedro je ra.

18

Ererecua tuchi ra se, i jaaja Jesús chimbaaquiatu nyue

¹ Aque mose que echimbaaquiatu ñee jate Jesús je ra. —¿Aba ra ererecua tuchi ure nderese re? i que ñee Jesús je ra. ² Jesús que ãquẽ mo mbucoi mĩ eite re ra. ³ Ñee ngue mbia je cote ra. —Tacheẽ nyecua jêje. Dios quiti jemba eã mose ra jenderecua eã mbei Dios. Mbia riirĩ na jẽingoã mose ra jenderecua eã mbei Dios no. ⁴ Ae siqui quia cocheete nae, ãquĩ nda mbia rerecuarã nyee Dios rese. Ae siqui quia mbia riirĩ n a nae, ãquĩ nda mbia rerecuarã nyee Dios rese. ⁵ Ae eturã ndiqui mbia riirĩ je seriĩ nae, seje abe chõ eturã ndiqui nguĩã.

Mbae icuã nda nandesã uquiachĩ emo je

⁶ Ae ra mbae icuã saã uquia seicuasa mo je nae, ũquĩ nda mbae rasi saã tuchi cote. Ũquĩ nda aba mombo chõ ama ndisha ye nyii re chã. Sita resebe ecua ji mondo. ⁷ I nda mbae icuã naa uquia eãte rei seicuasa je. ⁷ Mbae icuã nguiarei siqui bei tuchi mbia mbĩicuã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquĩ nde. Ae “mbae icuã esaã” i nae, ũquĩ nda mbae rasi saã tuchi cote. ⁸ Ndeo nemingo mose mbae icuã ndese, ndeo echisia mombo. Coche rei ra ereso ibate ndei mĩ nderequia, siqui bei sacua huee. Ndei nemingo mose mbae i cuã ndese, ndei echisia mombo no. Coche rei ra ereso ibate ndei mĩ nderequia, siqui bei sacua huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no. ⁹ Nderesa nemingo mose mbae icuã ndese, nderesa echoo. Coche rei ra ereso ibate nderesa mĩ nderequia. Nemombo rocoĩ tata cuásuu, nderesa nyeremo nderao.

Oveja quiachã je

¹⁰ Seririĩ ñetẽ mo nda jẽucũyãchĩ jẽ. Angeles riqui eraarõte ã. Angeles riqui Paba rese ibate pe. ¹¹ Se que achu quiachã je rea ra. ¹² Sã emo nimba quiachã oveja no. Cien ndei ngue erimba re. Co mĩ ngue quiachã ee ra. Aque esi quia quiachã je requia aque. Eataque recha. Noventa y nueve recha. ¹³ Tacheẽ nyecua jẽje. Echa quiachã je rea mose, eyate que erese ra. Eya tuchi que erese ovejas ataque si ra. Quiachã eã je si. ¹⁴ Sã jendu ibatenda abe no. —Sã aque mĩ quiachã eã seriiriĩ ñetẽ mo, i chõ Dios nguia co.

Emo mbae icuã naa mbei mose ndeje, etesarei sarei bei chõ

¹⁵ Nderesenda icuã mose ndeje, eso ñee ee. “Ã ngue eresaã mbae icuã nda”, ere chõ ñee eisaa. Ndecheẽ andu turã mose, nderesenda que eremitirõ turã nda. ¹⁶ Ndecheẽ andu sereã mose, emo abe erao ñee sacua ee. Aque mĩ nda reae. Nyeremo nda re no ae. Ũquĩ abe ñee sacua ee. Jeñee ja mose ee hue rĩ ja, jẽandu turã arõte. ¹⁷ Ũquĩ andu sereã mose, jeñee mbia chumunuásaa cote. Sã mbia ñumunua je ñee ja ee. Ũquĩ ñee andu sereã mose, jemombo chõ cote. Dios quiatoã naanguia jẽsaã ño ee cote. Mbia icuã naanguia jẽsaã ño nguia ee cote. ¹⁸ Tacheẽ nyecua jẽje. Jẽ mbae mo ndiquisã mose, Dios abe ra esiquisã. Jẽ mbae mo ndiquisã eã mose, Dios abe ra esiquisã eã no. ¹⁹ Tacheẽ nyecua jẽje. Jẽ nyeremo ndua turã mose hue rĩ sí, “co embu ure je” jenyete turã ja mose Dios je, Paba Ibatenda ra emondo jẽje. ²⁰ Jẽ nyeremo ñumunua mose seriĩ, aico chee nguia jendese jẽite re huee, i que Jesús uchimbaaquiatu je ra.

²¹ Pedro que ñee Jesús je ra. —Seresenda icuã mbei mose seje ¿manyas veces ra atesarei eicuã si re? ¿Siete veces ra re? i que Pedro ra. ²² Jesús que ñee ee ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jẽtesarei

²³ Sã ererecua mo ndiqui no. Dios rã si chõ ererecua re. Sã ererecua a cuenta raã naa ja nguimba je no. ²⁴ Cuenta raã naa mose que erimba mo ndurucua ee ra. Aque que deber i tuchi quia ee ra. ²⁵ Mbae ãte que erimba mbae pagar i sacua nda. Nyebe ererecua ñee nguia. “Embae je vender nande ja rã. Eriiriĩ abe je vender nande. Eninisi abe no. Ae abe je vender nande. I nda cuenta ua jiri”, i rei que ererecua ñee nda.

²⁶ Erimba ia eã tuchi que echeẽ andu ra. Ngoi que ngũĩã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra. ²⁷ Ererecua ia eã tuchi que erese ra. “Mbae emondo eã ndei seje pagar i sacua”, i chõ nyee que ee ra. Hui chõ nyee que esi ra. ²⁸ Erimba que usẽ ndei oso quia ra. Aque mosechi que ngasẽ nguesenda mo je ra. Deber i mĩte rei ee reaẽ. “Pagar ere rã seje”, i que echosoi isi ra. ²⁹ Eresenda que ngoi ngũĩã ndese ñee ee ra. “Eico tochi chõ seje ae. Mbae tamondo ja chee ndeje”, i que eresenda ñee ee ra. ³⁰ “Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacua ee. ³¹ Eresenda ataque ia eã tuchi que mae erese ra. Nyebe echoi nguiã ñee ererecua je. ³² Nyebe ererecua “echu” i nguiã ee. “Serimba icuãte chõ ereicochĩ nde re. Ae deber ere seje, ũqui nĩ ngue acheẽ eãte ndeje. Seya eãte que nderese nde ñee mose seje nyii. ³³ ¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra. ³⁴ Ererecua que paama i tuchi ee ra. “Jẽirua nua tuchi, pagar i ja chee”, i que ererecua ñee mbia je ra, i que Jesús mbia mbaaquiatsu quiatu ra. ³⁵ —Eĩ sí ra Paba Ibatenda paama i jẽje, jẽtesareiã mose jendesenda icua si, i que Jesús mbi a je ra.

19

Jesús ñee mbia ngũinisi mombo je ri

¹ Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re. ² Mbia que nyoĩ ja tuchi quia erui ra. Huee que mbia rasi mbucherõ cherõ tuchi ra. ³ Fariseos mo ngue nyoĩ Jesús richã nda. —Tã nande Jesús je no. Ma ñee Dios cheẽ abi, i que ñee nyue

ra. —¿Coche mbia ngũinisi jea ubiã mose re? i que ñee Jesús je cote ra. ⁴ Jesús que ñee ee ra. —¿Embesa ji rese jẽingo mae áte re? “Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁵ Nyebe ra emo ndiqui ngũinisi rese bei. Ngu si isho. Usi si abe no. Ngũinisi rese siqui bei sacua. Co mĩ na siqui sacua nyiese”, i ñi embesa ji re. ⁶ Nyeremo siqui rã eã ño cote re. Co mĩ siqui rã ño ũqui cote re. Ae Dios mbucha nyiese nae, sã ũqui hui eã mbei nyesi, i que Jesús ñee ee ra ⁷ Fariseos que ñee ee cote ra. —¿Mbaerã Moisés ñee ũqui nde? “Jeninisi jea nonde, papel mbesa je jemonde ee”, i ee re, i que ra. ⁸ Jesús que ñee ee ra. —Jẽaquẽ átãte quiatu ngue re. Nyebe Moisés embesa nguiã jẽje ũqui. ũqui i áte que Dios mbia ao ramo mose nyii ra. ⁹ Ae ngũinisi jea nae, eninisi siquiã ndaque emo ndese, eicuã tuchi chõ ũqui nde. Ae ngũinisirã mo ndeabe mose, adulterio i que ũqui je ra, i que Jesús ñee ee ra.

¹⁰ Echimbaaquiatsu que ñee ee ra. —Mbaeia mose ngũinisi jea mose ¿mbaerã nguiatsu ra ngũinisirã ndea re? i rei que echimbaaquiatsu ñee nda. ¹¹ Jesús que ñee ee ra. —Mbia ja riqui ũqui icua eãte ã. Ae Dios mbaaquiatsu quiatsu nae, ũqui mĩ ño siqui nguiã eicua ã. ¹² Ae eninisi sereã mbeite nae, ũqui nda siqui turã, eninisiã ndaque rae. Emo nyia o ji mose, ũqui abe ra siqui turã, eninisiã ndaque rae. Emo ngũinisirã nderequia eã mose Dios rĩ, ũqui abe ra siqui turã, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia riirĩ isi turã turã

¹³ Mbia que nguiirĩ ngurucuaẽ cuaẽ nguiã Jesús je ra. Jesús o noono sacua eãquĩ arõ. Jesús ñee

sacuã Dios je eriĩ. —¿Mbaerã jendi-irĩ jendu quia co re? i rei que Jesús chimbaaquiatu ñee mbia je ra. ¹⁴ Jesús que ñee nda. —Tei. Jẽhui chõ esi. Sã nguiĩrĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riĩrĩ na, i que Jesús ñee ee ra. ¹⁵ Jesús que o chono ñono mbia riĩrĩ arõ nda. Aquere que esi ngata cote ra.

Acuanindu mbaecha mo ñee Jesús je

¹⁶ Acuanindu mo ngue tu ñee Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaã nde? i que ñee Jesús je ra. ¹⁷ Jesús que ñee ee ra. —¿Mbaerã ereico eturã i seje re? Dios mii ño eturã ndesẽ. Nde ndeico beise mose, Dios cheẽ emumbayã ja, i que Jesús ñee e e ra. ¹⁸ —¿Mbae ra amumbayã Dios cheẽ nde? i que acuanindu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicochĩ. Mbae mo nda erembuquiachãchĩ. Erecheẽ ñooñochĩ nda emo nii. ¹⁹ Ndeturã ño nderu je. Ndeturã ño ndesi abe je. Sã erechesequa ndechiese no nae, eĩ ere si chõ nyesecua nde ji jenda rese”. Dios cheẽ ja chõ ũquĩ nde. Mbia echeẽ mumbayã sacuaã, i que Jesús ñee acuanindu je ra. ²⁰ Acuanindu que ñee ndei ee ra. —Ũquĩ ngue amumbayã ja bei quia ra. Señetẽ mosenda bei. ¿Mbae mo abe ra asaã nde? i que acuanindu ñee Jesús je ra. ²¹ Jesús que ñee ee ra. —“Taico turã tuchi”, nde i mose, ã abe esaã. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanindu Jesús cheẽ andu mose que echosoi oso serĩte cote ra. Eyayãte que oso ra. Mbaecha tuchite quiatu ngue ae re.

²³ Jesús que ñee uchimbaaquiatu je cote ra. —Tacheẽ nyecua jẽje. Mbaranguiatu áte mbaecha je ngasẽ sacuaã ibate siqui bei sacuaã huee. ²⁴ Sã ticuasuo mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁵ Echimbaaquiatu que nyuruiira tuchi echeẽ andu ra. —¿Aba quia ra oso Dios rea ibate re no? i que echimbaaquiatu Jesús je cote ra. ²⁶ Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra. ²⁷ Pedro que ñee Jesús je ra. —Ure que urembae uresech a ja ra. Siqui sacuaã nderui. ¿Mbae ra eremeẽ ure je re? i que Pedro ñee nda. ²⁸ Jesús que ñee ee ra. —Tacheẽ nyecua jẽje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jẽ abe ererecua. Jẽ doce. Trono jaaja ra jembaerã cote. Judios rerecua ja ra jẽ. ²⁹ Emo umbae secha ja mose siqui sacuaã serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae ngũinisi secha. Ae nguiĩrĩ secha. Ae umbae ibi secha no. Ũquĩ mbae ja ra asibishorõ tuchi cien veces. Aquere ra siqui bei tuchi Dios rese ibate cote. ³⁰ Ae rane eriqui nyii nae, ũquĩ nda siqui mbia rui tuchi cote. Ae siqui quia mbia rui tuchi nyii nae, ũquĩ nane nda cote, i que Jesús ra.

20

Ae rane eriqui nyii nae, ũquĩ nda siqui mbia rui tuchi cote

¹ Jesús que mbia mbaaquiatu quiatube no nda. —Dios rei mbia rerecua tuchi. Sã mbaecha mo ndiqui no. Sã mbaecha uva tubiriãte riqui embae no. Sã mbaecha mbia mo ndea rea umbae ishao shao sacuaã no. Nyaashĩ

namo mose. ² “Denario mii tamondo mondo ja jêje. Sembae ishao shao sacua tenda mondo chee”, i que emondochoi úcoo cote ra. ³ Tenda chui mose que mae emo ndecotea eã ndese ra. ⁴ —Jê abe jêso sembae ishao shao. Mbae mo tamee jêje, i que ee ra. Nyoï que echeê mose ra. ⁵ Tenda nandeite re mose que echa emo mondo choi cote ra. Umbae ishao shao sacua. Ei si que echa tenda chaara ramo mose no nda. ⁶ Tenda irei mose abe que mae emo ndecotea eã ndese no nda. “¿Mbaerã jêingo tenda mondochooño siqui rocoi mbae mo ndese a re?” i que echa ñee ee ra. ⁷ “Emo ngue ‘mbae mo esaã seje’ i âte ure je ra”, i que ee ra. “Jêso jê abe sembae ishao shao. Mbae mo tamee jêje”, i que echa ee ra. ⁸ Itondaru ramo mose que echa ñee mbia reaquiatusa je ra. “‘Jenyu’ ere sembae ishao shaosa je. Pagar ere rã ûqui ja je. Ae ique ramo eresaitô nae, ûqui nane je pagar ere. Ae rane ique nyii nae, ûqui je pagar ere hui bei cote”, i que echa ñee nda. ⁹ Ae ique eresaitô nae, ûqui nane je que denario mii mee mee nda. ¹⁰ Ae rane ique nyii nae, ûqui ngue ñee ñee u nyue ra. “Eata jiri ra emee nande je reae. Nande rane ngue uva a nandeishao shao”, i rei que eu ñee ñee nyue ra. Ûqui je abe que denario mii mee mee nda. ¹¹ Pagar i mose ee que ñee asi asi echa je ra. ¹² “Ae ique ramo eresaitô nae, ûqui ngue mbae ishao shao eã jiri resê. Eresaitôte que ique. Ure quiatu que tenda uremumba rei uva a ishao shao ndeje. ¿Mbaerã mbae isiquia eremee ee ure rã si chô nde?” i que ñee echa je ra. ¹³ Echa que ñee ûqui mo je ra. “Mbae icuã mo asaã eãte ndeje resê. ‘Denario mii’, nande que ñee nyii resê. ¹⁴ Quiatu nembae denario rerao cote. Ae ique ramo nae, ûqui je abe denario tamee mee

nde rã si. ¹⁵ Sembae ae rese aico nguiã. Sembae amondose mose emo je, ¿amondo aroneate se re? Se sembae mee mose emo je, ¿ndebiãte ûqui nde?” i que echa ñee ee ra. ¹⁶ Ae rane eriqui nyii nae, ûqui nda siqui mbia rui tuchi cote. Ae siqui quia mbia rui tuchi nyii nae, ûqui nane nda cote. “Jenyu serui” i tuchi Dios quia mbia ja je co. Mbiamii ño eisirô sirô nguiã co, i que Jesús ñee nda.

Mbia ra seiquia, i si Jesús

¹⁷ Jesús que ngata oso quia Jerusalén quiti ra. Uchimbaaquiutu que equerao mbia tiãsa ñee sacua ee ra. ¹⁸ —Co nyao quia Jeusalén co. Huee ra mbia semee sacerdotes rerecua je. Embesasa abe je. “Jesús jêiquia”, i ra seriã. ¹⁹ Semee nda judíos eã je cote. Seiquia sacua. Mbiamia ra secheê saã saã. Seiruã nua abe ra eno. Sembucha chee ra iquia ira rese. Tres nyaashi mose ra aquera si, i que Jesús ñee ee ra.

Ererecuarã ure, i raque Jacobo, Juan ndese

²⁰ Ari mo ngue oso Jesús riichã nda. Jacobo si. Juan si. Zebedeo riiirî ngue ûqui nda. Ari que oso Jesús riichã nguiirî ndese ra. Ngoi que nguiã ndese ñee Jesús je ra. —Mbae mo esaã na seje, i que ee ra. ²¹ —¿Mbae ra aba saã ndeje re? i que Jesús ñee ari je ra. Ari que ñee ee ra. —Ndeico mose ererecua tuchi, sã seriirî abe riqui ererecuarã nderese. Sã seriirî ngoi ja u ndejii. Enongue chî ngoi ndequito cuti. Enongue ndequiato cutiã no, i rei que ari ñee Jesús je ra. ²² Jesús que ñee ee ra. —Ae riã jêingo ñee seje nae, jêirandu turã eãte ûqui ndese. Ae rasi ra asaã tuchi nae, ¿ûqui ndasi ra jêsaã jê abe re? i que Jesús ee ra. “Ae”, i que ari riiirî ñee ee ra. ²³ Jesús que ñee ee ra. —Ae bei. Ae rasi ra asaã tuchi nae, ûqui ndasi ra jêsaã tuchi raque jê abe. “Ererecuarã ure”, jenye que seje,

ũquĩ asaã aroneate se jêje. Paba ae quiatu ra ũquĩ saã. Ae ebite, ũquĩ nda emĩ ererecuarã, i que Jesús ra. ²⁴ Echimbbaaquiatsu ataque que jirandu erese ra. Echimbbaaquiatsu diez. Paama i que Juan je ra. Jacobo je abe. ²⁵ Jesús que “jenyu” i ñee uchimbbaaquiatsu ja je cote ra. —Mbia ataque rerecua riqui ucuasu raã naa tuchi ngũimba je ũquĩ. ²⁶ Ũquĩ nda jêsaãchĩ jê. “Ererecua ra se”, i mose jemo, sã aque riquichõ uataque rimbarã. ²⁷ Jemo “se rane jê” i mose, sã ũquĩ ndiqui bei mbae turã naa naa uataque je. ²⁸ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús mbia nyeremo ndesayã mbucherõ

²⁹ Jesús que ngata oso quia Jericó si ra. Uchimbbaaquiatsu rese. Mbia tubiriã ngue nyoĩ quia erui ra. ³⁰ Eresayã nyeremo ngue chi ñeenda jie ee ra. Eresayã ngue jirandu Jesús ucuu rese ra. Ñeemombo mombo que Jesús je ra. —¡Sererecua! ¡David rucucha! ¡Ndeya eã ño urerese jê! i que eresayã ñee Jesús je ra. ³¹ —¡jêquiriri chõ jê! i tuchi rei que mbia ñee ee ra. —¡Sererecua! ¡David rucucha! ¡Ndeya eã ño urerese jê! ibe que eresayã ñee Jesús je ra. ³² Jesús que tiba ñee ee cote ra. —Jenyu rã. ¿Mañi ae ra jêje re? i que Jesús ñee eresayã je ra. ³³ —Ureresa embuturã na, Urererecua, i que eresayã ñee ee ra. ³⁴ Jesús ia eã tuchi que erese ra. Oco ja que eresa rese ra. Aque mose tuchi que eresayã ndesa turã ja cote ra. Mae turã ngue cote ra. Jesús rui que echoi quia cote ra.

21

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que hue je ra. Hue si que Jesús uchimbbaaquiatsu nyeremo mondo ra. ² Ñee ngue ee ra. —Achi súchaa chõ jêso rã. Burro cuasa ra chĩ ngui-irĩ ndese jêje huee. Ũquĩ jenyura seru seje. ³ Emo ñee mose jêje, “¿mbaerã nda jenyura re?” i mose jêje, jeñee ee. “Nandererecua que ‘jendu’ i ra. Mondo jeibe ra jêje”, jenyee ee, i que Jesús ñee ũquĩ nyeremo mondo ra. ⁴ Embesa ji cheẽ io sacua ño ngue ũquĩ nda. I embesa ji huĩ a:

⁵ Jeñee Jerusalén jenda je.

“¡sã jê! Jendererecua ru quia jêje burro ato co.

Ucuasu esaã saã eãte u quia co.

Burro riirĩ átoo eru quia co”, jenyee ee,

i que embesa ji huĩ nyii ra. ⁶ Ũquĩ nyeremo ngue Jesús mondo cote ra. Ae riĩ Jesús ñee ee nae, ũquĩ ngue nyecua ja ee cote ra. ⁷ Burro que ecuruchoi Jesús je ra. Huĩrao que echono ñono burro quite arõ nda. Burro riirĩ quite arõ abe. Jesús que nyui eato cote ra. ⁸ Jesús que ngata rei oso quia burro átoo ra. Mbia tubiriã ngue huĩrao mbiitee tee nyoĩ quia ibi rĩ enonde ra. Emo emo ngue sindo mbiitee tee ee no nda. Jesús oso sacua hue rĩ. ⁹ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. David rucucha ru quia co. Dios turã tuchi riqui nande je co, i tuchi que mbia quia ñee nda. Ae nyoĩ quia Jesús nonde nae, ũquĩ. Ae nyoĩ quia erui nae, ũquĩ abe no. ¹⁰ Jesús que ngasẽ Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús rĩ nda. ¹¹ Mbia ataque que echeẽ sibishorõ nda. —Dios chimondo chõ co re. Jesús i equia

ee. Nazaret de Galilea jenda chõ ae re, i que ñee nda.

Jesús mbia mbusẽ Dios chuchua
si

¹² Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ûquĩ ja que Jesús mombo hue si ra. Ae mbae isiquia sibishorõ shorõ nguia, ùquĩ mbae abe que embuchiichere chere ja mesa ra. Mesa aronda resebe. Ae nyurushi cuasu mondo mondo mbia je mbae ribishorõ nae, ùquĩ nenda abe que embuchiichere chere ra. ¹³ Jesús que ñee ùquĩ ja je ra. —“ ‘Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchu a je re. Mbae mbuquiachãsa chuchua jẽsaãte chĩ nguia ee, i que Jesús ñee asite ùquĩ je ra.

¹⁴ Jesús siqui mose Dios chuchúaa, mbia resayã ngue nyoĩ nyoĩ erea huee ra. Mbia cuatayã abe no. Jesús que ùquĩ mbucherõ ja ra. ¹⁵ Ererecua cuabẽte que chi mae icuã icuã ere se ra. Sacerdote rerecua abe no. Embesasa abe no. Jesús chisaã turã ndese mae mose que paama ite ee no ra. — David rucucha turãte riqui co, i mose mbia riirĩ Jesús riĩ, ùquĩ mose que ererecua paama i ja Jesús je ra. ¹⁶ —¿Mbia riirĩ ñee erechandu quia re? i que ùquĩ ñee Jesús je ra. Jesús que ñee ee cote ra. —Ae. ¿Embesa ji rese jemae eãte re? “Dios ra mbia riirĩ mbucheẽ turã uturã niĩ”, i que embesa ji ra, i que Jesús ñee ererecua je ra. ¹⁷ Jesús que oso mbia rerecua recha ja cote ra. Sucha tubiriã abe recha. Oso que Betániaa nda. Huee que itõ nda.

Jesús ñee icuã higo i je

¹⁸ Isamamimbe que Jesús choi sí quia sucha tubiriã nda. Eriãcuãte abe que nyoĩ quia ra. ¹⁹ Higo i mo ndese que mae ñeenda jie ra.

Siichã ndei que oso ra. Ea eãte que ee ra. Ero achõte chõ ngue ee ra. Nyebe Jesús ñee nguia higo i je. —Ndea eã mbei r a cote, i que Jesús ñee ee ra. Aque mosebe tuchi que esi quia ñimama mano nda. ²⁰ Echĩmbaaquiato que nyuruira tuchi mae ere se ra. —¿Mañi higo i quia ñimama asite mano nde? i que ñee Jesús je ra. ²¹ Jesús que ñee ee ra. —Tacheẽ nyecua jẽje. Ae asaã higo i je nae, jẽ abe ra ùquĩ jẽsaã serã sí, jẽ Dios jẽicua tuchi mose. Jeñee nyee ra sita ibate mo je. “Esiri rã oso am a ndisha ye”, jenyee chee ra sita ibate mo je. Sita ibate ra jeñee mumbayã jẽ Dios jẽicua tuchi mose. ²² “Ã emondo seje”, jenyee mose Dios je, mondo r a jẽje. “Dios ra emondo seje”, jenyee mose jeñiangui re, Dios ra emondo jẽje, i que Jesús ra.

¿Aba nembu re? i mbia ñee Jesús je

²³ Jesús que oso Dios chuchúaa ra. Huee que eriqui mbia mbaaquiato quiato ra. Sacerdote rerecua que nyoĩ ñee ee amei ndese ra. — ¿Mbaerã ereico mbia mbaaquiato quiato Dios chuchúaa re? ¿Aba “ùquĩ esaã saã” i ndeje re? i que ererecua ñee ja Jesús je ra. ²⁴ Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ turã mose, ùquĩ mose quiato ra jeñee asibishorõ turã se abe. ²⁵ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerã jẽingo eãte erui re no?” i quiarei ra nande je. ²⁶ “Dios eã ngue embu ra”, nande aroneate ñee ee no. Mbia ataque ra paama i tuchi nande je. Juan quiato tuchi quiarei mbia, i

que ererecua u ñee ñee nyue ra.
²⁷ Ererecua que ñee nyee Jesús je cote ra. —Ureicuayâte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jêje no. Ae “ã esaã” i seje nae, aque riñ nda acheẽ eã jêje no, i que Jesús ererecua je ra.

Acuanindu ndua ndua si

²⁸ Jesús que ñeembe ee ra. —I ra ã jêje reae. Sã amei mo ndiriñ nyeremo no. “Quiatu rã uvas ishao shao seje”, i que amei nguiirĩ ndiqui je ra. ²⁹ “Nya” i rei que eririñ ndiqui ñee ngu je ra. Aquere que ndua si chõ oso uvas ishao shao ra. ³⁰ “Quiatu rã uvas ishao shao seje”, i rei que amei ñee nguiirĩ nduinda je cote ra. “Se quiatu taso, Paba”, i rei que ee ra. Osoã ño ngue ra. ³¹ ¿Ma ngu cheẽ mumbayã ùquĩ mo nde? i que Jesús ñee judíos rerecua je ra. —Eriqui chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jêje. Cuñandu ata ata riqui Dios cheẽ andu turã jêsi ã. Impuestos isi isiquia abe riqui Dios cheẽ andu turã jêsi ã. Ùquĩ nda siqui tuchi Dios rese jêsi. ³² “Eĩ jenyẽ chõ siqui turã Dios je”, i rei que Juan el Bautista jembaaquiату quiatu ra. Jẽ nguiatu que echeẽ jemumbate ra. Cuñandu ata ata quiatu que echeẽ isi turã nda. Impuestos isi isiqui a rese. Ùquĩ ndese mae mose abe que jêya eã eã jêicuã ndese no nda. Jẽ echeẽ isi turã sacua.

Uva raarõsa icuã icuã nguerecua je

³³ ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jêsaarõ”, i que emo je cote

ra. Ae que oso isho itõte cote ra.
³⁴ Uva quiche mose que ngũimba mo mondo rei umbaerã ndea ra.
³⁵ Uva raarõsa que erimba mbucuasẽ icuã ño nda. Iruã nua ño ngue ra. Echa que ngũimba nongue mo abe mondo rei erea ra. Er-aarõsa que aque iquia ra. Enongue que echei chei tuchi mbuqui sita je ra. ³⁶ Eĩ eĩ mbei que eraarõsa quia echa rimba ja je ra. ³⁷ Aquere que echa nguiirĩ mondo erea cote ra. “Ireĩ ireĩ jiri ra seriirĩsi”, i rei que ra.
³⁸ Uva raarõsa mae mose erese que ñee nyue ra. “iCo eririñ ndu quia co cote jê! iNandeiquia rei jê! i nda uvas nandembaerã ae tuchi cote”, i que ñee nyue ra. ³⁹ Eraarõsa que eririñ isi icuã cote ra. Curuchoi que pe jiri iquia ra. Mano ngue cote ra. ⁴⁰ ¿Mañi nda echa quia eraarõsa je cote re? i que Jesús ñee mbia je ra. ⁴¹ Mbia que ñee ee ra. —Echa ra eraarõsa icuã iquia ja cote. Uva i ra emondo emo je eraarõ sacua cote. Ùquĩ nguia ra embaerã mee turã turã ee equiche mose, i que mbia ñee Jesús je ra.

⁴² Jesús que ñee mbia je ra. —¿Ã embesa ji rese jemae âte re?

Sã emo ndiqui tuchia ao sita je no. Sita mo ngue equirirõ mombo ra. Eicuâte eriqui rei nguia ee.

Aquere Dios emundua si erese. “Earonda sacua turambi chõ eriqui re”, i ndua si uchimombo rese.

Uchimombo que esirõ si cote ra.

Dios chiao chõ ùquĩ nde.

Dios chiao turã tuchi riqui nande je ã,

i ñi embesa ji re. ⁴³ Tacheẽ nyecua jêje. Jenderecua eã nyee ra Dios cote. Ae mbiamo nda Dios icua nae, ùquĩ nderecua quia ra Dios cote. ⁴⁴ Ae ra ngoi aque sita arõ nae, ùquĩ nda huẽ. Aque sita ngoi mose emo arõ, ùquĩ nda mano no, i que Jesús ra. —Aque sita rã ndei se, i chõ ngue re.

45 Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerĩ ño eriqui nguiã ñee co, i que ndua ndua ra. 46 Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

22

Jenyu quiaru sere, i raque emo uquiato je

1 Jesús que ejemplo mo senei mbia je ra. 2 —“Jenyu serea”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru sere”, i rei que uquiato je ra. Eriirĩ ngüinisi rea ramo mose. 3 Mbae quiche ja mose que ngüimba mo mondo rei mbia mbiirandu ra. Mbua que ngaẽ sereã nea ja chõ erea ra. 4 Ngüimba mo ngue emondobe rei erea ra. “Mbae quiche jate que ra. Ticuasú quira tuchi que equishĩ nda. Eriirĩ ngüinisirã isi ramo ndese jẽso mae. Jẽso quiaru erese”, i rei que erimba mbia je ra. 5 Ae je “jenyu” i nae, ñquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda. 6 Mbua que teã teã ja ra. Ererecua rimba iruã nua ño ngue ra. Eiquia chee. 7 Ñquĩ mose que ererecua paama i tuchi ra. Soldados que emondo ngüimba iquiasa iquiasa iquiasa ra. Echuchua abe rei rei. 8 Ererecua que ñee ngüimba je cote ra. “Mbae quiche chi ja raque a. Ae je ‘jenyu’ ae rei nyii nae, sã ñquĩ ngaẽ eã. Eicuãte quia ñene. 9 Jẽso ñee mbia ja je. Ishonda ja je. ‘Jenyu ja ererecua ririĩ ngüinisi rerequia ramo ndese mae’, jenyẽ oso quia mbia mbuchesea sea”, i que ererecua ñee nda. 10 Erimba que nyoi mbia mbiirandu randu ja ra. Mbua

turã mbiirandu. Mbua icuã abe mbiirandu randu no. Mbua que ngaẽ tuchi cote ra. Tuchua itãyã nyee que ra.

11 Ererecua que ique mbia tubiriã ndese mae cote ra. Emo irao icuãte que chi ee huee ra. Tiru ererecua chimondo emingue eã ñochĩ nguia reaẽ. 12 Ererecua que ñee ee ra. “Seriirĩ ndiqui ngüinisirã isi a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee eãte que ererecua cheẽ mose ra. 13 Ererecua que ñee ngüimba je cote ra. “Co jẽisi jẽ. Eo jenyucua. Ei abe jenyucua. Jenosẽ serao mombo itaicuee itondaruqui re. Huee ra nyeseo tuchi. Huee ra ureĩ quiti quiti tuchi”, i que ererecua ñee nda. 14 “Jenyu serui” i tuchi Dios quia mbia ja je co. Mbua mĩ mĩ ño eisirõ sirõ nguiã co, i que Jesús ñee nda.

¿Impuestos ra uremee ererecua je re? i mbia ñee Jesús je

15 —Jesús nandembucheẽ icuã na. 16 Jẽ nda mbia paama i ee, i que fariseos ñee ñee nyue ra. 16 Nyebe fariseos uchimbaaquiatu mo mondochoi nguiã Jesús rea. Herodes chimbaaquiatu rese. Jesús mbucheẽ icuã sacuã ño ñquĩ nde. Uturã ngue esaã ñooño Jesús je ra. —Jesús, co ereico mbia mbaaquiatu quiatu turãte co. Ndeturãte ereico mbia ja je co. Co ereico turãt e mbia mbuchiabiã co. Mbua erembaaquiatu quiatu turãte quia Dios icha riĩ co. 17 Nyebe urechu nguiã ñee ndeje a. ¿Coche mbia mbae isiqui a mee mee Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. 18 Jesús que ñquĩ icuã icuate ra. Nyebe ñee nguiã ee. —¿Mbaerã jẽingo “ĩ nda Jesús ucheẽ nyabi”, i seriĩ nde? 19 Mbae isiquia mo jẽteacuquia imbu seje, i que ee ra. Mbua que eteacuquia ee ra. 20 —¿Aba mbae

nombre ñi mbae isiqui a rese a re? ¿Aba ãquĩ aingue abe ñi a re? i que Jesús ee ra. ²¹—Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra. ²² Mbia que nyuruira jate u Jesús cheẽ andu ra. Nyoĩ ja que erecha cote ra.

Mbia raaque ra quera si, i Jesús

²³ —Mbia raaque ra quera eã mbei, i que mbiamo nguia ñee nda. Saduceos i que ãquĩ je ra. Ûquĩ mo ngue nyoĩ ñee Jesús je ra. ²⁴ —Sererecua, ã ngue Moisés mbesa nande je ra: “Emo mano mose eriirĩ, sã enongue mano je ninisi rerequia erendaque re. Sã tiirĩ ngõngue raaque riĩ”, i que Moisés embesa nande je ra. ²⁵ Eriqui mo ngue siqui urerese ra. Seis que eribi ra. Eriqui que ngũinisiã quereco rei ra. Mano ño ngue tiirĩ ndocoĩ ngũinisi recha ra. Enongue que nguiqui checha quereco rei cote ra. ²⁶ Ae abe que mano ño tiirĩ ndocoĩ no nda. Ûquĩ seis que ngõngue checha quereco ja rei ra. Mano ja chõ ngue tiirĩ ndocoĩ no nda. ²⁷ Eninisi eru checha que mano nyee chõ cote no nda. ²⁸ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re. ²⁹ Jesús que ñee ee ra. —¿Mbaerã jẽingo Dios cheẽ icua eãte ã nde? Jẽingo Dios cheẽ abi tuchi ã. Jẽingo Dios quirãcuã icua eãte ã. ³⁰ Ae raaque ra Dios mbuquera si nae, ãquĩ nda ngũinisi quereco eã mbei huee cote. Ûquĩ nda ngu quereco eã mbei huee cote no. Angeles rã mbei ra mbia rigui huee ibate cote. ³¹ Mbia raaque quera si riĩ ño ngue Dios jembiirandu rei ra. ¿Embesa ji rese jemae ãte re? ³² ã ño Dios cheẽ embesa ji re:

Abraham nderecua chõ aico nguĩã se co.

Isaac nderecua abe.

Jacob rerecua abe no,

i que embesa ji ra. ã ngue mano ndei nyii ra. Eresco siqui bei chõ nguĩã namo ã. Mbia raaque rerecua eã ño Dios re. Mbia reco rerecua chõ ae re, i que Jesús ñee mbia je ra. ³³ Mbia tubiriã ngue chi nyuruira tuchi eandu ra. Jesús mbae icua ja mose.

Echsecua tuchi quia Dios rese

³⁴ Jesús cheẽ aquiatu tuchi que ra. Nyebe saduceos cheẽ mbutiba nguĩã. Fariseos jirandu mose erese que ñumunua ñee nyue ra. ³⁵ —Se chõ tacheẽ Jesús je. Ma Jesús ñee icuã, i rei que fariseo mo nda. Embesasa que ae ra. ³⁶ —Jesús, Dios cheẽ tubiriãte rigui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que fariseo ñee Jesús je ra. ³⁷ Jesús que ñee ee ra. —ã ño Dios cheẽ ndiita ã nde: “Echsecua tuchi quia Dios rese. Ndechĩã je. Neaĩ je abe. Nendua ndua je abe”. ³⁸ Ûquĩ ño Dios cheẽ ndiita ãquĩ nde. Ûquĩ ño Dios cheẽ ñiinda ãquĩ nde. ³⁹ ã abe rei ãquĩ nduinda ã no: “Sã ereico nyesecua ndechiese no. Eĩ ere si chõ nyesecua mbia rese”. ⁴⁰ Moisés chimbesa tuchi chõ ãquĩ nde. Dios quiato cose ndare chimbesa ja chõ ãquĩ nde, i que Jesús ra.

¿Aba rucucha Cristo re?

⁴¹ Fariseos chichõ mose ñumunua ngue Jesús ñee ee ra. ⁴² —¿Aba rucucha Cristo re? ¿Aba jenyee equia ee re? i que Jesús ñee ee ra. —David nducucha chõ ñene, i que fariseos ñee nda. ⁴³ Jesús que ñee ee cote ra. —¿Mbaerã David “sererecua” i ee re no? Espíritu turã embucheẽ mose. ⁴⁴ ã ngue David ñee nda: Dios que ñee Cristo sererecua je ra: “Ecoi sejii. Nde abe ra ererecua serese.

Ae ndeucuayâte quia nae, ùquĩ je
ra ndequirâcuã ateacuquia
tuchi.

Ndequirâcuã tuchi chee ra ùquĩ sí”, i
que Dios ñee sererecua je ra,
i que David ra. ⁴⁵ David sí chõ
“sererecua” i nguiã Cristo je. Cristo
David rucucha mose, ¿mbaerã
David “sererecua” i ee re? i que
Jesús fariseos je ra. ⁴⁶ Ùquĩ ngue ñee
aquiutuãte Jesús cheẽ ndibishorõ
nda. Aque mose bei que mbia
preguntar i eã mbei Jesús je cote
ra.

23

Jesús ñee asi fariseos je

¹ Jesús que ñee uchimbaaquiātu
je ra. Mbia tubiriã je abe no.
² —Fariseos rã nda jëingochĩ jẽ.
Embesa rã abe ra jëingochĩ
jẽ. “Ure quia Moisés chimbese
ureicuate nguiã ure ã”, i chõ
nguiã. ³ Coche jëingo nguiã echeẽ
mumbayã ndaque. Erã sí quia
nda jëingoã nguiã. Echeẽ turã
turâte raque. Siqui turã eãte quiātu
nguiã. ⁴ Dios cheẽ embeta mbeta
tuchichĩ nguiã mbia je ã. Mbia
echeẽ mumbayã aroneate chee
quia ã. Eya eã eãte eriqui mbia
rese ã. ⁵ Mbae turã naa mose, mbia
mae sacua erese chõ ùquĩ nde.
Tiru huirao ibi quitinda ai mbiicoi
tuchi equia ã. Dios cheẽ mbesa ji
echucua bei quia uchiba cúa rese ã.
Mbia mae sacua erese chõ eriqui
nguiã ùquĩ naa naa ã. ⁶ Aba mbia
eã tuchi fariseos. “Serendarã turã
nguiātu se jẽ”, i tuchi equia mbia
chumunua nua mose ã. ⁷ “Sã mbia
ererecua i nande je”, i beite equia
ã. Ebi tuchi “mbia mbaaquiātusa”
i mose ee. ⁸ “Mbia mbaaquiātusa
rei se”, jenyechĩ nda jẽ. Se mii
ño jembaaquiātusa re. Nyiesenda
chõ jẽ nde. ⁹ “Paba” jenyechĩ nda
mbia mo je jẽ. Jendu mii ño siqui
nguiã ibate pe. ¹⁰ “Ererecuarã
se”, jenyechĩ nda eno. Se mii

ño jenderecua re. ¹¹ Jemo siqui
mingue mose, mbae raã naa
mose uataque je, aque quia ra
ererecuarã. ¹² Ae ucuasu raã naa
nguiã nae, mbia ñetẽ nda Dios saã
ño ùquĩ je. Ae siqui mingue quia
nae, mbia rerecuarã ño nda Dios
saã ùquĩ je.

¹³ Aba mbia eã tuchite jẽ, Embe-
sasa. Aba mbia eã tuchite jẽ abe no,
Fariseos. Jëcuasu jësaã saãte quia
ã. Jëingo sereãte quia Dios rese ã.
Mbia siquise mose Dios rese, jëingo
emingo eãte erese ã no. ¹⁴ Aba
mbia eã tuchite jẽ. Eru cheecha
mbae jembutiã tiã ñochĩ nguiã ã.
Ûquinde jëingo chõchĩ ñee oco oco
Dios je ã no. “I nda mbia mae
nanderese” jenyechĩ equia ã.
Nyebe ra Dios jembasi tuchi cote.
¹⁵ Aba mbia eã tuchite jẽ, Embe-
sasa. Aba mbia eã tuchite jẽ abe no,
Fariseos. Jëcuasu jësaã saãte quia
ã. “Jëingo ure rui” jenyechĩ
equia mbia je ã. Ùquĩ mo siqui
mose jendui, eicuã tuchi chõ ùquĩ
abe cote re.

¹⁶ Aba mbia eã tuchite jẽ. Sã
eresayã mo ndiqui emo ndesayã
mbuti echiba rese no. Ùquĩ na
ño jẽ nde. Jëaquiātuã ño mbia
mbaaquiātu quiatuchĩ nguiã.
“Jurar jenyechĩ mose Dios chuchua
rĩ, coche jeñee jembuchebi nguiã”,
jenyechĩ chõchĩ nguiã mbia je ã. “Jurar
jenyechĩ mose oro Dios chuchua
jenda rĩ, ùquĩ mose quiātu jeñee
jembuchebi aroneate nguiã”,
jenyechĩ chõchĩ nguiã mbia je ã. ¹⁷ ¿Oro
quiātu i tuchi jiri Dios chuchua
si re? ¿Mbaerã jëaquiātuãte riqui
re? ¹⁸ “Jurar jenyechĩ mose altar rĩ,
coche jeñee jembuchebi nguiã”,
jenyechĩ chõchĩ nguiã mbia je ã. “Jurar
jenyechĩ mose ofrenda altar jenda rĩ,
ùquĩ mose quiātu jeñee jembuchebi
aroneate nguiã”, jenyechĩ chõchĩ
nguiã mbia je ã. ¹⁹ Eresayã na
tuchi chõ jëingochĩ nguiã. ¿Mbaerã

jëaquiatuâte riqui re? ¿Ofrenda quiatu i tuchi jiri altar si re? ²⁰ Jurar jenyé mose altar riñ, earonda abe riñ ño jëingo nguiã jurar i ofrenda. ²¹ Jurar jenyé mose Dios chuchua riñ, Dios abe riñ ño jëingo nguiã jurar i. Dios abe quia siqui nguiã uchuchua huee. ²² Jurar jenyé mose ibei riñ, Dios renda abe riñ ño jëingo nguiã jurar i. Dios sí riñ abe no.

²³ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Décimo jemee mee ndaque quia Dios je mbae ñetë nñi. Comino. Menta. Anís. Dios cheë ndiita quiatu jemumba mumbate nguiã. Dios jëicua rá nyii. Jëingo turã na nyii. Jëya eã na mbia rese nyii. Aquere quiatu mbae ñetë jësaã cote. ²⁴ Sã eresayã mo ndiqui emo ndesayã mbuti echiba rese no. Ûquĩ na ño jë nde. Mbae ñetë jësaã turã turâte raque quia ã. Dios cheë ndiita quiatu jemumba mumbate nguiã. ²⁵ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Sã emo ndiqui i riru irei irei earonda no. Eimi nguiatu eirei quiiriãte re. Eĩ ño jë no nde. Jëturã aba reã ño jëaronda no nde. Jeñiangui renda quiatu eicuã icuãte re. Mbae quia jembuquiachã quiachãte nguiã. Mbae abe quia jenyosei icuã icuãte nguiã. ²⁶ Eresayã na tuchi chõ jëingochĩ jë nde, Fariseos. Jeñiangui renda rane nguiatu jëirei. Jëaronda abe ra equishĩ cote.

²⁷ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Mbía raaque tãsa rá ño jëingo nguiã. Eati ji turâte raque. Eimi ye quiatu mbía raaque quiangue chi nguiã hue. Eroo cuí abe no. ²⁸ Eĩ si chõ jë nde. Jëaronda turâte aba reã ndiqui raque mbía je. Jeñiangui

renda a quiatu eicuãte re.

²⁹ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Ae mbía turã mano cose nae, Ûquĩ tãsa jembiitã turã mbeite raque quia ã. Dios cheë mbuchecuasa tãsa abe no. ³⁰ “Cose ureico mose, i nda ureicuã eãte rei Dios quiato je. Ureramei na eã”, jenyé raque equia ã. ³¹ “Mbía iquia iquiasa ri-irĩ ño ure re”, jenyete equia Ûquĩ. Jendu rá si tuchi jë. Mbía i quiasa. ³² Jenamei icuã na si chõ jëingo no. ³³ Mbei tásie rá tuchi chõ jë nde. Eĩ jenyé bei oso quia aque ngasë nyee tata cuasu. ³⁴ Nyebe ra Dios cheë mbuchecuasa amondo mondo quia jëje. Mbía mbaaquiatusa ra amondo jëje. Mbía aracua abe no. Jë nda sechimondo emo emo jëiquia. Emo emo nda jëiruã nua mbía chumunuásaa no. Jëico ico ra equia erese eiquia chee. ³⁵ Ae Dios quiato iquia iquia quia cose nae, Ûquĩ nñi nda Dios jembasi cote. Sã mbía Abel iquia cose no. Sã mbía Zacarías abe iquia Dios chuchua jii no. Berequías riirĩ ndei aque. Sã mbía Dios quiato iquia iquia bei cose no. ³⁶ Ûquĩ ja riñ nda Dios jembasi cote. Acheë nyecua quia jëje a.

Jesús ia eã tuchi Jerusalén jenda rese

³⁷ Tacheë na jëje, Jerusalén jenda. Seya eãte aicochĩ jendese co. Hue jëingo mbía iquia iquia beite hue. Dios cheë mbuchecuasa iquia iquia. Dios chimondo abe iquia iquia no. Sã nguira riqui nguiire reaquiato mondo ujeoqui re no. “Eĩ tae jendeaquiato”, ae beite rei nguiã jëje co. Secheë jëisi sereã mbei chõchĩ nguiã ã. ³⁸ ¡Aico jendecha a cote jë! ³⁹ Jemae mae eã nda serese cote. Sechube mose ibate si, aque ramo mose ra jemae serese cote. “¡Co chi Dios rucucha ru quia co cote jë!” i ra mbía seisi

turã aque mose cote, i que Jesús ñee nda.

24

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Ecuata mose que echimbaaquiatu ñee ee ra. —Sã Dios chuchua turã tuchite jẽ, i que ñee ee ra. ² Jesús que ñee ee ra. —Tacheẽ nyecua rã jẽje. Ae rese jẽingo mae ã nae, ùquĩ nda mbia mbucoi ja cote. Sita mo nda chi eã nyichuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiatu que ngasẽ ñee eĩsaa ra. —¿Manosete ra ùquĩ nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiatu ñee Jesús je ra. ⁴ Jesús que ñee ee ra. —Jẽtesa jiri quia jẽ. Mbia mo nda jembĩrĩ irĩchĩ ñee jẽje jẽ. ⁵ “Cristo chõ se re”, i ra mbia ñee ata atate jẽje. Ùquĩ ñee nda jeñanduchĩ jẽ. Ùquĩ nda mbia mbĩrĩ irĩ jate. Ñee ñooño je chõ ùquĩ nde. ⁶ Mbia ra guerras saã saã tuchi. Mbia ra ñee ñee tuchi quia nyĩiquia iquia je rĩĩ. Ùquĩ mose ra jẽsiquichechĩ jẽ. Ùquĩ ja rane nda nyecua raque. Aque mose ra mbae ja ua eã ná. ⁷ Mbia ra guerras saã tuchi chee. Nyĩiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. ⁸ Jembasi ramo mose chõ nda ùquĩ nde. Aquere ra jem-basi tuchi cote.

⁹ Mbia icuã icuã tuchi r a jẽje serĩ. Nguerecua je ra mbia jenderao rao tuchi. Jẽiquia chee rae.

Mbia mangue chooñoa jenda ra jẽucuayã tuchi serĩ. ¹⁰ Ae siqui quia serui nae, ùquĩ tubĩriã nda hui sesi ùquĩ mose cote. Ùquĩ nda nyĩucuayã. Ùquĩ nda nguerecua mbuqueta queta tuchi ngõngue rĩĩ. ¹¹ “Dios cheẽ mbuchecuaasa chõ se re”, i ra mbia ñee ata atate jẽje. Ùquĩ nda mbia mbĩrĩ irĩ tuchi. ¹² Mbia icuã icuã tuchi ra cote. Aba cheẽ mumba mumba beite ra cote. Mbia ra nyesequa eã tuchi nyiese cote. ¹³ Ae ra siqui bei serese, ùquĩ nda Dios mingo bei. ¹⁴ Sequiato r a Dios cheẽ turã senei senei ná mbia ja je nyii. Mangue chooñoa jenda ja je. Aquere ra mbae ua ja cote.

¹⁵ Dios cheẽ mbuchecuaasa rei Daniel. Ae que embesa Mbae Mbutiãsa Icuã nĩ nda. “Dios rendaque re taico se quiatu”, i ra equia huee. (Ae ra mae nguia sechimbese rese nae, sã ùquĩ eicua.) ¹⁶ Jemae mose Mbae Mbutiãsa Icuã ndese, jeña esi. Ae siqui quia Judéaa, sã ùquĩ uchã jei choi ibi ibátee mo. ¹⁷ Ae ra siqui tuchia quite rese, sã ùquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoi. ¹⁸ Ae ra siqui úcoo, sã ùquĩ nyebiã ngaẽ huĩrao rea. Sã hue si bei chõ echoi uchã. ¹⁹ Aba mbia eã tuchi ra emo ãquẽ ndiru rerequia mose aque mose. Nguĩrĩ mbuquiambu je abe no. ²⁰ “Nyiiiseĩ mose eã urechã” jenyẽ Dios je. “Sábado mose eã abe urechã”, jenyẽ abe Dios je no. ²¹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacuã ño ùquĩ nde. ²² Ae rasi ra mbia saã tuchi nae, ùquĩ nda Dios mbujua jiri uquiato rĩĩ. ¹ nda emo ñĩmbirãcuã eã tuchi rei ùquĩ ndasi je. ²³ “A Cristo riqui a jẽ” i mose emo jẽje, “nyia” jenyechĩ nda ùquĩ ñee mose jẽ. “Hue Cristo riqui hue jẽ” i mose emo jẽje, “nyia”

jenyechĩ nda eno jẽ. ²⁴ “Cristo chõ se re”, ichõĩño nda mbia ñee ata atate jẽje. “Dios cheẽ mbuchecuaa chõ se re”, ichõĩño nda mbia ñee ata atate jẽje no. Mbia mae sayã nda esaã saã tuchi mbia mbĩrĩ irĩ sacua. Ũquĩ Dios quiato abe chee mbĩrĩ irĩ arõte. ²⁵ Ũquĩ nonde chõ aico nguiã jembiirandu randu co. ²⁶ “Hue Cristo riqui turuquia hue”, ichõĩño nda mbia jẽje serĩ. “A Cristo riqui tuchua a”, ichõĩño nda emo jẽje serĩ no. Ũquĩ mose ra “nyia” jenyechĩ jẽ. ²⁷ Sã amandiqui pirirã i ibei resae ja no, eĩ nda sechu mose. Mbia ra mae ja serese. ²⁸ Sã urubu riqui mae ja mbae raaque rese no. Eĩ si ra seicuaa mae ja sechu rese no.

Dios riirĩ nda tube ibate sĩ

²⁹ Mbia ũquĩ ndasi raã ja mose r a tenda checuayã mbei cote. Nyasi abe no. Nyasitata ra ngoi ngoi. Ibei jenda abe ra quiata quiata chee cote no. ³⁰ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. Mbia ra mae ja tuchi sechu rese mangue chooñoa jenda ja. Mbia ia eã tuchi ra nyeseo mae mose serese. ³¹ Angeles serimba ra amondo corneta mbucheẽ sacua. Ũquĩ nda mbia sechiisirõ munua nua ja seje cote. Ishonda ja. Mangue chooñoa jenda ja.

³² Sã higuera riqui no. Sã ira mo ndiqui no. Ero quira usẽ j a mose, “iraro itõ ndacu ra cote”, ichõ mbia nguiã aque mose. ³³ Eĩ sĩ ra mbae ua ja nonde. Ae riĩ aico ñee jẽje nae, ũquĩ ndese jemae mose, “mbae ra ua ja cote” jenyera cote. ³⁴ Tacheẽ nyecua jẽje. ã mbia riqui ngata ibi ã nae, ũquĩ emo emo nda manoã mbae ua ja nonde. ³⁵ Ibei ra ua. Ibi abe ra ua no. Secheẽ nguia ra ua eã mbei.

³⁶ Manosete chõ nda mbae ua ja. Aico eicuayãte co. Mbia mo

abe eicuayãte quia ã no. Angeles abe eicuayãte quia ã no. Paba miĩ ño eicua nguiã co. ³⁷ Sã Noé mosenda mbia siqui sereãte Dios rese cose no. Eĩ si ra mbia siqui sereã Dios rese sechu nonde no. ³⁸ Sã Noé mosenda mbia quiaru chooño no. Ndua rocoĩ Dios rese. Ngũinisirã ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde. ³⁹ Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose. ⁴⁰ Sechu mose ra mbia ny-eremo siqui úcoo. Co miĩ nda arao. Enongue ra siquichõ. ⁴¹ Cuña ny-eremo nd a chi raque mbua tocho no. Co miĩ nda arao. Enongue ra siquichõ. ⁴² Jẽtesa bei quiatu quia serese. Ae mose ra achu, aque tenda rese jẽiranuate riqui ã. ⁴³ Mbaecha mo jirandu mose mbae mbuquiachãsa rese, “co isa ra eru” i mose, ũquĩ mose nda uqueã nde chaẽ. 1 nda mbae mbuquiachãsa mbae sirõ eã ndei. ⁴⁴ Jẽingoquiatu bei quiatu quia seraarõ arõ. Jenda eã mose serese ra achu jembuate.

Erimba echeẽ mumbayã mose, eya tuchi rae

⁴⁵ Dios rimba aba cheẽ mumbayã je aico ñee a. Dios rimba aquiatu je aico ñee a. Sã erere-cua mo ñee ngũimba turã je no. “Sembae esaarõ turã ja quia secutiã. Serimba ataque embuquiaru quiaru turã secutiã”, i que erere-cua ee ra. ⁴⁶ Erimba echeẽ mumbayã mose, ererecua ia tuchi ra eru mose. Erimba abe ra eya tuchi no. ⁴⁷ Ererecua ra ngũimba miĩ umbae raarõ mbei sacua cote. ⁴⁸ Sã erimba ndua ndua uchiangui re no. “Sererecua ra tu jei ãte” i ndua ndua. ⁴⁹ Hue ñee icuã icuã uataque je hue cote. Iruã nua cote. Quiaru chooño cote. Mbae mbei chooño abe cote. Quiacua quiacua mbia

icuã ndese cote. ⁵⁰ Sã ererecua ruchi nguia ngũimba mbuate aque mose cote jẽ. ⁵¹ Ererecua ra eĩruã nua tuchi. Mombo rae. Mbae rasi ra esaã tuchi. Ae ucuasu saã saã nguia nae, ũquĩ ndese ra mbae rasi raã tuchi cote. Nyeseo seo tuchi ra equia. Ureĩ nda equiti quti tuchi.

25

Nyucuaaque icoquiātu je

¹ Nyucuaaque icoquiātu je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoĩ ja quia ra. ² Cinco que icoquiātu je ra. Cinco que icoquiātuã je no nda. ³ Ae icoquiātuã nae, ũquĩ ngue mbae quira curuchoĩ eã umbae lamparina mombisẽ sacua nda. ⁴ Ae icoquiātu nae, ũquĩ ngue mbae quira curuchoĩ botella ye ra. Lamparina ye abe. ⁵ Ae ra ngũinisi isi reĩ nguia ee, aque que itõte ee ra. Nyucuaaque reesi esi chee que ra. Uque uque ja chee que ra. ⁶ Itondiite mose que to i andu cote ra. “Co erurã ndu quia co cote jẽ. Jẽso mae erese cote”, i que mbia tasẽ tasẽ ee ra. ⁷ Nyucuaaque que nyuruã ja cote ra. “Nandembae lamparina nandemombisẽ mbisẽ ja”, i rei que ra. ⁸ Ae icoquiātuã nae, ũquĩ ngue ñee ndei icoquiātu je ra. “Urembae uque uquete. Mbae quira ñetẽ jeme mee na ure je”, i rei que uataque je ra. ⁹ “Ateẽ. Nande ja chayãte ra resẽ. Emo jẽisi chõ oso icua”, i que icoquiātu je ñee ee ra. ¹⁰ Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiātu je que nyoĩ ique erese ra. Ngũinisiã isi ramo ndese mae. Quiaru abe que echoi erese ra. Eiquesa que ematã cote ra. ¹¹ Icoquiātuã je abe que ngaẽ nyee ra. I que eiquesa matã ji mi ee ra. “Embuquiata rã ure je”, i rei que ñee eru je ra. ¹² Eru que ñee ee

ra. “Tei. Jaẽicuayã tuchite se”, i que eru ñee ee ra, i que Jesús ñee mbia je ra. ¹³ —Jẽingoquiātu bei quia jẽ. Ae mose ra achu, ũquĩ jẽicuayãte quia ã.

Ererecu a mbae isiquia mbuchao chao ngũimba je

¹⁴ Sã ererecua mo mbae isiquia mee mee ngũimba je no. Eĩ si chõ Dios nguia mbae mee mee ngũimba je. Ererecua oso serĩ mose que umbae mbae isiquia mee mee ngũimba je ra. Embaata ata sacua ño ngue emee nguia ee. ¹⁵ Cinco mil que emee emo je ra. Dos mil enongue je no. Un mil que enongue je no nda. “Jenya chõ tamee mee jẽje jẽ”, i que ñee ee ra. Secha que oso isho cote ra. ¹⁶ Ae je ererecua cinco mil mondo nae, aque que negocio saã saã mbae isiquia je ra. Mbae isiquia que embaata tuchi ra. ¹⁷ Ae je ererecua dos mil mondo nae, aque abe que negocio saã saã mbae isiquia je ra. Mbae isiquia que embaata tuchi no nda. ¹⁸ Ae je ererecua un mil mondo nae, aque que ibi sibicoi mbae isiquia rerecoquiātu sacua nda. ¹⁹ Emo mose tuchi que ererecua ru cote ra. Ñee ngue ngũimba je cote ra. “Jenyu sembiirandu sembae mbae isiquia rese cote”, i que ñee ee ra. ²⁰ Ae je cinco mil mondo nae, aque rane ngue tu ñee nguerecua je ra. “Cinco mil que eremee ndei seje nae, ũquĩ ngue ambaata ra. Cinco mil que aisibe ra”, i que emee ja nguerecua je ra. ²¹ Ererecua que ñee ee ra. “Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiātu seje cote. Ndeya bei tuchi ra ereico serese cote”, i que ererecua ñee ee ra. ²² Ae je ererecua dos mil mondo nae, aque que tu ñee nguerecua je cote ra. “Dos mil que eremee ndei seje nae, ũquĩ ngue ambaata ra. Dos mil que aisibe ra”, i que emee

ja nguerecua je ra. ²³ Ererecua que ñee ee ra. “Coche ñene. Nde quiarei serimba turã tuchi. Mbae ñetê ngue eresaã turãte nde ra. Nyebe ra mbae tubiriã ereteaquiatu seja cote. Ndeya bei tuchi ra ereico serese cote”, i que ererecua ñee ee ra. ²⁴ Ae je ererecua un mil mondo nae, aque que tu rei ñee nguerecua je cote ra. “Nde que ere queteãte quiatu nguiã mbae rese. Ndechitiquia eã abe ereishao shaote quia co. ²⁵ Nyebe asiquiche tuchi nguiã mbae isiquia mee mose seja. Nyebe achati nguiã ibi je. Co é co resê”, i que ñee nguerecua je ra. ²⁶ Ererecua que ñee ee ra. “Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheẽ eremumba re? ²⁷ Sembae mbae isiquia eremonaõ ñochĩ banco. I nda eata jiri sechu mose cote re chã”, i que ererecua ñee asite ee ra. ²⁸ Ererecua que ñee mbi a hue jenda je cote ra. “Mbae isiquia jêsirõ na esi un mil. Ae diez mil quereco nae, aque je jemondo. ²⁹ Ae embae tubiriãte nae, aque je mbae tamondobe. Ae embae ate nae, embae ñetê tasirõ ja esi. ³⁰ Co que serimba icuã tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Urei nda equiti quiti tuchi”, i que ererecua ñee nda.

Jesús ra mbia emo emo mingo icúe umbaerã

³¹ Sechu mose íbii mbia rerecuarã, ángeles sembae ra semama tuchi aque mose. Serenda nininya tuchi ra aque mose. ³² Mbía mangue chooñoa jenda ja ra chi ñumunua huee aque mose. Mbía emo emo nda achono icúe sembaerã aque mose. Sã oveja raarõsa riqui ovejas no icúe chivos si no. ³³ Uquiato cuti ra ovejas no. Uquiato cutiã nda chivos no no. ³⁴ Eĩ ae ra se mbia rerecua tuchi mose. Acheẽ nda mbia

sequiato cutinda je. “Jenyu serese. Jenderecua turã tuchi ra aico jêje. Paba turãte riqui jêje co. Paba que jêirabo nyii mbae ao nonde ra. Jêingo sacuã serese. ³⁵ Seriãcuã mose que mbae jemee seja ra. Seisei mose que sembiu ra. Sechuchua eã mose que seisi turã no nda. ³⁶ Seirao eã mose que tiru jemee seja ra. Serasi mose que jêso mae serese ra. Seico mose cárcel que jêso mae serese no nda”, ae ra ñee sequiato cutinda je. ³⁷ Sequiato cutinda ra ñee seja cote. “¿Manose mbae uremee ndeje nderiãcuã mose re? ¿Manose ureso nembiu ndeisei mose re? ³⁸ ¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re? ³⁹ ¿Manose ureso mae nderese nderasi mose re? ¿Manose ureso mae nderese ndeico mose cárcel re?” i tuchi ra ñee seja. ⁴⁰ Aque mose ra acheẽ ee. “Tacheẽ nyecua jêje. Senongue mo mbaech a reã ndaque. Ae turã jêsaã senongue mo je nae, seja eraã naanguia chõ ñquí nde”, ae ra ñee ee. ⁴¹ Acheẽ nda sequiato cutiã quitinda je cote. “Jêso sesi. Mbae turã nda jêisiã seo jenda. Jêso tata cuásuu. Ae Dios chiao tata, diablo mbasi sacuã. Diablo rimb a abe mbasi sacuã. Ñquí tata ra uqueã mbei. ⁴² Seriãcuã mose que mbae mo jemee eãte seja ra. Seisei mose que sembiu eãte no nda. ⁴³ Sechuchua eã mose que seisi turã eã nda. Seirao eã mose que tiru jemee eãte seja ra. Serasi mose que jêso eãte mae serese ra. Seico mose cárcel que jêso eãte mae serese no nda”, ae ra sequiato cutiã quitinda je. ⁴⁴ Sequiato cutiã quitinda ra ñee seja cote. “¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no. Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde

no?” i ra sequiato cutiã quitinda ñee seje. ⁴⁵ Acheẽ nda ee. “Mbae turã jêsaã eã mose emo je, seje eraã eã naanguia chõ ùquĩ nde”, ae ra sequiato cutiã quitinda je. ⁴⁶ Ûquĩ nda nyoĩ ja tata cuasu cote. Huee ra mbae rasi raã mbei tuchi cote. Sequiato cutinda quia ra sigui turã mbei ibate cote, i que Jesús ñee nda.

26

Jesú nandeisi tarõ, i ja ererecua nyue

¹ Aquere que Jesús ñee uchimbaaquiato je cote ra. ² —Dos días mose ra fiesta de la pascua cote. Aque mose ra mbia icuã semee ererecua je seiquia sacuã, i que Jesús ñee nda. ³ Sacerdote rerecua que ñumunua ja cote ra. Amei ja rese. Embesasa rese abe no. Ûquĩ ngue ñumunua ja u Caifás itaicuee ra. Caifás rei sacerdote rerecua tuchi. ⁴ Caifás itaicuee que ùquĩ nyi ñee ñee Jesús rĩ nda. — Jesús nandembĩrĩ irĩ jẽ. Eisi sacuã. Etarõ sacuã. Eiquia sacuã cote, i que u ñee ñee nyue ra. ⁵ —Fiesta mose eã ño nandeisi jẽ. Mbua ra paama i tuchi nande je, i que u ñee ñee nyue ra.

Cuñã mo aba mbusimbua turã ichusẽ Jesús aqũ ndese

⁶ Jesús que sigui Simón Leproso chuchúaa ra. Betania, i que hue je ra. ⁷ Cuñã mo ngue tu erea hue ra. Aba mbusimbua mo ngue equeru Jesús je ra. Embisẽ tuchi que equeru ra. Mbae isiquia mumbasa tuchi que ùquĩ nda. Ichusẽ ja que Jesús aqũ ndese equiaru mose ra. ⁸ Echimbaaquiato que chi ja mae erese ra. Paama i que cuñã je ra. ⁹ —¿Mbaerã eichusẽ ñooño nde? Mbae isiquia ribishorõ ño nda aba emondo re. Mbaecha reã je emee mee sacuã, i que echimbaaquiato ñee nyue ra. ¹⁰ Jesús que echeẽ ñandu ra. Ñee ngue ee ra. —¿Mbaerã jẽingo ñee ùquĩ nde? Sã cuñã ae

riqui ae. Ae esaã seje nae, eturãte seje ùquĩ. ¹¹ Mbaecha reã nguia ra chi arete íbii a. Se quia nda aico bei eã nguia jendese aa. ¹² Seati nonde chõ ngue cuñã aba mbusimbua ichusẽ nguia serese. ¹³ Tacheẽ nye-cua jẽje. Mbua Dios cheẽ turã nenei nenei mose mangue chooñoa jenda ja je, cuñã nyisaã abe ra esenei senei. Mbua ndua turã ja sacuã echisaã abe rese, i que Jesús ñee uchimbaaquiato je ra.

Jesús tamee jẽje, i Judas mbia icuã je

¹⁴ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. ¹⁵ —Jesús tamee jẽje. ¿Mbae ra jemee seje eribishorõ nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra. Treinta que ra. ¹⁶ —Mbua eãsa quiato Jesús tamee jẽje, i que Judas ñee ee ra.

Jesús quiaru uchimbaaquiato rese

¹⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. Fiesta nonde que echimbaaquiato ñee Jesús je ra. —¿Mangue ra oveja urembuchi mangue ndechiurã nde? i que ñee Jesús je ra. ¹⁸ Jesús que ñee ee ra. —Jẽso sucha cuasu. Jẽnee aque je. “Jesús que urembu ñee ndeje ra. ‘Ndechuchua oveja tau sequiato rese semana nonde’, i que Jesús ucheẽ mbu ndeje ra”, janye aque je, i que Jesús ñee nda. ¹⁹ Echimbaaquiato que nyoĩ erea Jesús cheẽ nguire ra. Oveja que embuchi huee cote ra.

²⁰ Itondaru ramo mose que Jesús chi quiaru uchimbaaquiato rese huee cote ra. ²¹ Quiaru mose que Jesús ñee ee cote ra. —Tacheẽ nye-cua jẽje. Jemo nda semondo mbia icuã je, i que ñee uchimbaaquiato

je ra. ²² Echimbaaquiatu ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²³ Jesús que ñee ee ra. —Ae chí quiaru serese aque plato ye sí a nae, aque tuchi ra semondo mbia icuã je. ²⁴ Dios cheẽ ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra. ²⁵ —¿Se ra aremondo mbia icuã je re? i que Judas ñee Jesús je ra. Jesús rĩ ñeende mbia icuã je nyii. “Ae” i que Jesús echeẽ mose ra.

²⁶ Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jẽu. Serete chõ ã nde, i que Jesús ñee ee ra. ²⁷ Vino mbeisa que esirõ cote no nda. Gracias i que Dios je ra. Mondo que uchimbaa quiatu oo cote ra. —Jembei mbei ja. ²⁸ Seruqui chõ ã nde. Mbiambuia mbutiã sacua ño seruqui re. Dios cheẽ yasu rui si chõ seruqui riqui nguia mbia icuã mbutiã co. ²⁹ Tacheẽ nyecua tuchi jẽje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia jendese cote, i que Jesús ñee nda.

Jesús aicuayãte resẽ, ichõño nda Pedro serĩ, i Jesús

³⁰ Irasei rasei que cote ra. Nyoĩ que Monte de los Olivos ra. ³¹ Jesús que ñee uchimbaaquiatsu je ra. —Jẽireĩ ireĩte ra serĩ co isa. Jeñimboseĩ mboseĩ nda oso serecha co isa. Sã embesa ji riqui ñee no: “Dios ra oveja raarõsa iquia. Oveja ra ñimboseĩ nyoĩ cote”, sã embesa ji riqui i no. ³² Seraaque quera sire ra aso se rane jendaarõ Galilea, i que Jesús ra. ³³ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã

mbei ndesi, i rei que Pedro ñee ee ra. ³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra. ³⁵ Pedro que ñee ee ra. —Mbiambuia sei quia arõte raque nderĩ, acheẽ ñooño eã nda nderĩ, i rei que Pedro ra. Eĩ ja que ñee nda.

Jesús ñee ngu je

³⁶ Jesús que oso Getsemanĩ cote ra. Uchimbaaquiatsu rese. —Jengoi rã u aa. Taso rã ñee Paba je pe jiri se, i que Jesús ee ra. ³⁷ Pe quiti jiri que Pedro rerao ra. Zebedeo ririĩ nyeremo ndese. Eya eã ndasi tuchi que tu ee aque mose ra. ³⁸ Ñee ngue ũquĩ je ra. —Seya eã ndasi tuchi aico co. Seya eã ndasi ra sei quia chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁹ Jesús que oso pe quiti jiri cot e ra. Nyibi que u nguia ndese ñee Dios je ra. —Paba, ũquĩ ndasi asaã sereãte raque quia co. Ae sebite riqui nae, ũquĩ ndese semingo eã. Ae ndebite riqui nae, ũquĩ ndese quiatu semingo, i que Jesús ñee Dios je ra. ⁴⁰ Nyebi que u uchimbaaquiatsu je cote ra. I que eu uque ja ee cote ra. Ñee ngue Pedro je ra. —Jẽingo areã ñochĩ tesa serese se ñee mose Dios je. ⁴¹ Jẽtesa tesa u. Jengue eã u ñee Dios je. Mbae icuã tã i eã sacua jẽje. Jẽingo serete raque serese. Mbae icuã nguia jembuti mbutite nguia, i que Jesús ee ra. ⁴² Osobe que ñee Dios je pe jiri cote ra. —Paba, nde ñee mose seje, “mbae rasi ra eresaã” nde i mose seje, asaã nda se, i que ñee Dios je ra. ⁴³ Nyebi que u uchimbaaquiatsu je cote ra. I sí que u uque ee no nda. Eresa quiatu ngue eshiu shiute nguia. ⁴⁴ Jesús que osobe erecha ñee Dios je ra. Tres veces que aque cote ra. Hue rĩ si que ñee Dios je ra.

⁴⁵ Uchĩmbaaquiatsu jii que esi ñee ee cote ra. —Jengue cote. Jenguenea jẽucua cote. Semondo ra mbia icuã je cote. Seiquia sacua. ⁴⁶ Jẽhuã cote. Nyao cote. Ae ra semee mbia icuã je, co eru quia semee sacua co cote, i que Jesús uchĩmbaaquiatsu je ra.

Mbia icuã Jesús isi suruchoi

⁴⁷ Jesús cheẽ mosebe tuchi que Judas ru erea ra. Jesús chĩmbaaquiatsu rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ãquĩ mbucuaẽ nguia reaẽ. Amei abe. ⁴⁸ Judas ñee nyecuayã nguiatsu quia ãquĩ je nyii reaẽ. —Ae ritii ra asiite, aque chõ ñene. Aque jẽisi serao, i quia equia ee nyii reaẽ. ⁴⁹ Jesús riichã ngue esi saludar i ee cote ra. Jesús ritii que esiite ee cote ra. ⁵⁰ —¿Mbaerã erechu serea re? i que Jesús ee ra. Mbia que ngaẽ Jesús isi ecua cote ra. ⁵¹ ãquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁵² Jesús que ñee ee ra. —Ndechuuru emingue chõ eriru ye. Nde emo nyĩsha mose tiquise je, nde abe ra emo ndeisha. ⁵³ ¿Ndeiranuate ángeles rese re? Se ñee mose Paba je, ángeles tubiriã tuchi nda embu seje re chaẽ. Sereaquiatsu sacua. ⁵⁴ “Ángeles embu rã sereaquiatsu”, ae eã nda Paba je. ãquĩ mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra. ⁵⁵ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoi jenyuchĩ nguia serea co. Tenda que amumba mumba beite rei quia jendese Dios chuchua resẽ. Mbia que ambaaquiatsu

quiatsu bei rei quia huee resẽ. ¿Mbaerã seisiã nyucua aque mose re? ⁵⁶ Embesa ji ique sacua ño jẽicuã icuã ndiqui nguia seje ã, i que Jesús ra. Echĩmbaaquiatsu que nyoi ja chee uchã Jesús recha ra.

Jesús mbia curuchoi mbia rerecua je

⁵⁷ Ae Jesús isi nae, ãquĩ ngue ecuruchoi sacerdote rerecua je ra. Huee que embesasa chi ja ñumunua nda. Amei ererecua ja abe. ⁵⁸ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que hui ngoi eraarõ arõ nda. ⁵⁹ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandequia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u ñee ñee nyue ra. ⁶⁰ Emo emo ngue ngaẽ ndei ñee icuã icuã Jesús riĩ nda. ãquĩnde que mbia nyeremo ngaẽ ñee ñooño Jesús riĩ nda. ⁶¹ —Jesús que ñee ñooño Dios chuchua riĩ nda. “Dios chuchua ra ambucoi. Tres días mose ra achaobe”, i que urechandu Jesús cheẽ nda, i que ãquĩ ñee ñooño Jesús riĩ nda. ⁶² Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderĩ nde? i que Jesús je ra. ⁶³ Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Diósaa echeẽ ure je, i que sacerdote rerecua ñee ee ra. ⁶⁴ Jesús que ñee ee ra. —Ae. Dios rucucha chõ se re. Tacheẽ nyecua jẽje. Jemae nda serese se coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶⁵ Sacerdote rerecua que paama i tuchi Jesús cheẽ mose ra. Huiirao que endoro ndoro chee

ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ⁶⁶ ¿I jêje re? ¿Mañi nande ra equia re? i que sacerdote rerecua ñee ererecua ataque je ra. —Eicua tuchi que ra jê. Sã mbia eiquia, i jate que ererecua ñee Jesús rĩ nda. ⁶⁷ Mbia que ñinimbu nimbu Jesús ruba resê cote ra. Ucuu ucuu abe que erese ra. Emo emo ngue eritii mbeete ete o je ra. ⁶⁸ Ñee ngue ee ra. —“Cristo chõ se re”, ere ñi equia. Aba chõ ucuu nderese chã. Ma eicua no, i que mbia ñee icuã icuã ee ra.

Jesús aicuayãte reseẽ, ichõño Pedro

⁶⁹ Pedro que chĩ mbeite ngoi itaieuee ra. Nyucuaaque mo ngue tu ñee ee mbia rimba mo nda. —Jesús resenda que nde abe ra. Galilea jenda, i que nyucuaaque ñee ee ra. ⁷⁰ Pedro que ñee ee ra. —Tei. Ndecheẽ aicuayãte, ichõño ngue Pedro mbia résaa ñee ee ra. ⁷¹ Pedro que oso quia eiquesa cuti cote ra. Nyucuaaque nongue que ñee mbia je erĩ nda. —Co abe que Jesús resenda ra. Nazaret jenda, i que ñee mbia je ra. ⁷² —Tei. Jesús aicuayãte, ibe que Pedro ñee icuã ee ra. ⁷³ Ae chi huee nae, ñquĩ mo ngue ñee Pedro je cote ra. —Jesús resenda chõ nde abe resẽ. Ndecheẽ aba chiicuate resẽ, i que ñee ee ra. ⁷⁴ Pedro que jurar i tuchi ñee ee ra. —Aicuayã tuchite se resẽ, i que ñee ñooño nda. Aque mose tuchi que nguira ñee cote ra. ⁷⁵ Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñooño tres veces serĩ, sã Jesús i ee nyii no. Ñquĩ ndese que Pedro ndua cote ra. Nyebe esi nguia usẽ nyeseo tuchi.

27

Mbia Jesús curuchoi Pilato je

¹ Nyaashĩ namo mose que sacerdote rerecua ndua hue rĩ ja ra. Amei mbia rerecua ja abe no. Hue rĩ ja ndua Jesús iquia sacua. ² Jesús que echucua suruchoi Pilato je ra. Pilato rei mbia rerecua, hue jenda ja rerecua.

Judas uchoso mumbi nyiquia

³ Mbia ra Jesús iquia, i mose Judas je, eya eã tuchi que ñquĩ mose ra. —Jesús amee jirichĩ nguia mbia je, i que ra. Nyebe mbae isiquia mondobe nguia sacerdote rerecua je. Amei ererecua je abe no. ⁴ —Mbae icuã tuchi asaachĩ. Jesús seteã tuchi ameechĩ jêje. Eiquia sacua, i que Judas ñee nda. —Nde quia rei. Ure eã ñene, i ja que ererecua ñee ee ra. ⁵ Judas que mbae isiquia mbaba asi mombo mondo ibi ra. Dios chuchúaa. Oso que uchoso mumbi nyiquia cote ra. ⁶ Sacerdote rerecua que mbae isiquia sirõ ibi si cote ra. —Mbia ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra. ⁷ Aque que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacua nda. Ñionga, i que hue ibi je ra. ⁸ Nyebe eriqui nguia “mbia ruqui rua” i bei hue je. Namonyee. ⁹ Aque mose que Jeremías ñimbese ique cote ra. Ñ ndei Jeremías ñimbese ã: Ñquĩ mbae isiquia treinta que eisi cote ra. Ñquĩ ndei mbia ribishoronda ñquĩ. ¹⁰ Ñquĩ mbae isiquia que emondo hue ñionga ribishorõ cote ra. Dios ñee nguia erĩ seje nyii nae, ñquĩ ndui si, i que Jeremías embese cose ra.

Pilato ñee Jesús je

¹¹ Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se

re, i que Jesús ee ra. ¹² Sacerdote rerecua que ñee icuã ja Jesús je ra. Amei ererecua abe no. Jesús que ñee ãte echeẽ mose ra. ¹³ —¿Erehanuãte equia ñee mose nderĩi nde? i que Pilato ñee Jesús je ra. ¹⁴ Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jẽiquia mbucha ira rese, i ererecua

¹⁵ Pilato que mbia tarõ ji mo mbusẽ mbei quia pascua mose ra. Co mĩi ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ¹⁶ Barrabás, i que etarõ ji mo je ra. Mbia chiucua tuchi que ae ra. ¹⁷ Mbia ñumunua ja mose que Pilato ñee ee ra. —¿Aba ra ambusẽ mondo jẽje re? ¿Barrabás ra re? ¿Jesús ra re? i que Pilato ñee ee ra. ¹⁸ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹⁹ Pilato que chĩngoi ndua ndua ngũenda tose ra. Eninisi que ucheẽ mondo ñee ee ra. —Ehui chõ Jesús si jẽ. Mbae icuã ngue esaã eãte resẽ. Atea que seque re isa ra jẽ. Seque re icuã tuchi que aa ra jẽ, i que Pilato ninisi ñee ngu je ra. ²⁰ Sacerdote rerecua que ñee mbia ja je ra. Amei ndese. —Sã Pilato Barrabás mbusẽ mondo. Sã Jesús quiatu iquia, i que ererecua ñee ja mbia je ra. Nyebe mbia “eno” i chee ee. ²¹ Pilato que ñee si mbia je ra. —¿Aba ra ambusẽ mondo jẽje re? ¿Jesús ra re? ¿Barrabás ra re? i que Pilato ra. —Barrabás embusẽ mondo i que mbia ee ra. ²² —¿Mañi ae quia ra Jesucristo je re no? i que Pilato ra. —Embucha ira rese, i ja que mbia ñee ee ra. ²³ —¿Mbae icuã esaã nde? i que Pilato ee ra. —Embucha ira rese jẽ, ibe que mbia tasẽ tasẽ ee ra.

²⁴ —Mbia riqui “Jesús eiquia” i i tuchihi, i que Pilato ndua ndua ra. —I mo embu seje, i que mbia je cote ra. Nyoï que mbia résaa cote ra. —A aico nyoï a. Se ra Jesús aiquaiyã. Eseteãte quiatu ngue re. Jẽ nguiatu jẽingo erese, i rei que Pilato ñee mbia je ra. ²⁵ Mbia que ñee ja Pilato je ra. —¡Eiquia jẽ! Eicuãte que eriqui ra jẽ. Dios ra paama i eã eiquia mose. Dios paama i mose, sã ure je quiatu paama i. Urieriirĩ je abe no, i jate que mbia Pilato je ra. ²⁶ Pilato que Barrabás mbusẽ mondo cote ra. Jesús cuasa quiatu que chiño nda. Pilato que Jesús iruã nua cote ra. —Jembucha iquia ira rese, i que ñee soldados je cote ra.

²⁷ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama nda. ²⁸ Jesús irao que embui esi ra. Tiru ireĩ nguiatu ngue emingue nguiã ee cote. ²⁹ Nyu ritiméi uma ji que emĩi eãquĩ ndese corona nda. Ira ñetẽ mo abe que emondo éoo ra. Ngoi ja que u ngũĩã ndese Jesús nonde ra. Ñee icuã icuã ngue u erĩi nda. —Judíos rerecua tuchi chõ nde re, ichõĩño ngue soldados Jesús je ra. ³⁰ Nĩnimbu nimbu abe que erese ra. Ira abe que euru uru eãquĩ ndese no nda. ³¹ Jesús rimba que esaã saã ee no nda. Iquia iquia que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

³² I rei que echoi quia ra. Mbia mo ngue esobeishĩ nda. Simón, i equia ee. Cirene jenda que ae ra. —Cruz echa rã Jesús mbucha sacua pe, i que soldados ee ra. Nguerao que ee cote ra. ³³ Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ³⁴ Huee que vino ñimocondo tuchi

mo mondo Jesús je ra. Ubi rei que erese ra. Aquere que embei eã cote ra. ³⁵ Soldados que Jesús mbucha ira rese ra. Aquere que sita ñetê mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheẽ ique cote ra.

Seirao que embuchao chao nyue ra.

Sita ñetê mbaba mbabare o je, i que embesa ji ra. ³⁶ Aquere que soldados chi ngoi Jesús raarõ cote ra. ³⁷ Mbia que letrado mii Jesús ãquĩ nguiti ibate ra. JESUS REI JUDÍOS RERECUA, i que embesa mii nda. Ûquĩ ñi ño eriqui nguiã eiquia hue. ³⁸ Mbia nyeremo abe que embucha ira rese Jesús chabe ra. Jesús rereco chobei que emii ira rese ra. Mbae mbuquiachãsa tuchi que ãquĩ nda. ³⁹ Mbia que iquia iquia chõ nguiã echeẽ naa naa ecuã nda. Ñee icuã icuã ee. ⁴⁰ —“Dios chuchua ra ambucoi. Tres días mose ra ambuchuruambe” ere que equia. Ndequirãcuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra. ⁴¹ Sacerdote rerecua abe que iquia iquia chõ nguiã ee ra. Embesasa abe no. Amei ererecua abe no. Ûquĩ ngue ñee icuã icuã ja quia erii nda. ⁴² —Mbia que embuquera quera rei nyii ra. Ae si quia quera aroneate nguiã aque. Judío rerecua mose ae, sã ae ae nguichi ira si. ¶ nda ureicu a cote, i ja que ererecua ñee icuã icuã e erii nda. ⁴³ —“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã erii nda. ⁴⁴ Ae mbuchai chi ira rese mbae mbuquiachãsa nae, ãquĩ abe que ñee icuã icuã nyee ee ra.

Jesús mano cote

⁴⁵ Tenda nandeite re mose que itondaru ru ra. Itondaru bei que mbia ja je tres horas ra. ⁴⁶ Tenda

cheseco mose que Jesús ñeemombo cote ra. —Elí, Elí, ¿lam a sabac-tani? i que ñeemombo ra. —Dios sererecua, ¿mbaerã ereico hui sesi re? i chõ ngue ñee nguiã. ⁴⁷ —Elías je eriqui “quiatuchu” i reae, i rei que echeẽ andusa mo nda. ⁴⁸ Aque mose tuchi que emo esponja monde vinagre ye ra. Ira ai rese que embia ji mondo rei Jesús chúruu cote ra. ⁴⁹ —Esecha rei. ¿Sã Elías ruãte quia erea! i que eataque ñee ee ra. ⁵⁰ Jesús que tasẽ mano mbei cote ra.

⁵¹ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere nyere cote ra. Sita abe que nyisia sia nyibite bite rĩ nda. ⁵² Mbia tãsa mo abe que nyeequia equia ra. Dios quiato raaque mo ngue quera quera ra. ⁵³ Jesús quera si mose que ãquĩ ndaaque usẽ nyoĩ cote ra. Nyoĩ que Jerusalén cote ra. Mbia tubiriã ngue mae u erese ra. ⁵⁴ Soldados rerecua que chĩ mae Jesús rese ra. Soldados abe no. Ûquĩ ngue siquichete Jesús mano mose ra. Ibi chere mose. Mae mose mbae ja rese. —Dios ririĩ ño eriqui re, i jate que soldados ñee erii cote ra.

⁵⁵⁻⁵⁶ Cuña ngue chi jate mae Jesús rese isho ra. María Magdalena abe que chĩ huee ra. María abe no. María rei Jacobo si. José abe si. Zebedeo ririĩ si abe que chĩ erese huee ra. Ûquĩ ngue siqui bei quia Jesús rui ra. Echiurã ngue emii mii mbei quia ee ra. Galiléaa eico mose bei.

Mbia Jesús raaque chati cote

⁵⁷ José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra. ⁵⁸ —Jesús raaque emee na seje, i que oso ñee Pilato je ra. Pilato que “eno” i ee ra. ⁵⁹ José que eraaque curuchoi cote ra. Ñuma ngue tirushĩ mo je ra.

⁶⁰ Jesús raaque que eiti suruchoi sita ribicoi ji imi ye ra. José chisaã ye. Nyati rei que sita cuasu mo je cote ra. Nyoï que erecha cote ra. ⁶¹ María Magdalena ngue chi ngoi mae Jesús atisa rese ra. María rese.

Soldados Jesús raaque atiquia saarõ u

⁶² Isamami ngue sacerdote rerecua choi ñee Pilato je ra. Fariseos abe no. Sábado isamami ngue ra. ⁶³ Ûquĩ ngue nyoï ñee Pilato je Jesús rĩ nda. —Urendua nduachĩ nguiã ñeeñoño je rese. “Tres días mose ra aquera si”, i que equia mano nonde ra. ⁶⁴ Soldados emondo rã eatiquia raarõ. Sã echi beï tres días eraarõ huee. † nda echimbaaquiatu eraaque siroã suruchoi. “Quera si que ra” ¡chĩ nda ñee ñooño mbia je jẽ! Ûquĩ mose ra mbia mbĩrĩ irĩ tuchi cote, i que ñee Pilato je ra. ⁶⁵ Pilato que ñee ee ra. —Soldados jendao rã. Eraaque raarõ tuchi sacua, i que ee ra. ⁶⁶ Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jësaarõ tuchijẽ, i rei que soldados je cote ra.

28

Jesús raaque quera si

¹ Jesús raaque ati ji que chibe sábado mose ra. † nyaashĩ oso quia domingo mose, aque mose que cuña mo nyoï mae eatisa rese ra. María Magdaalena, i que emo je ra. María, i que enongue je ra. ² Aque mose tuchi que ibi nyere nyere ee ra. Angel ibatenda mo nguia tu quia eatisa mbuquiata reaẽ. Sita eatiquia que ecuruba ra. Ngoi que etose ra. ³ Enininya tuchi que chĩ ngoi ra. Ama pirirã pirirã i rã tuchi que ra. Eiraoshĩ tuchi que chĩ nda. ⁴ Soldados que titi titi i tuchi chõ mae ùquĩ ndese ra. Emundi tuchi que ra. ⁵ Angel que ñee cuña je ra. —Jësiquiche

quichechĩ nguiã. Jëingo raque Jesús raaque requia ã. ⁶ Emoate aa resẽ. Eraaque que quera si no. Ucheẽ ndui si que quera resẽ. Jenyu rei mae eatisa rese ae. ⁷ Jëso asi rã echimbaaquiatu mbiirandu equera si rese. “Jenonde ra esi Galilea. Jemae nda erese huee”, jenyẽ embiirandu. Ûquĩ ae chõ ngue u nguiã jẽje, i que ángel cuña je ra. ⁸ Cuña ngue siquichete echeẽ andu ra. Eyate abe que ra. Uchã ndei que echoi quia Jesús chimbaaquiatu mbiirandu ra. ⁹ Ñeenda cúa chõ ngue Jesús nyecua saludar i ee ra. Cuña ngue nyoï oo erese ra. Jesús i que equiaama ama nda. ¹⁰ Jesús que ñee ee ra. —Jësiquichechĩ nguiã sesi. Jëso ñee seresenda je. “Jëso rã Galilea. Hue ra jemae Jesús rese”, jenyẽ oso ee, i que Jesús ñee cuña je ra.

Soldados ñee ñooño Jesús raaque rĩ

¹¹ Soldados eraaque raarõsa que nyoï sacerdotes rerecua mbiirandu Jesús quera rese ra. Ae rese mae nae, ùquĩ ngue esenei ja ee ra. ¹² Sacerdotes rerecua que nyoï ja ñee amei ererecua je cote ra. —¿Mañi nande ra equia mbia jiranuã sacua Jesús quera rese re? i que ererecua ndua ndua hue rĩ ja ra. Nyebe mbae isiquia mee nguiã soldados je, ñee ñooño sacua mbia je. ¹³ —Jëñee ñooño mbia je jẽ. “Ureque mose Jesús resenda eraaque suruchoi rei sirõ”, jenyẽ chooño mbia je jẽ. ¹⁴ Pilato jirandu mose jendese, urecheẽ nda ee. Paama iã nda jẽje chã, i que ererecua ñee ja soldados je ra. ¹⁵ Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguiã ñee mbei ã cote. —Jesús chimbaaquiatu que eraaque sirõ cose ra, nyebe eriqui nguiã i bei ã cote.

*Jesús uchimbaaquiatsu mondo
mbia mbiirandu*

¹⁶ Jesús chimbaaquiatsu once que nyoija Galilea ra. Ibi ibate mo ngue echoi Jesús cheẽ nguire ra. ¹⁷ Jesús que nyecu a ee huee ra. Jesús rese mae mose que ngoi ngũĩã ndese ñee ee ra. —Jesús eã ño co reae, i rei que emo emo ñee uchiangui re ra. ¹⁸ Aquere que Jesús si eriichã ñee ee cote ra. —Sequirãcuã tuchi chõ se re. Se rei ibi jenda rerecua ja. Ibatenda abe rerecua ja. ¹⁹ Jẽso mbia mbaaquiatsu quiatsu ja serĩ. Mbia mangue chooñoa jenda ja. Bautizar jenye ee Paba rĩ. Serĩ abe. Espíritu Turã nĩ abe no. ²⁰ Jembaaquiatsu quiatsu tuchi secheẽ nĩ. Ae asenei senei nguia jẽje nae, ũquĩ jẽsenei senei ja ee. Secheẽ mumbayã sacuã. Aico bei ra se quia jendese. Mbae ua j a chee, i que Jesús ñee ee ra. Amén.

EL SANTO EVANGELIO SEGÚN SAN MARCOS

Juan el Bautista Dios cheẽ senei senei

¹ ã tasenei na jẽje. Dios cheẽ turã Jesucristo riĩ. Jesucristo rei Dios riĩrĩ. ² Sã Isaías Dios cheẽ mbesa cose no:

Secheẽ nderaosa amondo quia nderẽta aque.

Ae ra ñeenda mbuquiche nembaerã, i que Dios ra.

³ Emo ndiqui ñeemombo mombo turúquiaa hue.

“Sã emo ndiqui ñeenda mbuquiche no, eĩ jenyẽ si chõ nguia jẽ abe ico quiatu nandererecua raarõ arõ”, i equia turúquiaa hue,

i que Isaías embesa ra. ⁴ Juan el Bautista que tu ãquĩ ñee nguire cote ra. Dios cheẽ ngue esenei senei nguia turúquiaa cote ra. —Jendua si Dios rese. Jẽhui chõ jẽicuã si. Dios jẽicuã mbutiã sacuã. ãquĩ mose nda bautizar ae jẽje chã, i beite que Juan nguia ñee nda. ⁵ Jerusalén jenda que ngãẽ ngãẽ tuchi quia echeẽ andu ra. Judea jenda abe no. Mbia huiã nenei nenei mose Dios je, ãquĩ mose que Juan ndiqui bautizar i ee ra. Ama Jordán ye. ⁶ Quicuã mbuaera chõ ngue Juan irao ra. Camello. Mbae ire chõ ngue enumbicuaa no nda. Tucu mbuae chõ ngue eu eu quia ra. Irao quiaa rãnda abe. ⁷⁻⁸ Dios cheẽ ngue esenei senei nguia ra: —I achõ je chõ aico nguia bautizar i mbia je co. Co chi emo ndu quia serui co. Dios riĩrĩ tuchi chõ ae re. Ae quia equirãcuã tuchi sesi re. Ae quia eturã tuchi sesi no nde. Ae quia tura bautizar i mbia je Espiritu Turã je. Mbia chiã mbitirõ sacuã, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye. ¹⁰ Jesús que usẽ oso ama si cote ra. Ibei que nyeequia ee cote ra. Espiritu Turã ngue nguichi u erese cote ra. Nyurushi rã ngue eru nguichi erese ra. ¹¹ Ibei jenda que ñee ee ra. —Seriĩrĩ ño nde re. Sechesecua chõ nde re. Seyate nderese, i que Dios ñee ee ra.

Jesús tambĩ cuã, i raque Satanás

¹² Espiritu Turã ngue Jesús querao turúquiaa cote ra. ¹³ Huee que Jesús riqui arete ra. Cuarenta días. Nyacua risha ite re. Mbia riichare ja ite re. Satanás que tu rei tã i ee cote ra. Angeles que ngãẽ ngãẽ nguia ereaquiatu ra.

Jesús mbia mbaaquiatu quiatu ramo

¹⁴ Mbia rerecua que Juan tarõ cárcel cote ra. Aquere que Jesús si Galiléaa ra. Dios cheẽ turã ngue esenei senei nguia huee ra. ¹⁵ — Achite Dios ñi tu mbia rerecuarã a. Jendua sí Dios rese. Jẽhui chõ jẽicuã si. Dios cheẽ turã jẽicua. I nda Dios jemingo bei, i que Jesús quia ñee mbia je ra.

Jẽingo serui, i Jesús uchĩmbaaquiatu rã je

¹⁶ Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mondo ii ra. Sira resenda bei rei ãquĩ. ¹⁷ Jesús que ñee ee ra. —Serui bei chõ jẽingo jẽ. Taembaaquiatu quiatu. Mbia teendu endu bei quia seje cote, i que ee ra. ¹⁸ Nyoĩ ja que erui ra. Sira mbuasa si que echoĩ hui ra. ¹⁹ Pe jiri que mae Jacobo rese ra. Enongue rese abe. Juan, i equia ee. Zebedeo riĩrĩ ja rei ãquĩ. Huee que echi ja canoa ye sira mbuasa mbitirõ tirõ nda. ²⁰ —Jẽingo serui, i

que Jesús ñee ee ra. Echeẽ nduibe tuchi que echoi erui ra. Ngu que esecha choi ra. Eru que siquichõ canoa ye ngũimba rese ra.

Jesús aba checuayã icuã jea mbia mo si

²¹ Nyoï que sucha tubiriã Capernaum nda. Sábado mose que Jesús si judíos chumunua nuásaa ra. Mbia mbaaquiato quiatu sacuã.

²² Mbia rerecua rã ño ngue eriqui mbia mbaaquiato quiatu ra. Embesasa rã eã. Nyebe mbia riqui nguiã nyuruira tuchi echeẽ andu.

²³ Huee que amei mo ndiqui mbia chumunuásaa ra. Aba checuayã icuã nyireco rei ae. Ñee asite que Jesús je ra.

²⁴ —¿Mbaerã erechu urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re.

Areicuate se, i rei que aba checuayã ñee asite ee ra. ²⁵ Jesús que ñee asi ee cote ra. —¡Equiriri chõ jê! Esẽ oso amei ñiangui si, i que ee ra.

²⁶ Jesús cheẽ mose que aba checuayã amei mburirite cote ra. Tasẽ ngue oso usẽ amei si cote ra.

²⁷ Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiato quiatu ucheẽ namonda je co. Equiracuã ae ñee nguiã. Mbia rerecua rã ño eriqui nguiã ñee aba checuayã icuã je co.

Sã aba checuayã echeẽ mumbayãte jê, i que mbia ra. ²⁸ Mbia que jirandu jei Jesús rese Galilea jenda ja cote ra.

Jesús Simón ninisi si mbucherõ

²⁹ Jesús que usẽ nyoï mbia chumunuasa si cote ra. Nyoï que Simón nyuchua ra. Andrés abe que siqui rei huee tuchia ra. Jesús que ique nyoï huee ra. Jacobo rese. Juan ndese abe no.

³⁰ I que Pedro chari rasi u nyaara ee ra. Eracu tuchi que ra. ³¹ Jesús que eo isi embuchuruã nda. Aque mosebe que eracu ti i esi cote ra. Mbae que

echao chao quia mbia chiurã cote ra.

Jesús mbia rasi chumumbara mbucherõ

³² Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco quia nae, ñquĩ abe que ecurucuaẽ cuaẽ tuchi quia ee ra.

³³ Sucha tubiriã jenda ja que chi ñmunua eiquésaa ra. ³⁴ Mbia rasi chumumbara que embucherõ cherõ ja ra. Aba checuayã icuã tubiriã ngue eja jea quia mbia si ra.

Aba checuayã ngue Jesús icuate rei ra. Nyebe Jesús riqui nguiã echeẽ ndiquisã quisãte.

Jesús mbia Galilea jenda mbuchesea sea

³⁵ I nyaashĩ oso quia, aque mose que Jesús juã oso mbia tiásaa ra. Ñee sacuã Dios je itondaru bei mose.

³⁶ Simón ngue oso erui emuña nda. Nguesenda rese. ³⁷ Ngasẽ ngue ee ra. —Pe mbia chi nderequia jate pe, i que ee ra.

³⁸ Jesús que ñee ee ra. —Nyao sucha tubiriã mbuchesea sea achi jenda. Dios cheẽ nda asenei senei ee chã. Nyebe achu nguiã, i que ee ra.

³⁹ Galilea jenda que embuchesea sea ja cote ra. Dios cheẽ nenei nenei judíos chumunua nuásaa. Aba checuayã abe jea jea mbia si.

Jesús mbia leproso mbucherõ

⁴⁰ Emo ndasi que ngasẽ Jesús je ra. Leproso, i que ñquĩ erasi je ra. Tu que ngoi ngũiã ndese ñee Jesús je ra. —Nde sembucherõse mose, sembucherõ se, i tuchi que ñee ee ra.

⁴¹ Jesús ia eã tuchi que erese ra. Ñomee ngue oco erese cote ra. —Eno. Tarembucherõ, i que ee ra.

⁴² Echeẽ nduibe tuchi que nyerõ cote ra. ⁴³⁻⁴⁴ Jesús que ñee ee ra. —Sã jê. Erecheẽchĩ nda emo je jê. Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbia jirandu nderasiã ndese cote, i rei

que Jesús ñee emondo ra. ⁴⁵ Mbía que embiirandu ja tuchi chõ oso ra. Nyebe Jesús nyecua aroneate nguiã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erea ra.

2

Jesús emi sayã mo mbucherõ

¹ Emo mose jiri que Jesús nyebi Capernaum nda. Echuchua ereco mose que mbía jirandu erese ra. ² Mbía tubiriã ngue ñumunua ee ra. Mbía chayã tuchi que ra. Ei quesa abe itãyã tuchi que ra. Dios cheẽ ngue esenei senei tuchi quia ee ra. ³ Mbía cuatro que erasi mo curucuaẽ ee ra. Emi sayã. ⁴ Mbía tubiriã ngue tuchia mbi-itãyãte eriquisã nda. Nyebe erasi ruruchoi nguiã sui tei quite arõ. Tei que endoro cote ra. Erasi que embuquichi imbu quisa ye Jesús je cote ra. ⁵ —Erurucuaẽsa riqui seicuate ùquĩ, i que Jesús ñee uchiangui re ra. Nyebe ñee nguiã emi sayã je. —Echo, ndechisaã mbae icuã ambutiã nguia ndesi a, i que ee ra. ⁶ Embesasa mo abe que chi echeẽ andu ra. Mae icuã icuãte que equia Jesús res e ra. ⁷ —¿Mbaerã Jesús riqui ñee ùquĩ nde? Ñee icuã icuã ñochĩ equia Dios rĩĩ co. Dios ibatenda aẽ mbi a chiao icuã mbutiã tiã nguia esi resẽ, i rei que ñee icuã icuã Jesús rĩĩ nda. ⁸ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁹ ¿Ma mbaranguiatuã eã jiri jẽje re? ¿Mbía icuã mbutiã esi ere? Mbía rasi mbucherõ ere no ae. ¿Ma mbaranguiatuã eã jiri jẽje re? ¹⁰ Dios rucucha rei se. Mbía chiao icuã mbutiã aqiuatu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. ¹¹ —Ehuã na. Ndechuchua eso cote. Ndequisa abe erao, i que Jesús emi sayã je ra.

¹² Emi sayã ngue juã asi Jesús cheẽ nduibe cote ra. Ngua que esirõ asite serao cote ra. Mbía resa rae ja. —Ã ndese que ureico mae eã tuchi emo mose ra, i tuchi que mbía u mae nyuruiã erese ra. Mbía que ñee turã jate Dios quirãcuã ñĩ cote ra.

Serui beĩ eico, i Jesús Levĩ je

¹³ Jesús que oso si ama ndisha rimiaa nda. Mbía que ngaẽ ngaẽ jate erea ra. Jesús que embaaquiatu quiatu ra. ¹⁴ I que Jesús oso quia ra. Mae ngue Levĩ rese ra. Alfeo riirĩ ngue Levĩ ra. Ngoi que huĩ plata isi isi impuestorã nda. —Serui beĩ eico, i que Jesús ñee ee ra. Ae Levĩ juã oso nguiã erui.

¹⁵ Jesús que nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiatu abe rese. Mbía icuã mo abe que chi quiaru erese no nda. Ùquĩ tubiriãte que siqui erui ra. ¹⁶ Fariseos que ñee icuãte Jesús chimbaaquiatu je ra. Embesasa abe que ñee icuãte ee ra. —¿Mbaerã Jesús riqui quiaru mbía icuãte rese re? i que ñee nda. ¹⁷ Nyebe Jesús ñee nguiã ee. —Sã mbía rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguiã mbía turã je. Mbía icuã je chõ ngue achu nguiã “jenyu seje” i, i que Jesús ra.

Jesús chimbaaquiatu hui ãte uchũ si

¹⁸ Juan ñimbaaquiatu que hui uchũ si aque mose ra. Fariseos chimbaaquiatu abe no. Nyebe mbía ngaẽ nguiã ñee Jesús je. —¿Mbaerã ndechimbaaquiatu abe riqui hui ãte uchũ si re? i que ñee Jesús je ra. ¹⁹ Jesús que ñee ee ra. —Sã emo ndiqui ngũinisirã isi ramo no. Sã eresenda iate riqui quiaru erese no. Sã eriqui hui aroneate uchũ si aque mose no.

²⁰ Sã eru riqi mano emo mose no. Aque mose ramo nguiatu ra equiato hui uchü si cote. ²¹ Sã emo ndiqui tiru yasu mii aroneate tiru ima sorei rese no. Eyasu ra nyaacua quiata eima si. Soro icoi tuchi chõ nda cote. ²² Sã emo mbaeri rasi ramo nderecoquiatu eã eriru ima ye no. Mbae ire ima ye ererecoquiatu aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiacuãte ra cote. Mbaeri yasu quia nda equerecoquiatu nguiã mbae ire yasu ye. Soroã sacua, i que Jesús ñee ee ra.

Jesús chimbaaquiatu mbae a ishao shao sábado mose

²³ Sábado mose que Jesús si quia mbiaco ite ite ri emo mose ra. Echimbaaquiatu que quiata a nyiqui nyiqui choi quia erui ra. ²⁴ Fariseos mo ngue ñee ee ra. — ¿Mbaerã ndechimbaaquiatu riqi mbae ishao shao sábado mose re? Co mose chõ mbia riqi uquenea ucua resẽ, i que fariseos ñee Jesús je ra. ²⁵ Jesús que ñee ee ra. — ¿Embesa ji rese jemaẽ eã David riĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ²⁶ David que ique Dios chuchua aque mose ra. Abiatar que sacerdote rere cua aque mose ra. Mbichae Dios chuchua jenda que David u ra. Mee mee ngue nguesenda abe je ra. Eriacuãte quiatu ngue re. Sacerdote mbaerã ja chõ ndaque mbichae, i que Jesús fariseos je ra. ²⁷ —Sábado que Dios chao mbia mbaerã nda. Sábado mbaerã eã ño Dios mbia ao nguiã. ²⁸ Sábado rerecua bei chõ se re, i que Jesús ñee fariseos je ra.

3

Jesús emo o tomei mo mbucherõ

¹ Jesús que oso mbia chumunúasaa cote ra. Huee que eo tomei mo ndiqui ee ra. ² Mb

que mae nguiatute quia Jesús rese ra. —Ma Jesús eo tomei mbucherõ. Sábado mose raque co. Sã embucherõ. Nandecheẽ icuã icuã nda ee chã, i que eu mae nguiatute Jesús rese ra. ³ Jesús que ñee eo tomei je cote ra. —Ehuã na u aa mbia ite re, i que ee ra. ⁴ Jesús que ñee mbia je ra. —¿Mbae eturãte jẽje co tenda sábado mose re? ¿Coche nandeico mbae turã naa naa sábado mose re? ¿Coche nandeico mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. Mb

Mbia tubiriã nyoĩ Jesús rui

⁷ Jesús que oso ama ndisha quiti ra. Uchimbaaquiatu rese. Mb

Jesús rese” i. ¹¹ Aba checuayã icuã mae mose Jesús rese que ngoi ngoi quia ngüã ndese ñee ee ra. — Dios riirĩ ndei nde, i que equia ñeemombo mombo ee ra. ¹² Jesús que ñee asite ee ra. —“Co rei Dios riirĩ co” jenyechĩ nda jẽ, i que ee ra.

Jesús mbia doce irabo uchimbaaquiatura
¹³ Jesús que nyui oso sita ibate mo ndese ra. “Jenyu” i que uchiirabobi je ra. Nyoĩ que erea ra. ¹⁴ Ũquĩ doce que eirabo nguesendacuã nda. Embuchao chao sacuã mondo Dios cheẽ nenei nenei. ¹⁵ Uquirãcuã ngue emondo ee ra. Aba checuayã jea jea sacuã mbia si. Mbiamasi chumumbara mbucherõ cherõ sacuã. ¹⁶ ã ndei mbia echiirabo ã: Simón (Pedro, i abe que ee ra.)

¹⁷ Jacobo (Zebedeo riirĩ ndei Jacobo.)

Juan (Jacobo nongue rei Juan. Boanerges, i que ũquĩ ja je ra. “Ama sieu je riirĩ” i chõ nguiã ee.)

¹⁸ Andrés

Felipe

Bartolomé

Mateo

Tomás

Jacobo (Jacobo rei Alfeo riirĩ.)

Tadeo

Simón el Cananista

¹⁹ Judas Iscariote (Aque que Jesús mondo mbia icuã je ra.)

Ũquĩ ja que Jesús irabo ra.

Aba checuayã quirãcuã Jesús quereco co, i raque mbia

Nyoĩ que ique tuchúaa cote ra. Uchimbaaquiatur rese. ²⁰ Mbiamasi que ngaẽ ngaẽ tuchi quia erea no nda. Equiaru mose rocoĩ. Echimbaaquiatur abe quiaru mose rocoĩ. ²¹ Jesús nongue jirandu mose que echoi erea ra. Equiachã eriqui reĩ nguiã ee. Nyebe eriqui rei nguiã “nanderao” i raque. ²² Embesasa ngaẽ nguia Jerusalén si nae, ũquĩ ngue ñee ñee mbia je ra. Mbiamasi mbuqueta queta Jesús riĩ. — Satanás quirãcuã je chõ Jesús riqui

nguiã aba checuayã icuã jea jea mbia si co, i rei que ñee icuã Jesús je ra. ²³ —Jenyu rã tacheẽ jẽje, i que Jesús ee ra. —¿Mañi nda Satanás abachecuayã icuã jea mbia si re? Erimba chõ nyeresẽ. ²⁴ Gobierno icuã icuã mose nyue, ua rae. ²⁵ Tuchuamo jenda icuã icuã mose nyue, ua ra eno. ²⁶ Satanás icuã icuã mose nyue, equirãcuã nda ua no. ²⁷ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõt e quia esi co. Dios Satanás quirãcuã mbutiã ja arõte quia co.

²⁸ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. ²⁹ Emo ñee icuã mose Espíritu Turã nii, ũquĩ icuã nguiatu ra Dios mbutiã eã mbei esi, i que Jesús ee ra. ³⁰ — Jesús chiangui re abachecuayã icuã ndiqui co, i quiatur ngue mbiamasi nguiã. Nyebe Jesús ñee nguiã ũquĩ.

Jesús nongue ngaẽ erea usi rese

³¹ Jesús nongue que ngaẽ ndei erea ra. Usi rese. Chichõ ja chõ ngue itaicuee ra. —“Quiatuchu” ere Jesús je, i que emo mondo ra. ³² Mbiamasi que chi jate ngoi Jesús jii ra. Ũquĩ ngue ñee ee ra. —Hue ndesiriqui nderequia itaicuee hue. Ndenongue rese, i que ee ra. ³³ — ¿Aba je chõ aico “taĩ” i chã? ¿Aba je chõ aico “senongue” i no ña? i que Jesús mbiamasi je ra. ³⁴ Jesús que mae ucheẽ andusa rese ra. —ã je chõ aico nguiã “taĩ” i. ã je chõ aico nguiã “senongue” i no. ³⁵ Ae Dios cheẽ mumbayã nguia nae, ũquĩ je chõ aico nguiã “senongue” i. Ũquĩ je chõ aico nguiã “taĩ” i no, i que Jesús ñee ee ra.

4

Emo mbae eĩ mombiquia mbiquia

¹ Jesús que mbia mbaaquiату quiatu si ama nimia ndese ra. Mbia que ñumunua tuchi u erese huee ra. Nyebe Jesús si nguiã ua canoa mo ye. Ngoi que huĩ huee mbia mbaaquiату quiatu ra. Mbia que chi jate ama nimia ndese ra. ² Jesús que mbia mbaaquiату quiatu tuchi quia ra. Ejemplos que esaã saã tuchi ee ra. ³ —Jenyisaquia rã serese. Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi cuaẽ eriquisã nda. Nyebe ia eã ño nguiã. ⁸ Sã emo ndiqui uqui uqui ibi turã no. Ũqui nguiatu que suri turã nda. I a turã ngue ra. Sã emo ia treinta no. Sã emo ia sesenta no. Sã emo ia cien no. ⁹ Jëisa mose, secheẽ jeñandu turã na, i que Jesús ra.

Jesús ucheẽmbiasa uchimbaaquiату je mbae eĩ ñi

¹⁰ Mbia ataque nyoi mose que Jesús ji jenda ñee ee ra. Echimbaaquiату doce rese. —Ndecheẽ embiasa tuchi rã ure je mbae eĩ ñi, i que ñee Jesús je ra. ¹¹ Jesús que ñee ee ra. —Mbia rerecua tuchi quiarei Ibatenda. Ae chõ asenei senei nguiã jëje ã. Secheẽ ambiasa asa bei tuchi quia jëje co. Mbia ataque quia siqui sereã erese co. Mbia ataque je aico ejemplos achõ naa naa mbei co. ¹² Eanduchõ sacua eicua turã nonde rocoi. Sã eriqui uba eãte Dios icha rui no. Dios eicuã mbutiã eã sacua esi, i que Jesús ñee nda.

¹³ Jesús que ñee ee ra. —¿Secheẽ jëicuayãte mbae eĩ ñi ñee mose jëje re? ¿Mañi jenye quiatu ra ejemplos ataque icua re no? ¹⁴ Ae mbae eĩ mombiquia mbiquia nae, Dios cheẽ nenei neneisa rã ño aque re. ¹⁵ Ae uqui uqui ñeenda rui nae, mbia Dios cheẽ andu chooñosa rã ño ũqui nde. Ae Dios cheẽ andu chooñote quia nae, ũqui ñiangui si chõ Satanás ndiqui nguiã Dios cheẽ ndirõ. ¹⁶ Ae uqui uqui sita arõ nae, mbia mo na ño ũqui no nde. Dios cheẽ andu mose, isi turã ndaque. Eyate raque erese nyii. ¹⁷ Mbia icuã icuã mose ee Dios cheẽ ñi, hui jei chõ nguiã esi. Mbae rao eã naanguia chõ ũqui nde. ¹⁸ Ae uqui uqui nyu réndaa nae, mbia mo na ño ũqui no nde. Dios cheẽ andu turã ndaque. Siqui bei eã ño nguiã erui. ¹⁹ Ũmbaerã achõ ndese chõ eriquichi nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²⁰ Ae uqui uqui ibi túraã nae, mbia mo na ño ũqui no nde. Ũqui nguiatu Dios cheẽ ñandu turã nguiã. Nyebe eriqui nguiã siqui beite erese. I a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹ Jesús que ñeembe ee ra. —Sã nandeico lamparina ati eã no. Sã nandeico emi eã mbaequi re no. Erendi checua chõ nda nandemi. Mbia resae ja sacua. ²² Mbae checuayã nda nyecua ja emo mose. Mbia chiangui renda checuayã nda nyecua emo mose no. ²³ Jëisa mose secheẽ jeñandu turã na. ²⁴ Secheẽ nda jeñandu chooñochi jë. Jë secheẽ mumbayã mose, taembaaquiату i i tuchi. ²⁵ Emo umbae rerequia mose, Dios ra embaerã mo mon-dobe ee. Emo embae eã mose, Dios ra embae sirõ ja esi.

Dios rimba ñimbeta chõ nguĩã mbae eĩ na

²⁶ Dios rimba ñimbeta chõ nguĩã mbae eĩ na. Sã emo mbae eĩ tiquia tiquia no. ²⁷ Suri ra itõ mocoĩnde cote. Eruri cuasu tuchi ra cote. Echa embusuriã ndaque. ²⁸ Dios ae chõ embusuri nguĩã. Eracói rane. Iã chee. Ea ñetẽ nane. Ea cuasute cote. Ea ireĩ cote. ²⁹ Ea ireĩ tuchi mose ra eishao shao cote.

Mbae eĩ na ño Dios rimba re

³⁰ Mbae rã ño Dios rimba chã. Ejemplo mo tasenei jėje. ³¹ Mbae eĩ na ño Dios rimba re. Sã mbia mo mostaza eĩ tiquia no. Eñetẽ tuchi raque mbae eĩ mo si. ³² Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ñquĩ mĩ ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiātu ra.

Jesús ejemplos senei senei tuchi mbia je

³³ Eĩ ño ngue Jesús quia mbia tubiriã mbaaquiātu quiātu ejemplos je ra. Mbia quenea tuchi chee que ra. ³⁴ Ejemplos achõ ngue esenei senei mbia mbaaquiātu sacuã nda. Uchimbaaquiātu je quiātu que embiasa turã turã nda.

Jesús quiririã icuã icuã mbutiba; ama ndebera abe

³⁵ Itondaru ramo mose que ñee uchimbaaquiātu je ra. — Nyao ama ndisha robei, i que ee ra. ³⁶ Ae canoa ye Jesús ñi mbia mbaaquiātu quiātu nae, aque ye sí que echimbaaquiātu Jesús rerao ra. Mbia tubiriã ndecha. Canoa mo abe que nyoĩ quia erese ra. ³⁷ Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ndiqui nguĩã ñĩmi serĩ tuchi ee. ³⁸ Jesús que uque rei oso quia canoa ndiita quiti ra. Uãquĩ ndua arõ ngue esi rei quia ra. Echimbaaquiātu que emumba ra.

—Urembaaquiātusa, echumumba. Nandemanochĩ nda re, i que Jesús je ra. ³⁹ Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra. ⁴⁰ Ñee ngue uchimbaaquiātu je cote ra. —¿Mbaerã jēsiquichete riqui re? ¿Seicuayãte equia ã nde? i que Jesús ñee ee ra. ⁴¹ Siquiche bei que equia ra. Nyuruirã tuchi que mae Jesús quirirãuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

5

Jesús aba checuayã icuã jea

¹ Ngasẽ ngue ama ndobei cote ra. Gadara, i que hue ib je ra. ² Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra. ³ Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra. ⁴ Nyucua mocoĩte rei nda cadenas je raẽ. Ei nda echucua rei raẽ. Eo abe. Ucuasa nda endoso ndoso bei quia ra. Emo nda embutiba aronea tuchi quia ra. ⁵ Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra. ⁶ Isho que mae Jesús rese ra. Uchã asi que eu ngoi nguĩã ndese enonde ra. ⁷⁻⁸ Jesús que ñee ee ra. —Esẽ u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios riirĩ ño nde re. ¡Sembasichĩ nda se jẽ! i tuchi que ee ra. ⁹ —¿Mañi ndeje re? i que Jesús ee ra. —Etubiriã, i chõ nguĩã seje. Ure cuabẽte quia ñene, i que

ñee Jesús je ra. ¹⁰—Isho ra uremon-dochĩ, i tuchi que aba checuayã ñee Jesús je ra. ¹¹ Chiasu socoli tubiriã ngue chi quiaru huee ibi ibátee ra. ¹² Nyebe aba checuayã icuã ñee ja nguĩa Jesús je. —Uremondo ja rá chiasu socoli chianguire, i tuchi que equia Jesús je ra. ¹³ Eno, i que Jesús ee ra. Nyebe aba checuayã usẽ ja nguĩa amei ñia si cote. Chiasu chianguire que echoi ja cote ra. Dos mil rei chiasu. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

¹⁴ Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ishonda abe mbiirandu no. Mbia que ngãe ngãe nguia jirandu turã cote ra. ¹⁵ Ngasẽ ngue ecuaẽ Jesús je ra. Ae aba checuayã icuã nguereco uchianguire nyii nae, aque abe que siqui huee ee ra. Huĩrao resebe que eñi ngoi ra. Earacuate que ee cote ra. Nyebe mbia riqui nguĩa siquichete.

¹⁶ Ae mae erese nae, ũquĩ ngue ñee ñee mbia je ra. Mbia mbiirandu chiasu socoli rese. Ae aba checuayã quereco quia nyii nae, aque rese abe no. ¹⁷—Eso rá urerecha urerecua si, i jate que hue jenda ñee Jesús je ra. ¹⁸ Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jẽ, i rei que ñee Jesús je ra. ¹⁹ Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguĩã. Eya eã tuchite que eriqui serese ra”, ere oso nderesenda mbiirandu, i que Jesús ee ra. ²⁰ Amei ngue oso sucha mbuchesea seã cote ra. Mbia Decápolis jenda mbiirandu randu ja. —Jesús chõ sembucherõ nguĩã, i ja jate que equia mbia je ra. Mbia que nyururite quia mae erese ra.

Jesús Jairo riirĩ mbucherõ; ari mo

abe mbucherõ

²¹ Jesús que tu si iasa sobei si canoa ye ra. Mbia tubiriã ngue ngãe ngãe nguia erea ra. Ama nimíaa eriquibe mose. ²² Judíos rerecua mo ngue tu erea ra. Jairo, i que ee ra. Judíos munua nuasa que ae ra. Jesús nonde que eru ngoi nguĩã ndese ñee ee ra. ²³—Qui seri-irĩ si quia mano qui. Nyao rá ndeo terechono earõ. Embucherõ sacuaã, i tuchi que equia Jesús je ra. ²⁴ Jesús que oso erese cote ra. Mbia tubiriã abe que nyoĩ quia ñimajaã tuchi erui ra. ²⁵ Ari rasi mo abe que oso quia erui ra. Eruqui nda uchẽ mbei quia ee ra. Doce años nyee. ²⁶ Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerõ jiri jiriã tuchi que ra. Erasi i i tuchi chõ ngue ra. ²⁷ Jirandu chee que Jesús rese ra. Equite quiti que esi mbia joõ nda. Oco que oso eirao rese ra. ²⁸—Eirao achõ ndese se oco mose, acherõ nda se, i nda ra. ²⁹ Aque mose tuchi que eruqui ti i ee cote ra. Ngasiã ngue eicua uchianguire cote ra. ³⁰—Sequirãcuã ngue mbia mo mbucherõ nda, i que Jesús uchianguire ra. —¿Aba oco seirao rese re? i que mae uquite quiti ra. ³¹ Echimbaaquiato que ñee ee ra. —Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese re?” i re? i que ee ra. ³² Jesús que nyuruba ruba mae nda. —¿Aba oco serese re? i. ³³ Ari que jirandu tuchi ucherõ ndese ra. Eireite que titi titi i huĩ ee ra. Ngoi que nguĩã ndese Jesús resa quiti ra. Mbae que esenei ja ee cote ra. ³⁴ Jesús que ñee ee ra. —Seicuate que se ra. Nyebe arembucherõ nguĩã. Ndeya chõ eso cote. Nderasi ra tu si eã ndeje, i que Jesús ñee ee ra.

³⁵ Echeẽ mose chite que emo ngãe Jairo chuchua si ra. —Nderiirĩ ngue mano cote

ra. ¿Mbaerã nda Jesús ererao ndechuchua cote re? i que ñee ee ra. ³⁶ Jesús que echeẽ ñandu ra. Ñee ngue Jairo je cote ra. — Ndeya eã techĩ nda jẽ. Seicua chõ se jẽ, i que Jesús ee ra. ³⁷ Jesús que oso eraaque rea cot e ra. Uchĩmbaaquiatu tres que equerao ra. Pedro. Jacobo abe. Juan abe no. Jacobo nongue que Juan nda. Uquĩ mĩ ño ngue equerao erea ra. ³⁸ Ngasẽ ngue Jairo chuchua cote ra. Mbia que chĩ ja nyeseo ãquẽ ndaaque rese ee ra. Nyiibu tuchi que eu ra. ³⁹ Ique que oso ñee mbia je ra. —¿Mbaerã jẽingo nyiibute re? ¿Mbaerã jẽingo nyeseo re? ãquẽ manoãte resẽ. Uque chõ u co resẽ, i que Jesús ñee mbia je ra. ⁴⁰ Mbia que iquĩa iquĩa chõ ee ra. Jesús que mbia mondo ja chee itaicuee ra. Eru rese que esi ique eriirĩ ndaaque rea ra. Esi abe rese. Nguesenda abe rese. ⁴¹ Eraaque o que eisi ñee ee ra. —Echuruã, ãquẽ, i que ee ra. ⁴² Echeẽ mose tuchi que ãquẽ juã ngata cote ra. Etiarõte que ra. Doce años que ra. Mbia que nyuruira tuchi mae erese ra. ⁴³ —“Jesús que co raaque mbuquera ra”, jenyechĩ nda emo je jẽ, i que Jesús mbia je ra. —Nderiirĩ embuquiaru cote, i que ee cote ra.

6

Mbia Nazaret jenda Jesús isiteã

¹ Hue si que esi nguécuaa ra. Echĩmbaaquiatu abe que nyoĩ erese ra. ² Sábado mose que mbia mbaaquiatu quiatu judíos chumunuásaa ra. Mbia que nyuruira ja tuchi u echeẽ andu ra. Ñee ñee ngue u nyue ra. —¿Mangue eriqui ñĩmbaaquiatu tuchite re? ¿Mañi equia mbae icua ja tuchite re? Nandemae sayã naa naa tuchichĩ. ³ Ira mbitirõ tirõsa chõ ndaque. María riirĩ ño ndaque. Jacobo nongue chõ ndaque. José abe

no. Judas abe no. Simón abe no. ã echari enongue riqui ja raque nanderese ã, i que mbia ra. Nyebe mbia Jesús cheẽ andu sereã nea nguia. ⁴ Jesús que ñee ee ra. — Dios cheẽ mbuchecuasa ishonda cheẽ nguia ra mbia isi turã mbei. Nguetua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee ngueta jenda je ra. ⁵ Jesús que mbia mae sayã saã saã aroneate quia huee ra. O que echono mbia rasi mĩ mĩ arõ embucherõ nda. ⁶ Hue jenda mbia que chĩ Jesús icua eãte ra. Nyebe Jesús nyuruira tuchi nguia mae erese. Sucha tubiriã mbuchesea sea que equia mbia mbaaquiatu quiatu ra.

Jesús uchĩmbaaquiatu doce mondo ucheẽ nenei nenei sacua

⁷ “Jenyu” i que uchĩmbaaquiatu doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba checuayã icuã jea jea sacua mbia chianguĩ si. ⁸⁻⁹ —Mbae mo nda jendaochĩ icua. Mbae riru mo abe ra jendaochĩ. Jenyirũ mo abe ra jendaochĩ no. Mbae isiquia abe ra jendaochĩ. Jëiyao nongue mo nda jendaochĩ. Jëirao nongue mo abe ra jendaochĩ no. Jenyitochoquia mĩ ño jendao. ¹⁰ Jengasẽ mose sucha tubiriã mo, aque tuchua mĩ ño jẽingo uque. Tuchia ra jembuchesea seate chĩ jẽingo mose huee. Ae ra jengue nyii nae, hue tuchia bei chõ jẽingo uque. ¹¹ Sucha tubiriã jenda mo jëisi sereã nea mose, jëhui chõ esi. Hue jenda jeñee andu sereã mose, jëso chõ hue si. Jëi tubi jembutomo tomo ee. Hue jenda huicua icua sacua. Tacheẽ nyecua jëje. Ae ra jeñee isi sereã nae, uquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae,

ũquĩ nguia ra embasi tuchi Sodoma jenda si. Gomorra jenda abe si, i que Jesús ñee uchimondobi je ra. ¹² Nyoĩ nyoĩ ja que equia Dios cheẽ nenei nenei mbia je ra. —Jendua si Dios rese, i ite que equia mbia ja je ra. ¹³ Aba checuayã icuã ngue ejea jea tuchi quia mbia chianguĩ si ra. Mbae eĩ quira que equiti quiti quia mbia rasi rese ra. Mbucherõ ja que ra.

Mbia Juan el Bautista iquia

¹⁴ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. Juan el Bautista Jesús riqui reĩ Herodes je reaẽ. —Juan ndaaque que quera si ra. Nyebe eriqui nguĩ mbae raã jate, i rei que Herodes ra. ¹⁵ Elías Jesús riqui reĩ emo je reaẽ. Dios cheẽ mbuchecuaasa ñiinda Jesús riqui reĩ emo je re no aẽ. ¹⁶ Herodes que jirandu Jesús rese ra. Juan el Bautista eriqui reĩ nguĩ ee. —Juan ño eriqui re. Ae ãquĩ achisia. Quera si chõchĩ ere, i rei que Herodes ra. ¹⁷⁻¹⁸ Herodes Juan mondo quiatu quia carcel nyii reaẽ. Nyucua nda cadena je ra. Paama i nda Juan je ra. —iNde nde-nongue ninisi erereco aroneate jẽ! i quiatu que Juan ñee ee nyii ra. Herodes siquĩ mose nõngue ninisi rese. Herodías, i que enongue ninisi je ra. Felipe, i que enongue je ra. ¹⁹ Herodías que Juan ucuayãte quia ra. —Taiquia, i rei que equia ra. ²⁰ Herodes bite rei que Juan ñee andu ra. Icuayã jiri rei que ra. —Juan turãte que ra jẽ, i que equia Juan niĩ nda. Nyebe eriqui nguĩã ireĩ ireĩte esi. Nyebe Herodías Juan iquia aroneate nguĩã. ²¹ —Co mose chõ jẽ, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je. ²² Aque mose que Herodías riĩrĩ

nyuruqui ruqui mbia je ra. Nyucuaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaque je ra. —¿Mbae ra amee ndeje re? Echeẽ ño seje. ²³ “Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñooñoa ño nguĩã ndeje a, i que Herodes ñee nyucuaaque je ra. ²⁴ Nyucuaaque que oso ñee usi je ra. —¿Mbae “embu seje” ae ra ee re? i que ñee usi je ra. —“Juan el Bautista ãquĩ ño embu seje”, ere chõ ee, i que esi ra. ²⁵ Nyebe que esi ñee Herodes je cote ra. —Juan el Bautista ãquĩ emee na seje plato ye, i que ñee ee ra. ²⁶ Herodes chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã se-andu ja chõchĩ. Nyebe ra secheẽ ambuchebi eã ee, i que Herodes uchianguĩ re ra. ²⁷ Soldado mo ngue emondo cote ra. —Quiatu Juan iquia. Eãquĩ eru seje, i que ñee soldado je ra. ²⁸ Cárcel que esi Juan ãquĩ sia cote ra. Eãquĩ ngue equeru plato ye nyucuaaque je cote ra. Nyucuaaque que emee usi je cote ra. ²⁹ Juan ñimbaaquiatu jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae mii je

³⁰ Ae Jesús mondo quia uchimbaaquiatu, ũquĩ ngue ngaẽ si ee cote ra. Uchisaã ngue esenei senei cuaẽ ee ra. —Eĩ ure que mbia mbaaquiatu quiatu ra, i que ecuaẽ Jesús mbiirandu ra. ³¹ Mbia tubiriãte que ngaẽ ngaẽ nguia ñindecua ndecua erea ra. Equiaru mose rocoĩ abe. Nyebe ñee nguĩã uchimbaaquiatu je. —Nyao rã mbia eãsaa, jenguenea ucua mbiri, i que ra. ³² Ae ae que nyoĩ canoa ye mbia eãsaa ra. ³³ Mbia tubiriã tuchi

ngue mae ñochĩ nguiã echoi rese. Jesús icua chõ نگue ra. Mbia que nyoĩ uchã ibi rĩ nda. Sucha jenda ja. Ûquĩ nane نگue nyoĩ ngasẽ Jesús raarõ ama nimia nda. ³⁴ Jesús que usẽ canoa si cote ra. Mbia tubiriã ndese que mae nda. Eya eã tuchite que erese ra. Oveja raarõ iriã na nguiatu que mbia chi ee ra. Mbia que embaaquiatu quiatu tuchi cote ra. ³⁵ Tenda oso mose que echimbaaquiatu ñee ndei ee ra. —Tenda osote resẽ. Mbia chuchua mo âte a resẽ. ³⁶ Mbia chiurã eã abete a resẽ. Mbia embui mondo uchiurã ndequia requia sacua sucha achi jenda rea rea, i que ñee Jesús je ra. ³⁷ —Jeño mbae jemondo ee echurã, i chõ نگue Jesús ñee ee ra. —Tei. Mbae quia ra aba mondo ee. Mbia tubiriã tuchite quia ñene. Mbae isiquia tubiriã tuchi je quia nda aba mbae isi rei nguiã ña. Mbia chayãte chõ eno nde, i que ñee Jesús je ra. ³⁸ —¿Manya mbichae jendeco ñquĩ nde? Jẽso mae erese no, i que Jesús ee ra. Emo نگue oso mae erese eicua ra. —Cinco mbichae riqu i co. Sira nyeremo abe, i que echimbaaquiatu mo ñee ee ra. ³⁹ —Sã mbia ngoi ngoi ja quiata tose. Echesea sea, i que Jesús ra. ⁴⁰ Mbia que ngoi ngoi ja nyesea sea cote ra. Cincuenta jaaja. Cien abe no. ⁴¹ Jesús que mbichae cinco sirõ cote ra. Sira nyeremo abe no. Ibei rese que mae gracias i Dios je ra. Mbichae que esiquio quio cote ra. Mee mee نگue uchimbaaquiatu je ra. —Jemee mee mbia je, i que uchimbaaquiatu je ra. Sira nyeremo abe que esiquio quio mbia ja je ra. ⁴² Mbia ja que eu tuchi ra. Ñimbio chee que ra. ⁴³ Mbia chiũ sique tubiriã tuchi que ra. Mbichae rĩre. Sira rĩre abe no. Doce iru que mbia mombisẽ esique sique je ra. ⁴⁴ Cinco mil hombres que mbia mbichaecua ra.

Jesús ngata i arõ

⁴⁵ Aquere que Jesús uchimbaaquiatu mondo ja canoa ye ra. —Jẽ nane jẽso Betsaida sobei. Mbia tambui turã na mondo uchuchúaa se nyiĩ, i que ra. ⁴⁶ Jesús que mbia mbui turã mondo cote ra. Ae ae que oso sita ibátee cote ra. Ñee sacua Dios je. ⁴⁷ Huee que ae ae riqui itondaru chee ra. Canoa yenda que chi bei ama ndiite rĩ nda. ⁴⁸ Echimbaaquiatu que pare pare i canoa ibu ra. Quiririã نگue eichu ichute eruba quti ra. Jesús que mae erese ishote ra. Nguira ñee mose que esi erichã nda. I arõ نگue esi quia ngata ra. Nyucuaño nda eña nde. ⁴⁹ Mbia aingue eriqui reĩ nguiã echimbaaquiatu je. Ngata mose i arõ. Nyebe tasẽ tasẽ nguiã. ⁵⁰ Echimbaaquiatu chiã نگue cuãacuã i tuchi mae erese ra. —Jẽsiquichechĩ nguiã. Jẽya chõ ae. Se chõ nyeresẽ, i que Jesús ñee ee ra. ⁵¹ Ua que canoa ye embirõ cote ra. Quiririã نگue tiba cote ra. Echimbaaquiatu que nyuraira tuchi u mae erese ra. ⁵² Jesús mbichae mbeta quia nae, ñquĩ نگue echimbaaquiatu icuayãte uchiangui re ra. —Dios riirĩ ño eriqui reaẽ, i âte que eicuayã nda. Eãquĩ âtãte chõ نگue ra.

Jesús mbia Genesaret jenda mbucherõ cherõ

⁵³ Ngasẽ nyee que sobei cote ra. Genesaret, i que hue ibi je ra. ⁵⁴ Jesús usẽ mose canoa si que mbia eicua jei ra. ⁵⁵ Mbia que nyoĩ ja uchã tuchua mbuchesea sea ra. Erasi rurucuaẽ cuaẽ sacua Jesús je, erua resebe. ⁵⁶ Jesús cuatásaa que mbia riqui erasi rurucuaẽ cuaẽ ee ra. Sucha tubiriã jenda jaaja. Sucha mii mii jenda jaaja abe no. Turuquia jenda abe no. Ûquĩ ja que erasi curucuaẽ cuaẽ nguiã ñono Jesús jii ra. —Sã erasi oco oco ja rã ndeirao ai rese, i jaaja que ñee Jesús je ra. Ae oco erese nae, ñquĩ نگue nyerõ ja ra.

7

Mbia chiangui renda ae chõ embiçuã nguiã

¹ Aquere que fariseos mo ngaẽ ñee Jesús je ra. Embesasa mo abe, ae ngaẽ Jerusalén si. ² Jesús chimbaaquiatu mo ngue quiaru quiaru echoi quiiriã ee ra. —¿Mbaerã jẽingo quiaru jenyoï quiiriã nde? Nanderamei ñee ndui si eã ño jẽingochi nde, i que ñee asite ee ra. ³ Fariseos quiarei nyoï bei quiaru nonde. Judíos ja abe no. —Nandechoi eã mose ra nandechiã mondeite, i rei equia ã. Ngãmei ñee nguire eriqui ã naa naa mbei ã. ⁴ Echoi quiiriã mose eriqui quiaruã ã. Ngaẽ mose plaza si eriqui nyoï nyoï tuchi quiaru nonde ã. Ngãmei ñee nguire chõ eriqui nguiã mbae raã ja ã. Sã eriqui uyuquia irei irei no. Ñio abe no. Irachaẽ abe no. Uquisa abe no. ⁵ Nyebe fariseos ñee nguiã Jesús je. —¿Mbaerã ndechimbaaquiatu riqui eĩ eã nanderamei ñee nguire re? ¿Mbaerã eriqui quiaru uchoi quiiriã nde? i que fariseos ñee Jesús je ra. Embesasa abe no. ⁶ Jesús que ñee ee ra. —Isaías que embesa jeni cose ra. Eĩ ngue embesa ra:

À mbia riqui ñee turãte raque seje ã.
Uchiangui re quia eriquiãte nguiã serese ã.

⁷ Ñee turãte raque equia seje ã.
Amei ñee achõ ño esenei seneichi nguiã mbia je.

Dios cheẽ mii nenei nenei ndocoĩ ee,

i que Isaías embesa jeni nda.

⁸ Jenamei ñee achõ ño jesenei seneichi nguiã mbia je ãqui. Dios cheẽ nenei nenei ndocoĩ ee.

⁹ Dios cheẽ jemumba mumba chõ chi nguiã ã. Nanderamei ñee ndese chõ jẽingochi oote ã.

¹⁰ Moisés cheẽ ndui turã eã ño jẽingochi ã. Sã Moisés ñee mbia je no: “Jẽturã ño nguia jendu je jẽ. Jẽsi je abe no. Emo ñee icuã

mose ngu je, ãqui jẽiquia chõ. Emo ñee icuã mose usi abe je, ãqui abe jẽiquia no”, sã i Moisés no. ¹¹ Jẽ nguia jẽingo nguiã Moisés cheẽ abi abite ã. Sã jẽingo ñee no. “Ae nda amee nei jẽje, ãqui ngue amondo ja Dios je ra”, i mose emo ñee ngu je, “coche ñene” jenye chõchi nguiã ee. Mbae mee eã mose ngu je. Usi abe je. Nyebe jẽingo nguiã mbia mbaaquiatu icuã icuã ãqui. ¹² ¿Mbaerã jẽingo mbia riquisã quisãte mbae meese mose usi je re? Ngu je abe no. ¹³ Nanderamei ñee achõte jẽsenei seneichi nguiã jendiirĩ je ã. Nyebe jẽingo nguiã Dios cheẽ mbuquiachãte jendiirĩ si ã. Mbae icuã atate jẽsaã saã nguia ã, i que Jesús fariseos je ra. Embesasa abe je. ¹⁴ —Jenyu secheẽ andu, i que Jesús mbia ja je ra. —Secheẽ jẽicua rã. ¹⁵ Mbia chiu embiçuã eã nguiã. Echiangui renda chõ embiçuã nguiã. Echiangui renda chõ usẽ nguiã echuru rĩ echeẽ mose. ãqui ño embiçuã nguiã. ¹⁶ Jẽisa mose, secheẽ jeñandu turã na, i que Jesús ra. ¹⁷ Jesús que mbia secha oso ique tuchúaa ra. Echimbaaquiatu que ñee ee cote ra. —Erecheẽ ngue namo, “ãqui nda mbia mbiçuã” ere que, ãqui embuchecua rã ndecheẽ ure je, i que ñee Jesús je ra. ¹⁸ Jesús que ñee ee ra. —¿Jẽ abe jẽicuayãte quia re? Ae mbia u quia nae, ãqui mbia mbiçuã eã nguiã. ¹⁹ Iqueã nda oso echiangui re. Erie ye chõ eriqui nguiã oso. Echiqui rui chõ eriqui nguiã oso. Usẽ nyee, i que Jesús ñee uchimbaaquiatu je ra. —Mbia chiu turã ja, i chõ nguiã. ²⁰ — Mbia chiangui renda chõ embiçuã nguiã usẽ mose echuru rĩ. ²¹ Aba chiangui renda quia aba mundua icuã icuãte nguiã. Nyebe eriqui nguiã siqui emo ninisi rese. Emo ndu rese abe no. Siqui siqui eruã ndese abe no. Mbia abe iquia

iquia. ²² Mbae abe mbuguiachã quiachã no. “Aque raã nda sembaerã ña”, i emo mbae je no. Mbae icuã ñumumbara raã naa ja. Mbia abe mbiirĩ irĩ no. Mbae icuã osei osei bei. “Se quiatu ae”, i mbae je. Ñee icuã icuã no. Ucuasu abe raã naa no. Mbae icuã naa ja chooño. ²³ Mbia chianguĩ renda icuã ja chõ ãquĩ nde. Ñquĩ ño mbia mbiicuã icuã nguĩã ãquĩ ao ao mose, i que Jesús ra.

Ari mo Jesús icua

²⁴ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. Ique que oso tuchia mo nda. —Sã mbia jiranua serese, i rei que ra. Mbia qu e jirandu chõ erese ra. ²⁵ Ari mo abe que jirandu erese ra. Eriirĩ ngue aba checuayã nguereco uchianguĩ re ra. Ari que tu Jesús rea ra. Ngũã ndese que ngoĩ ejii ra. ²⁶ Sirofenisia jenda que ae ra. Judío eã tuchi que ae ra. Griego cheẽ ño ngue echeẽ nde. —Aba checuayã icuã eja raã seriirĩ si, i tuchi que Jesús je ra. ²⁷ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁸ Ari que ñee ee ra. —Aicuate raque se, Sererecua. Mbi amo ndaque ure. Judíos eã ndaque ure. Ure je abe chõ mbae esaã ae. Seriirĩ embucherõ seje ae, i que ari ñee ee ra. ²⁹ Jesús que ñee ee ra. —Erecheẽ turãte. Quiatu rei. Nderiirĩ ngue nyerõ no, i que ee ra. ³⁰ Ari que oso uchuchúaa cote ra. I que eriirĩ u ngua ye ee cote ra. Aba checuayã icuã usẽ ño ngui a esi reaẽ.

Jesús eisayã mbucherõ

³¹ Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rĩ ngue esi ra. ³² Eisayã mo ngue mbia curucuaẽ ee ra.

Echeẽ aquiatuãte abe que ra. —Ndeo echono earõ embucherõ, i tuchi que mbia Jesús je ra. ³³ Jesús que eisayã nguerao pe jiri mbia recha ra. O que emingue mondo eisacua rereco chobei ra. O que embia ngũendi je ra. Mondo que echuru rĩ cote ra. ³⁴ Soboiba que ibate cote ra. Jiabute que ñee ee ra. —Esoro, eisacua, i que ee ra. ³⁵ Eisacua que soro cote ra. Echuru abe que nyerõ cote ra. Ñee ngue cote ra. ³⁶ —Emo nda jembiiranduchi jẽ, i rei que Jesús ñee mbia je ra. Mbia que ñimbiirandu i i tuchi ra. ³⁷ Mbia que ñee ñee nyue Jesús rĩ nda. —Mbae raã turã turã ja tuchi chĩ equi a co. Eisayã abe isa ndoro chee no. Echeẽ ngũã abe mbucheẽ nyee no, i ja tuchi que mbia quia nyuruira mae erese ra.

8

Jesús mbichae tubiriã saã mbichae mũje

¹ Mbia que ñumunua tuchi Jesús je aque mose ra. Ñee ngue uchimbaaquiato je ra. ² —Seya eãte aico ã mbia tubiriã ndese co. A echi arete serese tres días a. Echiurã mo eãte mbae mo aa. ³ Eriãcuã amondo sereãte echuchúaa. Ngasẽ ãte chõ ndae. Ishote si ecuaẽ aa resẽ. Nandembuquiaru chõ aa, i que Jesús ra. ⁴ Echimbaaquiato que ñee ee ra. —Turuquia re chõ nandeico a resẽ. ¿Mañĩ nda aba ã mbuguiaru ja re? i que ñee Jesús je ra. ⁵ —¿Manya mbichae jendeco re? i que Jesús ee ra. —Siete, i que ee ra. ⁶ Jesús que mbia mbucoi ja ibii ra. Mbichae siete que eisi ja o je cote ra. Gracias i que Dios je cote ra. Mbichae qu e esiquio quio mee uchimbaaquiato je cote ra. Ñquĩ ngue embuchao chao mbia tubiriã je cote ra. ⁷ Sira ñetẽ mii abe que equereco ra. Gracias i que Jesús Dios je cote ra. —Sira abe

jembuchao chao mbia je, i abe que ee ra. ⁸ Mbia que eu ja ñimbio chee ra. Echüu sique que emunua nua ja ra. Siete iru que emombisê nyee ra. ⁹ Mbichaecua rei mbia cuatro mil. Jesús que embui turã mondo cote ra. ¹⁰ Canoa ye que Jesús ua uchimbaaquiatu rese cote ra. Nyoï que Dalmanútaa ra.

Mbia mae sayã eteacuquia ure je, i fariseos

¹¹ —Tã nande rã Jesús je, i que fariseos cuaê ñee ñee ee ra. —Mbia mae sayã esaã na ure je. ¶ nda “Dios chimbu” ure tuchi ndeje, i rei que ñee Jesús je ra. ¹² Jesús que iabu tuchi ñee nda. —¿Mbaerã mbia riqui “mbia mae sayã esaã ure je” i tuchi re? Tacheê nyecua jêje. Mbia mae sayã mo nda ateacuquia eã tuchi jêje, i que Jesús ñee ee ra. ¹³ Oso que mbia recha cote ra. Iasa que echoi sobei cote ra.

Fariseos mbia mbaaquiatu icuã, i Jesús

¹⁴ Jesús chimbaaquiatu que uchiurã curuchoi eã nda. Tesarei que esi ra. Mbichae mii tuchi que equeru huee ra. ¹⁵ Jesús que ñee ee ra. —Mbichae mbuchimatãsa rã ndei fariseos cheê. Herodes chimbaaquiatu cheê abe no. Ũquĩ ñee ndese ra jêingochĩ jê, i que Jesús ee ra. ¹⁶ —Mbichae quiatu ngue nanderuã nguĩã. Nyebe eriqui nguĩã ñee nande je ũquĩ, i rei que echimbaaquiatu ñee nyue ra. ¹⁷ Jesús que echeê ñee icuate ra. Nyebe ñee nguĩã ee. —¿Mbaerã jêingo “mbichae nanderuãchĩ” i re? ¿Ae rĩ aico ñee jêje nae, ũquĩ jêicuayã mbeite quia re? ¿Jeñia ãtã mbeite eriqui re? ¹⁸ Jêisate raque. ¿Secheê jeñanua mbeite quia re? Jendesate raque. ¿Sechisaã jêicuayã mbeite quia re? ¹⁹ Se mbichae cinco mbeta mose mbia cinco mil je, ¿manya iru jemombisê mbichae sique sique je re? i que Jesús ee ra. Doce, i que ee ra.

²⁰ —Mbichae siete mbeta mose mbia cuatro mil je, ¿manya iru jemombisê esique sique je re no? i que Jesús ee ra. Siete, i que ee ra. ²¹ —¿Jêingo secheê icuayã i ite ã nde? i que Jesús ee ra.

Jesús eresayã mo mbucherõ

²² Nyoï que Betsaida cote ra. Mbia que amei ndesayã mo ngurucuaê Jesús je ra. Oco sacua ere se embucherõ. ²³ Jesús que eo isi serao pe jiri sucha si cote ra. Ngüendi que equiti eresa rese ra. O que echono earõ nda. —¿Eremaete mbae rese cote re? i que ee ra. ²⁴ Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, i que eresayã nda. ²⁵ Jesús que o chonombe eresa rese ra. Mae turã ngue cote ra. Nyerõ tuchi que cote ra. ²⁶ Jesús que embui mondo uchuchúaa ra. —Eresochĩ nda sucha ite rĩ jê, i que ee ra.

Cristo chõ nde resê, i Pedro Jesús je

²⁷ Jesús que nyoï Cesarea de Filípoo cote ra. Huee que ñee uchimbaaquiatu je cote ra. —¿Aba aico reĩ mbia je re? i que ee ra. ²⁸ Echimbaaquiatu que ñee ee ra. —Juan el Bautista ereico reĩ nguĩã mbia je co. Elías ereico reĩ nguĩã emo je no. Dios cheê nenei neneisa mo ereico reĩ nguĩã emo je no, i que echimbaaquiatu ñee Jesús je ra. ²⁹ —¿Aba aico reĩ jêje co re? i que Jesús ee ra. —Cristo chõ nde resê, i que Pedro ñee ee ra. ³⁰ —Jeñeechĩ nda mbia mo je ũquĩ jê, i que Jesús ee ra.

Mbia ra seiquia, i Jesús

³¹ Jesús que umano nonde senei senei uchimbaaquiatu je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Seiquia rae. Tres días mose ra aquera si, i que ñee uchimbaaquiatu je ra. ³² Jesús que

ñee nyecua tuchi ee ra. Nyebe Pedro Jesús rerao nguiã suruicha. — ¿Mbaerã erecheẽ ùquĩ nde? Mbia ra ndeiquiyã, i rei que Pedro ñee asite Jesús je ra. ³³ Jesús que uba mae uchimbbaaquiato rese ra. Ñee ngue Pedro je ra. —Ehui chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴ Jesús que ñee uchimbbaaquiato ja je cote ra. Mbia abe je. — Emo siquise mose serui, sã hui ja mbae ubi si. Sã cruz rui umbaerã se rã si. Sã eriqui serui bei cote. ³⁵ Emo ndua bei mose nguico rese, ereco ra ua esi. Emo hui mose nguico si seje, ùquĩ nda siqui bei. ³⁶ Emo nguico mumba chooño mose, eya eã mbei rae. Mbaecha rete raque. ³⁷ Emo nguico mumba chooño mose, mbae mo eãte ereco ribishorõ sacuã. ³⁸ Emo ireĩ ireĩ mose sesi mbia icuã ndésaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si íbii uquirãcuã je aque mose. Ibatenda rese ra achu ángeles, i que Jesús ee ra.

9

¹ —Tacheẽ nyecua jêje. A jengu a nae, jemo nda jemaẽ sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús nyicuaabo uchimbbaaquiato résaa

² Tenda seis uare que Jesús uchimbbaaquiato mo nderao sita ibátee ra. Pedro. Jacobo. Juan abe no. Ùquĩ ngue equerao ja mbia tiásaa ra. Jesús que nyicuaabo erésaa huee ra. Enininya tuchi que ee ra. ³ Eirao abe nininya tuchi que ra. Eiraoshĩ nininya tuchi que ee ra. ⁴ Mbia nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que

ùquĩ nda. Elías rese. ⁵ Pedro que ñee Jesús je ra. —Sererecua, nandecuturãte a. Sucha ñetẽ uresaã saã na. Enongue nembraerã. Enongue Moisés mbaerã. Enongue Elías mbaerã no, i rei que Pedro ñee Jesús je ra. ⁶ Echimbbaaquiato siquichete quiato ngue re. Nyebe Pedro riqui nguiã “mañi nda aba re” ite. ⁷ Ibeishĩ ngue tu nguichi eite re cote ra. Moisés mbuchecuayã ee. Elías abe no. Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra. ⁸ Echimbbaaquiato mae mose que Jesús mii ndiqui ee cote ra. Moisés que nyecuayã asi ee ra. Elías abe.

⁹ Ecuaẽ mose nguichi sita ibate si que Jesús ñee ee ra. —Ae rese jemaẽ namo nae, ùquĩ je jenyecuachõ jẽ. Sequera si mose quiato teñee ñee mbia je cote. Semano nonde eã, i que Jesús ñee uchimbbaaquiato je ra. ¹⁰ Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra. ¹¹ Ñee ngue Jesús je cote ra. —¿Mbaerã embesasa ñee nde? “Elías rane nda tu Cristo si” i re, i que ñee Jesús je ra. ¹² Jesús que ñee ee ra. —Ae bei. Coche Elías rane tu nguiã mbae mbitirõ ja. ¿Mbae i chõ embesa ji quia Cristo riĩ ña? “Mbae rasi ra esaã tuchi”, i chõ nguiã. “Mbia ra eucuayã tuchi”, i chõ nguiã no. ¹³ Elías que tu no. Mbia icuã icuã tuchi que ee ra. Sã embesa ji ñee nyii no. Eĩ si tuchi que ra, i que Jesús ñee ee ra.

Jesús aba checuayã jea mbia riirĩ mo si

¹⁴ Ngasẽ ngue echoi echimbbaaquiato ataque je cote ra. Mbia tubiriã tuchi que chi echimbbaaquiato mama huee ra. I que embesasa u ñee icuã icuã echimbbaaquiato je huee ra. ¹⁵ Jesús ngasẽ mose que mbia nyuruira tuchi mae erese ra.

Oo tuchi que erese ra. ¹⁶ —¿Mbae riĩ jẽingo ñee icuã icuãte jenyue re? i que Jesús ñee mbia je ra. ¹⁷ Emo ngue ñee Jesús je ra. —Sererecua, seriĩ aru quia ndeje co. Nde embucherõ sacua. Aba checuayã icuã equereco uchiangui re co. Nyebe eriqui nguiã ñee eãte co. ¹⁸ Aba checuayã icuã ndiqui seriĩ isi isi beite co. Mbucoi coi beite equia ibii co. Echuru abe mbichoite. Ureĩ abe quti quitite. Nyebe equirãcuã neate riqui nguiã co. “Aba checuayã jẽjea seriĩ si”, ae rei que ndechimbaaquiatu je ra. Eaquiatuãte chõ ngue ra, i que eru ñee Jesús je ra. ¹⁹ Jesús que ñee cote ra. —¿Mañi jenyue quia seicuayãte re? ¿Ñimbirãcuã mbeite ra aba quia jẽje re? i que Jesús ra. —Eriĩ jendu rã seje, i que cote ra. ²⁰ Eriĩ ngue ecurucuaẽ ee cote ra. Aba checuayã ngue eriĩ mburirite Jesús rese mae mose ra. Mbucoi que ibii ra. Mbuchiishao shao tuchi que ra. Echuru mbichoĩ tuchi que ra. ²¹ —¿Manosete aba checuayã ndiqui ererequia re? i que Jesús eru je ra. —Eñetẽ mosebe bei, i que eru ra. ²² —Tátaa eriqui emondo mondo beite co. Ama ye abe. Ericharã. Nde ejea aquiatu mose, ejea rã esi ure je, i que eru ñee Jesús je ra. ²³ Jesús que ñee ee ra. —¿Mbaerã ereico “nde aquiatu mose” i seje re? Ae seicua quia nae, ũquĩ je aico mbae raã aquiatu jate co resẽ, i que Jesús ee ra. ²⁴ Eru que ñee ee ra. —Areicuate se resẽ. Semingo uquiabe jiri nderese ae, i que eru ucheẽ mumbebote ñee Jesús je ra. ²⁵ I que mbia cuaẽ nguiã ñumunua nua tuchi huee ra. Nyebe Jesús ñee asi nguiã aba checuayã icuã je. —Aba checuayã, mbia isa erembũtaote quia hue. Ereimbucheẽ ngũĩate abe equia hue. Esẽ oso esi. Eriique sichĩ nda oso echiangui re jẽ, i que Jesús ee ra. ²⁶ Aba checuayã ngue tasẽte

eriĩ mburiri cote ra. Usẽ oso cote. Eraaque rã ngue eriĩ nyi cote ra. Mano nei nguiã mbia je. ²⁷ Jesús que emua eo rese ra. Juã turã ngue cote ra. ²⁸ Jesús que oso ique tuchúaa cote ra. Echimbaaquiatu que ñee ee mbia tiãmbaa cote ra. —¿Mbaerã aba checuayã useã oso urecheẽ mose ure re? i que ñee ee ra. ²⁹ Jesús que ñee ee ra. —Jeñee eã mose Dios je, ã jẽjea aroneate. Jẽhui eã mose jenyũ si, ã jẽjea aroneate no, i que Jesús ee ra.

Mbia ra seiquia, i si Jesús

³⁰ Galilea rĩ ngue echoĩ hue si ra. —Sã mbia jiranua nanderese, nandeso mose hue rĩ, i que Jesús ñee uchimbaaquiatu je ra. ³¹ Uchimbaaquiatu ae que embaaquiatu quiatu oso quia ñeenda rui ra. —Emo nda semee mbia icuã je seiquia sacua. Seiquia ji ra aquera si tres días mose, i que equia embaaquiatu quiatu ñeenda rui ra. ³² Echimbaaquiatu que echeẽ icuayãte quia ra. —Ndecheẽ embiasa asa tuchi rã ure je, i ãte que equia ee ra. Ireĩ ireĩte quiatu que equia esi ra.

Ererecua tuchi ra se, i jaaja Jesús chimbaaquiatu nyue

³³ Ngasẽ ngue Capernaum nda. Tuchúaa ique mose que ñee uchimbaaquiatu je ra. —¿Mbae rĩ jenyu quia ñee icuã icuãte jenyue ñeenda rui re? i que ee ra. ³⁴ Quiriri ja chõ ngue u ñee ndocoi ee ra. —Ererecuarã nda se cote, i jaaja chõ equia nyue ñeenda rui reaẽ. Nyebe eriqui ireĩ ireĩte Jesús si re. ³⁵ Jesús que ngoi cote ra. —Jenyu ja rã. Tacheẽ jẽ ja je, i que uchimbaaquiatu doce je ra. —“Ererecuarã se” i mose emo, sã uataque rimbarã ño eriqui, i que Jesús ee ra. ³⁶ Äquẽ mo ngue emii eite re cote ra. Sui que ñee uchimbaaquiatu je ra. ³⁷ —Ae siqui turã ngui mbi a riĩ je seriĩ nae,

seje abe chõ eriqui nguiã siqui turã. Ae eturã ndiqui seje nae, semondosa abe je chõ eturã ndiqui nguiã, i que Jesús ee ra.

Emo icuã eã mose nande je, nanderesenda chõ ùquĩ nde

³⁸ Juan ngue ñee Jesús je ra. — Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguiã, i que Juan Jesús je ra. ³⁹ Jesús que ñee ee ra. —Tei. jÿesiquisã quisãchĩ nda jẽ! Emo mbia mae sayã naa mose seriĩ, ñee icuã eã nda seje aquere. ⁴⁰ Emo icuã eã mose nande je, nanderesenda chõ ùquĩ nde. ⁴¹ Emo sechĩmbaaquiatsu isei mbiu turã mose seriĩ, Dios abe ra mbae turã mondo aque je.

Mbae icuã nda nandesã ùquiachĩ emo je

⁴² Ae ra mbae icuã saã uquia seicuasa mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisha ye nyii re chã. Sita resebe ecua ji mondo. f nda mbae icuã naa uquia eãte rei seicuasa je. ⁴³ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mĩ Nderequia, siqui bei sacuã huee. Oso rocoĩ tata cuásuu, ndeo nyeremo nderao. Tata mungue aronea tuchi chõ hue jenda re. ⁴⁴ Mbae rosei ra manoa mbei huee. Tata ra uqueã mbei huee no. ⁴⁵ Ndei nemingo mose mbae icuã ndese, ndei echisia mombo. Coche rei ra ereso ibate ndei mĩ nderequia, siqui bei sacuã huee. Nemombo rocoĩ tata cuásuu, ndei nyeremo nderao. Tata mungue aronea tuchi chõ hue jenda re. ⁴⁶ Mbae rosei ra manoa mbei huee. Tata ra uqueã mbei huee no. ⁴⁷ Nderesa nemingo mose mbae icuã ndese, nderesa echoo. Coche rei ra ereso Dios recua nderesa mĩ nderequia. Nemombo

rocoĩ tata cuásuu, nderesa nyeremo nderao. ⁴⁸ Mbae rosei ra manoa mbei huee. Tata ra uqueã mbei huee no. ⁴⁹ Tata ra mbia sei bei huee. ⁵⁰ Embiquesa rã ño jẽingo nguiã mbia je ã. Sã embiquesa turãte no. Eise quiachamba mose, eicuã tuchi ra cote. Embiquesa rã tuchi chõ jẽingo mbia je. Jẽingo turã ño nguia jenyiese, i que Jesús ee ra.

10

Jesús ñee mbia ngüinisi mombo je rĩ

¹ Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbia que ñumunua nua tuchi quia ee ra. Mbaaquiatsu quiatu que equia ra. Sã eriqui mbia mbaaquiatsu quiatu beite no. ² Fariseos mo abe que ngaẽ erea ra. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngüinisi jea ubiã mose re? i que ñee Jesús je cote ra. ³ —¿Mbae i Moisés embesa re? i que Jesús ee ra. ⁴ Fariseos que ñee ee ra. —“Jeninisi jea nonde, papel mbesa ji jemondo ee”, i que Moisés ra, i que ra. ⁵ Jesús que ñee ee ra. —Jeãquĩ ãtãte quiatu ngue re. Nyebe Moisés ùquĩ mbesa nguiã jẽje. ⁶ Ùquĩ i ãte que Dios quia mbia ao ramo mose nyii ra. Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁷ Nyebe ra emo ndiqui ngüinisi rese bei. Ngu si isho. Usi si abe no. Ngüinisi mĩ ndese siqui bei sacuã. ⁸ Co mĩ na siqui sacuã nyiese cote. Nyeremo siqui rã eã ño cote re. Co mĩ siqui rã ño ùquĩ cote re. ⁹ Ae Dios mbucha nyiese nae, sã ùquĩ hui eã mbei nyesi, i que Jesús ñee fariseos je ra.

¹⁰ Ngasẽ mose tuchúaa que echĩmbaaquiatsu ñeembe ee ra. — Ndecheẽ embiasa turã na ure je, i que ee ra. ¹¹ Jesús que ñee ee ra. — Ae ngüinisi jea nae, emo ndese siqui

sacuã nae, eicuã tuchi chõ ùquĩ nde. Adulterio i que ùquĩ je ra. ¹² Cuña mo ngu jea mose siqui sacua emo ndese, eicuã tuchi chõ ùquĩ no nde, i que Jesús ee ra.

Jesús mbia riirĩ isi turã turã

¹³ Mbia que nguiirĩ ngurucuaẽ cuaẽ nguia Jesús je ra. Jesús oco oco sacua erese. —¿Mbaerã jendiirĩ jendu quia co re? i rei que echimbaaquiato ñee mbia je ra. ¹⁴ Jesús que paama i ñee uchimbaaquiato je ra. —Jeñeechĩ nguia ee. Sã ae ae riqui nguiirĩ ndrurucuaẽ cuaẽ seje. Eĩ ño Dios rimba nguia. Ucuasu raã naa eã. Mbia riirĩ na. ¹⁵ Mbia riirĩ na ño jëingo Dios isi turã. † mose ra Dios rimba tuchi jê cote, i que Jesús ra. ¹⁶ Mbia riirĩ ngue esui sui ra. O que echono ñono earõ nda. Ñee turã ngue Dios je erĩ nda.

Acuanindu mbaecha mo ñee Jesús je

¹⁷ Acuanindu mo ngue tu Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacua nde? i que ñee Jesús je ra. ¹⁸ Jesús que ñee ee ra. —¿Mbaerã ereico “eturã” i seje re? Dios mii ño eturã ndesẽ. ¹⁹ Dios cheẽ emumbayã. Echeẽ ereicuate quia co resẽ: “Emo ninisi rese ra ereicochĩ. Mbia ra ereiquiachĩ. Mbae ra erembuquiachãchĩ. Erecheẽ ñooñochoĩ nda emo nii. Emo nda erembuĩrĩ irĩchĩ. Ndeturã ño nderu je. Ndesi abe je”, i que Dios cheẽ nda, i que Jesús ñee ee ra. ²⁰ Acuanindu que ñee ndei ee ra. —Ùquĩ ngue amumbayã ja bei quia ra. Señetẽ mosenda bei, i rei que ñee Jesús je ra. ²¹ Jesús que nyesequa tuchi mae mose erese ra. —Ã mii mo abe eresaã eãte. Nembae emondo mondo ja mbia mbaecha reã je. Nde ùquĩ naa mose, mbae tubiriã nda nembae ndeico mose ibate. Nembae mondo ja mose mbaecha reã je,

serui eico cote, i que Jesús ee ra. ²² Acuanindu Jesús cheẽ andu mose que echiã ndoso tuchi cote ra. Eya eã tuchi que oso Jesús recha ra. Mbaecha tuchite quiatu ngue ae re.

²³ Jesús que mae mbia rese ra. —Mbaranguiatu ãte mbaecha je ngasẽ sacua ibate, siqui bei sacua huee, i que ñee uchimbaaquiato je ra. ²⁴ Echimbaaquiato que nyuruiira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiatu ãte ùquĩ je oso sacua ibate Dios rese. ²⁵ Sã ticuas mo ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, i que Jesús ee ra. ²⁶ Echimbaaquiato que nyuruiira tuchibe u eandu no nda. —¿Aba quiatu ra oso Dios rea ibate re no? i que ñee nyue ra. ²⁷ Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresеча ja ra. Siqui sacua nderui, i que Pedro ñee nda. ²⁹ Jesús que ñee ee ra. —Tacheẽ nyecua jêje. Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae nguiirĩ secha. Ae umbae ibi secha no. ³⁰ Ùquĩ mbae ja ra asibishorõ tuchi cien veces ereco mose íbii. Echuchua ata. Enongue ata. Esi ata. Eriirĩ ata. Ibi ata abe no. Ùquĩ ja ra asibishorõ tuchi ee. Mbia icuã icuã tuchi ra ee serĩ. Aquere ra siqui bei tuchi Dios rese ibate cote. ³¹ Ae ererecua saã saã nguia namo nae, ererecua eã tuchi ra ùquĩ m o cote. Ae ererecua eã namo nae, ùquĩ mo nda ererecua cote, i que Jesús ra.

Mbia ra seiquia, i si Jesús

³² Jerusalén ngue echoi quia ra. Jesús que oso quia enonde ra. Echimbaaquiato que siquichete

nyoi quia ra. Nyebe Jesús ererao nguiã mbia tiãsaa ñee sacua ee. ³³—Co nyao quia Jerusalén co. Huee ra mbia semee sacerdotes rerecua je. Embesasa abe je. “Jesús jëiquia”, i ra seriĩ. Semee nda judíos eã je cote. Sei quia sacua. ³⁴ Mbia ra secheẽ saã saã. Seiruã nua abe ra eno. Sembucha chee ra i quia ira rese. Tres nyaashĩ mose ra aquera si, i que Jesús ñee ee ra.

Ererecuarã se, i raque Jacobo, Juan ndese

³⁵ Jacobo que oso Jesús riichã ngõngue rese ra. Juan, i equia ee. Zebedeo riirĩ ndei ũquĩ. —Urechu ñee ndeje aa, Urembaaquiatusa. Ae riĩ nda urecheẽ ndeje nae, ũquĩ je “eno” ere rã ure je, i rei que ee ra. ³⁶ —¿Mbae ra aba saã jëje re? i que Jesús ee ra. ³⁷ —Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co miĩ chĩ ndequiato cuti. Enonge chĩ ndequiato cutiã no, i rei que ñee Jesús je ra. ³⁸ Jesús que ñee ee ra. —Ae riĩ jëingo ñee seje nae, jëirandu turã eãte ũquĩ ndese. Ae rasi ra asaã tuchi nae, ¿ũquĩ ndasi ra jësaã jë abe re? Bautizar i ra seje, ¿eĩ nda bautizar i jë abe je re? i que Jesús ee ra. ³⁹ “Ae” i que ñee ee ra. Jesús que ñee ee cote ra. —Ae bei. Ae rasi ra asaã tuchi nae, ũquĩ ndasi ra jësaã tuchi rei jë abe. Bautizar i ra seje, eĩ si rei ra bautizar i jëje no. ⁴⁰ “Ererecuarã ure”, jenyere rei que seje, ũquĩ asaã aroneate se jëje. Paba ae quiatu ra ũquĩ saã. A e ebite, ũquĩ nda emiĩ ererecuarã, i que Jesús ra. ⁴¹ Echimbbaaquiatusa ataque que jirandu erese ra. Echimbbaaquiatusa diez. Paama i que Jacobo je ra. Juan je abe. ⁴² Jesús que “jenyu” i ñee uchimbbaaquiatusa ja je cote ra. —Mbia ataque rerecua riqui ucuasu raã naa tuchi ngũimba je

ũquĩ. ⁴³ Ũquĩ nda jësaã eã jë. “Ererecua ra se”, i mose jemo, sã ũquĩ siquichõ uataque rimbarã. ⁴⁴ Jemo “se rane jë” i mose, sã ũquĩ ndiqui bei mbae turã naa naa uataque je no. ⁴⁵ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã oso mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús Bartimeo ndesayã mbucherõ

⁴⁶ Jesús que ngasẽ Jericoo ra. Uchimbbaaquiatusa rese. Jesús ngata mose hue si, mbia tubiriãte que nyoi quia erui ra. Eresayã mo ngue chĩ ñeenda jie huee ra. Ache ache i que huĩ nda. Bartimeo, i equia ee. Timeo ndiirĩ ngue ae ra. ⁴⁷ Jirandu mose Jesús rese que ñeemombo mombo ee ra. —¡Jesús! ¡David nducucha! ¡Ndeya eã ño serese jë! i que ee ra. ⁴⁸ —¡Equiriri chõ jë! i tuchi rei que mbia ñee ee ra. —¡Sererecua! ¡David nducucha! ¡Ndeya eã ño serese jë! ibe que eresayã ñee Jesús je ra. ⁴⁹ Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jë. Ehuã. Jesús riqui ñee ndeje a, i que ee ra. ⁵⁰ Juã asi que oso oo Jesús rese ra. Uchiaticua recha. ⁵¹ —¿Mañi ae ra ndeje re? i que Jesús ñee ee ra. —Seresa embuturã nae, Sererecua, i que ra. ⁵² Jesús que ñee ee ra. —Eso cote. Seicuate que se ra. Nyebe nderesa nyerõ nguiã cote, i que ee ra. Aque mose tuchi que eresayã ndesa turã ja cote ra. Jesús rui que esi quia cote ra.

11

Jesús ngasẽ Jerusalén

¹ Jesús que Jerusalén curubite nyoi quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que ee ra. Hue si que

Jesús uchimbaaquiatu nyeremo mo mondo ra. ² Ñee ngue ee ra. —Achi sucha chõ jêso rã. Jengasẽ namo mose ra burro riirĩ cuasa mo ñi jêje huee. Emo ngue nyui eãte eátoo ra. Jenyura seru seje. ³ Emo ñee mose jêje, “¿mbaerã nda jenyura re?” i mose jêje, jeñee ee. “Nandererecua que ‘jendu’ i ra. Mondo jeibe ra jêje”, jenyee ee, i que Jesús ñee ñquĩ nyeremo mondo ra. ⁴ Nyoĩ que erea cote ra. Burro riirĩ ngue etea Jesús cheẽ nguire cote ra. Ecuasa que chĩ taicuee eiquesa jii ra. Nyura que cote ra. ⁵ Ae mbia chi huee nae, ñquĩ mo ngue ñee ee ra. —¿Mbae rese jẽingo hue re? ¿Mbaerã jẽingo era era re? i que ee ra. ⁶ Jesús cheẽ ndui si que ñquĩ ñee ee ra. “Eno” i que mbia ee cote ra. ⁷ Burro riirĩ ngue ecuruchoi Jesús je cote ra. Huĩrao que echono ñono earõ nda. Jesús que nyui eátoo cote ra. ⁸ Jesús que ngata oso quia burro átoo cote ra. Mbia tubiriã ngue huĩrao mbiitee tee nyoĩ quia ibi rĩ enonde ra. Emo ngue sindo mbiitee tee choi quia enonde no nda. Jesús oso sacua hue rĩ. ⁹ Mbia ia tuchi que tasẽ tasẽ nyoĩ quia enonde ra. Erui abe no. —Co nandererecua ru quia ngasẽte co. Co Dios chimbu ru quia ngasẽte nande je co. ¹⁰ David nducucha ru quia co. Nandererecua turã sacua. Dios turã tuchi riqui nande je co, i tuchi que mbia quia ñee nda. ¹¹ Jesús que ngasẽ Jerusalén cote ra. I que que oso Dios chuchua cote ra. Mae ja mose mbae rese que esi Betania uchimbaaquiatu rese cote ra. Tenda quiatu ngue osote nguia ee.

Jesús ñee icuã higo i je

¹² I que Jesús choi quia Betania si isamami nda. Eriãcuãte que oso quia ra. ¹³ Isho que mae higo i mo ndese ra. Ero rerecua que ra. —Ea mo tau, i rei que oso erea ra. Ero achõte chõ ngue ee ra. Aque

mose que eriqui ia eã nda. ¹⁴ Jesús que ñee higo i je cote ra. —Mbia ra ndea u eã mbei cote, i que ee ra. Echimbaaquiatu abe que echeẽ ñandu ra.

Jesús mbia mbusẽ Dios chuchua si

¹⁵ Ngasẽ ngue Jerusalén cote ra. Jesús que oso Dios chuchua ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ñquĩ ja que Jesús mbusẽ mondo ra. Ae mbae isiquia sibishorõ shorõ nguia, ñquĩ mbae abe que embuchiichere chere ja mesa ra. Mbae ja resebe. Ae nyurushi cuasu mondo mondo mbia je mbae ribishorõ nae, ñquĩ nenda abe que embuchiichere chere ja ra. ¹⁶ Jesús que ñee ñquĩ je ra. —Dios chuchua ite rĩ jẽingochĩ nguia mbae rerao rao. ¹⁷ “‘Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchua je re. Mbae mbuquiachãsa chuchua jẽsaãte chĩ nguia ee, i que Jesús ñee asite ñquĩ je ra. ¹⁸ Sacerdote rerecua que chi Jesús cheẽ andu ra. Embesasa abe no. —¿Mañi nda aba Jesús iquia re? i que eu ndua ndua ra. Mbia quiatu que oote Jesús cheẽ ndese ee ra. Nyebe eriqui nguia Jesús ucuayãte. ¹⁹ Hue sucha qu e Jesús secha oso eresaitõ cote ra.

Higo i mano cote

²⁰ I que Jesús nyoĩ quia isamami nda. Higo i cutite que echoi quia ra. Higo i ñimama ño nguia reaẽ. Erao abe mano ño nguia re no aẽ. ²¹ Pedro que ndua ñee Jesús je ra. ¡—Sã Sererecua! Higo i je que erecheẽ asi nae, mano ño equia cote reaẽ, i que ñee Jesús je ra. ²² Jesús que ñee ee ra. —Dios jẽicua tuchi. ²³ Tacheẽ nyecua jêje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios

icua tuchi rã nyii. “Dios ra secheẽ mumbayã” i tuchi mose uchiangui re, Dios ra echeẽ mumbayã. Sita ra siri ee. ²⁴ “A emondo seje”, jenyne mose Dios je, mondo ra jêje. “Dios ra emondo seje”, jenyne mose jeñiangui re, mondo ra jêje. ²⁵ Emo mbae icuã naa mose jêje, ãquĩ ñee chĩ mose jendese, jêtesarei chõ ãquĩ si. Jêtesarei chõ esi ñee nonde Dios je. ãquĩ mose ra jendu ibatenda abe jêicuã mbutiã no. ²⁶ Jêtesareiã mose emo icuã si, Dios abe ra jêicuã mbutiã eã mbei jêsi, i que Jesús ee ra.

¿Aba nembure? i mbia ñee Jesús je

²⁷ Nyebibere que echoi Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoi ñee ee ra. Embesasa rese. Amei ndese. ²⁸ —¿Mbaerã ereico mbia mbaaquiatsu quiatu Dios chuchúaa re? ¿Aba “ãquĩ esaã saã” i quia ndeje re? i que ãquĩ ererecua ñee ja Jesús je ra. ²⁹ Jesús que ñee ee ra. —Se rane tacheẽ jêje. Se rane preguntar tae jêje. Secheẽ jêsi bishorõ na nyii. Aquere quiatu ra jeñee asibishorõ cote. ³⁰ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. ³¹ Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndibishorõ nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jêingo eãte erui re no?” i quiarei ra nande je. ³² “Dios que embu eã nda”, nande aroneate ee no. Mbia ataque ra paama i tuchi nande je. Juan quia-tote quia mbia re, i que ererecua ñee ñee nyue ra. ³³ Ñee nyee que Jesús je cote ra. —Ureicuayãte. Aba chõ Juan mbu bautizar i sacua mbia je, i que ee ra. Nyebe Jesús ñee nguiã ee. —Se abe quiatu tacheẽ eã jêje no. Ae “ã esaã” i seje nae,

eriĩ nda acheẽ eã jêje no, i que Jesús ãquĩ ererecua je ra.

12

Uva raarõsa icuã icuã nguerecua je

¹ Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao no nda. Uco raarõ turã ja sacua. Ibicha que “sembae uvas jêsaarõ” i emo je cote ra. Al partido. Ae que oso isho itõte cote ra. ² Uva quiche mose que ngũimba mo mondo rei umbaerã ndea ra. ³ Uva raarõsa que erimba mbucuasẽ icuã ño nda. Iruã nua ño ngue ra. Eochi chõ ngue emondo mbuchebi ra. ⁴ Echa que ngũimba mo mondobe rei ereabe no nda. Aque abe que embucuasẽ icuã no nda. Sita que emombo mombo erese no nda. Eãquĩ nduqui tuchi que ra. ⁵ Ngũimba mo ngue emondobe aquere no nda. Aque quiatu que eiquia tuchi cot e ra. Eĩ eĩ mbei que eraarõsa quia echa rimba je ra. Emo emo ngue eiruã nua nda. Emo emo ngue eiquia no nda. ⁶ Aque mĩ tuchi que siquichõ echa rese cote ra. Eriirĩ tuchi chõ ngue aque re. Nyesecua tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra. ⁷ Eriirĩ ngasẽ mose que uva raarõsa ñee nyue ra. —iCo eriirĩ ndu quia co cote jê! iNandeiquia rei jê! i nda uvas nandembaerã ae tuchi cote, i que ñee nyue ra. ⁸ Eraarõsa que eriirĩ isi icuã cote ra. Curuchoi que iquia pe jiri ra. Mano ngue cote ra. ⁹ ¿Mañi nda echa quia eraarõsa je cote re? Echa ra eraarõsa icuã iquia ja cote. Uva i ra emondo ja emo je eraarõ sacua cote. ¹⁰ ¿Ã mbesa ji rese jemae ate re? Sã emo ndiqui tuchua ao sita je no.

Sita mo ngue equirirō mombo ra.
Eicuâte eriqui reĩ nguiã ee.

Aquere ndua si erese.

“Earonda sacuã, turambi chõ
eriqui re”, i ndua si
uchimombo rese.

Uchimombo que esirõ si cote ra.

¹¹ Dios chiao chõ ũquĩ nde.

Dios chiao turã tuchi riqui nande je
ã,

i ñi embesa ji re, i que Jesús ee ra.

¹²—Nanderĩ ño eriqui nguiã ñee,
i que ũquĩ ererecua ra. —Nandeisi
rei serao jê, i rei que nyue ra. Jesús
isi aronea tuchi que mbia résaa ra.
Eireĩte quiatu ngue mbia tubiriã si
re.

*¿Impuestos ra uremee ererecua je
re? i mbia ñee Jesús je*

¹³ Ũquĩ ererecua que fariseos mo
mondochoi ñee Jesús je ra. Herodes
chimbaaquiato abe mondochoi
erea. —Jesús nandembucheẽ icuã
na. I nda mbia paama i ee, i rei
que ra. ¹⁴ Uturã ngue esaã ñooño
Jesús je ra. —Jesús, co ereico
mbia mbaaquiato turâte co. Mbia
jaje ndeturâte riqui co. Co ereico
turâte mbia mbuchiabiã co. Mbia
erembaaquiato quiatu turâte quia
Dios icha riĩ co. Nyebe urechu
nguiã ñee ndeje a. ¿Coche mbia
mbae isiquia mee mee Romanos
nderecua je re? Impuestos.

¹⁵ ¿Uremee mee nda ee re? ¿Uremee
eã nda ee re no? i que ñee Jesús
je ra. Jesús que ũquĩ icuã icuate
ra. Nyebe ñee nguiã ee. —¿Mbaerã
jẽingo “ĩ nda Jesús ucheẽ nyabi”, i
serĩ nde? Mbae isiquia jẽteacuquia
imbu seje. Tamae erese, i que ee ra.

¹⁶ Mbia que eteacuquia ee ra. —
¿Aba mbae nombre ñi mbae isiquia
rese a re? ¿Aba ãquĩ aingue abe ñi
a re? i que Jesús ee ra. Romanos
nderecua, i que mbia ee ra. ¹⁷ Jesús
que ñee ee cote ra. —Romano s
nderecua mbaerã jemondo chõ ee,
Dios mbaerã jemondo chõ ee no, i

que Jesús ee ra. Mbia que nyuruira
jate u Jesús cheẽ andu ra.

Mbia raaque ra quera si, i Jesús

¹⁸ —Mbia raaque ra quera eã
mbei, i que mbiamo nguia ñee nda.
Saduceos i que ũquĩ mbia je ra.
Ũquĩ mo ngue nyoĩ ñee Jesús je
ra. Tã i sacuã ee. ¹⁹ —Sererecua,
ã ngue Moisés mbesa nande je
ra: “Emo ndiiriã mano mose, sã
enongue mano je ninisi rerequia
erendaque re. Sã tiirĩ ngõngue
raaque riĩ”, i que Moisés embesa
nande je ra. ²⁰ Eriqui mo ngue
siqui urerese ra. Seis que eribi
ra. Eriqui que ngüinisirã quereco
rei ra. Mano ño ngue tiirĩ ndocoĩ
ngüinisi recha ra. ²¹ Enongue que
nguiqui checha quereco rei cote
ra. Ae abe que mano ño tiirĩ ndocoĩ
no nda. Enongue que equereco
no nda. ²² Ũquĩ seis que ngõngue
checha quereco ja rei ra. Mano
ja chõ ngue erecha tiirĩ ndocoĩ
no nda. Eninisi eru checha que
mano nyee chõ cote no nda. ²³ Siete
rei que eru nyii ra. Mbia raaque
quera si ja mose, ¿abate ra equereco
cote re? i que saduceos ñee Jesús je
ra. —Ma Jesús ñee icuã, i chõ ngue
re.

²⁴ Jesús que ñee ee ra. —Jẽingo
Dios cheẽ icuayâte ã. Jẽingo Dios
cheẽ abi tuchi ã. Jẽingo Dios
quirãcuã icuayâte ã. ²⁵ Ae raaque
ra Dios mbuquera si nae, ũquĩ nda
ngüinisi quereco eã mbei huee cote.
Ũquĩ nda ngu quereco eã mbei huee
cote no. Angeles rã mbei ra mbia
riqui huee ibate cote. ²⁶ ¿Moisés
chimbese rese jemaẽ ate re? Mbia
raaque quera si riĩ ño ngue embesa
nguiã. Ira ruri sendi quia, aque
mose que Dios Moisés mbiirandu
ũquĩ ndese ra. “Abraham nderecua
chõ aico nguiã se co. Isaac ndere-
cua abe. Jacob nderecua abe no”,
i que Dios Moisés je aque mose ra.
²⁷ ã ngue mano ndei nyii ra. Ereco

siqui bei chõ nguiã namo ã. Mbia raaque rerecua eã ño Dios re. Mbia reco rerecua chõ ae re. ¿Ûquĩ jêicua eãte quia ã nde? i que Jesús ñee mbia je ra.

Echesequa tuchi quia Dios rese

²⁸ Embesasa mo ngue chĩ echeẽ andu ra. —Jesús ñee turã tuchichĩ saduceos je, i que uchiangui re ra. Nyebe esi nguiã ñee ee. —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que embesasa ñee Jesús je ra. ²⁹ Jesús que ñee ee ra. —Ã ño Dios cheẽ ndiita ã nde: “Secheẽ jeñandu rã, Israelitas. Dios mii tuchi chõ nandererecua re. ³⁰ Echesequa tuchi quia Dios rese. Ndechiã je. Neaĩ je. Nendua ndua abe je. Ndequirãcuã abe je”, i chõ Dios cheẽ ndiita nguiã. ³¹ ã abe rei Ûquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”, i. Ûquĩ nyeremo ndei Dios cheẽ i tuchi Ûquĩ, i que Jesús ee ra. ³² Embesasa que ñee Jesús je cote ra. —Ae bei, Sererecua. Dios mii tuchi chõ nandererecua re. Emo abe mo eãte. ³³ Nandechesequa tuchi mose Dios rese, Ûquĩ eturãte ee. Nandechesequa tuchi mose nandechiã je. Nandendua ndua je. Nandeaĩ je. Nandequirãcuã je abe no. Nandechesequa tuchi mose mbia rese, Ûquĩ eturãte Dios je mbae mo si. Sacrificio mo si. Ofrenda mo si, i que embesasa ñee Jesús je ra. ³⁴ —Ñee aquiatute equia seje co, i que Jesús uchiangui re ra. —Dio s rimbarã tuchi chee ra nde, i que ee cote ra.

¿Aba rucucha Cristo re?

³⁵ Jesús que mbia mbaaquiatu quiatu quia Dios chuchúaa ra. —¿Mbaerã embesasa riqui ñee nde? “David rucucha chõ Cristo re” i re. ³⁶ David abe que “sererecua” i Jesús je ra. Sã embesa ji ñee no: Dios que ñee Cristo sererecua je ra:

“Ecoi sejii. Nde abe ra ererecua serese.

Ae ndeucuayãte quia nae, Ûquĩ je ra ndequirãcuã ateacuquia tuchi.

Ndequirãcuã tuchi chee ra Ûquĩ si”, i que Dios ñee sererecua je ra, i que Espíritu Turã David mbucheẽ nda. ³⁷ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús embesasa je ra. Mbia tubiriã ngue Jesús cheẽ chandu turã jate ra.

Jesús ñee asi embesasa je

³⁸ Jesús que uchimbaaquiatu mbaaquiatu quiatu ra. — Embesasa rã nda jẽingochĩ jẽ. Ûquĩ ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã. ³⁹ Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe beite equia ã no. ⁴⁰ Ari eru cheecha mbae abe embutiã tiãte quia ã no. Ucheẽ oco abe esaã saã mbeite quia Dios je ã no. “I nda mbia mae nanderese”, i chõ nguiã. Ûquĩ nda Dios mbasi tuchi cote, i que Jesús mbia je ra.

Eru cheecha mbaecha reã mo mbae mee Dios je

⁴¹ Emo mose que Jesús ñi Dios chuchúaa ra. Ofrenda riru nonde que eñi ngoi ra. Mae ngue mii mbia mbae isiquia mondo mondo mose eriru ye rese ra. Mbaecha atate que mbae isiquia tubiriã mondo mondo quia eriru ye ra. ⁴² Eru cheecha mo ngue ngasẽ u cote ra. Nyeremoño tuchi que ae mbae isiquia mondo ra. Centavo mii mbuchechea tuchi que ra. ⁴³ Jesús que ñee uchimbaaquiatu je ra. —Jenyu. Tacheẽ nyecua jêje. Eru cheecha mbaecha reã ngue mbae isiquia mondo tuchi mbia ataque si ra. ⁴⁴ Mbaecha quiatu que umbae rire ñetẽ mondo mondo ra.

Eru cheecha quiatu que umbae mii mondo ja ra, i que Jesús ra.

13

Mbia ra Dios chuchua mbucoi ja, i Jesús

¹ Jesús que oso usê Dios chuchua si cote ra. Echimbaaquiatu mo ngue ñee ee ra. —Sã Dios chuchua turã tuchite jê. Eao ji turã tuchi sita je, i que echimbaaquiatu mo ñee ee ra. ² Jesús que ñee ee ra. —Ã ndese jêingo mae ã nae, ûquĩ nda mbia mbucoi ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibate mo nda. Monte de los Olivos, i que hue je ra. Dios chuchua checuate que ee hue si ra. Echimbaaquiatu que ngasê ñee ee ra. Pedro. Jacobo. Juan. Andrés. Ûquĩ ja que ñee eĩsaa ra. ⁴ —¿Manosete ra ûquĩ nde? ¿Mañi ure ra equia jirandu mbae ua nonde re? i que ñee Jesús je ra. ⁵ Jesús que ñee ee ra. —Jêtesa jiri quia jê. Mbia mo nda jembĩrĩ irĩchĩ ñee jêje jê. ⁶ “Cristo chõ se re” i ra mbia ñee ata atate jêje. Ûquĩ nda jeñanduchĩ jê. Ûquĩ nda mbia mbĩrĩ irĩ jate. Ñee ñooño je chõ ûquĩ nde. ⁷ Mbia ra guerras saã saã tuchi. Mbia ra ñee ñee tuchi quia nyĩquia iquia je rĩĩ. Ûquĩ mose ra jêsiquichechĩ jê. Ûquĩ ja rane nda nyecua raque. Aque mose r a mbae ja ua eã ná. ⁸ Mbia ra guerras saã tuchi chee. Nyĩquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. Jembasi ramo mose chõ nda ûquĩ nde. Aquere ra jembasi tuchi cote.

⁹ iSã jê! Mbia icuã icuãte ra jêje. Jembĩrĩ irĩ ndae. Jemee mee icuã nda mbia rerecua je.

Jêiruã nua nda mbia chumunuásaa. Nguerecua je ra mbia jenderao rao tuchi. Ererecua abe je chee ra secheê jêsenei senei. ¹⁰ Sequiato ra Dios cheê turã senei senei ná mbia ja je nyii. Mangue chooñoa jenda ja je. Aquere ra mbae ua ja cote. ¹¹ Jemee mose mbia rerecua je, pare pare jenyechĩ nda jê. “¿Manyae ra ûquĩ ñee ndibishorõ nde?” jenyechĩ nda pare pare i jê. Espiritu Turã ae chõ nda jembucheê turã nguiã mbia je aque mose. Jê ae ra jeñee eã. Espiritu Turã ae chõ nda jembucheê nguiã. ¹² Jenongue ra jemondo chee mbia icuã je. Jêiquia sacuã. Jendu abe ra jemondo chee mbia icuã je. Jendi-irĩ abe ra jemondo chee mbia icuã je. Mbia icuã nda jemo iquia iquia chee. ¹³ Mbia mangue chooñoa jenda ra jêucuayã tuchi seriĩ. Ae ra siqui bei serese, ûquĩ nda Dios mingó bei.

¹⁴ Daniel que embesa Mbae Mbutiãsa Icuã nii nda. Mbae Mbutiãsa Icuã nda siqui nguecuáyãã. “Dios rendaque re taico se quiatu”, i ra equia huee. (Ae ra mae nguia sechimbese rese nae, sã ûquĩ eicua.) Jemae mose Mbae Mbutiãsa Icuã ndese, jeña esi. Ae siqui quia Judéaa, sã ûquĩ uchã jei choi ibi ibátee mo. ¹⁵ Ae ra siqui tuchia quite rese, sã ûquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁶ Ae ra siqui úcoo, sã ûquĩ nyebiã ngaê huĩrao rea. Sã hue si bei chõ echoi uchã. ¹⁷ Aba mbia eã tuchi ra emo âquẽ ndiru rerequia mose aque mose. Nguiĩrĩ mbuquiambu je abe no. ¹⁸ “Nyiiiseĩ mose eã urechã” jenyee Dios je. ¹⁹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacuã ño ûquĩ nde. ²⁰ Ae rasi ra mbia saã tuchi nae, ûquĩ nda

Dios mbujua jiri uquiato riĩ. ¹ I nda emo ñimbirācuā eā tuchi rei ũquĩ ndasi je. ²¹ “A Cristo riqui a jē” i mose emo jēje, “nyia” jenyechĩ nda ũquĩ ñee mose jē. “Hue Cristo riqui hue jē” i mose emo jēje, “nyia” jenyechĩ nda eno jē. ²² “Cristo chō se re” ichōĩño nda mbia ñee ata atate jēje. “Dios cheẽ mbuchecuasa chō se re” ichōĩño nda mbia ñee ata atate jēje no. Mbua mae sayā nda esaā saā tuchi mbia mbiĩrĩ irĩ sacuā. Ũquĩ Dios quiato abe chee mbiĩrĩ irĩ arōte. ²³ Ũquĩ nonde chō aico nguiā jembirandu randu co.

Dios riirĩ nda tube ibate si

²⁴ Mbua ũquĩ ndasi raā ja mose ra tenda checuayā mbei cote. Nyasi abe no. ²⁵ Nyasitata ra ngoi ngoi. Ibei jenda abe ra quiata quiata chee cote no. ²⁶ Aque mose ra achu ibei rese. Seninĩnya tuchi ra sechu mose. Sequirācuā tuchi ra sechu mose no. ²⁷ Angeles serimba ra amondo mbia sechiisirō munua nua sacuā. Ishonda ja. Mangu chooñoa jenda ja. Mbua sechiisirō nda emunua nua ja seje cote.

²⁸ Sā higuera riqui no. Sā ira mo ndiqui no. Ero quira usē ja mose, “iraro itō ndacu ra cote”, i chō mbia nguiā aque mose. ²⁹ Eĩ sí ra mbae ua ja nonde. Ae riĩ aico ñee jēje nae, ũquĩ ndese jemaē mose, “mbae ra ua ja cote” jenyē ra cote. ³⁰ Tacheẽ nyecua jēje. Ā mbia riqui ngata ibi ā nae, ũquĩ emo emo nda manoa mbae ua ja nonde. ³¹ Ibei ra ua. Ibi abe ra ua no. Secheẽ nguiā ra ua eā mbei.

³² Manosete chō nda mbae ua ja. Aico eicuayāte co. Mbua mo abe eicuayāte quia ā no. Angeles abe eicuayāte quia ā no. Paba mii ño eicua nguiā co. ³³ Nyebe jēingo quiatu quia eraarō arō mbei. Jētesa tesa bei quia. Ma nyaashĩ ño nda equeru. Jēicuayāte equia ā. ³⁴ Sā ererecua mo oso isho itōte no. Sā

ñee ngũimba je oso nonde no. — Sembae jēsaarō ja. Ā ndese jēingo. Co rese eico nde. Qui rese eico nde no, i que ñee ngũimba mii mii je ra. — Etesa tesa bei quia, i que eiquesa raarōsa je ra. ³⁵ Manosete chō nda tuchuacha ru. Jēicuayāte equia ā. Itondaru ramo mose eru arondete. Itondii mose eru arondete. Ngaira cheẽ mose eru arondete no. Ere-saitō ndabe mose eru arondete no. Nyebe jētesa tesa bei quiatu quia. ³⁶ Jengue mose ra eruchĩ jembuate jē. ³⁷ “Jētesa tesa bei quia” ae chō nguiā mbia ja je co. Jē mii je eā, i que Jesús ra.

14

Jesús nandeisi tarō, i ja ererecua nyue

¹ Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacuā. ¿Mañi nande ra embiĩrĩ irĩ nde? i que equia ñee ñee nyue ra. Achite que fiesta de la pascua ñi tu ee cote ra. Dos días. ²— Fiesta mose eā nandeisi jē. Mbua ra paama ichĩ nande je jē, i que u ñee ñee nyue ra.

Cuñā mo aba mbusimbusa turā ichusē Jesús āquĩ ndese

³ Jesús que siqui Simón Leproso chuchúaa ra. Betania, i que hue je ra. Cuñā mo ngue tu erea huee ra. Aba mbusimbusa mo ngue equeru ee ra. Sita ao ji ye que ereru ra. Embisē tuchi que equeru ra. Mbae isiquia mumbasa tuchi que ũquĩ nda. Eriru churui que esiquio eichusē nonde Jesús āquĩ ndese equiaru mose ra. ⁴ Mbua que chĩ ja mae erese ra. Paama i que cuñā je ra. —¿Mbaerā eichusē ñooño nde? ⁵ Mbae isiquia ribishorō ño nda aba emondo re. Mbaecha reā je emee mee sacuā, i que ñee icuā icuā cuñā je ra. ⁶ Jesús que ñee cote ra. —¿Mbaerā jēingo ñee ũquĩ nde? Sā cuñā ae riqui ae. Ae esaā seje nae,

eturâte seje ũquĩ. ⁷ Mbaecha reã nguia ra chi arete íbii a. Jẽ mbae raãse mose ee, mbae jẽsaã turã mbei ee ae. Se quia nda aico bei eã nguia jendese aa. ⁸ Seati nonde chõ ngue cuña aba mbusimbusa ichusẽ ja nguia serese. ⁹ Tacheẽ nyecua jẽje. Mbia Dios cheẽ turã nenei nenei mose mbia ja je, cuña nyisaã abe ra esenei senei mangue chooñoa jenda ja je. Mbia ndua turã ja sacua echisaã abe rese, i que Jesús ñee mbia je ra.

Jesús tamee jẽje, i Judas mbia icuã je

¹⁰ Judas Iscariote, i rei que Jesús chimbbaaquiato mo je ra. Aque que oso ñee sacerdote rerecua je ra. Jesús mee nonde ee. ¹¹ Sacerdote rerecua ia ja que ũquĩ andu ra. —Mbae isiquia uremee tuchi ndeje jẽ, i que ee ra. Nyebe Judas riqui nguia ndua ndua. —Mbia eãsa quiatu Jesús tamee ee, i.

Jesús quiaru uchimbbaaquiato rese

¹² Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbbaaquiato ñee Jesús je ra. ¹³ Ñee ngue uchimbbaaquiato nyeremo je ra. —Jẽso sucha cuasu. Huee ra jemaee emo i rerao rese. I ra equerao quia irasa mo ye. Aque rui jẽso. ¹⁴ Ei que mose, aque tuchuacha je jeñee. “Jesús que urembu ñee sacua ndeje ra. ‘¿Ma cuarto ra urecu quiaru oveja u que re? Sechimbbaaquiato rese’, i que Jesús ñee ndeje ra”, jenyetuchuacha je. ¹⁵ Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹⁶ Nyebe

echimbbaaquiato nyoĩ nguia sucha cuasu. Jesús cheẽ ndui si tuchi que mbae chi ja ee huee ra. Huee que oveja mbuchi huee cote ra.

¹⁷ Itondaru ramo mose que Jesús ru uchimbbaa quiatu ataque rese ra. ¹⁸ Quiaru mose que Jesús ñee ee cote ra. —Tacheẽ nyecua jẽje. A jẽingo quiaru serese a nae, jemo nda semondo mbia icuã je, i que ñee uchimbbaaquiato je ra. ¹⁹ Echimbbaaquiato ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²⁰ Jesús que ñee ee ra. —Doce jẽingo quiaru serese a nae, jemo ño ñene. Ae chi quiaru serese aque plato ye sí a nae, aque chõ ñene. ²¹ Dios cheẽ ndui si tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra.

²² Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jẽu. Serete chõ ã nde, i que Jesús ñee ee ra. ²³ Vino mbeisa que esirõ cote no nda. Gracias i que Dios je ra. Mondo que uchimbbaaquiato oo cote ra. Mbei mbei ja que cote ra. ²⁴ Jesús que ñee ee ra. —Seruqui chõ ã nde. Mbia icuã mbutiã sacua ño seruqui re. Dios cheẽ yasu rui si chõ seruqui riqui nguia mbia icuã mbutiã ã. ²⁵ Tacheẽ nyecua jẽje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia cote, i que Jesús ñee nda.

Jesús aicuayâte resẽ, ichõĩño nda Pedro serĩ, i Jesús

²⁶ Frasei rasei que cote ra. Nyoĩ que ibi ibate mo cote ra. Monte de los Olivos, i que hue ibi je ra. ²⁷ Jesús que ñee uchimbbaaquiato je huee ra. —Jẽireĩte ra eriqui

seriĩ. Jeñimboseĩ mboseĩ nda oso serecha. Sã embesa ji riqui ñee no: “Mbĩa ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no. ²⁸ Seraaque quera sire ra aso se rane jendaarõ Galilea, i que Jesús ee ra. ²⁹ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireĩã mbei ndesi, i rei que Pedro ñee ee ra. ³⁰ Jesús que ñee ee ra. —Tacheẽ nyecua ndeje. Nguira cheẽ nyeremo nonde ra erecheẽ ñooño tres veces seriĩ namo, Pedro. “Jesús aicuayãte resẽ”, ere chooño ño nda seriĩ, i que Jesús ñee ee ra. ³¹ Pedro que ñee ee ra. —Mbĩa ra sei quia arõte raque nderĩĩ, acheẽ ñooño eã nda se nderĩĩ, i rei que Pedro ra. Eĩ ja que ñee nda.

Jesús ñee ngu je

³² Jesús que oso Getsemaní cote ra. Uchi mbaaquiātu rese. —Jengoi rã u aa. Tacheẽ na oso Paba je pe jiri se, i que Jesús ee ra. ³³ Pe quiti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra. ³⁴ Ñee ngue ũquĩ je ra. —Seya eã ndasi tuchi aico co. Seya eã ndasi ra sei quia chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁵ Jesús que oso pe quiti jiri cote ra. Nyibi que u ngoi ngũĩã ndese ñee Dios je ra. —Mbae rasi asaã sereãte, i rei que ñee Dios je ra. ³⁶ —Paba, mbae eresaã ja arõte nde. Ũquĩ ndasi asaã sereãte raque quia co. Ae sebi riqui nae, ũquĩ ndese semingo eã. Ae ndebite riqui nae, ũquĩ ndese quiātu semingo, i que Jesús ñee Dios je ra. ³⁷ Nyebi que u uchimbbaaquiātu je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je. ³⁸ Jẽtesa tesa u. Jengue eã u ñee Dios je. Mbae icuã tã i eã sacuã jẽje. Jẽingo serete

raque serese. Mbae icuã nguia tu jembuti mbutite nguĩã, i que Jesús ee ra. ³⁹ Nyebi si que oso ñee Dios je ra. Hue rĩ si que ñee ee ra. ⁴⁰ Nyebi que u uchimbbaaquiātu je cote ra. I si que u uque ee no nda. Eresa quiātu ngue eshiu shiute nguĩã. —¿Mañi nda aba ñee nde? i ja tuchi que echimbbaaquiātu ra. ⁴¹ Osobe que ñee Dios je pe jiri cote ra. Tres veces que aque cote ra. Uba rei que u ñee uchimbbaaquiātu je ra. —Jengue tuchi cote. Jenguenea jẽucua cote. Semondo ra mbĩa icuã je cote. Sei quia sacuã. ⁴² Jẽhuã cote. Nyao cote. Ae ra semee mbĩa icuã je, co eru quia semee sacuã co cote, i que Jesús uchimbbaaquiātu je ra.

Mbĩa icuã Jesús isi suruchoi

⁴³ Jesús cheẽ mosebe tuchi que Judas ru erea ra. Jesús chimbbaaquiātu rei que ae ra. Aque rese que mbĩa cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ũquĩ mbucuaẽ nguia reaẽ. Embesasa abe. Amei abe. ⁴⁴ Judas ñee nyecua yã nguia tu quia ũquĩ je nyii reaẽ. —Ae ritii ra asiite nae, aque chõ ñene. Aque jẽisi quiātu tuchi serao, i quia equia ee nyii reaẽ. ⁴⁵ Jesús riichã ngue esi saludar i ee cote ra. Jesús ritii que esiite ee cote ra. ⁴⁶ Mbĩa que Jesús isi cuaẽ ecua cote ra. ⁴⁷ Ũquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁴⁸ Jesús que ñee mbĩa ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. ⁴⁹ Tenda que amumba mumba beite rei quia jendese Dios chuchua resẽ. Mbĩa que ambaaquiātu quiātu bei rei quia huee resẽ. ¿Mbaerã seisiã nyucua aque mose re? Embesa ji

ique sacua ño jêicuã icuã ndiqui nguiã seje ã, i que Jesús ñee ee ra. ⁵⁰Echimbaaquiātu que nyoija chee uchã Jesús recha ra. ⁵¹Acuanindu mii mo ngue oso erui ra. Tiru mii ngue equereco nyiati ra. Mbia que acuanindu abe isi rei ra. ⁵²Huĩrao que esecha oso uchã nda. Eirao eã tuchi que oso uchã nda.

Jesús mbia curuchoi mbia rerecua je

⁵³Mbia que Jesús curuchoi sacerdote rerecua je cote ra. Huee que sacerdote rerecua ja chi ñumunua nda. Embesaa abe. Amei ererecua ja abe no. ⁵⁴Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que huĩ huee ra. ⁵⁵Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u ñee ñee nyue ra. ⁵⁶Emo emo ngue ñee icuã icuã ndei Jesús riĩ nda. Ucheẽ ngue etasa tasa tuchi chõ nda. ⁵⁷Mbia mo abe que juã ñee ñooño eriĩ nda. ⁵⁸—Jesús cheẽ ngue urechandu ra. Ñee icuãte que Dios chuchua riĩ nda. “Dios chuchua tambocoi mbia chiao. Tres días mose ra Dios chuchuarã asaã no. Mbia chiao eã nda ñquĩ cote”, i que urechandu Jesús cheẽ nda, i que ñquĩ ñee ñooño Jesús riĩ nda. ⁵⁹Ucheẽ ngue etasa tasa bei chõ nda. ⁶⁰Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderiĩ nde? i que ñee Jesús je ra. ⁶¹Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? i que ñee Jesús je ra. ⁶²Jesús que ñee ee ra. —Ae. Dios rucucha chõ se re. Jemae nda serese s e coi mose Dios quirãcuã

jii. Sechu mose abe ibeishĩ ndese, i que Jesús ee ra. ⁶³⁻⁶⁴Sacerdote rerecua que paama i tuchi Jesús cheẽ mose ra. Huĩrao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembirandube eã cote. Nandemae ndei ngue erese re. ¿I jêje re? ¿Mañi nande ra equia re? i que sacerdote rerecua ñee mbia rerecua ataque je ra. —Eicuã tuchi que ra jẽ. Sã mbia eiquia, i jate que ererecua ñee Jesús riĩ nda. ⁶⁵Mbia que ñinimbu nimbu Jesús ruba rese cote ra. Eresa que echati mbae mo je ra. Ucuu ucuu tuchi que erese cote ra. —¿Aba ucuu ucuu u nderese a re? Eicuã no, i que equia eresa ati ji je ra. Soldados abe que ucuu ucuu tuchi eresa rese ra.

Jesús aicuayãte resẽ, ichõĩño Pedro

⁶⁶Pedro que chĩmbeite ngoi itaicuee ra. Nyucuaaque mo ngue tu huee sacerdote rerecua rimba ra. ⁶⁷Pedro que chi nyee tata jii ee huee ra. —Jesús resenda que nde abe ra, i que nyucuaaque ñee mae mose Pedro rese ra. ⁶⁸—Tei. Ndecheẽ aicuayãte, ichõĩño ngue Pedro ñee ee ra. Hue si que esi eiquesa quiti cote ra. Usẽ mose que nguira ñee cote ra. ⁶⁹Nyucuaaque que maembe erese ra. —Co abe que Jesús resenda ra, i que mbia ataque je ra. ⁷⁰—Tei. Aicuayãte se, ichõĩño ngue Pedro ee no nda. Ae chi huee nae, ñquĩ mo ngue ñee ee cote ra. —Jesús resenda chõ nde abe resẽ. Galilea jenda chõ nde resẽ, i que ñee Pedro je ra. ⁷¹Pedro que jurar i tuchi ñee ee ra. —Aicuayã tuchite se resẽ, i que ñee ñooño si no nda. ⁷²Aque mose tuchi que nguira ñee si cote ra. Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nyeremo nonde ra erecheẽ ñooño tres veces seriĩ, sã Jesús i ee nyii no.

Ũquĩ ndese que Pedro ndua cote ra. Nyebe nyeseo tuchi nguiã cote.

15

Mbia Jesús curuchoi Pilato je

¹ Nyaashĩ namo mose que sacerdote rerecua ñumunua ja ra. Amei ererecua abe no. Embesasa abe no. Mbia rerecua jate que ñumunua nda. Jesús que echucua suruchoi Pilato je ra. Pilato rei mbia rerecua hue jenda ja. ² —¿Judíos rerecua chõ nde re? i que Pilato ñee ee ra. —Ae. Judios rerecua chõ se re, i que Jesús ee ra. ³ Sacerdote rerecua que ñee ñooño tuchi Jesús riĩ nda. Ñee icuã tuchi que eriĩ nda. ⁴ —Sã ñee icuã icuãte nderiĩ jẽ. ¿Echeẽ nda eresibishorõ eã nde? i que Pilato ñee Jesús je ra. ⁵ Jesús que ñee âte echeẽ mose ra. Nyebe Pilato nyuruira tuchi nguiã echeẽ eã mose.

Jesús jẽiquia mbucha ira rese, i ererecua

⁶ Pilato que mbia tarõ ji mo mbusẽ mbei quia pascua mose ra. Co mĩ ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ⁷ Barrabás, i que etarõ ji mo je ra. Emo abe que chi huee erese ra. Mbia iquiasa que ũquĩ nda. ⁸ Mbia que ñee ngaẽ Pilato je ra. —Mbia mĩ tarõ ji que erembusẽ mbeite quia, einyere si emo mbusẽ namo, i ja que mbia ñee Pilato je ra. ⁹ —¿Judío rerecua ra ambusẽ mondo jẽje Jesús re? i rei que Pilato ra. ¹⁰ —Sacerdote rerecua riqui paama i chooñote Jesús je ã, i quiatu que Pilato ndua ndua uchianguĩ re ra. ¹¹ —Sã Pilato Barrabás mbusẽ mondo Jesús rendaque re, i tuchi que sacerdotes ñee ja mbia je ra. Nyebe que mbia “Barrabás embusẽ mondo” i chee Pilato je ra. ¹² —¿Mañi ae quia ra Jesucristo je re no? i que Pilato

ñee ee ra. ¹³ —Embucha ira rese, i ja que mbia ñee ee ra. ¹⁴ —¿Mbae icuã esaã nde? i que Pilato ñee ee ra. —¿Embucha ira rese jẽ! i bei bei que mbia ra. ¹⁵ —Mbia turã jiri nda seje chã, i chee que Pilato ra. Nyebe Barrabás mbusẽ mondo nguiã. Jesús quiatu que eiruã nua cote ra. —Jembucha iquia ira rese, i que mbia je cote ra.

¹⁶ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama no nda. ¹⁷ Tiru ireĩ ngue emingue ee cote ra. —Ererecua chõ nde re, ichõĩño iquia iquia ee. Nyu ritimei uma ji que emĩ eãquĩ ndese corona nda. ¹⁸ —Judío rerecua tuchi chõ nde re, ichõĩño ngue iquia iquia ee ra. ¹⁹ Ira que euru uru eãquĩ ndese ra. Ñinimbu nimbu abe que erese no nda. Ngoi ngoi que nguiã ndese erimba raã naa ee ra. ²⁰ I quia iquia tuchi que eu ee ra. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

²¹ I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aque que soldados isi ira mbuchicuandasa ji rerao sacua ee ra. Cruz, i equia ee. Nguerao que cote ra. ²² Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ²³ Huee que vino mondo rei Jesús je ra. Mirra je emumbarai. Mbei eã ngue ra. ²⁴ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. ²⁵ Tenda chui ite ramo mose que embucha ira rese ra. ²⁶ Mbia que letrero mĩ Jesús ãquĩ nguĩti ibate ra. JESUS REI JUDÍO RERECUA i que embesa mĩ nda. Ũquĩ nĩ ño eriqui nguiã

eiquia hue. ²⁷ Mbia nyeremo abe que embucha ira rese Jesús chabe ra. Jesús rereco chobei que emi ira rese ra. Mbae mbuquichâsa tuchi que ũquĩ nda. ²⁸ Embesa ji cheẽ nguire que Jesús iquia mbia icuã ndese cote ra. Sã embesa ji riqui ñee no: “Mbia icuã ndese ra eiquia, sã embesa ji i ñee nyii no. ²⁹ Mbia que iquia iquia quia Jesús cheẽ naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equia. ³⁰ Equiche u nde ae hue si no, i tuchi que mbia quia iquia iquia ee ecuã mose ra. ³¹ Sacerdote rerecua abe que iquia iquia chõ nguia ee ra. Embesasa abe no. Ũquĩ ngue ñee icuã icuã ja quia eriĩ nda. —Mbia que embuquera quera rei nyii ra. Ae sí quera aroneate nguiã aque. ³² Judío rerecua mose ae, sã ae ae nguichi ira si. Cristo mose ae, sã ae ae nguichi no. † nda uremae erese. † nda ureicua cote, i ja que ererecua ñee icuã icuã eriĩ nda.

Jesús mano mose cote

³³ Tenda nandeite re mose que itondaru tu ra. Itondaru bei que mbia ja je tres horas ra. ³⁴ Tenda cheseco mose que Jesús ñeemombo cote ra. —Eloi, Eloi, ¿lama sabactani? i que ñee mombo ra. —Dios sererecua, ¿mbaerã ereico hui sesi re? i chõ ngue ñee nguia. ³⁵ —Elías je eriqui “quiatuchu” i reae, i rei que echeẽ andusa mo nda. ³⁶ Emo ngue esponja monde vinagre ye ra. Ira ai rese que embia ji mondo rei Jesús chúruu cote ra. —Esecha rei. Sã Elías ruât e quia erea, i que emo ñee ee ra. ³⁷ Jesús que tasẽ mano mbei cote ra. ³⁸ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. ³⁹ Soldado rerecua que chí Jesús nonde mae erese ra. Emano ndese que eñi mae nda. —Dios riirĩ ño eriqui re, i que cote ra.

⁴⁰ Cuña ngue chi jate ma e Jesús rese isho ra. María Magdalena abe que chí huee ra. Salomé abe no. María abe no. María rei José si. Jacobo Ñetẽ si abe no. ⁴¹ Ũquĩ ngu e siqui bei quia Jesús rui ra. Echiurã ngue emiĩ mĩ mbei quia ee ra. Galiléaa eico mose bei. Cuña tubiriâte abe que chí mae Jesús mbuchai rese huee ra. Ae nyoĩ Jesús rese Jerusalén, ũquĩ.

Mbia Jesús raaque chati cote

⁴² Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacua nda. ⁴³ Aque eresaitõ mose que José si ñee Pilato je ra. Judío turã ngue ae ra. Arimatea jenda que ae ra. Judío rerecua que ae no nda. —Dios ra ererecua, i beite que equia eraarõ arõ nda. Aque que ireĩ ireĩ âte oso ñee Pilato je ra. —Jesús raaque emee na seje, i que oso ñee ee ra. ⁴⁴ —¿Mano jei tuchi ere? i tuchi que Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra. ⁴⁵ —Mano ngue cote ra, i que soldado rerecua ñee ee ra. Nyebe Pilato eraaque mondonguiã José je cote. ⁴⁶ José que Jesús raaque mbuquichi cote ra. Tirushĩ turã mo ngue eisi ra. Eraaque que echuma aque je cote ra. Iti que echoi sita ribicoi ji imi ye ra. Nyati que sita cuasu mo je cote ra. ⁴⁷ María Magdalena ngu e mae mi eati rese ra. María rese. José si que ae ra.

16

Jesús raaque quera si

¹ Jesús raaque ati ji que chibe sábado mose ra. † nyaashĩ oso quia domingo mose, aque mose que cuña mo nyoĩ mae eatisa rese ra. María Magdalena. Salomé abe no. María abe no. Jacobo si rei ae. Ũquĩ ja que aba mbushimbusa isi rei eichusẽ chusẽ sacua Jesús

raaque rese ra. ² Tenda nyui ramo mose que echoi eatísaa ra. ³ —¿Aba ra sita curuba nande je eatiquia re? i rei que echoi quia ñee ñee nyue ra. ⁴ I que sita rurubai u ee cote ra. Sita cuasute quiatu ngue re. ⁵ Ique rei que echoi sita imi ye ra. Acuanindu mo ngue chí ngoi huee equiatocuti quiti ra. Huiraoshĩ oco tuchi que ecunui huee ra. Cuña ngue siquiche tuchi ra. ⁶ Acuanindu que ñee ee ra. —¿Mbaerã jẽingo siquiche re? Jesús raaque jẽsequia raque quia ã. Emoate a resẽ. Eraaque que quera si no. Jemaee eatisa rese ae. ⁷ Jẽso asi rã echimbaaquiato mbiirandu erese. Pedro abe jembiirandu. “Jenonde ra esi Galilea. Jemaee nda erese huee. Sã ñee jẽje nyii no”, jenyee embiirandu, i que acuanindu ee ra. ⁸ Cuña ngue siquichete echeẽ andu ra. Uchã ngue echoi eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹ Jesús que quera si nyaashĩ namo mose domingo mose ra. María Magdalena nane je que nyecua ra. Aque si chõ eriqui siete aba checuayã icuã jea nyii reaẽ. ¹⁰ Ae que oso Jesús quiato mbiirandu ja cote ra. Ngasẽ mose ee que echi nyeseo jate eya eã ee ra. ¹¹ —Jesús que quera si ra. Amae ngue erese ra, i rei que embiirandu ra. Quera aroneate que ñquĩ je ra.

Jesús nyecua uquiato nyeremo je

¹² Aquere que nyecua uquiato nyeremo je ra. Ishote que sucha tubiriã si ra. Emo na tuchi que ee ra. ¹³ —Jesús que quera si nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiato mondo mbia mbiirandu

¹⁴ Aquere que Jesús nyecua uchimbaaquiato ja je no nda. Once je. Ñquĩ quiaru mose que nyecua ee ra. Ñee asi asi que ee ra. —¿Mbaerã jeñia átãte riqui re? ¿Mbaerã “nyia” jenyee eã jembiirandu mose sequera rese re? i que ñee ee ra. ¹⁵ —Jẽso secheẽ nenei nenei mbia ja je. Mbiamangue chooñoa jenda ja je. ¹⁶ Mbiamo nda seicua icua. Ñquĩ je bautizar jenyee. Ñquĩ nda siqui bei cote. Ae ra seicuayã, ñquĩ nda mbae rasi saã mbei. ¹⁷ Seicuasa ra mbia mae sayã saã saã tuchi. Aba checuayã icuã nda ejea jea mbia si serĩ. Mbiamcheemo nda esaã. ¹⁸ Mbeira eisi isi o je. Aba iquiasa mbei mose ra erasiã. O ra echono ñono erasi arõ embucherõ sacuã, i que Jesús uchimbaaquiato mondo ra.

Jesús nyui oso ibate

¹⁹ Jesús ñee ja mose que Dios equerao ibate cote ra. Siqui bei sacuã Dios jii cote. ²⁰ Echimbaaquiato que nyoĩ Dios cheẽ nenei nenei mbia ja je ra. Mangue chooñoa jenda ja je. Dios que siqui tuchi quia erese ra. Mbiamae sayã tuchi que esaã saã nguia ra. MbiamDios cheẽ icua sacuã. Amén.

EL SANTO EVANGELIO SEGÚN SAN LUCAS

Lucas ucheẽ mbesa Teófilo je

¹ Jesucristo que mbae saã saã tuchi quia huico mose ibii ra. Mbia atate que echisaã mbesa mbesa rei ra. ² Mae ndei equia erese nyii. Dios cheẽ esenei senei mbei rei quia nyii. Jesucristo chisaã ndese que urembiirandu cote ra. ³ Se abe que airandu tuchi cote ra. Ae esaã saã nguia nyii nae, aque mosenda bei rese que airandu cote ra. Se abe ũquĩ tambesa ja ndeje, Teófilo. Tasenei turã ja embuchiabiã ndeje. ⁴ Ae rese ereirandu randu nae, ũquĩ ereicua tuchi sacua ño aico nguĩa embesa mbesa ndeje. Eĩ nda “ae bei” ere chõ nguia Jesucristo chisaã saã je.

“Juan el Bautista ra nyecua u mbia je”, i que ángel mo nda

⁵ Zacarías, i que emo je ra. Sacerdote que ae ra. Herodes que siqui Judea mbia rerecuarã aque mose ra. Abías resenda rei Zacarías. Aarón ndiirĩ nducucha rei Zacarías. Eninisi abe rei Aarón ndiirĩ nducucha no. Elisabet, i que eninisi je ra. ⁶ Zacarías turãte que eriqui Dios je ra. Ngũinisi rese. Ũquĩ ngue Dios cheẽ mumbayã mbei quia ra. Eicuãte, i aroneãte que mbia mo nguia erĩ nda. ⁷ Eriirĩ mbei que eriqui ra. Tiirĩ je rei Elisabet. Ari chee. Zacarías abe que ameite chee ra.

⁸⁻⁹ Sacerdotes que nyuuru uru beite quia querabe mbae raã naa Dios chuchúaa ra. Nyebe que Zacarías abe riqui mbae raã naa Dios chuchúaa emo mose ra. Zacarías que oso ique tuchi Dios chuchua ra. Mbae mo ndei sacua embushimbu. ¹⁰ Zacarías que mbae shimbu sei cote ra. Mbia cuabẽ ngue chi ja taicuee ñee ñee

Dios je ra. ¹¹ Angel ibatenda mo ngue tu nyecua Zacarías je cote ra. Chĩ ngue juã mbae shimbu reisa ji ee ra. ¹² Zacarías mae mose ángel rese, siquiche tuchi que ra. ¹³ Angel que ñee Zacarías je cote ra. —¿Mbaerã ereico siquiche re? Dios que ndecheẽ ñandu ra. Elisabet nda tiirĩ ndeje cote. Juan, ere nderiirĩ je nyaacuquia mose. ¹⁴ Ndeyate ra cote. Nderiirĩ nyaacuquia mose ra mbia ia tuchi cote. ¹⁵ Nderiirĩ nda mbae turã saã saã tuchi quia Dios je. Mbaeri rasi mo nda embei eã tuchi. Espíritu Turã nda siqui tuchi erese. Esi rie ye ereco mose bei. ¹⁶ Nderiirĩ nda mbia Israel jenda mbuchebi ja Dios je. Dios ra ũquĩ nderecuarã. ¹⁷ Nderiirĩ nda mbae mbuquiche ja Cristo tu nonde. Sã Dios Elías mbuquiracuã no, eĩ si ra Dios uquiracuã mee nderiirĩ je. Nderiirĩ nda mbia mbuturã turã nyiese. Eru mbuturã turã nguiri ndese. Eriirĩ mbuturã turã ngu rese no. Nderiirĩ nda aba cheẽ mumbasa mbaaquiatsu quiatu. Aba cheẽ mumbayã sacua cote. Nderiirĩ nda mbia mbuquiche ja Cristo tu nonde, i que ibatenda ñee Zacarías je ra. ¹⁸ Zacarías que ñee ángel je ra. —¿Mañi nda ũqui nde? ¿Ndecheẽ nda ique seje re? ¿Manyae ra eicua re? Ameite se. Seninisi abe arite, i que Zacarías ee ra. ¹⁹ Angel que ñee Zacarías je ra. —Se rei Gabriel. Dios rimba chõ aico co. Dios quia semondo rei nguĩa ñee turã sacua ndeje. ²⁰ “Nya” ere eã ñochĩ secheẽ je. Nyebe ra ndeisyã. Ndecheẽ nguĩa nda eno. Nderiirĩ nda nyaacuquia chee. Nderiirĩ nyaacuquia mose ra erecheẽ nyecua cote. Secheẽ nda io ja ndeje cote, i que ángel Zacarías je ra. ²¹ Mbia que chi bei taicuee huee ra. Zacarías raarõ arõ. —¿Mbaerã Zacarías riqui itõ tuchite Dios chuchúaa re? i que mbia ñee jate ra. ²² Zacarías que usẽ nyee ra. Echeẽ nguĩã. O que

emumbate mbate chõ nguia mbia je ra. —Zacariás mbae mo tea cuu Dios chuchua reae, i que mbia ñee ñee nyue ra. ²³ Zacariás que umbae tarea saã ja Dios chuchúaa ra. Tenda nongue mose. Emo ngue tu euru cote ra. Zacariás que oso uchuchua cote ra.

²⁴ Aquere qu Eya uchi que cote ra. Eninisi que useã mbei tuchua si cinco meses ra. ²⁵ —Dios seriirina meẽi seje cote. Mbia ra iquia iquia eã seje cote, i que Elisabet ra.

*“Dios riirĩ nda nyecua u mbia je”,
i que ángel mo nda*

²⁶ Nyasi nongue mose que Dios ibatenda mondo mbia mo je ra. Gabriel, i que aque ángel je ra. Aque que emondo sucha Nazaret ra. Galilea, i que aque ibi je ra.

²⁷ —Eso rã ñee nyucuaaque María je, i que Dios ángel mondo ra. Emo ngue siquĩa tuchi María rese ra. Eruã mbei. José ninisibi rei María. José siquĩa ndaque erese. David riirĩ nducucha rei José. ²⁸ Angel que ique María ch María chuchua cote ra. —Acheẽ ngue u ndeje ra. Dios turã tuchi riqui ndeje co. Ndua bei nderese. Dios ia tuchite nderese acuanĩ mo si, i que ángel María je ra. ²⁹ María mae mose ibatenda rese que ñee uchiangui re ra. —¿Mbaerã eru quia serea co re? ¿Mbaerã eru quia ñee seje co re? i que María uchiangui re ra. ³⁰ Angel que ñeembe ee ra. —María, siquichechĩ nda sesi re. Dios turã tuchi riqui ndeje co. ³¹ Dios cheẽ turã ngue asenei u ndeje ra. Nanĩmbae ra nde cote. Nderiirina nda ereta cote. Jesús, ere nderiirĩ je. ³² Nderiirĩ quirãcuã tuchi rae. Dios quirãcuã ndiirĩ nda erereco. Mbia rerecua tuchi ra ae. Sã David riqui mbia rerecua nyii no, eĩ nda nderiirĩ mbia rerecua tuchi cote. ³³ Nderiirĩ nda judíos rerecua bei cote. Ua eã mbei rae, i que ángel ñee María je ra.

³⁴ María que ñee ángel je ra. —¿Mañi nda serío re? Seru eãte nyeresẽ, i que María ee ra. ³⁵ Angel que ñee María je ra. —Espíritu Turã ae ra Dios riirĩ mondo nderie ye. Espíritu Turã nda ndereaquiato bei quia. Dios quirãcuã nda siqui bei nderese. Nyebe ra Dios mbaerã tuchi nderiirĩ. Dios rucucha, i ra nderiirĩ je. ³⁶ Ndesi nongue ndiirĩ abe ra tiirĩ cote. Elisabet, i equia ee nae, aque abe ra tiirĩ. Arite raque. Erie cuasu cote. Tiirĩ mbae, i mbia quia ee nyii nae, aque ra tiirĩ cote. ³⁷ Dios quiareĩ mbae ao ja, i que ángel ñee María je ra. ³⁸ María que ñee ee ra. —Dios rimba chõ aico nguiã co. Sã ndecheẽ ique quia seje, i que María ra. Angel que oso erecha cote ra.

María oso Elisabet ndea

³⁹ María que oso Elisabet ndea cote ra. Ñeenda ishote que ee ra. Sita ibate bate rĩ ngue esi quia ra. Judea, i hue ibi je. ⁴⁰ María que ngasẽ Elisabet ndu chuchúaa ra. Zacariás, i equia eru je. Ique que ñee Elisabet je ra. ⁴¹ Elisabet María cheẽ andu mose, erie yenda que umi nda. Espíritu Turã ngue ique tuchi Elisabet chiangui re cote ra. ⁴² Elisabet que ñee nyecua tuchi María je ra. —Nde rese chõ Dios ia tuchi acuanĩ mo si re. Dios ia tuchi nderie yenda rese abe no. ⁴³ ¿Mbaerã Cristo si ru serea se re? Mbia rerecua eã ño se resẽ. ⁴⁴ Se ndecheẽ andu mose que serie yenda ia tuchi umi nda. ⁴⁵ Dios cheẽ ngue ereisi turã nda. Nyebe Dios iate riqui nderese co. Nyebe ra Dios cheẽ ique tuchi ndeje cote, i que Elisabet ñee María je ra. ⁴⁶ María que ñee cote ra.

Acheẽ turã mbei quia Dios rĩ co.

⁴⁷ Seya bei riqui Dios rese co.

Ae que servirõ mbae icuã si ra.

⁴⁸ Dios que nduate quia serese ra. Seaquiataũ ndaque.

Nyebe ra mbia ia jate serese cote.
⁴⁹ Dios quirācuā ngue mbae
 turā saā tuchi seje ra.

Ae mii ño eturā tuchi emo si re.

⁵⁰ Ae ndua turā nguia Dios rese
 nae, ũquĩ ndese chō Dios ia
 eā tuchi riqui nguiā.

Eĩ mbei chō Dios nguiā mbia je co.

⁵¹ Dios quirācuā ngue mbae saā ja
 ra.

Ucuasu raā naasa chō Dios mboseĩ
 nguiā.

⁵² Siqui mingue je chō Dios mii mii
 nguiā mbia rerecuarā.

Ae ererecua uaquiatu saā saā
 nguia nae, ũquĩ ño Dios sirō
 nguiā.

Ererecua eā ño ũquĩ cote re.

⁵³ Dios que mbae mee mee nguia
 mbaecha reā je ra.

Mbaecha quia emboochi nguiā.

⁵⁴ Dios que siqui tuchi judíos rese
 ra.

Tesareiā mbei esi.

Eyayā mbei erese no. ⁵⁵ Sā Dios ñee
 Abraham je no, ũquĩ ngue
 embuchebiā mbei ra.

Ae ucheẽ mondo judíos jaje nae,
 ũquĩ ngue embuchebiā mbei
 no nda,

i que María ñee turā Dios riĩ nda.

⁵⁶ María que siqui arete Elisabet
 rese ra. Tres meses. Aquere que
 eru nyebi uchuchúaa cote ra.

Juan el Bautista nyaacuquia

⁵⁷ Elisabet rasi rasite que cote ra.
 Nyaa cuquia que cote ra. ⁵⁸ Mbia
 que nyoi ja Elisabet ndea cote ra.
 Ejii jenda. Eresenda ja. —Dios turā
 tuchi riqui ndeje co. Āquẽ mondo
 ndeje, i ja que ee ra. Eya ja tuchi
 que erese ra. ⁵⁹ Ocho días mose
 que circuncisión naa eririĩ je ra.
 Zacarías, i nda mbia eririĩ je chā
 nde. Eru rā si. ⁶⁰ Esi quia que
 ñee nda. —Tei. Juan nande chō
 ee, i que esi ra. ⁶¹ Mbia que ñee
 esi je ra. —¿Mbaerā nda “Juan” ere
 ndeririĩ je re? Juan mo eā ndere-
 senda mo aa resẽ, i rei que mbia
 esi je ra. ⁶² Mbia que o mbaaba

aba Zacarías je ra. —¿Mañi nda
 ndeririĩ je re? i ee. ⁶³ Zacarías
 que ñomee mbia je ra. Nyebe mbia
 embesa sacua mee nguiā ee. —
 Juan, i chō seriiriĩ je, i que Zacarías
 embesa ra. Mbia que nyuruira ja
 u mae erese ra. ⁶⁴ Aque rube que
 Zacarías ñee aquiatu cote ra. Ñee
 turā tuchi que equia Dios riĩ cote ra.
⁶⁵ Zacarías cheẽ andure que mbia
 nyuruira jate ndua ndua hue jenda
 ra. Nyebe mbia ñimbiirandu ja
 nguiā sita ibate bate jenda. Judea, i
 que hue ibi je ra. ⁶⁶ Ae jirandu quia
 erese, ũquĩ ngue ndua tuchi quia
 erese ra. —Mañi nda Zacarías riiriĩ
 nguia reae. Nandemae nguia erese
 no, i que mbia quia ndua ndua ra.
 Dios que siqui tuchi Zacarías ndiriĩ
 ndese ra.

Zacarías ia tuchi ñee Dios je

⁶⁷ Espiritu Turā ngue siqui tuchi
 Zacarías rese ra. Nyebe Zacarías
 Dios cheẽ nenei nguiā.

⁶⁸ Sā mbia ñee turā Dios riĩ judíos
 rerecua riĩ.

Uturā ngue etecuquia nande je ra.
 Nanderirō ngue mbae icuā si ra.

⁶⁹ Nanderirō sacua nande icuā si
 que Dios mondo nande je ra.
 David riiriĩ nducucha que nan-
 derirō sacua nda.

⁷⁰ Sā Dios ñee cose no.

“Mbia rirō sacua nda ambu íbii”, i
 cose no.

Ucheẽ nenei neneisa que em-
 buchecua mbia je cote ra.

⁷¹ “Jēucuāyāsa si ra jendirōsa jen-
 deaquiatu bei”, i que Dios
 nande je ra.

⁷²⁻⁷³ Dios turāte que eriqui nandei
 ñiinda je ra.

Abraham je abe que eturāte riqui
 ra.

Ae Dios ñee Abraham je nyii nae,
 echeẽ ngue io cote ra.

⁷⁴ Dios que ñee Abraham je nan-
 deriĩ nyii ra.

“Taendeaquiatu jēucuāyāsa si,
 jēsiquicheā sacua ico mose

serese”, i que Dios nanderĩ cose ra.
 75 Nyebe ra nandeico turã mbei Dios je.
 Ae ra nandemingo bei icúe umbaerã.
 76 Nde ra Ibatenda cheẽ esenei senei nguia mbia je, ãquẽ.
 Dios riirĩ ndetã nda Dios cheẽ eresenei senei nguia mbia je, ãquẽ.
 Mbia icoguiatu sacuã Dios riirĩ je.
 77 Eĩ mose ra Dios mbia rirõ eicuã si.
 Eĩ mose ra Dios mbia icuã mbutiã esi.
 78 Dios turãte quia eriqui nguia nande je.
 Eriirĩ nda tu ibate si mbae mbuchecua nande je.
 79 Nandeaquiata mbaaquiata sacuã ño eru nguia aque.
 Nandemingo sacuã nyaashĩ naanguia chõ eru nguia aque,
 i que Zacarías ñee ãquẽ je ra. 80 ãquẽ ngue tiarõ i i oso quia cote ra. Dios rese que eriqui i i cote ra. Siqui bei que equia turúquiaa ra. Dios cheẽ ngue esenei senei nyee mbia je cote ra.

2

Jesús nyaacuquia

1 Aque mose que ererecua ñee nda. Augusto, i que ee ra. —Censo nandesaã na mbia ja je, i que ra. Mbiambae nombre mbesa mbesa ja mose, “censo” i que ùqui je ra.
 2 Censo raã namo mose rei ùqui. Cirenio ngue Siria jenda rerecua aque mose ra. 3—Jenyusua sua jẽso ja pueblo. Nombre mbesa mbesa ja sacuã jembae, i que ererecua mbia ja je ra. 4 Nyebe José choi nguia Judea. Belén, i que sucha je ra. Belén ño David chusua re. José i chõ David re. Nyebe José choi nguia Belén. Umbae ibi recha. Nazaret recha. Galilea abe recha no. 5 José que nyoi Belén umbae nombre mii sacuã nda. María rese.

María que eninisibi ra. María riote que ra. 6 Siqui mose Belén ngue ãquẽ ndasi rasite María je ra. 7 Aque ramo ngue María nguiri mbua ra. Ñuma ngue tiru je ra. Ticuas quiarusa ye que eno nda. Mbiam chuchua quiatu que eitãyãte ee ra.

Oveja raarõsa ngaẽ mae Jesús itãqueĩ ndese

8 Hue jii que oveja raarõsa mo nyi isa ra. Ovejas que esaarõ arõ nguia turuquia rĩ nda. 9 Angel ibatenda mo ngue tu embua tuchi ra. Dios nininya tuchi que tu overja raarõsa resae ra. Nyebe siquiche tuchi nguia esi. 10 Angel que ñee ee ra. —¿Mbaerã jẽsiquichete riqui re? Mbae turã nii ño achu nguia ñee jẽje co. Ae ra asenei jẽje, mbiam mbia sacua tuchi chõ ùqui nde. 11 Dios riirĩ ngue nyaacuquia namo Belén nda. Cristo, i equia ee. Mbiam rirõsa mbae icua si chõ ae re. 12 Aque echiticas quiarusa ye aque. Ema ji tiru je. Jemae nda erese huee. Jemae mose sechienei ndese, “Cristo chõ eriqui re”, jentye ra cote, i que ángel ñee oveja raarõsa je ra. 13 Angeles tubiriãte que nyecua oveja raarõsa je cote ra. Angel ñiinda ndese. Ñee turã ja que Dios rii nda. 14 Sã mbiam ñee turã ja Dios ibatenda rii. Sã Dios uquiato mbiam ibi jenda, i que ángeles ñee nyecha ee ra. 15 Angeles que nyoi ibate cote ra. Oveja raarõsa que ñee ñee nyue cote ra. —Nyaso rã Belén. Ae Dios senei senei nguia nande je nae, nyaso rã mae erese. Ae nyaacuquia namo nae, nyaso rã mae erese, i que oveja raarõsa ñee nyue ra. 16 Nyoi asi tuchi que mae erese ra. Ngasẽ ngue María je ra. José abe je. ãquẽ abe je. I que ãquẽ u ticuas quiarusa ye ee ra. 17 Oveja raarõsa que mbiam mbiirandu

ja erese ra. Ae ángel senei senei nguia ee María riirĩ nii, ũquí ngue oveja raarõsa senei senei tuchi mbia je cote ra. ¹⁸ Eandusa que nyuruira ja tuchi eandura. ¹⁹ María que ndua ndua tuchi quia ũquí ja rese uchiangui re ra. ²⁰ Oveja raarõsa ia tuchi que nyo nyebi ovejas je ra. Ñee turã turã tuchi que echoi quia Dios riĩ nda. —Angel que ñee nande je, echeẽ ndui si tuchi chõchĩ mbae eĩ ja, i que ñee ñee nyue ra.

Jesús ruruchoi Dios chuchúaa

²¹ Ocho días mose que circuncisión naa áquẽ je cote ra. Jesús, i que áquẽ je cote ra. Angel cheẽ ndui si tuchi chõ “Jesús” ichĩ áquẽ je. Ae ángel ñee María je erio nonde nae, echeẽ ndui si tuchi chõ “Jesús” ichĩ María riirĩ je. ²² Aquere que María ñimbitirõ Moisés cheẽ ndui si cote ra. Aquere que áquẽ nduruchoi Jerusalén cote ra. Áquẽ mee sacua Dios je. ²³ Embesa ji cheẽ ndui si que áquẽ mee Dios je ra. —Ae eriirĩ i erãcuẽ nae, ũquí jemondo tuchi Dios je, i quiatu ngue embesa ji rese re. ²⁴ Jerusalén José riqui mose que sacrificio mee Dios je ra. Embesa ji cheẽ ndui si. Sã embesa ji riqui ñee no: —Nyurusi nyeremo jemee Dios je. Ũquí eã mose, nyurusi ñetẽ jemee ee no ae, i que embesa ji cheẽ nda. ²⁵ Amei mo ngue siqui hue Jerusalén nda. Simeón, i que ee ra. Ae que eturã tuchi ra. Ñee mbei que equia Dios je ra. Ae que Dios riirĩ saarõ arõ tuchi quia ra. Judíos mbui sacua mbae icuã si. Espíritu Turã abe que siqui Simeón ndese ra. ²⁶ Espíritu Turã nguia ñee ndei Simeón je nyii. —Eremae nda Dios riirĩ ndese. Ndemano nonde ra eretea. Dios ra embu íbii, i que Espíritu Turã ñee Simeón je nyii

ra. ²⁷ Espíritu Turã ngue Simeón querao Dios chuchúaa ra. Embesa ji cheẽ ndui si que José áquẽ nduruchoi Dios chuchúaa aque mose si ra. María reses. ²⁸ Simeón ngue áquẽ sui ra. Eya tuchi que erese ra. —¡Co chõ jê! i que Simeón ñee turã Dios je ra.

²⁹ Dios, ndecheẽ ngue io seje cote ra.

Seyate aico co cote Sererao se cote.

³⁰ Nderiirĩ ndese que amae cote ra.

³¹ Ae erembu mbia rirõ sacua mbae icuã si nae, aque rese aico mae co cote.

³² Mbia resae sacua tuchi chõ nderiirĩ ndiqui re.

Judíos eã abe ra etesae tuchi.

Judíos abe je ra eturã tuchi no,

i que Simeón ñee Dios je ra.

³³ Simeón ñee mose María riirĩ nii,

José que nyuruira tuchi echeẽ andura.

María rese. ³⁴ Simeón ngue ñee turã María je ra. —Nderiirĩ

nda judíos tubiriã mingo turã. Ae

siqui sereãte quia erese, ũquí nguia

ra emingo icuã. Mbia ra ñee icuã

icuã nguia nderiirĩ turã je. Eicuã

je rocoi. ³⁵ Ae ndua turãte quia

nderiirĩ nii nae, ũquí ndua ndua

turã nda nyecua mbia je cote. Ae

ndua ndua icuã nguia, ũquí ndua

ndua abe ra nyecua mbia je cote

no. Mbia icuã nda nemundite

nderiirĩ ndese, i que Simeón María

je ra. ³⁶ Hue que arite mo ndiqui

ra. Dios cheẽ nenei neneisa que

ae ra. Ana, i equia ee. Fanuel, i

que eru eiruã siasa je ra. Aser, i

que ei ñiinda je ra. Ana yasu mose

que ngurã ndea nyii ra. Siete años

que eriqui ngu rese nyii ra. ³⁷ Eru

eã ngue cote ra. Eru cheecha que

siqui beite ra. Ochenta y cuatro

años. Dios chuchúaa que eriqui

beite ra. Ñee ñee mbei Dios je.

Quiaru rocoi. Isa abe. ³⁸ Ana ngue

mae áquẽ Jesús rese Dios chuchua

cote ra. —¡Co chõ jê! i tuchi que

Dios je ra. Ñee turã tuchi que áquẽ

nii mbia jaje cote ra. Ae Dios riirĩ

saarõ arõ nguia nae, ùquĩ jaje que Ana ñee turã turã ãquẽ nĩ nda.

José nyebi Jesús rerao Nazaret

³⁹ José que mbae saã ja embesa ji cheẽ nguire ra. Aquere que echoi nyebi Galiléaa ra. Nazaret, i equia echuchua je. ⁴⁰ María riirĩ ngue tiarõ cote ra. Ñĩmbaaquiatsu quiatsu que equia cote ra. Ñĩmbirãcuã nacuãte que equia cote ra. Dios turã ngue siqui tuchi quia erese ra.

Jesús ñĩmbaaquiatsu quiatsu Dios chuchúaa

⁴¹ Aque tenda bei que José riqui nyoĩ choi Jerusalén nda. Fiesta de la pascua mose bei. María rese. ⁴² Jesús tiarõ namo mose, doce años mose que echoi si fiesta de la pascua mose no nda. Jerusalén. ⁴³ Fiesta ua mose que ecuaẽ ndei quia nyebi ra. Jesús que siquichõ Jerusalén nda. Jesús abe oso reĩ nguĩa usi je. Ngu abe je. ⁴⁴ Jerusalén ño eriquichõ neaẽ. Mbia ataque rese eru reĩ nguĩa esi je. Mbia que ngaẽ ngaẽ bei quia tenda mumba chee ra. —Ma Jesús ñi, i rei que nguesenda je ra. ⁴⁵ Tea eã mbei que ra. Erea eã mose que eru si chee nyebi Jerusalén nda. María rese. Erequia sacua huee cote. ⁴⁶ Tres días mose que erea huee cote ra. Dios chuchúaa que eriqui ee ra. Ñĩmbaaquiatsu quiatsu. Mbia mbaaquiatusa cheẽ andu andu que Jesús riqui ngoi huee ra. —¿Mañi equia re? Tachandu tuchi rã, i i que equia ee ra. ⁴⁷ Jesús cheẽ aracua tuchi que eriqui mbia je ra. Nyebe mbia nyuruĩra nguĩa echeẽ aracua andu. ⁴⁸ Eru erea mose huee, ae abe que nyuruĩra ra. Esi abe nyuruĩra no. Esi que ñee ee ra. —¿Mbaerã eresoã urerese re, Echo? Ureya eã tuchi que eriqui nderequia asi asi ra, i que María nguĩrĩ je ra. ⁴⁹ Jesús que ñee ee ra. —¿Mbaerã serequia mámbii re? Paba chuchua chõ ngue aico resẽ,

i que Jesús usi je ra. ⁵⁰ María que Jesús cheẽ icuayãte ra. José abe echeẽ icuayã no. ⁵¹ Jesús que oso uchuchua erese cote ra. Nazaret, i equia sucha je. Usi cheẽ ngue emumbayã mbei quia ra. Ngu cheẽ ngue emumbayã mbei quia no nda. Esi que ndua ndua bei quia ùquĩ Jesús chisaã ndese ra. ⁵² Jesús rete que siri siri oso quia cote ra. Ñĩmbaaracua racua que equia no nda. Dios iate que eriqui erese ra. Mbia abe iate que eriqui erese no nda.

3

Juan Dios cheẽ senei senei mbia je

¹⁻² Aquere que Dios ñee Juan je ra. Zacarías riirĩ je. Tiberio siqui bei mose mbia ja rerecuarã. Quince años ereco mose mbia rerecuarã. Poncio Pilato que Judea jenda rerecu a que mose ra. Herodes que Galilea jenda rerecu ra. Felipe que Herodes nongue ra. Felipe que Iturea jenda rerecu ra. Traconite jenda rerecu abe que Felipe no nda. Lisania que Abilinia jenda rerecu ra. Anás que sacerdote rerecu ra. Caifás abe que sacerdote rerecu ra. Ùquĩ ererecu si que mose que Dios ñee Juan je turuquia re ra. ³ Nyebe que Juan Dios cheẽ senei senei nguia mbia je ra. Ama Jordán ndurubinda jaje. Eĩ ño ngue Juan nguia ñee mbia je ra. —Jẽhuĩ chõ jẽicuã si. Dios jẽicuã mbutiã sacua. Ùquĩ mose nda bautizar ae jẽje chã, i que Juan nguia ñee mbia ja je ra. ⁴ Isaías chimbesa io sacua ño ngue Juan Dios cheẽ nenei nenei nguĩa. Isaías chimbesa chõ ã nde: Emo nda ñeemombo mombo quia mbia je turúquiaa.

“Ñeenda nandererecu mbaerã jembuquiche.

Jẽingo quiatsu nandererecu tu nonde.

⁵ Ñeenda jembuturã turã nander-
erecua mbaerã.

Ibi cuaacua jembato mbato.

Ibi ati ati jësimiambo ambo.

Ñeenda chaa chaa jeñeengo.

Ibi rashĩ ndashĩ jëiti iti.

⁶ ‘Mbia mingo beisa’, i ja ra mbia
ñee Dios je cote”, i ra emo
nguia turũquiaa,

i que Isaías embesa cose ra. ⁷ Mbia
que nyoĩ nyoĩ ja quia Juan ndea
ra. Juan bautizar i sacua ee. Juan
ngue ñee ee ra. —Mbei rã ño jëingo
nguĩã. Mbae icuã nda jëĩ jëĩ mbia
je, ¿ũquĩ si jenyu quia seje co re?

⁸ Jë mbae icuã ndecha mose Dios
je, mbae turã jësã saã mbei quia
ee cote. “Abraham ndiĩrĩ ndu-
cucha chõ nande re. Nyebe ra
Dios nandemingo bei” jjenyechĩ nda
jë! Dios Abraham ndiĩrĩ nducucha
chao arondete raque sita je. ⁹ Ira
rã si chõ mbia re. Sã ira mo ia eã
no. Sã ea eã maña ño no. Sã erëĩ
chõ no. Eĩ serĩ serĩ ño Dios mbia
je, mba mbae turã naa eã mose, i
que Juan ñee mbia je ra. ¹⁰ —¿Mbae
rese ra ureico Dios je re? i que mbia
Juan je ra. ¹¹ Juan gue ñee ee ra. —
Ndeirao nyeremo mose, enongue
emondo eirao eã je. Ndechĩurã
mose, emo emondo mbaecha reã
je, i que Juan mbia mbaaquiatsu
quiatsu ra. ¹² Impuestos isi isiquia
mo abe que nyoĩ Juan je ra. Juan
bautizar i sacua ee. —¿Mbae rese ra
ureico ure re? i que ñee Juan je ra.

¹³ —¿Mbae ra jembatachĩ jë! iCobrar
jenye turã ño jë! Jëicua quiatsu chõ,
i que Juan ee ra. ¹⁴ Soldados mo
abe que ñee Juan je ra. —¿Mbae
rese ra ureico ure re no? i que
soldados ñee Juan je ra. Juan gue
ñee ee ra. —¿Mbia mbae ra jëisi
chooñoĩchĩ jë! “Co que mbae icuã
saã nda” jjenye chooñoĩchĩ nda emo
je jë! Jembae ae chõ jendeco, i que
Juan ñee soldados je ra. ¹⁵ Mbia que
mae quiatsu quiatsu quia Juan ndese
ra. —Cristo chõ co reae, i raque
mae quiatsu quiatsu ere. ¹⁶ Juan

ngue ñee mbia jaje ra. —I achõ je
chõ aico nguĩã bautizar i mbia je
co. Co chi emo ndu quia serui co.
Ae quia equirãcuã tuchi sesi re. Ae
quia eturã tuchi sesi re. Ae quia
ra bautizar i mbia je Espíritu Turã
je. Mbia chiã mbitirõ sacua. Sã
tata riqui mbae mbitirõ no. ¹⁷ Ae
ra mba umbae mii icúe. Eturã achõ
ño embae re. Ae embae eã nae, ũquĩ
nda esei cote. Ũquĩ ndeisa ra ua eã
mbei tata. Sã mbia quiata a chiqui
chiqui no. Sã ea mii icúe no. Sã
echuruque mombo tátaa no, i que
Juan ñee mbia je ra. ¹⁸ Eĩ gue Juan
nguia Dios cheẽ turã nenei nenei
mbia je ra. Mbia mbaaquiatsu
tuchi. ¹⁹ Ererecua Herodes je que
Juan ñee nyee ra. Felipe ninisi rese
siqui mose. —¿Mbaerã ereico nde-
nongue ninisi rese re? i que Juan
ererecua je ra. —Mbae icuã eresaã
saã ja techĩ nguia re, i tuchi que
Juan ee ra. ²⁰ Ererecua que Juan
ñee mumba bei chõ nda. Ererecua
que Juan tarõ nyee cárcel nda.

Juan bautizar i Jesús je

²¹ Juan bautizar i mose mbia jaje,
Jesús je abe que bautizar i ra. Jesús
que ñee ñee nguia ngu je ra. Ibei
que obo ee ra. ²² Espíritu Turã gue
nguichi Jesús rese ra. Nyurusĩ rã
ño nguichi checua ere. Ibatenda
que ñee ee ra. —Seriĩrĩ ño nde
re. Sechesecua chõ nde re. Seyate
nderese, i que Ibatenda Jesús je ra.

Mbia ñiinda Jesús i

²³ Jesús treinta años mose que
mbia mbaaquiatsu quiatsu ramo
nda. —José riĩrĩ, i ja que mbia Jesús
je ra. Elĩ riĩrĩ nguia José re. ²⁴ Elĩ
rei Matat ndiĩrĩ. Matat ndei Levĩ
riĩrĩ. Levĩ rei Melqui riĩrĩ. Melqui
rei Jana ndiĩrĩ. Jana ndei José riĩrĩ.
²⁵ José rei Matatías riĩrĩ. Matatías
rei Amós ndiĩrĩ. Amós ndei Nahum
ndiĩrĩ. Nahum ndei Esli riĩrĩ. Esli
rei Nagai riĩrĩ. ²⁶ Nagai rei Maat
ndiĩrĩ. Maat ndei Matatías riĩrĩ.
Matatías rei Semei ndiĩrĩ. Semei

ndeí José ririĩ. José rei Judá ririĩ.
²⁷ Judá rei Joana ndiĩrĩ. Joana
 ndei Resa ririĩ. Resa rei Zorobabel
 ririĩ. Zorobabel rei Salatiel ririĩ.
 Salatiel rei Neri ririĩ. ²⁸ Neri rei
 Melqui ririĩ. Melqui rei Adi ririĩ.
 Adi rei Cosam ndiĩrĩ. Cosam ndei
 Elmodam ndiĩrĩ. Elmodam ndei
 Er ririĩ. ²⁹ Er rei Josué ririĩ. Josué
 rei Eliezer ririĩ. Eliezer rei Jorim
 ndiĩrĩ. Jorim ndei Matat ririĩ.
³⁰ Matat rei Levi ririĩ. Levi rei
 Simeón ndiĩrĩ. Simeón ndei Judá
 ririĩ. Judá rei José ririĩ. José rei
 Jonán ndiĩrĩ. Jonán ndei Eliaquim
 ndiĩrĩ. ³¹ Eliaquim ndei Melea ririĩ.
 Melea rei Mainán ndiĩrĩ. Mainán
 ndei Matata ririĩ. Matata rei Natán
 ndiĩrĩ. ³² Natán ndei David ririĩ.
 David rei Isaí ririĩ. Isaí rei Obed
 ririĩ. Obed rei Booz ririĩ. Booz rei
 Salmón ndiĩrĩ. Salmón ndei Naasón
 ndiĩrĩ. ³³ Naasón ndei Aminadab
 ririĩ. Aminadab rei Aram ndiĩrĩ.
 Aram ndei Esrom ndiĩrĩ. Esrom
 ndei Fares ririĩ. Fares rei Judá
 ririĩ. ³⁴ Judá rei Jacob ririĩ. Jacob
 rei Isaac ririĩ. Isaac rei Abraham
 ndiĩrĩ. Abraham ndei Taré ririĩ.
 Taré rei Nacor ririĩ. ³⁵ Nacor rei
 Serug ririĩ. Serug rei Ragau ririĩ.
 Ragau rei Peleg ririĩ. Peleg rei
 Heber ririĩ. Heber rei Sala ririĩ.
³⁶ Sala rei Cainán ndiĩrĩ. Cainán
 ndei Arfaxad ririĩ. Arfaxad rei
 Sem ndiĩrĩ. Sem ndei Noé ririĩ.
 Noé rei Lamec ndiĩrĩ. ³⁷ Lamec
 ndei Matusalén ndiĩrĩ. Matusalén
 ndei Enoc ndiĩrĩ. Enoc ndei
 Jared ririĩ. Jared rei Mahalaleel
 ririĩ. Mahalaleel rei Cainán ndiĩrĩ.
³⁸ Cainán ndei Enós ndiĩrĩ. Enós
 ndei Set ririĩ. Set rei Adán ndiĩrĩ.
 Adán ndei Dios ririĩ.

4

Satanás tã i Jesús je

¹ Jesús que nyebi Ama Jordán
 si ra. Espíritu Turã ngue siqui
 tuchi quia erese ra. Turúquiaa que
 Espíritu Turã Jesús rerao ra. ² Huee
 que eriqui arete ra. Cuarenta días.
 Mbae mo ngue eu eã mbei aque
 mose ra. Eriãcuâte que cote ra. —
 Tã tae rã Jesús je. Ma Jesús mbae

icuã naa, i rei que diablo Jesús
 riĩ nda. ³ —Nde Dios ririĩ mose,
 mbichae esaã co sita je no, i rei que
 diablo Jesús je ra. ⁴ Jesús que ñee
 ee ra. —Tei. Eĩ ngue embesa ji
 ñee nda: “Mbia chiũ achõ nda mbia
 mingo eã. Dios cheẽ nguia ra mbia
 mingo nguia”, i que embesa ji ra,
 i que Jesús diablo je ra. ⁵ Aquere
 que diablo Jesús rerao ibi ibate mo
 nda. Ibate tuchi. Diablo que ibi
 teacuquia ja Jesús je ra. Ishonda abe
 reacuquia ja ee. Aque mose bei
 que ereacuquia ja ee ra. ⁶⁻⁷ Diablo
 que ñee Jesús je ra. —Sembæ ja
 chõ ibi re. Se emondose mose
 emo je, amondo ra ee. Tamondo
 tuchi ndeje. Mbia ja rerecuarã nda
 aremii. Ndeico mose serese, ta-
 mondo ja ndeje. Serimbarã mose
 nde, tamondo ja ndeje no, i rei que
 diablo ñee Jesús je ra. ⁸ Jesús que
 ñee diablo je ra. —Quiatúæ sesi
 ae, Satanás. ¿Mañi nda nderimba
 se re? “Dios ae rese chõ jẽingo”, i
 que embesa ji ñee ndesẽ, i que Jesús
 diablo je ra. ⁹ Aquere que diablo
 Jesús rerao Jerusalén nda. Querao
 que suruchui ibate Dios chuchua
 arõ nda. Ibate tuchi echuchua. —
 Nde Dios ririĩ mose, eo oso íbii. Dios
 ra ndereaquiato. Eremanoã nda
 oso ngoi. ¹⁰ Sã embesa ji riqui ñee
 no:

Dios ra ángeles mondo ndereaquiato
 sacuã.

¹¹ Oje ra ndeisi.

Nembuquichi mingue rae.

Sita ra cua iã ndei je,

i que embesa ji ra, i rei que diablo
 Jesús je ra. ¹² Jesús que ñee dia-
 blo je ra. —Sã embesa ji ñee no:
 “Ma Dios sereaquiato. Tã tae ee
 no’, jenyechĩ nda Dios je”, i ñi Dios
 cheẽ nde, i que Jesús ñee diablo je
 ra. ¹³ Diablo Jesús mbiicuã aronea
 mose, secha chee que oso ra. —
 Emo mose jiri ra tã aebe ndeje jẽ, i
 rei que uchiangui re ra.

*Jesús mbia mbaaquiato quiato
 ramo*

¹⁴ Jesús que oso nyebi Galiléaa cote ra. Espíritu Turã quirãcuã ngue síqui tuchi quia erese ra. Mbia hue jenda ja que jirandu ja tuchi quia erese ra. ¹⁵ Judíos chumunuásaa que Jesús riqui mbia mbaaquiato quiato ra. Mbia que ñee turã ja quia eriñ nda.

Nazaret jenda Jesús isiteã

¹⁶ Jesús que ngasê Nazaret cote ra. Hue rei etiarõsa hue. Sábado mose que esi judíos chumunuásaa ra. Sábado mose bei que eriqui oso oso huee ra. Juã ngue embesa ji renei nonde mbia je ra. ¹⁷ Mbia que Isaías chimbesa mondo Jesús oo ra. Isaías chimbesa que eequia cote ra. Ñ embesa ji que esaã saã mbia je ra: ¹⁸ Espíritu Turã ndiqui tuchi serese co.

Dios que sererecúe ra.

Echeẽ turã nenei nenei sacua mbaecha reã je.

Etarõi mbusẽ sacua ño ngue Dios sererecúe ra.

Eresayã ndesa ira sacua ño ngue sererecúe no nda.

Ae je ererecua icuãte riqui nae, ñquĩ mbusẽ sacua ño ngue Dios sererecúe nguiã no.

¹⁹ Mbia je ñee ñee sacua ngue Dios sererecúe no nda.

“Namo ño Dios turã ndiqui nguiã”, i sacua mbia je,

i que Jesús embesa ji mbuchecua mbia je ra. ²⁰ Jesús que embesa ji mumbi cote ra. Mondo que emo oo cote ra. Ngoi que cote ra. Mbia que mae mbei quia erese ra. ²¹ Jesús que ñee mbia je ra. —Embesa ji que ambuchecua jêje namo, aque io quia jêje a cote, i que Jesús mbia je ra. ²² Mbia que ñee turã ja quia Jesús riñ nda. —Jesús cheẽ turã tuchi quia eriqui re, i ja tuchi que mbia nyuruira ra. —¿José riirĩ ño co re? i que mbia quia ee ra. ²³ Jesús que ñee mbia je ra. —“Mbia mae sayã ngue eresaã saã Capernaum nae, ñquĩ mo esaã aa ndechuchúaa no”, jentye arõte seje sechuchúaa.

²⁴ Tacheẽ nyecua rã jêje. Dios cheẽ mbuchecuasa ishonda cheẽ nguia ra mbia isi turã mbei quia. Nguecua jenda cheẽ nguia ra eisi turã eã. ²⁵ Tacheẽ nyecua rã jêje. Elías reco mose íbii, ama ngue nyaaquíã mbei ra. Tres años ndobei. Mbia riãcuã ja que aque mose ra. Eru cheecha tubiriãte que chi rei hue Israel jenda ra. ²⁶ “Ñquĩ eru cheecha mo je mbae echao turã”, i ãte que Dios quia Elías je ra. “Sarepta jenda je quia mbae echao eru cheecha je”, i quiato que Dios ee ra. Judío eã je quiato que Dios Elías mondo ra. ²⁷ Eliseo reco mose íbii, leprosos tubiriãte que chi rei hue Israel jenda ra. Eliseo que hue jenda mo mbucheroã no nda. Ishonda mo nguia to que embucherõ Siria jenda ra. Naamán, i que ee ra, i que Jesús ñee mbia je ra. ²⁸ Judíos chumunuasa que Jesús riqui ñee mbia je ra. Mbia Jesús cheẽ andu mose que paama i ee ra. ²⁹ Mbia paama i je que Jesús mombo sucha tubiriã si ra. Sita ibate que sucha tubiriãte ra. Sita rimia mbucu que mbia Jesús rerao rei ra. Hue si nda emombo nguiã ña. ³⁰ Jesús que oso chee mbia tubiriã ite re si ra.

Jesús aba checuayã icuã jea ameĩ mo si

³¹ Jesús que oso Capernaum cote ra. Sucha tubiriã mo. Galilea jenda. Sábado mose que mbia mbaaquiato quiato ra. ³² Ererecua rã ño ngue Jesús riqui mbia mbaaquiato quiato ra. Nyebe mbia riqui nguiã nyuruira tuchi echeẽ andu. ³³ Huee que ameĩ mo ndiqui mbia chumunuásaa ra. Aba checuayã icuã nyireco rei ae. Aque que ñee asite Jesús je ra. ³⁴ —¿Mbaerã erechu quia urerea co re, Jesús? Quiatúae urerecha ae. ¿Urerĩcharã ño erechu quia co re? Dios rucucha chõ nde re. Areĩcuatse, i rei que aba checuayã icuã Jesús je ra. ³⁵ Jesús que ñee ee ra. —Equiriri chõ jê. Esẽ oso ameĩ

ñiangui si, i que Jesús ee ra. Jesús cheê mose que aba checuayã amei mombo íbii ra. Mbia tubiriãsa. Usê ngue u amei mbasiã cote ra. ³⁶ Mbia tuririã ngue nyuruira ja u erea ra. —Jesús quirãcuã ae ñee nguiã. Mbia rerecua rã ño eriqui nguiã ñee aba checuayã icuã je. ¡Sã aba checuayã echeê mumbayã jê! i tuchi que mbia nyuruira erea ra. ³⁷ Mbia que ñimbiirandu randu ja Jesús rese ra. Erurubinda jenda abe jirandu ja erese.

Jesús Simón ninisi si mbucherô

³⁸ Jesús que usê mbia chumunuasa si cote ra. Oso que ique Simón nyuchua cote ra. I que Simón nyari rasi u ee ra. Eracu tuchi que ee ra. —Embucherô na, i tuchi que mbia Jesús je ra. ³⁹ Jesús que oso nyibi earô nda. Ñee ngue eracu je ra. —Etiba, i que ee ra. Eracu que hui esi Jesús cheê nguire ra. Ari que juã cote ra. Mbae que echao chao mbia chiurã cote ra.

Jesús mbia rasi chumumbara mbucherô

⁴⁰ Tenda ireĩ mose que mbia nguesenda rasi rurucuaê cuaê ja Jesús je ra. Erasi chumumbara tuchi que ra. Jesús que o chono ñono ja erasi arô embucherô cherô ja ra. ⁴¹ Aba checuayã icuã ngue usê usê nguia mbia si Jesús cheê mose cote ra. —Nde rei Cristo Dios riirĩ, i que usê usê mbia si ra. —¡Jêñee eã ño jê! i tuchi que Jesús quia aba checuayã icuã je ra. Ũqui ngue Cristo icua chõ nda.

Jesús mbia Galilea jenda mbuchesea sea

⁴² Nyaashĩ namo mose que Jesús si turuquia a. ra. —Se ae taico mbirĩ na, i rei que ra. Mbia que nyoĩ erui erea chee ra. —¡Eresochĩ nda urerecha jê! Ure rese bei chõ eico, i rei que mbia ñee Jesús je ra. ⁴³ Jesús que ñee ee ra. —Dios cheê tasenei senei pe quitinda je abe. Nyebe sembu nguiã, i que Jesús ra.

⁴⁴ Jesús que mbia mbuchesea sea quia Galilea jenda ra. Dios cheê nenei nenei judíos chumunuãsa.

5

Jesús sira tubiriã mbua uquia mbia je

¹ Emo mose que Jesús riqui ama ndisha rimia ndese ra. Genezaret, i que ama ndisha aque je ra. Mbia cuabê ngue ngaê ee huee ra. Dios cheê anduse rete que ra. Nyebe mbia tubiriã Jesús mumbi i i tuchi nguiã. ² Canoa nyeremo abe que chi hue erimia ndese ra. Eoreã ja que ra. Echa que chi sira mbuasa irei irei ra. ³ Jesús que ua canoa nongue ye ra. Simón mbae que aque canoa nda. —Ama nimia ndecha jiri sererao mingo, i que Jesús Simón je ra. Canoa ye que Jesús ñi erimia ndesenda mbaaquiātu quiātu ra. ⁴ Mbia mbaaquiātu jare que ñee Simón je ra. —Eriquiraa sã canoa jendao. Huee tarafa jemondo ii. Sira mbuasa jemondo ii, i que Jesús ee ra. ⁵ Simón ngue ñee ee ra. —Nyaashĩ nyee que ureico rei embuasa rerequia isa ra. Emo ngue uresiroã mbei ra, Sererecua. Ma ndecheende tasaambe no, i que Simón Jesús je ra. ⁶ Mbia que tarafa mondo ii cote ra. Sira tubiriã mbua nonde. Tarafa soro serĩ sira usi je. ⁷ Nyueru eru que canoa nongue yenda je ra. —Sira usite ure je. Jenyu rã. Nandembua ja rã canoa ye, i que canoa nongue yenda je ñee nda. Canoa nyeremo puk i ja sira je. Aete ñiimi sira usi je. ⁸ Sira tubiriãchĩ sira eande nyii. Nyebe Simón Pedro nyuruira tuchi nguiã mae Jesús chimondo rese. Ngoi que ngũĩã ndese ñee ee ra. —Seicuâte aico co, Sererecua. Serecha rei se ae, i rei que Simón Pedro ñee Jesús je ra. ⁹ Echiã nguia cuaãcuã i tare nguiã. Eresenda abe chiã cuaãcuã i ja. Sira tubiriã ndea. Sira mbua eande nyii. ¹⁰ Zebedeo riirĩ abe que

chi ja Simón ndese huee ra. Jacobo, i que enongue je ra. Juan, i que enongue je no nda. Ũquí chiã abe que cuaãcuã i ra. Jesús que ñee Simón je ra. —¡Eresiquichechĩ nda jê! Sira rese ra ereicoã cote. Mbia ra ereru reru bei quia seje cote, i que Jesús ee ra. ¹¹ Canoa yenda ngasê mose ama nimíaa, umbae que esecha ja nyoĩ bei nonde Jesús rese cote ra.

Jesús mbia leproso mbucherõ

¹² Jesús que siqui tuchua mo nda. Hee que emo ndasi riqui ee ra. Leproso. Jesús rese mae mose que ngoi ngũĩã ndese ee ra. Nyibi que ñee Jesús je ra. —Sererecua, nde sembucherõse mose, sembucherõ se, i que leproso ñee Jesús je ra. ¹³ Jesús que oco erese ra. —Echerõ cote, i que ee ra. Echeẽ mosebe que nyerõ nda. ¹⁴ Jesús que ñee ee ra. —¡Erecheẽchĩ nda mbia mo je jê! Eso nderasiã ndeacuquia sacerdoti je cote. Moisés cheẽ ndui si mbae mo emondo Dios je. Eĩ nda mbia jirandu nderasiã ndese cote, i que Jesús ñee ee ra. ¹⁵ Mbia que ñimbiirandu i i tuchi quia Jesús rese ra. Ngaẽ ngaẽ ja que equia echeẽ andu ra. Umbucherõ cherõ sacua abe que eriqui ngaẽ ngaẽ erea ra. ¹⁶ Jesús que oso oso quia mbia tiãmbaa ra. Ñee ñee Dios je.

Jesús emi sayã mo mbucherõ

¹⁷ Emo mose que Jesús riqui mbia mbaaquiatsu quiatu ra. Huee que fariseos mo nyi echeẽ andu andu ra. Embesasa abe que chi ra. Galilea jenda chõ ũquí nde. Judea jenda abe no. Jerusalén jenda abe no. Huee que echĩ ja Jesús cheẽ andu ra. Dios quirãcuã ngue siqui tuchi Jesús rese ra. Erasi mbucherõ cherõ sacua. ¹⁸ Mbia que erasi mo curucuaẽ quisa ye ra. Emi sayã ngue ae ra. —Nandemingue serao Jesús je, i rei que ra. ¹⁹ Tuchua mbaranguiatuã que ee ra. Mbia tubiriã ngue tuchua mbiitãyã ee

ra. Nyebe erasi ruruchoi nguiã sui tuchua arõ. Tei que endoro ra. Erasi que embuquichi imbu quisa ye Jesús rimbe ra. Mbia ite rĩ. ²⁰ —Ererucuaẽsa riqui seicua ũquí, i que Jesús ñee uchianguĩ re ra. Nyebe ñee nguiã emi sayã je. —Ndechisaã mbae icuã ambutiã nguiã ndesi co, i que Jesús ee ra. ²¹ Fariseos que ñee ñee nyue ra. Embesasa rese. —Jesús ñee icuã ñochĩ nguiã Dios rĩ co. Dios ibatenda ae mbia chiao icuã mbutiã nguiã esi. Jesús aquiatsu ño ñene, i rei que eu ñee ñee nda. ²² Jesús que ũquí ndua icuã icuate ra. Nyebe ñee nguiã ee cote. —¿Mbaerã jẽingo ndua icuã nde? ²³ ¿Ma mbaranguiatuã eã jiri jêje re? ¿Mbia icuã mbutiã ere? ¿Mbia rasi mbucherõ ere no? ¿Ma mbaranguiatuã eã jiri ũquí jêje re? ²⁴ Dios ririĩ ndei se. Mbia chiao icuã mbutiã aquiatsu chõ se re. Sequirãcuã tateacuquia jêje, i que Jesús ñee ee ra. Ñee ngue erasi jê cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ²⁵ Jesús cheẽ ndurucha reã ngue emi sayã juã nda. Mbia que mae ja tuchi u ere se ra. Uquisa abe que equerao ra. Eya tuchi que oso uchuchúaa ra. Ñee ñee turã ngue equia Dios rĩ nda. ²⁶ Mbia que nyuruira ja u mae emi sayã ngata rese ra. —Emi sayãte rei nyii. Ngata chõchĩ cote, i ja que mbia u mae nguiatsu erese ra. Mbia ñee turã ja Dios rĩ cote.

Serui bei eico, i Jesús Leví je

²⁷ Leví, i que emo je ra. Ae que impuestos isi isi bei quia ererecua mbaerã nda. Jesús que ngasê ee emo mose ra. Huee que eñi ngoi plata isi isi ra. —Serui bei eico, i que Jesús ñee ee ra. ²⁸ Ae Leví juã oso nguiã Jesús rui. Mbae recha ja umbae. ²⁹ Leví que fiesta saã tuchi Jesús je ra. Embuquiaru turã sacua uchuchua. Impuestos

isi isiquia ata que chi quiaru erese huee ra. Mbiamo abe que chi no nda. ³⁰ Fariseos que ñee icuâte Jesús chimbaaquiatsu je ra. Embesasa rese ñee icuã ee. —¿Mbaerã jëingo quiaru impuestos isi isiquia rese re? Mbia icuã ndese abe jëingochi nguiã quiaru, i que ñee nda. ³¹ Jesús que ñee ee ra. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ³² “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i. “Jëicuã si jëhui”, ae chõ ngue u nguiã eicuã je, i que Jesús ee ra.

Jesús chimbaaquiatsu hui ãte uchiu si

³³ Mbia que ñee Jesús je ra. —Juanñimbaaquiatsu hui hui uchiu si. Ñee nonde Dios je. Fariseos chimbaaquiatsu abe hui hui uchiu si no. ¿Mbaerã ndechimbaaquiatsu riqui hui ãte uchiu si re? i que mbia Jesús je ra. ³⁴ Jesús que ñee ee ra. —Sã emo ngüinisirã isi ramo mose no. Sã eresenda iate riqui quiaru erese no. Sã hui aroneate uchiu si aque mose no. ³⁵ Sã eru riqui mano emo mose no. Aque mose quia ra equiato hui uchiu si cote, i que Jesús ñee ee ra. ³⁶ Jesús que ejemplo saã mbia je ra. —Sã emo ndiqui tiru yasu mii aroneate tiru ima sorei rese no. Ñquã mose eicuãte cote. Eyasu ra quiata chõ esi. ³⁷ Sã emo eri rasi ramo nderecoquiatsu eã eriru ima ye no. Mbae ire ima ye erecoquiatsu aronea. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiacuãte ra cote. ³⁸ Eri yasu quia nda equerecoquiatsu nguiã mbae ire yasu ye. Soroã sacuã. ³⁹ Emo eri ima mbei mose, eyasu ra embei sereã cote. “Eima ño eturã nde”, i chõ nguiã cote. Nyebe mbia riqui nguiã secheẽ yasu isi sereãte, i que Jesús ñee mbia je ra.

6

Jesús chimbaaquiatsu mbae a ishao shao sãbado mose

¹ Sãbado mo mose que Jesús si quia mbiaco ite rĩ nda. Uchimbaaquiatsu rese. Echimbaaquiatsu que quiata a ucua mii mii nyoĩ quia ecuã mose ra. Equiti quitire oo je que echoĩ quia eachãña cote ra. ² Fariseos mo ngue ñee ee ra. —¿Mbaerã jëingo mbae ishao shao sãbado mose re? Co mose chõ mbia uquenea ucua resẽ, i que fariseos ee ra. ³ Jesús que ñee ee ra. —¿Embesa ji rese jemae eã David rĩĩ nde? David riãcuãe que aque mose ra. Eresenda abe riãcuã ngue aque mose ra. ⁴ David que ique Dios chuchúaa ra. Mbichae Dios chuchua jenda que eu ra. Mee mee ngue nguesenda je ra. Eriãcuãte quia ñene. Sacerdote achõ mbaerã ndaque mbichae. ⁵ Sãbado rerecua bei chõ se re, i que Jesús ñee fariseos je ra.

Jesús eo tomei mo mbucherõ

⁶ Sãbado nongue mose que Jesús si judíos chumunuasa ra. Mbia que embaaquiatsu quiatsu huee ra. Huee que eo tomei mo ndiqui ee ra. Equiato cutinda tomei ngue ra. ⁷ Fariseos que mae nguiatsu quia Jesús rese ra. Embesasa abe que mae nguiatsu quia erese ra. —Mañi nda Jesús quia eo tomei je reae. Co sãbado mose reae. Sã embucherõ jẽ. Nandechẽ icuã nda ee chã jẽ, i que eu mae nguiatsu Jesús rese ra. ⁸ Ñquã ndua icuã ngue Jesús icua ra. Ñee ngue eo tomei je cote ra. —Ehuã na u mbia ite rĩ, i que Jesús ee ra. Eo tomei ngue juã uã cote ra. ⁹ Jesús que ñee mbia je ra. —¿Mbae eturãte jẽje co tenda mose re? Sãbado mose bei. ¿Coche mbae turã naa naa sãbado mose re? ¿Coche mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia

ja je ra. ¹⁰ Jesús que mae mbia ja rese cote ra. —Echomee secuti, i que eo tomei je cote ra. Eo tomei ngue ñomee Jesús cheẽ mose ra. Aque mosechi que eo nyerõ cote ra. ¹¹ Nyebe fariseos paama i tuchi nguiã Jesús je. Sábado mose mbia mbucherõ mose. —¿Mañi nande ra Jesús je re? Nandeiquia chõ nda reae, i tuchi que eu ñee nyue ra.

Jesús mbia doce irabo uchimbbaaquiatu

¹² Jesús que oso mbia tiãmbaa ra. Sita ibátee. Huee que eñi ñee mbei Dios je nyaashĩ nyee ra. ¹³ Nyaashĩ mose que uchimbbaaquiatu munua ja cote ra. Ñquĩ doce mo ngue eirabo ra. —Sechimondo sacuaã jẽ. Jaemondo ra secheẽ nenei nenei sacuaã mbia je, i que ñquĩ doce je ra.

¹⁴ ã mbia que eirabo ra:

Simón (Pedro, i abe que ee ra.)

Andrés (Simón nongue rei ae.)

Jacobo

Juan

Felipe

Bartolomé

¹⁵ Mateo

Tomás

Jacobo (Alfeo riirĩ ndei ae.)

Simón el Cananista

¹⁶ Judas (Jacobo nongue rei ae.)

Judas Iscariote (Aque que Jesús mondo mbia icuaã je ra.)

Ñquĩ ja que Jesús irabo ra.

Jesús mbia tubiriã mbbaaquiatu

¹⁷ Jesús que nguichi u sita si cote ra. Uchimbbaaquiatu rese. Ibi túraã ngue ecuaẽ ngasẽ cote ra. Mbba tubiriãte abe que chi huee ra. Judea jenda. Jerusalén jenda abe no. Tiro jenda abe no. Sidón jenda abe no. Ama nimia jenda rei ñquĩ. Ñquĩ ngue ngaẽ nyisaquia Jesús cheẽ ndese ra. Jesús embucherõ abe sacuaã ngue ecuaẽ nda. ¹⁸ Ae rese aba checuayã icuaã ndiqui nae, ñquĩ abe que Jesús mbucherõ nda. ¹⁹ Jesús quirãcuã ngue mbia mbucherõ ja quia ra.

Nyebe mbia riqui nguiã ocose ja Jesús rese.

Ae eyate riqui

²⁰ Jesús que mae uchimbbaaquiatu rese ñee nonde ee ra. —Jeyate riqui ã. Jẽ mbaecha reã ndaque. Dios quiatu ra jenderecuarã tuchi cote. ²¹ Jẽyate riqui ã. Jeniãcuã ndaque. Jendio rete ra cote. Jẽyate riqui ã. Jenyeseo seo raque. Jẽiquia iquia ra emo mose cote. ²² Mbba jemo ucuãyã mose, jemo mombo mose, ñee icuaã mose jẽje serĩ, jẽyate jẽingo ñquĩ. ²³ Jeñimbba tuchi chõ aque mose. Mbba icuaã mose jẽje. Dios quia ra mbae turã mondo jẽje ibate. Mbba icuande jẽje nyii. Eĩ si que mbba icuaã nguiã Dios rimba ñiinda je no nda.

Ae aba mbia eãte quia

²⁴ Aba mbia eã tuchichĩ jẽ, Mbaecha. Mbae icuaã nda tu jẽje. Jẽyare nyii. ²⁵ Aba mbia eã tuchichĩ jẽ, quiaru tuchi je. Jeniãcuã tuchi ra cote. Aba mbia eã tuchichĩ jẽ, iquia iquia je. Jenyeseo ra cote. ²⁶ Aba mbia eã tuchichĩ jẽ mbba ñee turã mbei mose jenii. Eĩ si rei que equia ñee turã turã dios abareã nimba je cose ra.

Jẽingo turã ño nguiã jẽucuãyãsa je

²⁷ Aico ñee jẽje a. Ae eicuãte riqui jẽje, ñquĩ ndese jenyeseo chõ. Jẽingo turã ño nguiã jẽucuãyãsa je. ²⁸ Emo ñee icuaã mose jeje, jeñee turã ño ee. Jeñee turã ño Dios je erĩ. ²⁹ Emo ucua mose jenditii rese, “tasaã se abe”, jenyechĩ ndae. Jenditii ribisho abe jẽteacuquia ee. Emo jẽirao rirõ mose jẽsi, jẽirao nongue abe rese jengueteã eã ño ee. ³⁰ Emo ache ache i mose jẽje, jemondo chõ ee. Emo jembae reraochõ mose, “emondobe seje”, jenyechĩ nda ee. ³¹ Sã jẽyate riqui mbba siqui turã mose jẽje no. Eĩ jenyee si chõ nguiã siqui turã mbba je no.

³² Ae eicuâte riqui jêje nae, ûquĩ ndese jenyesequa chõ. Ae nyesequa quia jendese nae, ûquĩ mii ndese jenyesequa mose, eicuâte ûquĩ. Mbia ja rese quiatu jenyesequa. ³³ Jẽingo turã nguia tu quia mbia ja rese. Ae eturã ndiqui jêje, ûquĩ mii ndese jẽingo turã mose, eicuâte ûquĩ. Jesús quia-toã abe chee siqui turã uquiato je. ³⁴ Emo prestar i mose jembae je, jemondo chõ ee. Ae mbae mondo aroneate eribishorõ nae, jemondo bei chõ ee. “Cobrar tae ee”, jenyechĩ ndae. Jesús quiatoã abe chee mbae mondo eribishorõsa je. “Mbae mo nda emondobe seje”, i. ³⁵ Eĩ jenyechĩ nda jê abe. “Mbae mo nda emondobe seje chã” jenyechĩ nda jê abe jê! Jemondochõ ño ee. Ae eicuâte riqui jêje, ûquĩ ndese jenyesequa chõ. Uquĩ mose ra Dios mbae mee tuchi jêje. Dios rã tuchi ra jê cote. Dios ia eâte quia eriqui nguia eicuã ndese. Dios turâte quia eicuã je re. Eicuã ñee turã eã ndaque ee. ³⁶ Jẽyayã ño mbia rese. Sã Dios abe eya eâte nanderese no.

“Eicuâte que co ra”, jenyechĩ nda emo nii

³⁷ “Co que eicuâte ra”, jenyechĩ nda emo nii. “Jẽicuâte”, iã nda Dios jêje chã. iCondenar jenyechĩ nda emo je jê! Dios nda condenar iã jêje chã. Emo icuã mose jêje, jêtesarei chõ eicuã si. Dios nda tesarei jẽicuã si no ña. ³⁸ Mbae jemee mee ño mbia je. Dios quia ra mbae mee tuchi jêje cote. Mee turã nda jêje. Eñetẽ nda emee eã jêje. Embisẽ ño nda emee jêje. Jê embisẽ mee mose emo je, Dios ra embisẽ mee jêje no, i que Jesús mbia mbaaquiatsu quiatu ra. ³⁹ Jesús que ejemplo saã mbia je ra. —Sã eresayã ja nyiruchoi aronea no. Ngoi ja chõ nda echoi ibicua rie. ⁴⁰ Embaaquiatusa quiarei earacua tuchi uchimbaaquiatsu si.

Embaaquiatsu ja ji mose, earacua tuchi cote. Umbaaquiatusa rã si cote. ⁴¹ iMbaerã nda “eicuã” jenyemo je re? Jê jẽicuã tuchi mose esi. “Mbae ñetẽ ndiqui nderesaa aque”, jenyechĩ nda emo je. Mbae cuasu siqui mose jendesaa jê quiatu. ⁴² “Mbae turã ndese chõ jẽingo”, jenyechĩ nda jẽingo icuã mose jê. Jêturã nda jesaã ñooñochoĩ jê. “Mbae ñetẽ tasirõ nderesa si”, jenyechĩ nda mbae cuasu siqui mose jendesaa jê. Jê nane nguia jêturã ndiqui. Aquere quiatsu jênee emo mingo turã cote.

Sã ira ae ia ae ae no

⁴³ Ira turã mose, ea abe turã ndae. Ira icuã mose, ea abe icuã ño nda eno. ⁴⁴ Sã ira ae ea ae ae no. Higo a rã eã nda nyu a no. Ea ae eno nde. Uva a rã eã nda isio rashĩ a no. Ea ae eno nde. ⁴⁵ Eĩ si chõ mbia no nde. Mbia turã nda ñee turã. Echiangui renda quia eturâte re. Nyebe eriqui nguia ñee turã. Mbia icuã nda ñee icuã no. Echiangui renda quia eicuâte riqui nguia. Nyebe eriqui nguia ñee icuã. Nandechuru achõ ñee eã nguia. Nandechiangui renda quia ñee nguia.

Tuchua nyeremo

⁴⁶ “Sererequa” jenyemo chõchĩ seje secheẽ mumba mumbare. ⁴⁷ Ae siqui serese secheẽ mumbayã nae, eturã tuchi chõ ûquĩ nde. ⁴⁸ Sã emo uchuchuarã ao no. Sã ibi ribicoi tuchi no. Sita je ngasẽ nyee. Sita arõ tuchua ao cote. Nyebe echuchua âtâte riqui nguia. Ama ndicuasus mose, iacuã irâtã ndaque echuchua ite rĩ. Tuchua mbaquiatu aroneate iacuã irâtâte raque. Sita arõ nguia ngue uchuchua ao nguia. Eĩ si chõ secheẽ mumbasa reã nde. Tuchua âtã aosa rã si. ⁴⁹ Sã emo uchuchuarã ao no. Aque quiarei ibi ribicoi tuchiã. Ibi arõchi chõ uchuchua ao nguia. Iacuã ngasẽ mose aque chuchua, mbucoi asi

que mondo ra. Eĩ si chõ secheẽ mumbasa re. Ae uchuchua saã ibi arõchi nae, aque rã si chõ ñene, i que Jesús ra.

7

Jesús soldados rerecua rimba mbucherõ

¹ Jesús cheẽ ngue tiba mbia je cote ra. Oso que Capernaum cote ra. ² Soldados rerecua mo ngue siqui hue ra. Capitán ngue ae ra. Roma jenda que ae ra. Aque rimba rasi que chi hue erese ra. Ebite que erimba ra. Erimba rasi tuchi. Mano serĩte que equia ee ra. ³ Capitán ngue jirandu Jesús rese cote ra. Ñee ngue judíos ramei je ra. —“Echu serimba mbucherõ”, i que capitán ñee ndeje ra”, jenye oso Jesús je, i que capitán nda. ⁴ Judíos ramei ngue ngasẽ Jesús je ra. — Capitán nimba embucherõ na oso ee. Capitán turãte quiatu ngue eriqui nguiã ure je. ⁵ Nandequiato turã tuchi que aque ra. Judíos quiato ja. Urechumunua nua sacua ngue ae chao tuchua ra, i que ameĩ ñee Jesús je ra. ⁶ Jesús que oso ameĩ ndese ra. Capitán nyuchua rurubi mose que capitán uquiato mo mondo Jesús robeishĩ nda. — Seicuãte se, Jesús. Sechuchua ra ereiquechĩ. ⁷ Nyebe se asoã nguiã nderea. Ndecheẽ achõ je chõ nda serimba erembucherõ. ⁸ Se abe sererecua no nde. Se echeẽ amumba aroneate. Soldados rerecua se no nde. Secheẽ abe emumbayã nguiã no. Eso, i mose, secheẽ mumbayã no. Echu, i mose, secheẽ mumbayã no. Se ñee mose serimba je, secheẽ mumbayãte no. Ndequirãcuã na eãte raque se, i que capitán ucheẽ mondo Jesús je ra. ⁹ Echeẽ andu mose que Jesús nyururate ra. Uba que ñee nguesenda je ra. —Tacheẽ nyecua jėje. Capitán seicua tuchite quia co. Israel jenda mo embuchechea aroneate quia co, i que Jesús ra.

¹⁰ Capitán nyimondo que nyebi nyoĩ uchuchúaa cote ra. Erimba mbucherõ ji que ee cote ra.

Jesús eru cheecha riirĩ ndaaque mbuquera

¹¹ Isamami ngue Jesús choi quia Naín cote ra. Echimbaaquiatu abe que nyoĩ quia erese ra. Mbia tubiriãte que nyoĩ quia erese ra. ¹² Sucha ata rurubi mose que ngasẽ mbia tubiriã je ra. I que eraaque ruruchoi quia etã sacua nda. Aque mi tuchi rei ngue cuña ndiirĩ mo nde. Eru cheecha riirĩ. Aque que mano ño ee ra. Hue jenda mbia que nyoĩ jate quia esi rese ra. Eraaque rui. ¹³ Jesús que mae esi nyeseo rese ra. Jesús ia eãte que erese ra. —¡Echeseo eã ño jẽ! i que ee ra. ¹⁴ Jesús que oco eraaque rese ra. Eruruchoisã que tiba ee cote ra. — Echuruã, Acuanindu, i que ñee eraaque je ra. ¹⁵ Eraaque que nyuruã ñee cote ra. Jesús que embuquera ji mondo esi je cote ra. ¹⁶ Mbia que nyuruirã ja erea ra. Ñee turã ja Dios riĩ. —Dios chimondo chõ co re, i que mbia quia ñee Jesús riĩ nda. —Dios riqui tesareiã nande si co, i que mbia quia nyue ra. ¹⁷ Jesús chumbucherõ ndese que mbia riqui ñimbiirandu jate ra. Judea jenda jirandu ja erese. Er-obeinda ja abe que jirandu erese ra.

Juan el Bautista mbia mondo ñee Jesús je

¹⁸ Juan abe que jirandu Jesús chiaõ rese ra. Erimba quiatu ngue embiirandu nguiã erese. ¹⁹ Nyebe Juan ñee nguiã ngũimba nyeremo je. —Nyeremo jẽso ñee Jesús je. “‘Cristo ra tu’, i bei equia nae, ¿ae chõ nde re?” jenye oso ee. “¿Cristo ra uresaarõ arõ si quia re?” jenye oso Jesús je, i que Juan ngũimba mondochoi ra. ²⁰ Juan ñimondo que nyoĩ ngasẽ Jesús je ra. —Juan el Bautista que urembu ñee ndeje

ra. ¿Cristo chõ nde re? ¿Cristo ra uresaarõ arõ si quia re no? ¿Ae chõ nde re? i que Juan nimba ñee Jesús je ra. ²¹ Juan nimba ngasête mose que Jesús riqui mbia rasi mbucherõ cherõ nda. Erasi chumumbara. Erasi cuabê. Aba checuayã icuã abe que embusê mbusê nguia mbia si ra. Eresayã abe que embu cherõ nyerõ nguia ra. Juan nimba que mae ja quia ùqui mbucherõ ndese ra. ²² Jesús que ñee Juan nimba je ra. —Ae rese jemae nae, ùqui jēsenei oso Juan je. Ae jeñandu nae, ùquiabe no. “Jesús que eresayã mbucherõ nyerõ nguia ra. Ecuatayã abe mbucuata cuata. Eire ndasi abe mbucherõ nyerõ. Eisayã abe mbucherõ nyerõ. Eraaque abe mbuquera. Ucheẽ turã esenei senei tuchi mbaecha reã je”, jenyee oso Juan mbiirandu. ²³ Emo hui jei eã mose sesi, aque iate ra siqui cote, i que Jesús ucheẽ mondo Juan je ra.

²⁴ Juan ñimondo que nyoï nyebi ee cote ra. Jesús que ñee mbia ja je Juan nñi cote ra. —¿Mbae rese mae jêso turúquiaa re? ¿Quiririã idioi ichu ichu rese jêso mae nde? ²⁵ ¿Mbae rese mae jêso re? ¿Emo irao turã ndese jêso mae nde? Tei. Eirao turã siquiã nguia turuquia ñi. Ae siqui quia mbia rerecua chuchua nae, ùqui ño eirao turã ndiqui nguia. ²⁶ Juan ndese mae ño ngue jêso turúquiaa resê. Dios cheẽ nenei neneisa tuchi chõ ae emo si re. Ae chõ mbia mingoquiātu quiātu nguia se ñee sacua ee aque. ²⁷ Sã embesa ji riqui ñee no: Secheẽ nderaosa tamondo nderêta. Ae ra mbia mingoquiātu ndeje, i que embesa ji ñee nda. Juan nñi ño embesa ji ñee nguia. ²⁸ Juan el Bautista quiarei i tuchi raque mbia ñiinda ja si. Dios cheẽ nenei neneisa ataque si. Ae ra siqui tuchi Dios rese erimbarã cote nae, ùqui nguia ra i tuchi Juan si cote, i que Jesús ñee

nda. ²⁹ Mbia que Jesús cheẽ ñandu turã ja ra. Impuestos isi isiquia abe chee que echeẽ ñandu turã nda. —Dios turã tuchi, i ja que mbia ra. Juan ngue bautizar i ja ee nyii ra. ³⁰ Fariseos achõ ño ngue Jesús cheẽ isi sereã nda. Embesasa rese. Ûqui ngue siqui sereãte Dios cheẽ ndese ra. Nyebe Juan bautizar i eã nguia ee.

³¹ Jesús que ñeembe ee ra. —Mbia namonda siqui turã eãte quia aba cheẽ ndui ã. Mbia riirĩ na ño eriqui nguia. ³² Sã mbia riirĩ ndiqui ñumbusarei sarei no. Sã eriqui ñee ñee nyue no. “Flauta que asaã saã ndei jêje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue asaã ndei jêje resê. ¿Mbaerã jêyate erese re?” sã i chõ mbia riirĩ nyue no. Ûqui na si chõ jẽingo nguia aba cheẽ mumba ã. ³³ Juan el Bautista que tu rei jêje ra. Jẽisi turã eã ngue ra. “Co eriqui quiaru sereãte nanderese co. Co eriqui mbae mbei sereãte nanderese co”, jenyee chõchĩ ee. “Aba checuayã ndesenda”, jenyee chõ ngue ee ra. ³⁴ Se abe que achu rei jêje ra. Aquiaru rei quia jendese co. Mbae abe ambei rei quia jendese co. Se abe que jê seisi turãya nda. “Quiaru tuchi je”, jenyee chõchĩ seje. “Mbae mbeisa”, jenyee chõ ngue seje no nda. “Mbia icuã quiato chõ ñene”, jenyee que seje resê. ³⁵ Ae earacuate nae, Dios aracua abe ra eicua, i que Jesús mbia je ra.

Jesús quiaru fariseo chuchua

³⁶ —Nandequiaru sechuchua, i que fariseo mo ñee Jesús je ra. Jesús que oso erese ra. Ngoi que quiaru nonde ra. ³⁷ Cuña icuã mo ngue siqui hue jenda huee ra. Jirandu que Jesús rese ra. Oso que erea cote ra. Aba mbushimbua que equerao erea ra. (Sita ao ji rei aba mbushimbua riru.) ³⁸ Jesús quite quti que eñi nyeseo ra. Nguesari

je que Jesús i irei irei ra. Ua je que embiiru iru cote ra. Uchuru que embucha Jesús i rese eriite ra. Aba mbushimbusa que eicherê ei rese cote ra. ³⁹ Jesús mbuquiarusa que ñee nguia uchiangui re ra. —¿Mbaerã Jesús ñee asiã cuña icuã je re? Jesús Dios riirĩ mose, i nda ñee asi rei ee, i que fariseo uchiangui re ra. ⁴⁰ Jesús que ñee fariseo je ra. —Tacheê ndeje, Simón, i que ee ra. —Eno. Echeê seje no, Sererecua, i que fariseo ee ra. ⁴¹ Jesús que ñee ee ra. —Sã mbia nyeremo deber i ererecua mo je no. Sã enongue deber i ee quinientos no. Sã enongue deber i ee cincuenta no. ⁴² Ũquĩ ja que pagar i aronea ja. Nyebe ererecua ñee nguĩã ee. “Mbae jemondo eã ño seje”, sã i chõ ererecua ee no. ¿Aba eya tuchi nguerecua rese re? i que Jesús ñee Simón je ra. ⁴³ Simón ngue ñee ee ra. —Ae deber i tuchi ee nae, aque eya tuchi erese cote reae, i que Simón ee ra. —Ae bei, i que Jesús ñee ee ra. ⁴⁴ Jesús que mae cuña ndese ñee Simón je ra. —Ndechuchúaa sei que mose que sei ereirei eã nda. Co cuña nguia tu que sei irei nguesari je ra. Ua je que sei mbiiru ra. ⁴⁵ Nde quia tu que seritii eresiite eã ndesê. Cuña nguia tu que sei siite nguĩã. ⁴⁶ Nde que aba mbushimbusa ereichereã sea rese resê. Cuña nguia tu ngue aba mbushimbusa icherê nguĩã sei rese. ⁴⁷ Tacheê nyecua ndeje, Simón. Cuña icuã tuchi raque. Eicuã ngue ambutiã ee namo nda. Nyebe eriqui nguĩã nyesecua tuchi serese a. Ae “seicuã eã jiri se”, i quia nae, ũquĩ nguia ra nyesecua eã jiri serese. Se eicuã ambutiã ndaque, i que Jesús Simón je ra. ⁴⁸ —Ndeicuã ngue ambutiã ndesi ra, i que Jesús ñee cuña je cote ra. ⁴⁹ Ae que chi quiaru erese nae, ũquĩ ngue ñee nyecuayã cuayã u nyue ra. —¿Mañi nda Jesús mbia icuã mbutiã esi re? i que eu ñee ñee nyue

ra. ⁵⁰ Jesús que ñee cuña je ra. —Seicuasa chõ nde re. Nyebe arerirõ nguĩã ndeicuã si. Ereico bei ra cote. Ndeya eso cote, i que Jesús cuña je ra.

8

Cuña mo nyoĩ ngata Jesús rui mbae raã naa ee

¹ Jesús que sucha tubiriã mbuchesea sea quia ra. Dios cheê turã ngue esenei senei nguia mbia je ra. Echimbaaquiatu doce abe que ngata quia erese ra. ² Cuña echimbucherõ mo abe que ngata quia erese ra. Ae si aba checuayã icuã ndirõ nyii, ũquĩ mo abe que ngata quia erese ra. María Magdalena que ngata quia erese ra. Ae si aba checuayã siete rirõ nyii nae. ³ Juana abe que ngata quia erese ra. Chuza ninisi que aque ra. Herodes resenda rei Chuza. Susana abe que ngata quia erese ra. Cuña ata que ngata quia erese ra. Ũquĩ ngue umbae mee mee mbei quia Jesús je ra.

Emo mbae eĩ mombiquia mbiqui

⁴ Mbia que ngaẽ ngaẽ ja quia Jesús rea ra. Suchamo jenda abe. Mbia ñumunua ja mose que Jesús ejemplo raã ee ra. ⁵ —Sã emo si mbae eĩ mombiquia mbiquia no. Emombiquia mbiquia mose sã emo uqui uqui ñeenda rui no. Sã mbia riqui irõ irõ erese no. Sã nguireĩ abe eu chee no. ⁶ Sã emo uqui uqui sita arõ no. Sita aronda suri raque. Ibi irute quia ee re. Nyebe ñimama nguĩã mano. ⁷ Sã emo ndiqui uqui uqui nyu réndaa no. Sã nyu abe suri erese no. Nyu ruri que echati asi u eriquisã nda. ⁸ Sã emo uqui uqui ibi túraã no. Ũquĩ nguia tu que ia turã nda, i que Jesús mbia je ra. Aquere que ñee asite mbia je ra. —Jëisa mose jsecheê jeñandu turã na! i que Jesús mbia je ra.

9 —Eresenei ngue mbae eĩ nii, ñquĩ embiasa turã na ure je, i que echimbaaquiatu ñee ee ra. ¹⁰ Jesús que ñee ee ra. —Mbia rerecua tuchi quiaiei Dios. Ae riqui nguiã ucheẽ mbiase asa ja jẽje co. Mbia ataque quia siqui sereã erese co. Mbia ataque je quia eriqui nguiã ucheẽ mbiase eã jiri. Ejemplos achõ esenei senei nguiã ee co. Eanduchõ sacua. Eicua turã ndocoĩ.

Jesús ucheẽ mbiase uchimbaaquiatu je mbae eĩ nii

¹¹ Secheẽ tambiasa jẽje cote. Dios cheẽ na si chõ mbae eĩ nde. ¹² Ae uqui uqui ñeenda rui nae, ñquĩ ndei mbia Dios cheẽ andu chooñosa rã ñquĩ. Ae Dios cheẽ andu chooño nae, ñquĩ ñiangui si chõ diablo riqui nguiã Dios cheẽ ndirõ. Nyebe eriqui nguiã Dios icuayã mbei. Nyebe Dios riqui nguiã emingo bei eã. ¹³ Ae uqui uqui sita arõ nae, mbia mo na ño ñquĩ no nde. Dios cheẽ andu mose, isi turã ndaque. Eyate raque erese. Mbae mo embiayã mose, hui jei chõ esi cote. Mbae rao eã naanguia chõ ñquĩ nde. ¹⁴ Ae uqui uqui nyu réndaa nae, mbia mo na ño ñquĩ no nde. Dios cheẽ andu turã ndaque. Siqui bei eã ño nguiã erese. Umbaerã achõ ndese chõ eriquichĩ nguiã ndua. Ñimbusarei sarei bei chõchĩ nguiã. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbei ee. ¹⁵ Ae uqui uqui ibi túraã nae, mbia mo na ño ñquĩ no nde. Echiã quishĩ ño ñquĩ nde. Dios cheẽ andu mose, siqui bei erese. Ia ia bei raanguia cote.

Tata rendi mbia resae ja

¹⁶ Sã nandeico lamparina mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii nguiã. Mbia resae ja sacua. ¹⁷ Mbae checuayã nda nyecua ja emo mose. Ñeminde ra nyecua ja.

¹⁸ Secheẽ jeñandu tuchi. Aba mo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi.

Jesús nongue ngaẽ erea usi rese

¹⁹ Jesusi que ngaẽ ndei ee ra. Jesús nongue ja rese. Mbia tubiriãte que esiquisãte esi ra. ²⁰ —Hue ndesi riqui nderequia taicuee hue. Ndenongue rese, i que mbia Jesús mbiirandu ra. ²¹ Jesús que ñee mbia je ra. —Ae Dios cheẽ andu turã nae, ae Dios cheẽ mumbayã nguiã nae, ñquĩ je chõ aico nguiã “senongue” i. Ñquĩ je chõ aico nguiã “taĩ” i no, i que Jesús ñee nda.

Jesús quiririã icuã icuã mbutiba; ama ndebera abe

²² Emo mose que Jesús ua canoa ye ra. Uchimbaaquiatu ja rese. —Nyao ama ndisha robei, i que Jesús ee ra. Nyoi que cote ra. ²³ Ama ndisha rasa mose que Jesús si quia uque ra. Ama ndiite re mose que quiririã icuã icuã ndu ee ra. I rebera que ique tuchi quia canoa ye ra. Nyebe canoa ñiimi serĩ tuchi nguiã ee. ²⁴ Nyebe mbia Jesús mumba nguiã. —Urembaaquiatusa, echumumba. Nandemanochĩ nda re, i que ñee Jesús je ra. Jesús que nyuruã cote ra. Ñee quiririã je. Ama mbutiba. Quiririã ngue ti i ee cote ra. Ama abe que ti i no nda. ²⁵ —¿Mbaerã jẽingo siquichete re? ¿Seicuayãte equia re? i que Jesús uchimbaaquiatu je ra. Siquiche bei que equia ra. Nyuruira tuchi Jesús quirirãcuã ndese mae. —Quiririã Jesús cheẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea Gadara jenda mo si

²⁶ Ngasẽ nyee que sobei ra. Gadara, i que hue ibi je ra. Galilea mbuchecha tuchi que huee ra. Ama ndisha rasa. ²⁷ Canoa si Jesús

nguichi mose, hue jenda amei mo ngue tu ee ra. Aba checuayã icuã ngue siqui quia echiangui re ra. Cosete ngue eriqui rei nguia echiangui re. Eirao eã mbei que eriqui ra. Tuchiaqui re que eriqui uqueã nda. Mbia raaque tãsa bei chõ eriqui nguia. ²⁸ Tu que ngoi nguia ndese Jesús resa quti ra. Ñee asite que eu ee ra. —¿Mañi ere ra seje re, Jesús? Dios ibatenda riiri ño nde re. ¡Sembasichĩ nda se jẽ! i que ñee tuchi Jesús je ra. ²⁹ —Esẽ esi, i chõ Jesús aba checuayã icuã je reaẽ. Aba checuayã ño aque amei isi isi bei quia embicuã icuã neaẽ. Mbia eo cuaacua raque quia cadenas je. Ei abe cuaacua raque no. Ucuasa ndoso ndosochõ mbei que equia ra. Aba checuayã ño equerao rao quia turuquia ñi neaẽ. ³⁰ —¿Mañi ndeje re? i que Jesús ñee ee ra. —Etubiriã, i que seje ra. Ure cuabẽte quia ure re, i que aba checuayã ñee Jesús je ra. ³¹ —Uremondochĩ nda tata cuasu, i que aba checuayã ñee tuchi Jesús je ra. ³² Chiasu socoi tubiriã ngue chi quiaru huee ra. Sita ibate rese. Nyebe aba checuayã ñee Jesús je. —Chiasu chiangui re ureso rã, i tuchi que equia ñee Jesús je ra. —Eno, i que Jesús ee ra. ³³ Aba checuayã icuã ngue usẽ ja amei ñia si cote ra. Chiasu chiangui re que echoi ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

³⁴ Chiasu raarõsa que chi mae erese ra. Emundite que ra. Nyoĩ que uchã mbia mbiirandu ja chiasu rese ra. Sucha tubiriã jenda mbiirandu. Mbia ataque abe mbiirandu no. ³⁵ Mbia que ngaẽ ja mae erese ra. Huee que Jesús riqui beite ra. Ae rese aba checuayã ndiqui nyii amei nae, aque abe que chĩ ngoi Jesús i jii ra. Huĩrao resebe cote. Earacuate que mbia je cote ra. Nyebe mbia nyuruira tuchi

nguia erea. ³⁶ —Jesús que amei mbucherõ aba checuayã ndirõ esi ra, i que maesa erese ñee mbia ataque je ra. Maesa erese que esenei ja mbia je ra. ³⁷ Mbia hue jenda que siquiche ja Jesús si cote ra. —Eso rã urerecha urerecua si, i ja que hue jenda ñee Jesús je ra. Nyebe Jesús ua nguia canoa ye. Oso que nyebi sobei cote ra. Gadara recha. ³⁸ Ae rese aba checuayã ndiqui nyii nae, aque que ñee Jesús je ra. —Nderese taso bei, Jesús, i rei que ee ra. Jesús que ñee ee ra. ³⁹ —Eso chõ ndechuchúaa. Mbae esenei ja nderesenda je. “Dios que sembucherõ nda”, ere oso mbae renei nenei ja nderesenda je, i que Jesús ee ra. Umbucherõsa renei nenei ngue oso mbia ja je cote ra. Jesús renei nenei ja sucha jenda ja je.

Jesús Jairo riiri mbucherõ; ari mo abe mbucherõ

⁴⁰ Jesús chebi si mose sobei si, mbia que chi eraarõ arõ nda. Ũquĩ nguiatu que eisi turãte ra. ⁴¹ Emo ngue tu ñee Jesús je ra. Jairo, i que ee ra. Judio munua nuasa que ae ra. Jesús i jii que ngoi ñee ee ra. —Nyao rã sechuchúaa. ⁴² Seriiri nguasu jiri si quia mano serite seje qui. Seriiri mĩ tuchi se, i tuchi que Jesús je ra. Jesús que oso erese ra. Mbia cuabẽ ngue nyoĩ ja erui ra. Jesús mbiitãyate que echoi quia ra. ⁴³ Ari mo abe que oso quia mbia ite rĩ nda. Eruqui nda uchẽ uñe mbei quia ee ra. Doce años nyee nda eruqui tibayã mbei ee ra. Aba mbucherõsa abe nda embucherõ aroneate quia ee ra. Ari umbae mondo mondo ja raque quia ee. ⁴⁴ Ari que tu Jesús quite quti erichã nda. Eirao ai rese que oco ra. Aque mose tuchi que eruqui tiba ee cote ra. ⁴⁵ —¿Aba oco serese re? i que Jesús mbi je cote ra. —Tei. Aba ãte, i ja rei que

mbia ee ra. Pedro que ñee ee ra. — Mbia tubiriâte nyeresê. Mbia cuaẽ nguia ñimaña maña jate co resê. ¿Mbaerã ereico “¿aba oco serese re?” i re? i que echimbaaquiatu ñee ja ee ra. ⁴⁶ Jesús que ñee ee ra. — Tei. Emo ngue oco serese ra. Sequirãcuã ngue emo mbucherõ nda i que Jesús ra. ⁴⁷ — Jesús jiran- duchĩ serese, i que ari uchiangui re cote ra. Nyebe ngoi nguia nguia ndese Jesús resa quti. Titi titi i ete que ra. Ñee nyecua que ee ra. — Sembucherõ sacua ño aoco nguia nderese. Aque mose tuchi chõ acherõchĩ, i que ari erenei ja Jesús je ra. Mbia que echandu ja u ra. ⁴⁸ Jesús que ñee ee cote ra. — Seicuasa chõ nde re. Nyebe arembucherõ nguia. Ndeya tuchi eso cote, i que Jesús ee ra.

⁴⁹ Jesús cheẽ mosete que emo ndu Jairo chuchua si ra. — Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee Jairo je ra. ⁵⁰ Jesús que echandu ra. Ñee ngue Jairo je ra. — ¡Ndeya eã techĩ nda jẽ! Seicua chõ se. Nderiirĩ nda quera si, i que eru je ra. ⁵¹ Ngasẽ ngue echuchúaa cote ra. Jesús que ique eraaque rea cote ra. Pedro rese. Jacobo abe rese. Juan abe rese. Eraaque ru abe rese no. Esi abe rese. Uquĩ achõ ngue emingue ra. ⁵² Mbia que chi ja nyeseo ãquẽ ndese ra. — Jenyeseochĩ nguia. Mano eã ño ñene. Uque chõ ñene, i que Jesús ñee mbia je ra. ⁵³ Mbia que iquia Jesús cheẽ mose ra. — Eraquete nyeresê. ¿Mañi nda nyuruã nde? i que mbia ra. ⁵⁴ Jesús que eraaque o isi ra. — Echuruã na, Echo, i que ñee asite ee ra. ⁵⁵ Quera si que nyuruã cote ra. — Nderiirĩ embuquiaru cote, i que Jesús ee ra. ⁵⁶ Eru que nyuruira tuchi mae erese ra. Esi abe nyuruira tuchi. — ¡Emo nda jembiiranduchĩ jẽ! i que Jesús ee ra.

9

Jesús uchimbaaquiatu doce mondo ucheẽ nenei nenei sacua

¹ — Jenyu, i que Jesús uchimbaaquiatu doce je ra. Uquirãcuã ngue emee mee ee ra. Aba checuayã icua jea jea sacua mbia si. Mbia rasi mbucherõ cherõ sacua. ² — Jẽso Dios cheẽ nenei nenei mbia je. Jẽso mbia rasi abe mbucherõ cherõ. “Mbia rerecuarã tuchi ra Dios cote”, jenyẽ oso secheẽ nenei nenei mbia je. ³ Mbae mo nda jendaochĩ icua. Jenyitochoquia ra jendaochĩ. Mbae riru mo abe ra jendaochĩ no. Jenyĩurã mo nda jendaochĩ no. Mbae isiquia mo abe ra jendaochĩ no. Jẽirao nongue abe ra jendaochĩ no. ⁴ Emo nyuchúaa jengue mose, hueechõ ño jẽingo uque. Jemba jembatechĩ nda uque tuchua raamba amba. Hue si chõ jẽso sucha tubiriã mo secheẽ nenei nenei cote. ⁵ Sucha tubiriã mo jenda jẽisi sereã mose, jẽsecha chõ. Jẽi tubi jembutomo tomo ee. Hue jenda huiçuã icua sacua, i que Jesús uchimbaaquiatu je ra. ⁶ Echimbaaquiatu que nyoĩ choi bei quia sucha tubiriã mbuchesea sea ra. Dios cheẽ turã nenei nenei mbia ja je. Mbia rasi mbucherõ cherõ no.

Mbia Juan el Bautista iquia

⁷ Herodes abe que jirandu Jesús chiao rese ra. Embusiquichete que ra. Emo ngue ñee ndei ee ra. — Ae ereiquia nae, Juan i equia ee nae, aque que quera si ra, i rei que emo ñee Herodes je ra. Juan Jesús riqui reĩ nguia mbia je. ⁸ Elías Jesús riqui reĩ nguia emo je no. — Dios cheẽ nenei neneisa ima quera si je chõ ñene, i rei que emo emo Jesús rĩ no nda. ⁹ Herodes que ñee nda. — Juan ãquĩ ngue achisiamo tuchi. ¿Mañi nda quera si re? ¿Aba Jesús re? Ae rese aico jirandu tuchite. Tamae erese no, i que ndua ndua uchiangui re ra.

Jesús mbichae mbeta tuchi mbia je

¹⁰ Jesús chimondo ucheẽ nenei neneisa que nyebi ngaẽ ee ra. —Ã ngue uresaã saã nda, i que mbae renei ja Jesús je ra. Mbia tiámbaa que Jesús ùquĩ nderao ja rei ra. Betsaida rurubi jiri. ¹¹ Mbia ataque jirandu mose que nyoĩ erui ra. Jesús que eisi turã Dios cheẽ nenei nenei ee ra. Erasi abe mbucherõ cherõ ee. ¹² Tenda oso mose que echimbaaquiatsu ñee ndei ee ra. —Mbia emondo rã sucha tubiriã nia. Sã echoĩ bei quiaru huee. Uque bei abe huee no. Mbae áte nandecu a, i rei que echimbaaquiatsu Jesús je ra. ¹³ —Jeño mbae jemondo ee echĩurã, i que Jesús ee ra. —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatsu Jesús je ra. ¹⁴ Mbia tubiriã tuchi que chi ra. Cinco mil ndobei. —Mbia jembucoi ja ñno íbii. Eata jaaja jeñono mbucoi. Sã echĩ ngoi icúe cúe cincuenta jaaja, i que Jesús uchimbaaquiatsu je ra. ¹⁵ Jesús cheẽ nguire que ngoi ja cote ra. ¹⁶ Jesús que mbichae sirõ cote ra. Sira abe rirõ. Mae ngue ibate ra. —Gracias, i que ñee Dios je ra. Mbichae que esiquio quio ra. Sira abe no. Mondo mondo ja que uchimbaaquiatsu je cote ra. —Jembuchao chao mbia tubiriã je cote, i que Jesús ra. ¹⁷ Mbia que embuquiaru ja tuchi ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra.

Cristo chõ nde resẽ, i Pedro Jesús je

¹⁸ Emo mose que Jesús ae riqui ñee ñee Dios je ra. Echimbaaquiatsu abe que chi huee ra. —¿Aba aico reĩ mbia je re? i que Jesús ee ra. ¹⁹ Echimbaaquiatsu que ñee ee ra.

—Juan el Bautista ereico reĩ nguĩã emo je co. Elías ereico reĩ nguĩã emo je no. Dios cheẽ nenei neneisa quera si je ereico reĩ nguĩã emo je no, i que echimbaaquiatsu ee ra. ²⁰ —¿Aba aico reĩ jẽje co re? i que Jesús ee ra. —Cristo chõ nde resẽ. Dios ririĩ ño nde resẽ, i que Pedro Jesús je ra.

Mbia ra seiquia, i Jesús uchimbaaquiatsu je

²¹ —Ùquĩ nda jeñeechĩ emo je jẽ, i tuchi que Jesús ee ra. ²² Jesús que uchimbaaquiatsu mbaaquiatsu quiatu ra. —Mbiarã ngue Dios sembu ra. Mbia ra sembasi mbasi tuchi. Amei nda hui ja sesi. Sacerdotes rerecua abe ra hui ja sesi. Embesasa abe ra hui ja sesi. Mbia ra seiquia chee. Tres tenda mose ra aquera si, i que Jesús mbia ei quia nonde ra.

²³ —Emo siquise mose serui, sã hui ja mbae ubi si. Sã cruz umbaerã ndui bei se rã si. Sã eriqui serui cote. ²⁴ Emo ndua bei mose nguenco rese, ereco ra ua esi. Emo hui mose nguenco si seje, ùquĩ nda siqui bei. ²⁵ Emo nguenco mumba chooño mose, eya eã mbei rae. Mbaecha rete raque. ²⁶ Emo ireĩ ireĩ mose sesi, se abe chõ nda aireĩ ireĩ esi. Emo ireĩ ireĩ mose secheẽ si, se abe chõ nda aireĩ ireĩ esi, sechu mose mbia rerecuarã. Dios quirãcuã nda sembu. Angeles rese ra achu aque mose. ²⁷ Tacheẽ nyecua jẽje. ã jẽingo serese ã nae, jemo nda jemaẽ Dios quirãcuã ndese jemanõ nonde. Mbia rerecua tuchi ra Dios, jemo mano nonde, i que Jesús ee ra.

Jesús nyĩcabo uchimbaaquiatsu je

²⁸ Ocho tendare que Jesús choi sita ibátee ra. Ñee sacuaã Dios je huee. Pedro que oso erese ra. Jacobo abe. Juan abe. ²⁹ Jesús ñee mose Dios je que eruba ñimbiasu ra. Eirao abe que enininya ra. Eiraoshĩ

nininya tuchi que ra. ³⁰ Mbia ny-
eremo ngue nyecua u ibate si ra.
Jesús nininya mose que eriqui ñee
ñee nyue erese ra. Moisés que
enongue ra. Elías que enongue
no nda. ³¹ Ũquí ja que enininya
Jesús rese ra. —Mbia ra Jesús
iquia mbucha ira rese Jerusalén, i
que equia ñee nyue ra. ³² Pedro
reesite raque. Eresenda abe reesi
esite raque. Uqueã mbei quera.
Jesús nininyate quiatu ngue ee
re. Moisés abe nininyate quiatu
ngue ee re. Elías abe nininya no.
³³ Ibatenda que nyoí quia Jesús
recha cote ra. —¿Manyae ra ñee
Jesús je re? i que Pedro ra. Nyebe
ñee iru chô nguã ee. —Nandecu
turãte aa, Sembaaquiatusa. Sucha
ñetê uresaã saã na. Enongue nem-
baerã. Enongue Moisés mbaerã no.
Enongue Elías mbaerã no, i rei que
Pedro ñee Jesús je ra. ³⁴ Pedro cheẽ
mosete que ibeishĩ ndu eite ñi nda.
Ibeishĩ ngue Moisés mbuchecuayã
ee ra. Elías abe mbuchecuayã ee.
Nyebe esiquiche nguã. ³⁵ Echeẽ
mo ngue echandu ibeishĩ qui re
ra. —Co rei sebi tuchi seriirĩ co.
Echeẽ jeñandu bei quã, i que Dios
ee ibeishĩ qui re ra. ³⁶ Aquere que
Jesús mĩ ndiqui uchĩmbaaquiatsu
rese ra. Umaesa que esenei eã ja
emo je ra. Ñee áte que emo je ra.

*Jesús aba checuayã jea mbia riiri
mo si*

³⁷ Isamamĩmbe que ecuaẽ
nguichi sita ibate si ra. Mbia tubiriã
ngue ngaẽ Jesús rea ra. ³⁸ Ũquí
mo ngue ñee Jesús je ra. —Seriirĩ
ndese emae, Urembaaquiatusa.
Seriirĩ mĩte que se co ra. ³⁹ Aba
checuayã icuã ndiqui eisi isi co.
Embaasẽ asẽ mbei. Emburiri riri.
Echuru mbichoi. Erete munumbi
numbi. Aba checuayã hui sereã
mbei seriirĩ si. ⁴⁰ “Aba checuayã
embusẽ seriirĩ si”, ae rei ngue
ndechĩmbaaquiatsu je re. Embusẽ
aroneate esi, i que eru ñee Jesús je

ra. ⁴¹ —¿Mañi jenye quia seicuayãte
re? ¿Secheẽ jemumba tuchi chô
nguia re? ¿Ñimbirãcuã mbeite ra
aba quia jẽje re? i que Jesús ñee ee
ra. —Nderiirĩ eru rã seje, i que eru
je cote ra. ⁴² Jesús rurubite mose
que aba checuayã eriirĩ mbucoi
mondo ra. Mburiri tuchi que ra.
Jesús que ñee asite aba checuayã
icuã je ra. Eriirĩ ngue embucherõ
nda. Embucherõ ji que emondo
eru je cote ra. ⁴³ Dios quirãcuã
ndese mae ngue mbia nyuruira
tuchi ra.

Mbia ra seiquia, i si Jesús

Jesús chiao rese mae ngue
mbia nyuruira tuchi ra. Mbia
nyuruira mose que Jesús ñee
uchĩmbaaquiatsu je cote ra. ⁴⁴ —
Mbiarã ngue achu ra. Mbia ra
semee mbia icuã je. Serĩcharã.
Ũquí si ra jẽtesareichĩ, i rei que
Jesús uchĩmbaaquiatsu je ra.
⁴⁵ Echĩmbaaquiatsu que Jesús cheẽ
icuayãte ra. Echecuayãte que ee ra.
—Ndecheẽ embiasa ure je, iã ngue
ñee ee ra. Ireĩ ireĩ ño ngue ñee ee ra.

*Ererecua tuchi ra se, i jaaja Jesús
chĩmbaaquiatsu nyue*

⁴⁶ —Se quia ra ererecuarã tuchi
jẽsi, i jaaja que echĩmbaaquiatsu ñee
nyue ra. Ñee icuã icuã nyee nyue.
⁴⁷ Jesús que ũquí ndua ndua icuate
ra. Nyebe ãquẽ mo mbucoi mĩ
nguã ujii. ⁴⁸ Jesús que ñee ee ra.
—Sã ãquẽ mo ndiqui siquĩ mingue
no jẽ. Ae eturã ndiqui mbia ri-
irĩ je serĩ nae, seje abe chô eturã
ndiqui nguã. Ae eturã ndiqui seje
nae, semondosa je abe chô eturã
ndiqui nguã. Ae ererecua sereãte
riqui jemo nae, ũquí nguia sebi re.
¿Mbaerã jẽingo “ererecuarã se” i
nyue re? i que Jesús ee ra.

*Emo icuã eã mose nande je, nan-
deresenda chô ũquí nde*

⁴⁹ Juan ngue ñee Jesús je ra. —
Pe emo nyi aba checuayã ndirõ

ndirõ mbia si nderĩ pe. Uremae ngue erese ra. Aque eriqui âte nanderese aque. Nyebe uresiquisã nguiã, i que Juan Jesús je ra. ⁵⁰ Jesús que ñee ee ra. —Tei. ¡Jēsiquisã quisãchĩ nda jẽ! Emo icuã eã mose nande je, nanderesenda chõ ãquĩ nde, i que Jesús ñee ee ra.

Jesús ñee asi Jacobo je; Juan abe je

⁵¹ —Namo jiri ra aso ibate cote, i que Jesús ndua ndua cote ra. —Taso Jerusalén, i tuchi que equia ra. ⁵² Jesús que mbia mo mondo unonde ra. ãquĩ ngue ngasẽ sucha tubiriã mo nda. Samaria jenda rei sucha. —Jesús ra uque aa jendese, i rei que hue jenda je ra. ⁵³ Hue jenda que Jesús isi turã sereãte ra. —Jerusalén Jesús si quia qui reae. Nyebe ureico nguiã eisi sereã aa, i que hue jenda ñee icuã Jesús chimondo je ra. ⁵⁴ Jacobo jirandu mose que paama i hue jenda je ra. Juan abe que paama i hue jenda je ra. ãquĩ ngue ñee Jesús je ra. —Sã Elías tata mbu ibate si mbia icuã je cose no. ¿Eĩ ure si ra tata mbu ã iquia sacuã nde? i que echimbaaquiatu ñee Jesús je ra. ⁵⁵ Jesús que uba ñee asite ee ra. —Jēsecha chõ. Aba mingosa riirĩ ño jēingo ã ndesẽ. ¿Jētesarei chõ nguia ãquĩ si re? ⁵⁶ Mbia iquia sacuã ngue achuã ndesẽ. Mbia mingo bei sacuã ño ngue achu nguiã, i que Jesús ra. Sucha tubiriã mo ngue echoi cote ra.

Jesús rui taico, i raque emo

⁵⁷ Jesús ngata mose que mbia mo ñee ee ra. —Taico bei nderese. Ndeso mose manguiti, se abe ra aso bei quia nderese, i que ñee Jesús je ra. ⁵⁸ Jesús que ñee ee ra. —¿Mbae rasi ra eresaã saã seresẽ re? Eoita quia ecua jiri re. Nguirei nguia equisa jiri no nde. Se quia sequisayã mbei re, i que Jesús ee ra. ⁵⁹ —Serui eico bei, i que Jesús emo je ra. —Sã seru mano na. Aquere quia ra

aico bei nderui, i rei que aque ñee Jesús je ra. ⁶⁰ Jesús que ñee ee ra. —Sã mbia ataque chõ nderu chati. Nde quia eso Dios cheẽ nenei nenei mbia je, i que Jesús ee ra. ⁶¹ Emo ngue ñee Jesús je ra. —Aico jee ra nderui. “Co acua quia co”, tae rã oso sechuchua jenda je, i que ñee Jesús je ra. ⁶² Jesús que ñee ee ra. —“Achu jirichĩ nguia Jesús rui”, i mose sequiato mo, aque ra ngaseã Dios je, i que ra.

10

Jesús mbia setenta mondo ucheẽ nenei nenei sacuã

¹ Aquere que Jesús mbia setenta irabo no nda. —Serẽta chõ jẽso jẽso quia sucha mbuchesea sea, i que ee ra. Nyeremo nemo ngue embuchao chao quia mondo ra. ² —Secheẽ andusa reã ndei etubiriã. Secheẽ nenei neneisa rei co mii jiri. “Dios, ndecheẽ nenei neneisa mo emondo tuchi. Mbia mbiirandu randu sacuã”, jenye chõ nguia Dios je. Sã echa mbae a ishao shaosa mondo ea ireĩ mose no. ³ Jẽso cote. Sã nyacua icuã ndiqui oveja je no. Eĩ si ra mbia icuã icuã jẽje. Nyacua rã si. ⁴ Jẽochi chõ jẽso. Mbae riru ra jendaochĩ. Mbae isiquia abe ra jendaochĩ no. Jēiyao abe ra jendaochĩ. Jēitõ itõchĩ nda ñeenda cúa ñee sacuã mbia je. ⁵ Jēique mose emo nyuchúaa, jeñee turã huee tuchia jenda je. “Dios nda jembia bei quia chã”, jenye hue jenda je. ⁶ Hue jenda ia mose Dios rese, Dios ra siqui tuchi erese. Eya eã mose Dios rese, emo je quia jeñee. ⁷ Jemba jembatechĩ nda uque tuchia raamba amba. Jengue mocoĩ jiri quia huee. Ae hue jenda u u quia nae, jẽ abe jẽu quia erese. Jēingo mose secheẽ nenei nenei mbia je, sã mbia mbae mondo mondo jẽje. ⁸ Sucha tubiriã jenda jēisi turã mose, jēquiaru quiaru erese.

⁹ Hue jenda ndasi jembucherō ny-
erō ee. Hue jenda je secheē jēsenei
senei. “Namo jiri ra jenderecuarā
Dios cote”, jenye chō hue jenda je.
¹⁰ Sucha tubirā jenda mo jēisi sereā
nea mose, jeñee asi ee etaicúee.
¹¹ “Urei tubi urembutomo nguia
jendique jie a. Jētesareiā sacuā ure-
cheē si. Jenderecuase rete raque
Dios. Jēisiā ñochĩ”, jenye chō hue
jenda mbiirandu. ¹² Se mbia icuā
mbasi mbasi mose, hue jenda ra
ambasi mbasi tuchi Sodoma jenda
si.

*Jesús ia eā mbia sucha tubirā
jenda rese*

¹³ Seya eāte jendese, Corazín
jenda. Seya eāte jendese, Betsaida
jenda. Jendasi tuchi chō ndae.
Mbia mae sayā ngue asaā saā jēje
nae, ũquĩ naa mose Sidón jenda je,
eĩ nda hue jenda huĩcuā ndecha
rei. Eĩ nda Tiro jenda abe huĩcuā
ndecha rei. Eĩ nda eya eāte rei
huĩcuā ndese. ¹⁴ Jē nguia jēicuā
jēsecha sereāte rei. Nyebe ra Dios
jembasi mbasi tuchi ũquĩ si quiatu.
Dios mbia icuā mbasi mbasi mose.
¹⁵ Jēcuasu jēsaā saā tuchi techĩ nguia
re, Capernaum jenda. Nyebe ra
Dios jemondo tuchi tata cuasu.
¹⁶ Secheē nenei neneisa chō jē nde.
Ae ra jeñee ñandu quia nae, secheē
abe ra echandu. Ae ra jēucuāyāte
quia nae, se abe ucuāyā ndae. Ae
ra seucuāyāte quia nae, sembusa
abe ucuāyā nda eno, i que Jesús ñee
uchimondo setenta je ra.

*Jesús chimondo mbia setenta
nyebi ngaē ee*

¹⁷ Ũquĩ setenta nyebi si mose que
eyate ra. —Aba checuayā icuā ure-
cheē mumbayā ñochĩ nderĩ, Ur-
ererecuā, i que ñee Jesús je ra.
¹⁸ Jesús que ñee ee ra. —Satanás
que ngoi tuchi u ibei si ra. Sā ama
piriā i asi no, eĩ si que eu ngoi
ra. Amae tuchi que ecoi rese ra.
¹⁹ Sequirācuā ngue amee tuchi jēje

ra. Jendeaquiatu sacuā. Jēirō sacuā
mbei tásie rese. Quiraē ndese. Seu-
cuāyāsa riquisā sacuā. Sequirācuā
nda jendea quiatu mingo. ²⁰ Ũquĩ
ndesechĩ nda jēya. Serese quia
jēya. Aba checuayā jeñee mum-
bayā mose jūquĩ ndesechĩ nda jēya
no jē! Paba que nombre jembae
mbesa mbesa mii ibate ra. Ũquĩ
ndese quia jēya, i que Jesús ee ra.

Jesús ia tuchi

²¹ Aque mosete que Espiritu Turā
Jesús mbia tuchi ra. Ñee ngue ngu
je ra. —Seyate aico nderese co,
Paba. Ibi jenda rerecuā ja chō nde
re. Ibei jenda abe rerecuā ja chō
nde no nde. Ndecheē ngue erem-
buchecuayā mbia aquiatu tuchi je
ra. Mbia riirĩ naanguia je chō
ngue erembuchecua nguia. Ũquĩ
ño ngue eturā ndeje ra, Paba, i
que Jesús ra. ²² —Seru que mbae
mondo ja seje ra. Paba mii ño
seicua tuchi nguia. Paba riirĩ mii
ño se re. Se mii ño Paba aicua
tuchi nguia no. Ae je ra Paba
ateacuquia nae, ũquĩ mii ño nda
Paba icua tuchi nguia serese, i que
Jesús ñee nda. ²³ Jesús que uba
mae uchimbacuatatu rese ra. Eísaa
que ñee nda. —Coche jemae nguia
ā sechiao rese. ²⁴ Mbia rerecuā
ñiinda mae ja bite raque ā sechiao
rese. Dios cheē nenei neneisa abe
mae ja bite raque ā ndese. Mae
eā mbei que equia sechiao rese ra.
Secheē andu bite raque. Secheē
ngue echanuate ra, i que Jesús ra.

Samaria jenda mo turā erasi je

²⁵ —Ma Jesús ucheē nyabi, i que
embesasa mo ñee oso Jesús rea
ra. —¿Mbae rese ra aico siqui bei
nonde re? i que ñee Jesús je ra. ²⁶ —
¿Mañi ño Voisés chimbesa re? i que
Jesús ee ra. ²⁷ Embesasa que ñee
ee ra. —Eĩ ño ngue Moisés embesa
ra: “Echesecua tuchi quia Dios rese.
Ndechiā ja je chō eico nyesecua
erese. Neaĩ abe je. Ndequirācuā

abe je. Nendua ndua abe je. Sã erechesecua ndechiese no, eĩ ere si chõ nyesecua nde ji jenda rese”, i que embesa ji ñee ndesẽ, i que embesasa ñee Jesús je ra. ²⁸ Jesús que ñee ke ra. —Erecheẽ turãte. Ndkico mose ùquĩ ndese, Paba ra nemingo bei, i que Jesús ee ra.

²⁹ Embesasa que uturã saã saã Jesús je ra. —¿Aba se ji jenda re? ¿Aba rese ra achesequa re? i que ñee Jesús je ra. ³⁰ Jesús que ñee ee ra. —Sã emo oso quia Jericó quitino. Jerusaén si. Sã mbia icuã nyarõ ere se ñeenda cúa no. Ucuu ucuu tuchi que ere se ra. Embae que embuquiachã ja ra. Eirao abe rirõ ja esi no. Ecura curái que esecha ino ñeenda cúa rĩ nda. ³¹ Aque ñeenda aui que sacerdote mo si ra. Maeño ngue ecura curái rese ra. Nyucuaño ngue oso ra. ³² Levita mo abe que oso rei hue rĩ no nda. Aque abe que maeño si ere se no nda. Ñeenda ibi chõ esi nguiia kcuafno no. ³³ Aque que Samaria jenda mo oso hue rĩ nda. Aque mae mose ecura curái rese, eya eã tuchi que aque quiatu ra. Aque quia echucuaño eã nguiã cote. ³⁴ Aque que tibia ere se ra. Mbae quira que equiti quitino eiruã nua ji rese ra. Vино abe quitino ere se. Esia ji que echucua chucua ee ra. Caballo umbae rese que erasi mbuchui cote ra. Tuchua mo ngue ererao ra. Huee que eriqui eraarõ isa ra. ³⁵ Isamami ngue ñee tuchuacha je ra. —Taso cote. Ecura curái embucherõ nguia aa. Co mbae isiquia nyeremo tamondo ndeje. Embucherõ sacua eisi co je. Co nyeremo chayã mose, mbae isiquia mo nda amondobe ndeje sechube mose, i que Samaria jenda ñee tuchuacha je ra. ³⁶ ¿Aba nyesecua ecura curái rese re? ¿Sacerdote ere? ¿Levita ere? ¿Samaria jenda ere? i que Jesús embesasa je ra. ³⁷ Embesasa que ñee ee ra. —Samaria jenda chõ ngue nyese-

cua ere se resẽ, i que embesasa ñee Jesús je ra. Jesús que ñee ee ra. —Ae rã si chõ eico nyesecua, i que ee ra.

Jesús oso Marta rea; María abe rea

³⁸ Jesús que ngasẽ sucha tubiriã mo nda. Cuña mo ngue eisi turã uchuchúaa ra. Marta, i equia ee. ³⁹ María, i que Marta nongue je ra. Jesús i ji bei que María riqui ngoi ra. Jesús cheẽ ndese nyiisaquia bei. ⁴⁰ Marta que mbae chao chao ja tuchi quia ra. Erecoteã tuchi que eriqui ra. Oso que ñee Jesús je ra. —Mbae mo ndese senongue riquiã ño co resẽ. Echeẽ na ee. Siqui sacua mbae mo ndese seje, i rei que Marta Jesús je ra. ⁴¹ Jesús que ñee Marta je ra. —¿Mbaerã ereico siqui jate mbae rese re, Marta? ⁴² Aque mii ndese chõ eico ndenongue rã si ae, Marta. María riqui secheẽ andu andu a resẽ. Emo nda embui eã secheẽ si, i que Jesús Marta je ra.

11

Jesús mbia mbaaquiato quiato ñee tura sacua Dios je

¹ Emo mose que Jesús chi ñee ngu je ra. Hui mose que echimbaaquiato ñee ee cote ra. —Urererequa, urembaquiato rã ñee Dios je. Sã Juan uchimbaaquiato mbaaquiato no, i que Jesús chimbaaquiato ñee ee ra. ² Jesús que ñee ee ra. —Eĩ jenze chõ nguia Dios je ñee mose:

Paba ibatenda, sã mbia ñee turã ja bei quia nderĩ.

Mbia rerecuarã ja sacua echu je ibii.

Sã mbia ibatenda siqui beite ndebi rese no.

Sã mbia ibi jenda abe riqui ndebi rese.

³ Ae ra ureu namo, ùquĩ embu rã urechiurã.

⁴ Ae uresaã icuã icuã ndeje nae, ùquĩ embutiã ná uresi.

Sã ureico tesareĩ mbia icuã icuã mose ure je no.

“Mbae icuã jësaã” i chĩ nda emo ure je jê!

Urereaquiato mbae icuã si.

Eĩ jenyê chõ ñee mose Dios je, i que Jesús embaaquiato ra. ⁵ Jesús que ñeembe ee ra. —“Mbae embu seje”, jê i mose jêquiato je, ¿mee nda jêje re? Sã jëingo oso jêquiato rea itondiite rete mose no. “Mbichae prestar ere rã seje. ⁶ Sequiato mo ngue tu serea ra. ¿Mbae ra amee ee re?” jenyê chõ ee. ⁷ Ae je jëingo ñee nae, ¿mee eã nda jêje re? Sã ñee jêje no. “Jëso rei. Seiquesa ãtãte. Co achu seriirĩ ndese quisa ye co. Sehuã sereãte. Mbae mo amondo aronea tuchite ndeje”, ¿i ra jêje re? ⁸ Mondo eã aroneate jêje jeñee mbei bei mose ee. Nyuruã sereãte raque uquiato je. Ñee mbei mose ee, nyuruã nda mbae mondo turã ee. ⁹ Eĩ si chõ Dios no nde. Jeñee i i mose Dios je, mbae ra emondo jêje no. Jê mbae mo ndequia i i mose, jêtea rae. Jê eiquesa mbu i i mose, mbuquiata ra jêje cote. ¹⁰ Ae ñee i ite quia Dios je nae, mbae ra Dios mondo ee. Ae mbae mo sequia i ite quia nae, tea rae. Ae eiquesa mbu i ite quia nae, equia ra ee. ¹¹ Jendiirĩ “mbichae embu seje” i mose, ¿sita ra eru mee ee re? Jendiirĩ “sira embu seje” i mose ¿mbei ra eru mondo ee re? ¹² Jendiirĩ “nguira chia embu seje” i mose, ¿quiraẽ nda eru mondo ee re? ¹³ Mbia icuã nyee mbae turã mondo mondo quia nguiri je ã. Jendu Ibatenda quia ra mbae turã tuchi mee jêje. Jendu ra Espíritu Turã mee jêje, jeñee mose ee, i que Jesús ee ra.

Aba checuayã quirãcuã Jesús quereco co, i raque mbia

¹⁴ Emo mose que Jesús aba checuayã icuã mbusẽ emo ñia si ra. Aque aba checuayã nguia echeẽ mbaaquiatuãte nguia. Jesús embusẽ mose que ñee cote ra. Ñee mose que mbia nyuruira tuchi mae

erese ra. ¹⁵ Emo emo ngue ñee nda. —Aba checuayã icuã nderecua tuchi chõ Satanás nde. Satanás quirãcuã je chõ Jesús riqui nguia aba checuayã icuã mbusẽ mbusẽ mbia si co, i rei que emo emo nda. ¹⁶ —Ma Jesús aquiature, i que mbia ñee nyue ra. —Jesús, mbia mae sayã mo esaã na ure je, i que mbia ñee Jesús je ra. ¹⁷ Jesús que ñquĩ ndua ndua icuate ra. Nyebe ñee nguia ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ¹⁸ Satanás icuã icuã mose nyue, Satanás quirãcuã nda ua no. Jeñee ñooño ño nguia seje ã. “Satanás quirãcuã je chõ Jesús riqui nguia aba checuayã mbusẽ mbusẽ mbia si”, jenyê chõchĩ nguia seje ã. ¹⁹ ¿Aba jeñimbaaquiato mbirãcuã jê nde? Aba checuayã icuã mbusẽ nonde re. ¿Satanás jeñimbaaquiato mbirãcuã serese re? ²⁰ Dios quirãcuã je quiatu aico aba checuayã mbusẽ mbusẽ mbia si ã. “Dios quirãcuã ndese chõ ureico nguia mae”, jenyê eã ñochĩ nguia ã. ²¹ Satanás quirãcuã tuchite raque. Umbae raarõ tuchite raque. “Sembae chi turãte a”, i raque. ²² Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ²³ Ae siqui ãte quia serese nae, ñquĩ icuã ño eriqui nguia seje. Ae mbae a ishao shao raanguia eãte quia seje nae, ñquĩ icuã ño eriqui nguia seje.

Aba checuayã icuã nyebi u mbia chianguire

²⁴ Aba checuayã icuã usẽ mose emo ñia si, ngata bei chõ nguia. “¿Mangue ra sequenea aucua que re?” i chõ nguia. Uquenea ucua sacua ngue etea eãte ra. “Tasobe rei nyebi. Ae si achu usẽ, aque chiã ye si taso”, i que aba checuayã nda. ²⁵ Aba checuayã nyebi si mose u, mbia chiã ndecoteã eãte que ee

ra. Tuchua tii ji raâte que ee ra.
²⁶ Aba checuayã icuã ngue ngue-
 senda sietie queru cote ra. Ique
 ja que echoi aque chiangui re cote
 ra. Ae chiangui re aba checuayã
 icuã sietie riqui nae, aque icuã i i
 tuchi que cote ra. Ñiinda si. Aba
 checuayã mii ngue siqui eye nyii ra.
 Etubiriâte cote, i que Jesús ee ra.

Dios cheẽ andusa je quiatu mbae roonde

²⁷ Jesús cheẽ mose que cuña mo
 tasẽ tuchi ñee mombo ra. —Mbae
 roonde tuchiñi ndesi je nye. Ae
 nembuquiambu quia, i que cuña
 mo ñee mombo Jesús je ra. ²⁸ Jesús
 que ñee ee ra. —Dios cheẽ andusa
 je quiatu mbae roonde riqui nguiã.
 Dios cheẽ mumbasa reã je quiatu
 mbae roonde riqui nguiã, i que
 Jesús ra.

Mbia mae sayã esaã ure je, i bei mbia Jesús je

²⁹ Mbia que ngaẽ tuchi Jesús
 riichã nda. Jesús que ñee mbia je
 ra. —Co mosenda mbia icuâte riqui
 ã. “Mbia mae sayã esaã ure je”, i
 beite equia seje ã. Mbia mae sayã
 mii ño nda asaã ee. Jonás na si.
³⁰ Sã Jonás ndiqui raque sira rie ye
 tres días nae, sã mbia Nínive jenda
 echeẽ andu cote nae. Jonás na si ra
 asaã mbia je. Mbia co mosenda je
 mae sayã tasaã. ³¹ La reina de Seba
 quia eturã jiri mbia co mosenda si
 re. Dios ra co mosenda mbasi tuchi
 la reina de Seba si. Sã la reina de
 Seba tu isho tuchi si Salomón ñee
 andu no. Se quia acheẽ ndaque
 quia jėje. Searacua tuchi raque
 se quiatu Salomón si. Secheẽ je-
 mumbate chõchĩ NGUIA Ñ: Nyebe
 ra Dios jembasi tuchi mbia icuã
 ndea rea mose. ³² Nínive jenda quia
 eturã jiri co mosenda si re. Dios
 ra co mosenda mbasi tuchi Nínive
 jenda si. Sã Nínive jenda huicua
 ndecha Jonás ñee mose ee no. Aico
 raque ñee jėje, co mosenda je. Jẽ
 secheẽ jemumbate chõchĩ nguiã ã.

Se quia raque ererecua tuchi Jonás
 si. Nyebe ra Dios jembasi tuchi
 mbia icuã ndea rea mose.

Nanderesa quiarei mbae resae nanderete je

³³ Nande lámpara mendi mose,
 nandemii aroneate mbaequi re.
 Nandemii aroneate mbae mo
 ye. Nandemingo quia ibate
 erenda rese. Mbia resae ja sacua.
³⁴ Nanderesa quiarei mbae resae
 nanderete je. Nanderesa turã
 mose, nanderete abe ra oso turã.
 Naneeresa icuã mose, nanderete
 abe ra oso icuã icuã no. ³⁵ Tata
 rendi rã jëingo bei. ³⁶ Tata rendi
 rã jëingo bei mose, jemae turã nda
 mbae ja rese cote. Sã tata rendi
 riqui nanderesae no, i que Jesús
 mbia mbaaquiato ra.

Jesús ñee asi fariseos je

³⁷ Jesús ñee jare que fariseo
 mo ñee ee cote ra. —Nyao rã
 sechuchúaa. Terequiaru serese, i
 que ñee Jesús je ra. Jesús que oso
 erese ra. Ngoi que quiaru cote ra.
³⁸ Fariseo que ñee uchiangui re ra.
 —Jesús choi quiiriã ño quiaruchĩ,
 i que uchiangui re ra. ³⁹ Jesús
 que ñee asi ee cote ra. —Jẽo achõ
 ño jëirei ireichĩ nguiã. Jeñiangui
 renda quia eicuâte re. Jeñiangui
 renda quia jëirei ãte nguiã. Abei
 chiâte chõ jëingochĩ jeñiangui re.
⁴⁰ Nandeo achõ eã ño ngue Dios saã
 nguiã. Nandechiangui renda abe
 chõ ngue Dios saã ndesẽ. ⁴¹ Abei
 chiâte chõ jëingochĩ jeñiangui re
 ã. Jeñiangui renda turã mose,
 eĩ nda jëturã ja rei. ⁴² Aba mbia
 eã tuchichĩ jẽ, Fariseos. Mbae a
 jemondo mondo tuchi raque Dios
 je. Jenyesequa eãte quia erese
 jeñiangui re re. Jëingo turã eãte
 quia mbia rese no nde. Ûquĩ jësaã
 jiri ae. Mbae a abe jemondo Dios
 je. ⁴³ Aba mbia eã tuchichĩ jẽ,
 Fariseos. “¡Serendarã turã nguiatu
 se jẽ!” jenyete chĩ nguiã mbia

ñumunua mose. “Sã mbia sererecua i nande je”, jenyete chĩ nguiã no. ⁴⁴ Aba mbia eã tuchichĩ jẽ, Fariseos. Embesasa abe no. Jenguasu jẽsaã saã techĩ nguiã mbia je. Mbia raaque tãsa rã ño jeñiangui renda re. Jeñiangui renda soõ ño nguiã. Erondeite. Sã eraaque tãsa yenda soõ no. Mbia jirandu eã ndaque jeñiangui renda soõ ndese, i que Jesús ñee fariseos je ra. Embesasa je abe no. ⁴⁵ Embesasa mo ngue ñee Jesús je cote ra. —¿Mbaerã ereico ñee ure abe je re? i que ra. ⁴⁶ Jesús que ñee ũquĩ abe je ra. —Aba mbia eã tuchichĩ jẽ abe. Jeñee tuchite quia mbia je ã. Dios cheẽ jembeta mbeta tuchichĩ nguiã mbia je ã. Mbia echeẽ mumbayã aroneate chee quia ã. Jẽ si chõ jeñee jemumba mumba nguiã ã. ⁴⁷⁻⁴⁸ Cose ndare rã si jẽingo nguiã ã. Jenamei na si. Sã ñi jenamei icuã icuã ndiqui Dios cheẽ mbuchecuaa je cose no. Eĩ jenyete si chõ nguiã ã no. ⁴⁹ Dios quiarei earacua tuchi. Ae que ñee jẽje ra. “Secheẽ mbuchecuaa emo emo nda amondo mbia je. Mbia icuã icuãte ra secheẽ mbuchecuaa je. Secheẽ mbuchecuaa mo iquã chee, i que Dios ñee nda. ⁵⁰⁻⁵¹ Ae Dios quiato iquã iquã quia cose nae, ũquĩ ñi nda Dios jembasi cote. Sã mbia Abel iquã cose no. Sã mbia Zacarías abe iquã altar jii no. Sã mbia Dios quiato iquã iquã bei cose no. ũquĩ ja riĩ nda Dios jembasi cote. ⁵² Aba mbia eã tuchichĩ jẽ. “Ure mĩ ño Dios cheẽ ureicua nguiã ã”, jenyete chooño ño nguiã ã. Dios cheẽ jẽisi turã eãte quia ã. Mbia siquise mose Dios rese, jẽingo emingo eãte erese ã no. Jẽ abe chee jẽingo eãte erese ã no, i que Jesús ñee embesasa je ra.

⁵³⁻⁵⁴ Jesús ñee jare que fariseos paama i tuchi ee ra. Embesasa abe paama i nguiã ee no. ũquĩ ngue ñee ñee tuchi Jesús je ra. —Sã

Jesús ucheẽ tasa tasa nande je no. ũquĩ mose nandeisi serao policiaa, i tuchi que ra. Nyebe eriqui nguiã Jesús rea chemi ñemi.

12

Jeturã nda jẽsaã ñooño chĩ je

¹ Mbia tubiriã ngue ngaẽ ngaẽ nguiã Jesús rea cote ra. Cuaacua i tuchi que equia nyuera. Mbia tubiriã tuchi. Jesús que ñee uchimbaaquiato je cote ra. — ¡Fariseos rã nda jẽingochĩ jẽ! Uturã naa ñooño mbei. ² Ae mbia saã nyecua yã cuayã nguiã nae, ũquĩ nda nyecua ja cote. ũquĩ nda mbia icua ja cote. ³ Ae jeñee nguiã itondaru jẽingo mose, ũquĩ nda nyecua ja mbia je cote. Jeñee equia nyiisa isa nae, ũquĩ abe ra nyecua ja mbia je no.

Dios riqui jendeaquiato bei co

⁴ Tacheẽ nyecua jẽje, Sequiato. Ae “taiquia” i quia jeni nae, iũquĩ si ra jẽsiquichechĩ jẽ! ⁵ Ae aba mombo serite quia tata cuasu nae, aque si quiato jẽsiquiche. ¡Aque si quiato jẽsiquiche tuchi jẽ! ⁶ Nguireĩ ndei aba queteamba eã jiri. Mbae isiquia mumba eã jiri raque. Dios quia nguireĩ icua jate nguiã. Dios ra tesareĩã nguireĩ mo si. ⁷ Dios riqui jẽ mĩ mĩ icua ja co. Dios riqui ngueteã jiri jendese nguireĩ si co. Nyebe jẽsiquicheã mbae mo si.

Jesús quiato chõ se re, jenyete checua chõ nguiã mbia je

⁸ “Jesucristo quiato chõ se re”, ae i quia mbia je nae, ũquĩ ñi nda acheẽ turã se abe. “Sequiato chõ ã nde”, ae ra se. Angeles ra ambiirandu ja ũquĩ ndese. ⁹ “Jesucristo quiato chõ se re”, ae iã nguiã mbia je nae, ũquĩ ñi nda acheẽ turã eã. “Sequiato eã ño ũquĩ nde”, ae ra se. Angeles naa ambiirandu ja sequiato eã ndese. ¹⁰ Emo ñee icuã mose serĩ, Dios ra echeẽ icuã

mbutiã arôte. Emo ñee icuã mose Espíritu Turã nii, ùquí icuã nguia ra Dios mbutiã eã mbei. ¹¹ Mbia icuã icuã nda jêje seriĩ. Jenderao mose mbia rerecua je, ijêquicoi coichĩ nda jê! “¿Mañi nande ra ñee ee re?” ijenyechĩ nda jê! ¹² Huee quia ra Espíritu Turã ñee nguia jêje jembucheẽ sacuã, i que Jesús ñee uchimbaaquiatu je ra.

Mbaecha aracuayã

¹³ Emo ngue ñee Jesús je ra. — Sererecua, senongue icuã icuãte seje. Echeẽ na senongueje. Ae ureru secha ure je nae, senongue embuchecha turã eãte seje, i que mbia mo ñee Jesús je ra. ¹⁴ Jesús que ñee ee ra. —¿Mbaerã nda re? “Mbia mbae embuchecha turã turã ee”, iã ngue Dios seje ra, i que Jesús ee ra. ¹⁵ —jEmo mbae rese ra jemaee maechĩ eosei sacuã jê! “Sembae tubiriã mose ra seyate cote”, ijenyechĩ nda jê! i que Jesús ee ra. ¹⁶ Jesús que ñee ee ra. —Sã mbaecha mo ndiqui no. Ibicha. Sã embae ia tuchite no. ¹⁷ “¿Mañi ae ra se re? ¿Mangue ra aba ererecoquiatu re?” i tuchi que mbaecha uchiangui re ra. ¹⁸ “Sembae ruacuã tambucuasu tuchi. Quiata a ruacuã. f nda sembae ique ja tuchi huee. Ae arecoquiatu quia ã nae, ùquí nda tenda ata jiri tea seje chã. ¹⁹ Aquiei quiei eã mbei ra se quia cote. Aquiaru quiaru chõ nda se quia cote. Mbae ra ambei mbei chõ nguia cote. Achimbiambia chõ nda se quia cote”, i raque mbaecha ñee uchiangui re. ²⁰ Dios que ñee ee ra. “Ndearacuayãte ereico co. Co isa chõ nda eremano. Ae ererecoquiatute quia nae, aba je chio nda ùquí cote”, i que Dios ñee mbaecha je ra. ²¹ Ae mbae munua nua mbei quia nae, ererecoquiatu sacuã nae, earacuayã tuchi chõ ùquí nde. Dios quiato eã ño ùquí nde, i que Jesús mbia mbaaquiatu quiatu ra.

Dios uquiato reaquiato bei

²² Jesús que ñee uchimbaaquiatu je ra. —“¿Mbae ra nandeu re?” ijenyechĩ nda quicoi coi jê! “¿Ma tiru ra nandemingue re?” ijenyechĩ nda quicoi coi jê! ²³ Mbia iriau ae ra mbia mingo eã. Mbia iriau abe ra mbia mingo eã no. ²⁴ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae. Dios quiarei embuquiaru quiaru. Jê nguia rei Dios queteamba tuchi nguireĩ si. Nguireĩ ja si. Jê abe Dios ae jembuquiaru nguia jê no. ²⁵ Mbia ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ arõ nguia. ²⁶ Jê mbae ñetẽ naa aquiatuã mose, ¿mbaerã jẽingo “mbae cuasa tasaã” i re? Dios quia ra mbae saã ja jêje. ²⁷ Sã mbae uti turãte riqui no. Mbae ao ao eã ndaque. Ninyu mburirã eã ndaque. Mbae uti quiarei eturã jiri Salomón si. Salomón turãte raque. ²⁸ Sã Dios quiata mbuturã no. Quiata mano jeite raque. ¿Mañi nda Dios jemburao eã jê nde no? ¿Mbaerã jẽingo Dios icuayãte re? ²⁹ “¿Mbae ra nandeu re?” ijenyechĩ nda pare pare i jê! “¿Mbae ra nandembei re?” jenyechĩ nda quicoi coi no jê. ³⁰ Eĩ ño Dios quiatoã nguia. Jê nguia jendu tesareia mbeite nguia jêsi. ³¹ Jê nguia jẽingo tuchi Dios rese jenderecuarã. Ùquí mose ra Dios mbae mee mee mbei jêje. Jenyiurã. Jeñimbeirã abe no.

Jembae jemondo ja Dios je

³² Jẽsiquichechĩ nda mbae mo si, Seriirĩ. Jendu ra umbae mondo ja jêje. Dios iate ra umbae mondo mose jêje. ³³ Jembae jemondochõ ño mbaecha reã je. f nda jembae tubiriã jẽingo mose ibate cote. Mbae riru ra soro soroã mbei jembae ibate cote. Mbae ra ua eã mbei huee. Mbia ra mbae mbuquiachãya huee.

Chicuaquiareĩ eãte ra huee no.
³⁴ Jẽ jembæ mondo mondo mose
 ibate, jendua ra ibatenda rese cote.
 Jẽ jembæ monoã mose emo je,
 ibatenda rese ra jendua eãte.

Jẽingoquiatsu bei chõ nguia

³⁵ Jẽingoquiatsu bei quia jẽ! Iton-
 daru abe jẽingoquiatsu quia. ³⁶ Sã
 ererecua mo no. Oso ngũinisirã
 nderequia no. Huee erimba mo
 ndiqui echuchua raarõ huee. Aque
 ererecua ru quia eiquesa mbuu
 mbuu aque cote. Erimba uequia
 asi ee cote. ³⁷ Erimba uqueã
 mose nguerecua tu mose, ererẽcua
 ia tuchi ra erese. Ererecua ra
 embuquiaru turã. Ae si chõ echara
 chara nguã ngũimba je hue no.
³⁸ Ererecua ra tu arõte itondãruu.
 Itondiite mose abe no. Erimba
 uqueã mose nguerecua tu mose,
 ererecua ia tuchi ra erese. ³⁹ Sã
 emo ñee ndeje no. “Co mose ra
 mbae mbuquiachãsa ru nembæ
 rirõ”, i ndeje no. Ũquĩ mose ra
 erequeã. Nembæ ra eresarõ
 mbei esi. ⁴⁰ Eĩ jenye jẽ abe
 icoquiatsu. Eĩ ae ra u ibate si. “Tu
 eãte rei rae”, i mose quia ra achu, i
 que Jesús ra.

*Erimba echeẽ mumbayã mose,
 eya tuchi rae*

⁴¹ Pedro que ñee Jesús je ra. —
 ¿Aba je ereico ñee ũquĩ nde? ¿Ure
 miĩ je ere? ¿Mbia ja je ere? i que
 Pedro ee ra. ⁴² Jesús que ñee ee
 ra. —Dios rimba aba cheẽ mum-
 bayã niĩ aico ñee co. Dios rimba
 aracua riiãico ñee co. Sã ererecua
 ñee ngũimba turã je no. “iSembæ
 esaarõ ja jẽ!” i ee. “Serimba ataque
 embuquiaru quiaru ja quia no”,
 i ee. ⁴³ Erimba echeẽ mumbayã
 mose, ererecua ia tuchi ra tu mose.
 Erimba abe ra eya no. ⁴⁴ Ererecua
 ra ngũimba miĩ mbei cote, umbæ
 raarõ sacua. ⁴⁵ Sã erimba ndua
 ndua uchiangui re no. “Serere-
 cua ra tu jei ãte”, i ndua ndua.
 Hue ñee icuã icuã uataque je huee

cote. Iruã nua cote. Quiaru chooño
 cote. Mbae mbei chooño abe cote.
 Quiacua quiacua cote. ⁴⁶ Sã erere-
 cua ru quia ngũimba mbuate aque
 cote no. Ñee ee. “Mbae ra ere-
 saarõ mbei seje cote”, i ngũimba
 je cote. Ngũimba iruã nua tuchi
 cote. Ae aba cheẽ mumbate quia,
 ũquĩ ndese ra mbae rasi raã naa
 cote. ⁴⁷ Ae nguerecua cheẽ icuate
 quia nae, ũquĩ nda ererecua mbasi
 mbasi bei ucheẽ mumba mose.
⁴⁸ Ae nguerecua cheẽ icua eãte quia
 nae, ũquĩ nguia ra ererecua mbasi
 mbasiã jiri ucheẽ mumba mose. Ae
 Dios cheẽ icua tuchi quia nae, ũquĩ
 je ra Dios “mbæ esaã tuchi seje”, i.
 Ae je Dios mbae mondo tuchi nae,
 ũquĩ je ra Dios “mbæ esaã tuchi
 seje”, i.

*Achu chõ ngue mbia mbuchao
 chao nyesi resẽ, i Jesús*

⁴⁹ Ibate si que achu íbii ra. Mbia
 mæ sacua sequirãcuã ndese. Mbia
 sequirãcuã icua eã ñochĩ namo
 nyee. ⁵⁰ Mbia ra sembasi tuchi
 cote. Pare pare aete se quia
 ndua erese co. ⁵¹ ¿Achu reĩ mbia
 mbuturã turã sacua serimba je
 jẽje re? Tei. Achu chõ ngue mbia
 mbuchao chao nyesi resẽ. ⁵² Mbia
 chuchua jenda ra ñimbuchao chao
 nyesi. Nyeremo nda siqui serese
 serimbarã. Eataque ra ñimbuchao
 esi. ⁵³ Emo nda eicuãte ngu je seriĩ.
 Emo nda eicuãte nguiirĩ je seriĩ
 no. Emo nda eicuãte usi je seriĩ no.
 Acuanĩ abe ra eicuãte uchari je no.
 Ari mo abe ra eicuãte nguiirĩ ninisi
 je no. Eĩ si ra mbia icuã icuã uchue
 seriĩ no, i que Jesús ra.

*Ae ibatenda ra tu icuãte mbia je
 nae, aque jẽicua eãte chõchi*

⁵⁴ Jesús que ñeembe mbia je ra. —
 “Ama nda nyaaqui”, jenye bei quia
 pã i mose ã. Ibei jẽicuate raque
 quia ã. ⁵⁵ “Tenda rasite ra cote”,
 jenye bei quia quiririã ichu ichu
 mose ã no. ⁵⁶ Ibei jẽicuate raque

quia ã. Tenda abe jêicuate raque quia ã no. Ama abe no. Dios rucucha ra tu mbia je, ¿mbaerã jêingo ùquĩ icuayãte quiatu re? ¿Mbaerã jêingo jêaracua raã naa nde?

Ae eicuãte riqui jêje nae, “nandeico turã ño nguia”, jenyê chõ nguia ee

⁵⁷ ¿Mbaerã jêingo mae sereãte mbae turã ndese re? ⁵⁸ Emo ñee icuã mose jenĩ mbia rerecua je, jêturã ño ee. Jeñee turã ño ee. Jê ae chõ jêñimbuturã nguia erese. Jnda jenderao icuã eã. Jenderao mose ra jêtarõ mbei cárcel. ⁵⁹ Huee ra jêingo bei. Jembae mondo ja tuchi chee ee, i que Jesús ra.

13

Jêhui chõ jêicuã si

¹ Aque mose que mbia Jesús mbiirandu Pilato riĩ nda. Pilato nda mbia Galilea jenda mo iquia iquia ra. Mbiam ticuasum iquia iquia mose Dios mbaerã. ² Jesús que ñee mbia je ra. —Ae Pilato iquia iquia quia nae, ¿ùquĩ icuãte riqui reĩ mbia ataque si re? Tei. Jêicuã ja chõ jêingo nguia ã no. ³ Jêhui eã mose jêicuã si, jemano ja chõ nda jê abe. Ùquĩ na si. ⁴ Sã torre de Siloé ngoi mbia ati no. Dieciocho iquia. ¿Ùquĩ eicuãte riqui reĩ mbia ataque si re? Tei. ⁵ Eĩ ja chõ ñene. Jêhui eã mose jêicuã si, jemano ja chõ nda jê abe. Ùquĩ na si, i que Jesús ra.

Ira ia ea mbei

⁶ Jesús que ñee mbia je ra. —Sã amei mo ira tiquia rei no. Ia eã mbei chõ ee no. “Ma taso erea no. Ia cote reae”, i rei que amei nda. Ei oreãte que ee ra. ⁷ Nyebe amei ñee nguia ngũimba je cote. “Ira a rea ngue aso rei nguia. Ia eã mbei chõchĩ seje tres años. ¡Echisia chõ oso jê! Ibi riquisã ñooño uã aque”, i que amei ngũimba je ra. ⁸ Sã erimba ñee amei je no. “Co tenda

mose nandechisia eã na. Equi tambuturã. Mbae ruusi tachono ñono erao rese. ⁹ Ma ia eãte co tenda. Ia eã mose, nandechisia chõ cote”, i que erimba amei je ra, i que Jesús mbiam mbaaquiaturã.

Jesús ari rasi mbucherõ

¹⁰ Sábado mose que Jesús chĩ mbiam mbaaquiaturã quiaturã. Judíos chumunuásaa. ¹¹ Cuña ndasi mo ngue siqui hue ra. Nyiituquia bei dieciocho años nyee. Aba checuayã icuã nguia embasi nguia. Ari que nguete isoã mbei quia ra. ¹² Jesús que mae ari rasi rese ra. —Echu rã aa, i que ee ra. —Cuña, nderasi ãte cote, i que Jesús ee ra. ¹³ Jesús que o chono erese ra. Aque mose tuchi que ari nguete iso turã cote ra. Ari que ñee turã turã Dios je cote ra. ¹⁴ Ererecua judíos munuasa que paama i tuchi Jesús je ra. Ari mbucherõ mose sábado. —Sábado eã mose chõ nandeico mbae rese ae. Sábado eã mose chõ nandeico erasi mbucherõ ae. Sábado mose chõ Dios mbae resẽ. Erasi mbucherõ aroneate co mose resẽ, i rei que ererecua mbiam je ra. ¹⁵ Jesús que ñee ee ra. —¿Mbaerã ereico ndeturã naa ñooño nde? ¿Sábado mose jêingo ticuasum mbei eã mbei embiu sacua nde? ¹⁶ ¿Mañi nande ra cuña ndasi mbucheroã co sábado mose re? Judía si chõ nyeresẽ. Jê na si. Satanás que embasi cosete ra. Dieciocho años chee. ¿Mañi ae ra erasi mbei eã esi sábado mose re? i que Jesús ñee nda. ¹⁷ Mbiam ataque iate que Jesús cheẽ mose ra. Jesús chiao rese abe eyate no. Ae Jesús ucuayãte quia, ùquĩ ngue eireĩ tuchi Jesús cheẽ mose ra.

Mbae eĩ na ño Dios rimba re

¹⁸⁻¹⁹ Jesús que ñeembe mbiam je cote ra. —¿Mbae rã ño Dios rimba chã? Mbae eĩ na ño Dios rimba re. Sã mbiam mostaza eĩ tiquia no. Ieĩ ñetete raque etiquia ramo mose. Suri oso quia cote. Ecuasum tuchi chee cote. Nguireĩ uquisa saã nyee

erãquiã ndese. Eĩ si chõ Dios rimba re. Ûquĩ mĩ ndaque nyii. Nimbeta tuchi cote. Mbae eĩ na.

Levadura rã ño Dios rimba re
 20-21 ¿Mbae rã ño Dios rimba chã? Levadura rã ño Dios rimba re. Sã mbia levadura ñetê mondo mbichae ao ramo mose no. Levadura oso quia mbichae mbuchimatã ja no. Eĩ si chõ Dios rimba re, i que Jesús ra.

Eiquesa chumumbi

22 Jesús que oso quia Jerusalén nda. Tiba tiba que oso quia mbia chuchua mbuchesea sea ra. Mbia mbaaquiatsu quiatu. 23 Emo ngue ñee Jesús je ra. —Sererecua, ¿mbia mĩ mĩ ño nda siqui ibate nderese re? i que emo ñee Jesús je ra. 24 Jesús que ñee ee ra. —¿Eiquesa chumumbi rĩ ño jẽso ique jẽ! “Hue rĩ nda aso se abe ique”, i ja jate raque rae. Tei. Ique ja eã nguia nda re. 25 Emo mose ra eiquesa amatã mbei cote. Emo nda iqueã mbei cote. Eiquesa ra jembuu mbuu raque cote. “Sererecua, eiquesa embuquiata rã ure je”, jenyere raque ra seje cote. Acheẽ nda jẽje. “¿Mangue jenda jẽ nde? Jaẽicuayãte se”, ae ra jẽje cote. Eiquesa ra ambuquiatayã mbei jẽje cote. 26 Jeñee tuchi raque ra seje cote. “Urequiaru que equia nderese. Nde que urembaaquiatsu quia. ¿Mañi ere ra urerecha re?” jenyere raque ra seje cote. 27 Acheẽ nda jẽje cote. “Jaẽicuayãte se. Jẽso serecha. Mbae icuã ngue jẽsaã saãte quia resẽ”, ae ra se hue cote. 28 Hue ra jenyeseo seo seje huee cote. Jeñee nda seje. “Abraham ño siquichĩ nderese hue. isaac abe no. Jacob abe no. Dios cheẽ mbuchecuasa ja abe no. Ure chõ urecuchĩ taicuee a”, jenyere ra nyeseo seo seje huee. 29 Mangue jenda chooñoa nda ngaẽ ngaẽ Dios riichã aque mose. Quiaru quiaru ra equia Dios rese. 30 Ae eaquiature

riqui raque namo nae, ùquĩ mo nda eñetê na pee cote. Ae eaquiature riqui raque namo nae, ùquĩ mo nguia ra siqui ecuasurã tuchi pee cote, i que Jesús ñee nda.

Jesús ia eã tuchi Jerusalén jenda rese

31 Aque nyaashĩ mose que fariseos ngaẽ ñee Jesús je ra. — ¿Eso a si jẽ! Herodes ndeiquia serĩte quia co, i que Jesús mbiirandu ra. 32 Jesús que ñee ee ra. —Eoita rã ño Herodes re. Jẽso ñee ee. “Jesús que ñee ndeje ra. Taico mbirimbe rã aba checuayã icuã jea jea mbia si. Taico mbirimbe rã mbia rasi mbucherõ cherõ. Namó. Isamami abe. Isamami nongue ra ahui erecha cote’, i que Jesús ndeje ra”, jenyere oso Herodes je. 33 Taicobe jiri namo. Isamami. Isamami nongue abe no. Jerusalén nguia nda sei quia nguia. Sã Dios cheẽ mbuchecuasa mano ja Jerusalén no. 34 Tacheẽ na jẽje, Jerusalén jenda. Seya eãte aicochĩ jendese co. Hue jẽingo mbia iquia iquia beite hue. Dios cheẽ mbuchecuasa iquia iquia. Dios chimondo abe iquia iquia no. Sã nguira riqui nguiire reaquiatsu mondo ujeoqui re no. “Eĩ tae jendeaquiatsu”, ae beite rei nguia jẽje co. Secheẽ jẽisi sereã mbei chõchĩ nguia ã. 35 ¿Aico jendecha a cote jẽ! Jemae mae eã nda serese cote. “¿Co chi Dios rucucha ru quia co cote jẽ!” jenyere mose, hue ramo nguia ra jemae serese cote.

14

Jesús mbia rete ruru mbucherõ

1 Jesús que oso rei quiaru fariseo rerecua mo nyuchúaa ra. Sábado mose. Fariseos mo ngue chi erea chemi ñemi nda. 2 Huee que emo ndasi riqui Jesús je ra. Erete ruru ja que ra. 3 Jesús que ñee fariseos je ra. Embesasa je abe. —¿Eicuãte se erasi mbucherõ mose sábado mose re? I ere. Jeñee seje, i rei que Jesús

ee ra. ⁴ Jesús cheẽ mose que mbia mo ñee eãte ee ra. Jesús que erasi mbucherõ mondo cote ra. ⁵ Jesús que ñee fariseos je ra. —Sã jenimba ticuasú riqui jaã no, ngoi oso ibicua rie. ¿Sábado mose ra jësiquã nde? i que Jesús ee ra. ⁶ Fariseos que ñee sereãte echeẽ mose ra.

Jëcuasu ra jësaã saãchĩ, i Jesús mbia je

⁷ Mbia que erenda turã isirõ sirõ nguia ra. Ngoi sacua ererecua ji. Ucuasu raã naa sacua. Nyebe Jesús ñee nguiã ee. ⁸ —Jëingo mose fiesta, jerenda turã mo nda jëisirõchĩ jë! Mbia chũcuate mo nda tu arõ ndeje cote. ⁹ Fiestacha ra ñee arõte ndeje. “Ehuã na nde. Erenda turã tamondo sequiato je”, i arõte ra ndeje. Ndeireĩte ra huee cote. Pe quiti jiri ra nembucoi cote. ¹⁰ Jëingo mose fiesta, pe quiti jiri chõ jengoi. Erenda turã isirõ nocoĩ. I nda fiestacha ñee ndeje. “Quiatuchu a jiri, Sequiato. Erenda turã tose”, i sacua ndeje. I nda mbia mae ja nderese. ¹¹ Ae ererecua saã saã nguia nae, ùquĩ nda siqui eñetẽ na cote. Ae siqui minguite quia nae, ùquĩ nda siqui ererecuarã cote, i que Jesús mbia je ra.

¹² Fiestacha abe je que ñee cote ra. —Nde fiesta raã mose, “jenyu quiaru serese”, jerechĩ nda mbaecha jiri je jë! Erechĩ nda ndenongue je. Erechĩ nda ndequiato tuchi je. Ùquĩ mose ra embuchebi ndeje. Dios quia ra embuchebiã ndeje cote. ¹³ Nde fiesta raã mose, “jenyu quiaru serese”, ere chõ mbaecha reã je. Ere chõ mbia rasi rasi je. Mbia cuatayã je. Mbia resayã je. ¹⁴ Nde fiesta raã naa mose ùquĩ je, ùquĩ nda embuchebiã ndeje. Dios quia ra embuchebi ndeje, Dios quiato quera si mose. Ùquĩ mose ra ndeya tuchi, i que Jesús fiestacha je ra.

Ererecua quiaru mbaecha reã ndese

¹⁵ Ùquĩ andu mose que emo ñee Jesús je ra. —Ababi tuchi siqui Dios rese ae ererecua tuchi mose, i que emo ñee Jesús je ra. ¹⁶ Jesús que ñee ee ra. —Sã emo fiesta raã no. “Jenyu quiaru serese”, i sacua mbia tubiriã je. Mbia chiurã ngue esaã tuchi ra. ¹⁷ Echiurã quiche ja mose que ngũimba mo mondo cote ra. “Ae je acheẽ, sã ecuaẽ quiaru cote”, i que ngũimba je ra. ¹⁸ “Ateẽ. Aso eã nda se. Serecoteãte chõchĩ?”, i ja ja que ra. “Ibi mo ngue aisi ramote ra. Taso rã erea”, i que emo ucheẽ mondo fiestacha je ra. ¹⁹ “Ticuasú mo ngue aisi ramote ra. Cinco yuntas. Taso rã erea”, i que emo ucheẽ mondo no nda. ²⁰ “Seninisirã mo areco ramote co. Nyebe ra asoã quiaru nderese huee”, i que emo ee no nda. ²¹ Erimba que tu nyebi ñee nguerecua je ra. “Erecoteã ja jate que ra. Quiaru eã nda nderese”, i que erimba embiirandu ja ra. Ererecua que paama i ra. Ngaẽ eã mose erea. Ae ñeembe nguiã ngũimba je. “Eso ñee ùquĩ je quiatu no. Mbaecha reã je. Mbia rasi rasi je. Mbia cuatayã je. Mbia resayã je. Ùquĩ ja je echeẽ. Sã ecuaẽ quiaru serese”, i que ererecua ra. ²² Emo mose jiri que erimba ru ñee nyebi ee ra. “Acheẽ ñee ja que ee ra. Co ecuaẽ ndaque nguiã co. Mbia miite que ra”, i que erimba ñee fiestacha je ra. ²³ Ererecua que ñeembe ee ra. “Esobe ñee ñee emo je no. Eru ja sechuchua. Quiaru sacua serese. I nda sechuchua mbiitâyã jiri. ²⁴ Ae je acheẽ nyii, ùquĩ nda quiaruã tuchi serese cote”, i que ererecua ñee asi ra, i que Jesús ñee nda.

Jesús rui aba siqui jei aronea

²⁵ Mbia tubiriã ngue siqui quia Jesús rui ra. Jesús que uba ñee ee ra. ²⁶ —Ae nyesequa tuchi quia ngu rese sesi, ùquĩ nda serimba eã.

Ae nyesequa tuchi quia usi rese sesi, ũquí nda serimba eã no. Ak nyesequa tuchi quia ngūinisi rese sesi, ũquí nda serimba eã no. Ae nyesequa tuchi quia nguiirĩ ndese sesi, ũquí nda serimba eã no. Ae nyesequa tuchi quia ngōngue ndese sesi, ũquí nda serimba eã no. Ae nyesequa tuchi quia ngueco rese sesi, ũquí nda serimba eã no. Ũquí ja ra serimba eã. ²⁷ Ae mano sereãte seriĩ, ũquí nda serimba eã no. Ae siqui sereãte quia serui, ũquí nda serimba eã no. ²⁸ Sã emo ñee no. “Sechuchua tasaã na”, i. “¿Manya mbae isiquia ra amumba sechuchua raã sacua nde?” i nyii eao nonde. ²⁹ Sã uchuchua raã naa ndaque no. Ihuaẽ tiquia tiquia raque. Hui bei chõ esi cote. Hue mbia iquia iquia ee cote. ³⁰ “Co uchuchua saã saã ndei cose. Saã ja eã mbei chõchi nae”, i ra mbia iquia iquia ee. ³¹ Sã soldados rerecua icuã icuã emo je no. Guerra raã serĩ ee. Guerra raã nonde ra ndua ndua. “Ae quiatu que soldados tubiriãte embae sesi ra”, i uchiangui re cote. ³² Nyebe guerra raã eã nguiã ee. Nyebe ucheẽ turã mondo nguiã ee. Isho mose. “¡Nandeico turã ño nyiese jê!” i ee. ³³ ¡Eĩ jenyê si chõ nguia jê! Jendua rã nguia nyii. Jê jembae recha ja eã mose, serimbarã eã nda jê.

Embiquesa ise quiachamba mose

³⁴ Embiquesa turãte raque. Embiquesa ise quiachamba mose, eicuã tuchi cote. ³⁵ Ñio ye echã aronea cote. Eicuãte cote. Emombo bei chõ cote. Ae eisate riqui, secheẽ jeñandu, i que Jesús ra.

15

Oveja quiachã je

¹ Mbã icuã ngue Jesús siichã nguia ra. Ae impuestos isi isi quia, ũquí abe que Jesús siichã nguia ra. Echeẽ andu sacua. ² Nyebe fariseos

ñee icuã icuã nguiã Jesús rĩ. Embesasa abe ñee icuã icuã nguiã erĩ no. —¿Mbaerã Jesús riqui mbã icuã isi turã turã nde? ¿Mbaerã eriqui quiaru erese re? i que equia ñee Jesús mbutereã tuchi ra. ³ Nyebe Jesús ñee nguiã ee. Embaaquiutu sacua.

⁴ —Sã emo nimba quiachã oveja no. Cien ndei erimba. Co mii ngue quiachã ee ra. Aque esi quia quiachã je requia aque. Eataque recha. Noventa y nueve recha. ⁵ Quiachã je rea mose, sui cote. Equiaama cote. Eya tuchi erese cote. ⁶ Tu uchuchua cote. “Quiatuchu rã”, i uquiato je cote. Nguesenda je abe no. “Quiachã je que atea cote ra. ¡Sã jê! Jêya tuchi serese cote”, i que uquiato je ra. ⁷ Tacheẽ nyecua jêje. Quiachã je mo nyebi mose, Dios iate riqui co. Mbã icuã tu mose ee, Dios iate riqui erese co. Ae uturã saã saã nguia nae, ae huiicua secha sereãte quia nae, ũquí ndese quia Dios ia eãte re.

Mbae isiquia quiachã je

⁸ Sã cuña mo mbae isiquia diez quereco no. Sã aque mii quiachã ndaque ee no. Lamparina ngue emendi eresae sacua nda. Sã uchuchua tii no. Mbae isiquia rea chee. ⁹ Ereare que ñee uquiato ja je ra. “Quiachã je que atea cote ra. ¡Sã jê! Jêya tuchi serese cote, i que uquiato je ra. ¹⁰ Aico ñee nyecua jêje a. Mbã mo hui mose huiicua si, ángeles ibatenda ia tuchi erese, i que Jesús ra.

Ae ngu secha

¹¹ Jesús que ñeembe ee ra. — Sã ameĩ mo eriirĩ nyeremo no. ¹² Eriirĩ ndiqui que ñee ngu je ra. “Paba, mbae isiquia ataque embu rã se sembaerã. Ndemano nonde”, i que ñee ngu je ra. Ae eru mbae isiquia mbuchecha nguiã ee. Mondo eo cote. ¹³ Isamami nongue

que eririĩ nduĩnda umbae rere-coquiatsu ra. Ae oso nguiã isho cote. Ngu recha. Huee que mbae isiquia umbae mumba chooño ja ra. Mbae icuã ndibishorõ. ¹⁴ Hue jenda mbia chiũ que uate cote ra. Amei ndiirĩ abe riãcuã nyee que ra. Umbae mumba chooño jare. ¹⁵ “Taquiei quiei rã oso ererecua mo je”, i chee. “Teasu socoi esaarõ na serimba”, i chee ererecua mo ee. ¹⁶ “Teasu chiũ au chõ mbichĩ ira a. Seriãcuã tuchichĩ”, i chee amei ndiirĩ. Emo ngue embuquiaruã mbei ra. ¹⁷ “Paba rimba chichĩ quiaru turãte sechuchua huee, seriãcuã mose aa. ¹⁸ Tasobe rei Paba rea. Tacheẽ ndei oso ee. ‘Seicuã tuchite que ndeje curi ra, Paba. Paba ibatenda je abe no. ¹⁹ Seriirĩ ere eã seje cote. Nderimbarã taico cote’, tae rã oso Paba je”, i que ndua ndua uchiangui re cote ra. ²⁰ Ngu rea que esi cote ra. Isho ereco mose que eru mae erese ra. Amei ia eã tuchi que eriqui erese ra. Amei ngue oso uchã nguiirĩ ndese oo ra. Equiaama. Eritii riite no. ²¹ Ngu je que eririĩ ñee ndei cote ra. “Seicuã tuchite que ndeje curi ra, Paba. Paba ibatenda je abe no. Seriirĩ ere eã seje cote”, i rei que ngu je ra. ²² Eru que ñee ngũimba je cote ra. “Eirao turã mo emondo seriirĩ je. Eiyaorã abe mo emingue ee. Anillo mo abe emingue eo rese. ²³ Ticuasú quira mo jẽquishĩ echo je. Nandequiaru tuchi erese. Fiesta nandesã ee. ²⁴ Seriirĩ ngue mano naanguia oso curi resẽ. A eru quera si raanguia seje a. Quiachã tuchi que oso serecha ra. A erube seje a cote”, i que amei ngũimba je ñee nda. Eya tuchi cote. Nyebe fiesta raã nguiã nguiirĩ je.

²⁵ Amei ndiirĩ nongue que siqui úcoo ra. Ngasẽ ndaque u quia uchuchúaa cote. Tõotõ i que echandu ra. Mbia cheĩ cururi abe andu. ²⁶ Ñee ngue erimba mo je ra. “¿Mbaerã eriqui toõtõ i re? ¿Mbaerã

mbia riqui nyuruqui re?” i que amei ndiirĩ ndiqui ra. ²⁷ Erimba que ñee ee ra. “Ndenongue que tu ngasẽ nderu je ra. Nyebe ticuasú quia nguiã ee”, i que erimba ñee ee ra. ²⁸ Ae enongue paama i nguiã ngu je. Ique sereã nea ngu chuchúaa. Ae eru tu nguiã usẽ ñee ee taicuee. “Eique rã mae ndenongue rese”, i rei que eru ee ra. ²⁹ Eriirĩ ngue ñee ngu je ra. “Cosete que aico rei quiei quiei ndeje. Ndecheẽ ngue amumba mumba eãte quia emo mose. Mbae mo ngue ereiquia eã mbeite seje. Sembae fiesta raã sacua sequiato rese. ³⁰ Ae tu ramo nderiirĩ, ¿mbaerã ticuasú mo ereiquia ee re? Umbae que emumba chooño oso curi resẽ. Siqui siqui cuña icuã ndese. ¿Mbaerã ereico fiesta raã ee re?” i que eririĩ ngu je ra. ³¹ Eru que ñee echeẽ mose ra. “A ereico beite serese a resẽ, Echo. Sembae ja chõ nembraerã ndesẽ. ³² Ndenongue quiatu que quiachã nandesĩ resẽ. Mano naanguia oso nandesĩ. A eru si quera raanguia nande je a. Nyebe fiesta nandesã ee. Nandeya tuchi rã erese”, i que eru nguiirĩ nongue je ra, i que Jesús mbia je ra.

16

Ererecua rimba mo icoquiatsu

¹ Jesús que ñee uchimbaaquiatu je ra. —Sã ererecua mo mbaechate riqui no. Erimba mo ngue embae saarõ ja quia ra. “Nderimba que nembrae mbuquiachã quiachã nguia ra”, i que mbia mo ererecua mbiirandu cote ra. ² Ererecua que ñee ee ra. “¿Mbaerã mbia riqui ñee nderiĩ seje re? ¡Cuentas esã saã mbia mbae ja jẽ! Sembae raarõsa eã nda nde cote”, i que ererecua ngũimba je ra. ³ Erimba que ndua ndua uchiangui re cote ra. “¿Mañi ae ra sequia sererecua se mombo mose re? Sequirãcuã neate quiei

quiei sacua ndesē. Seireŕte ache ache i mbia je. ⁴ Ũquĩ ño nda asaã ee nda. f nda mbia seiŕi turã uchuchuaa sembae eã mose”, i que erimba uchiangui re ra. ⁵ Ae deber i quia ererecua je, ũquĩ je que erimba ñee nda. Co mii mii je. “¿Manya deber ere sererecua je re?” i que erimba emo je ra. ⁶ “Cien latas de aceite que deber ae ee ra”, i que erimba je ra. Erimba que ñee ee ra. “Nembae cuenta nandemombo chõ. Emo nandesaa asi. Cien eã nda cote. Cincuenta achõ ño nda cote”, i que erimba ee ra. ⁷ Ae deber i quia ererecua je, ũquĩ mo je que erimba ñee no nda. “¿Manya deber ere sererecua je re?” i ee. “Cien bolsas de trigo que deber ae ee ra”, i que erimba je ra. Erimba que ñee ee ra. “Nembae cuenta nandemombo chõ. Emo nandesaa asi. Cien eã nda cote. Ochenta achõ ño nda cote”, i que erimba ñee ee ra. ⁸ Ererecua que jirandu erese cote ra. “Serimba aracua chõ eriquichĩ nde no”, i que ererecua ra. Mbia ibi jenda aracua tuchi chõchĩ Dios quiato si. ⁹ Acheẽ tuchi quia jẽje co. iMbae isiquia jemondo mondo quia ibatenda je jẽ! Eĩ nda jẽquiato jiri. Eĩ nda Dios jẽisi quiatu turã ibate jembae ua mose. Huee ra jẽingo bei cote.

¹⁰ Ae mbae ñetẽ saarõ turãte quia, mbae tubiriã abe ra esaarõ turã nguia. Ae mbae ñetẽ saarõ turã eãte quia, mbae tubiriã abe ra esaarõ turãya nguia no. ¹¹ Jẽ jembae mondo turã eã mose Dios je, Dios ra mbae turã mondo eã jẽje ibate. ¹² Jẽ Dios mbae raarõ turã eã mose, ¿aba quia ra mbae mondo jẽje jembraerã tuchi cote re? ¹³ Co mii erimba siqui aronea ererecua nyeremo ndese. Ererecua nyeremo mose, huee ra erimba nguerecua nongue ucuãya. Ererecua nongue ra ebite. Ae ndua beite quia mbae isiquia rese nae, ũquĩ siqui aroneate Dios rese. Ae siqui

beite quia Dios rese nae, ũquĩ ndei ndua eã jiri mbae isiquia rese, i que Jesús ra.

¹⁴ Fariseos que chi Jesús cheẽ andu ja ra. Mbae isiquia quiato tuchi que ũquĩ nda. Nyebe ñee icuã nguiã Jesús cheẽ mose. ¹⁵ Nyebe Jesús ñee asite nguiã ũquĩ je. —Jẽ nguiarei jẽturã jembuchecua tuchi mbia résaa. Dios quiarei jeñiangui renda icua tuchi quia co. Ae eturã abareãte riqui mbia je nae, ũquĩ Dios ucuãya te quia co.

Dios cheẽ nda io ja

¹⁶ Moisés chimbesa que mbia mbaaquiato quiato nyii ra. Dios cheẽ mbuchecuaa chimbesa abe que mbia mbaaquiato quiato nyii ra. Juan tu nonde. Juan ngue Dios cheẽ turã senei senei cote ra. “Mbia rerecuarã tuchi ra Dios cote”, i bei que Juan nguia ee cote ra. Nyebe mbia riqui nguiã ñee. “Dios rimba ra se”, i tuchi mbia quia ã cote. ¹⁷ Ibei ua arõte quia co. Ibi abe ua arõte quia co no. Embesa ji Dios cheẽ nguia ra uayã mbei. Io ja rae.

Eicuãte ngüinisi mombo mose

¹⁸ Mbia ngüinisi mombo mose, ngüinisirã mo nderequia mose, eicuã tuchi ũquĩ. Adulterio, i que ũquĩ je ra. Ae eru mombo, emo aque rerequia mose, eicuãte ũquĩ abe no.

Mbaecha mo oso tata cuasu

¹⁹ Sã mbaecha tuchi mo ndiqui no. Huĩrao turã mingue mingue bei. Huĩrao nininya mingue mingue bei. Fiesta que esaã saã mbei quia ra. Umbae mbae isiquia mumba chooño mbae rese. ²⁰ Sã mbaecha reã mo abe riqui no. Lázaro, i que ee ra. Erete reechu echu que ra. Huee que Lázaro riqui chĩ mbei ngoi ra. Mbaecha chuchua taronda jii. ²¹ Lázaro riãcuã ngue ñee mbei quia ra. “Mbaecha chi u rire nda au rã ña”, i tuchi que equia uchiangui

re ra. Ñooño ngue ngaẽ ngaẽ nguia erete reechu rere rere ra. ²² Lázaro mbaecha reã ngue mano cote ra. Angeles que equerao mbae turãsa Abraham ndea ra. Mbaecha abe que mano nda. Mbia que echati ra. ²³ Mbaecha que oso tata cuasu cote ra. Isho que mae Abraham ndese ra. Lázaro abe. ²⁴ Sã ñeemombo mombo Abraham je no. “Paba Abraham, ndeya eã jiri serese ae. Serasite aico tata réndii a. Lázaro embu rã. Sã o mbia rã i je sechuru mbia sacuã”, i rei que mbaecha ñeemombo Abraham je ra. ²⁵ Abraham ngue ñee ee cote ra. “Mbae tubiriãte que nembae nyii resẽ. Lázaro quiatu que mbae rasi saã tuchi quia nyii ra. A eriqui turãte a cote, nde nderasi rasi mose cote. ²⁶ A jenda mo oso aroneate erasa ndeje hue. Hue jenda abe tu aroneate erasa ure je aa no”, i que Abraham mbaecha je ra. ²⁷ Mbaecha que ñeemombobe Abraham je ra. “Lázaro chõ emondo Paba chuchúaa no, Abraham. ²⁸ Hue senongue cinco chi hue. Sã Lázaro si ñee ee. Embiirandu. I nda ecuaẽ eã mbae rasi raã a”, i rei que mbaecha ñee Abraham je ra. ²⁹ Abraham ngue ñee ee ra. “Ndenongue Moisés chimbese rerequia hue. Dios cheẽ mbuchecuasa cheẽ abe rerequia hue no. Sã ñquĩ mumbayã”, i que Abraham ee ra. ³⁰ Mbaecha que ñeembe Abraham je ra. “Embesa ji rerequia raque. Mano je oso mose ñee ee, aque cheẽ nguia ra emumbayã cote. Huĩcuã nda esecha cote”, i rei que mbaecha ñee Abraham je ra. ³¹ Abraham ngue ñee ee ra. “Ndenongue Moisés chimbese mumba mumba mose, mano je cheẽ abe ra emumba no. Eraaque mo quera si je ñee mose ee, aque cheẽ abe ra emumba no”, i que Abraham ñee mbaecha je ra, i que Jesús ra.

17

Mbae icuã nda nandesã uquiachi emo je

¹ Jesús que ñee uchimbaaquiatu je ra. —Mbae icuã nguia rei siqui bei tuchi mbia mbĩcuã nonde. Ae ñee nguia mbia je nae, “mbae icuã esaã” i nae, eicuã tuchi chõ ñquĩ nde. Ae “mbae icuã esaã” i nae, ñquĩ nda mbae rasi saã tuchi cote. ² Ae ra mbae icuã saã uquia seicuasa mo je nae, ñquĩ nda mbae rasi saã tuchi cote. Ñquĩ nda aba mombo chõ ama ndisa ye nyii re chã. Sita resebe ecua ji mondo. I nda mbae icuã naa uquia eãte rei seicuasa je. ³ Ijẽingo chooñoa ño nguia jẽ! Nderesenda icuã mose ndeje, echeẽ ño ee. “Nandeico turã ño”, ere ee. Hui mose huiĩcuã si, eicuã si etesareĩ chõ nde. ⁴ Sã nderesenda mbae icuã naa naa si ete veces ndeje no. Sã ñee ndaque siete veces ndeje no. “Mbae icuã nda asaã eã ndeje cote”, sã i raque ndeje no. Eicuã si etesareĩ chõ, eicuã mbei bei raque, i que Jesús ñee ee ra.

Jẽ Dios icua jiri mose, eĩ nda mbae mo jeñee mumba eãte rei

⁵ Jesús chimbaaquiatu que ñee ee ra. —Dios eicua tuchi rã ure je, i que ñee Jesús je ra. ⁶ Jesús que ñee ee ra. —Jẽ Dios icua jiri mose, i nda mbae mo jeñee mumbayãte rei. I nda jeñee ndei ira je. “Nde ae echisiqui. Nde ae si echitiquia ama ndisha ite re”, i ira je. I nda ira jeñee mumbayãte rei, jẽ Dios icua jiri mose.

Dios rimbachõ ño nande re, jenye chõ nguia

⁷ Sã emo nimba mo ndiqui bei turuquia rĩ ticuasuu raarõ arõ no. Ecuasẽ mose tuchúaa, ¿mañi nda ererecua ñee jei ee re? “Equiaru rã”, i jei ee re. ⁸ Tei. I jei eã nda ee. “Sechiurã esaã naa seje. Sequiaru eteaquiatu rã nyii. Aquere quia

terequiaru nde”, i chõ nda ererecua ee. ⁹ Ererecua ra gracias i eã ngũimba je. Erimbachõ ño ñene. ¹⁰ Eĩ si chõ jẽ no nde. Dios rimbachõ ño jẽ no nde. Ae riĩ Dios riqui ñee jẽje, ũquĩ naa ja mose, jẽingo mingue chõ nguia ee jẽ! “Ae riĩ Dios ñee nande je nae, ũquĩ miĩ ño ngue nandesaã nda. Erimbachõ ño nande re”, jenyẽ chõ nguia ico mingue, i que Jesús ra.

Jesús mbia leproso ata mbucherõ

¹¹ Jesús que ngata si Jerusalén icha rui ra. Galilea rĩ ngue écoi quia ra. Samaria rĩ abe que écoi quia ra. ¹² Jesús que ngasẽ sucha tubiriã moo nda. Hue que mbia rasi mo chi ee ra. Diez que ra. Eire rasi ja que ra. Lepra, i que ũquĩ mbia rasi je ra. Erasi que chi icúe isho jiri Jesús si ra. ¹³ Ũquĩ mbia rasi que ñeemombo mombo Jesús je ra. —¡Jesús! ¡Mbia mbaaquiatusa! Urembucherõ na ae, i que ñeemombo mombo ee ra. ¹⁴ Jesús que mae erese cote ra. Ñee ngue ee ra. —Eno. Jẽso jendete reacuquia sacerdotes je, i que Jesús ee ra. Ecuata mose chõ ngue nyerõ ja ra. ¹⁵ Ucherõ ndese mae mose que co miĩ ndu nyebi ñee Jesús je ra. Eya tuchi que ñeemombo mombo Dios riĩ nda. ¹⁶ Ngoi que ngũĩã ndese Jesús resa quitu ra. Nyibi que u ñee ee ra. Gracias i tuchi que Jesús je cote ra. Samaria jenda que ae ra. Judío eã ngue ra. ¹⁷ Jesús que ñee nda. —Eatate que ambucherõ. ¿Ma eataque ma nde? ¿Ma nueve ma nde? Nyebiã ñochĩ ecuaẽ gracias i seje. ¹⁸ Co miĩ tuchi chõ tuchi nyebi gracias i Dios je co. Judío eã ndaque, i que Jesús ra. ¹⁹ Jesús que ñee erasi je cote ra. —Ehuã. Eso cote. Nde que seicua ra. Nyebe arembucherõ nguĩã, i que Jesús ee ra.

Mbia chiangui re quiatu Dios riqui nguĩã mbia rerecuarã

²⁰ —¿Manosete ra Dios ru íbii mbia rerecuarã tuchi re? i que fariseos ñee Jesús je ra. Jesús que ñee ee ra. —Mbia ra mae eã erese. ²¹ “¡Aa chõ Dios riqui mbia rerecuarã jẽ!” iã ndae. “¡Pee chõ Dios riqui mbia rerecuarã jẽ!” iã nda eno. Mbia chiangui re quiatu Dios riqui nguĩã mbia rerecuarã, i que Jesús ra.

²² Jesús que ñee uchimbaaquiatu je cote ra. —Namo jiri ra jẽ seosei osei setiã mose cote. “Jesús nda siqui mbiriĩ na nanderese chã”, jenyẽ rei nda re. ²³ “Hue Cristo riqui hue”, ichõĩño nda mbia jẽje serĩ. “Pe eriqui pe”, ichõĩño nda jẽje no. “Nyia” jenyechĩ nda ee jẽ. Ñeeñooño ndae. ²⁴ Sechecuayã nguia ra achuã. Mbia ra mae ja quiatu senininya rese seru mose. Sã mbia riqui mae jate ama pirirã i rese no. Eĩ ae quia ra u mbia mu-mae ja. ²⁵ Sechube nonde ra mbia icuã tuchi seje. Mbae rasi ra asaã tuchi rã. Ae siqui namo ã mbia, ũquĩ nda seririrõ tuchi rã. ²⁶ Sã Noé mosenda mbia siqui sereã tuchi Dios rese no. Eĩ si ra mbia siqui sereã Dios rese sechu nonde no. ²⁷ Sã Noé mosenda mbia quiaru chooño no. Ndua rocoĩ Dios rese. Sã ngũinisirã nderequia chooño no. Sã mbae raã ñooño ndua rocoĩ Dios rese no. Sã Noé ique chee arca ye no. Sã ama ndicuasú tu cote no. Sã mbia mano ja no. ²⁸ Sã Lot mosenda abe mbia no. Sã quiaru chooño no. Sã mbae isi isi chooño no. Sã mbae ei tiquia chooño no. Sã uchuchuarã naa ñooño no. Sã mbae raã ñooño no. Ndua rocoĩ Dios rese no. ²⁹ Sã Lot usẽ nyee hue si cote no. Sã Dios tata mbu ibate si cote no. Sã Sodoma jenda oquei ja aque mose no. ³⁰ Eĩ si ra mbia mbae raã ñooño. Seru mose chee. Ndua rocoĩ serese. ³¹ Emo siqui mose taicue se tu mose, ique eã nda uchuchua umbae rerecquiatu. Ae siqui úcoo, nyebiã nda u uchuchua no. ³² ¡Lot ninisi rã nda jẽingochĩ

jê! ³³ Ae ngueteâte quia ngueco rese nae, ereco ra quiachã esi. Ae ngueteã eâte quia ngueco rese nae, aque reco quia ra quiachâyã esi. ³⁴ Sechu mose, aque isa ra nyeremo chi uque quisa ye. Co mii nda arao. Enongue ra siquichõ. ³⁵ Cuña nyeremo nda chi mbua tocho no. Co mii nda arao. Enongue ra siquichõ no. ³⁶ Mbia nyeremo nda chi úcoo no. Co mii nda arao. Enongue ra siquichõ no, i que Jesús ra. ³⁷ —¿Mangue ra ũquí mangue re, Jesús? i que echimbaaquiatu ra. Jesús que ñeembe ee ra. —Ae ri mbae raaque riqui chi nae, huae ra urubu choi ja tuchi, i que Jesús ra.

18

Eru cheecha ñee chiibe ibe ererecua mo je

¹ Jesús que ñee uchimbaaquiatu je ra. —Sã mbia riqui ñee mbei Dios je. Sã tesareiã mbei ñee Dios je. ²⁻³ Sã eru cheecha mo ndiqui no. Oso chiibe ibe ñee ererecua je no. “Ae sembae quereco nae, sã aque sembae meembe seje”, i chiibe i bei ererecua je. Dios quiatoã ndaque ererecua. Mbia quiato biâte raque aque ererecua. ⁴⁻⁵ Ererecua que eru cheecha cheẽ ñanduchõ nyii ra. Eru cheecha que ñee i i tuchi ee ra. Ererecua que ndua chee uchiangui re ra. “Ari riqui ñee chiibe i bei tuchichĩ seje co. Echeẽ tamumbayã na”, i chee que ererecua ra, i que Jesús ñee uchimbaaquiatu je ra. ⁶ Ñeembe que ee ra. —Sã ererecua ari cheẽ mumbayã nyee no. Ererecua icuâte raque. ⁷ Eĩ nda Dios uquiato cheẽ mumbayã no. Dios quiato riqui ñee ñee mbei Dios je co. Arõ mose. Isa abe. Dios riqui uquiato ucuâyãsa riisu isu raque co. ⁸ Dios ra uquiato cheẽ mumbayã nyee cote. Se tube mose ibii manya sequiato ra chi bei ñee Dios je reae, i que Jesús ra.

Mbia nyeremo ñee Dios je

⁹ Ucuasu raã naasa mo ngue chi Jesús je ra. Mbia ataque ririrõte que equia ra. Mbia ataque isi teã teã mbei. Nyebe Jesús ñee nguiã ũquí je. ¹⁰ —Sã mbia nyeremo nyoĩ ique Dios chuchua no. Ñee Dios je no. Co mii ngue fariseo ra. Enongue que impuestos isi isi quia ererecua mbaerã nda. Mbia mbiĩrĩ irĩsa que ae ra. ¹¹ Fariseo que ñee ndei Dios je ra. “Dios, seturâte se. Mbia icuã na eã ño se re. Co mbia mbiĩrĩ irĩsa rã eã ño se re. Mbae mbuquiachãsa eã ño se no nde. Acheẽ ñooño eã ño se re. Emo ninisi rese aicoãte se. Mbia ambĩrĩ irĩ ate quia co. ¹² Aquiaruã mocoĩte quia ndua bei nderese co. Diezmos amee mee mbeite quia ndeje co”, i rei que fariseo ñee Dios je ra. ¹³ Aba mbiĩrĩ irĩsa que chĩ isho ra. Uãquí ngue embucheseco ibi quiti ra. Uchiã ngue eisi ñee Dios je ra. “Ndeyayã ño serese, Dios. Mbae icuã asaã saã mbei chõchĩ nguia co. Seyayã tuchichĩ seicuã ndese”, i que ñee Dios je ra. ¹⁴ Tacheẽ nyecua rã jêje. Dios que aba mbiĩrĩ irĩsa cheẽ isi turã nda. Ico minguite quiatu nguiã ñee ñee Dios je. Fariseo quiatu ngue uturã saã saã mbeite nguiã ñee Dios je. Nyebe Dios echeẽ ñanuate nguiã. Ae ucuasu saã saã nguia nae, ũquí nda Dios isiãte. Ae ico tochei quia Dios je, ũquí nguiatu ra Dios isi, i que Jesús ra.

Jesús mbia riirĩ isi turã turã

¹⁵ Mbia que nguiĩrĩ ngurucuaẽ cuaẽ nguia Jesús je ra. Jesús oco oco sacua ere. —¿Mbaerã jendiĩrĩ jendu quia co re? i rei que Jesús chimbaaquiatu ñee mbia je ra. ¹⁶ Jesús quiatu que ñee nda. —Tei. Jêsecha. Sã nguiĩrĩ ndurucuaẽ seje. Eĩ ño Dios rimba re. Mbia riirĩ na. Ucuasu raã naa eã. ¹⁷ Mbia riirĩ na ño jẽingo Dios isi turã. Eĩ jenye mose, Dios rimba tuchi ra jê cote, i que Jesús ra.

Acuanindu mbaecha mo ñee Jesús je

¹⁸ Ererecua mo ngue ñee Jesús je ra. —Mbia mbaaquiatusa turâte nde. ¿Mañi ae ra se siqui bei nonde ibate re? i que ererecua ñee Jesús je ra. ¹⁹ Jesús que ñee ee ra. —¿Mbaerã ereico eturã i seje re? Dios mii ño eturã ndesê. ²⁰ Dios cheê ereicuate resê: “Emo ninisi rese ra ereicochi. Mbia mo nda ereiquiachĩ no. Mbae ra erembuquiachãchi. Erecheê ñooñochi nda emo nii. Ndeturã ño nderu je. Ndeturã ño ndesi abe je”, i que Dios cheê nda, i que Jesús ñee ererecua je ra. ²¹ Ererecua que ñee ndei Jesús je ra. —Ũqui ngue amumbayã ja bei quia ra. Señetê mosenda bei, i rei que ererecua ra. ²² Jesús eandu mose que ñee ee ra. —Mbae mii mo abe eresaã eâte. Ña abe esaã. Nembae emondo mondo ja mbia mbaecha reã je. Nde ũqui naa mose, mbae tubiriã nda nde, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²³ Ererecua Jesús cheê andu mose que echosoi oso serite cote ra. Mbaecha tuchite quiatu ngue ae re. ²⁴ Jesús que mae mbaecha ia eã ndese ra. Ñee ngue mbia je cote ra. —Mbaranguiatu âte mbaecha je ngasê sacua ibate Dios rese. ²⁵ Sã ticuasú mo ndiqui oso aroneate aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁶ —¿Aba quia ra oso Dios rea re no? i que mbia Jesús je cote ra. ²⁷ Jesús que ñee ee ra. —Ae mbia saã aroneâte quia nae, Dios mii ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacua nderui, i que Pedro ee ra. ²⁹ Jesús que ñee ee ra. —Emo umbae recha ja mose Dios rĩ, Dios ra esibishorõ tuchi ee. Ae uchuchua secha. Ae ngu secha. Ae usi secha. Ae ngõngue secha. Ae ngũinisi secha. Ae nguĩrĩ secha.

³⁰ Ũqui mbae ja ra Dios sibishorõ tuchi. Ibii mbia reco bei mose. Aquere ra Dios emingo bei ibate cote, i que Jesús ra.

Mbia ra seiquia, i si Jesús

³¹ Jesús que ñee icúee uchimbaaquiatsu doce je ra. —Co nandeso quia Jerusalén co. Ae Dios cheê mbuchecuasa mbesa mbesa quia serĩ nyii nae, ũqui nda io ja cote. ³² Mbia ra semee judíos eã je cote. Mbia ra secheê naa naa. Ñee icua tuchi ra seje. Nnimbu nimbu ra serese. ³³ Seiruã nuã ndae. Seiquia ra cote. Tres nyaashi mose ra aquera si, i que ñee ee ra. ³⁴ Echimbaaquiatsu que echeê icuayâte ra. —¿Mbae rĩ eriqui ñee nande je re? i que nyue ra.

Jesús eresayã mo mbucherõ Jerico

³⁵ Jesús Jericó rurubi mose que eresayã mo ndiqui ee ra. Ñeenda jie que eñi ache ache i mbia je ra. ³⁶ Eresayã ngue mbia tubiriã quicoi chandu ra. —¿Mbae ere? i que eresayã emo je ra. ³⁷ —Co Jesús coi quia co. Nazaret jenda coi quia co, i que emo eresayã je ra. ³⁸ Eresayã ngue ñee mombo ra. —¡Jesús! ¡David rucucha! ¡Ndeya eã ño serese jê! i que eresayã ñee Jesús je ra. ³⁹ Ae rane nyoĩ quia, ũqui ngue ñee ndei eresayã je ra. —¡Equirirĩ chõ jê! i rei que ee ra. —Jesús, ¡ndeya eã ño serese jê! i bei bei que Jesús je ra. ⁴⁰ Jesús que tiba cote ra. —Eresayã jendu rã, i que mbia je ra. Eresayã ngue oso Jesús rĩchã cote ra. ⁴¹ —¿Mañi ae ra ndeje re? i que Jesús ñee ee ra. —Serese embuturã na, Sererecua, i que eresayã nda. ⁴² Jesús que ñee ee ra. —Nderesa que cote ra. Seicuate quiatu ngue se re. Nyebe arembucherõ nguĩ, i que Jesús ee ra. ⁴³ Aque mose tuchi que eresayã ndesa turã cote ra. Mae turã ngue cote ra. Jesús rui que esi quia cote ra. Ñee turã turã tuchi que equia

Dios rĩĩ cote ra. Ae mae erese nae, ũquĩ abe que ñee turã ja quia Dios je cote ra.

19

Taico nderese, i Zaqueo Jesús je

¹ Jesús que ngasẽ Jericoo cote ra. Sucha tubiriã ite rĩ ngue esi quia ra. ² Mbia mbaecha mo ngue siqui ee huee ra. Zaqueo, i que ee ra. Aba mbĩrĩ irĩa que ae ra. Impuestos isi isiquia rerecua que ae ra. ³—Jesús rese tamae. Jesús taicua rã, i rei que Zaqueo ra. Mbia tubiriã ngue Jesús chatite esi ra. Zaqueo jua tuchi que ra. Nyebe mae aroneate nguiã Jesús rese. ⁴ Zaqueo que oso uchã Jesús nonde ra. Nyui que oso ira mo ñi nda. Jesús ucua rese mae sacua. ⁵ Jesús que ngasẽ Zaqueoqui re cote ra. Soboiba que mae erese ra. —Equichi, Zaqueo. Taso ndechuchua nderese, i que Jesús ee ra. ⁶ Zaqueo que nguichi asi u cote ra. Eyate que Jesús rerao uchuchúaa ra. ⁷ Mbia que ñee ñee tuchi Jesús rĩĩ cote ra. —¿Mbaerã Jesús si quia mbia icuã nyuchúaa aque re? i tuchi que mbia ñee nda. ⁸ Zaqueo que juã ñee Jesús je ra. —Sererecua, tacheẽ ndeje. Sembae tachisia nyibite rĩ mondo sacua mbia mbaecha reã je. Ae asirõ ñooño mbia si nae, ũquĩ tambuchebibe ee. Eata tambuchebibe ee, cuatro veces, i que Zaqueo Jesús je ra. ⁹ Jesús que ñee ee cote ra. —Arerirõ ngue mbae icuã si namo nda. Judiote quiatu nde re. ¹⁰ Quiachã je requia chõ achu nguiã ibate si co. Quiachã je mingo bei sacua abe chõ achu nguiã ibate si co no, i que Jesús ra.

Mbae isiquia jembaata, i ererecua ngũimba je

¹¹ Mbia que Jesús cheẽ ñandu turã nguia ra. Jerusalén ndurubite que echoi quia ra. —Mbia rerecuarã ja ra Jesús cote reae, i rei que

mbia quia ndua ndua ra. Nyebe Jesús ñee nguiã ee. ¹² —Sã mbia mo ndiqui oso ibimo isho tuchi no. “Mbia rerecuarã eico nde cote”, i nonde mbia pe jenda ee. Aquere ra eru mbia rerecuarã cote. ¹³ Sã ñee ja ngũimba je oso nonde no. Diez rei erimba. Mbae isiquia atate que embuchao chao ngũimba je ra. “Ã mbae isiquia jembaata ata oso quia. Sechu mose chee”, i que ngũimba je ra. ¹⁴ Sã hue jenda mbia aque ucuãyãte no. Comisión ngue emondo ra. “Aque urebiãte urererecuarã”, i rei que comisión mondo ra. ¹⁵ Gobierno ngue emii mbei chõ ererecuarã nda. Nyebe uba bei u nguiã uchuchua cote. Ngũimba je que ñee cote ra. ũquĩ diez. Ae je eriqui mbae isiquia mondo nae, ũquĩ. “¿Sechimee mbae isiquia jembaata ata rei re?” i jaaja que ngũimba je ra. ¹⁶ Erimba mo ngue ñee ee ra. “Ae. Aque mii ngue eremee ndei seje nyii, ambaatate que se cote ra. Diez que cote ra”, i que nguerecua je ra. ¹⁷ Ererecua que ñee ee ra. “Coche ñene. Serimba turãte nde. Mbae ñetẽ ngue eresaã turãte quia secheẽ nguire ra. Nyebe mbae cuasu tamondo ndeje cote. Diez pueblos rerecuarã nda nde cote”, i que ererecua ngũimba ñiinda je ra. ¹⁸ Erimba nongue que tu ñee ee cote ra. “Aque mii ngue eremee ndei seje nyii, ambaatate que se cote ra. Cinco que cote ra”, i que nguerecua je cote ra. ¹⁹ Ererecua que ñee ae abe je no nda. “Eno. Cinco pueblos rerecuarã nda nde cote”, i que aque ngũimba je ra. ²⁰ Erimba nongue que tu ñee ee cote ra. “Co nembae mbae isiquia co. Tiru ye que areco bei ra. ²¹ Sesiquichete quiatu ngue ndesi re. Erequeteãte quiatu nguiã mbae rese. Ndechitiquia eã abe ereishao shaote quia co. Nyebe nembae mbae isiquia areco quiatuchõ ño nguiã

ndeje”, i que aque nguerecua je ra. ²² Ererecua que paama i tuchi ñee ee ra. “Serimba icuã tuchichĩ nde re. Nde si chõ erecheẽ nguia sembi-irandu. ‘Nembae que ambaata eãte ra’, ere chõchĩ. ‘Areco quiatuchõ ño nguia’, ere chõchĩ. Se ngueteã mose mbae rese ndeje ¿mbaerã secheẽ eremumba re? ²³ ¿Mbaerã sembae mbae isiquia eremondo eã banco re? f nda ñimbaata jiri rei seje”, i que ererecua ñee asi aque ngũimba je ra. ²⁴ Ae chi huee, ũquĩ je que ererecua ñee nda. “Ae sembae quereco chooño nguia nae, jēsirõ na esi. Ae diez quereco quia nae, aque je jemondo”, i que ererecua ra. ²⁵ Mbia que ñee ererecua je ra. “¿Mbaerã nda re? Eatate ae resẽ. Diez que ae resẽ. ¿Mbaerã nda emo abe eremondo ee re?” i que mbia ñee ererecua je ra. ²⁶ Ererecua que ñee ee ra. “Ae embaete nae, mbae tamondobe ee. Ae mbae quereco ãte quia nae, embae tasirõ ja esi. ²⁷ Seucuâyãsa jendu ja rã. Ae ñee nguia seriĩ. ‘Aque urebiãte ure-rerecuarã’, ae i quia seriĩ. Ũquĩ jendu ja. Ũquĩ jēiquia ja sésaa”, i que ererecua ra, i que Jesús ñee mbia mbaaquiatu ra.

Jesús ngasẽ Jerusalén

²⁸ Jesús cheẽ jare que ngata si Jerusalén icha rui ra. ²⁹ Jerusalén ndurubite que echoi ngasẽ nda. Betfagé, i que hue sucha je ra. Betania, i que hue sucha erurubinda je no nda. Ibi ibate abe que chĩ huee ra. Monte de los Olivos, i que ee ra. Hue si que uchimbaaquiatu nyeremo mondo cote ra. ³⁰ —Aichi súchaa chõ jēso rã. Burro riirĩ cuasa ra chĩ jēje hue. Ae ato emo nyui ãte. Jenyura seru seje. ³¹ “¿Mbaerã nda jenyura re?” i mose emo jēje, jeñee ee. “Nandererecua que jendu i ra”, jenyee ee, i que Jesús ũquĩ nyeremo mondo ra. ³² Nyoi que súchaa ra. Ae

riĩ Jesús ñee ee nae, ũquĩ ngue nye-cua ja ee cote ra. ³³ Burro riirĩ ngue etea ra. Era mose que echa ñee ee ra. —¿Mbaerã jēingo era era re? i que ee ra. ³⁴ Jesús chimbaaquiatu que ñee ee ra. —Nandererecua que jendu i ra, i que echa je ra. ³⁵ Burro riirĩ ngue ecuruchoi Jesús je cote ra. Echimbaaquiatu que huiirao chono ñono burro arõ nda. Mbia que Jesús mbuchui burro ato cote ra. ³⁶ Jesús ngata mose burro ato, mbia que huiirao mbiitee ee ibi rĩ nda. Jesús nonde. Jesús oso sacuã hue rĩ. ³⁷ Jesús quiato tubiriã tuchi que nyoi quia erese ra. Monte de los Olivos icha re ngasẽ mose, Jesús quiato que tasẽ tasẽ tuchi ra. Eya tuchi que ra. Ñee mombo mombo turã ngue Dios je cote ra. —Jesús riqui mbia mae sayã naa naa tuchi mbia je co, i que ñee mombo mombo turã Dios je ra. ³⁸ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. Dios turã tuchite nande je, i que mbia ia tuchi ra. ³⁹ Fariseos mo abe que chĩ huee ra. Ũquĩ ngue ñee ndei Jesús je ra. —Ndechimbaaquiatu embaasẽ asẽ eã jiri ae, i rei que Jesús je ra. ⁴⁰ Jesús que ñee ee ra. —Sequiato ñeemombo mombo eã mose seriĩ, eĩ ndei ra sita ñeemombo mombo seriĩ cote, i que ñee nda.

⁴¹ Jesús que ngasẽ serĩte oso quia Jerusalén cote ra. Sucha checuate que esi quia ee cote ra. Jesús ia eã tuchi que Jerusalén ndese ra. Nyeseo que erese cote ra. ⁴² Jesús que ñee sucha tubiriã je cote ra. Jerusalén je. —Seyayã tuchi aico nderese co, Jerusalén. Mbia mbi-asa ereicuayã mbei chõchĩ nguia co. Echecuayã mbei chõ eriquichĩ ndeje co. ⁴³ Mbae rasi ra ere-saã tuchi cote. Ndeucuâyãsa ra nderiquisã tuchi cote. Nemama nda ecuaẽ. ⁴⁴ Sucha ra embucoi ja

ndeyenda. Sita ra embucoi ja tuchi mbia chuchua si. Mbia ra mano ja ndeyenda cote. Dios quiatu ngue ereisiã mbeite nguã. Dios sembu mose nderea, aque mose abe que seisiãte no nda, i que Jesús ñee Jerusalén je ra.

Jesús mbia mbusẽ Dios chuchua si

⁴⁵ Jesús que oso Dios chuchúaa ra. Huee que mbia riqui mbae isi isi querabe ra. Mbae mondo mondo abe mbae isiquia ribishorõ. Jesús que ùquĩ mombo ja Dios chuchua si ra. ⁴⁶ Jesús que ñee mbia je ra. —“Mbia cheẽsa Dios je”, i ra mbia Dios chuchua je”, i que embesa ji ra. Jẽ nguia jẽicuã tuchite Dios chuchua je re. Mbae mbuquiachãsa chuchuarã ño jẽsaãte chĩ nguia Dios chuchua je, i que Jesús ùquĩ je ra. ⁴⁷ Jesús que mbia mbaaquiatsu quiatu bei quia Dios chuchúaa ra. Ererecua cuabẽte que mae icuã icuã nguia erese ra. Sacerdote rerecua. Embesasa abe no. Mbia rerecua ja. Ûquĩ ererecua ja que ñee ñee nguia nyue ra. —¿Mañi nande ra equia Jesús iquia sacua nde? i que ererecua quia ñee ñee nyue ra. ⁴⁸ Ererecua que Jesús iquia aroneate ra. Mbia tubiriãte quiatu que Jesús chandu quia ra.

20

¿Aba nembure? i mbia ñee Jesús je

¹ Emo mose que Jesús riqui mbia mbaaquiatsu quiatu Dios chuchúaa ra. Ererecua que ngaẽ ja ñee ee ra. Sacerdote rerecua. Embesasa abe no. Amei abe no. ² Ûquĩ ngue ñee ja Jesús je ra. —¿Mbaerã ereico mbia mbaaquiatsu quiatu re? ¿Aba “mbia mbaaquiatsu quiatu” i ndeje re? i que ererecua ja Jesús je ra. ³ Jesús que ñee ee ra. —Se rane tacheẽ jẽje. Se rane preguntar tae jẽje. ⁴ ¿Aba ñee Juan je re? “Eso bautizar i mbia je” i ee re. ¿Dios eã ño ere no? Jeñee

seje, i que Jesús ee ra. ⁵ Ererecua que ndua ndua ja u ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate. Eĩ nda ñee nande je. “¿Mbaerã jẽingoãte erui re no?” i quiarei ra nande je. ⁶ “Dios eã ngue embu ra”, nande aroneate no. Mbia ataque ra paama i tuchi nande je. Nandei ei ra sita je. Juan quiato tuchi que mbia, i que ererecua ñee ñee nyue ra. ⁷ Ererecua que ñee nyee Jesús je ra. —Ureicuayãte. Aba chõ Juan mbu. Bautizar i sacua, i que ererecua ñee ja ee ra. ⁸ Jesús abe que ñee ee cote ra. —Se abe ra acheẽ eã jẽje no. Aba chõ “ã esaã” i seje. Acheẽ eã nda jẽje no, i que ererecua je ra.

Uva raarõsa icuã icuã nguerecua je

⁹ Jesús que mbia mbaaquiatsu quiatu cote ra. —Sã mbia mo ndiqui no. Sã ibicha mo ndiqui no. Sã ibicha riqui uva i tiquia tiquia no. Sã ibicha riqui “sembae uvas jẽsaarõ”, i emo je no. Sã eriqui oso itõte no. ¹⁰ Uva quiche mose que echa ngũimba mo mondo rei umbaerã ndea ra. Ae uva saarõ nguia nae, ùquĩ ngue eisi icuã tuchi ra. Ucuu ucuu que erese ra. Eochi que emondo mbuchebi ra. ¹¹ Echa que ngũimba mo mondo rei ereabe no nda. Aque abe que eraarõsa isi icuã no nda. Ucuu ucuu que aque abe rese no nda. Eochi que emondo mbuchebi ra. ¹² Echa que emo abe mondo rei ra. Aque abe que eiruã nua mondo mbuchebi no nda. ¹³ Echa ia eãte que ra. “¿Mañi ae ra se re? Seriirĩ quiatu tamondo erea cote. Ûquĩ nda ireĩ ireĩ jiri esi cote reae”, i rei que echa ra. ¹⁴ Uva raarõsa mae mose erese que ñee nyue ra. “¿Co eriirĩ ndu quia co cote jẽ! ¡Nandequia rei jẽ! f nda uvas nandembaerã ae cote”, i que ñee nyue ra. ¹⁵ Eraarõsa que eriirĩ querao pe jiri eiquia ra. Eriirĩ

ngue mano cote ra. ¿Mañi nda echa quia eraarõsa je cote re? ¹⁶ Echa ra oso eraarõsa iquia ja cote. Ibi ra emondo emo je cote. Eraarõ sacua, i que Jesús mbia je ra. —¿Ũquĩ nda iquechĩ jẽ! i que mbia ra. ¹⁷ Jesús que mae erese ñee ee cote ra. —¿Ã embesa ji rese jemae âte re?

Sã emo ndiqui tuchia ao sita je no. Sã sita mo ndirirõ mombo no. Eicuâte eriqui reĩ nguiã ee.

Aquere Dios emundua si erese.

“Earonda sacua turambi chõ eriqui re”, i ndua si uchimombo rese.

Sã uchimombo rirõ si cote no, i que embesa ji ra. ¹⁸ Ae ra nyoĩ ngoi aque sita arõ nae, ũquĩ nda huẽ. Aque sita ngoi mose emo arõ, ũquĩ nda mano, i que Jesús ra. —Aque sita rã ndei se, i chõ ngue re.

¿Impuestos ra uremee ererecua je re? i mbia ñee Jesús je

¹⁹—Nanderĩ ño Jesús riqui nguiã ñee a. Nandeisi rei serao jẽ, i rei que sacerdotes rerecua ñee nyue ra. Embesasa abe no. Ũquĩ ngue paama i ja Jesús je ra. Jesús isi aronea tuchite que mbia résaa ra. Eireĩte quiatu ngue mbia tubiriã si re. ²⁰ Ererecua que mbia icuã mondo mondo quia Jesús cheẽ andu andu ra. —¿Jêturã jêsaã saã oso Jesús je jẽ! ¿Echeẽ ndese jenyiisaquia quiatu ure je jẽ! Mbae mo nũ ñee icuã mose, jnandeisi rei jẽ! Ererecua tuchi je nandemondo cote, i ja que ererecua ñee nda.

²¹ Ae chi uturã naa naate Jesús je nae, ũquĩ ngue ñee ee ra. —Jesús, co ereico mbia mbaaquiatsu quiatu turâte co. Mbia jaje ndeturâte riqui co. Mbia erembaaquiatsu quiatu turâte quia Dios icha riĩ co.

²² Nyebe ureico nguiã ñee ndeje a. ¿Coche mbia mbae isiquia mee mee mose Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ²³ Jesús que ũquĩ icuã icuate

ra. Nyebe ñee nguiã ee. —¿Mbaerã jẽingo “ĩ nda Jesús ucheẽ nyabi”, i seje re? ²⁴ Mbae isiquia mo jêteacuquia imbu seje. ¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. —Romano nderecua, i que ñee Jesús je ra. ²⁵ Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee, i que Jesús ee ra. ²⁶ Jesús que ucheẽ nyabi aroneate ee ra. Ũquĩ ngue nyuruira jate u Jesús cheẽ andu ra. Nyebe eriqui ñee eã ee cote.

Mbia raaque ra quera si, i Jesús

²⁷ —Mbia raaque ra quera eã mbei, i que mbiamo nguiã ñee nda. Saduceos i que ũquĩ je ra. Ũquĩ mo ngue nyoĩ ñee Jesús je ra.

²⁸ —Ã ngue Moisés mbesa nande je ra: “Emo eriiriã mano mose, ngũinisi recha mose, sã enongue mano je ninisi rerequia. Sã tiirĩ ngõngue raaque riĩ”, i que Moisés embesa nande je ra. ²⁹ Sã eriqui mo ndiqui no. Eribi que seis ra. Eriqui que ngũinisiã quereco rei ra. Mano ño ngue tiirĩ ndocoĩ ngũinisi recha ra. ³⁰ Enongue que nguiqui cheecha quereco rei cote ra. Ae abe que mano ño tiirĩ ndocoĩ no nda. ³¹ Enongue abe que equereco rei cote no nda. Ae abe que mano ño tiirĩ ndocoĩ no nda. Ũquĩ seis ja que ngõngue cheecha quereco ja rei ra. Mano ja tuchi chõ ngue tiirĩ ndocoĩ no nda. ³² Eninisi eru cheecha abe que mano ño nyee cote ra. ³³ Siete que eru nyi resẽ. Mbia raaque quera si mose, ¿abate ra equereco cote re? i que saduceos ñee Jesús je ra. —Ma Jesús ñee icuã no, i chõ ngue re.

³⁴ Jesús que ñee ee ra. —Aa chõ mbia riqui nguiã ngũinisi rerequia querabe. Siqui mose íbii. ³⁵ Ae raaque ra Dios mbuquera si nae, ae ra Dios mingo bei nyiese nae,

ũquĩ nda ngũinisi quereco eã mbei huee cote. Ũquĩ nda ngu quereco eã mbei huee cote no. ³⁶ Huee quiatu ra mbia manoã mbei. Angeles rã mbei ra mbia riqui huee cote. Dios riirĩ tuchi ra eriqui huee mose cote. Embuquerái quiatu ra cote. ³⁷ Moisés abe que mbia mbiirandu ra. “Mbia raaque quera quera bei quia co”, i que Moisés ra. “Se rei Dios. Abraham nderecua chõ aico nguiã co. Isaac nderecua abe. Jacob nderecua abe no’, i que Dios ra”, i que Moisés embesa ra. Ira ruri rendi mose que Dios Moisés mbiirandu ũquĩ ndese ra. ³⁸ Ũquĩ mano ndaque nyii. Ũquĩ ndeco siqui bei chõ nguiã ũquĩ. Mbia raaque rerecua eã ño Dios re. Mbia reco rerecua chõ ñene. Mbia reco ja chõ siqui nguiã Dios je ã, i que Jesús ee ra. ³⁹ —Ndecheẽ turãte, i que embesasa mo ñee Jesús je ra. ⁴⁰ Ae “Jesús nandembũcuã” i rei quia, ũquĩ ngue ñee eã Jesús je cote ra.

¿Aba rucucha Cristo re?

⁴¹ Jesús que ñee mbia je ra. —Se abe tacheẽ jêje cote. ¿Mbaerã mbia riqui ñee nde? “David rucucha chõ Cristo re” i re. ⁴² David si que “sererecua” i Cristo je ra. Sã David chimbasa Salmos no: Dios que ñee Cristo sererecua je ra. “Ecoi sejii.

Nde abe ra ererecua serese.

⁴³ Ae ndeucuãyãte quia nae, ũquĩ je ra ndequirãcuã ateacuquia tuchi.

Ndequirãcuã tuchi chee ra ũquĩ si”, i que Dios sererecua je ra, i que David embesa ra. ⁴⁴ David si chõ “sererecua” i nguiã Cristo je. ¿Mañi nda David rucucha Cristo re? Jeñee ño seje, i que Jesús ũquĩ je ra.

Jesús ñee asi embesasa je

⁴⁵ Mbia ja résaa que Jesús ñee uchimbaaquiatsu je cote ra. ⁴⁶ —¿Embesasa rã ño nda jẽingochĩ je! Ũquĩ ucuasu saã saã mbeite quia

ã. Huiirao turã equereco beite quia ã. “Sã mbia ererecua i nande je”, i beite equia ã. Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe bei equia ã no. ⁴⁷ Ari eru cheecha mbae abe embutiã tiã nguia ã no. Ucheẽ oco abe esaã saã mbeite quia Dios je ã no. “I nda mbia mae nanderese”, i chõ nguiã. Ũquĩ nda Dios mbasi tuchi cote, i que Jesús uchimbaaquiatsu je ra.

21

Eru cheecha mbaecha reã mo mbae mo mee Dios je

¹ Jesús que nyoĩ nyoĩ quia Dios chuchúaa ra. Hue que mbia mbaecha riqui ofrenda mondo mondo ofrenda riru ye ra. ² Eru cheecha abe que siqui ra. Ae que centavos nyeremoño mondo ofrendarã nda. Mbaecha reãte quiatu ngue ae re. ³ Jesús que ñee nda. —Tacheẽ tuchi jêje. Eru cheecha mbaecha reã ngue mbae mondo tuchi mbia ataque si ra. ⁴ Mbaecha quiatu que umbae rire ñetẽ mondo mondo ra. Eru cheecha quiatu nbabbknnnnknnnnnnn gue umbae mii mondo ja nguiã, i que Jesús ra.

Mbia ra Dios chuchua mbucoi ja, i Jesús

⁵ Mbia que ñee ñee Dios chuchua turã nii nda. Tuchua mbarõ ji sita turã nii. Mbae aba queteamba riĩ abe no, Dios chuchua jenda. Jesús que ñee mbia je cote ra. ⁶ —Ae rese jẽingo mae nae, ũquĩ nda mbiamo mbutiã ja cote. Sita mo nda chi eã nyuchuarõ cote. Mbia ra tuchua mbucoi ja tuchi. Dios chuchua ra chi eã juã cote, i que Jesús ra.

Mbae ua ja nonde

⁷ —¿Manose ra ũquĩ nde? ¿Mañi ure ra equia irandu mbae ua nonde re? i que Jesús chimbaaquiatsu ee ra. ⁸ Jesús que

ñee ee ra. —Jêtesa jiri quia jê. Mbia ra jembirĩ irĩchĩ jê. “Cristo chõ se re”, i ra mbia ñee ata atate jêje. “Co rei é co cote”, i ra mbia ñee ata atate jêje no. Ũquĩ nda jeñanduchĩ. Ñeeñoño je chõ ũquĩ nde. ⁹ Mbia ra ñee ñee tuchi nyĩquia iquia je rĩ. Guerra rĩ abe no. Ũquĩ mose ra jêsiquicheĩ jê. Ũquĩ ja rane nda nyecua raque. Aque mose ra mbae ja ua eã ná, i que Jesús mbia mbaaquiatsu ra.

¹⁰ —Mbia ra guerra saã tuchi chee. Nyĩquia iquia tuchi rae. ¹¹ Ibi ra nyere nyere tuchi. Mbia mo abe riãcuã tuchi ra aque mose. Emo ñooñoa tuchi ra mbia rasi. Mbia mae sayã nda nyecua tuchi ibei rĩ cote. ¹² Ũquĩ nonde ra mbia icuã icuã tuchi jê je serĩ. Nguerecua je ra mbia jenderao rao tuchi. Ererecua abe icuã icuã tuchi ra jêje. Jêtarõ tarõ tuchi ra serĩ. ¹³ Ũquĩ mose nda secheẽ jêsenei senei tuchi mbia je chã. ¹⁴ ¿Manyae ra ũquĩ ñee ndibishorõ nde? jenyechĩ nda ñee ũquĩ nonde jê. ¹⁵ Se chõ nda jaembucheẽ turã nguiã aque mose. Nyebe ra jêucuayãsa jeñee ndibishorõ aroneate aque mose. ¹⁶ Jendu ra jemondo chee mbia icuã je. Jenongue abe ra jemondo chee mbia icuã je no. Jendesenda abe ra jemondo chee mbia icuã je no. Jêquiato abe no. Ũquĩ nda jemo iquia chee no. ¹⁷ Mbia ra jêucuayã tuchi serĩ. ¹⁸ Jêsiquicheĩ nda esi. Jaendeaquiatsu tuchi ra aque mose. ¹⁹ Jeñimbirãcuã mose ra Dios jemingo turã mbei.

Jerusalén tiã tuchi rae, i Jesús

²⁰ Soldados Jerusalén mama mose, aque mose ra Jerusalén mbutiã cote. ²¹ Sã Judea jenda choi uchã ibi ibate riichã aque mose. Sã Jerusalén jenda abe choi uchã hue si. Ae chi ishó ishó Jerusalén si nae, sã ũquĩ nyebibe eã Jerusalén ndũchã aque mose.

²² Aque mose ra mbia mbae icuã ja irara tuchi huĩcuã nĩ. Embesa ji cheẽ nda ique ja aque mose. ²³ Aba mbia eã tuchi ra emo ãquẽ ndiru rerequia mose aque mose. Nguiirĩ mbuquiambu je abe no. Mbia ra mbae rasi saã tuchi aque mose. Mbae icuã nda irara tuchi huĩcuã nĩ. ²⁴ Aque mose ra mbia guerra raã tuchi. Mbia ra nyĩquia iquia aque mose. Jerusalén jenda ra sasẽ tuchi aque mose. Mbia ra ecuruchoi choi tuchi tarõ ishó. Judíos eã nda chi tuchi Jerusalén aque mose. Dios ra emondochoi chee hue si cote.

Dios riirĩ nda tube ibate si

²⁵ Mbia mae sayã ndese ra mbia mae tuchi ibei rĩ cote. Tenda rese. Nyasi rese abe no. Nyasi tata rese abe no. Ama ndisha ra sieu tuchi quia aque mose cote. Mbia ra titi titi i tuchi aque mose. Quiachã tuchi rae. ²⁶ Mbia chiã nda cuaãcuã i tuchi aque mose. “Mbae rasi ra nandesaa tuchichĩ nde”, i tuchi ra titi titi i. Ibei jenda abe chee ra quiata quiata cote. ²⁷ Aque mose tuchi ra achube ibii cote. Ibeishĩ ndese ra achu. Senininya tuchi ra achu. Sequirãcuã tuchi ra achu. ²⁸ Ũquĩ ndese jemaẽ mose, jêo jêo tuchi aque mose jê. Dios ra jendirõ jei mbae icuã si aque mose cote, i que Jesús ra. ²⁹ Jesús que ñeembe ee ra. —Sã higuera riqui no. Sã ira mo ndiqui no. ³⁰ Ero quira usẽ ja mose, “iraro itõ ndacu ra cote”, i chõ mbia nguiã aque mose cote. ³¹ Eĩ si chõ nda mbia mae mbae ja rese cote. Ũquĩ ndese mae mose, “achite Jesús ñi tu a cote”, jenyẽ rae. “Mbia rerecua tuchi ra Dios cote”, jenyẽ ra aque mose. ³² Ae siqui quia mbia aque mose nae, ũquĩ nda manoã mbae ua ja mose chee. ³³ Ibei ra ua. Ibi abe ra ua. Secheẽ nguia ra uayã mbei.

³⁴⁻³⁵ Mbia ndua eã mose serese ra achu cote. Ibi jenda ja ra ambua tuchi u. Jê nguia seraarõ arõ

mbei quia. Mbae icuã ndese siqui rocoĩ. Quiacua siqui rocoĩ. Mbae rese ndua ata ata rocoĩ. Ûquĩ icuã ndese jëingo mose, jaembuate ra u. ³⁶ Jêtesa bei quiatu quia serese. Jeñee mbei quiatu quia Dios je. Â mbae icuã jêĩ eã sacuã jêje. Jëingo turã sacuã serese sechu mose, i que Jesús ra.

³⁷ Nyaashĩ mose que Jesús riqui mbia mbaaquiatsu quiatu Dios chuchua ra. Isa que eriqui oso oso bei Monte de los Olivos ra. ³⁸ Isamamimbe que mbia riqui ngaẽ ngaẽ ja bei echeẽ andu ra. Dios chuchúaa.

22

Jesús nandeisi tarõ, i ja mbia rerecua ñee nyue

¹ Achite que fiesta de la pascua cote ra. Mbichae mbuchimatã iriã ngue mbia u u quia aque fiesta mose querabe ra. ² Sacerdotes rerecua que ñee ja nyue ra. Embesasa abe no. —Jesús nandeiquia. ¿Mañi nande ra equia equia nonde re? i que equia ñee ñee nyue ra. Eireĩte que eriqui mbia tubiriã si ra. ³ Judas Iscariote, i que Jesús chimbbaaquiatsu mo je ra. Satanás que ique aque chiangui re cote ra. ⁴ Nyebe aque si nguĩã ñee sacerdotes rerecua je. Dios chuchua raarõsa je abe no. —Jesús tamondo jêje. ¿Mañi nande ra equia ee re? i que Judas ñee ee ra. ⁵ Ûquĩ iate que Judas ñee mose ee ra. —Mbae isiquia ra uremee ndeje, i que Judas je cote ra. ⁶ Judas que eno i mbia ñee mose ee ra. —Jesús tamondo rã jêje mbia tiãsaa, i que ñee nda.

Jesús quiaru uchimbbaaquiatsu rese

⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia no nda. ⁸ Jesús que ñee Pedro je ra.

Juan abe je. —Jêso oveja mbuchi nande je, i que Jesús ee ra. ⁹ Ûquĩ ngue ñee echeẽ mose ra. —¿Mangue ra aba embuchi mangue re? i que Jesús cheẽ mose ra. ¹⁰ Jesús que ñee ee ra. —Jengasẽ mose sucha cuasu, emo i rerao rese ra jemae. I ra equerao quia irasa mo ye. Aque rui jêso bei quia ique chee echuchua. ¹¹ Tuchuacha je jeñee. “Jesús que urembu ñee ndeje ra. ‘¿Ma cuarto ra urecu quiaru oveja u que re? Sechimbbaaquiatsu rese’, i que Jesús ñee ndeje ra”, jentye tuchuacha je. ¹² Tuchuacha ra cuarto cuasu mee jêje. Mbia quesa ibatenda ra emee jêje. Embuquiche ji. Huee chõ oveja jembuchi nandequiaru sacuã, i que Jesús ñee ee ra. ¹³ Pedro que nyoĩ cote ra. Juan abe. Jesús cheẽ ndui si tuchi que mbae eĩ ja cote ra. Huee que oveja mbuchi cote ra.

¹⁴ Mbae quiche ja mose que Jesús ngoi uchimbbaaquiatsu rese quiaru sacuã cote ra. ¹⁵ Jesús que ñee ee ra. —Co oveja que ause tuchi quia jendese semano nonde ra. Co mose pascua mose. ¹⁶ Pascua mo nda au eã mbei jendese cote. Dios mbia rerecua tuchi mose chee, i que Jesús ee ra. ¹⁷ Jesús que vino mbeisa isi cote ra. Gracias i que Dios je ra. Nee ngue uchimbbaaquiatsu je cote ra. —Co jêisi. Jembei jaaja jê. ¹⁸ Vino mo nda ambei eã mbei cote. Dios mbia rerecua tuchi mose chee, i que Jesús ra. ¹⁹ Jesús que mbichae isi cote ra. Gracias i que Dios je ra. Siquio que mbuchao chao ee cote ra. Nee ngue ee cote ra. —Â ndei serete rã ã. Serete ra mano jêje cote. Jendua serete riquio ji rese ã mbichae u mose, i que Jesús ñee ee ra. ²⁰ Eĩ si que Jesús vino mbeisa isi no nda. Quiaru jare. —Â ndei seruquĩ rã ã. Mbia icuã mbutiã sacuã tuchi chõ seruquĩ re. Dios cheẽ yasu rui si chõ seruquĩ riqui

nguiã mbia icuã mbutiã co. ²¹ Ae ra semee mbia icuã je nae, aque abe riqui quiaru serese a. ²² Co acua raque quia mano nonde co. Dios cheẽ ndui si co. Ae semee nguia mbia icuã je a nae, aque ra mbae rasi saã tuchi. Aba mbia eã tuchi rae, i que Jesús ee ra. ²³ Echimbaaquiatu que mae jaaja nyiese ra. —Aba tuchi ra emee mbia icuã je reae, i ja jate que nyue ra.

Jesús chimbaaquiatu mbia rerecua saã saã tuchi nyue

²⁴ Aquere que Jesús chimbaaquiatu ñee icuã icuã tuchi nyue ra. — Se quia ererecua tuchi ndesi re, i jaaja que nyue ra. ²⁵ Jesús que ñee ee ra. —Mbia ataque rerecua riqui ucuasu raã naa tuchi ngũimba je ũquí. ²⁶ Eĩ jenyechĩ nda jẽ jẽ. “Ererecuarã se”, jenyechĩ nda jẽ. Ae eaquiatu jiri jemo nae, sã ũquí ndiqui uñetẽ naa naa ño. Sã ũquí ndiqui tochei chõ nguia. Ae ererecua jemo nae, sã ũquí ndiqui ererecua rimba rã tuchi chõ. ²⁷ Ererecua ngoi chõ nguiã. Erimba mbae mee mee ño nguiã ee. Eĩ eã ño se re. Se quia mbae amee mee nguiã jẽje co.

²⁸ Jẽ nguiatu ngue jẽingo beite nguiã serese. Se mbae icuã irara tuchi mose. ²⁹ Nyebe ra jaemii tuchi mbia rerecuarã. Sã seru semii tuchi mbia rerecuarã no. ³⁰ Jẽingo tuchi ra serese, se ererecua tuchi mose. Jẽquiaru ra serese. Mbae mo abe ra jembei serese no. Israel ndiriĩ nderecua ja ra jẽ. Judios rerecua ja ra jẽ, i que Jesús ee ra.

Jesús aicuayãte resẽ, i ra Pedro serĩ, i Jesús

³¹ Jesús que ñee Pedro je cote ra. —Simón, Satanás que ñee jenii nda. “Ndechimbaaquiatu emee na seje. Tã tae rã ee. Ma siqui beite Dios rese”, i rei ngue Satanás jenii nde. ³² Acheẽ tuchite que Dios je nderĩ nda. Nde Dios icua tuchi

sacuã. Nde ubabe mose serese, nderesenda abe je echeẽ emingo sacuã serese, i que Jesús Pedro je ra. ³³ Pedro que ñee ee ra. — Sererecua chõ nde re. Aico bei ra se quia nderese. Mbia nda sematã ndei nguiã. Mbia nda sei quia rei nguiã nderese, i que Pedro ra. ³⁴ Jesús que ñee ee ra. —Tacheẽ nyecua ndeje, Pedro. Ngaira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús Pedro je ra.

Embesa ji chee nda ique ja serĩ cote, i Jesús

³⁵ Jesús que ñee uchimbaaquiatu je ra. —Jaemondo que mbia mbaaquiatu quiatu sacuã nyii, jẽochi que jaemondo. Mbae isiquia mo ngue jendao eã tuchi icua. Mbae rirurã mo abe que jendao eãte. Jẽiyao eã abe no. ¿Aque mose mbae eãte jẽje re? i que Jesús ee ra. —Tei. Urembae tubiriãte que ra, i que echimbaaquiatu ñee Jesús je ra. ³⁶ Jesús que ñee ee ra. —Ae jemo embae rirurã mo nae, jendao cote ae. Ae mbae isiquia mo nae, jendao cote ae. Ae echuuru eãte tiquise mo nae, sã emo isi huiirao ribishorõ ae. ³⁷ Sã embesa ji riqui ñee serĩ no. “Mbia icuã ndese ra Dios ririĩ mingo chee”, i. Ũquí nda ique cote. Embesa ji cheẽ nda ique ja tuchi serĩ cote, i que Jesús ñee nda. ³⁸ —Co tiquise nyeremo ñi co resẽ, i que echimbaaquiatu echeẽ mose ra. —Coche ñene, i que Jesús ee ra.

Jesús ñee ngu je

³⁹ Jesús que oso usẽ taicuee cote ra. Oso que Monte de los Olivos cote ra. Eĩ mbei que ae quia oso oso huee ra. Echimbaaquiatu que nyoĩ erese ra. ⁴⁰ Ngasẽ mose que ñee uchimbaaquiatu je ra. —Jeñee tuchi Dios je. Satanás tã i eã sacuã jẽje, i que Jesús ñee ee ra. ⁴¹ Jesús que oso pe quti jiri esi ra. Ngoi que

ngũĩã ndese ñee Dios je ra. ⁴² — Paba, ndebi mose sereaquiatsu se, mbae rasi raã eã sacuaã. Ae sebite nae, ũqui esaã eã seje. Ae ndebite nae, ũqui nguiatu esaã, i que Jesús Dios je ra. ⁴³ Aque mose que ángel mo tu ibate si ee ra. Embirãcua sacuaã. ⁴⁴ Jesús ia eã tuchite que ra. —Mbae rasi ra asaã tuchĩ nde, i tuchi que ndua ndua ra. Ñee tuchi que Dios je ra. Eirĩe ruqui que tiqui tiqui tuchi quia ibii ra. ⁴⁵ Jesús ñee jare Dios je que juã cote ra. Uchimbaaquiatsu rea que esi ra. I que u uque ee ra. Eya eãte quiatu ngue re. ⁴⁶ Ñee ngue ee ra. —¿Mbaerã jẽingo uque a re? Jenyuruã eae. Jeñee na Dios je. Satanás tã i eã sacuaã jẽje, i que Jesús ee ra.

Mbia Jesús nyucua serao

⁴⁷ Jesús cheẽ ua eã mose que mbia ngaẽ jate ee ra. Judas que tu quia mbia nonde ra. Jesús chimbaaquiatsu raque que ae ra. Ae que Jesús siichã u eritii riite sacuaã nda. ⁴⁸ Jesús que ñee Judas je ra. —¿Ereico seritii riite mbia icua je sereacuquia sacuaã a re? i que Jesús ee ra. ⁴⁹ Jesús resenda que mae u erese ra. Ñee ngue Jesús je ra. —Urererecua, ¿tiquise ra ureuru uru mbia rese re? i que ñee Jesús je ra. ⁵⁰ Jesús resenda mo ngue tiquise uru sacerdote rerecua rimba rese ra. Eisa sia. Eisa equiatocuti quitinda. ⁵¹ —Jẽhui esi ae. Coche ñene, i que Jesús ee ra. Oco que eisa rese embucherõ nda. ⁵² Jesús rerao sacuaã ño mbia ngaẽ nguia reaẽ. Sacerdotes rerecua. Policía abe no. Judíos rerecua abe no. Nyebe Jesús ñee nguia ee. —¿Mbaerã jenyu quia tiquise reru serea co re? Ira jua abe no. Mbae mbuquiachãsa isi rã ño jenyuchĩ nguia serea co. ⁵³ Tenda que amumba mumba beite rei quia jendese resẽ. Mbia mbaaquiatsu quiatu Dios chuchuaa resẽ. ¿Mbaerã jẽingo seisiã secua aque mose re? Isa chõ jenyuchĩ serea co, mbia

mae eã sacuaã jendese. Itondaru riinda chõ jẽ nde, i que Jesús ee ra.

Jesús aicuayãte resẽ, ichõĩño Pedro

⁵⁴ Mbia que Jesús isi nyucua cote ra. Sacerdotes rerecua chuchua que eruruchoi cote ra. Pedro que oso quia ishote erui ra. ⁵⁵ Itaicuee que mbia tata mbucha ra. Huee que echĩ ngoi tata jii ra. Pedro abe que ngoi embirõ nda. ⁵⁶ Nyucuaaque mo ngue chĩ mae nguiatu tuchi Pedro rese ra. Tata rendi que etesaete ee ra. —Aque abe que Jesús resenda, i que mae Pedro rese ra. ⁵⁷ Pedro que ñee ee ra. —Tei. Jesús aicuayãte resẽ, ichõĩño ngue Pedro nyucuaaque je ra. ⁵⁸ Emo jiri mose que mbia mo mae Pedro rese ra. —Nde abe que Jesús resenda ra, i que Pedro je ra. —Tei. Eresenda eã ño se resẽ, ichõĩño ngue Pedro ee ra. ⁵⁹ Emo mose jiri que emo ñee ee no nda. —Jesús resenda chõ nde resẽ. Galilea jenda chõ nde abe resẽ, i tuchi que Pedro je ra. ⁶⁰ Pedro que ñee ee ra. —Tei. Ndecheẽ aicuayãte resẽ, ichõĩño ngue Pedro ee ra. Pedro cheẽ mose tuchi que nguira ñee cote ra. ⁶¹ Jesús que uba mae Pedro rese nguira cheẽ mose cote ra. Pedro que ndua Jesús cheẽ ndese cote ra. —Nguira cheẽ nonde ra echeẽ ñooño tres veces serĩi, sã Jesús i Pedro je nyii no. ⁶² Pedro ndua mose ũqui ndese que esi nyeseo pe jiri ra.

Mbia iquia chooño Jesús je

⁶³ Ae Jesús isi mii nae, ũqui ngue iquia iquia tuchi u Jesús je ra. Ucuu tuchi que u erese ra. ⁶⁴ Jesús resa abe que echati ra. Eruba rese que ucua ucua tuchi ra. —¿Aba ucua ucua quia nderuba rese a re? i abe que equia Jesús resa ati ji je ra. ⁶⁵ ũqui mii eã ngue eriqui ñee ee ra. Mbae ja riĩ ngue embuqueta ra.

Mbia Jesús ruruchoi ererecua chumunua mose

⁶⁶ I que nyaashĩ u quia ra. Aque mose que ererecua ñumunua ja ra. Judíos rerecua. Sacerdotes rerecua abe no. Embesasa abe no. Ũquĩ ñumunua mose que Jesús ruruchoi ee cote ra. Ererecua que ñee ja Jesús je cote ra. ⁶⁷ —¿Cristo nde re? Echeẽ tuchi ure je no, i que ererecua ñee Jesús je ra. —“Cristo chõ se re”, ae raque ra jêje, “nyia”, jenyẽ âte ra secheẽ mose. ⁶⁸ Se abe preguntar i mose jêje mbae mo nĩi, jeñee âte chõ nda secheẽ ndibishorõ. Jêhui eã abe ra sesi no. ⁶⁹ Namõ jiri ra acoi Dios quiatocuti cote. Hue bei ra aĩ cote. Dios quirãcuã na si ra aico mbia rerecua cote, i que Jesús ñee ererecua chumunua mose ra. ⁷⁰ Ñee ja que Jesús je cote ra. —¿Dios rucucha chõ nde re? i ja que ñee Jesús je ra. —Ae. Dios rucucha rei se, i que Jesús ee ra. ⁷¹ Ererecua que ñee ja nyue ra. —¿Mbaerã nda mbia Jesús icuã nenei i ite nande je re? Jesús cheẽ icuã ngue nandechandu rei nande abe resẽ. Sã mbia eiquia, i que ererecua ñee ja nyue ra.

23

Mbia Jesús ruruchoi Pilato je

¹ Judíos rerecua que juã ja cote ra. Jesús que ecuruchoi Pilato je cote ra. ² Ũquĩ ngue ñee icuãte Pilato je Jesús rĩĩ nda. —Jesús que mbia mbaaquiatsu icuã icuãte quia ra jẽ. “Impuestos ra jemee meecheĩ mbia rerecua je”, i chõ ngue equia mbia je ra jẽ. “Se chõ Cristo re. Mbia rerecuarã nda se”, i que equia ra, i que judíos rerecua ñee icuã Jesús rĩĩ nda. ³ —¿Judíos rerecua nde re? i que Pilato ñee Jesús je ra. —Ae. Judíos rerecua chõ se re, i que Jesús ee ra. ⁴ Pilato que ñee mbia je cote ra. Sacerdotes rerecua je abe no. —“Mbae icuã mo ngue Jesús saã nda”, ae aroneate eriĩ, i que

Pilato ra. ⁵ Judíos que ñee asite ee ra. —Jesús riqui mbia mbaaquiatsu icuã icuã tuchi co. Mbia mbesa chooño. Judíos mbaaquiatsu icuã icuã ja. Galilea jenda rane. A jenda abe chee cote, i que ñee asite Pilato je ra.

Mbia Jesús ruruchoi Herodes je

⁶ Galilea jenda, i mose que Pilato ñee ee ra. —¿Galilea jenda chõ Jesús re? i que mbia je ra. ⁷ —Ae. Galilea jenda chõ Jesús re, i que mbia Pilato je ra. Nyebe Pilato Jesús mondo nguiã Herodes je. Galilea jenda rerecua quiatsu ngue Herodes re. Herodes que siquĩ Jerusalén aque mose ra. ⁸ Herodes que maese beite quia Jesús rese ra. Jesús rese que eriquĩ jirandu beite ra. —Jesús nda mbia mae sayã mo saã na serésaa chã, i beite que equia ra. Nyebe eya tuchi nguiã mae mose Jesús rese cote. ⁹ Herodes que ñee atate rei Jesús je ra. Jesús que ñeeã mbeite echeẽ ndibishorõ nda. ¹⁰ Sacerdotes rerecua abe que chi ra. Embesasa abe no. Ũquĩ ngue ñee icuã icuãte quia Jesús rĩĩ nda. ¹¹ Herodes que iquia iquia chõ nguia Jesús rĩĩ nda. Erimba soldados abe no. Jesús ririrõ tuchi que equia ra. Tiru nininya tuchi que emingue Jesús je ra. Ererecua raã naa tuchi Jesús je. Aquere que Herodes embuchebi mondo Pilato je cote ra. ¹² Aque mose ramo ngue Herodes quiatu Pilato cote ra. Eicuã icuã mbeite que eriquĩ nyue nyii ra.

Jesús jẽiquia mbucha ira rese, i ererecua

¹³ Pilato que mbia rerecua munua ja ra. Sacerdote rerecua. Judíos rerecua abe no. Mbia ja abe no. ¹⁴ Ñee ngue mbia je cote ra. —Jẽ ngue Jesús jendu rei seje ra. “Mbia mbĩrĩ irĩsa chõ Jesús re”, jenyẽ rei que seje ra. Acheẽ ocote rei que ee jẽsaa ra. Ae jeñee ndei seje nae, ũquĩ icuã mo eãte seje Jesús rĩĩ.

15 Herodes je abe mbae icuã mo eãte Jesús riĩ. Herodes que Jesús mbube chõ nande je ra. ¿Mbaerã nda nandeiquia re? Mbae icuã mo ngue esaã eãte resẽ. 16 Tairuã nua ño. Aquere tambui mondo, i rei que Pilato ñee mbia je ra. 17 Pascua mose bei que Pilato riqui mbia matã ji mii mbui bei ra.

18 Mbua que tasẽ tasẽte ñeemombo mombo Pilato je ra. —Jesús eiquia. Barrabás quia embui ure je, i tuchi que mbia quia Pilato je ra. 19 Barrabás tarõ ji que chĩ nda. Mbua iquiasa tuchi que ae ra. Romanos nderecua je abe que eicuã icuã tuchi riqui ra. 20 —Jesús quia tambui, i rei que Pilato ñeembe mbia je ra. 21 —Jesús embucha ira rese, i tuchi que mbia quia tasẽ i i ra. 22 Pilato que ñee si ee ra. Tres veces cote. —¿Mbaerã nda Jesús aiquia re? ¿Mbae icuã esaã nde? Mbae icuã esaã eãte umano sacua. Tairuã nua ño. Aquere tambui mondo, i rei que Pilato ra. 23 Mbua que ñee mombo mombo tuchite ee ra. —¡Eiquia jê! ¡Ira rese embucha jê! i tuchi que mbia quia tasẽ tasẽ ee ra. Sacerdotes rerecua abe que tasẽ i ite ra. Eno i chee que Pilato cote ra. 24 Pilato que mbia cheẽ mumbayã nyee ra. 25 Pilato que Barrabás mbui mondo cote ra. Mbua iquiasa iquiasate raque ae. Ñee icuã icuãate raque ererecua je. Pilato que Jesús mee mbia je cote ra. Eiquia sacua.

Mbia Jesús mbuchesecho ira rese

26 Soldados que Jesús curuchoi eiquia sacua cote ra. I rei que emo u quia uco si ra. Simón, i que ee ra. Cirene jenda mo ngue ae ra. Aque que soldados isi ra. Ira mbuchiandasa ji rerao sacua Jesús rui. Cruz, i equia ee. 27 Mbua tubiriã ngue nyoĩ quia erui ra. Cuña abe tubiriã. Uquĩ ngue nyoĩ quia tasẽ tasẽ tuchi nyeseo erese ra. 28 Jesús que uba mae ñee ee ra.

—Cuña, jenyeseochĩ nguia serese. Jenyese quia jenyeseo. Jendiirĩ abe rese quia jenyeseo, Jerusalén jenda. 29 Mbae icuã nda tuutu tuchi jêje cote. Ae eririĩ nderecua nae, uquĩ nda mbae rasi saã tuchi aque mose cote. Aque mose quiatu bichĩ mbia riirĩ eã ja mbite re. Mbae icuã tuchite quia nda aque mose cote re. 30 “Amano ño mbichĩ se”, i tuchi ra mbia aque mose cote. “Sita ibate tu chõ mbichĩ seati”, i tuchi ra mbia aque mose cote. 31 Se chee mbia riquichĩ sembasi mbasi a. Seicuã eã ndaque se. Mbua quiatu ra mbae rasi saã tuchi huĩcuã nii cote, i que Jesús ñee nda.

32 Soldados que mbia icuã ny-eremo curuchoi Jesús rese eiquia sacua nda. 33 Ngasẽ ngue ibi ibate mo cote ra. Eresa cuare, i que hue je ra. Huee que Jesús mbucha ira rese cote ra. Uquĩ mbia icuã abe que embucha ira rese ra. Enongue que emii Jesús quiatocuti ra. Equiatocutiã ngue enongue mii no nda. 34 Mbua Jesús mbucha mose ira rese que Jesús ñee Dios je ra. —Paba, ã icuã embutiã esi. Nĩmbaquiutuãte equia sei quia ã, i que Jesús Dios je ra. Soldados que sita ñetẽ mbaaba aba o je ra. —Aba ra ja. Aba mbaerã nda Jesús irao reae, i que nyue ra. 35 Mbua que chi ja tuchi mae erese ra. Ererecua abe chee que chi iquiasa iquiasa Jesús je ra. —Ma ndequirãcuãte. Mbua que erembucherõ cherõ tuchi quia. ¿Mbaerã ereico eĩ ãte ndechue nde abe re? Dios riirĩ nde reaẽ, i que ererecua u iquiasa iquiasa Jesús je ra. 36 Soldados abe que iquiasa iquiasa chõ nguia ee ra. Vinagre chiquino ngue emee ndei ee echimbei sacua nda. 37 —¿Mbaerã ereico nguichi ãte ira si nde ae re? Judios rerecua rei nde reaẽ, i que soldados iquiasa iquiasa Jesús je ra. 38 Mbua que embesa ji mii Jesús ãquĩ quiti ibate ra. JUDIOS RERECUA CHÕ CO RE, i que embesa ji huĩ

nda. Griego cheẽ. Latín ñee abe no. Hebreo cheẽ abe no.

³⁹ Ae mbia icuã mbuchesecho ji chi Jesús rese nae, ñquĩ mo ngue ñee icuã Jesús je ra. —¿Mbaerã ereico nguichiã nde ae re? ¿Mbaerã ereico urembuquichiãte ure abe re? Dios riirĩ nde reaẽ, i que ñquĩ mo ñeemombo Jesús je ra. ⁴⁰ Enongue que ñee ee ra. —¿Mbaerã ereico ñee ñquĩ Jesús je re? ¿Ndesiquiche ãte eriqui Dios si re? Ereico mano Jesús rã si a resẽ. ⁴¹ Nandeico mano nandeicuã ñi a resẽ. Jesús quiatu que mbae icuã saã eãte rei resẽ, i que enongue ñee ee ra. ⁴² Aque sí que ñee Jesús je cote ra. — Jesús, endua serese nde ererecuarã mose, i que ñee Jesús je ra. ⁴³ Jesús que ñee ee ra. —Tacheẽ nyecua ndeje. Ereico ra serese namo Dios rese seico mose, i que Jesús ee ra.

Jesús mano cote

⁴⁴ Tenda chĩ mose nandeite re que itondaru ru cote ra. Ibi ja que itondaru ra. Itondaru beite que ra. Tenda nyesecho chee. Tres horas que ra. ⁴⁵ Tenda cuute que aque mose ra. Tiru mbuchesecho ji Dios chuchua jenda que nyisia turã nda. ⁴⁶ Jesús que ñee mombo ngu je ra. —Paba, aso quia nderea aque, i que ra. Mano ngue cote ra. ⁴⁷ Soldado rerecua que mae tuchi hui erese ra. Ae que ñee turã Dios riĩ cote ra. —Mbae icuã naasa eã tuchi chõ Jesús riqui re, i que maende erese ra. ⁴⁸ Mbia tubiriã chi quia mae ja erese nae, ñquĩ ia eã tuchi que nyoĩ quia uchiã isi cote ra. ⁴⁹ Mbia Jesús chiicua ja que chi isho mae erese ra. Ae cuña nyoĩ beite quia erese Galilea si nae, ñquĩ abe que chi isho mae erese ra.

Mbia Jesús raaque chati cote

⁵⁰ I que mbia turã mo nguia huee ra. José, i que ee ra. Judío mo ngue ae ra. Arimatea jenda que ae ra. Judíos rerecua mo ngue ae

ra. ⁵¹ José ia eãte que ererecua ataque rese Jesús iquia mose ra. Ae que Dios quiatote ra. —Dios ra ererecua, i beite que equia eraarõ arõ nda. ⁵² —Jesús raaque emee na seje, i que José oso ñee Pilato je ra. ⁵³ José que Jesús raaque mbuquichi cote ra. Tiru je que ema nda. Sita ribicoi ji imi ye que emondo ra. Mbia raaque mo ngue emondo eãte huee nyii ra. ⁵⁴ Viernes que aque mose ra. Mbia que icoquiato ja quia sábado nonde ra. ⁵⁵ Ae cuña nyoĩ beite quia Jesús rese Galilea si nae, ñquĩ ngue nyoĩ sita imi ndese mae nda. Jesús raaque iti ji rese que mae tuchi ra. ⁵⁶ Nyebi que echoi uchuchua ra. Aba mbushimbua que esaã nyoĩ ra. Sábado mose que ñquĩ uquenea ucua cote ra. Dios cheẽ si.

24

Jesús raaque quera si

¹ Isamamimbe tuchi que cuña nyoĩ domingo mose sita imi ndese mae nda. Aba mbushimbua que ecuruchoi rei eichusẽ chusẽ sacua Jesús raaque rese ra. Cuña mo abe que nyoĩ quia erese ra. ² I que sita eraaque atiquia ruruba ji u ee ra. ³ Cuña ngue ique rei nyoĩ sita imi ye ra. Jesús raaque oreãte que ee ra. ⁴ Tiri i tuchi que ra. —¿Mañi nda aba re? i tuchi que ra. Aque mose que mbia nyeremo chi juã ee ra. Eirao nininya tuchi que chi ee ra. ⁵ Cuña ngue titi titi i tuchi u ra. Nyebe echĩ nguiã nyibi beite. Angeles que ñee ee ra. —¿Mbaerã jẽingo Jesús raaque requia requia a re? Quera si que resẽ. ⁶ Emoate a resẽ. Quera si que resẽ. Sã ñee jẽje siqui mose Galilea no. ⁷ “Mbia icuã nda seisi iquia. Sembucha ra ira rese. Tres días mose ra aquera si”, i que jẽje nyii resẽ, i que ángeles ñee cuña je ra. ⁸ Ñquĩ ndese que cuña ndua cote ra. ⁹ Cuña ngue nyebi cuaẽ mbia mbiirandu ja cote

ra. Jesús chimbaaquiatu once abe mbiirandu. ¹⁰ María Magdalena i que mbia mbiirandusa je ra. Juana i que emo je ra. María i que enongue je ra. Jacobo si que María ra. Cuña mo abe abe que ra. ¹¹ Nyia iã ñochĩ Jesús chimbaaquiatu cuña ñee mose ee. Cuña ñee ñooño nei nguiã ee. ¹² Pedro que oso uchã sita imi ndese mae nda. Nyurucua que mae erese ra. Jesús umanda achõ ngue chi ee ra. Pedro que nyebi oso quia ndua ndua Jesús oreã ndese ra.

Jesús ngata querare uquiato rese

¹³ I que Jesús quiato nyeremo nyoĩ quia aque mose ra. Emaús quiti que echoĩ quia ra. Dos leguas que Jerusalén si ra. ¹⁴ Ñquĩ ngue nyoĩ quia ñee ñee nyue ra. Jesús mano nĩ. Jesús raaque oreã nĩ abe no. ¹⁵ Ñquĩ ñee ñee ndichã ngue Jesús si ra. Erese que Jesús si quia ngata cote ra. ¹⁶ Ñquĩ ngue mae ndei Jesús rese ra. Icuã eãte chõ ngue ra. Mbiamo nda eriqui reĩ ee raẽ. ¹⁷ Jesús que ñee nyee ee ra. —¿Mbae rĩĩ jẽingo ñee nyue ã nde? ¿Mbaerã jẽya eãte riqui re? i que Jesús ñee ee ra. ¹⁸ Ñquĩ mo ngue ñee Jesús je cote ra. Cleofas, i equia ee. —¿Ereiranuate erese re? ¿Nde mĩ ño ereiranua erese ndeico mose Jerusalén nde? i que Cleofas ñee ee ra. ¹⁹ —¿Mbae rese? i que Jesús ee ra. Ñquĩ ngue ñeembe ee ra. —Jesús rese. Nazaret jenda rese. Dios cheẽ nenei neneisa tuchi rei que ae ra. Equirãcuã tuchi rei que ae ra. Mbia que mae ja tuchi rei equirãcuã ndese ra. ²⁰ Mbia rerecua que Jesús iquia cote ra. Sacerdotes rerecua abe chõ ngue Jesús iquia nguiã. Nyebe soldados eiquia nguiã mbucha ira rese cote. ²¹ Israel jenda rerecua reĩ nda ure je. Tres días chee namo cote emano mosenda bei. ²² Ureresenda cuña mo ngue ñee uremundi tuchi ra. Ñquĩ ngue nyoĩ rei eatísaa nyaashĩ

namo mose ra. ²³ Jesús raaque oreãte nda ee ra. Nyebe ecuaẽ nguiã urembiirandu cote. Angeles mo nda chi ee eatísaa ra. “Jesús que quera si ra”, i nda ángeles ñee ee ra. ²⁴ Aquere que ureresenda mo abe nyoĩ eatísaa ra. Cuña ñee ndui si que Jesús raaque oreãte ee ra. Jesús rese quiatu que mae eã nda, i que Cleofas ñee Jesús sí je ra. Jesús eã nda eriqui reĩ ee raẽ. ²⁵ Jesús que ñee ee cote ra. —¿Mbaerã jẽaquiatuãte riqui re? ¿Mbaerã jẽingo Dios cheẽ icuayãte re? ¿Mbaerã jẽingo Dios cheẽ nenei neneisa chimbesa icuayãte re? ²⁶ Sã embesa ji ñee no. “Cristo ra mbae rasi saã ja oso nonde ibate”, i que embesa ji no, i que Jesús ee ra. ²⁷ Jesús que Dios cheẽ mbuchecua ja ee cote ra. Ngasi rĩĩ. Umano nĩ abe no. Uquera rĩĩ abe no. Moisés chimbesa que embuchecua ee ra. Aquere que Dios cheẽ nenei neneisa chimbesa abe mbuchecua ja ee ra.

²⁸ Ngasẽ ngue ñquĩ nyuchúaa cote ra. Jesús que ngata i abareã oso ra. ²⁹ Jesús ngata i abareã mose que ñquĩ eriquisã nda. —Eitõ urerese aa ae. Tenda osote resẽ. Itondarute ra ndeje resẽ, i que ñee ee ra. Nyebe Jesús ique nguiã echuchúaa erese. ³⁰ Ngoi ja que quiaru nonde cote ra. Jesús abe que ngoi erese ra. Mbichae que esirõ o je cote ra. Gracias i que Dios ibatenda je mbichae rĩĩ nda. Mbichae que esiquio mondo ee cote ra. ³¹ Ñquĩ mose tuchi que Dios mbia mumae turã tuchi Jesús icua sacua cote ra. Jesús icua ramo sacua cote. Jesús que quiachã asi esi cote ra. ³² Ñquĩ ngue ñee ñee nyue cote ra. —Jesús chõ eriqui reaẽ. Nyebe nandeya tuchite riqui nguiã Dios cheẽ mbuchecua checua mose nande je ñeenda cúa, i que equia ñee ñee nyue ra. ³³ Nyebe echoĩ jei nguiã nyebi si Jerusalén. Huee que

Jesús chimbbaquiatu chi ñumunua ee ra. Eresenda mo abe rese. ³⁴ Ũquĩ ñumunua je que ñee ee ra. — Jesús que quera si ra. Ae bei. Simón ngue mae erese ra, i que ñumunua je ee ra. ³⁵ Aquere que ũquĩ nyeremo ñee mbia chumunua je cote ra. — Jesús rese que uremae ñeenda cúa ra. Urembaaquiatu quiatu que umano nii nda. Uquera rĩĩ abe no. Mbichae riquio mose ure je, aque mose ramo ngue Jesús ureicua ra, i que mbia mbiirandu ja ra.

Jesús nyecua uchimbbaaquiatu je

³⁶ Ũquĩ ñee ua eã mose que Jesús nyecua ee ra. Mbia ite re. — Jëya chõ serese, i que ñee ee ra. ³⁷ Mbia que titi titi i tuchi u mae erese ra. Aba checuayã nda Jesús riqui reĩ ee raẽ. ³⁸ Jesús que ñee ee ra. —¿Mbaerã jësiquichete riqui re? ¿Mbaerã “Jesús chõ eriqui re” jenye eã seje re? ³⁹ ¡Sã jê! Jemae seo rese. Jemae sei abe rese ae. Jëoco serese ae. ¡Sã se si chõ jê! Aba checuayã nguia eroo eã nde. Equiangu eã abe no. Se rã eã, i que Jesús ee ra. ⁴⁰ O que eteacuquia ee cote ra. Hui abe que eteacuquia ee ra. ⁴¹ —Jesús chõ eriqui re, i eã ngue ra. Ndua ndua chõ erese. Eyate raque erese. Jesús que ñeembe ee ra. —¿Mbae mo ndei eu sacuaã aa re? i que ee ra. ⁴² Sira resi ji que emee ee ra. Irao abe que emee ee eretã ndesebe ra. ⁴³ Jesús que eisi eu bei ũquĩ ndésaa cote ra.

⁴⁴ Jesús que ñee ee cote ra. —Sã acheẽ jêje seico mose jendese nyii no. “Ae Moisés mbesa seriĩ nae, ũquĩ nda ique ja seriĩ cote. Dios cheẽ nenei neneisa chimbasa abe ra ique ja cote. Salmos ndesenda cheẽ abe ra ique ja seriĩ cote”, ae que se quia jêje nyii. Ũquĩ ngue ique ja semana mose cote ra. Sequera mose abe no, i que Jesús ñee ee ra. ⁴⁵ Dios cheẽ ngue embuchecua checua ee cote ra. ⁴⁶ Jesús que ñeembe ee ra. —Sã embesa ji riqui

ñee no: “Cristo ra mbae rasi saã tuchi mano nonde. Tres días mose ra quera si. ⁴⁷ Mbia ra echeẽ senei senei tuchi cote. Jerusalén jenda je rane nda erenei nenei. Mbia ja je ra erenei nenei cote. ‘Jëicuã si jêhui rã. Cristo jëicuã mbutiã sacuaã’, i tuchi ra mbia ja je Cristo rĩĩ cote”, i que embesa ji quia nae. ⁴⁸ Ũquĩ ique quia ã cote. Jemae nguia erese ã cote. ⁴⁹ Ae je Paba ñee jêje nae, “Espíritu Turã tamondo jêje”, i equia jêje nae, aque tamee jêje cote. A jenguchõ na Jerusalén. Paba ibatenda uquirãcuã mee nyee jêje, i que Jesús ñee uchimbbaaquiatu je ra.

Jesús nyui oso ibate

⁵⁰ Jesús que equerao ja pe jiri Jerusalén si cote ra. Betania i que hue sucha je ra. Jesús que o mumbate ñee uchimbbaaquiatu je cote ra. —Sã Dios jendeaquiatu turã, i ee. ⁵¹ Aque mose tuchi que Jesús si nyui ibate erecha cote ra. ⁵² Ũquĩ ngue ñee turãte Jesús rĩĩ nda. Eya tuchi que nyebi nyoi Jerusalén nda. ⁵³ Dios chuchua que eriqui bei nyoi ñee turã Dios rĩĩ nda. Amén.

EL SANTO EVANGELIO SEGÚN SAN JUAN

Jesucristo rane ngue siqui nyii ra

¹ Dios cheẽ nane tuchi que nyii ra. Mbae ja si. Dios cheẽ ndei Jesús. Ae que siqui bei Dios rese ra. Dios si rei Jesús. ² Ae chõ ngue siqui bei Dios rese nyii ra. ³ Dios que mbae chao eã ae ae ra. Jesús rese ae mbae ao ja nguiã. ⁴ Jesús chõ mbia mingo nguiã ã. Nandemingosa chõ nanderesae nguiã ã. ⁵ Nandemingosa chõ mbae tesae tuchi nguiã itondaru. Itondaru quia ra emungue aroneãte. ⁶ Dios que emo mbu cote ra. Juan, i que ee ra. ⁷ Juan ngue tu aba resaesa renei nenei mbia je ra. Mbia mbiirandu randu ja. fnda mbia aba resaesa icua ja, Juan ñee nguire. ⁸ Aba resaesa eã ño Juan nde. Emo nii ño Juan ndiqui nguiã ñee. —Ae chõ nanderesae nguiã co, i que Juan nda. ⁹ Aba resaesa que tu ibi cote ra. Aba resaesa chooñoã tuchi que ra. Ae chõ aba resae ja nguiã ã. ¹⁰ Aba resaesa que siqui ibii cote ra. Mbia que eicua eãte chõ nda. Mbae aosa ja raque ae. ¹¹ Aba resaesa que tu rei nguesenda mbirõ nda. Eresenda que eisiteã ñochĩ nguiã. ¹² Mbia mii mii ño ngue eisi turã turã nguiã. Mbia mii mii ño ngue eicua icua nguiã. Ûquí je quia Dios riqui nguiã “seriirĩ” i. ¹³ Mbia riirĩ na eã ño Dios riirĩ ndiqui nguiã nyaacuquia cuquia ã. Àquẽ nyaacuquia rã eã ño Dios riirĩ ndiqui nguiã nyaacuquia cuquia ã cote. Sã emo ndiqui ngüinisi rese embiirĩ nae, ùquí na eã ño Dios riirĩ ndiqui nguiã nyaacuquia cuquia ã. Dios ae chõ “seriirĩ” i nguiã ee Dios icua mose. ¹⁴ Jesús rei Dios cheẽ. Jesús que tu mbiarã cote ra. Mbia tuchi que ae cote ra. Siqui que equia urerese cote

ra. Echisaã turã ndese que ureico mae cote ra. Eturã tuchi chõ ae re. Ngu rã si chõ ae re. Ichõiñosa reã tuchi chõ ae re. ¹⁵ Juan ngue Jesús senei senei nguia mbia je ra. —Co riĩ ngue acheẽ jẽje resẽ. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae rei que jẽje resẽ. Ae siqui co cote, i que Juan mbia je ra. ¹⁶ Jesús turã tuchi que ra. Nyebe eriqui nguiã mbae turã mee mee mbei nande je. ¹⁷ Dios cheẽ mumbayã sacua ngue Moisés ñee ndei nguiã nande je. Jesús quiatu ngue tu nguiã cote. Dios turã nenei nenei nande je. Jesús quiatu ngue Dios cheẽ ñooñoa senei senei nguiã nande je no. ¹⁸ Emo maeãte Dios rese. Eriirĩ ae que nandembiirandu randu quia Dios rese ra. Eriirĩ nguiarei ngu rã si.

Juan el Bautista ñee turã Jesús rĩ

¹⁹ Judíos Jerusalén jenda que mbia mondochoi ñee Juan je ra. Sacerdotes mondo erea. Levitas mo ndese. —¿Aba nde re? i sacua Juan je. ²⁰ Juan ngue ñee nyecua tuchi ee ra. —Christo eã ño se re, i que ee ra. ²¹ —¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecuasa ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra. ²² Judíos chimondo que ñeembe Juan je ra. —Ndecheẽ embuchecua ure je. ¿Abate nde re? fnda ndecheẽ uresenei ùquí je, ae urembu. ¿Mañi ure ra nderĩ nde? i que Juan je ra. ²³ Juan ngue ñee ee ra. —Tacheẽ jẽje cote. Aba chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbasa rui si chõ Juan ñee

nguiã.) ²⁴ Ae ñee ñee nguia Juan je nae, ũquĩ ndei fariseos chimondo ũquĩ. ²⁵ Fariseos chimondo que ñee ee ra. —¿Mbaerã ereico bautizar i re? Cristo eã ño nde resẽ. Elías eã ño nde resẽ. Dios cheẽ mbuchecuasa eã ño nde resẽ, i que Juan je ra. ²⁶ Juan ngue ñee ee ra. —I je chõ aico nguia bautizar i. Emo nguia siqui raque quia jêite re. Aque quia jêicuayâte nguia co. ²⁷ Enonde aico co. Aque ra tu serui. Ae quia ererecuata tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

²⁸ Betábara, i que hue sucha je ra. Huee quia fariseos chimondo ñee nguia Juan je. Ama Jordán ndobei. Ae Juan ndiqui bautizar i, huee. ²⁹ Isamami nongue que Juan mae Jesús rese ra. Jesús que tu quia Juan ndichã nda. —Co mbia icuã ndiquicharõ sacuã ndu quia co. Oveja riirĩ na eriqui Dios je. Ae ra nandeicuã mbutiã nandesí. ³⁰ Erĩ ngue aico ñee jêje. “Ae ra tu serui, aque quiarei ererecuata tuchi sesi. Ae rane nguia siqui rei seã mose nyii”, ae que se quia jêje. Co chi eru quia co cote. ³¹ Se sí que aicuayâte nyii ra. I je que bautizar ae quia mbia je cote ra. I nda Israel jenda Cristo icua, i que Juan nda. ³² Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusi rã ngue eru nguichi earõ nda. I bate si. ³³ “¿Aba ra Cristo re?” ae beite que se quia ra. Dios que ñee seje ra. “¡I je eico bautizar i mbia je jê! Ae arõ nda Espíritu Turã ndu nguichi bei nae, ae quiatu bautizar i sacuã mbia je Espíritu Turã je”, i que Dios seje ra. ³⁴ Atea que se cote ra. Ae rei Dios riirĩ. Aicuâte se cote, i que Juan nda.

Jesús mbia irabo uchimbaaquiaturã

³⁵ Isamami nongue que Juan ndiqui hue sí no nda. Nguesenda

nyeremo ndese que eriqui ra. ³⁶ I que Jesús ucua quia ra. —Qui mbia icuã ndiquicharõ sacuã coi quia qui. Oveja riirĩ na eriqui Dios je, i que Juan Jesús riĩ nda. ³⁷ Juan ndesenda nyeremo ngue Juan ñee ñandu ra. Nyoĩ que Jesús rui cote ra. ³⁸ Jesús que mae nguique quti ra. —¿Mbae jêsequia quia re? i que mae erese ra. ũquĩ ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra. ³⁹ —Jenyu mae erese, i que Jesús ee ra. Nyoĩ que mae echuchua rese ra. Tenda nyesecote mose que echoi erese ra. Tenda oso cheete que echi erese cote ra. ⁴⁰ ũquĩ nyeremo ngue Juan ñee ñandu ra. Si qui que Jesús rui cote ra. Andrés, i que ũquĩ mo je ra. Simón Pedro nongue que ae ra. ⁴¹ Andrés que oso asite ngõngue requia ra. Simón ndequia. —Dios chimondo que uretea ra. Cristo que uretea ra, i que Andrés ngõngue je ra. ⁴² Andrés que ngõngue querao Jesús rea cote ra. Jesús que mae erese ra. Ñee ngue ee ra. —Simón ño nde re. Jonás ndiirĩ ño nde re. Cefas, i ra ndeje cote. Cefas, i chõ Pedro re, i que Jesús ee ra.

Jesús Felipe irabo; Natanael abe

⁴³ Isamami nongue que Jesús ñee nda. —Taso Galilea, i que ra. Ngasẽ ngue Felipe je ra. —Serui eico, i que ee ra. ⁴⁴ Betsaida jenda que Felipe ra. Hue jenda si chõ Andrés re. Pedro rese. ⁴⁵ Felipe que oso Natanael ndequia cote ra. —Ae riĩ Moisés riqui embesa mbesa cose, aque que uretea ra. Ae riĩ Dios cheẽ mbuchecuasa riqui embesa mbesa cose, aque que uretea cote ra. Jesús chõ eriqui re. Nazaret jenda chõ eriqui re. José riirĩ ño eriqui re, i que Felipe Natanael je ra. ⁴⁶ Natanael que ñee Felipe je ra. —¿Mbae turã mo nda tu Nazaret jenda re? i que ra. —Echu erea ae, i que Felipe ee ra. ⁴⁷ Natanael

que tu Jesús riichã nda. Jesús que mae ere se ra. —Co israelita turã tuchi mo ndu quia co. Aba mbĩĩĩ irĩsa reã tuchi mo ndu quia co, i que Jesús Natanael nĩ nda. ⁴⁸ —¿Mañi ere quia seicuate re? i que Natanael Jesús je ra. —Amae ngue nderese ra. Felipe ‘quiatushu’ i nonde ndeje. Iraqui re que amae nderese ra. Higo iqui re, i que Jesús ee ra. ⁴⁹ Natanael que ñeembe ee ra. —Mbia mbaaquiatusa, Dios ndiĩĩ ño nde riqui re. Israel jenda rerecua tuchi chõ nde riqui re, i que Natanael Jesús je ra. ⁵⁰ Jesús que ñee ee ra. —¿Seicuate se re? “Iraqui re que amae nderese ra”, ae que ndeje, ¿aque bei bei seicua quia co re? Mbae turã tuchi rese ra eremae cote, aque si, i que Jesús Natanael je ra. ⁵¹ Jesús que ñee si ee ra. —Tacheẽ nyecua jẽje. Ibei ra obo jẽje. Angeles nda nguichi quichi quia seje. Nyoĩ nyoĩ si ra equia ibate. Angeles ibatenda. Dios rimba. Jemae nda ere se, i que Jesús ee ra.

2

Emo ngũinisirã nguereco

¹ Tres días mose que emo ngũinisirã isi ra. Galilea. Caná, i que hue sucha tubiriã je ra. Mbia que ñumunua nua fiesta raã ngũinisirã isi mose ra. Jesús si abe que siqui huee ra. ² Jesús abe que siqui huee no nda. Uchimbaaquiatu rese. ³ Mbia que uva rique mbei u huee ra. Ua jei que mbia je ra. Jesús si que ñee nda. —Uva rique que ua jeite ra, i que ñee Jesús je ra. ⁴ Jesús que ñee ee ra. —¿Mbaerã ereico ñee seje ũquĩ nde, Tai? Achecua jei eã nda mbia je, i que Jesús usi je ra. ⁵ Esi que ñee mbia rimba je ra. —¡Jesús cheẽ ndui si chõ jẽingo jẽ! i que ee ra. ⁶ Cántaro atate que chi ra. Seis que cántaro ra. Sita ao ji. Ũquĩ jie que judíos riqui nyoĩ nyoĩ querabe ra. Ũquĩ cántaro jie que cien litros

jaaja ra. ⁷ Jesús que ñee mbia rimba je ra. —Cántaro jemombisẽ mbisẽ ja i je, i que Jesús ee ra. Nyebe emombisẽ ja nguiã. ⁸ Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra. ⁹ Uva rique rã si chõ ngue i fiesta raã naasa je cote ra. Fiesta raã naasa que ubi ere se ra. Eiranuã ngue ubi ere se ra. Erimba achõ ño ngue jirandu ja nguiã. Ae ngũinisirã isi quia nae, aque je que fiesta raã naasa ñee nda. ¹⁰ —Mbia ja quiarei uva rique turã nane mee mee nguia mbia je querabe. Eturã mbei ja mose, ereã jiri mbei ruquia ruquia mbia je cote. Nde quia eturã tuchi ererecoquiatu nguiã. Hui bei sacua cote, i que ra. Jesús chisaã nĩ ño eriqui nguiã ñee. ¹¹ Ũquĩ nane ngue Jesús saã mbia mae sayã nyii ra. Uva rique rã si tuchi que i raã nda. Ũquĩ ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echimbbaaquiatu que Jesús icua tuchi cote ra. ¹² Huesi que Jesús choi Capernaum nda. Usi rese. Ngõngue rese. Uchimbaaquiatu abe rese. Hue que echi itõ mocoĩte ra.

Jesús oso Dios chuchúaa

¹³ Fiesta rurubite mose que Jesús si Jerusalén nda. Pascua, i que judíos aque fiesta je ra. ¹⁴ Jesús que oso Dios chuchúaa ra. Huee que mbia chi ticuasuu mee mee nyue mbae isiquia ribishorõ nda. Ovejas abe no. Nyurusu cuasu abe no. Emo ngue chi ngoi ra. Mbae isiquia que esibishorõ shorõ u ra. ¹⁵ Mbia iruã nuãsa que Jesús saã nda. Esã nderecua. Aque je que Jesús mbia mbusẽ ja mondochoi Dios chuchua si ra. Ticuasuu abe. Ovejas abe. Ae mbae isiquia sibishorõ shorõ nguia, ũquĩ mbae

abe que embuchiichere chere ja mesa ra. Mbae isiquia mombo mombo íbii. ¹⁶ Ae nyurusí cuasu mee mee nguia mbia je nae, ũquí je que Jesús ñee asite ra. —Á nyurusí cuasu jendao Dios chuchua si. Mbae isi isisa jěsaã saã ñochĩ u Paba chuchúaa a, i que Jesús ñee ee ra. ¹⁷ Jesús chimbaaquiātu que ndua ndua quia embesa ji rese ra. —Sebi tuchi ndechuchua, i que embesa ji huĩ nda. Ũquí ndese que echimbaaquiātu ndua ndua ra. Jesús mbia icuã mbusẽ mondochoi mose Dios chuchua si. ¹⁸ Judíos que ñee Jesús je ra. —¿Ma mbia mae sayã nda eresaã ure je re? Ure ndeicua sacua. “Ererecua chõ eriqui re”, ure nda ndeje chã, i que judíos ñee Jesús je ra. ¹⁹ Jesús que ñee ee ra. —Jẽ Dios chuchua mbutiã mose, asiquicharõ nda se. Tres días mose ra asiquicharõ, i que Jesús ra. ²⁰ Judíos que ñeembe Jesús je ra. —Tenda atate que nanderu riqui itõte Dios chuchua ao ao resẽ. Cuarenta y seis años. ¿Mañi ere ra tres días eao ja nde re? i que judíos Jesús je ra. ²¹ Nguete riĩ ngue Jesús riqui ñee nda. Mbia chumunuasa riĩ eã ño ngue ñee nguia. ²² Jesús quera si mose ramo ngue echimbaaquiātu ndua aque echeẽ ndese cote ra. Embesa ji rese ndua. —Í nguia equia re, i que echimbaaquiātu ndua ndua cote ra. Jesús quera si mose.

Jesús mbia chiã icuate

²³ Mbia tubiriã ngue Jesús icuate aque mose ra. Fiesta de la pascua mose. Siqui mose Jerusalén. Mbia mae sayã naa naa mose que mbia eicuate cote ra. ²⁴ Jesús que mbia ndua ndua icuate quia ra. Nyebe ñee tuchi eã nguia mbia je. ²⁵ —Ëi ño mbia nguia ã, i aronea mbia mo Jesús mbiirandu. Jesús quiātu que mbia chiã icuate quia ra.

3

Nicodemo oso ñee Jesús je

¹ Mbia mo ngue siqui ra. Nicodemo, i que ee ra. Fariseo que ae ra. Judíos rerecua que ae ra. ² Itondaru mo ngue esi Jesús rea ra. —Mbia mbaaquiatusa chõ nde re. Dios chimbu chõ nde re. Ureicuate que ra. Mbia mae sayã nda mbia mo saã eã, Dios siquiã mose erese, i que Nicodemo Jesús je ra. ³ Jesús que ñee ee ra. —Tacheẽ nyecua ndeje. Ae nyaacuquia si eã, ũquí nda siquiã Dios rese, i que Jesús ee ra. ⁴ Nicodemo que ñee Jesús je ra. —¿Mañi nda mbia cuasu nyaacuquia si re? ¿Usi riequi riĩ nda esi si re? ¿Nyaacuquia si nonde re? i que Nicodemo Jesús je ra. ⁵ Jesús que ñee ee ra. —Tacheẽ nyecua ndeje. Ae nyaacuquia i achõ je nae, ũquí nda siquiã Dios rese. Ae nyaacuquia Espíritu Turã abe je nae, ũquí nguia ra siqui Dios rese cote. ⁶ Mbia nyaacuquia mose, mbia sí chõ eriirĩ nde. Emo nyaacuquia mose Dios riirina, Dios rã si chõ eno nde. ⁷ “Nducuã”, erechĩ nda secheẽ mose jẽ. “¿Jenyaacuquia si ja chõ jẽ!” se i mose. ⁸ ¿Mbaranguiti si quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae ãte erese. Eĩ si chõ Dios riirĩ nde. Ae nyaacuquia Dios je nae, i que Jesús ee ra. ⁹ —¿Mañi ũquí nde? i que Nicodemo Jesús je ra. ¹⁰ Jesús que ñee ee ra. —¿Secheẽ ereicuayãte quia re? Mbia mbaaquiatusa raque nde. Judíos mbaaquiatusa raque nde. ¹¹ Tacheẽ nyecua ndeje. Ae ureicua, ũquí ño uresenei senei ndei nguia jẽje. Ae rese uremae, ũquí ño uresenei senei ndei nguia jẽje. “Ichõiño nguia”, jenye chõchĩ nguia urecheẽ mose. ¹² “Ichõiño nguia”, jenye chõchĩ nguia secheẽ mose. Ibi jenda renei nenei mose

jêje. Secheẽ nda jemumba tuchi cote, ibatenda nenei nenei mose jêje. ¹³ Emo nguichiãte ibei si. Se mii ño ngue achu nguiã nguichi ibei si. Mbiarã ño ngue achu nguiã. Asobe ra ibei. Ibei jenda chõ se re. ¹⁴ Sã Moisés mbei raanguia mbuchecua mbia je turuquia re cose no. Eĩ si ra mbia sembuchira rese. ¹⁵ ƒ nda seicuasa quiachã eã mbei sesi. ƒ nda seicuasa siqui bei ibate serese.

Dios nyesecua ja mbia rese

¹⁶ Dios que nyesecua tuchite mbia ja rese ra. Nyebe nguiĩ mii mbu nguiã mbia je. Eriĩĩ icua sa ra manoa. Siqui bei rae. ¹⁷ Mbia mbasi sacua eã ngue Dios nguiĩ mbu ibii ra. Mbia rirõ sacua mbae icua si quia ñi ngue Dios nguiĩ mbu nguiã. ¹⁸ “Eso tata cuasu”, i eã nda Dios nguiĩ icuasa je. “Eso tata cuasu”, i Dios quia nguiĩ icuasa reã je ã. Jesús icua eãte quia ñene. ¹⁹ “Eso tata cuasu”, i Dios quia nguiĩ icuasa reã je. Ebite quia ñi itondaru nyaashĩ si re. Nyaashĩ tu mose ibii, isiteã ngue ra. Mbae icua ndese quia eriqui beite nguiã. ²⁰ Ae siqui beite quia mbae icua ndese, ũquĩ nguia siquichete nguiã nyaashĩ si. Nyaashĩ ndũchã sereãte quia ñene. “ƒ nda mbia mae eã nandechisaã ndese mbae icua ndese”, i ñene. ²¹ Ae mbae turã saã mbeite quia nae, ũquĩ nguiatu nyaashĩ si chã sete nguiã. ƒ nda echisaã saã nyecua mbia je. ƒ nda mbia ñee, “Dios quirãcuã nguia siquite nguiã erese”, i ra mbia ñee, i que Jesús ra.

Juan el Bautista ñee turã Jesús rĩ

²² Jesús que nyoĩ Judéaa cote ra. Uchimbaaquiatsu rese. Huee que eriqui mocoĩte ũquĩ ndese ra. Huee que eriqui bautizar i mbia je ra. ²³ Juan abe que bautiza r i quia mbia je ra. Enón, i que sucha tubiriã je ra. Salim ndurubi que ra. Hue quiatu ngue i tubiriãte re.

Mbia que ngaẽ ngaẽ nguia erea ra. Juan ngue bautizar i quia ee ra. ²⁴ Mbia Juan tarõ nonde mii ngue eriqui bautizar i huee nyii ra.

²⁵ Judío mo ngue ñee icua icua Juan ñimbaaquiatsu je ra. Bautizar i rĩ. —¿Aba quia ra bautizar i mbia mbitirõ sacua nde? i que ñee icua icua nyue ra. ²⁶ Nyebe Juan ñimbaaquiatsu nyoĩ nguiã ñee Juan je. —Ae rese ereico Ama Jordán ndobei, ae abe riqui bautizar i mbia je huee. Ae eresenei senei turã nguia ure je, aque. Mbia riqui tuchite erui ã, i que Juan ñimbaaquiatsu ñee ee ra. ²⁷ Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose. ²⁸ Cristo tu nonde que Dios sembu resẽ. Mbae mbuquiche ja sacua Cristo tu nonde. “Cristo eã ño se resẽ”, ae checua rei que jêje resẽ. ²⁹ Jesús rui ra mbia siqui ja. Sã emo ngũinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui. ³⁰ Jesús quia ererecua tuchi riqui nguiã sesi co. Ererecua eã ño aico nguiã se co, i que Juan nda.

Jesús rei ibatenda

³¹ Jesús rei ibatenda. Nyebe eaquiatsu riqui nguiã mbia si co. Ibi jenda chõ nande re. Ibi jenda rese achõ ño nandeaquiatsu nande re. Ae quiarei ibatenda. ³² Ibatenda umaesa senei senei nguia mbia je co. Ae echandu ibate nae, ũquĩ abe esenei senei nguia mbia je co. Mbia mii jiri riqui echeẽ andu andu ã. ³³ Ũquĩ mii mii ño Jesús cheẽ isi turã nguiã ã. Ũquĩ mii “Dios ichõĩñosa reã”, i tuchi nguiã ã. ³⁴ Dios quiatu que Jesús mbu ra. Nyebe Jesús riqui Dios cheẽ nenei nenei co. Dios que Espíritu Turã mondo tuchite Jesús je ra. ³⁵ Jesús rese Paba riqui nyesecua tuchite

co. Erucucha quia ae re. Nyebe Paba uquirācuā mee tuchi nguiā ee. 1 Nda Jesús riqui mbae rerecuarā ja. 36 Ae Dios rucucha icua nae, ũqui nda siqui bei Dios rese. Ae Dios rucucha icuayā nae, ũqui nda siquiā tuchi erese. Nyoī eā mbei ra ibate. Dios ra ũqui mondo tata cuásuu.

4

Jesús ñee acuanī mo je

1-2 Mbia que siqui tuchite Jesús rui cote ra, Bautizar i sacuā mbia je. Jesús si que bautizar i eā nda. Echimbāaquiatu quia ngue bautizar i nguiā ee. —Fariseos riqui ndeucuāyāte ā. Mbia siqui tuchi mose nderui, i que mbia mo Jesús mbiirandu ra. 3 Jesús jirandu mose que esi Judea recha cote ra. —Tasobe Galilea, i que ra. 4 Samaria ni ngue esi ra. 5 Ngasē ngue Samaria ra. Sucha tubiriā mo ngue ngasē nda. Sicar, i que hue je ra. Jacob chimee ibi ndurubite que huee ra. Ae emee nguiirī José je. 6 Jacob chibicoi ibi que chí huee ra. Noria. Jesús que ngoi huī uquenea ucua huee ra. Noria ji. Tenda nandeite re mose. Ñeenda ishote que ee ra.

7-8 Jesús ae que tiba huee ra. Echimbāaquiatu que nyoī sucha tubiriā nda. Mbae mo isi uchiurā. Acuanī mo ngue tu ngasē i rea huee ra. Samaria jenda que ae ra. —I embu rā. Tayu, i que Jesús ñee ee ra. 9 Judíos que ñee eā mbei quia mbia Samaria jenda je querabe ra. Isho bei que eriqui nyesi ra. Nyebe acuanī ñee nguiā Jesús je. —Judiate nde resē. ¿Mbaerā ereico ñee seje re? ¿Mbaerā ereico “i embu” i seje re? Samaria jenda chō se resē, i que acuanī Jesús cheē ndibishorō nda. 10 Jesús que ñee ee cote ra. —Dios chimee ereicuayāte quia co. Co ereico seicuayāte co. Eī nda “i raanguia embu seje” ere rei seje. Seicua mose. Eī nda i mbia

mingo beisa amee ndeje, i que Jesús acuanī je ra. 11 Acuanī ngue ñee si Jesús je ra. —Noria cuate nyeresē. I arasa ereru eāte quia a resē. Ma je quia ra i raanguia erechara seje. 12 Nanderu ñiinda abe nda íu íu quia a yenda ye resē. Jacob. Nguiirī ndese. Erimba abe nda íu íu quia a yenda ye resē. ¿Ndeaquiatute ae si nde re? i que acuanī Jesús je ra. 13 Jesús que ñee acuanī je ra. —Mbia íu mose a yenda jie, eisei jei chō nda eno. 14 Ae i raanguia mbei quia nae, ũqui nda eisei chiā mbei cote. I raanguia sechimee nguia ra siqui bei echiangui re. Uchi bei ra equia echiangui re. Emingo bei sacuā, i que Jesús acuanī je ra. 15 Acuanī ngue ñeembe Jesús je ra. —I raanguia embu nembae seje no. Eī nda seisei chiā mbei. Eī nda achu achu eā a jenda ara, i que acuanī ee ra.

16 —Eso nderu rea. Eru seje a, i que Jesús ee ra. 17 —Seru eāte nyeresē, i que acuanī nda. Jesús que ñee ee ra. —Ae beite. Nderu eāte que ereico namo co ra. 18 Nderurā ngue eretea mo-coite rei resē. Cinco. Ae erereco co nae, nderu tuchi eā ño aque re. Erecheē ñooño āte rei nguiā seje a, i que Jesús acuanī je ra. 19 Jesús cheē mose que acuanī ñeembe ee no nda. —Mbae mbuchecuaa nde reae. Dios resenda nde reae. 20 Ureramei nda ngaē ngaē nguia a ibi ato ra. Ñee ñee sacuā Dios je. “Jerusalén quiatu mbia cheēsa Dios je re” jentye chōchī nguiā judíos, i que acuanī Jesús je ra. 21 Jesús que ñee acuanī je ra. —Tacheē nyecua ndeje. Mangue chooño āte ra mbia ñee Dios je cote. Namu jiri. Jerusalén mii eā. A ibi ato mii eā no. 22 Jeñee mbeite raque equia Dios je ā. Dios icuare rocoī. Ure quia ureico nguiā Dios icuate ā. Judíos chō ure re. Judío rei mbia rirōsa mbae icuā si. 23 Namu jiri ra Dios quiatote ñee turā turā

Dios riĩ uchiangui re. Mangué chooñoa cote. Dios quiatote ra ñee turã bei quia Dios riĩ cote. Echeẽ nguire. ²⁴ Dios rei espíritu. Mae aronea erese. Nandechiangui re chõ nandeico Dios andu ã. Nandechiangui re nandechẽ turã turã Dios riĩ. Dios cheẽ nguire, i que Jesús ra. ²⁵ Acuanĩ ngue ñee Jesús je ra. —Mesías ra tu ibate si. “Cristo”, i equia ee nae, aque ra tu íbii cote. Tu mose ra mbae mbuchecua ja mbia je. Ûquĩ aicuate quia co, i que acuanĩ nda. ²⁶ —Cristo chõ se re. Ae je ereico ñee, i que Jesús acuanĩ je ra.

²⁷ Aque mose que Jesús chimbaaquiatu ngaẽ ngasẽ cote ra. —Jesús riquichĩ ñee acuanĩ je a re, i que eu nyuruirate mae erese ra. —¿Mbae jenyẽ quia ñee nde? i eã ngue emo nda. Ireĩ ireĩte quiatu ngue ñee Jesús je re. ²⁸ —Se rei Cristo, i mose que acuanĩ ía tuchi ra. Ñio ngue esecha oso ra. Mbia mbiirandu randu sucha tubiriã jenda. ²⁹ —A emo ndiqui a. Semumbusẽ ja que ra. Cristo chõ ae reae. Nyao rã mae erese, i que acuanĩ mbia je ra. ³⁰ Nyebe mbia nyoĩ ja nguiã ícuua. Jirandu mae Jesús rese. Acuanĩ ñee nguire.

³¹ —Mbae mo eu, i chiibe ibe que echimbaaquiatu Jesús je ra. Acuanĩ oso mose sucha tubiriã. ³² —Tei. Sechiu jẽicuayãte jẽ, i que Jesús ee ra. ³³ —Emo mbae mo queru echiurã ndeae, i que echimbaaquiatu ñee ñee nyue ra. ³⁴ Jesús que ñee ee ra. —Ae riĩ Paba ñee seje nae, ñquĩ tasaã mbei quia ee. Paba cheẽ mumbayã mose, ñquĩ ño sechiu riqui nguiã. ³⁵ “Pete mbae ishao shao ñi pe”, jenyẽ chõchĩ nguiã ã. Mbiaco yenda ea ireĩ ishao iriã na ño mbia riqui nguiã ã. Sã mbia riqui nyoĩ mbae a ishao shao no. Eĩ jenyẽ si chõ nguia nyoĩ mbia reru seje. Serese siqui sacua. ³⁶⁻³⁸ Sã emo ndiqui

mbae a ishao shao no. Sã mbae acha riqui mbae mondo mondo ee eishao shao ribishorõ no. Sã emo ndiqui mbae eĩ tiquia tiquia no. Sã emo ndiqui eishao shao equiche mose no. Eĩ si chõ secheẽ no nde. Sã emo ndiqui secheẽ nenei nenei nyii no. Aquere emo mbia reru reru seje no. Ae secheẽ nenei nenei quia nyii nae, ae mbia queru queru quia seje cote nae, ñquĩ ía jate nyiese cote. Ae emo ndiqui secheẽ nenei nenei nyii, huee jaemondo quia aque. Mbia reru reru sacua seje. Se mbia mingo bei sacua. Emo nane serenei nenei nguiã ee nyii. Jẽ jẽingo ereru reru seje ã cote. Jẽya jate riqui jenyiese ã cote. Ae secheẽ nenei nenei quia nyii, ñquĩ ndese jẽya jate, i que Jesús ra.

³⁹ —Jesús que semumbusẽ ja ra, i que acuanĩ ñee sucha tubiriã jenda je ra. Nyebe mbia tubiriã siqui nguiã Jesús rui hue jenda cote. ⁴⁰ Samaria jenda que nyoĩ Jesús rea cote ra. —Eico are jiri ure rese, i que mbia Jesús je ra. Nyebe Jesús itõ nguiã nyeremo huee. ⁴¹ Jesús sí que mbia mbaaquiatu quiatu cote ra. Nyebe mbia tubiriã siqui tuchi nguiã erui cote. ⁴² Mbia que ñee acuanĩ je cote ra. —Nde chõ ngue urembiirandu rei nyii ra. Uremae ngue erese cote ra. Echeẽ ngue urechandu cote ra. Nyebe ureico nguiã eicua tuchi ã cote. Erecheẽ ñooñoa ngue ra. Cristo tuchi chõ ae re. Mbia rirõsa mbae ícuã si chõ ae re, i que mbia ñee acuanĩ je ra.

Jesús ererecua mo ndiirĩ mbucherõ

⁴³ Huee que Jesús itõ nyeremo nda. Samariaa. Hue si que esi si nyuruã Galilea quiti ra. ⁴⁴ —Mbia ra Dios cheẽ nenei neneisa quereco turã eã hue jenda sí mose, i que Jesús nyii ra. Nyebe esi nguiã Galiléaa. ⁴⁵ Jesús que ngasẽ Galiléaa cote ra. Mbia hue jenda que embucuasẽ turã nda. Mae nguiatu equia

erese Jerusalén neaẽ. Pascua mose. Mbia mae sayã nguiatu ngue Jesús saã saã nguiã ee nyii. Nyebe eyate nguiã Jesús cuasẽ mose cote.

⁴⁶ Jesús que oso si Caná de Galilea no nda. Ae eriqui i mbuchiicabo uva rique rã mbia je nyii nae, huee que esi si ra. Hue rurubi que ererecua mo ndiirĩ ndasi riqui ra. Capernaum, i que hue je ra. ⁴⁷ — Jesús ru Judea si a cote, i que mbia ererecua mbiirandu ra. Nyebe ererecua si nguiã Jesús rea cote. — Seriiĩrĩ chĩ mano serĩte qui. Nyao terembucherõ seje, i que ererecua ñee ee ra. ⁴⁸ — Mbia mae sayã naa eã mose ra jẽ seicuayã ñochĩ nde, i que Jesús ee ra. ⁴⁹ — Nyao jei rã. Seriiĩrĩ nda mano nyee re, i que ererecua Jesús je ra. ⁵⁰ — Esobe nyebi ndechuchúaa. Nderiirĩ ngue nyerõ nda, i que Jesús ee ra. — Jesús ñee ñooño aroneate, i que ererecua oso nyebi ra. ⁵¹ Echuchua rurubi que erimba ngaẽ erobeishĩ ñee nda. — Nderiirĩ ngue nyerõte ra, i que ñee embiirandu ra. ⁵² — ¿Ma tenda seriiĩrĩ ngasi ucu re? i que ererecua ra. — Tenda nyiichere ramo mose que nderiirĩ ngacu ucu curi ra, i que mbia ñee ee ra. ⁵³ — Hue tenda tuchi que Jesús ñee seje curi ra. “Nderiirĩ ngue nyerõ nda”, i seje curi, i que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra. ⁵⁴ Judea si que Jesús ru Galiléaa ra. Mbia mae sayã nyeremo ngue Jesús saã Galilea jenda je ra. I que esaã uva riquera nyii ra. Ererecua riirĩ ngue embucherõ namo no nda.

5

Jesús Amei mbucherõ

¹ Aquere que judíos mbae fiesta ra. Jesús que oso Jerusalén fiesta mose ra. ² Oveja iquesa que chĩ huee ra. Mbia icua abe que chĩ huee ra. Cinco tei que chĩ hue

eicua mama nda. Betesda, i que judíos hue mbia icua je ra. ³ Mbia rasi que chĩ jate nyaara huee ra. Taiqui re. Eresayã. Ecuatayã. Echaacua. Mbia rasi chumumbara que chĩ huee ra. I rebera raarõ arõ. ⁴ Angel mo nda nguichi quichi quia ra. I mumbera sacua mbia rasi je. — Ae rane nda ua ama ndebera mose nae, aque rane nda nyerõ, i que mbia ra. ⁵ Amei ndasi ima mo ngue chĩ bei aque rĩ nda. Treinta y ocho años que amei ndasi ra. ⁶ Aque que chĩ nyaara Jesús je ra. — Aa chõ erasi riqui bei a cose re, i que Jesús uchiangui re ra. — ¿Erecherõ sete ere? i que ee ra. ⁷ Amei ndasi que ñee ee ra. — Aba quia ra sembua i ye, i rebera mose. Mbia rane ngue secuã secuã nguia ra. I rebera mose, i que erasi Jesús je ra. ⁸ Jesús que ñee ee ra. — Êhuã. Ndequisa erao. Eso, i que Jesús ee ra. ⁹ Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda. ¹⁰ Nyebe judíos paama i nguiã embucherõ mose sábado mose. — Co mose que mbia uguenea ucu ra. ¿Mbaerã nda ndequisa ererao re? i que judíos Jesús chimbucherõ je ra. ¹¹ — Ae sembucherõ, aque que ñee seje ra: “Ndequisa erao. Eso”, i que sembucherõsa seje ra, i que judíos cheẽ mose ra. ¹² Judíos que ñee ee ra. — ¿Aba aque re? ¿Aba “ndequisa erao”, i ndeje re? i que ra. ¹³ — Aicua eãte se. Aba chõ sembucherõ. Mbia tubiriãte quiatu ngue re, i que erasi judíos je ra. Jesús oso rei. ¹⁴ Emo mose que Jesús ngasembe uchimbucherõ je ra. Dios chuchúaa. Ñee ngue ee ra. — ¡Sã jê! Arembucherõ ngue se resẽ. ¡Mbae icua nda eresaã sichĩ jê! Mbae mo nda jê tuchi ndeje cote, i que Jesús ee ra. ¹⁵ Amei ngue oso judíos mbiirandu cote ra. — Jesús chõ sembucherõ nguia reaẽ, i que

judíos je ra. ¹⁶ Nyebe judíos paama i nguiã Jesús je. Nandeiquia, i. Sábado mose quia Jesús riqui nguiã mbia mbucherô cherô judíos je. Judíos uquenea ucua mose. Nyebe judíos paama i nguiã ee. ¹⁷ Jesús que ñee judíos je cote ra. —Paba recoteã mbeite riqui co. Namó abe. Se abe Paba rã si serecoteã teã mbeite riqui co, i que Jesús ee ra. ¹⁸ Nyebe judíos riqui nguiã paama i tuchi Jesús je. Iquia serĩ serĩte que cote ra. Jesús que judíos cheẽ mumba mumba ra. Mbía rasi mbucherô cherô sábadó mose. —Dios rã si aico co. Paba rei Dios, i que Jesús ra. Nyebe judíos paama i tuchi nguiã ee.

Jesús rei Dios rucucha

¹⁹ Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguiã mbae raã naa se abe co. Ae Paba saã saã nguia, ùquĩ asaã saã ja quia se abe co. ²⁰ Dios rucucha rei se. Paba riqui nyesequa tuchi serese co. Paba riqui uchiao reacucua tuchi seje co. Uchiao ra eteacucua tuchi seje cote. Mbía mae sayã tuchi. Jenyuruirã tuchi ra mae erese cote. ²¹ Paba mbia raaque mbuquera quera. Se abe ra mbia raaque ambuquera quera. Ae amingo bei sete, ùquĩ abe ra amingo bei. ²² Paba ra mbia mo mondo eã tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. ²³ I nda mbia ñee turã serĩ. Sã mbia riqui ñee turã Paba rĩ no. Ae ñee turã eã nguia serĩ, ùquĩ ñee turã eãte Paba abe rĩ no. Dios rucucha rei se. Dios chimee ndei se. ²⁴ Tacheẽ nyecua jêje. Secheẽ andusa ra siqui bei. Paba icuasa ra siqui bei. Nyoi eã mbei ra tata cuásuu. Paba ra emingo bei cote.

²⁵ Tacheẽ nyecua jêje. Namó jiri ra mbia raaque secheẽ andu. Secheẽ mumbasa reã nda siqui

bei. ²⁶ Paba quiarei mbia mingo beisa. Se abe rei mbia mingo beisa Paba rui si. ²⁷ Se abe ra mbia amondo tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. Se chĩ erucucha. ²⁸ IJenyuruirã techĩ nda secheẽ mose jê! Mbía raaque ra secheẽ ñandu ja chee. ²⁹ Júã ja ra ngua si. Ae siqui turã, ùquĩ nda Dios mingo bei cote. Ae siqui icuã icuã nguia, ùquĩ nda nyoi tata cuásuu.

Serĩ ño embesa ji ñee, i Jesús

³⁰ Se ae ra mbae asaã eã. Paba cheẽ ndui si chõ aico nguiã mbia mondo tata cuásuu. Paba cheẽ ndui si chõ aico nguiã mbia mingo bei no. Paba cheẽ nda achabiã. Paba cheẽ nguire chõ aico nguiã mbae raã naa co. Se ae eã ño ñene. ³¹ Se ae eã ño acheenei enei nguiã mbia je co. I nda “ichõño” jentye rei seje. ³² Aque emo ndiqui serenei nenei mbia je aque. Aque eriqui ñee ñooño eã serĩ aque. ³³ Jemo ngue jemondo Juan je. Jêirandu sacua serese. Juan ngue ñee ñooño eãte jêje ra. ³⁴ Ae mbia ñee ñee serĩ, ùquĩ ñee ndeseã aico nguiã se. “Dios ririĩ eã ño co re”, i mose mbia serĩ, Dios ririĩ mbei chõ se re. Jêicuã mbutiã sacua ño aico rei nguiã ñee jêje. ³⁵ Tata rendi rã ndei Juan. Mbae resae ja raaque. Huee que jengu mbiriĩ ndei erese ra. Jêhui jei chõchĩ esi. ³⁶ Juan ñee ngue mbia mbiirandu rei serese ra. Sechisaã nguia mbia mbiirandu tuchi serese Juan ñee si. Dios cheẽ nguire ae aico nguiã mbae ao ao co. Sechisaã ndese mae jee mbia jirandu nguiã serese cote. “Dios chimondo quiarei Jesús”, i mbia cote. ³⁷ Paba abe riqui serenei nenei mbia je co. Paba cheẽ jeñanuate raaque. Jemae sayãte raaque Paba no. ³⁸ Jê nguia seicuayãte nguiã co. Paba chimondo chõ se re. Nyebe Paba cheẽ chĩ eãte jendese. ³⁹ Embesa ji rese jêingo mae tuchite raaque. “Embesa ji ra nandemingo beite”,

jenyechĩ nguiã. Serese jembirandu sacuã ño embesa ji re. Se quiatu mbia mingosa tuchi re. ⁴⁰ Jẽ nguia jẽingo sereãte nguia serese. ƒ nda se jaemingo beite rei. ⁴¹ Jẽingo eã mose Dios rese, sebiãte jeñee turã turã mose seriĩ. ⁴² Co aico jẽicuate co resẽ. Jenyesequa eãte quia Dios rese co resẽ. ⁴³ Paba que sembu resẽ. Jẽo eã ñochĩ serese. Paba chimondo eã tu mose, aque rese quia ra jẽo tuchite cote. ⁴⁴ Mbía resa rae jẽingochĩ nguiã jẽturã naa naa. Dios je quiarei jẽturã eãte. ¿Mañi jenyẽ quiatu ra equia seicua re? ⁴⁵ Se quia ra jẽicuã ambuchecua eã Paba je. Moisés chimbese quia jẽicuã mbuchecua nguiã. “Moisés chimbese rei mbia mingos beisa”, jenyechĩ nguiã. ⁴⁶ Moisés chimbese jẽicua eãte quia ã. Nyebe jẽingo nguiã seicua eãte ã. Seriĩ ngue Moisés embesa ra. ⁴⁷ “Nyia” jenyẽ eã mose Moisés chimbese je, “nyia” jenyẽ eã nda secheẽ mose abe no, i que Jesús judíos je ra.

6

Jesús mbichae mbeta tuchi

¹ Aquere que Jesús choi amandisa rasa ra. Galilea, i que amandisa je ra. Tiberias, i abe que ee ra. Hue robei que echoi ra. ² Mbía que nyoĩ tuchite Jesús rui ra. Mbía mae sayã ngue Jesús saã saã nguia ra. Echisaã ndese que mbía mae mae nda. Mbía rasi mbucherõ cherõ mose. ³ Sita ibate rĩ ngue Jesús choi ra. Huee que echĩ ngoĩ uchimbaaquiatur rese ra. ⁴ Fiesta de pascua rurubi que ra. ⁵ Mbía tubiriã ngue ngaẽ nguia Jesús rui ra. Jesús que mae erese ra. Ñee ngue Felipe je ra. —Mbía tubiriã tuchi. ¿Mangue ra echĩurã nandei si mangue re? i que Jesús ee ra. ⁶ Jesús eicuate raque. —Mañi nda Felipe quia secheẽ mose reae, i que Jesús ra.

⁷ Felipe que ñee ee ra. —Doscientos plata mbía chayãte mbía chiurã isi sacuã. Echayã tuchite, i que Felipe ra. ⁸ Andrés abe que chi ra. Jesús chimbaaquiatur. Simón Pedro nongue. Ae que ñee nda. ⁹ —A ãquẽ mo ndiqui a. Cinco mbichae rerequia a. Sira nyeremo abe rerequia a. Echayãte quiatur nda re. Mbía tubiriãte quia ñene, i que Andrés Jesús je ra. ¹⁰ —“Jengoi ja”, jenyẽ mbía je, i que Jesús ra. Quiatur turã ngue huee ra. Quiatur tose que mbía ngoi ja ra. Mbía cuabẽ. Cinco mil que mbía ra. ¹¹ Jesús que mbichae isi cote ra. Ianye, i que ngu je cote ra. Mbichae rĩ. Mbichae que embuchao chao cote ra. Uchimbaaquiatur je que emondo mondo ra. Echimbaaquiatur que emondo mondo mbía je cote ra. Ae chi ngoi. Sira abe que embuchao chao mbía je ra. Mbía que eu ja ra. Mbía que echosei chiã chiã nyee ra. ¹² Mbía rio ja mose que Jesús ñee uchimbaaquiatur je cote ra. —iMbía chiũ siquẽ jemunua nua jẽ! jJendecoquiatur ja jẽ! i que ra. ¹³ Echĩu siquẽ que emunua ja ra. Doce irairu que puk i ja ra. Mbichae siquẽ siquẽ. Cinco chõ ndei que mbichae nyii aẽ. ¹⁴ Mbía que mae tuchi Jesús rese ra. Mbichae mbeta rese ra. Ñquĩ ndese que mbía riqui mae eã tuchi nyii ra. —Dios cheẽ nenei neneisa chõ co riqui re. Ae uresaarõ arõ nguia, ae chõ eriqui re, i que mbía Jesús rĩ nda.

¹⁵ Jesús que mbía icua ra. —Mbía ra seisichĩ suruchoi ererecuarã nde, i que ra. Nyebe esi si nguiã mbía recha. Sita ibate rĩ ngue esi erecha ra.

Jesús ngata i arõ

¹⁶ Itondaru ndaru que Jesús chimbaaquiatur choi amandisaa ra. ¹⁷ Nyui nyui que canoa ye cote ra. Aque echoichĩ nguia iasa

Capernaum aque. Jesús que nyebi eã mbeite u ee ra. Itondaru chee. Nyoĩ chee que erecha ra. ¹⁸ Quiririã ngue tu icuã icuã ee ra. Ama ndiite re mbia reco mose. I rebera que tu asi asi tuchi ra. ¹⁹ Mbua que nyoĩ choĩ bei canoa ye ra. Una legua. Jesús que canoa curubite cote ra. I arõ ngue esi quia ngata ra. Canoa yenda que mae erese ra. Echiã ngue cuaãcuã i tuchi ra. ²⁰ —Se chõ nyeresẽ. ¿Mbaerã jẽingo siquiche sesi re? i que Jesús ee ra. ²¹ Canoa yenda que oote erese cote ra. Mbua que canoa ye ra. Ngasẽ asi que ecuaẽ ibii cote ra.

Mbia cuabẽ Jesús requia

²² Mbua cuabẽ ngue chi sobei ra. Isamami ngue Jesús tiãte ee ra. Nyebe ñee nguiã nyue. —Canoa mii ño ngue chi resẽ. Canoa ye eã ño Jesús si iasa resẽ. Echimbaaquiatu achõ ño ngue nyoĩ iasa canoa ye resẽ. ¿Mangue Jesús riqui mangue re? i que mbia cuabẽ u ñee Jesús requia ra. ²³ Aque mose que canoa mo ngaẽ ngasẽ ee ra. Tiberias si que canoa cuaẽ nda. Mbua mbichae usa rurubi que ecuaẽ tiba ra. ²⁴ Jesús tiã mbei que mbia je huee ra. Mbichae úsaa ra. Echimbaaquiatu abe tiã ngue mbia je ra. Nyebe mbia choĩ nguiã erequia canoa ye. Ngasẽ ngue coquimo cote ra. Capernaum, i que hue sucha je ra.

Mbichae rã ndei Jesús

²⁵ Mbua cuabẽ ngue ngaẽ amandasa coquimo ngote ra. Ngasẽ ngue Jesús je cote ra. —Mbua mbaaquiatusa, ¿manose erechu ngasẽ aa re? i que mbia cuabẽ Jesús je ra. ²⁶ Jesús que ñee ee ra. —Tacheẽ nyecua jêje. Se jembuquiarure chõ jẽingo nguiã serese. Se jembiore chõ jẽingo nguiã serese. Sechisaã icuare rocõĩ. Jemae sayã ngue asaã saã ndei quia resẽ. ²⁷ Jenyiurã ndese jẽingochĩ nguiã ndua tuchite. Ûquĩ

nda ua jeite. Ae ua eã mbeite quia, Ûquĩ ndese quiatu jendua. Mbua mingo beisa rese quiatu jendua. Se rei mbia mingo beisa. Se rei Dios rucucha. Paba que uquirãcuã mondo seje ra, i que Jesús ee ra. ²⁸ Mbua que ñeembe Jesús je ra. —¿Mañi ure ra equia re? ¿Mbae rese ra aba riqui Dios mbia re? i que mbia Jesús je ra. ²⁹ Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, i que Jesús mbia je ra. ³⁰ —¿Mbae mo nda eresaã na ure je re, uremae sayã nde? f nda uremae nderese. Eĩ ure ra ndeicua cote. ³¹ Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbia je ra”, sã embesa ji riqui i no, i que mbia Jesús je ra. ³² Jesús que ñee ee ra. —Tacheẽ nyecua jêje. Moisés eã ño ngue mbichae mondo nguiã mbia je ibei si. Paba chõ ngue emondo nguiã ibei si mbia je. Aque mbichae ra mbia mingo bei eã. Paba ra mbia mingo beisa mondo mbia je cote. ³³ Dios riqui mbichae mbuae mondo mondo mbia je co. Ae Dios mondo mondo nguiã mbia je co nae, aque que tu ibei si ra. Aque rei mbia mingo beisa, i que Jesús ra. ³⁴ Mbua que ñee Jesús je ra. —Aquembichae mbichae emondo mondo bei quia ure je, Urererecua, i que mbia Jesús je ra.

³⁵ Jesús que ñee ee cote ra. —Mbichae rã ño se re. Mbua mingo beisa chõ se re. Serese siqui mose ra jeniãcuã eã mbei. Serese siqui mose ra jẽisei eã mbei. Jêya bei rae. ³⁶ Jemae ndei que equia serese resẽ. Seicuayã mbei chõchĩ nguiã ã. Acheẽ ndei que jêje nyii resẽ. ³⁷ Ae Paba mee seje mbia nae, Ûquĩ nda siqui bei serese. Ûquĩ nda aisi teã eã mbei. ³⁸ Paba que sembu ibei si resẽ. Secheẽ nguire eã ño aico

nguiã mbae raã naa. Paba cheẽ nguire ae chõ aico nguiã mbae raã naa co. ³⁹ “Ae amondo ndeje nae, ãquĩ mo nda quiachãchĩ”, i que Paba seja ra. Ambuquera ja ra se, se tube mose íbii. ⁴⁰ Se rei Dios rucucha. Paba que sembu ra. Ae seicuate nae, ãquĩ nda siqui bei. “Ãquĩ nda amingo bei”, i que Paba ra. ãquĩ ndaambuquera ja, se tube mose íbii, i que Jesús ra.

⁴¹ Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra. ⁴² —Jesús chõ co re. José riirĩ ño co re. Eru rese que nandemae ndesẽ. Esi abe rese que nandemae ndesẽ. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra. ⁴³ Jesús que ñee ee cote ra. —¿Mbaerã jẽingo ñee icuã icuã serĩi nde? ⁴⁴ Mbia ae ra siqui eã serese. Paba emingo mose serese, aque mose ra eriqui tuchi serese cote. ãquĩ ndaambuquera si mingo sechube mose íbii. ⁴⁵ “Dios ra mbia mbaaquiatsu ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese. ⁴⁶ Emo ngue mae eãte Paba rese ra. Se mii ño ngue amae erese ra. Esi chõ ngue achu resẽ. ⁴⁷ Tacheẽ nyecua jẽje. Ae seicuate quia nae, ãquĩ nda siqui bei. ⁴⁸ Se rei mbichae rã. Mbia mingo beisa rei se. ⁴⁹ Nanderamei ngue maná u u turã ndei quia turuquia re ra. Emo mose que mano mano ja ra. ⁵⁰ Mbichae mbuae chõ asenei senei nguiã jẽje co. Mbia mingo beisa rei mbichae mbuae. Aque que tu ibei si ra. Ae mbichae mbuae u nae, ãquĩ nda siqui bei. ãquĩ nda ua eã mbei. ⁵¹ Se rei mbichae. Ibei si que achu ra. Mbia mingo beisa rei se. Ae seu nae, ãquĩ nda siqui bei. Mbichae ra amee mbia mingo bei sacua. Aque mbichae rei serete sí.

Seroo sí, i que Jesús judíos je ra.

⁵² Judíos que ñee icuã icuã nyue cote ra. —¿Mañi nda nguete mee nandechiurã nde? i que nyue ra. ⁵³ Jesús que ñee ee cote ra. —Tacheẽ nyecua jẽje. Mbiarã ngue achu ra. Serete jẽu eã mose, jẽingo bei eã ndae. Seruqui jembei eã mose, jẽingo bei eã ndae. ⁵⁴ Ae serete u quia nae, ãquĩ nda siqui bei. Ae seruqui mbei quia nae, ãquĩ nda siqui bei. ãquĩ ndaambuquera si mingo, sechube mose íbii. ⁵⁵ Serete rei mbia chiurã. Seruqui rei mbia chimbei rã. ⁵⁶ Ae serete u quia nae, ae seruqui mbei quia nae, ãquĩ nda siqui bei sechiangui re. Se abe ra aico bei echiangui re. ⁵⁷ Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se. ⁵⁸ Mbichae mbuae chõ asenei senei nguiã jẽje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbia mingo bei eã nda. Emo mose que mano ja chõ nda. Ae sechimee u quia nae, ãquĩ nguiã ra siqui bei, i que Jesús judíos je ra. ⁵⁹ Eĩ ngue Jesús quia judíos mbaaquiatsu quiatu ra. Capernaum. Judíos chumunuásaa.

Mbia tubiriã hui Jesús si

⁶⁰ Jesús cheẽ andusa que ñee tuchi nyue ra. —Mbaranguiatuã tuchi chõ Jesús cheẽ ndiqui re. Echeẽ nandemumba eã aroneate quiatu quia re, i que nyue ra. ⁶¹ —Mbia riqui ñee icuã icuã tuchi chõ secheẽ nii, i que Jesús uchiangui re ra. Nyebe ucheẽ mbuchecua ee cote. —¿Mbaranguiatuã secheẽ jẽje re? ⁶² ¿Mañi jenyre ra mae mose serese re? Seso si mose ibate re. ⁶³ Nande rete nandemingo eã nguiã. Nande aĩ ño nandemingo nguiã. Secheẽ nguiã ra mbia mingo bei ibátee. ⁶⁴ Seicua ja eãte quiatu nguiã ã. Jemo seicua eãte quia ã, i que Jesús ee ra. Mbae ao ramo

mosenda bei que Jesús mbia icua uchiangui re ra. —Ã nda seicua. Ã nda seicua eã. Co ra semondo mbia icuã je, i que Jesús mbia icua uchiangui re nyii ra. ⁶⁵ —Acheẽ ngue jêje nyii, ûquĩ sí aico ñee jêje a. Mbia ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

⁶⁶ Aque mosebe bei que mbia tubiriã hui Jesús si cote ra. Ae siqui erese nyii nae, ûquĩ mo ngue hui ja esi cote ra. Ngatayã ngue equia erui cote ra. ⁶⁷ Jesús que ñee uchimbaaquiatu je cote ra. Doce je. —¿Jê abe ra jêhui sesi re? i que uchimbaaquiatu je ra. ⁶⁸ Simón Pedro que ñee ee ra. —Tei, Ure-rerecua. Aba rui quia ra ureico cote. Ndecheẽ ño mbia mingo beisa resẽ. ⁶⁹ Ureico ndeicua ã cote. Cristo rei nde. Dios rucucha rei nde, i que Pedro ra. ⁷⁰ Jesús que ñee ee cote ra. —Jê doce que jaẽirabo rei ra. Sechimbaaquiatu sacua. Jemo ngue diablo rã nda, i que ra. ⁷¹ Judas Iscariote riĩ ngue eriqui ñee nda. Diablo, i. Simón ndiirĩ ndei Judas. Ae quia Jesús mee nguiã mbia icuã je. Jesús chimbaaquiatu mo ndaque.

7

Jesús nongue siquiã Jesús rese

¹ —Jesús nandeiquia, i rei que judíos quia ñee ñee nyue ra. Nyebe Jesús si eã nguiã Judea cote. Galilea bei que eriqui ngata ra. ² Fiesta rurubi mose que cote ra. Tuchua ñetẽ ngue judíos saã saã mbei quia aque fiesta mose ra. Curubite que cote ra. ³ Jesús nongue que ñee ja ee ra. —Eso rã Judea. ¶ nda ndechimbaaquiatu mae ja ndechisaã ndese Judea jenda. ⁴ ¶ Mbae esaã nyecua chõ mbia resa rae jê! ¶ nda mbia ndeicua ja. Co ereico mbia mae sayã naa naa co. Mbia resa rae quiatu esaã saã, i que enongue ee ra. ⁵ Jesús nongue

abe que Jesús icuayãte ra. Nyia, i eã Jesús cheẽ je. ⁶ Jesús que ñee ee cote ra. —Emo mose quia ra aso nyecua mbia je cote. Jê jêso jê ae ae, jêsose mose. ⁷ Dios cheẽ mumbasa riqui jêucuayã eãte raque jê. Se quia eriqui nguiã seucuayãte ã. “Jenyisaã saã nguia eicuãte riqui nguiã”, ae quiatu nguiã ee co. Nyebe eriqui nguiã seucuayãte ã. ⁸ Jê ño jêso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra. ⁹ Jesús que siqui are jiri Galilea cote ra.

Jesús mbia mbaaquiatu quiatu fiesta mose

¹⁰ Jesús nongue que nyoĩ fiesta rea cote ra. Aquere que Jesús abe si mingue cote ra. Ngasẽ nyecuayã ño ngue oso ra. —Mbia ra jiranduchi serese re, i que uchiangui re ra. ¹¹ Judíos rerecua que Jesús sequia sequia ja u ra. —¿Ma Jesús riqui ma nde? i ja que fiesta mose ra. ¹² Mbia que ñee ata atate Jesús riĩ nda. —Jesús turãte que, i que emo emo nda. —Jesús turã eã ngue ra. Mbia mbĩĩ irĩte que equia no nda, i que emo emo no nda. ¹³ Mbia que siquichete judíos rerecua si ra. Nyebe mbia ucheẽ mbuchecua eã nguiã Jesús riĩ.

¹⁴ Fiesta ite mose que Jesús si Dios chuchua mbia mbaaquiatu quiatu cote ra. ¹⁵ Judíos que nyuruira tuchi Jesús cheẽ andu ra. —Eaquiatute quia eriqui re. ¿Mangue eriqui ñimbaaquiatu mangue nyii re? i que mbia ra. ¹⁶ Jesús que ñee ee ra. —Secheẽ ae eã asenei senei nguiã jêje co. Paba cheẽ ño asenei senei nguiã jêje. Ae sembu. ¹⁷ Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbia je co. Dios cheẽ ño esenei senei nguiã mbia je co”, i ra aque ñee seriĩ. ¹⁸ “¿sã mbia ñee turã mbe

i serĩ jẽ!” i ra emo ucheẽ achõ nenei nenei. “iSã mbia ñee turã mbei Dios riĩ nguiatu jẽ!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambĩrĩ irĩ eã ño nguiã co. ¹⁹ Moisés que Dios cheẽ mbesa rei nande je ra. Nande emumbayã sacua. Jẽ nguia rei Dios cheẽ mumba. ¿Mbaerã jẽingo seiquia serĩte re? i que Jesús ee ra. ²⁰ Mbia que ñee ee cote ra. —Emo ndiqui ndeiquia serĩ eãte co. Aba checuayã icuã ae nembĩcuã ndeae, i que mbia Jesús je ra. ²¹ Jesús que ñee ee cote ra. —Mbia rasi mo ngue ambucherõ sábadó mose. Aque mĩ ño ngue asaĩ ndei nguiã. Aque mĩ je chõ jẽingochĩ nguiã nyuruirate mae serese. ²² Moisés que circuncisión teacuquia jẽje ra. Nanderamei nane ngue circuncisión saã nguiĩ je ra. Nyebe jẽingo nguiã sábadó mose abe circuncisión naa naa jendiĩ je. ²³ Moisés cheẽ nguire chõ jẽingo nguiã circuncisión naa naa jendiĩ je ã. Sábado mose abe. ¿Mbaerã jẽingo paama i seje mbia mbucherõ mose sábadó mose re? ²⁴ “Aque eicuãte”, jenyẽ jẽi chõchĩ nguiã. Jẽirandu turã na erese nyii, i que Jesús ee ra.

Ibatenda chõ se re, i Jesús

²⁵ Jerusalén jenda que ñee ñee Jesús riĩ cote ra. —A Jesús riqui ñee mbia je a. ¿Nandererecua ra Jesús iquia eã si chõ nde? ²⁶ A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo eriqui reĩ nandererecua je re? ²⁷ Cristo eã ño Jesús re. Galilea jenda chõ ae re. Cristo tu mose quiatu ra nandeiranuate. Ma si chõ nda eru, i que Jerusalén jenda ñee nda. ²⁸ Jesús que echeẽ ñandu ja ra. Dios chuchúaa eriqui mose mbia mbaaquiātu quiatu. Nyebe Jesús echeẽ ndibishorõ nguiã cote. —¿Ma si achu co re? ¿Jẽ seicuate re?

Se ae achu eã nguiã co. Sembu ji ae aico nguiã co. Ichõĩñosa reã ae ngue sembu nguiã. Ae rese je-mae ãte nae, ae chõ sembu nguiã. ²⁹ Se ae que amae erese ra. Esi que achu ra. Ae chõ sembu nguiã co, i que Jesús ee ra. ³⁰ Mbia que paama i Jesús cheẽ mose ra. —Jesús nandeisi etarõ sacua, i rei que mbia ñee nyue ra. Ae mbia eisiã ño nguiã. —Aque mose ra eremano, i ãte quiarei Dios ee. ³¹ Mbia tubirĩã ngue Jesús icua icua ramo nguia cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiatu mo nda tuãte rei. Co mĩ tuchi chõ ndei Dios chimbu co, i que mbia tubirĩã nguia ñee ñee Jesús riĩ nda.

Fariseos paama i Jesús je

³² Fariseos que nyiisaquia mbia cheẽ ndese ra. Mbia ñee turã turã mose Jesús riĩ. Nyebe fariseos paama i nguiã Jesús je. Policía jenda mo ngue emondo rei Jesús isi sacua nda. Sacerdote rerecua abe que policía jenda mondo rei Jesús isi sacua nda. ³³ Jesús que ñee nda. —Aico mbirĩ ño nguiã jendese a cote. Aquere ra aso si Paba rea. Ae sembu. ³⁴ Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra. ³⁵ Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ñquĩ ndea ra esi reae. Griegos mbaaquiātu sacua ndeae. ³⁶ “Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiã nande je. ¿Mbaerã eriqui ñee nande je ñquĩ nde? i que judíos u ñee nyue ra.

Jesús icuasa rei i riõ na

³⁷ Fiesta ua nonde que mbia ñumunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra

se. ³⁸ Ae ra seicua nae, i riõ na nda ùquĩ. Iãcuã turã na nda ùquĩ”, sã embesa ji riqui i no, i que Jesús ucheẽ mbirãtãte mbia je ra. ³⁹ — Ae ra seicua nae, ùquĩ je ra Espiritu Turã amondo, i ñene. Espiritu Turã mbu nonde chõ eriqui nguiã ñee. Jesús oso eã mose ibate chõ eriqui nguiã ñee.

Mbia ñee atate Jesús rĩĩ

⁴⁰ Mbia tubĩriã ngue chi Jesús cheẽ andu ra. Ùquĩ mo ngue ñee nyue ra. —Co rei Dios cheẽ nenei neneisa co. Ae uresaarõ arõ nguia co, i que u ñee Jesús rĩĩ nda. ⁴¹ Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea jenda Cristo re? Hue jenda eã ño nda Cristo ndesẽ. ⁴² “David riirĩ nda Cristo. Belén jenda ra Cristo, David rã si”, sã embesa ji riqui i no, i que mbia ñee ñee nyue ra. ⁴³ Hue rĩĩ ja mbia ñee eãchĩ Jesús rĩĩ. Mbia que ñee ata ata Jesús rĩĩ nda. ⁴⁴ —Jesús nandeisi serao tarõ, i rei que emo emo ñee nda. Isiã si que ra.

Fariseos Jesús icuayã

⁴⁵ Policía jenda ochi que nyoĩ nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policía jenda je ra. ⁴⁶ Policía jenda que ñee ee ra. —Aque Jesús riqui mbia mbaaquiātu turã tuchi aque. Ae rã si emo mbia mbaaquiātu turã aronea, i que policía jenda ñee mbia rerecua je ra. ⁴⁷ Fariseos que ñee policía jenda je cote ra. —¿Jẽ abe chee chõ Jesús jembĩrĩ irĩ nguia re? ⁴⁸ Nanderererecua mo ngue “coche rei” iã tuchi Jesús je resẽ. Fariseos mo abe que “coche rei” iã tuchi Jesús je resẽ. ⁴⁹ ã mbia ataque riqui Dios cheẽ icua eãte ã. Quiachã ja ra Dios si, siqui mose Jesús rese, i rei que fariseos ra.

⁵⁰ Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra. ⁵¹ —Emo nandembasi mbasi chooño aroneate. Echeẽ nandechandu rane nguiatu. Nandeirandu ja rã nguiatu erese. Embasi nonde. Eĩ ngue Moisés embesa mĩĩ nande je ra, i que Nicodemo uataque je ra. ⁵² Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra. ⁵³ Mbia que nyoĩ ja uchuchua cote ra.

8

Cuña mo siqui emo ndu rese

¹ Jesús que oso Monte de los Olivos ra. ² Isamami ngue Jesús si nyebi si Dios chuchúaa ra. Eresaitõ ndabe. Mbia que esichã tuchi ra. Jesús que ngoi ra. Mbia mbaaquiātu quiatu. ³ Fariseos que cuña mo curucuaẽ Jesús je ra. Embesasa rese que cuña ndurucuaẽ ee ra. Cuña nda siqui emo ndu rese mbia je ra. Mbia ite re que fariseos cuña mĩĩ nda. ⁴ Ae cuña curucuaẽ nae, ùquĩ ngue ñee Jesús je ra. —Urembaaquiatusa, mbia que mae cuña ndese ra. Emo ndu rese siqui mose. ⁵ Moisés que ñee nande je ra. “Ã jẽiquia sita je”, i que Moisés quia ã mbia rĩĩ nda. ¿Mañi ere ra ã nĩĩ ñee nde re? i que cuña ndurucuaẽsa ñee Jesús je ra. ⁶ —Jesús nandembĩrĩ. I nda ñee icuã. I nda mbia nandembĩcuã Jesús je cote, ichõ equia nyii reaẽ. Nyebe cuña ndurucuaẽchĩ ee reaẽ. Jesús que nyatiquio chõ nda. Ibi que embesa mbesa o je ra. ⁷ —¿Mañi ere ra nde cuña je re? i bei que mbia quia Jesús je ra. Jesús que juã ñee mbia je cote ra. —Jemo turã mbeite mose, sã aque rane cuña chei sita je, i que Jesús ee ra. ⁸ Nyatiquio si que ibi mbesa ra. ⁹ Jesús cheẽ andu mose

que mbia rerecua ireĩ ireĩ ja chõ nda. —Nandeicua jate que, i ja chõ ngue ñee uchiangui re ra. Nyebe echoi nguiã usẽ ja. Amei nane ja que ra. Eataque quia usẽ nguiã erui cote. Ererecua que usẽ ja ra. Jesús ae que siquichõ nda. Cuña ndesechõ. ¹⁰ Jesús que juã mbia rerecua rube cote ra. Cuña je que ñee cote ra. —¿Ma nderurucuaẽsa ma nde? “Nandechei rã sita je”, ¿iãte emo nguia nderĩ co re? i que Jesús ñee cuña je ra. ¹¹ —Tei. Emo ñeeate, Sererecua, i que cuña Jesús je ra. Jesús que ñee ee cote ra. —Se abe ra acheẽ eã ndeje. Eso rei. ¡Mbae icuã nda eresaã sichĩ jẽ! i que Jesús cuña je ra.

Tata rendi rã ndei Jesús

¹² Jesús que ñee si mbia je ra. —Mbia ja mbaaquiatusa chõ se re. Tata rendi rã ño aico nguiã mbia je co. Ae siqui serui nae, ũquĩ nda siquĩ itondáruu. Ũquĩ amingo bei quia querabe co, i que Jesús mbia mbaaquiatu ra. ¹³ Fariseos que ñee Jesús je cote ra. —Ndechue chõ ereico nguiã ñee mbia je. Nyebe mbia “coche rei” i aronea ndechẽ je, i que fariseos ñee Jesús je ra. ¹⁴ Jesús que ñee echeẽ ndibishorõ nda. —Sechue acheẽ ndaque mbia je. “¡Ae bei jẽ!” i chõ mbite raque aba secheẽ mose. Ae si achu nae, huee jẽicuayãte. Ae ra aso nae, hue abe ra jẽicuayãte no. Se ae aicua nguiã co. ¹⁵ Jeñee icuã jei chõchĩ nguiã aba rĩ. Mbae mumbusẽ ja mose rocoĩ. Eĩ ae eã ño nguiã se. ¹⁶ “Co eicuãte”, ae eã nguiã se ae co. Paba rese chõ aico nguiã mbia mumbusẽ ja co. Nyebe aico nguiã ñee Paba cheẽ ndui si co. ¹⁷ “Mbia nyeremo ñee mose hue rĩ si, ‘ae beite’ jenyẽ chõ”, i que Moisés jẽje ra. ¹⁸ Sã ure nyeremo ure no. Paba rese. Ae sembu. Sã ureico ñee seriĩ Paba rese no. Ure nyeremo, i que Jesús fariseos je ra. ¹⁹ —¿Ma nderu riqui ma nde? i que

fariseos Jesús je ra. Jesús que ñee ee ra. —Paba jẽicuayãte quia ã. Se abe seicuayãte quia ã. Jẽ seicua mose, Paba abe ra jẽicua, i que Jesús ra. ²⁰ Eĩ ngue Jesús quia mbia mbaaquiatu quiatu Dios chuchúaa ra. Ofrenda no nosa jii que eriqui mbia mbaaquiatu quiatu ra. Emo ngue Jesús isi ãte etarõ sacua nda. —Aque mose ra eremano, i ãte quiarei Dios ee.

Aso si ra ibate Paba rea, i Jesús

²¹ Jesús que ñee si fariseos je ra. —Aso si ra Paba rea cote. Serequia requia rei nda se re. Jẽicuã mbei ra jemano nyee. Ae ra aso nae, huee jengasẽ aroneate, i que Jesús ee ra. ²² Judíos que ñee ñee nyue ra. —¿Mbaerã nda nandecuasẽ aroneate ee re? Nyiiquia ra reae, i rei que ñee nyue ra. ²³ Jesús que ñee ee ra. —Ibi jenda chõ jẽ nde. Ibatenda chõ se re. Ibi jenda eã ño se re. ²⁴ Nyebe aico nguiã ñee jẽje nyii. “Jẽicuã mbei ra jemano nyee”, ae que jẽje nyii. Seicuayã mbei mose ra jemano nyee jẽicuã mosebe, i que Jesús ee ra. ²⁵ —¿Aba tuchi nde re? i que mbia Jesús je ra. Jesús que ñee ee ra. —Cose ndare bei chõ aico nguiã serenei nenei jẽje co. ²⁶ Mbae ra asenei tuchi jẽje reae. Secheẽ nda jẽicuã mbuchecua tuchi jẽje. Ae sembu nae, aque quiarei ñee ñooño aronea. Echeẽ ngue achandu ra. Ae cheẽ ño asenei senei mbei nguiã mbia je co, i que Jesús mbia je ra. ²⁷ Mbia rerecua que Jesús cheẽ icuayã mbei ra. —Dios rĩ ño eriqui nguiã ñee, iã mbei que mbia ra. ²⁸ Jesús que ñeembe ee ra. —Mbiarã ngue achu ra. Jẽ nda sembuchã ira rese cote. Aque mose ra mbae jẽicua jiri seriĩ cote. “Dios cheẽ nguiri chõ eriqui mbia mbaaquiatu quiatu re”, jenyẽ ra seriĩ cote. “Dios rucucha chõ eriqui re”, jenyẽ ra seriĩ cote. ²⁹ Ae

sembru nae, aque riqui bei serese
co. Echeñ nguire aico bei embia
co. Nyebe eriqui nguia serechayã
mbei co, i que Jesús ra. ³⁰ Jesús cheñ
mose que mbia Jesús icua icua cote
ra.

*Jẽingo beĩ mose serui, sechĩmbaaquĩ
tuchĩ chõ jẽ nde*

³¹ Ae Jesús icua quia judíos nae, ũquĩ je que Jesús ñee nda. —Secheẽ si jẽhũĩ eã mose, sechĩmbaaquiatũrã tuchi ra jẽ. ³² Jẽ nda ichõĩñosa reã jẽicua tuchi cote. Mbia icuã nderecua rimba eã nda jẽ cote, i que Jesús ee ra. ³³ Mbia que ñee Jesús je ra. —Abraham nducucha rei ure. Mbia mo nimba eã mbei que ureico resẽ. ¿Mbaerã ereico ñee ure je re? “Mbia si taembui mingo cote”, i ure je re, i que mbia Jesús je ra.

³⁴ Jesús que ñee ee cote ra. — Ae mbae icuã saã saã nguia nae, ñiquĩ ndiqui bei eicuã nimbarã ã. ³⁵ Erimba ra sigui bei eã nguerecua rese. Nguiĩ tuchi quiatu ra equereco bei nyiese. ³⁶ Se jembui mose mbae icuã si, eicuã nimbarã eã nda jëingo cote. ³⁷ Abraham nducucha raque jë. Ñiquĩ aicuate raque. ã jëingo secheẽ isi turã eãte ã. Secheẽ jëucuyã nguia ã. Nyebe jëingo nguia seiquia serĩte ã. ³⁸ Ae Paba teacuquia seje nae, ñiqui ño asenei senei nguia jëje co. Ae jendu teacuquia jëje nae, ñiquĩ ndese chõ jëingo nguia jë ã no, i que Jesús ee ra.

39 —Abraham ño ureru resẽ. Urei resẽ, i que mbia Jesús je ra. Jesús que ñee ee cote ra. — Abraham nducucha turã mose jẽ, ei nguia nda jẽingo turã nguia ña. Abraham ndui si. 40 Dios que sembaaquiatu ra. Dios quiarei ñee ñooño eã. Echeẽ ño asenei senei nguia jẽje co. Uũi je chõ jẽingo nguia seiquia serite ã. I ãte que Abraham quia seje ra. 41 Jendu rã si chõ jẽingo nguia ã, i que Jesús ee ra. Mbia que ñee Jesús je cote

ra. —Ureru ata ata eãte nyeresẽ.
Dios mĩ ño ureru re, i que ñee
Jesús je ra. ⁴² Jesús que ñeembe
ee ra. —Dios jendu tuchi mose, eĩ
nguia nda jẽingo nguĩa nyesecua
serese chã. Ae quiarei sembu.

Satua eã achu nguiã. ⁴³ ã jëingo secheẽ andu sereãte ã. Nyebe jëingo nguiã secheẽ icua aroneate ã. ⁴⁴ Aba checuayã nderecua rei jendu. Erese bei chõ jëingo nguiã ã. Echeẽ jemumbayã mbei chõ nguiã ã. Mbia iquia iquiasa bei que ae ra. Cose ndare mosenda bei. Nee ñooñosa reã quiato aronea tuchi quiarei ae. Nee ñooño mbeite equia co. Ucheẽ achõ ño esenei senei nguiã mbia mbiĩrĩ querabe co. Nee ñooñosa rerecua chõ aque re. ⁴⁵ Se quia acheẽ ñooño ãte rei nguiã jêje. Secheẽ jëucuayãte chõchĩ nguiã. ⁴⁶ Mbae icuã ngue asaã eãte ra. Ũquĩ jëicuate raque. Acheẽ ñooño ãte sequia co resẽ. ¿Mbaerã jëingo secheẽ andu sereã neate ã nde? ⁴⁷ Dios quiato quia Dios cheẽ ñandu turã nguiã. Dios quiato eẽ ño jê nde. Nyebe jëingo nguiã Dios cheẽ andu sereãte ã, i que Jesús mbia je ra.

Jesús rane siqui Abraham si nyii

⁴⁸ Judios que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderĩ nda. ¿Ae tuchi nde re? i que judíos ñee Jesús je ra. ⁴⁹ Jesús que ñee ee ra. —Aba checuayã nyireco eã ño se resê. Co aico ñee turã tuchi Paba riĩ co resê. Jẽ nguia jeñee icuã mbeite nguĩã serĩ. ⁵⁰ “¿Sã mbia ñee turã serĩ jẽ!” ae eã ño nguĩã se co. Paba quia siqui nguĩã ñee turã turãte serĩ co. Ae quia ra mbia icuã mbasi. ⁵¹ Tacheẽ nyecua jẽje. Ae secheẽ mumbayã nguia nae, ũquĩ nda amingo bei. Ũquĩ nda manoã mbei, i que Jesús ra. ⁵² Judíos que ñee Jesús je ra. —Aba checuayã

nyireco tuchi chõ ereico nguiã co. ¿Mbaerã ereico ñee nde? “Mbia ra manoã, secheẽ mumbayã mose”, i re. Abraham ngue mano. Nandei. Dios cheẽ nenei neneisa que mano ja resẽ. ⁵³ ¿Nde ndequiatu tuchi Abraham si re? Ae cheẽ que mano. Dios cheẽ nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra. ⁵⁴ Jesús que ñee ee cote ra. Se ae secheẽ turã mose seriĩ, mbia ra seanduchõ. Paba quia ñee turã mbei nguiã seriĩ co. Ae je jẽingo ñee. “Dios urerere-cua” i raque eriĩ. ⁵⁵ ã jẽingo Dios icuayãte ã. Se quia aicuate nguiã co. “Dios aicuayã”, se i mose, eĩ nda acheẽ ñoonote rei jẽ na si. Dios aicua tuchite. Echeẽ ndui chõ aico bei nguiã co. ⁵⁶ Abraham ngue seraarõ arõ mbei quia ra. “Tu rae”, i bei que equia ñimbia seriĩ nda. Secuasẽ mose que eyate mae serese cote ra, i que Jesús mbia je ra. ⁵⁷ Mbia que ñee Jesús je ra. — Cosete que Abraham mano ndesẽ. ¿Mañi ere mae erese re? Cincuenta años eãte nde resẽ, i que ra. ⁵⁸ Jesús que ñee ee ra. —Tacheẽ nyecua jẽje. Cose ndare bei chõ aico nguiã co. Abraham tiã mosenda bei, i que Jesús ra. ⁵⁹ —¿Sita je Jesús nandechei jẽ! i rei que mbia sita isi isi ra. Jesús que ñimi ñimi oso ra. Usẽ Dios chuchua si.

9

Jesús emo ndesayã mbucherõ

¹ Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei ra. ² Jesús chimbacuiatu que ñee ee ra. —Urembaacuiatusa, ¿abate mbae icuã saã nyii re? Co resayã nonde re. Eru ereae. Esi ere no ae. Ae si ere no ae. ¿Abate ere? i que Jesús je ra. ³ Jesús que ñee ee ra. —Tei. Emo ngue mbae icuã saã eãte rei ra. Mbia ra mae ja Dios quirãcuã ndese chã. Embucherõ

mose. Nyebe eresayã nyaacuquia nguiã. ⁴ Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba je co. Semano mose quia aico aroneãte nguiã mbae rese íbii cote. ⁵ Seico mose íbii, aico mbia resaeete co, i que Jesús ra. ⁶ Jesús que ñinimbu íbii cote ra. Tuchu que esaã ngüendi je ra. Nguiti que eresayã ndesa rese cote ra. ⁷ — Eso nderuba irei cote. Ama Siloé eso eirei, i que Jesús eresayã je ra. (“Echimondo”, i chõ nguiã Siloé je.) Eresayã ngue oso nguesa irei huee ra. Obei que eru quia mae turã cote ra. ⁸ Hue jenda que nyuruira jate mae erese ra. Ae mae nguia erese nyii nae, ñuqĩ ngue nyuruira tuchi mae erese cote ra. Eresa cherõ mose. —¿Co resayã ño ache ache i quia nyii re? ¿Ae chõ ere? i que mbia ñee ñee nyue ra. ⁹ —Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyesesẽ, i que ñee mbia je ra. ¹⁰ —¿Mañi nderesayã mae nde? i que mbia ee ra. ¹¹ Eresayã ngue ñee nda. — Ae eriqui “Jesús” i nae, aque que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra. ¹² — ¿Ma nderesa mbucherõsa riqui ma nde? i que mbia eresayã je ra. — Qui chõ esi, i que ee ra.

Fariseos ñee eresayã je

¹³ Mbia que eresayã curuchoi fariseos je cote ra. ¹⁴ Ae mose Jesús eresayã mbucherõ nae, sábado mose que ra. Tuchu que esaã, aque mose que ra. ¹⁵ —¿Mañi ere nderesa ira re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda. ¹⁶ Fariseos mo ngue ñee nyue ra. —Ae eresa mbucherõ sábado mose

nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Eĩ nguia nda eicuã mose mbia mae sayã naa naa eã nguia nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda. ¹⁷ Fariseos que ñee si eresayã je ra. —Ae nembucherõ nae, ¿mañi ee re? ¿Mañi ere quia nde eriĩ co re? i que ra. Eresayã ngue ñee nda. —Dios chimondo que ae ra, i que eresayã nda.

¹⁸ Judíos que echeẽ ñandu sereã nda. Eresa turã mbei mo eriqui rei nguia ee. Nyebe “jenyu” i nguia eresayã ndu je. Esi je abe no. —Nandeirandu rã erese, i que ra. ¹⁹ —¿Co nderiirĩ co re? ¿Eresayã nyobei nyii re? ¿Eresayã nyaacuquia nyii re? ¿Mbae emu-mae nguia co cote re? i que ñee eru je ra. Esi je abe. ²⁰ Eru que ñee ee ra. —Co rei seriirĩ co. Eresayã ngue nyaacuquia rei ra. ²¹ Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresẽ. Ae ra ñee jẽje, i que eru ñee judio rerecua je ra. Esi abe. ²² Judíos rerecua quia ñee nguia nyue nyii reaẽ. —Emo ñee turã mose Jesús rĩ, ñquĩ nandemombo bei mbia chumunuasa si. “Dios chimbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe eresayandu siquichete nguia ñee turã Jesús rĩ. Esi abe no. ²³ Nyebe eru riqui nguia ñee ererecua je. —Jeñee nguia seriirĩ je. Etiarõte nyeresẽ, i ee. Esiquichete quia ñene.

²⁴ —Quiatuchu, i si que judíos rerecua eresayã je no nda. —Echeẽ turã Dios mĩ je. ¿Jesús abe je ra erecheẽ turãchĩ jẽ! Eicuãte ae resẽ, i rei que judíos rerecua eresayã je ra. ²⁵ Eresayã ngue ñee ee ra. —Aicuayãte se. Eicuãte erae. Eturãte ere no ae. Aicuayãte se.

Seresayã ngue nyii ra. Co aico mae co cote. Ñquĩ mĩ ño aicua nguia co, i que eresayã judíos rerecua je ra. ²⁶ —¿Mañi equia ndeje re? ¿Mañi nderesayã ira re? i si que eresayã je no nda. ²⁷ Eresayã ngue ñeembe ererecua je ra. —Acheẽ ndei que jẽje resẽ. Secheẽ ngue jemumb resẽ. ¿Mbaerã jẽingo “echeembe” i seje ã nde? ¿Jẽ abe jẽingose rete sembucherõsa rui re? i que eresayã judíos rerecua je ra. ²⁸ Ererecua que ñee icuãte ee cote ra. —Ae rui chõ ereicochĩ nguia nde co. Moisés rui chõ ureico nguia ure ã. ²⁹ Moisés je quiatu que Dios ñee nyii resẽ. Ñquĩ ño ureicua nguia ã. Ae nembucherõ nae, ma si quiatu ñi ae ru. Ae quia ureicuayãte nguia, i que judíos rerecua je ra. ³⁰ Eresayã ngue ñee ee ra. —Seresa que embucherõ ndesẽ. “Dios chimbu”, jenye eã ñochĩ equia ã. Seresa mbucherõsa raque ae. ³¹ Dios ra mbia icuã ñee ñanuã. Ae Dios cheẽ mumbayã nguia nae, ñquĩ ñee nguia ra Dios ñandu. ³² Seresayã ngue achaacuquia rei nyii ra. Ae que sembucherõ nda. Emo abe ra ñquĩ saã eã. ³³ Dios chimbu eã mose, eĩ nguia nda mbae raã eãte nguia ña, i que eresayã judíos rerecua je ra. ³⁴ Judíos rerecua que ñee eresayã je ra. —Ndechaacuquia mosenda bei chõ ndeicuã ndiqui nguia co. ¿Mbaerã ereico urembaquiatsu sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiatute ure, i chõchĩ fariseos

³⁵ Jesús que jirandu erese ra. Emombo mose. Nyebe esi nguia ñee eresayã je. —¿Dios rucucha ereicuate quia co re? i que ee ra. ³⁶ —¿Aba chõ Dios rucucha re? Aicua sete quia co, i que eresayã nda. ³⁷ —Ae chõ se resẽ. Ae

je chõ ereã ñee a resẽ. Eremae ndei serese resẽ, i que Jesús ee ra. ³⁸ Eresayã ngue ngoi ngũĩã ndese Jesús ji cote ra. —Areicua tuchi se cote, i que Jesús je ra. ³⁹ Jesús que ñee ee ra. —Achu que íbii ra. Mbia icuã mbuchecua mbia je ra. Achu que eresayã ndesa mumae mae nda. Ae eresa nae, ũquí mumae eã sacuã abe que achu ra, i que ra. ⁴⁰ Fariseos mo abe que chi hue ra. Jesús cheẽ andu que ñee Jesús je ra. —¿Urereresayã ureico ure abe ã nde? i que fariseos ee ra. ⁴¹ Jesús que ñee ee ra. —Jendesayã mose, eĩ nda jẽicuã ambuchecuayã ndei. “Seaquiatute”, jenyechĩ equia ã. Nyebe aico nguiã jẽicuã mbuchecua jẽje co, i que Jesús judíos rerecua je ra.

10

Ovejas ucha cheẽ icuate

¹ Jesús que ñee nda. —Tacheẽ nyecua jẽje. Ae iqueã nguia oveja chiquesa rĩ nae, mbae mbuquiachãsa chõ ũquí nde. Echiquesa eã ñi ique ique mose. ² Ae ique ique quia oveja chiquesa rĩ nae, aque quia oveja raarõsa aque re. ³ Ae echiquesa saarõ nguia nae, aque ra echiquesa equia oveja raarõsa je cote. Eique sacuã. Oveja raarõsa cheẽ nda oveja icua ja. Ñee mĩ mĩ nda umbae oveja je. Oveja icua ja. Ae ra oveja nyoĩ usẽ erui. ⁴ Eraarõsa embusẽ ja mose etaronda si, ae rane nda ngata oso quia erẽta. Oveja ra nyoĩ ja quia erui. Echeẽ nguia eicuate nguiã. ⁵ Emo ndui ra echoĩ eã. Uchã ño nda emo si. Echeẽ nguia eicuayãte nguiã, i que Jesús ñee nda. ⁶ Jesús que eĩ ndei ñee fariseos je ra. Ejemplo je. Oveja renei nenei ee. Jesús cheẽ andusa que echeẽ icuayãte ra.

Jesús rei oveja raarõsa

⁷ Jesús que ñee si ee ra. —Tacheẽ nyecua jẽje. Oveja chiquesa rã ño se re. ⁸ Ae ngaẽ senonde nyii nae, mbae mbuquiachãsa ja chõ ũquí nde. Nyebe ovejas eche siichã eã nguiã. ⁹ Oveja chiquesa chõ se re. Ae seicua quia nae, ũquí nda ateaquiatu bei mingo. Sã oveja mo ndiqui oso quiaru quiaru no. Sã eriqui cuaẽ nyebi chebi bei utaronda no. Eĩ si ra seicuasa quia siqui bei serese. ¹⁰ Mbae mbuquiachãsa quia ra tu mbae rirõ sacuã. Mbae mbutiã sacuã. Mbae iquia sacuã. Se quia ni achu nguiã mbia mingo bei sacuã. Mbia mbia tuchi nonde que achu ra. ¹¹ Oveja raarõsa rei se. Ovejas ateaquiatu bei quia co. Amano nda emingo bei sacuã. ¹² Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia. ¹³ “Echa eã ndei se re”, i ra eraarõsa uchã erecha. Esiquiche mose. Oveja raarõ turã eã. ¹⁴⁻¹⁵ Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguiã oveja icua sembae co no. Sembae abe seicua quia ã. Sembae ovejas mingo bei sacuã nda amano. ¹⁶ Ovejas mo abe que sembae no nda. A jenda eã ño ũquí nde. Ũquí abe ra aru a. Ũquí nda secheẽ mumbayã no. Sembae oveja ra chi ja serese cote. Se mĩ ño nda asaarõ ja cote. ¹⁷ Sesiquiche eã semano ndese. Sembae ovejas mingo sacuã. Nyebe Paba iate riqui nguiã serese co. Semanonde ra aquera si. ¹⁸ Semano sereã mose, eĩ nda mbia seiquia aroneate rei. Se ae chõ amanosete nguiã mbia je. Se ae chõ nda aquera si no. Paba quia uquirãcuã meete nguiã seje, i que Jesús mbia je ra.

¹⁹ Judíos que ñee ata atate nyue ra. Jesús cheẽ mose. Hue rĩ si ñee

ja eã. ²⁰ —Aba checuayã siquite Jesús rese co resê. ¿Mbaerã jêingo echeê andu re? i que emo emo uataque je ra. ²¹ Emo emo ngue ñee no nda. —Ae rese aba checuayã ndiqui nae, ũquí nda ñee turã eã ndesê. Aba checuayã nda mbia resayã mbucherô eã ndesê, i que emo emo no nda.

Judíos Jesús osei chiã

²² Mbia que ñumunua nua nguia Jerusalén cote ra. Dios chuchua ao mosenda ndese ndua ndua. Nyiiseite que aque mose ra. ²³ Jesús que oso Dios chuchúaa ra. Portal de Salomón ngue eriqui ngata ra. ²⁴ Judíos que ngaê Jesús mama nda. Ñee ngue ee ra. —Ureico ndeicuayâte ã. ¿Manosete ra erecheê tuchi ure je re? Nde riĩ. Echimbu checua jiri ure je. Nde Cristo mose, ndecheê embuchecua ure je, i que judíos ñee Jesús je ra. ²⁵ Jesús que ñee ee ra. —Acheê ndei que jêje resê. Secheê jêñanuã ño nguia ã. Paba quirâcuã je chõ aico nguia mbia mae sayã naa naa co. ã ndese mae nda seicua nguia ña. ²⁶ Acheê ndei que jêje nyii resê. Serimba eã ño jê nde. Nyebe jêingo nguia secheê anuã. ²⁷ Serimba secheê icua ja quia ã. Serimba aicua ja quia ã. Serui ja serimba riqui ã. ²⁸ Serimba amingo bei quia co. Serimba ra quiachã eã mbei. Emo eisi aronea tuchi sesi. ²⁹ Paba que emee serimbarã nda. Emo eisi aroneate Paba o si. Ae quiarei equirâcuã tuchi. ³⁰ Aque mii ño ureico nguia ã. Paba rese. Eĩ si tuchi ureico nguia ã, i que Jesús ee ra.

³¹ Nyebe judíos paama i nguia ee. Sita que esirô sirô nda. —Jesús nandechei, i rei que ra. ³² Jesús que ñee ee ra. —Paba que sembuquirâcuã tuchi ra. Nyebe jemae sayã asaã saã tuchi nguia jêje. ¿Ũquí mo nii jêingo “nandechei” i seje re? i que Jesús judíos je ra. ³³ Judíos que ñee Jesús je ra. —Ndechiao turã mo

je eã ño ureico nguia “nandechei” i ndeje. Erecheê icuâte que Dios riĩ ndesê. Dios eresaã saãte quia ure je co resê. Mbia si chõ ndaque nde, i que judíos Jesús je ra. ³⁴ Jesús que ñee ee ra. —Sã embesa ji riqui i no: “Jê ndei dioses, i que Dios ra”, sã embesa ji riqui i no. ³⁵ Embesa ji ñeeñoño aronea. “Dioses rei jê”, i que Dios ucheê nenei neneisa je ra. ³⁶ Dios que seirabo ra. Sembu que ibii cote ra. ¿Mbaerã jêingo paama i secheê mose re? “Dios riirĩ ño se re”, i mose re. “Ndeicuâte chõchĩ Dios je”, jenyê chõchĩ nguia seje. ³⁷ Se mbae raã naa eã mose Paba rã si, ũquí mose quia secheê jeñanua. ³⁸ Paba rã si mose, “coche ñene” jenyê chõ sechisaã je. Secheê jeñandu sereã ndaque. Paba riqui serese co. Se abe aico Paba rese co. Ũquí nda jêicua cote, “coche ñene” i mose sechisaã je, i que Jesús ee ra. ³⁹ —Jesús nanderao etarô sacua, i rei que mbia ra. Jesús que oso chee hue si ra.

⁴⁰ Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra. ⁴¹ Mbia que nyoĩ nyoĩ tuchite erea huee ra. Ñee ñee ngue nyue ra. —Juan ngue nandemae sayã mo saã eãte rei nande je. Nandembiirandu turã tuchichĩ Jesús riĩ. Ichõĩño eã ño equia ñee nande je reaê, i que mbia ñee nyue ra. ⁴² Mbia tubiriã ngue Jesús icua huee ra.

11

Lázaro mano

¹ Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ũquí nda. Betania jenda ja que ũquí nda. ² María rei aba mbushimbua ichusêsa Jesús i rese. Ua je que esi esi ra. Enongue quia erasi re. Lázaro, i que ee ra.

³ Nyebe echari mbia mo mondo nguiã Jesús mbiirandu sacuã. — Ndequiato rasi que chi aque riñda, i que echoi Jesús mbiirandu ra. ⁴ Jirandu mose que Jesús ñee cote ra. —Mano sacuã eã ño erasi chi nguiã aque. Dios quirãcuã ndese mbia mae sacuã ño erasi chi nguiã aque. Se abe sequirãcuã ndese mae sacuã ño erasi chi nguiã aque, i que Jesús ra. ⁵ Jesús que nyesequa tuchi Marta rese ra. María rese. Lázaro rese abe no. ⁶ Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra. ⁷ —Nyaobe Judea cote, i que uchimbaaquiato je cote ra. ⁸ Echimbaaquiato que ñee ee ra. —Namote que judíos ndeigua serite sita je. ¿Mbaerã nda ereso si huee re? i que Jesús je ra. ⁹⁻¹⁰ Jesús que ñee ee ra. —Dios quiato que sembu ra. Mbae raã naa sacuã ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee uchimbaaquiato je ra. ¹¹ Aquere que ñee si uchimbaaquiato je ra. —Nandequiato que uque cote ra. Lázaro. Taso emumba cote, i que ra. ¹² —Uque mose u, ae ae ra ñumumba rei, i que echimbaaquiato ee ra. ¹³ —Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbaaquiato je. ¹⁴ Jesús que ucheẽ mbuchecua ramo ee cote ra. —Lázaro que mano nda. ¹⁵ Coche aico eã nguiã huee. Jẽ nda seicua tuchi cote. Nyao erea cote, i que Jesús uchimbaaquiato je ra. ¹⁶ Tomás que ñee echimbaaquiato ataque je ra. —Nyao erese nande abe no. Sã mbia nandeiquia nande abe rõ, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

¹⁷ Ngasẽ ngue Betania cote ra. Mbia hue jenda que ñee Jesús je cote ra. —Co Lázaro ati ji chi itõ mocoite co resẽ. Cuatro días tuchite nyeresẽ, i que mbia ñee Jesús je ra. ¹⁸ Aichite que Betania Jerusalén si ra. Tres kilômetros que ra. ¹⁹ Nyebe judíos rane ngaẽ jate nguiã ngasẽ Jerusalén si. María mbia jiri sacuã. Marta abe no. Enongue raaque ati ji mose. ²⁰ Marta jirandu mose Jesús rese que esi erobeishĩ nda. Oo que erese ra. María quiato que siquichõ tuchúaa ra. ²¹ Marta que ñee Jesús je ra. —Sererecua, ndeico mose a, eĩ nda senongue manoãte rei. ²² Dios ra ndecheẽ ñandu. “Mbae mo embu seje”, i mose, i que Marta Jesús je ra. ²³ —Ndenongue ra quera si, i que Jesús ee ra. ²⁴ Marta que ñee ee cote ra. —Ae bei. Mbia raaque quera ja mose, aque mose ra senongue abe quera si. Mbae ua ja mose ra quera si. Aicuate raque se quia co, i que Marta ra. ²⁵ Jesús que ñee ee ra. —Mbia raaque mbuquerasa rei se. Mbia mingosa rei se. Ae seicua quia nae, ñuquí nda mano ndaque, quera si rae. ²⁶ Ae seicua quia nae, ñuquí nda uayã mbei. ¿Ñuquí ereicua quia co re? i que Jesús ee ra. ²⁷ Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu ibii”, i que mbia quia nyii nae, ae chõ nde re, i que Marta Jesús je ra.

Jesús nyeseo

²⁸ Aquere que Marta si María mbiirandu ra. —Nandembaaquiatusa que tu ra. Hue que eriqui nderequia ra, i que Marta ñee ngõngue ísaa ra. ²⁹ Echeẽ nduibe tuchi que María si juã asi Jesús rea ra. ³⁰ Jesús ngasẽ mose rocoi mbia chuchua ite re. Marta erobeishisa bei que Jesús riqui ra. ³¹ Mariaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos

choi nguiã erui. ³² María que ngasẽ Jesús je ra. Ngoi que ngũĩã ndese ejii ra. Ñee ngue ee ra. —Ndeico mose a senongue ndasi mose, eĩ nda manoãte rei, i que María Jesús je ra. ³³ María que nyeseo ra. Judíos que chi erese, ùquĩ abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra. ³⁴ —¿Mangue jenyati mangue re? i que Jesús mbia je ra. —Nyao erea ae, i que mbia ee ra. ³⁵ Jesús que nyeseo ra. ³⁶ Judíos que ñee nyue ra. —¡Sã jê! Nyesequa tuchi Lázaro rese. Eya eãte riqui erese co, i que mbia ra. ³⁷ Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaẽ. Eĩ nda manoãte, i que mbia ra.

Jesús Lázaro mbuquera si

³⁸ Jesús ia eãte que ngasẽ Lázaro atigua ra. Sita imi ye. Sita chõ ngue eatiquia no nda. ³⁹ —¡Sita eatiquia jêja jê! i que Jesús mbia je ra. Marta que ñee Jesús cheẽ mose ra. —¡Enete ra nande je jê! Curite que mano ndesẽ. Cuatro días tuchi que ra, i que Jesús je ra. ⁴⁰ Jesús que ñee ee ra. —“Seicua tuchi mose ra eremae Dios quirãcuã ndese”, ae rei que ndeje nyii, i que Jesús ra. ⁴¹ Sita eatiquia que mbia jea cote ra. Jesús que mae ibate quiti ra. Ñee Dios je. —Paba, secheẽ ngue erechandu. “Iaanye”, ae bei quia ndeje co. ⁴² Nde quiarei seandu bei. Mbia resa rae aico ñee ndeje a. “Dios chimondo chõ eriqui re”, i nda ã seriĩ ña, i que Jesús ñee Dios je ra. ⁴³ Jesús que ñeemombo Lázaro raaque je cote ra. —Lázaro, jechu usê! i que ra. ⁴⁴ Eraaque que usê u juã cote ra. Eo cuasa resebe que usê nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandeiquia, i judíos

⁴⁵ Judíos que nyoĩ María rese, ùquĩ ngue mae ja Jesús rese ra. Lázaro mbuquera mose. Ùquĩ tubiriã ngue Jesús icua cote ra. ⁴⁶ —Jesús que Lázaro raaque mbuchurũ nda, i que emo nyoĩ fariseos mbiirandu ra. ⁴⁷ Fariseos que ñumunua ja cote ra. Sacerdotes rerecua ja rese. Mbia rerecua ja. Ñee tuchi Jesús riĩ. —¿Mañi nande ra equia ee re? Mbia mae sayã naa naa tuchichĩ equia aque. ⁴⁸ Nande ereachõ mose ra mbia siqui ja techĩ erui re. ¡Roma jenda ra nandembae isichĩ ibi jê! ¡Dios chuchua ra embucoichĩ ngaẽ jê! i que ererecua ñee nyue ra. ⁴⁹ Caifás que sacerdote rerecua tuchi aque mose ra. Ae que ñee uataque je ra. —Mbae jêicuayã tuchichĩ nguia ã. ⁵⁰ Jendua eã ñochĩ equia ã. Aque mii ño nda mano nguiã nande ja je chã. Eĩ nda judíos ua tuchi eã, i que Caifás uataque je ra. ⁵¹ Caifás ae que ñee eã nda. Dios ae quiatu ngue embucheẽ nguiã ùquĩ. Sacerdote rerecua tuchite quiatu ngue ae re. Nyebe Dios embucheẽ nguiã. —Jesús ra mano judíos mingo ja sacua. ⁵² A jenda achõ je eã nda Jesús mano. Dios riirĩ mangue chooñoa jenda je abe chõ nda Jesús mano nguiã. Dios riirĩ munua ja sacua, i que Caifás ñee nda. ⁵³ Aque mose bei que judíos rerecua ñee ñee nyue ra. —¡Jesús nandeiquia rei jê! i que equia ñee ñee nyue ra. ⁵⁴ Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbaaquiato rese cote ra. ⁵⁵ Fiesta de la pascua que ecurubite ra. Nyebe judíos nyoĩ choi ja nguiã Jerusalén. Suchamo jenda emo emo ngue nyoĩ jate ra. Pascua nonde que echoi huicua mbitirõ sacua nda. ⁵⁶ Mbia que Jesús sequia quia ra. —¿Tu ra fiesta

re? ¿Tu eã nda re? ¿Tu aroneate jêje re? i que mbia ñee ñee nyue Jesús rĩ nda. I que mbia u ñee Dios chuchúaa ra. ⁵⁷ Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eĩ nda ureisi. Eĩ nda uretarõ mii, i que sacerdote rerecua ñee nyii ra. Fariseos abe no.

12

María aba mbushĩmbusa ichusẽ Jesús i rese

¹—Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si. ² Mbia que ñio mii Jesús chiurã nda. Marta que echurã mondo mondo ee ra. Mbia je abe. Lázaro abe que chĩ quiaru erese ra. ³ María que aba mbushĩmbusa queru Jesús je cote ra. Medio litro. Nardo, i que ũquĩ je ra. Mbae isiquia mumba tuchi que ũquĩ nda. María que eichusẽ Jesús i rese ra. Ua je que esi esi ra. Tuchua mbushĩmbu ja que ra. ⁴ Judas Iscariote abe que siqui ra. Simón ndiirĩ ngue aque ra. Jesús chimbaaquiato mo ndei que aque ra. Ae quiato que Jesús mee mbia icuã je emo mose cote ra. Ae que ñee nda. ⁵ —¿Mbaerã eichusẽ ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacuã, ũquĩ mbae isiquia, i que Judas ra. ⁶ Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda. ⁷ Jesús que ñee Judas je ra. — ¡Erecheẽchĩ nda María je jê! ¡Sã ae ae riqui jê! Seati nonde chõ aba mbushĩmbusa icherẽ nguia serese. ⁸ Mbaecha reã nguia nda chi are jiri nguia a. Se quia nda aico bei eã nguia jêje a, i que Jesús ra.

Lázaro nandeiquia, i rei judíos rerecua

⁹ Judíos que jirandu jate Jesús rese ra. Eriqui mose Betania. Nyoĩ jate que erea ra. Lázaro abe rea. Ae Jesús mbuquera erua si. ¹⁰ Nyebe judíos rerecua ñimbiirandu nguia. —¡Lázaro abe nandeiquia rei jê! i que ererecua ñee nyue ra. ¹¹ Judíos que siqui tuchi Jesús rese cote ra. Nguerecua que esecha jate cote ra. Lázaro que embuquera erua si nyii. Ũquĩ mbei bei que nyii ra. Jesús oso Jerusalén

¹² Mbia tubiriã ngue nyoĩ Jerusalén nda. Pascua raã naã sacuã huee. Jesús abe que oso ra. Mbia que jirandu erese ra. Ecuasẽ nonde. ¹³ Mbia yate que Jesús cuasẽ mose ra. Sindo que ecuruchoĩ erobeishĩ nda. Mbia que tasẽ tasẽ tuchi ra. —Eturã tuchi ruchĩ nguia co. Dios rucucha ruchĩ nguia co. Israel rerecua ruchĩ nguia co cote, i que mbia tasẽ tasẽ tuchi ee ra. ¹⁴ Jesús que ngasẽ burro riirĩ mo je ra. Nyui que eato ra. Embesa ji rui si. ¹⁵ I que embesa ji quia nyii ra:

¡jêireĩ ireĩchĩ nda, Sion jenda!

Co jenderecua ru quia co.

Co eru quia burro átoo co,

i que embesa ji quia nyii ra. ¹⁶ Jesús chimbaaquiato que ã icuayãte nyii ra. Embesa ji. Jesús quera si mose que ã icua cote ra. — Embesa ji rui si chõ eriqui rei reaẽ, i que echimbaaquiato eicua ramo cote ra. ¹⁷ Jesús que Lázaro mbuquera, ũquĩ ndese maesa que mbia mbiirandu randu tuchi quia ra. ¹⁸ Nyebe mbia nyoĩ ja tuchi nguia Jesús robeishĩ. Jirandure Lázaro raaque mbuquera rese. ¹⁹ Fariseos que ñee ñee si nyue no nda. —Jesús rui ja tuchichĩ mbia. ¿Mañi nda aba mbia je re? i que ñee nyue ra.

Griegos mo Jesús requia

²⁰ Griegos mo abe que nyoĩ Jerusalén nda. Pascua raã naa Dios

je. ²¹ Ũquĩ ngue nyoĩ ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i que griegos Felipe je ra. ²² Felipe que oso Andrés mbiirandu ra. Ũquĩ ja que nyoĩ Jesús mbiirandu cote ra. ²³ Jesús que ñee ee ra. —Mbiarã ngue achu ibate si ra. Semano nonde arubite cote. Sequera si nonde arubite cote. ²⁴ Tacheẽ nyecua jêje. Ibasi eĩ tiquia eã mose ra ia eã mbei. Chi chooño mbei rae. Etiquia mose ra suri cote. I a tuchi ra cote. Eĩ ae ra se. Ibasi eĩ na si. Amano nda se. Mbia ra setiquia. ²⁵ Ae nduate quia nyiese nae, ũquĩ nda nyoĩ eãte ibate. Ae ndua eãte quia nyiese nae, ũquĩ nguia ra nyoĩ ibate. Siqui bei sacua huee. ²⁶ Ae secheẽ mumba sereãte quia nae, sã ũquĩ ndiqui bei serui. Ae ra aico nae, huee ra ũquĩ abe riqui. Ae secheẽ mumba sereãte quia nae, ũquĩ nĩ nda Paba ñee turã.

Amano nda se, i Jesús mbia je

²⁷ Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. A sacua ño ngue achu resẽ. Sembasi sacua ño ngue achu resẽ. ²⁸ Paba, ndequirãcuã eteacuquia mbia je, i que Jesús ra. Ũquĩ mose que echeẽ mo ndu ee ibate si ra. —Sequirãcuã ngue ateacuquia mbia je ra. Ateacuquia si ra mbia je, i que ibatenda ñee ee ra. ²⁹ Mbia que ibatenda cheẽ ñandu ja rei ra. Ae chi Jesús rese, ũquĩ. —Ama ndieu ereae, i que mbia ra. —Tei. Angel mo ño ngue ñee nguia Jesús je, i que emo no nda. ³⁰ Jesús que ñee mbia je cote ra. —Seje eã ño ngue ibatenda ñee ndesẽ. Jẽ eandu sacua ño ngue ñee ndesẽ. ³¹ Paba ra seicuaa reã mbasi ja cote. Mbia icua nderecua ra Paba mombo ibi jenda cote. ³² Sembucha mose mĩ ibate, mbia ra siqui tuchi serease cote. Sucha

mo jenda ja abete ra siqui serease cote, i que Jesús ra. ³³ —Mbia ra seiquia mĩ sembucha ira rese, i ñene. ³⁴ Mbia que ñee Jesús je cote ra. —“Cristo ra siqui bei”, i que Dios cheẽ embesa ji urembiirandu. ¿Mbaerã erecheẽ nde? “Mbia ra sembucha ira rese”, i re. ¿Aba quia Cristo re? ¿Aba quia tu mbiarã nde? i que mbia ñee Jesús je ra. ³⁵ Jesús que ñee ee ra. —Taico mbirimbe jendese jembaaquiatsu quiatu. Jendesaebe mbiĩ. Tata rendi rãte aico co. Tata rendi siqui mose jendese, ijengata turã ño nguia jẽ! Seicuaa reã ño siqui nguia itondaru. Ũquĩ quiachã ño nguia ũquĩ. ³⁶ Tata rendi rãte aico co. Seico beebese mose jendese, seicua tuchi rã. Eĩ nda jẽingo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷ Jesús que mbia mae sayã saã saã tuchite rei mbia je ra. Mbia que Jesús icuayã mbei chõ nda. ³⁸ Ae Isaías mbesa mĩ nyii nae, ũquĩ na si chõ ngue mbia Jesús icuayã cote ra. Eĩ ngue Isaías embesa mĩ nda: Sererecua, ae uresenei senei nguia mbia je nae, ũquĩ mbia icua sereãte quia ã. Ndequirãcuã mbia tea sereãte quia ã, i que Isaías embesa ra. ³⁹ Mbia que Jesús icua aroneate ra. Isaías chimbese rã si chõ ngue ra. Eĩ ngue Isaías embesa mĩ no nda: ⁴⁰ Dios que mbia chiã matã nda. Nyebe eriqui mbae icuayãte ã. Nyebe eriqui nguia uba eãte serease. Se embitiĩ sacua, i que Isaías chimbese huĩ nda. ⁴¹ Isaías que Cristo quirãcuã tea nyii ra. Nyebe ã mbesa mĩ nguia Jesús rĩ a. ⁴² Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra.

Esiquichete quiatu ngue fariseos si re. —¡Fariseos ra nandemombochĩ mbia chumunuasa si jê! i que ra. ⁴³ —Dios cheê nandemumbayã jê, iã ñochĩ ngue re. —¡Mbia cheê nguiatu nandemumbayã jê! i chõchĩ ngue re.

Secheê nguia ra seucuayãsa mbasi, i Jesús

⁴⁴ Jesús que ñee irātã mbia je ra. —Ae seicua quia nae, se mii icua eã. Paba abe icua. Ae sembu ibate si. ⁴⁵ Ae mae nguia serese co nae, Paba abe rese mae. ⁴⁶ Mbia resae sacua ño achu nguiã co. Eĩ nda seicuasa siquĩã itondáruu. ⁴⁷ Jẽingo secheê andu ã. Jemo secheê mumba mose, se ra ambasiã. Secheê ae ra embasi. Mbia mingo bei sacua ño achu nguiã co. Mbia mbasi sacua eã ño achu nguiã. ⁴⁸ Secheê nguia ra seucuayãsa mbasi, mbae ua mose. Ibi ua mose. Secheê ae ra secheê mumbasa mondo tata cuasu. Secheê andu chooño nguiatu ngue re. ⁴⁹ Se ae eã ño acheê nguiã mbia je. Paba quia ñee nguiã seje. “Eĩ ere mbia mbaaquiatu quiatu”, i que Paba sembu ra. ⁵⁰ Paba cheê ndei mbia mingo beisa. Echeê mumbayã mose. Nyebe aico nguiã Paba cheê nenei nenei co. Secheê ae eã ño ñene.

13

Jesús mbia i irei irei

¹ —Namo jiri ra Paba sererao ibate ibi si cote, i que Jesús uchiangui re ra. Nyesecua tuchi que equia uchimbaaquiatu rese ra. Mano nyee. ² Jesús que quiaru u uchimbaaquiatu rese isa ra. Pascua nonde. —Jesús emondo mbia icuã je, i que diablo Judas Iscariote je nyii ra. Simón ndiirĩ ndei aque. ³ Jesús que mbae icua jate ra. —Dios si chõ achu nguiã co. Aso be ra erea. Paba que uquiracuã mee tuchi seje ra, i que Jesús uchiangui re ra. ⁴ Quiaru

jare que Jesús juã huĩrao mbui ra. Ngũmbi que echucua toalla je ra. ⁵ I que eichusê mbae mo ye ra. Uchimbaaquiatu i que eirei irei ra. Mbiiru iru que toalla je ra. ⁶ Pedro i nda eirei nguiã cote chã. —Sererecua chõ nde resê. ¿Mañi ere ra sei irei re? i que Simón Pedro ñee Jesús je ra. ⁷ Jesús que ñee ee ra. —Ã ereicuayãte. Ae asaã saã nguia ã. Ereicua rei ra cote, i que Jesús ñee Pedro je ra. ⁸ —Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra. ⁹ —Sei achõ eã eirei rō. Seo abe eirei no. Seãquĩ abe no, i chee que Pedro ee cote ra. ¹⁰ Jesús que ñee ee ra. —Ae echasu quiite, equishĩte ũquĩ ndesê. Jẽi mii ño tairei. Jẽquishĩ ja eãte raque. Aque mĩte raque echĩã nondei, i que Jesús uchimbaaquiatu je ra. ¹¹ Jesús que jirandu Judas rese ra. Nyebe eriqui nguiã ñee. —Aque mĩte raque echĩã nondei, i.

¹² Ei irei jare que huĩrao mingue cote ra. Ngoi si que ra. Ae ñee nguiã nguesenda je. —Jẽi que airei, ¿ũquĩ jẽicuate rei quia re? ¹³ Nyebe jẽingo nguiã ñee seje. “Sererecua, Sembaaquiatusa”, i seje. Coche jeñee nguiã seje. Ererecua rei se. ¹⁴ Jẽi que airei irei. Ererecua raque se. Nyebe jẽ abe jemo i jẽirei irei ae. ¹⁵ Nyebe que ateacuquia jẽje resê. Serui sichõ jẽingo emo i irei irei ae. ¹⁶ Tacheê nyecua jẽje. Se rei jenderecua. Se chõ aemondo mondo nguiã mbia mbaaquiatu sacua. Jengasu ra jẽsaã saãchĩ sesi jê. ¹⁷ Jẽ secheê icua mose, secheê mumbayã mose, jẽya tuchi ra jẽingo. ¹⁸ Jẽ ja je eã aico nguiã ñee a. Jaẽirabo que se resê. Jaẽicuate que se resê. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese. ¹⁹ ¡A aico ñee jei jẽje a jê! Eicuã nonde

seje. Eicuã mose seje, jẽ nda seicua cote. “Dios nducucha” jenyẽ tuchi ra seje cote. ²⁰ Tacheẽ nyecua jẽje. Ae secheẽ nenei neneisa isi quia nae, ùquĩ nda seisi se abe. Ae seisi quia nae, Paba abe isi rae, i que Jesús uchimbbaaquiatsu je ra.

Jemo nda semondo mbia icuã je, i Jesús

²¹ Jesús ia eã tuchi que cote ra. —Tacheẽ nyecua jẽje. Jemo nda semondo mbia icuã je cote, i que ñee nyecua uchimbbaaquiatsu je ra. ²² Echimbbaaquiatsu que mae mae ja chõ nyiese ra. —¿Aba ra re? ¿Aba ra re? i jaaja nyue. ²³ Jesús chesecua tuchi que chĩ ngoi ejii ra. ²⁴ Aque je que Simón Pedro o mee mee nda. —“¿Aba ra re?” ere ee, i que Pedro ra. ²⁵ Jesús chesecua que ñimbucha i i ñee Jesús je ra. —¿Aba ra re? i ee. ²⁶ Jesús que ñee ee ra. —Mbichae monde jĩ ra amee jemo je. Ae je ra amee, aque ra semee mbia icuã je, i que Jesús ra. Mbichae que emonde mondo Judas Iscariote je cote ra. ²⁷ Judas mbichae u mose que Satanás ndu embicua tuchi cote ra. Jesús que ñee ee ra. —Ae ra eresaã nae, jũquĩ esaã jeichõ jẽ! i que Jesús Judas je ra. ²⁸ —¿Mbae riĩ Jesús riqui ñee Judas je re? i que eataque ra. Mbia iranua ja que ra. ²⁹ Judas que mbae isiquia quereco ja quia ra. —Mbae mo eisi rã nandechiurã, i reĩ Jesús quia Judas je uchimbbaaquiatsu je. —Mbae mo emondo rã mbaecha reã je, i reĩ Jesús quia Judas je uchimbbaaquiatsu mo je. Echeẽ ngue eicuayã ja ra. ³⁰ Mbichae ure que Judas si usẽ cote ra. Itondaruqui rĩ.

Jesús ucheẽ yasu renei mbia je

³¹ Judas usẽ mose que Jesús ñee nda. —Mbiarã ngue achu ra. Sequirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia

mae cote. ³² Aico Dios quirãcuã ndeacuquia mbia je a cote. Dios abe ra sequirãcuã teacuquia mbia je cote. Sequirãcuã nda eteacuquia jei mbia je cote. ³³ Seresenda, aico mbirĩ ño nguia jendese a cote. Serequia rei ra se cote. Acheẽ ngue judíos je, ùquĩ sí aico ñee jẽje a. Ae ra aso nae, huee jengasẽ aroneate. ³⁴ Aico secheẽ yasu nenei jẽje a. Secheẽ mumbayã sacua. jenyesequa ja jenyiese jẽ! Sã ñi aico nyesequa tuchi jendese no. jẽ jenyẽ nyesequa tuchi jenyiese jẽ! ³⁵ Jenyesequa tuchi mose jenyiese, mbia ra ñee ja tuchi jenĩ. “Eĩ nguia Jesús chimbbaaquiatsu quia re”, i ra mbia jẽje, i que Jesús uchimbbaaquiatsu je ra.

Pedro ra ñee ñoono serĩ, i Jesús

³⁶ —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri ra ereso serui cote, i que Jesús Pedro je ra. ³⁷ Pedro que ñeembe ee ra. —¿Mbaerã nda asoã nderese namo nde? Seso sete nderese. Semano sete nderese, i que Pedro Jesús je ra. ³⁸ Jesús que ñee ee ra. —“Semano sete nderese”, erechĩ nguia seje. Co isa ra erecheẽ ñoono serĩ tres veces. “Jesús aicuayãte resẽ”, ere chooño nda serĩ nguira cheẽ nonde, i que Jesús Pedro je ra.

14

Jesús rei ñeenda Dios icha

¹ Jesús que ñee uchimbbaaquiatsu je ra. —Jẽya eã eriquichĩ nguia. Dios jẽicua chõ ae. Se abe jẽicua chõ ae. ² Ae Paba riqui, huee tuchia tubiriãte. Ùquĩ eande rae, eĩ nda acheẽ eãte rei jẽje. Aso ra tucharã naã jẽje. ³ Jenyucharã naa jare ra achube jendea cote, jenderao bei serese cote. Jẽ nda jẽingo bei serese pee cote, ae ra aico. ⁴ Ae ra aso, huee jẽicuate

resê. Ñeenda abe jêicuate resê, i que Jesús ee ra. ⁵ Tomás que ñee ee ra. —Ureicuayâte nyeresê. ¿Mangue ra ereso mangue re? Ñeenda ra ureicua eâte chi nde, i que Tomás Jesús je ra. ⁶ Jesús que ñee ee ra. —Ñeenda rei se. Ñee ñooñoã je rei se. Mbia mingo beisa rei se. Ae ra seicuayâte, ùquĩ nda ngaseã mbei Paba je. ⁷ Jê seicua mose, Paba abe jêicuate quia ã. Jê Paba jêicuate quia cote resê. Jemae ngue erese namo ndesê, i que Jesús ee ra.

⁸ Felipe que ñee ee cote ra. —Nderu eteacuquia rã ure je. Ûquĩ mii ño ureico nguiã ñee ndeje, i que Felipe ra. ⁹ Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayâte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje. ¹⁰ Co aico Paba rese co resê. Paba abe riqui serese co. ¿Ûquĩ ereicuayâte re? Ae aico ñee jêje nae, secheê ae eã ño ùquĩ nde. Paba riqui serese co. Ae abe riqui mbae raã naa serese co. ¹¹ Secheê jêicua rã. Co aico Paba rese co. Paba abe riqui serese co. “Nyia”, jenye eã mose secheê je, sechisaã je chõ “nyia” jenye.

¹² Tacheê nyecua jêje. Ae seicua quia nae, ùquĩ nda sechisaã saã saã se rã si cote. Ûquĩ nda mbae saã saã tuchi sesi. Co quia aso nguiã Paba rea se co. ¹³ “Mbae emondo ure je” i mose seje, amondo ra jêje. Jê seicua mose. Eĩ ae ra Paba quirãcuã ndeacuquia mbia je. ¹⁴ “Mbae emondo ure je”, i mose seje, amondo ra jêje. Jê seicua mose.

Espíritu Turã tamondo jêje, i Jesús

¹⁵ Jenyesecua mose serese, secheê jemumbayã ae. ¹⁶ Tacheê Paba je. “Espíritu Turã emondo sechimbaaquiatu je”, ae ra Paba je. Espiritu Turã nda siqui bei jendese cote. Jêquiato tuchi ra ae cote.

¹⁷ Espiritu Turã nda ñee ñooñoã jêje, jembaaquiatu quiatu. Ae ra siqui eã tuchi Dios quiatoã ndese. Espiritu Turã icuayâte quia ñe ne. Jê nguia jêicuate nguiã. Co Espiritu turã ndiqui jendese co. Siqui bei ra jendese.

¹⁸ Aso raque quia co. Esi cheecha rã nda jêingoã. Achube ra jembirõ.

¹⁹ Aichite aĩ oso a cote. Dios icuasa reã nda mae eã serese cote. Jê nguia nda jemae nguiã serese. Aquera si ra siqui bei nonde. Jê abe ra jêingo bei serĩ cote. ²⁰ Espiritu Turã tu mose ra jêicuate cote. “Jesús riqui ngu rese co. Æ ureico Jesús rese ã. Jesús riqui urerese co”, jenye ra serĩ cote. ²¹ Ae secheê icua quia nae, ae secheê mumbayâte quia nae, ùquĩ nguia nyesecuate nguiã serese. Paba nyesecuate ùquĩ ndese. Se abe acheseccuate ùquĩ ndese. Tachecua ñimbucha ùquĩ ndese, i que Jesús uchimbaaquiatu je ra. ²² Judas, i que echimbaaquiatu mo je ra. Judas Iscariote eã ño aque re. Judas mo ño aque re. Judas que ñee Jesús je ra. —¿Mbaerã nda erechecua ure je re? Mbia ja je nyecua rocoĩ, i que Judas ra. ²³ Jesús que ñee ee ra. —Ae nyesecuate quia serese, ùquĩ secheê mumbayâte quia ã. Paba abe ra nyesecuate ùquĩ ndese. Paba ra siqui ùquĩ ndese. Se abe ra aico ùquĩ ndese. ²⁴ Ae nyesecua eâte quia serese, ùquĩ secheê mumba mumbate quia ã. Secheê ae eã asenei senei nguiã jêje co. Paba cheê ño asenei senei nguiã jêje. Ae chõ sembu nguiã.

²⁵ Seso nonde aico co renei nenei jêje a. Sereco mosebe jendese.

²⁶ Paba ra Espiritu Turã mondo jêje secheê ndui si. Jêquiato tuchi ra Espiritu Turã cote. Ae ra jembaaquiatu tuchi mbae ja riĩ cote. Ae ra jemundua tuchi secheê ndese cote. ²⁷ Co aso quia co. Jêyayã eã taeminga a. Seicuasa reã na si

eã taemingo. Ũquĩ nguia eya eãte riqui nguĩã. Sã seyate se no. Eĩ tae jembia mingo a. ¡Jëya bei chõ jê! ¡Jësiquicheã ño jê! ²⁸ Aso ra Paba rea cote. Aquere ra achube jembirõ. Ũquĩ ndese que jëirandu resê. Jenyesecua mose serese, eĩ ndei ra jëyate secheẽ ndese. “Taso Paba rea”, i mose. Ae quiarei i tuchi sesi. ²⁹ Seso nonde aico ñee tuchi jêje a cote. “Ñee ñooñoã tuchi quia equia re”, jenyete tuchi ra seso mose cote. Huee ra jê seicua tuchi cote. ³⁰ A nda aicobe ñee ñee jêje chã. Diablo quia tu nguĩã co. Mbia icuã nderecua ru quia co. Ae quiarei equirãcuã neã jiri sesi. ³¹ Paba cheẽ ndui si taico. Mbia seiquia arondete raque. “Nyesequa tuchi quia equia ngu rese re”, i ra mbia seje cote. Paba cheẽ mumbayã mose. Jëhuã. Nyao, i que Jesús uchimbacuatatu je ra.

15

Jesús rei ira i rã

¹ Jesús que ñeembe uchimbacuatatu je ra. —Se rei ira i rã. ² Paba rei ira raarõsa rã. Ira rãquĩã ndibisho ia eã mose, nyisia rae. Erãquĩã ia mose, saarõ turã ndae. Mbeerera rera rae. Embitirõ sacuã. Ia tuchi sacuã cote. ³ Jê ngue secheẽ jëisi turã ndesê. Nyebe Paba jembitirõ secheẽ je resê. ⁴ Jëingo bei ñimbucha serese. Sã aico ñimbucha jendese no. Ira rãquĩã ae ra ia eã. Siquĩã mose ñimbucha hui rese. Eĩ jenyete ra jê. Mbae turã nda jësaã eã jê ae. Siquĩã mose ñimbucha serese. ⁵ Se rei ira i rã. Erãquĩã na ndei jê. Jëingo mose ñimbucha serese, seico mose ñimbucha jendese, jëturã tuchi ra jëingo cote. Jê ae ra mbae turã jësaã eã, siquĩã mose ñimbucha serese. ⁶ Ae siquĩã ñimbucha serese nae, ũquĩ nda siqui ira rãquĩã sia ji rã. Eiru mose ra mbia emunua nua. Eréi sacuã. ⁷ Jëingo bei mose serese, jënee

nda amumbayã. “Mbae embu ure je”, i mose, amondo ra jêje. Jëtesareĩã mose secheẽ si. ⁸ Jëingo turã mbei mose, mbia ra ñee turã turã mbei Paba rã. Jëingo turã mbei mose, “Jesús chimbacuatatu tuchi quia eriqui re”, i ra mbia jeni. ⁹ Sã Paba riqui nyesequa serese nae, eĩ ae si equia nyesequa jendese co. Jëingo bei ñimbucha serese. Eĩ nda achesequa bei jendese. ¹⁰ Paba cheẽ amumbayãte quia co. Nyebe Paba riqui nguĩã nyesequate serese co. Jê secheẽ mumbayã mose, achesequa bei tuchi ra jendese. ¹¹ Aico ñee jembacuatatu co. Jembia sacuã. Sã seyate se no, se rã si ra jëya.

¹² Ñ ndei secheẽ ã: ¡Jenyesecua tuchi quia jenyiese jê! Sã aico nyesequa tuchi jendese no. ¹³ “Se tamano sequiato ribishorõ”, i mose emo, aque quiarei nyesequa tuchite uquiato rese. ¹⁴ Sequiato rei jê, secheẽ mumbayã mose. ¹⁵ “Serimba” aeã nda jêje cote. Ererecua quiatu “sequiato” i ãte nguĩã ngũimba je. Ñee ja eãte ngũimba je. Sã eriqui ñee ja uquiato je no. Se quia ñi Paba cheẽ asenei senei jate nguĩã jêje. Nyebe “sequiato” tae jêje cote. “Serimba” i rocoĩ. ¹⁶ Jê ngue seirabo eã ndesê. Se quiatu ngue jaëirabo nguĩã. ¡Mbae turã ño jësaã saã mbei quia seje jê! ¡Jenyisaã nda uachĩ jê! Jê ngue seicuate. Nyebe jê “mbae mo embu ure je”, i mose Paba je, mondo ra jêje. ¹⁷ Ñ ndei secheẽ jêje ã: ¡Jenyesecua tuchi quia jenyiese jê!

Mbia ataque Jesús rimba ucuayã

¹⁸ Dios icuasa reã nda jëucuyãte cote. ¡Jëicua quiatu jê! “Eĩ ngue equia Jesús ucuayã nyii resê”, jenyete ra cote. ¹⁹ Jaëirabo que se ra. Nyebe jëingo nguĩã Dios icuasa reã na eã. Nyebe eriqui nguĩã jëucuyãte ã. Jê ũquĩ na mose, eĩ nda eriqui turãte rei jendese. ²⁰ Acheẽ

ngue jêje nyii, iũquĩ ndese jendua jê! jJengasu ra jêsaã saãchĩ sesi jê! Mbia icuã mose seje, jêje abe ra eicuã. Mbia secheẽ mumbayã mose, jê abe cheẽ mumbayã ndae. ²¹ Serĩĩ nda Dios icuasa reã jêĩ jêĩ jêje. Dios icuayãte quiatu nguiã ã. Nyebe ra eicuã icuãte jêje. ²² Achu que mbia mbaaquiatsu quiatu ra. Nyebe ra Dios eicuã tea chooñoã cote. Eĩ nda Dios eicuã tea chooño ndei. Se embaaquiatsu eã mose. “Ureicuã ureicuayãte quia ã”, i aronea ño emo cote re. ²³ Ae seucuayãte quia, Paba abe ucuayãte equia ã. ²⁴ Mbia mae sayã ngue ateacuquia tuchi rei ee ra. Sechisaã nda mbia mo saã eã. Eĩ nda Dios mbia icuã tea chooño ndei. Sechisaã ndese mae eã mose. Sechisaã ndese mae ndaque, seucuayã ño nguiã ã. Paba abe ucuayã ño nguiã ã. ²⁵ Mbia riqui seucuayãte ã. Sã embesa ji riqui ñee no: “Mbia seucuayãte. Se mbae icuã asaã eãte raque”, sã embesa ji riqui i no. Ñquĩ iquechĩ cote. ²⁶ Seso mose Paba rea, Espiritu Turã tamondo jêje. Jêquiatorã. Ae ra tu Paba si jêje. Ae ra ñee ñooñoã jêje. Ae ra jembaaquiatsu quiatu turã serĩĩ. ²⁷ Nyii mosenda bei chõ jêingo nguiã serese. Nyebe ra jê abe mbia jembaaquiatsu quiatu turã serĩĩ, i que Jesús ra.

16

¹ Jesús que ñee i i uchĩmbaaquiatsu je ra. —A aico ñee jêje a. Eĩ nda jêhui eã sesi, mbia icuã icuã mose jêje. ² Mbia ra jendiquisã quisã, jêso jêso mose mbia chumunuasa. “Á ureico rei nguiã mbae turã naa naa Dios je ã”, i ra mbia jêiquia iquia mose. ³ Seicuayãte quia ñe ne. Paba abe icuayãte quiatu nguiã ã. Nyebe ra eriqui mbae raã icuã icuã jêje. ⁴ Eĩ ae chõ nguiã ñee jêje co. Eĩ nda jendua secheẽ ndese, mbia icuã icuã mose jêje. “Jesús cheẽ iquechĩ cote”, jenyre ra cote.

Espíritu Turã nda jembaaquiatsu quiatu, i Jesús

Acheẽ jei eã ngue jêje ñquĩ cose resẽ. Aicote quiatsu ngue jendese re. ⁵ Co quia asote nguiã Paba rea co cote. Ae sembu. “¿Manguete ra ereso mangue re?” i eã ñochĩ jemo seje. ⁶ Se “taso” i mose jêje, jêya eãte chõ jêingochĩ nguiã ã. ⁷ Tacheẽ nyecua jêje. Coche aso nguiã jendecha co. Espiritu Turã nda ambu jêje. Jêquiatorã. Ae ra siqui jendese. Eĩ nda Espiritu Turã tuãte rei. Seso eã mose jêsi. ⁸ Espiritu Turã tu mose ra ñee ñee mbia je. “Mbia icuã ja chõ ñe ne. Jêingo turã Dios resa rae. Dios ra Jesús icuasa reã mbasi ja”, i ra Espiritu Turã ñee mbia mbaaquiatsu quiatu. ⁹ “Jê nguia Jesús jêicuayãte nguiã ã. Nyebe jêicuã ndiqui nguiã”, i ra Espiritu Turã ñee mbia mbiirandu. ¹⁰ Aso ra Paba rea cote. Mbia ra mae eãte serese cote. Nyebe ra Espiritu Turã mbia mundua mbae turã ndese cote. ¹¹ “Dios ra diablo mondo tata cuasu. Nyebe ra mbia icuã abe mondo tata cuasu”, i ra Espiritu Turã ñee mbia mbiirandu.

¹² “Taembaaquiatusube jiri”, ae rei se. Jêicuayã jêite chõ ndae. ¹³ Espiritu Turã tu mose, ae ra jembaaquiatsu quiatu turã mbae ja rese. Ñee ñooñoa tuchi rae. Ucheẽ ae ra esenei seneiã. Paba cheẽ ño esenei senei nguiã. Mbae tu nonde ra Espiritu Turã jembiirandu erese. ¹⁴ Espiritu Turã nda jembaaquiatsu quiatu secheẽ nii. Ñquĩ mose ra mbia ñee turã turã serĩĩ cote. ¹⁵ Ae Paba senei senei nguia, ñquĩ asenei senei nguia se abe co. Nyebe ra Espiritu Turã jembaaquiatsu quiatu secheẽ nii.

Jêya eande nyii ra jêya tuchi cote, i Jesús

¹⁶ Namu jiri ra jemaie eã serese cote. Aquere ra jemaembe serese cote. Aso ra Paba rea, i que Jesús uchĩmbaaquiatsu je ra.

17 Echimbaaquiatu que ñee ñee nyue ra. —¿Mbae i Jesús quia re? “Namo jiri ra jemaẽ eã serese cote. Aquere ra jemaembe serese cote. Aso ra Paba rea”, i chõchĩ. ¿Mbae ũquĩ nde? 18 ¿Mbaerã eriqui “namo jiri” i re? ¿Mbae rĩ eriqui ñee nde? Nandeiranuã tuchichĩ, i que echimbaaquiatu ñee nyue ra. 19 Jesús que jirandu erese ra. —“Ndecheẽ embiasa jiri ure je” ¿jenye sete seje re? “Namo jiri ra jemaẽ eã serese cote. Aquere ra jemaembe serese cote”, ae que jêje, ¿aque jêicuayãte re? 20 Tacheẽ nyecua jêje. Namo jiri ra jenyeseo. Jêya eãte rae. Sequiatoã nda eya tuchi. Aquere ra jêya tuchi cote no. Jêya eande nyii. 21 “Serasichĩ nda cote re”, i ra esi ndua ndua ãquẽ nyaacuquia serĩ mose. Eyayã tuchi ae. ãquẽ nyaacuquia mose cote, eya tuchi ra cote. Ndua eã tuchi ra ngasi rese cote. Eya tuchi chõ nda nguiĩ ndese cote. 22 ãquẽ ndasi rã ño jê nde. Jêya eãte namo. Setube mose jendea, jêya tuchi ra cote. Emo nda jembia eã eã cote. 23 “Ndecheẽ embiasa jiri ure je”, jenye eã nda seje cote. Tacheẽ nyecua jêje. Jê seicuate. Nyebe jê “mbae mo embu ure je”, i mose Paba je, mondo ra jêje. 24 “Mbae mo embu ure je. Jesús icuaa je”, jenye eã mbeite equia Paba je ã. Jêñee ee. Jêñee mose ee, mondo ra jêje. Jêya tuchi ra cote.

Jesús quirãcua tuchi ibi jenda si re

25 Acheẽ tuchi rei que jêje ra. Secheẽ ngue ambiãsa tuchiã jiri jêje ra. Emo mose jiri quia ra secheẽ ambiãsa tuchi jêje cote. Paba rĩ. 26 Aque mose ra jêñee Paba je. “Mbae embu rã ure je”, jenye ra Paba je serĩ. Aque mose ra acheẽ eã ee jenĩ cote. Jê ae chõ nda jêñee ee cote. 27 Paba sí nyesecua tuchite quia jendese co. Jenyesequate quiatu nguiã serese

ã. “Dios que Jesús mondo nande je resẽ”, jenye quiatu nguiã seje ã. Nyebe Paba riqui nguiã nyesecua tuchi jendese. 28 Paba si que achu ibii resẽ. Asobe ra ibi recha cote. Paba rea ra asobe ibátee cote, i que Jesús ñee uchimbaaquiatu je ra.

29 Echimbaaquiatu que ñee ee ra. —Ereicochĩ ñee nyecuate ure je a cote. Ndecheẽ erembiasa tuchichĩ nguia ure je a cote. 30 Mbae ereicua ja tuchi quiatu quia nde reaẽ. Mbia ndua ndua ereicuate quia equia co reaẽ. Ñee nonde ndeje. Nyebe ureico nguiã ndeicuate ã. “Paba si chõ erechu nguiã co”, ure equia ndeje ã, i que echimbaaquiatu ee ra. 31 Jesús que ñee ee cote ra. —Jê ngue seicuate rei nguiã. 32 Seandu rã se. Namo jiri ra jeñimbuchao chao oso sesi. Jêso ja ra serecha namo. Se ae eã nda aico. Paba riqui nguiã serese co. 33 Jê seicua mose, mbae ra jembia eã eã. Nyebe aico nguiã jembiirandu randu beite co. Mbia icuã icuã mbeite ra eriqui jêje a íbii. Jeñimbirãcuã jiri quia jê! Se quia sequirãcuã tuchi ibi jenda si re, i que Jesús ñee uchimbaaquiatu je ra.

17

Sechimbaaquiatu etequiatu, i Jesús Dios je

1 Jesús ñee jare uchimbaaquiatu je que soboiba mae ibate ñee Dios je ra. —Paba, ndecheẽ ndiquichĩ io a cote. Seturã etequaquia mbia je cote. Eĩ nda se abe ndeturã ateacuquia mbia je. 2 Nde chõ ngue semĩ mbia rerecurã, Paba. Mbia mingo bei sacuã. Mbia que eremee seje, ũquĩ mingo bei sacuã. Se rei nderucucha. 3 Paba, nde mĩ ndei Dios tuchi ereico co. Se rei Jesucristo ndechimbu ibate si. Ae ndeicuate quia nae, se abe icua equia nae, ũquĩ nda siqui bei. 4 Ndeturã ngue ateacuquia mbia je ra. “Ã esaã íbii”, ere que seje, ũquĩ

ngue asaã ja cote ra. ⁵ Paba, seturã eteacuaiabe mbia je. Cose ndare rã. Mbae eã mosenda rã. Asobe ra siqui nderese. MSã ndeturã ereteacuiqua mbia je nae, seturã abe eteacuiqua mbia je.

⁶ Mbia que eremee seje, ũquĩ ngue ambiirandu tuchi nderese ra. Nembae rei que nyii ra. Eremee ngue seje cote ra. Ndecheẽ ngue emumbayã nda. ⁷ Nde chõ ngue sembaaquiatu quiatu nguiã, Paba. Ndecheẽ ae chõ ã nde. Secheẽ eã ño ñe ne. Ũquĩ ngue sechimbaaquiatu icuate ra. ⁸ Eresenei senei ngue seje, ũquĩ ngue asenei senei ja ee ra. Nandechẽ ngue eisi ja turãte ra. “Paba si que Jesús ru ra. Paba que embu ra”, i equia nderĩ ã. ⁹ Sechimbaaquiatu eteaquiatu, Paba. Seicuaa reã je eã ño aico nguiã “eteaquiatu” i ndeje. Ae eremee seje nae, ũquĩ je chõ aico nguiã “eteaquiatu” i ndeje. Nderimbate quia ñe ne. ¹⁰ Ae nderimba nae, serimba chõ se abe re. Aẽ serimba nae, nderimba chõ ũquĩ no nde. Serimba riqui ñee turã mbei serĩ ã. ¹¹ Asobe ra ndeje, Paba. A ra aicoã íbii cote. Serimba quia ra chichõ íbii. Eteaquiatu, Paba. Ae eremee seje, ũquĩ eteaquiatu ndequirãcuã je. Mbae mii ndese ja chõ emundua ndua mingo. Sã nande nandendua ndua mbae mii ndese no nae. ¹² Ae eremee seje, ũquĩ ngue ateaquiatu quiatu quia ndequirãcuã je ra. Seico mose íbii. Emo ngue quiachã eãte sesi ra. Aque mii nda quiachã. Embesa ji cheẽ ndui si ra aque mii quiachã. Huicua je. Emo ngue quiachãyã cote ra. ¹³ Aso ra nderea cote. Seico beebe mose íbii, aico ñee ñee ndeje serimba riã a. f nda eya quiatu chi a. Sã seyate se no. ¹⁴ Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã. ¹⁵ “Serimba erao ibi si”, ae eã ño nguiã ndeje co, Paba. “Eteaquiatu

diablo si”, ae chõ nguiã ndeje co. ¹⁶ Se rã si rei serimba. Ibi jenda eã ndiqui ã. ¹⁷ Serimba emingo tuchi icúe nembraerã. Ndecheẽ je emingo icúe. Nde quia erecheẽ ñooño eãte nguiã. ¹⁸ Sã nde sembu mbia je no, eĩ ae si chõ nguiã serimba mondo mondo mbia mbaaquiatu quiatu co. ¹⁹ Aico ñimondo tuchi ndeje co, Paba. Mano sacua serimba je. f nda serimba abe ñimondo tuchi ndeje.

²⁰ ã nii achõ eã aico ñee ndeje. “Eteaquiatu” i ndeje. ã nda secheẽ senei senei emo je abe cote. Ũquĩ abe ra seicua cote. Serimbarã. Ae ra seicua icua nae, ũquĩ abe eteaquiatu. ²¹ Mbae mii ndese ja chõ ũquĩ emundua ndua mingo. Mbae mii naanguia tuchi emingo nanderese, Paba. Sã ereico serese no nae. Sã aico nderese no nae. Eĩ nyere si ũquĩ mingo mbae mii na. Eĩ nda mbia seicuaa reã ñee serĩ. “Dios chimbu quia eriqui re”, i nda mbia ñee serĩ ña. Seicuaa siqui mose mbae mii ndese. ²² Ndeturã ngue eremee seje, eĩ ae que seturã mondo seicuaa je ra. Eĩ nda eriqui mbae mii na. Sã nandeico mbae mii na nande no, Paba. ²³ Nyebe aico nguiã seicuaa rese co. Nde ereico serese co no. Nyebe seicuaa riqui mbae mii na co. Eĩ nda seicuaa reã ñee nderĩ. “Dios quia Jesús mbu quia reaẽ. Dios quia nyesecua quia Jesús icuaa rese re. Jesús rese rã si nyesecua”, i nda mbia ñee nderĩ ña. ²⁴ Paba, serimbarã ngue eremee seje. Ae ra aso, sã echoi serea siqui bei huee serese cote. Ndecheẽ turã andu sacua serĩ huee. Erecheẽ turã mbeite serĩ. Ibi eã mosenda bei chõ ereico nguiã nyesecua serese co. ²⁵ Ndeturã tuchi, Paba. Seicuaa reã ndeicuayãte quia ã. Se quia areicuate nguiã co. Serimba abe que ndeicuate quia ã no nda. “Dios chimbu”, i seje nderĩ. ²⁶ Arerenei nenei tuchi que serimba je ra.

Tarerenei nenei tuchibe ee. Eĩ nda nyesequa tuchi nyiese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

18

Mbia icuã ngaẽ Jesús ruruchoi

¹ Jesús ñeende ngu je que echoi ama ñetẽ ndobei ra. Cedrón, i que aque ama je ra. Aque robei que esi uchimbaaquiatsu rese ra. Iraqui turã mo ngue echoi ra. ² Jesús que oso oso beite quia huee ra. Iraqui re. Uchimbaaquiatsu rese. Nyebe Judas riqui nguã huee icuate. —Jesús tateacuquia checuayã mbia je, i que Judas ra. ³ Nyebe Judas mbia ruruchoi nguã huee Jesús isi sacua. Soldados que ecuruchoi ra. Policía jenda abe que ecuruchoi no nda. Sacerdotes rerecua chimondo rei policía. Fariseos chimondo abe no. Uquĩ ja que nyoĩ ngasẽ Jesús je ra. Tiquise que ecuruchoi quia ra. Lámparas abe no. Mbae rendi abe no. ⁴ Jesús que mbae icuate ra. —Mbia ra jeĩ jeĩ seje, i que eicuate ra. —¿Aba rea jenyu quia co re? i que oso ñee ee ra. ⁵ —Jesús rea urechu quia co. Nazaret jenda, i que mbia ñee nda. —Se chõ Jesús resẽ, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra. ⁶ —Se chõ Jesús resẽ, i mose que mbia siri siri choi uquite quiti ra. Ngoĩ ngoĩ chee que echoi ra. ⁷ —¿Aba rea jenyu quia co re? ibe que Jesús ñee ee ra. —Jesús rea urechu quia co, i que ra. ⁸ Jesús que ñeembe ee ra. —“Se chõ nyeresẽ”, ae que jẽje. Serequia mose, sererao se ae. Sã seresenda chichõ, i que Jesús ee ra. ⁹ —Ae Paba mee seje serimbarã, uquĩ mo quiachâyãte sesi, i que Jesús nyii ra. Nyebe ñee nguã mbia je cote. —Sã seresenda chichõ, i mbia je cote. ¹⁰ Simón Pedro que uchuuru

siqui tiquise ra. Sacerdote rerecua rimba rese que tiquise rerequie requia ra. Eisa que echisia equiatiocuti quitinda ra. Malco, i que aque je ra. Ae isa Pedro chisia. ¹¹ Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachecuachõ na mbia je. Sã mbia icuã sembasi tuchi cote, i que Jesús Pedro je ra.

¹² Soldados que Jesús isi cote ra. Soldados rerecua rese. Policía rese. Uquĩ ja que Jesús isi ra. Nyucua que suruchoi ra. ¹³ Anás chuchua rane ngue eruruchoi ra. Anás ndiriĩ ngue Caifás ninisi ra. Caifás que sacerdote rerecua aque mose ra. ¹⁴ Caifás sí quia que ñee nyii ra. —Aque mii ño nda mano nguã nande ja je chã, i que judíos je nyii ra.

Jesús aicuayãte, ichõño Pedro

¹⁵ Mbia Jesús ruruchoi mose que Simón Pedro nyoĩ eruĩ ra. Jesús chimbaaquiatsu nongue rese. Co mii ndese. Enongue que sacerdote rerecua icua ra. Nyebe ique oso nguã Jesús rui. Sacerdote rerecua itaicuee. ¹⁶ Mbia que Pedro siquisã mii etaronda robei ra. Sacerdote chucua que tu nyebi ñee echiquesa raarõsa je cote ra. —Sã Pedro ique rã serese, i que ra. Nyebe emingue nguã cote. ¹⁷ Echiquesa raarõsa que ñee Pedro je ra. —¿Jesús resenda nde re? i que nyucuaaque Pedro je ra. Echiquesa raarõsa. —Tei, ichõño ngue Pedro ee ra. ¹⁸ Nyiiseite mose que ra. Nyebe policía jenda tata mbucha nguã. Sacerdote rimba rese. Uquĩ ja que chi nyee ra. Pedro que chi nyee erese ra.

Sacerdote rerecua ñee Jesús je

¹⁹ Sacerdote rerecua que ñee Jesús je ra. —¿Aba ndechimbaaquiatsu re? ¿Mbae riĩ ereico mbia mbaaquiatsu quiatu re? i que ererecua ra. ²⁰ Jesús que ñee ee ra. —Se que acheẽ

ja mbia resa rae ra. Mbia chumunua nuásaa ja que aico mbia mbaaquiatu quiatu ra. Dios chuchúaa abe no. Acheê nyecuayâ cuayâ eã ngue se quia mbia ísaa ra. ²¹ ¿Mbaerã ereico ñee seje re? Secheê andusa je quia echeê. Sã ùquĩ ñee. Mbae rĩi acheê ee re. Ûquĩ ngue secheê ñandu ja quia ra, i que Jesús ererecua je ra. ²² Jesús cheê mose que policía jenda mo ucua eritii rese ra. —¿Mbaerã ereico ñee sacerdote rerecua je ùquĩ nde? i que policía mo ñee ucua Jesús rese ra. ²³ Jesús que ñee ee ra. —Secheê icuã mose quia echeê seje. Mbae icuã nĩi aico ñee nde. Secheê turã mose chõ erecuachĩ nguĩa serese, i que Jesús ee ra. ²⁴ Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayãte, i si Pedro

²⁵ Pedro que nyee beite u tata ra. Mbia mo ngue ñee ee ra. —¿Jesús resenda nde re? i ee. —Tei, ichõĩño ngue Pedro ee ra. ²⁶ Ae isa Pedro chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraquí re Jesús rese reae, i que Pedro je ra. ²⁷ —Tei, ichõĩño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸ Policía jenda que Jesús curuchoi Caifás chuchua si cote ra. Ererecua tuchi chuchúaa que eruruchoi cote ra. Pretorio, i que hue tuchia je ra. I que nyaashĩ u quia cote ra. Judíos que iqueã ererecua chuchua ra. Mbaeiaete que abae chuchua ee ra. Pascua raã nonde. —Eĩ nda oveja roo nandeuãte rei pascua mose, ique mose abae chuchua, i que ra. ²⁹ Nyebe Pilato si nguĩa usẽ ñee ee. —¿Mbaerã jẽingo ñee Jesús je re? ¿Mbae icuã esaã nde? i que Pilato ra. ³⁰ Mbia

que ñee ee ra. —Jesús que mbae icuã saã saãte ra. Eĩ nda uremondoãte rei ndeje. Mbae icuã naa naa eã mose, i que mbia Pilato je ra. ³¹ Pilato que ñee mbia je ra. —Jẽ ae Jesús jendao ae. Jẽ ae jẽingo erese ae. Jẽ ae Jesús jembasi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbia mo ureiquia aroneate. Nde chõ echb ẽ. “Jẽiquia” ere chõ soldados je, i que mbia ñee Pilato je ra. ³² Jesús cheê iquechĩ cote. —Mbia ra seiquia sembucha ira rese, i rei nyii. Echeê iquechĩ cote.

³³ Pilato que ique si oso uchuchúaa ra. Ae “quiatuchu” i nguĩa Jesús je. —¿Judíos rerecua tuchi nde re? i que Pilato Jesús je ra. ³⁴ Jesús que ñee ee ra. —¿Nde ae erecheê nguia seje a re? Emo ñee ndeje nyii reae, i que Jesús ee ra. ³⁵ Pilato que ñee ee ra. —Judío eã ño se resẽ. Judíos sí chõ ngue nemondo seje resẽ. Sacerdote rerecua abe no. ¿Mbae icuã eresaã nde? i que Pilato ra. ³⁶ Jesús que ñee ee ra. —Ererecua raque se. Ererecua eã ño se a íbii re. Eĩ nda serimba nyarõ tuchi rei serese, judíos ndiquisã quisã tuchi sesi. Ibi jenda rerecua eã ño se re, i que Jesús Pilato je ra. ³⁷ —¿Ererecua rei nde re? i si que Pilato ñee Jesús je ra. Jesús que ñeembe ee ra. —Ae. Achu que íbii ra. Sechusua rei íbii. Achu que mbia mbiirandu randu Dios cheê nĩi nda. Ichõĩñosa reã ñee nĩi. Ichõĩñosa reã ndesenda ra seandu ja, i que Jesús Pilato je ra. ³⁸ —¿Mbae ichõĩñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usẽ si oso ñee judíos je ra. —Mbae icuã Jesús saã eãt e reae. ³⁹ Pascua mose bei que aico etarõ ji mbusẽ mondo bei jẽje ra. ¿Aba ra ambusẽ mondo jẽje

namo nde? ¿Judíos rerecua ra ambusê mondo jêje re? i que Pilato ñee mbia je Jesús rîi nda. ⁴⁰ Mbia que ñee mombo mombo ja Pilato je ra. —Tei. Aque eã. Barrabás quia embusê imbu ure je, i ja que mbia ñee nda. Mbae mbuquiachãsa tuchi rei Barrabás.

19

¹ —Jesús jêiruã nua, i que Pilato ra. Mbia que Jesús iruã nua cote ra. ² Nyu ritiméi uma ji que soldados mii Jesús ãquĩ ndese ra. Tiru ireĩ ngue emingue ee ra. ³ —Judíos rerecua tuchi chõ nde re, ichõĩño ngue soldados ucua ucua Jesús rese ra. ⁴ Pilato que usê si oso ñee mbia je ra. —Secheê jeñandu rã. Acheê ndei que Jesús je ra. Mbae icuã esaã eãte reae. Nyebe anosembe nguã jêje co, i que Pilato ra. ⁵ Jesús que econosê mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resê, i que Pilato Jesús ndeacucua mbia je ra. ⁶ Sacerdote rerecua que chi ja huee ra. Policía jenda mo abe que chi huee ra. Ũquĩ ja que ñee mombo mombo Pilato je ra. —¡Embucha ira rese! ¡Embucha ira rese! i ja que ñee mombo mombo ee ra. Pilato que ñee ee ra. —Jê ño jembucha ira rese ae. Mbae icuã esaã eã arôte seje, i que Pilato mbia je ra. ⁷ Judíos que ñee Pilato je cote ra. —“Dios rucucha rei se”, ichĩ Jesús nguã. Nyebe eiquia. Sã embesa ji riqui i no: “Ae Dios ririĩ saã saã nguia, aque jêiquia”, i que embesa ji ra, i que judíos ñee Pilato je ra. ⁸ —Dios rucucha, i mose que Pilato siquiche tuchi cote ra. ⁹ Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeê mose ra. ¹⁰ Pilato que ñee si ee ra. —¿Mbaerã ereico ñee ãte secheê mose re? Arembucha arôte ira rese. Arembui abe arôte

se. Se chĩ mbia rerecua, i que Pilato ñee Jesús je ra. ¹¹ Jesús que ñee Pilato je ra. —Dios nemĩ eã mose mbia rerecuarã, eĩ nda ereoco ãte rei serese. Ae semondo ndeje, ae quiarei eicuã tuchi ndesi, i que Jesús ee ra.

¹² Aque mose bei que Pilato ndua ndua Jesús rese ra. —Jesús tambui mondo, i raque ndua ndua. Judíos quiatu que ñee ee ra. —Nya. ¡Erembuichĩ nda jê! Nde embui mose, César quiato eã nda nde cote. “Ererecua rei se”, i quia ñi Jesús re. Nyebe eicuãte riqui nguã César je, i que judíos tasê tasê Pilato je ra. ¹³⁻¹⁴ Judíos cheê andu mose que Pilato ngoi ngũenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pas-cua nonde. Tenda nandeite re mose. —A jenderecua ñi a resê, i que Pilato mbia je ra. ¹⁵ Mbia que tasê tasê ee ra. —¡Eiquia rei! ¡Embucha ira rese! i que mbia Pilato je ra. —¿Se ra jenderecua aiquia re? i que Pilato mbia je ra. —Urererecua mo eãte nyeresê. César mii ño nyeresê, i que sacerdote rerecua Pilato je ra. ¹⁶ Aque mose que Pilato Jesús mondo mbia je cote ra. —Jêiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

¹⁷ Jesús que usê oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheê hue je ra. ¹⁸ Huee que soldados Jesús mbucha ira rese ra. mbia nyeremo abe que embucha ira rese ra. Co mii Jesús ribisho quití. Enongue eribisho quití no. Jesús que emii eite re ra. ¹⁹ Pilato que letrado mbesa ra. JESUS DE

NAZARET REI JUDIOS RERECUA, i que embesa ra. Embesa ji que emii ibate Jesús aquí nguiri ra. ²⁰ Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguia ira rese. Embesa ji que chi mbia cheẽ mbuae jaaja ra. Judío cheẽ. Griego cheẽ. Latín ñee. ²¹ Sacerdotes rerecua que ñee ja Pilato je ra. —“Judíos rerecua” erechi nguia embesa. “Judíos rerecua raã ñooño” ere chõ embesa mii ae, i rei que judíos rerecua Pilato je ra. ²² —Ae ambesa, sã ùqui ñi ño, i que Pilato judíos rerecua je ra.

²³ Cuatro soldados que chi huee ra. Ùqui ngue Jesús mbucha ira rese ra. Ùqui ngue Jesús irao isirõ sirõ ja ra. Jesús irao mii ngue chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ eresebe que ra. ²⁴ Soldados que ñee nyue ra. —Aque ra nandechisia eã. Sita ñetẽ nandesurubaba baba rã nandehue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechi cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechi cote.

²⁵ Jesús mbuchasa ira rese que cuña mo chi ra. Jesús si que ra. Esi nongue abe que ra. María Magdalena abe que ra. Cleofas ninisi abe que ra. María, i que aque je ra. Ùqui ngue chi ja Jesús ji ra. ²⁶ Juan abe que chi Jesús si ji ra. Jesús mae mose usi rese que ñee ee ra. —Taĩ, aque quia nderiirina cote, i usi je. Juan nii eriqui ñee. Jesuubi tuchi quia ñi Juan nde. ²⁷ —Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸ —Achimbirãcuã tuchi que mbae ja je Dios cheẽ nguiri ra, i que Jesús uchiangui re cote ra. —Seisei, i cote. ²⁹ Vinagre mo ngue chi mbae mo ye huee ra. Mbía que esponja monde vinagre ye ra. Mondo que Jesús chúruu ra. ³⁰ Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãqui ngue embucheseco cote ra. Mano ngue cote ra.

Soldado Jesús cúa chiõ tiquise je

³¹ Judíos que ñee nyue ra. —Ae embucha ji chi ira rese nae, sã ùqui chiã ira rese pascua mose huee, i que mbia ra. Pascua nonde que embucha ira rese ra. Mbía icoquiato mose pascua nonde. Mbía chumunuasa tuchi quiarei pascua. Sábado mose rei pascua. Nyebe mbía ñee nguia Pilato je. —Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra. ³² Soldados que nyoĩ ira resenda tima ndiquio ra. Ae chi Jesús rereco chobei. ³³ Ngasẽ mose Jesús je, eraaquete que ee ra. Nyebe etima ndiquio eã nguia. ³⁴ Soldado mo ngue Jesús cúa chiõ tiquise je ra. Eruqui que uchẽ nda. Eri abe que uchẽ nda. ³⁵ Nyebe aico nguia ã mbesa mbesa a. Amae jee ngue erese re. Acheẽ ñooñoã se quia a. Eĩ nda jẽ abe “ae bei jẽ” jenyẽ Jesús rii. ³⁶ Embesa ji cheẽ ngue ique cote ra. Jesús tima ndiquio eã mose. —Etima nda mbía siquio eã, i que embesa ji nyii ra. ³⁷ —Ae embucha uquia ira rese nae, ùqui nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸ José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchiangui re ra. Ae que “Jesús rete embu seje” i Pilato je

ra. Pilato que “eno” i ee ra. José que Jesús rete curuchi ira si cote ra. Ae equerao nguiã. ³⁹ Nicodemo abe que tu erea ra. Ae tu ñee Jesús je isa nyii nae, aque. Aque que tu aba mbushimbusa tubiriã tuchi reru ra. Eraaque mbaerã ndei aba mbushimbusa. Ira shimbu turã mbucúi ji. Mbae a mbucúi ji abe no. ⁴⁰ Ũquĩ ja que Jesús rete querao cote ra. José. Nicodemo ndese. Aba mbushimbusa resebe que eraaque uma uma tiru je ra. Eĩ mbei que judíos quia mbia raaque je ra. Eati nonde. ⁴¹ Jesús iquiasa rurubi que sita imi mo ñi nda. Eao ramo ji. Mbia raaque mondose eã nyii. ⁴² Huee que Jesús raaque nduruchoi nyati ra. —Cochite quia sábado ru nguiã nande je co, i que eati aichi chõ nda.

20

Jesús quera si

¹ Domingo mose que María Magdalena nyoĩ mae Jesús tãsa rese ra. Nyaasĩ nonde. Jesús atiquia nduruba ji que chi sita ra. ² Nyebe echoi nguiã uchã ñee Simón Pedro mbiirandu. Jesús chimbaaquiatsu nongue abe mbiirandu. Ae Jesús quiato tuchi nae, aque. —Aba chõ nandererecua raaque sirõ suruchoi. Mangue eno mangue reae, i que María Magdalena nda. ³ Nyebe Pedro si nguiã ea tiquia rea. Uquiato rese. ⁴ Nyoĩ ja que uchã nda. Enongue rane ngue Pedro chucuã oso ngasẽ nda. ⁵ Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi ni nda. ⁶ Aquere que Simón Pedro ngasẽ cote ra. Ae quiatu que ique oso sita imi ni nda. Ae abe que mae Jesús umanda achõ ndese cote ra. ⁷ Eãquĩ umanda rese abe que mae nda. Tiru ataque rese ja eã ngue eãquĩ umanda chi ra. Eacua ji que chi icúe ra. ⁸ Ae rane ngasẽ

nguia nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguia re, i que eicua cote ra. ⁹ Ũquĩ ngue embesa ji icuayãte ra. “Jesús ra quera si”, i que eicuayãte ra. ¹⁰ Nyebi si que echoi uchuchúaa ra.

Jesús nyecua María Magdalena je

¹¹ María que chiño nyeseo eatiquia jii ra. Echeseo que nyibi mae Jesús rua rese ra. ¹² Angeles mo ngue chi huee nyeremo ee ra. Eiraoshĩ ja que chi ee ra. Enongue que chĩ ngoĩ Jesús ãquĩ ndúa quiti ra. Enongue ecuii rúa quiti no. ¹³ Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguiã nyeseo. Mangue chõ eriqui ererequia mangue, i que María ra. ¹⁴ Ucheẽ nduibe que mae ndei uquite quiti ra. I que Jesús uã ee ra. Icuã eãte que ra. ¹⁵ —¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reĩ nguiã María je. Nyebe María ñee nguiã ee. —¿Nde Jesús raaque ererao re? ¿Mangue erechono mangue re? Taso erea ae. Tarao ae, i que María ra. ¹⁶ Jesús que “María” i María cheẽ mose ra. María que uba tuchi Jesús icua cote ra. Judíos cheẽ ño ngue María ñee Jesús je ra. —Raboni, i que ra. —Sembaaquiatusa, i ñee Jesús icua re. ¹⁷ Jesús que ñee María je ra. ¡Seisi jeichĩ nda re! ¡Aso ãte Paba rea resẽ! Eso rã ñee senongue je. “Jesús que ñee jẽje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jẽje ra”, ere rã senongue je, i que Jesús ñee María je ra.

Jesús nyecua uchimbbaaquiatsu je

18 María Magdalena que oso Jesús chimbbaaquiatu mbiirandu ra. —Amaechĩ Jesús rese, i que ee ra. Jesús cheẽ ngue esenei ja ee ra. 19 Aque mose que domingo ra. Aque isa que Jesús chimbbaaquiatu chĩ ñumunua nda. Etaronda matã ji que chĩ nda. Siquichete quia judíos si re. Jesús que oso ique uchimbbaaquiatu mbuate ra. Eite re que esi ñee ee ra. —¡Jẽya eãte jirichĩ nda jẽ! i que Jesús ñee ee ra. 20 Aquere que Jesús o iõsa reacuquia ee ra. Ucúa iõsa abe no. Echimbbaaquiatu ia tuchi que mae Jesús rese ra. 21 Jesús que ñee si ee ra. —¡Jẽya eãte jirichĩ nda jẽ! Sã ñi Paba sembu no, eĩ tae si jemondo secheẽ nenei nenei sacua mbia je, i que Jesús uchimbbaaquiatu je ra. 22 Jesús que uchimbbaaquiatu ichu ñee nda. —Espíritu Turã ndu jẽje a cote, i que eichu ra. 23 —“Dios chõ jẽicuã mbutiã nguiã jẽsi co”, jenyẽ mose emo je, Dios ra ãquĩ icuã mbutiã esi cote. “Dios chõ jẽicuã mbutiã eã nguiã jẽsi co”, jenyẽ mose emo je, Dios ra ãquĩ icuã mbutiã eã esi, i que Jesús ra.

Tomás mae Jesús quera si rese

24 Tomás oreãte que Jesús nyecua mose uchimbbaaquiatu je ra. Jesús chimbbaaquiatu raque Tomás. Eata, i que Tomás je ra. 25 —Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecúa iõsa rese, “nyia” aeã nda se, i que Tomás ñee nda. 26 Jesús chimbbaaquiatu que ñumunua si domingo nongue mose ra. Tomás abe que siqui uataque rese hueẽ cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —¡Jẽya eãte jirichĩ nda jẽ! i que ee ra. 27 Ñee ngue Tomás je cote ra. —¡Sã seo jẽ! Seo iõsa rese eoco. Secúa iõsa rese abe eoco ae. “Jesús quera si eãte”

jere sichĩ nda jẽ! “Jesús que quera si ra”, ere chõ cote, i que Jesús ñee Tomás je ra. 28 —Sererecua. Nde rei sembae Dios, i que Tomás Jesús icua cote ra. 29 Jesús que ñee Tomás je ra. —Nde mae mose serese, aque mose chõ seicuachĩ. Mae eã mose serese chõ ngue emo ndiqui seicua ra. Ñquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguiã jẽje

30 Jesús que mbia mae sayã saã saã tuchi uchimbbaaquiatu je ra. Ñquĩ ambesa ja eã nguia a. 31 Ñ nguia ambesa ja quia a. Jẽ Jesús icua sacua. —Jesús rei Cristo. Jesús rei Dios rucucha, jenyẽ nda chã. Ñquĩ icua mose ra jẽingo bei.

21

Jesús nyecua siete uchimbbaaquiatu je

1 Aquere que Jesús nyecua si uchimbbaaquiatu je ra. Ama nimia ndese que eñi nda. Tiberias, i que aque ama ndisa je ra. Eĩ ngue Jesús uã nyecua ee ra. 2 Echimbbaaquiatu que chi nyiese ra. Simón Pedro. Tomás ndese. Ae je eriqui “Eata” i. Natanael ndese. Caná de Galilea jenda rei Natanael. Zebedeo ririĩ abe que chi ra. Echimbbaaquiatu nongue abe que chi nyeremo no nda. 3 —Taso rã sira rea, i que Simón Pedro ra. —Ure abe ra ureso nderese, i que eataque ee ra. Nyoi ja rei que sira rea ra. Nyui ja que echoi canoa ye ra. Sira que embua mbua eãte aque isa ra.

4 Jesús que chĩ erimia ndese echimbbaaquiatu je ra. Jesús eã eriqui rei nguiã ee. 5 —¿Sira mo jembua re, Áquẽ? i que Jesús ñee mombo ee ra. —Tei, i que echimbbaaquiatu ee ra. Jesús icua rocoĩ. 6 —Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda.

Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra. ⁷ Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huiirao mingue asi oso ii ra. Jesús rea. Sira mbua mbua nonde quia huiirao mbui nguiã nyii. ⁸ Isho tuchiã ngue ama nimia nda. Cien metros chõ ngue ra. Pedro ataque que canoa querao ama nimia ndichã nda. Sira mbua mbuasa que ecuruchoi quia mbutiriri sira resebe ra.

⁹ Nguichi que canoa si ibi rĩ cote ra. I que tata u ee ra. Sira mii ngue chi tata rĩ ee ra. Mbichae abe que chi ra. ¹⁰ —Sira mo jendu rã. Ae jembua ramo, i que Jesús uchimbaaquiatsu je ra. ¹¹ Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebe. Sira mbua mbuasa que soroãte enonosẽ mose ra. Sira cuasu achõte raque. Sira 153 raque. ¹² —Jenyu quiaru cote, i que Jesús ee ra. —¿Aba nde re? i ãte que emo ñee ireĩ nguiã ee ra. Mbia que Jesús icua jate ra. ¹³ Jesús que oso tátaa cote ra. Mbichae que esirõ nda. Mbuchao chao que uchimbaaquiatsu je ra. Sira abe que embuchao chao ee ra. ¹⁴ Jesús que mano nyii ra. Quera si que ra. Nye-cua nyecua que uchimbaaquiatsu je cote ra. Co rei tercera vez co.

Jesús ñee Pedro je

¹⁵ Quiaru jare que Jesús ñee Simón Pedro je ra. Jonas ndiirĩ ndei Simón Pedro. —Simón, ¿erechesequa tuchi quia serese ã si re? i que Jesús Pedro je ra. —Ae. Achesecua tuchite sequia nderese co resẽ. Seicuate se resẽ, i que Pedro ñee ee ra. —Oveja raarõsa rã eico no. Seicuasa embaaquiatsu quiatsu quia secheẽ je no, i que Jesús Pedro je ra. ¹⁶ —Simón, ¿erechesequa quia

serese re? i si que Jesús ñee Pedro je ra. Pedro que ñee ee ra. —Ae. Achesecua tuchite sequia nderese co resẽ. Seicuate se resẽ, i si que Pedro ñee ee ra. —Oveja raarõsa rã eico no. Seicuasa esaarõ turã nguia no, i que Jesús Pedro je ra. ¹⁷ —Simón, ¿erechesequa quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia co, Sererecua. Achesecua tuchite sequia nderese co resẽ, i que Pedro ñee Jesús je ra. —Oveja raarõsa rã eico no. Seicuasa esaarõ turã nguia no. ¹⁸ Tacheẽ nyecua ndeje, Pedro. Ndeyasu mose que ereico ndeirao mingue oso ngata chooño ndesose quiti ra. Nde amei mose ra ndechiba ereira cote. Mbia ra ndecua cote. Ndeso sere ãsa quiti ra mbia nderuruchoi cote, i que Jesús Pedro je cote ra. ¹⁹ —Eĩ nda mbia Pedro iquia, i chõ Jesús re. —Eĩ nda Pedro Dios quirãcuã ndeacuquia mbia je, i chõ Jesús re. —Eico serui, i que Jesús Pedro je cote ra.

Ae uchimbaaquiatsu rese Jesús nyesequa tuchi

²⁰ Pedro que uba mae serese cote ra. Se rei Juan. Jesús nyesequa tuchi rei se. Se chõ ngue acoi hui quiaru Jesús jii aque isa resẽ. Se chõ ngue “¿Aba ra nemee mbia icuã je re?” ae Jesús je resẽ. ²¹ Pedro que mae serese cote ra. Ñee ngue Jesús je cote ra. —¿Mañi ite ra mbia quia Juan je re? i que Pedro Jesús je ra. ²² Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se i mose, manoã ndae. Eico chõ serui nde, i que Jesús Pedro je ra. ²³ —Juan nda manoã mbeichĩ nde, i que Jesús icuasa Juan nii cote ra. Jesús cheẽ abi chõchĩ. —Juan nda manoã, ire rocoĩ Jesús nyii. —Se cheẽ mose ra

manoã, i chõ ndei ngue Jesús re. —
Juan nda manoã, i ãte que Jesús ra.

Juan ñimbessa hui bei

²⁴Jesús chimbaaquiatu chõ se re.
Se chõ ã ambessa ja nguiã. Amae
jate que se quia Jesús chissã ndese
ra. Acheẽ ñooño eãte se quia ã
mbessa mbessa co. ²⁵Jesús chissã
saã tubiriãte quia ñene. Ambessa ja
aroneãte quia a. Jesús chissã saã
mbessa ja mose, eĩ ndei ra papel
mbessa ji mbia recua mbiitayã jate.
Amén.

LOS HECHOS DE LOS APOSTOLES

Espíritu Turã nda tu, i Jesús

¹⁻² Ambesa que ndeje nyii, Teófilo. Arembiirandu ja que Jesús chiao rese. Eresco mose íbii. Jesús que mbia mbaaquiatsu quiatu ereco mose íbii ra. Dios que equerao bei jiri ibate cote ra. Ũquĩ ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiatsu quiatu ra. Siqui que Espíritu Turã ndese mbia mbaaquiatsu quiatu ra. Eaquiatsu que esecha oso ibate cote ra. ³ Manonde que eru si nyecua ũquĩ je ra. Oso nonde ibate. Ngueco que eteacuquia cuquia si ee ra. Cuarenta días que eriqui nyecua nyecua bei uchi mbaaquiatsu je ra. Dios rese que eriqui embiirandu randu ra. Dios rei ererecua tuchi. Ae riĩ eriqui embiirandu randu. ⁴ Jesús oso nonde ibate que eriqui ñee ñee uchimbaaquiatsu je ra. —jĕsochĩ nda sucha tubiriã si jĕ! jĕsochĩ nda Jerusalén si jĕ! jPaba cheẽ nguire jengu Espíritu Turã ndaarõ aa jĕ! “Espíritu Turã tamondo jĕje”, i que Paba jĕje ra. Aque riĩ ngue acheẽ jĕje nyii resẽ, i que Jesús ee ra. ⁵ —I je que Juan bautizar i mbia je ra. Namu jiri ra Espíritu Turã ndu. Ae ra ique jeñiangui re. Eĩ nda Espíritu Turã bautizar i jĕje. I je eã cote. Espíritu Turã nda ique chõ jeñiangui re cote, i que Jesús uchimbaaquiatsu je ra.

Jesús oso ibate

⁶ Emo mose que Jesús chimbaaquiatsu ñee ee ra. Jesús oso nonde ibate. —¿Manose ra urererecua ishonda erembutiã ure si re? Israel jenda rei ure. ¿Namu nda ure mo erembi urererecuarã

nde? i que mbia Jesús je ra. ⁷ Jesús que ñee ee ra. —Manose chõ ndae. Paba mii eicua. Mbia eicuayã. Jĕ nguia jĕicuayãte nguia no. Manosete chõ ndae. ⁸ jCo rese chõ jendua jĕ! Espíritu Turã nda tu jĕje cote. Ae ra jembuquirãcuã. Ae ra jembucheẽ ñee serĩ. Jĕ nda jĕingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia mangu chooñoa jenda ja je abe no. Ũquĩ ja je jĕingo serenei nenei, i que Jesús ra. ⁹ Ñeende que Jesús si ibate cote ra. Uchimbaaquiatsu resa rae que esi erecha ra. Ibeishĩ ngue embuchecuayã cote ra. ¹⁰ Echimbaaquiatsu que soboiba bei u mae ibei rese ra. Ibei rese mae mose que mbia nyeremo ngaẽ erea ra. Ibate si. Huee que echi ra. Eiraoshĩ tuchi que ngaẽ ejii ra. ¹¹ Ibatenda que ñee ee ra. —Galilea jenda, ¿mbaerã jengu beite mae ibei rese a re? Jesús oso quia ibate nae, ae si ra tube no. Jemaẽ ngue u eso rese nae, eĩ si ra u íbii no, i que ibatenda ee ra.

Dios que Matías irabo ra

¹² Jesús chimbaaquiatsu que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi. ¹³ Ngasẽ ngue Jerusalén nda. Nyoĩ que uchuchúaa cote ra. Ñ ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo riirĩ. Jacobo, i ee. Simón el Cananista. Judas. Jacobo riirĩ ndei Judas. ¹⁴ Ũquĩ ja que ñumunua mbei bei quia ñee ñee Dios je ra. Ari abe no. Acuani abe no. María abe no. Jesús si rei María. Jesús nongue abe no. Ũquĩ ja que ñumunua mbei bei quia ñee ñee Dios je ra.

¹⁵ Emo jiri mose que Jesús icuasa ñumunua ja ra. Ciento veinte que ra. Pedro que uã ñee ee ra. ¹⁶—Seandu rã se, Seresenda. ¡Sã embesa ji ñee ñooño eã ño jê! Cose que Espíritu Turã ñee Judas rĩ nda. David que embesa Espíritu Turã ñee nguire ra. Judas rĩ. Judas rei Jesús reacuquiasa mbia icuã je. Jesús rerao nonde iquia. ¹⁷ Jesús que Judas irabo rei nyii ra. Nandere-sendacuã. Nyebe rei Judas nandere-senda nyii. ¹⁸ Judas que mbae isiquia isi icuã nda. Mbae isiquia je que ibi mo isi ra. Hue ereco mose que mano nda. Ibate si eru ngoi mano. Uãquĩ nguiti que eru ngoi ra. Erie que oo ra. Echĩque mburiri. ¹⁹ Jerusalén jenda que jirandu ja erese ra. Acéldama, i que hue ibi je cote ra. Mbia ruqui rua, i chõ nguiã hue je. Ecoisa ibi je. ²⁰ ¡Ñi embesa ji Salmos nde:

Sã echuchua oreã mbei.

Sã mbia mo ndiquiã mbei equi re.

Sã eriquicharomba riqui Dios cheẽ nenei nenei cote,

i que embesa ji Judas rĩ nda. ²¹ Emo nandeirabo Judas riquicharõ. Mbia chi bei quia nanderese nae. Jesús nandembaaquiatu quiatu bei mose. ²² Juan mbia mbiirandu randu mosenda bei. Dios Jesús querao chee quia ibate. Ae siquĩ beite quia nanderese nae, ũquĩ mo nandeirabo nanderesendacuã. Jesús quera rese mbia mbiirandu randu sacuã, Judas riquicharõ, i que Pedro ñee ee ra. ²³ Mbia nyeremo ngue etea cote ra. José Justo, i emo je. Barsabás, i abe ee no. Matías, i enongue je. ²⁴ Jesús chimbaaquiatu que ñee Dios je cote ra. —Ürererecua, aba chiã ereicuate quia co. Ñ nyeremo ndiquiã. ¿Aba ndechiirabo re? ¿Aba ereirabo urembirõ sacuã nde? ²⁵ ¿Aba eretea ndechimbaaquiatubirã nde? ¿Aba

eretea Judas riquicharõ nde? Ae hui quia ndecheẽ si. Ae oso quiachã ndesi cote. ¿Aba eretea eriquicharõ nde? i que Dios je ra. ²⁶ Sita que embaba mbaba o ye cote ra. —¿Aba Dios chiirabo re? i ñene. Eĩ ngue Matías irabo ra. Dios que Matías mingo Jesús chimbaaquiatu rese cote ra. Mbia once mbirõ. Docerã. Doce que Jesús chimbaaquiatu cote ra.

2

Espíritu Turã tu Jesús icuasa je

¹ Fiesta de Pentecostés mose que Jesús icuasa chi ja ñumunua nda. Hue mĩ ngue echĩ ja ñumunua nda. ² Ibei rieu que embuate ra. Ama ndieu raanguia. Tuchua mbieu tuchi Jesús icuasa je. ³ Tata rendi raanguia que tu nguichi eãquĩ ndes e ra. Jesús icuasa ãquĩ ja rese. ⁴ Espíritu Turã ngue ique tuchi hue jenda chiangui re ra. Ique ja que Jesús icuasa chiangui re ra. Mbia que echeẽ ata mo saã saã cote ra. Echeẽ uchianuã ngue esaã saã nda. Espíritu Turã nguia rei embucheẽ echeemo. Mbia cheẽ mbuae jaaja que cote ra.

⁵ Aque mose que judíos tubiriã nyi Jerusalén nda. Ishonda tubiriã nyi huee. Mangué chooñoa jenda ja chõ chi nguia huee. Ũquĩ ndei Dios cheẽ mumbasa reã judíos ataque rã si. ⁶ Ibei rieu andu mose que ũquĩ ngaẽ uchã nda. Nyuruira tuchi eandu. Jesús resenda mbia cheẽ mbuae saã saã ja chõchĩ nguia u. Espíritu Turã ño ngue embucheẽ nguia. Mbiamo ñee icuasa reã ndaque. Mbia que ucheẽ ñandu ñandu ja u ra. Jesús icuasa ñee mose. Nyebe que mbia chi nguia nyuruira eandu. ⁷ Mbia nyuruira ja eandu. —¿Mañi equia mbiamo ñee icua ja re? Galilea jenda achõ ño ndaque ã, i tuchi que mbia u nyuruira eandu ra. ⁸⁻¹¹ —¿Mañi equia nande ja cheẽ naa naa ã nde?

Nandechē Jesús icuasa saã jaaja chõchĩ nguiã ã. Partia jenda cheẽ esaã saã ñochĩ nguiã ã. Media jenda cheẽ abe no. Elam jenda cheẽ abe no. Mesopotami a jenda cheẽ abe no. Judea jenda cheẽ abe no. Capadocia jenda cheẽ abe no. Ponto jenda cheẽ abe no. Asia jenda cheẽ abe no. Frigia jenda cheẽ abe no. Panfilia jenda cheẽ abe no. Egipto jenda cheẽ abe no. Libia jenda cheẽ abe no. (Cirene ndobei.) Roma jenda cheẽ abe no. (Roma jenda mo ndei judíos. Roma jenda ataque rei judíos eã.) Creta jenda cheẽ abe no. Arabia jenda cheẽ abe no. Jesús icuasa ũquĩ ñee saã saã ja chõchĩ nguiã ã. Nandechē esaã saã ja chõchĩ nguiã ã. Jesús icuasa riquichĩ nandechē naa naa tuchi Dios chiao turã nenei nenei ã, i ja que mbia ucheẽ andu jaaja mose. ¹² I jate que mbia u nyuruira eandu ra. Ndua ndua tuchi que u eandu ra. —Mañi equia ñee ã nde, i nyue. Jesús icuasa mbia cheẽ mbuae naa naa mose. ¹³ Emo emo ngue ñee icuã icuã Jesús icuasa je ra. —Quiacua chõ eriqui nguiã ã, i raque Jesús icuasa rĩ.

Pedro ñee mbia je

¹⁴ Pedro que uã ñee mbia je cote ra. Nguesenda once rese que echĩ uã ñee mbia je ra. Tasẽ jiri ñee ee. —¡Seandu ja u jẽ! Tacheẽ jẽje, Jerusalén jenda. Judea jenda abe no. ¹⁵ ¿Quiacua reĩ Jesús icuasa riqui jẽje re? Quiacua eã ño ñene. Tenda que nyui ramote resẽ. Mbia quiacuasa eã ño huee tenda resẽ. ¹⁶ ã nñi ngue Joel embesa mbesa cose ra. Dios cheẽ mbuchecua que embesa ã nñi nda. Eĩ ngue embesa ra:

¹⁷ “Mbae ua jiri mos e ra Espíritu Turã amondo mbia ja je”, i que Dios ra.
“Jendiirĩ nda secheẽ mbuchecua mbia je.
Acuanindu ra serea rea tuchi cuu.

Amei abe ra serea rea cuu no.

¹⁸ Aque mose ra Espíritu Turã amondo serimba ja je.
Serimba ra secheẽ mbuchecua checua mbia je.

¹⁹ Mbia mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

²⁰ Mbia rerecua tu nonde ra tenda ñimoo.

Eruqui rã nda nyasi mbia rerecua tu nonde”, i que Dios ra.

²¹ “Ndeya eã ño serese, Sererecua”, i mose emo ñee Dios je, aque ra Dios sirõ eicuã si,

i que Joel embesa ra. ²² Israel

jenda, ¡seandu rã! Nazaret jenda

riĩ aico ñee ñee jẽje a. Jesús riĩ.

Dios que Jesús mbuquiracuã tuchi

ra. Nyebe que Jesús mbia mae

sayã saã saã nda. Ũquĩ ndese que

jemae nda. ²³ “Mbia icuã nda seri-

irĩ iquia”, i que Dios Jesús mano

nonde ra. Jẽ nguia Jesús jẽiquia

tuchi nguiã cote. Jẽ nguia jemee

nguiã mbia icuã je. Eiquia nonde.

Dios rane ngue jirandu Jesús rese

ra. “Mbia icuã nda Jesús iquia”, i

que Dios quia nyii ra. ²⁴ Dios que

Jesús mbuquera si ra. Jesús mano

mbei aroneãte. ²⁵ David que Jesús

cheẽ senei cose ra. ã ngue ñee nda:

Sererecua riqui sembei eã mbei co.

Eriqui bei serese co.

Mbae riqui sembusiquiche

aroneãte co.

²⁶ Nyebe seya tuchite riqui co.

Nyebe aico ñee turãte Dios riĩ co.

Semano mose abe ra Dios hui eã

mbei sesi.

²⁷ Seaingue ra eresechayã semana

mose, Sererecua.

Serete abe ra erembuquera si

mingo.

Ndechesequate aico co.

²⁸ Semingosa tuchi rei nde.

Sereco mose nderese ra seya tuchi,

i que David Jesús cheẽ nenei cose

ra.

²⁹ Tacheẽ nyecua jẽje, Seresenda.

Nanderu David que mano cose

resê. Mbia que echati resê. Eatisa nandeicua ja quia co resê. ³⁰ David rei Dios cheê mbuchecuaa. Dios que ñee ee ra. “Nderiiri mo nda Cristo. Ae ra mbia rerecuarã tuchi. Nderiquicharõ nda mbia rerecuabi tuchi”, i que Dios David je cose ra. “Dios ñee ñooñoa tuchi chõ nguiã”, i que David ra. ³¹ David que Dios cheê icuate quia ra. Nyebe que ñee Jesús rĩ nda. “Seaingue ra eresechayã semana mose. Serete ra erembuquera si mingo”, nyebe David i nguiã Jesús rĩ. ³² Dios que Jesús mbuquera si ra. Ûquĩ ureicua ja quia ã. Nyebe ureico nguiã jembiiirandu randu ùquĩ ndese ã. ³³ Dios que Jesús querao ibate nyiese ra. Dios jii eriqui pee cote. Dios que Espíritu Turã mee Jesús je cote ra. Ucheê nguire que emee ee ra. Jesús riqui Espíritu Turã mondo ure je co. ã Espíritu Turã nyisaã jeñandu ñandu quia ã. Espíritu Turã ndiqui ã mbucheê mbia mo ñee ã. ³⁴⁻³⁵ David osoã ibate aque mose. Jesús rĩ ngue David embesa ra. ã ngue embesa ra:

Dios que ñee sererecua je ra. “Ecoi sejii. Nde abe ra ererecua serese.

Ae ndeucuayãte quia nae, ùquĩ je ra ndequirãcuã ateacuquia tuchi.

Ndequirãcuã tuchi ra ùquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheê andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiatsu ja je. ³⁸ Pedro que echeê sibishorõ nda. —¿Jẽicuã si jẽhui rã jẽ! Sã bautizar ure jẽje

Jesucristo rĩ. Dios jẽicuã mbutiã sacua. Aquere ra Dios Espíritu Turã mondo jẽje. ³⁹ “Espíritu Turã nda amondo jẽje. Jendiiri je abe ra amondo. Ishonda je abe ra amondo. Sechiirabo ja je ra Espíritu Turã amondo”, i que Dios ñee nande je ra, i que Pedro Dios cheê nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. — Mbia icuã achõte eriqui ibi jenda ã. Quiachã ja equia Dios si ã. Ûquĩ si jẽhui chõ. Jẽ abe jẽquiachãyã sacua Dios si, i que Pedro mbia mbaaquiatsu ra. ⁴¹ —¡Ae beite jẽ! i que mbia tubiriã Pedro cheê andu ra. Ûquĩ j e que bautizar i ra. Aque mose que mbia tres mil Jesús isi ra. ⁴² Ûquĩ abe que ñumunua nua nguia Jesús quiato ataque rese ra. Jesús chimbaaquiatsu ñee ñee mose mbia je. Ñumunua nua ñee Dios je. Eturã mbei que eriqui nyue ra. Mbichae que eu quia ndua ndua Jesús rese ra.

Jesús icuasa siqui turã nyue

⁴³ Mbia que siquiche ja Dios si ra. Jesús chimbaaquiatsu que Dios mbuquirãcuã nda. Nyebe mbia mae sayã naa naa tuchi nguiã. ⁴⁴ Jesús icuasa que ñumunua nua mbei quia ra. Abei tuchi que eriqui nyue ra. ⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã je cote ra. ⁴⁶ Ñumunua nua mbei que equia Dios chuchúaa ra. Quiaru quiaru que equia nyiese uchuchúaa ra. Dios rĩ ngue eriqui ñee turã turã nyue ra. Eya tuchi que eriqui Dios rese ra. ⁴⁷ Dios rĩ ngue eriqui ñee turã turã nda. Mbia ataque que ñee turã turã nguia Jesús icuasa rĩ nda. Jesús icuasa que Dios mbeta mbeta bei quia ra.

3

Ecuatayã mbucherõ

¹ Emo mose que Pedro nyoĩ quia Dios chuchúaa ra. Juan ndese. Tenda nyeseco mose. Hue tenda bei que mbia riqui ñee ñee Dios je ra. ² Huee que ameĩ mo ngatayã ndiqui bei huee ra. Echaacuquia mosenda bei eiquieĩ icuã. Mbía que ecuruchoĩ choĩ bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã mui mui mbei eiquesa jii ra. Ache ache i sacuã mbia ique mose Dios chuchúaa. ³ Dios chuchúaa nda Pedro ique nguĩ Juan ndese chã. Ecuatayã ngue mae erese ache i ee ra. ⁴ Pedro que nguesa mbui reã mae erese ra. Juan abe. —¡Ure rese emae jê! i ecuatayã je. ⁵ Eandu mose que mae erese ra. —Mbae mo nda emee seje reae, i mae nguiatu erese. ⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucuata. Ehuã na ngata. Nazaret jenda quirãcuã nembucherõ na, i que Pedro ee ra. ⁷ Pedro que eo isi ra. Mua ngue eo rese ra. Aque mosebe que ei nyerõ nda. Eiquieĩ abe nyerõ eo isi rui. ⁸ Ecuatayã ngue juã asi cote ra. Ngata cuata que ra. Ique Dios chuchúaa ùquĩ ndese. Eya tuchi que ra. Oo oo tuchi que ra. Iaanye, i tuchi que equia Dios je ra. ⁹ Mbía que mae ja u ecuatayã ngata rese ra. Ñee turã mose Dios je que mbia nyisaquia u echeẽ ndese ra. ¹⁰ Mbía que nyurui ra u mae erese ra. Mbía que eicua ja ra. —Ecuatayã ño aque re. Ache ache i beite que equia Dios chuchúaa, ae chõ co re, i que mbia nyurui ra tuchi mae erese ra.

Pedro ñee oco judíos je

¹¹ Embucherõ ji que Pedro chiba isi isi quia ra. Juan chiba abe no. Mbía que ngaẽ ucha mae erese ra. Nyurui ra erea. Portal de Salomón, i eiquesa je. Huee que echĩ ra.

¹² Pedro que mae mbia chumunua ndese ra. Ñee ngue ee ra. —¿Mbaerã jẽingo nyuruirate mae erese re, Israel jenda? ¿Mbaerã jẽingo nyuruirate mae urerese re? Ure ae eã ño Ecuatayã urembucherõ nguĩã. Urequirãcuã eã Ecuatayã mbucuata nguĩã. Dios quiarei uquiracuã mee ee embucherõ. Urecuata turã embucherõ eã nguĩã. ¹³ Dios rei nanderu rerecua bei. Abraham. Isaac. Jacob. Ûquĩ nderecua bei Dios. Dios ñee turã mbei ngui-irĩ nui. Jesús rui. Ae que jemee icuã mbia je eiquia sacuã nda. “Jesús tambui”, i mose Pilato, ùquĩ mose que jẽisi quiatu quiatu chõchĩ nguĩã. ¹⁴ “Embui”, jenyẽ eã ñochĩ ngue Jesús turã nui nde. “Embui”, jenyẽ chõchĩ ngue mbia iquiasa rui nde. ¹⁵ Eĩ jenyẽ chõchĩ ngue mbia mingosa iquia nguĩã. Dios que embuquera si ra. Equera si rese que uremae nda. ã ureico mbia mbiirandu randu equera rese ã. ¹⁶ ã jengu mae Ecuatayã ndese ã. Jẽ Ecuatayã jẽicuate resẽ. Jendesa rae que Dios embucherõ nda. Ure Jesús ureicuate quia ã. Nyebe Ecuatayã mbuquirãcuã nguĩã.

¹⁷ Jẽaquiatuã ño Jesús jẽiquia nguĩã, Seresenda. Jenderecua aquiatuã ño Jesús iquia nguĩã no. ¹⁸ Dios quia que ucheẽ mbuchecuasa mbuchee cose ra. Cristo rui embuchee. “Mbía icuã nda Cristo je. Cristo mbasi mbasi rae”, i que embuchecuasa cose ra. Ûquĩ ñee nguire quia Cristo mbasi mbasi nguĩã cote. ¹⁹ jẽicuã si jẽhui chõ jê! Jemba rã Dios icha cuti. Dios jẽicuã mbutiã sacuã. Eĩ jenyẽ mose ra Dios jembiate cote. ²⁰ Dios ra Jesucristo mbuquichi imbu cote. Ae que emui jenderecua rã cos e ra. ²¹ Namo ño nda Jesús riquichõ ibate. Dios mbae mbitirõ ja mose ra eru cote. Eĩ ngue Dios cheẽ mbuchecuasa ñiinda ñee nda. ²² Nyebe Moisés

ñee nguiã nanderu cose ndare je. “Dios ra nanderesenda mo isi. Dios cheẽ mbuchecua sacua. ¡Ae cheẽ nda jemumba jirichĩ jẽ! 23 Echeẽ mumbasa ra Dios mbuquiachã nyesi”, i que Moisés ñee nda. 24 Dios cheẽ mbuchecuasa ja que mbia mbiirandu randu mbae riĩ nda. Ae riqui nyecua namo ã cote. Samuel nane ngue mbia mbiirandu randu ã nĩ nda. Samuel nduinda ja abe que embiirandu randu ã nĩ no nda. 25 Jẽje chõ Dios cheẽ mbuchecuasa ñee ñee nguiã. “Seturãte ra jendiirĩ ja je”, i que Dios ñee nanderu ñiinda je ra. Jẽje abe Dios ñee. Ucheẽ nda embuchebi eã. Dios que ñee Abraham je cose ra. “Nderiirĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra. 26 Dios que nguiirĩ mondo íbii cote ra. Jẽ nane je que embu ra. Jembuturã sacua. Jẽhui sacua jẽicuã si, i que Pedro judíos je ra.

4

Ererecua paama i ja Pedro je, Juan abe je

1 Sacerdotes que ngaẽ cote ra. Pedro ñee mbei mose mbia je. Juan abe ñee mose ee. Dios chuchua raarõsa abe que tu erese huee ra. Saduceos mo abe que ngaẽ erese huee ra. 2 Ûqui paama i ja Pedro je. Juan abe je. Mbia mbaaquiatsu quiatu mose chõ ngue paama i ra. —Jesús que quera si manonde ra. Eĩ nda mbia abe quera si, i que Pedro ee nyii ra. Nyebe ùqui ndiqui nguiã paama i ee. 3 Nyebe eisi suruchoi nguiã policiaa. Eresaitõ ño emingue nguiã tarõ. —Isamami nguiã nda nandechandu nguiã, i que ererecua nyue ra. 4 Mbia tubiriã Dios cheẽ ñandu erenei nenei mose. Eatate que Jesús icua ra. Jesús icuasa rei cinco mil hombres.

5 Isamami ngue mbia tubiriã ñumunua nda. Judíos rerecua que ngaẽ ñumunua huee ra. Amei abe que ngaẽ ñumunua erese ra. Embesasa abe que ngaẽ ñumunua erese no nda. Ûqui ja que ñumunua Jerusalén nda. 6 Anás abe que chĩ erese ra. Ae rei sacerdote rerecua. Caifás abe que chĩ erese ra. Juan abe no. Alejandro abe no. Sacerdotes nducucha ja que chĩ ñimbaacua ra. 7 Pedro que emi mbia ite re ra. Juan ndese. Mbia ñee ee cote. —¿Aba jembirãcuã nde? ¿Aba jembirãcuã nguiã ecuatayã mbucuata nonde re? i que ee ra. 8 Espíritu Turã ngue Pedro mbucheẽ cote ra. —Tacheẽ jẽje, mbia rerecua. Tacheẽ jẽ abe je, Amei. 9 “Ecuatayã ndese urembiirandu rã”, jenyẽ chõ nguiã ure je ã. “¿Aba jembirãcuã ecuatayã mbucherõ nonde re?” jenyẽ chõ nguiã ure je ã. 10 Tacheẽ nyecua jẽje. Sã mbia ureandu ja. Sã Israel jenda ureandu ja. A ecuatayã embucherõ ji riqui jendesa rae a. Jesucristo quirãcuã nguiareĩ embucherõ. Aque sí quirãcuã ño ñene. Ae jẽiquia. Ae jembucha ira rese. Ae Dios mbuquera si. Aque quirãcuã ño ñene. Nazaret jenda quirãcuã. 11 Ihuaẽ nandechirirõ na ño Jesús re. Sañi nandeico mae mae ihuae nandechirirõ ndese no. “Aque chõ ndei que eturã nda”, sañi nandeico erirõ i no. Eĩ nyee ra mbia Jesús ndiichã i no. Mbia ra eisi tuchi nguerecuarã cote. Jesús momboi isi. Eisire rocoĩ nyii. 12 Aba mo eã ndei nanderirõsa nandeicuã si. Jesús ae nanderirõ nguiã nandeicuã si. Dios aba mo abe mbu eã nguiã mbia rirõ sacua huĩcuã si. Jesús ae ñene, i que Pedro ra.

13 Mbia rerecua nyuruira Pedro cheẽ andu. —¿Mbaerã eriqui siquicheãte ñee nde? Papel ndesenda eã ndaque. Mbia ataque rã ño ndaque, i que ererecua nyue

ra. Pedro riĩ. Juan nĩ. —Jesús resenda quia eriqui reaẽ. Nyebe eriqui siquicheãte ñee nde, i nyue cote. ¹⁴ Hue que embucherõ ji riqui huee ra. Nyebe mbia rerecua ñee icuã aroneate eriĩ. ¹⁵ Ererecua ñee ja cote. —Sã Pedro choi usẽ taicuee. Juan abe no. Nandechẽ nandechue nande ae, i que ererecua nyue ra. ¹⁶ —¿Mañi nande ra Pedro je re? ¿Mañi nande ra Juan abe je re no? Pedro chimbucherõ ndese mbia riqui jirandu randu jate ã. Jerusalén jenda riqui jirandu randu jate ã no. “Mbucheroã ngue ra”, nande aroneate. ¹⁷ Nandembusiquiche rã no. Ñee ñee siã nda equia Jesús riĩ ña. Mbia nda jiranua nguia mámbi chã. Jesús rese chã. “¡Jesús cheẽ nda jēsenei senei sichĩ jê!” nande rã ee, i que ererecua nyue ra. ¹⁸ —Jenyu, i Pedro je cote. Juan abe je. —¡Mbia ra jembaaquiatuchi Jesús riĩ jê! ¡Jesús ra jēsenei seneichiĩ mbia mo je jê! i rei que ee ra. ¹⁹ Pedro que echeẽ sibishorõ nda. Juan ndese. —¿Aba cheẽ nguia ra aba mumbayã nguia re? ¿Jeñee nguiau ra aba mumbayã nguia re? Dios cheẽ aba mumba aroneate. ¿I jêje re? ²⁰ ¿Mañi nda aba umaesa reneĩ nde? ¿Mañi nda aba uchiandu abe reneĩ ne no? i que Pedro ee ra. Juan abe. ²¹ Ererecua ñee icuã Pedro je. Juan abe je. —Nandembusiquiche nandechesi, i raque. Hui chõ ngue esi cote ra. Embasiã mondo cote. Ererecua ireĩte mbia tubiriã si. Nyebe eiruã nuã eã nguĩã. Pedro ecuatayã mbucherõ mose mbia ñee turã turã ño nguia Dios riĩ neaẽ. Nyebe ererecua ireĩte riqui nguĩã esi. ²² Ae Dios mbucherõ nae, aque amei. Cuarenta años que ae ra.

Urembusiquicheã, i equiato Dios je

²³ Mbia rerecua hui ja Pedro si. Juan abe si. Nyoĩ nguesenda mbi-

irandu ja mbia rerecua cheẽ ndese. Amei ñee ndese. Sacerdotes cheẽ ndese. Nguesenda mbiirandu ja. ²⁴ Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosa. Ibei aosa. Ibi aosa. Ama abe aosa no. ²⁵ Sã David erembucheẽ nderimba cose no. Sã eĩ erembucheẽ no:

¿Mbaerã ño mbia pare pare i ja re?

¿Mbaerã mbia riqui ndua ndua chõõñote mbae mo ndese re?

²⁶ Ibi jenda rerecua ja rei eicuã Dios je.

Mbia rerecua ja ñumunua icuã Dios je.

Ñumunua icuã ja eriirĩ abe je no. Cristo je,

sã David i cose no. ²⁷ Eĩ si tuchi mbia rerecua quia ñumunua icuã Jesús je co. Nderiirĩ turã je co. Herodes. Poncio Pilato. Judíos. Judíos eã abe no. Uquĩ ja que siqui icuã icuã nguia Jesús je ra. Ndechiirabo raque Jesús. ²⁸ Eĩ ere que ñee cose, eĩ si eicuã nguia ã namo. ²⁹ Echiisaquia echeẽ icuã ndese, Urererecua. Nandembusiquiche, i tuchi equia ure riĩ ã. Urembusiquicheã na, Urererecua. Urembusiquicheã ndechẽ nenei nenei sacuã. ³⁰ Ndequirãcuã embu ure je. Mbia rasi mbucherõ cherõ sacuã. Mbia mae sayã naa naa sacuã. Jesús riĩ. Nderiirĩ turã nĩ, i que Pedro resenda ñee nyecha Dios je ra. ³¹ Ñeende Dios je que ibi nyere ee ra. Ñumunuásaa que ibi nyere mbia je ra. Espíritu Turã ngue ique tuchi echiangui re ra. Esiquicheãte que mbia mbiirandu randu Dios cheẽ ndese cote ra.

Jesús quiato abeichiã eã

³² Hue ri ja Jesús icuasa ndua ndua checha. Eicuasa tubiriã. Ndua ndua ja. —Sembae ae chõ co re, i eã emo umbae je. —Nandembaerã ja chõ ã nde, i umbae ja je nyue. ³³ Jesús chi mbaaquiatu que mbia mbiirandu

randu tuchi Jesús quera resera. Jesús que uquirâcuâ mee mee nguia uchimbâaquiatsu je ra. Dios que siqui tuchi ere ra. ³⁴⁻³⁵ Mbae tiã eã ngue eriqui Jesús icuasa mo je ra. Tuchuacha que vender i jaaja uchuchua je ra. Ibicha abe que vender i jaaja umbae ibi je no nda. Mbae isiquia que emee mee Jesús chimbâaquiatsu je cote ra. Jesús chimbâaquiatsu que emee mee mbae cha reã ja je cote ra. Nyebe mbae tiã eãte riqui nguia emo je. Jesús quiato mo je. ³⁶ Sã José no. Bernabé, i Jesús chimbâaquiatsu José je. Mbia mbiasa, i chõ nguia Bernabé i. Ae rei Chipre jenda. Levita mo ngue ae ra. ³⁷ Ae rei ibicha. Ibi umbae je que vender i ra. Mbae isiquia que emee Jesús chimbâaquiatsu je cote ra.

5

Ananías ñee ñooño

¹ Ananías, i que emo je ra. Safira, i que eninisi je ra. Ñquĩ ngue vender i ibi mo je ra. ² —Mbae isiquia ataque nandembuchimi nandembaerã, i nyue. Eataque que emee Jesús chimbâaquiatsu je cote ra. Eninisi abe que eicua ja ra. ³ Pedro que ñee Ananías je ra. —¿Mbaerã Satanás ndiqui ique ndechiangui re re? ¿Mbaerã erecheẽ ñooño Espíritu Turã je re? ¿Mbaerã ño mbae isiquia ataque erembuchimi nde? ¿Mbaerã ño ibi ribishoronda erembuchimi nde? ⁴ ¿Mbaerã ño ere? Ibi rei nembae vender i nonde. Mbae isiquia abe rei nembae. Mbia je rocoĩ erecheẽ ñooño chĩ nde. Dios je chõ erecheẽ ñooño nguia, i que Pedro ra. ⁵ Ananías eandu mose que esi ngoi mano nda. Eandusa que siquiche ja ra. ⁶ Acuanindu mo ngue ngaẽ eraaque uma nda. Nguruchoi que nyati ra.

⁷ Emo mose jiri que mano je ninisi ru ra. Tres horas. Jiranuãte que

ngu rese ra. ⁸ Pedro que ñee ee ra. —¿Manya rei ibi ribishoronda re? ¿Nderu ibi ribishoronda queru ja rei re? i que Pedro ee ra. —Ae. Ñquĩ ja chõ nyeresẽ, ichõ ño ngue eninisi Pedro je ra. ⁹ Pedro ñee ee cote. —¿Mbaerã ere? ¿Mbaerã jendua nduachĩ ñquĩ ndese re? Jeñee ñooño chĩ nguia Espíritu Turã je. Ae nderu curuchoi nyati nae, ñquĩ nyi nderaarõ arõ a. Eiquesa ji a. A ecuaẽ ndererao sacua a, i que Pedro ee ra. ¹⁰ Pedro cheẽ mose tuchi que esi ngoi mano nda. Ngu rã si. Pedro resa rae mano. Acuanindu que ique ja eraaque rea ra. Nguruchoi que nyati ra. Eru atiquia jii que eruruchoi nyati ra. ¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbâaquiatsu que Dios quirâcuâ teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ñquĩ je ra. Jesús icuasa que ñmunua nua ja quia eiquésaa ra. Portal de Salomón, i que eiquesa je ra. ¹³ Jesús icuasa riĩ ngue mbia ñee turã ja quia ra. Mbia ataque que siquichete ra. Nyebe ñmunua eã nguia erese. ¹⁴ Jesús icuasa tubiriãt e que cote ra. Hombres tubiriã. Mujeres abe tubiriã no. ¹⁵ Erasi abe que mbia curuchoi choi quia ñeenda jie ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucu mose ra. ¹⁶ Jerusalén ndurubinda abe que ngaẽ ngaẽ nguia ra. Erasi rurucuaẽ cuaẽ Jerusalén. Aba checuayã nyireco abe que ecurucuaẽ cuaẽ nguia ra. Dios que embucherõ cherõ ja quia ra.

Jesús quiato tarõ policiaa

¹⁷ Sacerdote rerecua que paama i ra. Saduceos mo abe que chĩ erese ra. Ñquĩ abe que paama i no nda.

¹⁸ Nyebe que Jesús chimbaaquiatsu isi icuã nda. Tarõ ngue policíaa ra. ¹⁹ Isa que ibatenda mo nguichi ee ra. Angel. Etaronda que embuquiata ra. Jesús chimbaaquiatsu que equerao itaieuee ra. Ñee nonde ee. ²⁰ —Dios chuchúaa jêso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jembiirandu randu, i que ibatenda Pedro je ra. Juan abe je. ²¹ Jesús chimbaaquiatsu eandu mose que echoi Dios chuchúaa ra. Mbia mbaaquiatsu quiatu que echoi ra. Isamamimbe cote. Isamamimbe echoi mbia mbaaquiatsu. Sacerdote rerecua que “jenyu” i mbia rerecua ja je ra. Sacerdote resenda abe. Amei je abe ñee. Ñumunua ja u nyiese. Ñee ngue policíaa raarõsa je cote ra. —Jêso policíaa. Jesús chimbaaquiatsu jendu rã ure je, i rei que ee ra. ²² Ecuasẽ mose policíaa que Jesús chimbaaquiatsu oreã ño ee ra. Ae nyebi chõ ecuaẽ nguia sacerdote rerecua mbiirandu. Ñee ee. ²³ —Puerta ãtã ngue chĩ ndei nguia ure je. Soldados ngue chĩ rei nguia itaieuee. Eraarõ ndaque. Ureequia rei ngue re. Eoreã ngue ra. Jesús chimbaaquiatsu oreãte que ure je ra, i que ra. ²⁴ Sacerdote rerecua que nyuruiira eandu ra. Dios chuchua raarõsa abe nyuruiira eandu. —¿Mañi mañite equia re? i que u ñee ñee nyue ra. ²⁵ Emo ngue tu ñee ee cote ra. —Huee que jenyitarõ nyi Dios chuchúaa ra. Mbia mbaaquiatsu quiatu, i que embiirandu ra. ²⁶ Eandu mose que Dios chuchua raarõsa nyoi erea ra. Nguesenda rese echoi erea. Curucuaẽ ja nguerecua je. Curucuaẽ turã. —Mbia tubiriã nda sita mombo mombochĩ nande je, i ñene. Nyebe eicuã eã ee.

²⁷ Jesús chimbaaquiatsu que ecurucuaẽ mbia rerecua je ra. Sacerdote rerecua que ñee ee cote ra. ²⁸ —“iMbia ra jembiirandu

randuchĩ Jesús rese jê!” ure rei que jêje. Urecheẽ jemumba chõchĩ. Jerusalén jenda ja jembiirandu randu chõchĩ nguia. “Jesús iquiasa chõ ñquĩ nde”, jjenyechĩ nda ure rĩ jê! i que sacerdote rerecua Jesús chimbaaquiatsu je ra. ²⁹ Pedro que echeẽ sibishorõ nda. Nguesenda rese echeẽ ndibishorõ. —Dios cheẽ nguia aba mumba aroneate nguia. Mbia cheẽ nguia nda aba mumba jiri nguia ña. ³⁰ Jê nguia Jesús jembucha nguia ira rese. Eiquia sacua. Dios que embuquera si ra. Nanderu rerecua que embuquera si ra. ³¹ Dios que nguiirĩ mingo mbia rerecuarã tuchi cote ra. Uji bei que emingo ra. Mbia rerecuarã. Mbia rirõ sacua eicuã si. Israel jenda mbui sacua huicuã si. Dios eicuã mbutiã sacua esi. ³² Ñquĩ ndese que uremae ja ra. Nyebe ureico nguia mbia mbiirandu randu ã. Espíritu Turã abe mae ja erese. Nyebe a e abe riqui nguia mbia mbiirandu randu co. Dios quia Espíritu Turã mee mee nguia ucheẽ mumbasa reã je, i que Pedro ra.

³³ Ererecua que paama i ja Pedro cheẽ mose ra. Nyebe eriqui nguia eiquia ja serĩte. ³⁴ Fariseo mo abe que chĩ erese ra. Gamaliel, i que ee ra. Ae abe que ererecua ra. Mbia chũcua jat e que ae ra. Mbia mbaaquiatsu quiatusa que ae ra. Dios cheẽ nenei neneisa que ae ra. Ae que juã ñee nda. —Jesús chimbaaquiatsu jemondo mbiirĩ conosẽ itaieuee, i que ra. ³⁵ Ñee ngue ererecua uataque je cote ra. —Tacheẽ jêje, Israel jenda. ¡Jendua tuchi jê! ¡Jẽocochĩ nda Jesús chimbaaquiatsu rese jê! ³⁶ ¿Teudas si jẽtesareĩ re? ¿Jendua eãte quia erese re? Teudas quiatu ucuasu saã saã nguia resẽ. Erimbarã tubiriãte chee. Cuatro cientos chee erimba. Mbia Teudas iquia chee. Teudas mano nyee. Erimba que saseĩ saseĩ ja chee. Erimba que ua ja

ra. ³⁷ Aquere que Judas abe riqui ra. Galilea jenda. Censo mose. Mbia que siqui jate erui no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda. ³⁸ Nyebe ã jêteachõ. Jesús chimbbaaquiatsu jêteachõ. Sã ae ae quia ua, Dios siquiã mose erese. ³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ¡Jesús rimba nandeteachõ ño jê! Dios quirãcuã nguia siqui rei erese. Dios je ra nandeicuã abareãte, i que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguia cote. —Jenyu, i nguia Jesús chimbbaaquiatsu je cote. Iruã nua cote. —¡Mbia je ra Jesús cheẽ jêsenei senei sichĩ core jê! i rei que ee ra. Ererecua que hui esi cote ra. ⁴¹ Jesús chimbbaaquiatsu que nyoĩ mbia rerecua recha cote ra. Eyate que nyoĩ ra. —Jesús rĩ ño ureĩruã nua nguia, i que ra. Eya tuchi chõ ngue ra. ⁴² Mbia que embbaaquiatsu quiatsu bei ra. Jesucristo rĩ mbia mbiirandu randu bei. Mbia chuchua que embuchesea sea quia mbia mbiirandu randu Jesús rĩ nda. Dios chuchúaa abe mbia mbiirandu randu.

6

Mbia siete irabo mbiambuquiaru sacua

¹ Jesús quiato tubiriãte que cote ra. Ae griego cheẽ saã nguia, ùquĩ ngue paama i ra. Ae judío cheẽ saã nguia, ùquĩ je que paama i ra. Jesús quiato ja raque. —Urerenda eru checha ja ngue jembuquiaru icuã icuã ñochĩ nguia, i que griegos judíos je ra. ² Nyebe Jesús quiato rerecua mbia munua nguia. Jesús quiato munua ja. Ñee sacua ee. —Ñ ureico Dios cheẽ nenei nenei mbei mbia je ã. Urehui aronea tuchi quiaru Dios cheẽ si. Mbia urembuquiaru quiaru aroneate. Dios

cheẽ nenei nenei ndocoĩ. ³ Nyebe Jesús quiato siete chõ jêirabo. Mbia mbuquiaru sacua. Mbia chucua siete chõ jêirabo. Hombres aracua chõ jêirabo. Espiritu Turã ndesenda tuchi chõ jêirabo. Sã ùquĩ ño mbia mbuquiaru quiaru quia. ⁴ Ure quiatsu ra urecheẽ mbei quia Dios je. Ure quiatsu ra Dios cheẽ uresenei senei mbei quia mbia je, i que Jesús quiato rerecua ra. ⁵ —Coche ñene, i jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espiritu Turã ndesenda tuchi. Felipe. Prócoro. Nicanor. Timón. Parmenas. Nocolás. Ùquĩ ja que eirabo ra. Nicolás ndei Antioquía jenda. Judío eã ngue ae ra. ⁶ Curuchoi ja que Jesús quiato rerecua je ra. Jesús quiato rerecua que o chono ñono ja ùquĩ aquĩ arõ nda. Ùquĩ siete aquĩ arõ. Ñee ngue Dios je cote ra. ⁷ Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icuã tuchi Esteban je

⁸ Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguia mbia mae sayã naa naa tuchi mbia je. ⁹ Mbia emo emo ngue paama i Esteban je cote ra. Esclavos Liberados, i que mbia chumunuasa mo je ra. Hue jenda que paama i ee ra. Cirene jenda abe no. Alejandria jenda abe no. Cilicia jenda abe no. Asia jenda abe no. Ùquĩ jate que paama i Esteban je ra. ¹⁰ Ùquĩ ngue Esteban ñee sobeishĩ aroneate quia ra. Espiritu Turã nguia Esteban mbaaracuate nguia. Espiritu Turã nguia Esteban mbuch eẽ aquiatute nguia. Nyebe ùquĩ ndiqui Esteban ñee ndibishorõ aroneate. ¹¹ Paama isa que mbae isiquia mee mbia mo je ra. Ñee ñooño nonde Esteban nii.

—Esteban ngue ñee icuâte Moisés rĩ nda. Esteban ngue ñee icuâte Dios rĩ no nda, ichõĩño nonde Esteban nĩ. ¹² Ñee ñooño je que mbia mbiicuâte Esteban je ra. Amei abe mbiicuâte Esteban je no. Embesasa abe mbiicuâte Esteban je no. Nyebe mbia Esteban isi suruchoi nguiã ererecua je. ¹³ Ñee ñooño je que ñee icuã si Esteban nĩ huee no nda. —¡Esteban ngue ñee icuã icuâte quia Dios chuchua rĩ nda jê! ¡Dios cheẽ nĩ abe que Esteban ndiqui ñee icuã icuâte ra jê! ichõĩño Esteban nĩ. ¹⁴ —¡Esteban ñee ngue urechandu ra jê! “Jesús ra Dios chuchua mbucoi. Moisés cheẽ nda Jesús mbutiã”, ¡i que Esteban nda jê! ¡que ñee ñooño ererecua je ra. ¹⁵ Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ũquĩ mose.

7

Esteban ñee mbia je

¹ Sacerdote rerecua que ñee Esteban je cote ra. —¿Mbia ñee ñooño nguia nderĩ nde? ¡Esteban je. ² Esteban ngue ñee oco ee cote ra. —Tacheẽ jêje, Sere-senda. Tacheẽ jêje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde Harán. ³ Dios que ñee Abraham je ra. “Ibi mo nguia eso. Nderecua esecha. Nderesenda abe esecha ja. Ibi mo tateacuquia ndeje. Huee eso rã. Huee quia tereico”, ¡i que Dios ee ra. ⁴ Abraham ngue oso nguecua recha ja ra. Ibi Caldea recha ja. Oso ibi mo. Harán, ¡i que hue ibi je ra. Emo mose que eru mano ee ra. Aquere que Dios Abraham ndurucuaẽ aa ra. A nandeico a. Aa que erurucuaẽ nda. ⁵ Dios que ibi mo mee eã Abraham je ra. Ibi boque ñetẽ mo mee eã tuchi ee. “Ibi

tamondo nderiirĩ mbaerã. Ndetiã mose ra amee nderiirĩ je”, ¡i que Dios ee ra. Abraham ngui-irĩ ndea eã mose qu e Dios ñee ee ra. ⁶ “Nderiirĩ nda siqui ja rei mbiamo ndese. Ndetiãmbaa. Mbiamo ndécuaa ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã”, ¡i que Dios Abraham je ra. ⁷ “Nderiirĩ mbuquiei quieisa ra ambasi mbasi. Ũquĩ mos e ra nderiirĩ cuaẽ usẽ aa. Aa ra ñee ñee turã seje aa cote”, ¡i que Dios ra. ⁸ Dios que ñee Abraham je ra. Abraham ngue Dios cheẽ ñanduchõ eã nda. Nyebe Dios circuncisión ndeacuquia Abraham je cote. Erãcoĩ ire ai o ji je chõ eriqui nguiã circuncisión, ¡i ũquĩ je. Dios cheẽ si embutesareia sacua ndei circuncisión. Nyebe Abraham circuncisión saã nguiirĩ je. Eitãquieĩ mose. Ocho días mose. Isaac, ¡i que eriirĩ je ra. Isaac cuasu mose que ae abenguiirĩ tea ra. Jacob, ¡i que eriirĩ je ra. Isaac abe que circuncisión saã nguiirĩ je no nda. Embutesareia sacua Dios cheẽ si. Jacob abe que nguiirĩ tea ecuasú mose ra. Ae abe que circuncisión saã nguiirĩ je no nda. Doce eriirĩ. Ũquĩ ndei nandei cose.

⁹ José, ¡i que Jacob riirĩ mo je ra. José nongue que paama ¡i ja José je ra. Nyebe José mee nguiã mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra. ¹⁰ Mbia icuã mose José je, huee que Dios riqui er-aarõ tuchi ra. José ia eã eãte que eriqui ra. Dios embaaracua tuchi. Nyebe mbia rerecua turãte riqui nguiã ee. Faraón, ¡i Egipto jenda rerecua je. Ererecuabi tuchi que José riqui ra. Nyebe emingo nguiã ererecuarã. Egipto jenda rerecuarã. Nyebe emingo nguiã uchuchua jenda rerecuarã. ¹¹ Emo

mose jiri que mbae tiã mbia je ra. Mbia chiurã tiã ngue Egíptoo ra. Canaán abe mbia chiurã tiã. Nandei riãcuã ja que eriqui cose ra. ¹² Quiata a mbuae que Egíptoo ra. Jacob jirandu mose que nguiirĩ mondochoi erea ra. “Nandechiurã mo jêisi rã oso”, i que emondochoi Egíptoo ra. Aque ramo tuchi que eriirĩ nyoi Egíptoo ra. Jacob ndiirĩ ndei nandei ja. ¹³ Aquere que echoi si uchiurã ndea ra. Aque mose chõ ngue José nyecua nguiã ngõngue je cote ra. Nyebe e Faraón José nongue icua nguiã cote. ¹⁴ José que ngõngue mondochoi ngu rea cote ra. Jacob, i que eru je ra. “Nanderu jendu rã. Jeninisi abe jendu rã. Jendiirĩ abe jendu rã”, i que José ee ra. Curucuaẽ ja que ra. Setenta y cinco que mbia ra. ¹⁵ Eĩ ngue Jacob oso siri Egíptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee. ¹⁶ Emo mose que mbia Jacob quiangue ruruchoi Siquem nda. Ibicua rie que eno huee ra. Ae Abraham isi ibi nyii, huee que equiangue no nda. Huee que nandei quiangue no nda. Ae ibi Abraham isi quia Hanor ndiirĩ si nae, huee que equiangue no nda.

¹⁷ “Cuatro cientos años nda nderiirĩ nyi bei Egíptoo. Aquere Ibi Canaán tamee ee”, i quia Dios Abraham je nyii reaẽ. Cuatro cientos años ua jiri mose que nandei tubiriãte cote ra. ¹⁸⁻¹⁹ Aque mose que emo Egíptoo jenda rerecua rã cote ra. Ae que jiranuã José rese ra. Nyebe ngue eriqui nguiã nandei mbiirĩ irĩ. Eicuã tuchi que eriqui nandei je ra. “Jendiirĩ itãquieĩ jêsecha chõ. Sã ae ae mano ja”, i que ererecua nandei je ra. ²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia ramo mose. Tres nyasi que esi embutiarõ nyecuayã nda. Mbia rerecua si. Eru abe siqui embutiarõ nyecuayã. Eitãquieĩ

mose. ²¹ Nguereco checuayã aroneate chee que ra. Nyebe ererecua riirĩ ngasẽ nguiã ee. Isi turã ngue ra. Mbutiarõ ngue nguiirina nda. Nyucuaaque que ererecua riirĩ nda. Ae que Moisés itãquieĩ mbutiarõ cote ra. ²² Nyebe Moisés mbaaquiatu tuchi nguiã Egíptoo jenda rã si. Earacua tuchi que ecuasú mose cote ra. I tuchi que ra.

²³ Moisés que ndua tuchi uataque rese cote ra. “Taso rã israelitas rea”, i que cuarenta años mose cote ra. ²⁴ Oso que cote ra. Egíptoo jenda mo icuã icuã mose israelita mo je que Moisés si ngasẽ nda. Moisés que esiquisã nda. Iquia que ra. Egíptoo jenda iqia que ra. ²⁵ Moisés que ñee uchiangui re ra. “Sere senda ra seisi turã. Seicuate rae. ‘Dios chimbu chõ tu nguiã co. Urerirõ sacua a si’, i ra seresenda serĩ”, i rei ngue Moisés uchiangui re re. Eresenda que eisiã ñochĩ nguiã. ²⁶ Isamami nongue que israelitas mo icuã icuã nyue ra. “Tacheẽ turã ee. I nda eturã si nyue”, i rei que Moisés ra. “¿Mbaerã jêicuã icuã ndiqui jenyue re? Nande ja chõ nyeresẽ”, i que Moisés ee cote ra. ²⁷ Ae rane eicuã icuã ndiqui nyue nae, aque que ñee icuã Moisés je ra. Moisés maña mondo. “¿Aba nemingo ererecuarã nde? Urereachõ ño ae”, i que ñee icuã Moisés je ra. ²⁸ “Ae ereiquia curi, ¿aque rã si ra seiquia re?” i que ñee icuã Moisés je ra. ²⁹ Ñ andu mose que Moisés si uchã nda. Ibimo. Madián, i que ibimo je ra. Huee que eriqui arete ra. Nguiirĩ nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rĩ nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbiirõ ngue ibatenda mo nyecua ee ra. Angel que nyecua Moisés je ra. Ira ruri rendi ite re

que nyecua ee ra. ³¹ Moisés que nyuruira tuchi erea ra. Erurubi que mae tuchi erese cote ra. Dios que ñee ee cote ra. ³² “Dios chõ se re. Ndei rerecua chõ se re. Abraham nderecua. Isaac abe rerecua no. Jacob abe rerecua no. Ñquĩ nderecua ja chõ se re”, i que Dios ra. Moisés que titi titi i ra. Siquichete que mae ndocoĩ erese ra. ³³ Dios que ñeembe ee ra. “Ndeiyao esirõ na. Seturã ño se re. Sésaa ndeiyao esirõ. ³⁴ Serimba rese aico mae mae mbeite Egíptoo co. Mbia icuã tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirõ sacuã a. Tasirõ eicuã si cote. Eso Egíptoo. Taremondo Egípto cote”, i que Dios Moisés je cote ra.

³⁵ Dios que Moisés mingo mbia rerecuarã cote ra. Mbia rirõ sacuã Egípto si. Mbae icuã si. Mbia que Moisés isi sereã nea nyii ra. “¿Aba nemingo urererecuarã nde?” i que mbia Moisé je nyii ra. Ñquĩ sí je que Dios Moisés mondo si ra. Ererecuarã. Dios que tata rendi ite renda mbucheẽ Moisés je ra. ³⁶ Moisés que mbia mae sayã saã saã nguia nandei je ra. Mbia mae sayã tubiriãte que esaã saã nguia ra. Moisés que mbia curuchoi Egípto si cote ra. Curuchoi que Ama Ireĩ ndasa ra. Moisés que mbia quereco bei turuquia rui ra. Cuarenta años. Mbia mae sayã tubi riãte que esaã saã nguia ra. ³⁷ Amei mose que Moisés ñee mbia je ra. “Dios ra jemo irabo ucheẽ mbuchecua sacuã jėje. Seraanguia si ra eirabo. ¡Aque cheẽ nda jemumbachĩ jē!” i que Moisés israelitas je ra. ³⁸ Moisés bei chõ ngue ererecua ra. Moisés bei chõ ngue nandei quereco quia turuquia rĩ ndesẽ. Ae je chõ ngue ángel ñee ndesẽ. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je

cote ra. Ibatenda cheẽ mbuchecua ee. Mbia mingosa cheẽ nenei nenei mbia je. Nandei je. ³⁹ Nandei que Moisés cheẽ ñandu sereãte quia ra. Echeẽ mumba mumba. “Nyaso rei nyebi Egípto ae”, i que equia ra. ⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egíptoo chã. Moisés tiãte ure je cote. Ae urereru Egípto si. Maranguiti chõ esi urerecha”, i que mbia Aarón je ra. ⁴¹ Nyebe que Aarón ticuasú raanguia raã ee ra. Imagen. Nandei que mbae iquia iquia ticuasú raanguia je ra. Eroo que emi ticuasú raanguia jii ra. Mendi que ee cote ra. Mbia ia tuchi que uchiao rese cote ra. ⁴² Ñquĩ icuã tuchi que Dios je ra. Nyebe Dios hui nguĩã nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ñquĩ je chõ mbia riquichĩ ñee ñee. Ñquĩ mose que Dios ucheẽ mbu cote ra. Dios cheẽ mbuchecuaa que Dios cheẽ senei senei mbia je ra. Co rei embesa ji co:

Israelitas, ¿aba je jëingo mbae roo mendi mendi cose re?

Jëingo mose turuquia cuarenta años mose.

¿Seje chõ jëingo mbae roo mendi mendi cose re?

⁴³ Tei. Seje eã ñene.

Jenyiao je chõ jëingo mbae roo mendi resẽ.

Tuchua ñetẽ jendaso raso bei chõchĩ.

Mbae aingue raanguia resebe. Moloc, i ee.

Aque je chõ jëingochĩ nguĩã ñee ñee. Seje ñee ñee ndocoĩ.

Nyasi tata je abe jëingochĩ nguĩã ñee ñee.

Nyasi tata rei Refán mbae.

Mbae raanguia jenyiao je abete que jëingo ñee ñee nda.

Nyebe ra jaemondo jembae ibi si.

Babilonia ndobei ra jaemondo. Mbia rimbarã nda jaemondo, i que Dios nandei je cose ra. ⁴⁴ Nandei que chi arete turúquiaa ra. Aque mos e que nandei riqui tuchua rurucuata bei cose ra. Mbae ire que tuchuarã cose ra. Aque tuchuaqui re que mbia riqui ndua ndua Dios rese ra. Dios que tuchua nyao uquia Moisés je ra. “¡Eĩ ere chõ eao jẽ!” i que Dios Moisés je ra. Dios cheẽ ndui si tuchi que Moisés eao ra. ⁴⁵ Moisés manonde que Josué nandei rerecua cote ra. Ae que nandei curuchoi turuquia si cote ra. Ngasẽ nonde ibi mo je. Dios chĩmee, hue ibi je que ngasẽ cote ra. Nandei que guerra saã saã hue jenda je ra. Dios que mbia momboja hue jenda ra. Aque mose que nandei riqui tuchua ruruchoi bei ra. Tuchua, i chõ nguiã mbae ire ao ji je. Aque tuchua que equereco bei quia ra. David abe mbia rerecua mose. ⁴⁶ Dios que siqui tuchi David rese ra. David que ñee ee ra. “Tuchua cuasu tasaã ndeje”, i rei ngue David Dios je re. Jacob nderecua rei Dios. ⁴⁷ David ndiirĩ nguiatu que tuchua saã Dios je ra. Salomón, i que eririĩ je ra. ⁴⁸ Mbia rã eã ndei Dios. Dios siquiã tuchi chõ nguiã tuchuaqui re. Mbia chiaoqui re. Dios cheẽ mbuchecuaa que Dios cheẽ saã nda:

⁴⁹ Se quia ererecua tuchi re. Ibatenda rerecua abe rei se. Ibi jenda rerecua abe rei se no. ¿Mañi nda mbia sechucharã ao re?

Equi re ra aicoã ndesẽ.

⁵⁰ Se quiatu que mbae achao ja resẽ,

i que Dios nandei je ra. ⁵¹ Jeñia icuã ñochĩ. Jẽisayã ñochĩ. Espíritu Turã jẽisiteã teã ñochĩ. Jendu rã si chõ Espíritu Turã jẽisiteã teã ñochĩ. ⁵² Jendu icuã bei que eriqui Dios cheẽ mbuchecuaa ja je ra. Jendu

que Dios cheẽ mbuchecuaa iquia iquia bei quia ra. Ibatenda Turã nda tu, ae i quia cose nae, ñquĩ abe que jendu iquia iquia quia cose resẽ. Ibatenda Turã tu mose que jemee ñochĩ nguiã mbia icuã je ra. Eiquia nonde que jemee ñochĩ nguiã mbia icuã je. ⁵³ Dios que ángeles mbu rei jẽje ra. Ucheẽ nderu raque jẽje. Jẽ echeẽ mumbayã sacua. Echeẽ ngue jemumba mumba bei chõchĩ nguiã, i que Esteban ñee oco tuchi ee ra.

Mbia Esteban iquia sita je

⁵⁴ Eandusa que paama i tuchi Esteban je ra. Esteban i quia serĩ. ⁵⁵ Espíritu Turã ngue siqui tuchi Esteban ndese ra. Esteban ngue mae tuchi ibei rese mbia paama i mose ee ra. Dios Turã ndese que mae ibate ra. Jesús rese abe que mae nda. Jesús que chĩ juã Dios ji ee ra. ⁵⁶ Esteban ngue ñee nda. —Jemae jẽ. Ibei nyiequia rese aĩ mae a. Huee mbia rucucha ñi juã Dios ji huee. Huee Jesús ñi juã Dios ji huee, i que Esteban nda. ⁵⁷ Mbia que tasẽ tasẽ tuchi paama i ra. Huisacua que emitao ja Esteban ñee si ra. —Nandecua recua erese, i que o oe Esteban ndese ra. ⁵⁸ Mbia que Esteban curuchoi sucha tubiriã si ra. Huee que sita mombo mombo erese ra. Sita mombo mombosa que huiirao mbui mbui acuanindu mo je ra. —Esaarõ, i que ee ra. Saulo, i que eieirao raarõsa je ra. ⁵⁹ Mbia que sita mombo mombo Esteban ndese ra. Sita mombo mombo mose que Esteban ñee Ibatenda je ra. —Aque aso quia ndeje aque, Serererecua Jesús. Seisi cote, i que Esteban Ibatenda je ra. ⁶⁰ Ngoi que nguiã ndese cote ra. Tasẽ tasẽte que ñee mombo mombo ra. —Serererecua, ã icuã ndaque seje. ¡Erembasi mbasichĩ nda huiicua ñi jẽ! i que Esteban Jesús je ra. Esteban ngue mano cote ra.

8

Saulo icuã Jesús quiato je

¹—Coche rei mano, i que Saulo Esteban mano mose ra. Aque mose tuchi que mbia icuã icuã tuchi Jesús quiato je cote ra. Jerusalén jenda. Jesús quiato que nyoija ñimbuchao Judea rĩ nda. Samaria rĩ abe que echoi ñimbuchao ra. Jesús chimbaaquiatu achõ ngue chichõ Jerusalén nda. ²Mbia turã mo ngue Esteban nyati ra. Nyeseo tuchi que eati mose ra. ³Saulo icuã tuchi que eriqui Jesús quiato je ra. —Jesús quiato tambutiã, i tuchi que Saulo quia ra. Nyebe eriqui nguã mbia chuchua mbuchesea seate. Jesús quiato rea rea ererao sacua tarõ policiaa. Saulo icuã tuchi que eriqui Jesús quiato je ra.

Samaria jenda Dios cheẽ ñandu

⁴Ae uchã nyoija quia Jerusalén si nae, ùquĩ ngue nyoija mbia mbiirandu tuchi quia Jesús rĩ nda. Mbia recua ja que eriqui nyoija mbia mbiirandu randu Jesús rĩ nda. ⁵Felipe que oso Samáriaa ra. Sucha tubiriã mo. Huee que eriqui mbia mbiirandu randu Jesús rĩ no nda. ⁶Dios que Felipe mbuquirãcuã nda. Mbia mae sayã ngue esaã saã nda. Mbia tubiriã ngue nyiisaquia tuchi quia echeẽ ndese ra. ⁷Aba checuayã icuã ngue Felipe jea jea tuchi mbia si ra. Aba checuayã icuã ngue tasẽ tasẽ nguia hui mose mbia si ra. Felipe que mbia cuatayã mbucuata ja quia ra. Mbia umi sayã abe que embucherõ cherõ nguia ra. ⁸Nyebe hue jenda ia tuchi sucha tubiriã jenda.

⁹Huee sucha tubiriã ngue Simón ndiqui ra. Brujo que ae nyii ra. Ae que mbia mbĩrĩ irĩ tuchi quia nyii ra. Mbia Samaria jenda chiicua tuchi que ae ra. ¹⁰Mbia que nyiisaquia tuchi quia Simón ñee ndese cose ra. Mbia riirĩ abe que nyiisaquia quia echeẽ ndese ra. —Dios embuquirãcuã tuchi quia

co, i rei que mbia Simón nĩ nda. ¹¹Simón ngue mbia mbĩrĩ irĩ tuchi quia brujería je ra. Nyebe que mbia riqui nyiisaquia tuchi eres e nyii ra. ¹²Huee que Felipe Jesús renei nenei tuchi cote ra. —Dios ra mbia rerecuarã tuchi, i que Felipe quia hue jenda je ra. Ûquĩ mose que mbia Jesús icua icua tuchi ra. Bautizar i que mbia atate je ra. ¹³Simón Brujo abe que Jesús icua cote ra. Bautizar i que ee ra. Felipe rui bei que eriqui cote ra. Felipe que mbia mae sayã saã saã nguia ra. Simón ngue nyuruira tuchi quia mae erese ra.

¹⁴—Samaria jenda riqui Dios cheẽ isi isi tuchi ã, i que mbia Jerusalén jenda mbiirandu randu ra. Nyebe que Jerusalén jenda Pedro mondochoi Samáriaa ra. Juan abe mondo. ¹⁵Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra. ¹⁶Espíritu Turã iqueã mose hue jenda chianguire que Pedro choi erea ra. Jesús rimbarã ño ngue mbia bautizar i nguia ee nyii. Espíritu Turã iqueã ño nguia echianguire re nyii reaẽ. ¹⁷Pedro que o chono Jesús quiato ãquĩ arõ nda. Juan ab e o chono earõ. Espíritu Turã ngue tu Jesús quiato je cote ra. ¹⁸Simón ngue mae erese ra. O chono mose earõ. Espíritu Turã tu mose ee. Nyebe que mbae isiquia reacuquia Pedro je ra. Juan abe je. ¹⁹Ñee ngue ee ra. —Sembaaquiatu se abe. Ndequirãcuã embu seje. Sã se abe seo tachono ñono mbia arõ. Sã se abe Espíritu Turã quirãcuã tamee mee mbia je. Mbae isiquia tamee jẽje jẽquirãcuã ndibishorõ, i rei que Simón nda. ²⁰Pedro que ñee asi ee ra. —Sã mbae isiquia nembae quiachã ja. Nde abe equiachã tuchi. ¡Dios ra uquirãcuã mee eã mbae isiquia ribishorõ jẽ! ²¹Ndeturã eã ñochĩ ndechianguire. Nyebe ra Dios uquirãcuã mee

eã ndeje. ²² ¡Ndeicuã si ehui rã jê! Echeê ñee Dios je. Sã Dios nendua icuã mbutiã ndesi. ²³ ¡Sã ndeicuã tuchi riqui ndechiangui re jê! Ndeicuã aicuate quia co, i que Pedro ee ra. ²⁴ Simón ngue ñee Pedro je cote ra. —Echeê turã Dios je serĩ. Sã Dios seicuã mbutiã. ¶ nda aquiachãya esi, i que Simón nda.

²⁵ Pedro que Dios cheê senei senei nguia ra. Juan abe esenei senei no. Aquere que echoi nyebi Jerusalén nda. Ñeend a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheê ñandu

²⁶ Angel mo ngue tu Felipe je ra. Ibate si que eru nguichi ñee ee ra. —Eso chõ turúquiaa. Eso chõ ñeenda icoĩ Jerusalén icha. Gaza icha abe, i que ibatenda Felipe je ra. ²⁷ Felipe que oso Dios cheê nguire ra. Echia o ji mo ngue esobeishĩ ñeenda cúaa ra. Etiopía jenda rei echia o ji. Ae rei ererecua resenda. Candace, i que ererecua je ra. Reina. Mbae isiquia Candace mbae que esaarõ arõ tuchi quia ee ra. Echia o ji oso quiatu quia Jerusalén nyii reaê. Oso quia equia Jerusalén ñee ñee sacua Dios je nyii reaê. ²⁸ Uba que u quia uchuchua quiti cote ra. Carro ye que eru quia cote ra. Isaías chimbesea rese que eru quia mae mae carro ye ra. Dios cheê. ²⁹ Espíritu Turã ngue ñee Felipe je ra. —Eso rã carro jii, i que ee ra. ³⁰ Felipe que oso ra. Oso que Etiopía jenda andu ra. Isaías chimbesea rese que esi quia maemae nda. Nyebe Felipe ñee ee. —¿Isaías chimbesea checuate eriqui ndeje re? i que Felipe ee ra. ³¹ —Tei. ¿Mañi ae ra eicua re? Aba mo eicuayâte seje resê. Echui rã. Eкои sejii. Sembaaquiatsu rã se, i que carro yenda ee ra. ³² ã Isaías

chimbesea rese que eriqui mae mae nda. ã ndei e ã: Nanderiquicharõsa rei oveja rã. Mbia que oveja querao eiquiásaa ra.

Mbia que ovejara nyisia sia ra.

Oveja ñee ñeeã ee.

Eĩ ngue nanderiquicharõsa ñee ñeeã huiiquia mose ra.

³³ Nanderiquicharõsa turâte raque. Mbia icuã tuchi ee. Mbia eiquiachõ.

Emosenda icuã tuchite ee.

Emosenda eiquia chee.

Nanderiquicharõsa siquĩ ibi rĩ cote,

i qu e Isaías embesa ra. Embesa ji rese que Etiopía jenda riqui mae mae nda. ³⁴ Etiopía jenda que ñee Felipe je ra. —Embesea ji embuchecua seje. ¿Aba rĩ Isaías riqui embesa mbesa re? ¿Mbiamo nĩ eriqui embesa re? ¿Ngũĩ eriqui embesa re no? i que Felipe je ra.

³⁵ Felipe que embuchecua ee ra. Mbaaquiatsu tuchi que Jesús rĩ cote ra. ³⁶ Carro que ngasẽ ama moo cote ra. —¡Co ama ñi co! ¿Aa ra bautizar ere seje re? i que Etiopía jenda Felipe je ra. ³⁷ —¿Jesús ereicua quia cote re? Jesús icua tuchi mose ra bautizar ae ndeje cote, i que Felipe ee ra. Etiopía jenda ñee ee cote. —Jesús aicuate quia co cote. Jesucristo rei Dios ndiirĩ. Aicua sequia co cote, i que ra. ³⁸ Carro que embutiba cote ra. Nguichi que esi ra. Ama ndie que echoi ra. Felipe que bautizar i ee cote ra.

³⁹ Usẽ ngue ama si cote ra. Espíritu Turã ngue Felipe querao hue si cote ra. Etiopía jenda que mae eã mbei Felipe rese cote ra. Etiopía jenda ia tuchi que oso ra. ⁴⁰ Felipe que ngasẽ Azótoo ra. Sucha tubiriã ngue embuchesea sea ra. Mbia mbiirandu randu tuchi Jesús cheê ndese. Ngasẽ nyee que Cesarea ra.

9

Saulo uba ramo Dios icha rui

¹ Saulo icuã mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecua je ra. ² — Papel embesa rã sechiraorã. Tarao Damáscoo. Judíos chumunua mose ereacuquia sacua ee. Jesús quiat o hue jenda taru taru Jerusalén. Ecuasa taru taru quia etarõ sacua policiaa. Mujeres abe taru. Hombres abe taru taru no, i rei que Saulo ñee icuã Jesús quiato rã nda. ³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra. ⁴ Saulo que ngoi oso íbii ra. Echeẽ mo ngue echandu ra. —¿Mbaerã ndeicuãte riqui seje re? i que ibatenda ñee ee ra. ⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuãte riquichĩ nguiã. Ndeicuã mose seje, nde sí chõ ereico ñimbasi co. Sã ticuasú riqui nambacua mbuti no. Sã eriqui hui mbaba ira racua echĩ no. Ñquĩ na tuchi quiarei nde, i que Jesús ee ra. ⁶ Saulo que titi titi i eandu ra. —¿Mañĩ ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheẽ nenei ndeje, i que Jesús Saulo je ra. ⁷ Saulo resend a que siquiche tuchi ra. Echeẽ andu mose. Mbia mo ndese que maeã nda. Nyebe siquichete echeẽ andu. ⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que mbia eo isi suruchoi sucha tubiriã nda. Sucha tubiriã Damáscoo. ⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque nda Dios tea cuu ra. —Ananías, i nda Dios eque re ra. —¿Mbae? i nda Ananías e e ra.

¹¹ —Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee ñee seje hue.

¹² Saulo que nderea cuu ra. Ereso que ndeo no erese cuu ra. Eresa que erembucherõ cuu ra. Ñquĩ sí esaã oso ee, i nda Dios Ananías je ra.

¹³ Ananías que teã ndei ra. —Mbia Saulo icuã icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios. ¹⁴ A eru Jesús quiato isi

ererao sacua a. Ñquĩ je chõ sacerdote rerecua embu nguiã a. Uretarõ ja sacua, i que Ananías Dios je ra. Esiquichete que Saulo si ra.

¹⁵ Dios que ñee ee ra. —Eso chõ erea. Ae quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangue chooñoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no.

¹⁶ Saulo secheẽ nenei nenei mose ra mbia embasi mbasi tuchi. Mbia icuã icuã tuchi ra ee seriĩ mambi. Ñquĩ ndese Saulo tambiirandu, i que Dios ra. ¹⁷ Ananías que oso cote ra. Dios cheẽ nguire. Ique que Judas chuchúaa ra. O que echono Saulo rese ra. —Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espíritu Turã ique sacua ndechiangui re. Nemaie sacua abe sembu co no, i que Ananías Saulo je ra. ¹⁸ Aque mose tuchi que sira quiishĩ naanguia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra. ¹⁹ Saulo que quiaru ñimbuquirãcuã cote ra. Itõ mocoĩ jiri que Jesús quiato rese huee ra. Damasco jenda rese itõ mocoĩ.

Saulo Dios cheẽ nenei namo

²⁰ Saulo que oso oso quia Jesús renei nenei judíos chumunuásaa ra. —Jesús rei Dios riirĩ, i tuchi

que equia mbia je ra. ²¹ Mbia que nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacua nye. Co chõ Jesús quiato queraose rete quia sacerdote rerecua je nye. Ae Jesús quiato riqui quia namo co cote, i que mbia nyuruira Saulo rea ra. ²² Saulo quirãcuã tuchi que eriqui cote ra. Ererecua rã ño eriqui nguiã mbia mbaaquiato quiatu Jesús rĩ. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheẽ sibishorõ aronea nda.

Saulo uchã judíos si

²³ Emo mose jiri que judío rerecua ñee nyue ra. —¡Saulo nandeiquia jẽ! i rei que ñee nyue ra. ²⁴ Mbia mo nguie Saulo mbiirandu ra. —Nandeiquia, i nda mbia nderĩ nda. Hue echi nyiquitirõ nderese eiquésaa hue. Isa abe echi nyiquitirõ nderese hue, i que embiirandu ra. ²⁵ Itondaru mose que Jesús quiato mo Saulo mbuchemi nda. Nyuchã nguie iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

²⁶ Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nande je co, i rei que mbia ra. Nyebe siquiche rei nguiã esi. ²⁷ Bernabé mĩ nguie Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damáscoo ra. Nandererecua Jesús que nye-cua ee ñeenda cúaa ra. Jesús que ñee ee ra. Saulo que siqui Jesús rui cote ra. Saulo que siquicheã nguia Jesús renei nenei Damasco

jenda je cote ra, i que Bernabé uataque je ra. ²⁸ Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra. ²⁹ Saulo siquicheã nguie eriqui Jesús renei nenei mbia je ra. Ae griego cheẽ saã saã nguia nae, ũquí je abe que erenei nenei nda. Ñee asi asi que Saulo je Jesús rĩ nda. Saulo abe que ñee tuchi ee Jesús rĩ nda. Nyebe mbia riqui nguiã “nandeiquia” i Saulo rĩ. ³⁰ Jesús quiato que jirandu erese ra. Nyebe Saulo ruruchoi nguiã Cesarea. Mondo que echuchúaa sí cote ra. Tarso, i que Saulo chuchua je ra. ³¹ Aquere que mbia icuã icuã eã Jesús quiato je cote ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacuã ja ra. Siqui i tuchi Jesús rese. Espíritu Turã nguie embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbia mbuchesea sea tuchi quia ra. Oso que Jesús quiato Lida jenda rea no nda. ³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ nguie equia ra. Eneas, i que umi sayã je ra. ³⁴ Pedro que ñee ee ra. —¡Jesús riqui nembucherõ a jẽ! Ehuã na. Nderua abe enua, ique Pedro umi sayã je ra. ũquí mose que nyerõ nda. ³⁵ Mbia que mae ja u umi sayã ngata rese ra. Nyebe que mbia Jesús icua ja cote ra. Lida jenda Jesús icua ja. Sarón jenda abe que eicua ja n o nda. Ngãmei ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, i que ari mo je ra. Jope jenda que ra. Dorcas, i que griego

cheẽ quiicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra. ³⁷ Dorcas rasi que eiquia cote ra. Mbiam que eraaque mbuchasu ra. Mii ngue equesa nongue ibatenda ye ra. Segundo piso. ³⁸ Pedro que siqui aichi ra. Lida, i que sucha tubiriã je ra. Nyebe que Jesús quiato mbia nyeremo mondochoi Pedro reru sacua nda. ³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubiriã a nyi nyeseo eraaque res e hue. Dorcas chimee tubiriã ngue eteacuquia cuquia u nyue hue ra. Mbiam irao tubiriã ngue Dorcas chiao ra. ⁴⁰ Pedro que mbiam mbusẽ ja mondo taicuee ra. Ngũĩã ndese que ñee Dios je cote ra. Aquere que ñee eraaque je cote ra. —Ehuã na, Dorcas, i que ee je ra. Eraaque que nguesa ira mae Pedro rese ra. Nyuruã ngue ngoi cote ra. ⁴¹ Pedro que emua eo rese ra. Jenyu, i que Jesús quiato je cote ra. Eru chiecha ja je abe no. Ngaẽ ngue mae equera rese cote ra. ⁴² Mbiam Jope jenda que jirandu tuchi erese ra. Nyebe que mbiam tubiriã Jesús icua cote ra. ⁴³ Pedro que itõ mocoĩ hue ra. Sucha tubiriã, Simón curtidor chuchúaa que eriqui uque ra.

10

Pedro oso Cornelio rea

¹ Soldados rerecua mo ngue siqui sucha tubiriã Cesaréaa ra. Italia jenda rei ũquĩ soldados. Cien ngue soldados ra. Cornelio, i que soldados rerecua je ra. ² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã ndiqui Dios je ra. ³ Tenda nyeseco ramo mose que Cornelio ibatenda mo ndea cuu ra. Angel. Echecua tuchi que

ee cuu ra. Ique que echuchúaa ee cuu ra. —Cornelio, i que ñee ee cuu ra. ⁴ Cornelio que mae quiato tuchi erese ra. —¿Mbae ere, Sererecua? i que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mo mee mee mbeite mbaecha reã je co. Nyebe Dios ia tuchi riqui nguĩã nderese co. ⁵ Huee que Simón Pedro mo ndiqui Jópee ra. Nderimba mo emondochoi erea. Eruu sacua ñee ndeje. ⁶ Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacua ndeje, i que ibatenda Cornelio je cuu ra. ⁷ Dios chimondo ibatenda que oso Cornelio recha cote ra. Cornelio que ñumumba cote ra. Jenyu, i que nguĩmba nyeremo je ra. Aque mii soldado je abe no. Ae rei Cornelio raarõsa. Ae que ndua ndua bei quia Dios rese ra. ⁸ Ũquĩ je que Cornelio uquereicuã nenei nenei ja ra. —Jẽso Pedro reru Jope si, i que ee cote ra.

⁹⁻¹⁰ Isamami ngue Cornelio rimba ngasẽ Jope rurubi cote ra. Aque mose que Pedro chi tuchia arõ nda. Huee rei equesa no. Huee que Pedro chi ñee ñee Dios je ra. Tenda ibate mose que Pedro riãcuã nda. Echurã ngue uchi âte ra. Nyebe que uque u ra. Uchurã naa mose. Equereicuã ngue cote ra. ¹¹ Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana isi ji ja. ¹² Mbae tubiriã ngue tu nguichi tiru icoi y e ee cuu ra. Mbae chumumbara tuchi. Quiaa riinda ja. Mbei abe no. Nguireĩ abe no. Mbae ibi riinda ja tuchi que chi tiru ye cuu ra. ¹³ Pedro que echeẽ mo ñandu cote ra. —Ehuã na, Pedro. Emo eiquia ndechiurã, i que ra. ¹⁴ —Tei, Sererecua. Urechui eã ño ã ndesẽ. ã mo ngue ureu eã mbei

quia ra. Mbaeiaie tuchi ure je judíos ja je, i que Pedro ee ra. ¹⁵ Dios que ñeembe ee ra. —¡Sechimee ndechiurã nda ereisiteãchĩ jê! i que ra. ¹⁶ Eĩ si que tiru icoi ru tres veces ra. Mbae chumumba ra ja resebe. Tiru que oso bei ibate cote ra.

¹⁷ Pedro que ñumumba cote ra. Ndua ndua tuchi que uquereicuã ndese ra. Aque mosete que Cornelio rimba ngasẽ nda. —¿Ma Simón chuchua ma nde? i que ngasẽ nda. ¹⁸ —¿Simón Pedro riqui a re? i que ra. ¹⁹ Pedro qu e ndua ndua beite quia uquereicuã ndese ra. Nyebe Espiritu Turã ñee nguiã ee. —Mbia tres ngaẽ nguia nderequia co. ²⁰ Equichi. Eso rã erese. ¡Esiquicheã oso erese jê! Se chõ ngue ambu nderea resẽ, i que Dios Pedro je ra. ²¹ Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jẽingo serequia re? i que Pedro ra. ²² —Cornelio quia urembu nguiã nderea co. Ae rei soldados rerecua turã. Judío chĩcua tuchi que ae ra. Eturãte eriqui Dios je co. Angel que oso ñee Cornelio je ra. “Mbia emondo rã Pedro reru sacuã. Pedro cheẽ echandu rã”, i que ángel Cornelio je ra, i que Cornelio rimba Pedro je ra. ²³ —Jenyu rã ique. Jengue a, i que Pedro ee ra. Isamami ngue Pedro oso erese cote ra. Jesús quiato Jope jenda abe que nyoi erese ra. ²⁴ Isamami ngue ngasẽ Cesarea cote ra. Cornelio que esaarõ arõ nguia huee ra. Nguesenda rese que eriqui eraarõ arõ nda. Nguiĩrĩ abe rese que eriqui eraarõ arõ nda. —Jenyu Pedro raarõ serese. Echeẽ andu sacuã, i nda nguesenda je nyii ra. ²⁵ Pedro que ngasẽ oso Cornelio chuchúaa ra. Cornelio que oo erese ra. Aquere que ngoi nguiã ndese ñee ñee ee ra. Ibatenda Pedro riqui reĩ nguiã Cornelio je. ²⁶ Pedro que ñee ee ra. —Ehuã na. Dios eã ño

se re. Nderã si chõ se re. Mbia chõ se re, i que Pedro ra. ²⁷ Ñee ñee ngue equia nyue cote ra. Nyoi que ique mbia tubiriãsa cote ra. ²⁸ Pedro que ñee ũquí je ra. —Se rei judío. Judío siqui aronea ndaque mbiamo ndese. Judío ique aronea mbiamo nyuchúaa. Ũquí jẽicua raque quia ã. Dios que ñee seje cuu ra. Dios que sembaaquiatu cuu ra. “Mbiamo abe que eturãte riqui ra. Mbiamo ndese abe eico jiri”, i que Dios seje ra. ²⁹ Nyebe achu jei nguiã ndecheẽ mose co. ¿Mbaerã “echu” ere seje re? i que Pedro Cornelio je ra.

³⁰ Cornelio que ñee ee cote ra. — Hue tenda bei aico ñee ñee Dios je co. Tenda nyeseco mose aico bei ñee ñee Dios je co. Se cheẽ mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda. ³¹ Ibatenda que ñee seje ra. “Cornelio, Dios ndecheẽ ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co. ³² Mbia mo emondo rã Jópee. Hue Simón Pedro ndiqui hue. Hue eriqui Simón Curtidor chuchúaa hue. Ama ndisha rimiã ndese eriqui hue. Sã nderimba mo erurucuaẽ aa”, i que ángel seje ra. ³³ Nyebe serimba amondo jei nderea. Coche erechu nguiã seje aa. Ndecheẽ andu sacuã ño urecu nguiã aa. Dios cheẽ esenei na ure je cote. Ae Dios mondo ndeje, erenei sacuã ure je, i que Cornelio Pedro je ra.

³⁴ Pedro que ñee ee cote ra. — Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ. ³⁵ Mbiamo abe ireĩ ireĩ chĩ nguiã Dios si re. Ibimo jenda re. Ũquí siqui turã ño nguiã Dios je reaẽ. Nyebe Dios abe eturã ndiqui ũquí je reaẽ. Judíos achõ eã ndaque. ³⁶ Dios que ucheẽ turã mondo judíos je ra. Dios

cheê turã ngue tu Jesucristo rĩ nda. Ae rei aba mbiase. Jesucristo rei mbia rerecua tuchi. ³⁷ Judío recua ja que Dios cheê turã ndiqui ã ndesê. Juan Bautista reco mose que Dios cheê ngasê judíos ja je ra. Juan Bautista que Dios cheê senei senei Galilea ra. Aque mose rane ngue Dios cheê ngasê judíos ja je cote ra. Ûquĩ jêicua tuchi quia ã ndesê. ³⁸ Jesús siqui turã jêicua quia resê. Jesús Nazaret jenda siqui turã mbei. Dios que Jesús mbuquirãcuã Espíritu Turã je ra. Dios que siqui tuchi erese ra. Nyebe eriqui nguiã mbae turã nea naa. Nyebe eriqui nguiã aba checuayã icuã jea jea mbia si. Ûquĩ jêicua quia ã ndesê. ³⁹ Jesús chimbaaquiato chõ ureico nguiã ã. Jesús chisaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que mbia eiquia cote ra. Huee que mbia embucha ira rese ra. Eiquia sacuã. ⁴⁰⁻⁴¹ Dios que Jesús mbuquera si cote ra. Tres días mose. Dios que Jesús mbuchecua ure je cote ra. Mbia ja je embuchecuyã. Ure je achõ ngue embuchecua ra. Uchiirabo achõ je. Jesús renei nenei sacuã ngue Dios ureirabo ra. Urequiaru que Jesús rese ra. Jesús quera ico. Mbae mo abe que urembei erese ra. ⁴² Jesús que uremondo mbia mbiirandu randu sacuã ngũĩ nda. “Secheê turã jêsenei senei nguia mbia je. ‘Dios que Jesús mĩ nda. Mbia mano je icuã ndea sacuã. Manoã je abe icuã ndea sacuã. Jesús r a eicuã tea ja’, jenye quia mbia mbiirandu randu”, i que Jesús ure je ra. ⁴³ Dios cheê mbuchecuaa ja que embesa mbesa Jesús rĩ cose ra: “Dios turã nda eriqui Jesús icuasa je. Dios ra Jesús icuasa icuã mbutiã tiã esi”, i que Dios cheê mbuchecuaa ra, i que Pedro Cornelio je ra.

Espíritu Turã ique judíos eã chianguire

⁴⁴ Pedro cheê mose que Espíritu Turã ndu ique eandusa chianguire ra. Eandusa chianguire ja ique. ⁴⁵ Pedro resenda judíos que nyuruira tuchi ra. —Judíos eã je abe chõ Dios riqui Espíritu Turã mondo mondo re, i que judíos Jesús quiato u nyuruira ra. ⁴⁶ Judíos eã ngue mbiamo ñee saã saã nda. Espíritu Turã ique mose echianguire. Ñee turã ja Dios rĩ. Nyebe judíos ñee. —Ã ñiangui re abe Espíritu Turã iquechĩ. Judíos eã ndaque, i que eandu ra. Pedro que ñee nguesenda je cote ra. ⁴⁷ —Espíritu Turã ngue ique echianguire cote ra. Nyebe bautizar tae ee i je cote. Emo nda seriquisâyã, i que Pedro ra. ⁴⁸ Nyebe que Pedro bautizar i ee ra. Jesucristo rimbarã ngue bautizar i ee ra. Aquereque ñee ja Pedro je ra. —Eitõ mocoĩ jiri quia ure rese aa, i que ee ra.

11

Pedro Jerusalén jenda mbiirandu ja

¹ Jesús chimbaaquiato que jirandu erese ra. Judíos eã ndese. Jesús quiato Judea jenda abe que jirandu erese ra. —Judíos eã abe riqui Dios cheê isi isi ã, i que mbia ee ra. ² Pedro que oso Jerusalén cote ra. Huee que judíos ñee asi asi ee cote ra. ³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, i que ñee asi Pedro je ra. ⁴ Pedro que embiirandu tuchi cote ra. ⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tiru icoi mo ngue tu ibate si cuu ra. Echimangũiana isi ji que tu nguichi seje cuu ra. Echimangũiana isi ji ja. ⁶ Mbae chumumbara tuchi que tu aque tiru ye cuu ra. Quiaa rĩnda ja. Mbei abe no. Nguireĩ abe no. Mbae ibi

rinda ja tuchi que chi tiru ye cuu ra. ⁷ Echeẽ mo ngue tu seje cote ra. “Ehuã na, Pedro. Emo eiquia ndechiurã”, i que seje cuu ra. ⁸ “Tei, Sererecua. Urechiu eã ño ã ndesẽ. ã mo ngue ureu eã mbei quia ra. Mbaeiaie tuchi ure je judíos ja je”, ae rei que ee ra. ⁹ Dios que ñeembe seje ra. “¡Sechimee ndechiurã nda ereisi teächĩ jê!” i que seje ra. ¹⁰ Eĩ si que tiru icoi ru tres veces ra. Oso bei que ibate serecha cote ra. ¹¹ Aque mosete que Cornelio rimba ngasẽ seje ra. Seruruchoi sacua ngue ecuaẽ Cesarea si ra. Tres que ngaẽ seruruchoi sacua nda. ¹² “Eso rã erese. ¡Esiquicheã oso erese jê!” i que Espiritu Turã seje ra. ã nanderesenda seis que nyoĩ serese ra. Urecuasẽ ngue emondosa chuchua ra. Cornelio chuchua. ¹³ Cornelio que uquereicuã senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea. ¹⁴ Ae ra ñee ñee nguia jêje. Ndechuchua jenda je abe ra eriqui ñee ñee. Dios jendirõ sacua jëicuã si’, i que angel seje ra”, i que Cornelio seje ra. ¹⁵ Se ñee namo mose ee que Espiritu Turã nguichi ee ra. Ique que echiangui re ra. Ique que nandechiangui re nyii nae, eĩ si que ique Cornelio chiangui re cote ra. Cornelio chuchua jenda chiangui re abe. ¹⁶ Jesús cheẽ ndese que andua ndua cote ra. ã ndei echeẽ ã: “I je que Juan bautizar i rei mbia je ra. Espiritu Turã je bautizar tae jêje cote”, i que Jesús cose ra. Aque rese que andua ndua cote ra. ¹⁷ Nande judíos achõ je eã ño Dios riqui nguia Espiritu Turã mondo. Judí eã je abe chõ eriqui nguia Espiritu Turã mondo. Jesús icua mose. ¿Mañi ae ra Dios riquisã se re? i que Pedro ñee oco judíos je ra. ¹⁸ Mbia que Pedro cheẽ sobeishiãte ra. Ñee turã turã ngue Dios je cote ra. —Dios judío eã abe mbui mbui quiatu quia huicua si reaẽ. Judío

eã abe chee ra siqui bei Dios rese nye, i que judíos ra.

Antioquía jenda Jesús quiato

¹⁹ Mbia icua tuchi que eriqui Jesús quiato je cote ra. Esteban iquia mosebe bei que mbia icua ndiqui Jesús quiato je ra. Nyebe Jesús quiato choi nguia uchã Jerusalén si. Emo nyoĩ Feníciaa. Emo nyoĩ Chipre no. Emo nyoĩ Antioquía no. Huee ja que echi Jesús cheẽ turã nenei nenei nda. Judíos achõ je que echi erenei nenei nda. Judío eã je erenei nenei eã. ²⁰ Chipre jenda rei emo. Cirene jenda rei emo no. Uqui nguia que nyoĩ Antioquíaa ra. Uqui nguiau que Jesús cheẽ senei senei judío eã je ra. ²¹ Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra. ²² Jesús quiato Jerusalén jenda que jirandu erese ra. Antioquía jenda rese. Nyebe Bernabé mondo Antioquíaa. ²³ Bernabé que ngasẽ ñee Jesús quiato je ra. —Dios turã tuchi riqui nguia jêje co. Aque rese seyate riqui co. ¡jẽingo tuchi nandererecua rese jê! ¡jẽhuichĩ nda esi jê! i tuchi que Bernabé quia mbia je ra. ²⁴ Bernabé turãt e que eriqui ra. Espiritu Turã ngue siqui tuchi erese ra. Ae que Dios icua tuchi eresa ra. Nyebe mbia tubiriã ndiqui nguia Jesús isi isi. ²⁵ Aque que Bernabé si Tarso ra. Oso que Saulo requia huee ra. Tea que ra. Nguerao que Antioquíaa ra. ²⁶ Huee que echi bei Jesús quiato mbaaquiato quiatu ra. Un año que echi huee ra. Mbia tubiriã mbaaquiato quiatu bei. Hue jenda je ranẽ ngue “Cristianos” i Cristo quiato je ra.

²⁷ Aque mose que Dios cheẽ mbuchecuaa mo ngaẽ Antioquíaa ra. Ngaẽ ngue Jerusalén si ra. ²⁸ Emo ngue juã ñee mbia je ra. Agabo, i que ee ra. Espiritu Turã

ngue Agabo mbucheẽ ñee nda. — Mbia chiurã eã nda namojiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rerecua mose.²⁹ Nyebe Jesús quiato Antioquia jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra.³⁰ Eĩ ngue umbae mondo mundo Judea jenda je ra. Mee mee ja que Saulo je ra. Bernabé abe je. Uqui ngue ecuruchoi cote ra. Ae emee nguiã Jesús quiato rerecua je. Judea jenda.

12

Mbia Jacobo iquia; mbia Pedro tarõ

¹ Aque mose que ererecua icuã tuchi riqui Jesús quiato je ra. Herodes, i que ererecua je ra. ² Ae que Jacobo ãqui ndoso ti quise je ra. Jacobo rei Juan nongue. ³ Judíos ia tuchi que Jacobo ãqui ndoso mose ra. —Judíos tambiabe no, i que ererecua ra. Nyebe Pedro abe isi nguiã. Fiesta de Pascua mose que Pedro isi nguiã. ⁴ Tarõ ngue mii mbia icuã tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacuã. Fiesta ua mose r a amee ee, i rei que ererecua uchiangui re ra. ⁵ Nyebe que soldados Pedro tarõ ji raarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro rii ee ra.

Dios Pedro sirõ nyecuayã etaronda si

⁶ Isamami nda ererecua Pedro mee nguiã mbia je chã nde. Eiquia sacuã. —Isamami nda amee mbia je, i rei que Herodes ra. Aque isa que Pedro uque u soldados joõ ñi nda. Ecua ji que uque u ra. Cadena nyeremo je que ecua ino nda. Soldados nyeremo ngue uqueã u

eraarõ nda. ⁷ Ibatenda mo ngue tu Pedro je isa ra. Angel. Nyaashĩ na tuchi que tuchua ra. Mbae resae ja. Ibatenda que oco Pedro rese ra. Emumba. —¡Ehuã asi jê! i que Pedro je ra. Ehuã mose que cadenas nyera eo si ra. ⁸ —Ndeirao emingue ja rã. Ndeiyao abe emingue, i que ibatenda ee ra. Ae que Pedro emingue echeẽ mose ra. —Ndeirao aronda abe emingue. Nyao serese cote, i que Pedro je ra. ⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui reĩ nguiã ee. ¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que echoi nyiese ra. Ibatenda que oso Pedro recha cote ra. ¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacuã nde. Serirõ ño equia Herodes si re. Judíos ra sei quia yã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbia tubiriãte que chi ñumunua huee ra. Ñee ñee ngue u Dios je ra. ¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra. ¹⁴ Pedro cheẽ ngue eicua ra. Eya tuchi que nyebi asi oso mbia mbiirandu ra. Eiquesa equia rocoĩ Pedro je. —Hue Pedro ñi taicuee hue, i que embiirandu ra. ¹⁵ —Tei. Echeẽ ñooñoa na, i chõ ngue mbia Rode je ra. —Ae beite. Acheẽ ñooñoa ño jêje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbia nyucuaaque je ra. ¹⁶ Eiquesa que Pedro mbuu mbuu bei huĩ mbia je ra. Emo ngue oso cheete rei eequia ee ra.

Pedro que ique cote ra. Ñumunua je que nyuruira tuchi mae erese ra. ¹⁷ Pedro que mbia mbuquiriri o je ra. Mbae que esenei ja ee cote ra. —Eĩngue Dios serirõ setarõsa si ra, i que erenei nenei ja ee ra. —Jacobo jembiirandu ja rã serese. Jesús quiato ja jembiirandu, i que Pedro ra. Pedro que oso mbia recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usê nde? i que u ñee ñee nyue ra. ¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiiirandu ja rã se. ¿Mañi Pedro si usê nde? i que ererecua soldados je ra. Soldados que eicuayãte ee ra. Nyebe que ererecua soldados iquia nguiã. Pedro raarõsa iquia ja. Aquere que Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echiiurã mondo monoa ee cote. Nyebe que ñquĩ nyoi ja Herodes chuchúaa ra. —¡Nandeturã mbei chõ ee jê! f nda nandechiurã mondobe nande je, i que nyue ra. Herodes resenda mo ngue ñee turã ee ra. Blasto, i que aque je ra. —Echeẽ turã turã Herodes je ure riĩ. f nda eturambe ure je, i que mbia Blasto je ra. ²¹ Emo mose jiri que Herodes huiirao turã mingue ra. Ngoi que ngũenda icoi tose ra. Jenyu seje, i que Tiro jenda je cote ra. Sidón jenda je abe no. Herodes que ñee ocote ñquĩ je cote ra. ²² Mbia abe que ñeete ee cote ra. —Dios chõ nde resê. Dios cheẽ na si nde. Mbia cheẽ na eã, i que mbia Herodes mbucuasú i i ra. ²³ —Dios eã ño se re, i eã mbei que Herodes mbia je ra. Ñee turã eã ngue equia Dios

riĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosei que erie u ra. Eiquia nonde. Mano ngue cote ra. ²⁴ Jesús quiato que Jesús cheẽ senei senei tuchi quia ra. Mbia tubiriã ngue echandu chandu quia ra. Mbia tubiriã ngue Jesús icua icua quia cote ra. ²⁵ Bernabé que nyoi Jerusalén nda. Saulo rese. Mbae isiquia ruruchoi sacua. Mbae isiquia que emee mee Jesús quiato hue jenda je cot e ra. Nyoi que Antioquíaa cote ra. Juan Marcos abe que ecuruchoi nyiese ra.

13

Espíritu Turã Bernabé mondo Dios cheẽ nenei nenei sacua, Pablo rese

¹ Jesús quiato que ñumunua nua nguia Antioquíaa jenda ra. Mbia mbaaquiato quiatusa abe que chi erese ra. Dios cheẽ mbuchecuasa mo abe que chi erese ra. Bernabé, i que emo je ra. Simón nondei abe que ra. Lucio de Cirene abe que ra. Manaén abe que ra. Ae rei que Herodes resenda eñetẽ mose ra. Herodes ererecua nonde. Saulo abe que ra. Ñquĩ ja que mbia mbaaquiato quiatusa ra. ² Emo mose que ñquĩ nyi ñumunua nda. Ñee ñee ngue u Dios je ra. Uchiu si que hui ra. Ndua ndua sacua Dios rese. Aque mose que Espíritu Turã ñee ee ra. —Bernabé jemee na seje. Saulo abe jemee na seje no. Ñquĩ ngue airabo ra. Airabo que secheẽ nenei nenei sacua nda, i que Espíritu Turã ñee ñumunua je je ra. ³ Mbia que ñee turã mbei Dios je ra. Quiaruã mbei que u ra. O que echono ñono Bernabé ãquĩ ndese cote ra. Saulo ãquĩ ndese abe no. Mondo que Dios cheẽ nenei nenei sacua cote ra.

Pablo Dios cheẽ senei senei Chĩpre, Bernabé rese

⁴ Aquere que Espíritu Turã Bernabé curuchoi Selúciaa ra. Saulo rese. —Ama ndui nyao Chipre, i que ua canoa cuasu ye ra. ⁵ Ngasẽ ngue sucha tubiriã Salamina nda. Salamina ndei Chipre jenda mo. Judíos chumunuasaa que echoi Dios cheẽ nenei nenei nda. Juan Marcos abe que siqui erese Dios cheẽ nenei nenei nda. ⁶ Tuchua que embuchesea sea tuchi ra. Ngasẽ nyee Pafos. Huee que brujo mo ndiqui ee ra. Barjesús, i que brujo je ra. Judío mo ndei aque brujo. —Dios cheẽ mbuchecuasa rei se, ichõĩño mbei que equia mbia je ra. ⁷ Brujo que siqui ererecua rese ra. Sergio Paulo, i que ererecua je ra. Ererecua aquiatu tuchi que ra. —Jenyu, Dios cheẽ tachandu rã, i que ererecua Bernabé je ra. Saulo je abe no. ⁸ Brujo que Bernabé cheẽ siquisã nda. Pablo cheẽ abe riquisã. —¿nda sererecua Jesús icuayã, i tuchi brujo ñquĩ ñee ndiquisã. Elimas, i abe que brujo je ra. ⁹ Espíritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiatu brujo rese ra. ¹⁰ Ñee ngue ee ra. —Mbía mbĩĩrĩ irĩa tuchi quiarei nde. Diabolo resenda tuchi quiarei nde. Mbae turã ndesenda reã tuchi quiarei nde. ¿Mbaerã ereico mbia riquisã quisã Dios icha si re? ¿Manose ra erehũ ñquĩ si re? i que Pablo ñee icuã ee ra. ¹¹ —Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeẽ mosebe que eresa uque tuchi ra. Mae eã mbae rese cote. —Jenyiba taisi. ¿Sembucuata turã na nguia jẽ! i tuchi eresayã nguia mbia je cote. ¹² Ererecua que echandu ja ra. Nyebe ngue Jesús icua nguia cote. Nyurũra tuchi que huĩ Jesús cheẽ andu ra.

Pablo que siqui Antioquíaa ra;

Bernabé rese

¹³ Pablo que nyoĩ Pafos recha cote ra. Nguesenda rese que echoi ama ndui ra. Ngasẽ ngue Perge de Panfíliaa ra. Huee si que Juan Marcos si nyebi Jerusalén nda. Pablo recha. Bernabé abe recha. ¹⁴ Emo mose que echoi Perge si ra. Ngasẽ ngue sucha tubiriã Antioquíaa ra. Pisidia, i que hue ibi je ra. Sábado mose que ique judíos chumunuásaa ra. Huee que echi ngoi ra. ¹⁵ Judíos que leer i Dios cheẽ je ra. Moisés chimbesa je. Dios cheẽ mbuchecuasa chimbesa je abe no. Aquere que judíos ñee Pablo je ra. Bernabé je abe no. —¿Mbía ra jembaaquiatsu quiatu jẽ nde? i que ee ra. ¹⁶ Pablo que juã cote ra. O je que mbia mbuquirĩ ra. Ñee ngue ee cote ra. —Seandu rã se, Israelitas. Seandu rã se, Dios quiato. ¹⁷ Dios que Israelitas rerecua ra. Dios que nanderamei cose ndare irabo ra. Siqui tuchi que equia nanderamei ndese ra. Nanderamei chi mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra. ¹⁸ Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chi mose turuquia. ¹⁹ Sucha tubiriã jenda que mano ja mbiamo nda. Dios que eiquia ja ra. Siete rei sucha tubiriã. Canaán jenda. Dios que ñquĩ iquia ja nanderamei si ra. Ñquĩ mbae ibi que Dios mee nanderamei je cote ra. ²⁰ Dios que jueces mĩ mĩ nanderamei nderecuarã cote ra. Jueces que emĩ mĩ nguia cuatro cientos cincuenta años nda. Aquere que Dios Samuel mĩ nanderamei nderecuarã nda. ²¹ Aquere que nanderamei ñee Dios je ra. “Rey mo nguia emĩ urererecuarã”, i que Dios je ra. Nyebe que Dios Saúl mĩ ererecuarã nda. Rey. Ae rei Cis riĩrĩ. Cis rei Benjaminito.

Saúl que siqui arete nanderamei nderecuarã nda. Cuarenta años que eriqui ererecuarã nda. ²² Cuarenta años ua mose que Dios Saúl mombo cote ra. Dios que David mii nanderamei ndere cuarã cote ra. Saúl rendaque re. David rei Isaí riirĩ. Dios que ñee David je ra. “David sebi tuchi. Ae quia ra secheẽ mumba mumbayã”, i que Dios cose ra. ²³ David sí que Jesús ramei nda. Dios que Jesús mbu Israel jenda rirõ sacua huicua si ra. Ucheẽ nguire que Jesús mbu ra. Dios que ucheẽ mbuchebiã nda. ²⁴ Jesús tu nonde que Juan Bautista riqui ñee ñee nanderamei je ra. Israel jenda je. “Jëicuã si jëhui. Jemba Dios icha rui. † nda bautizar ae jêje”, i tuchi que Juan nguia mbia je ra. ²⁵ Umano nonde que Juan ñee mbia je ra. “Ae jësaarõ nguia nae, ae eã ño se re. Ae ra tu serui. Ae rei ererecu tuchi sesi. Se oco aronea eiyaõ rese”, i que Juan ñee Jesús rĩ nda.

²⁶ Seresenda, Abraham ndiirĩ ndei jê. Jemo ndiqui Dios icua ã. Nande je quia Dios ucheẽ mondo nguia. Nanderirõ sacua nandeicuã si. Dios que Jesús mondo nande je ra. ²⁷ Jerusalén jenda que Jesús icuayãte ra. Ererecu ja que chi Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábadõ mose, eicuayã mbei. Dios cheẽ mbuchecuasa cheẽ nguire que Jesús icua ra. ²⁸ “Jesús eiquia rã”, i tuchi que mbia quia Pilato je ra. Jesús icua eã ndaque. ²⁹ Nyebe que Jesús mano ndei ra. Embesa ji cheẽ nguire que Jesús mano nda. Jesús raaque que embuquichi ira si cote ra. Ñono ngue sita ribicoi ji ye ra. ³⁰ Jesús que quera si manonde cote ra. Dios que embuquera si ra. ³¹ Galilea jenda que siqui bei quia Jesús rese Jerusalén nae, ùquĩ ñgue mae mae equera si rese cote ra. Mae mae mbei equia Jesús

quera si rese cote. Ùquĩ ñee mbei quia Jesús rĩ ã cote. ³² A ureico Dios cheẽ turã nenei nenei jêje a. Dios ñee ñee nguia nanderamei je nyii nae, ùquĩ uresenei senei nguia jêje a. ³³ Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namo ngue arembuchecua mbia je ra”, i que Dios Jesús rĩ cose ra. Eĩ ngue Salmo dos nda. ³⁴ Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jêje. Seturã David je nyii nae, eĩ si ra seturãte jêje”, i que Dios ra. “Jesús tambuquera si jêje”, i ñene. ³⁵ Co abe rei embesa ji. ã ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra. ³⁶ David que siqui turã mbei quia uchabenda ja je ra. Dios cheẽ nguire que eriqui turã ee ra. Aquere que mano nda. Mbia que echati ngãmei jii rĩ nda. Aquere que David roo soõ cote ra. ³⁷ Jesús roo quiatu que soõ eã nda. Dios que embuquera si resẽ. Nyebe ae roo soõ eã nguia. ³⁸ Seresenda, Jesús mii ndiqui nandeicuã mbutiã sacua co. A ureico ùquĩ nenei nenei jêje a. Jëirandu sacua erese. ³⁹ Dios que ucheẽ senei senei nguia Moisés je nyii nae, aque cheẽ nguia r a aba icua mbutiã eã. Jesús mii ndiqui nandeicuã mbutiã sacua co. Nande Jesús icua mose. ⁴⁰ “Mbae icua nda tuchĩ jêje”, i que Dios cheẽ mbuchecuasa ra. Jêtesa bei u jê. Sã Dios cheẽ mbuchecuasa io eã jêje. Eĩ ngue Dios cheẽ mbuchecuasa ra: ⁴¹ Co jê, mbae turã ucuayãsa.

Je nyuraira rae. Jemano ndae.

Mbia mae sayã nda asaã ndaque jêje.

Jëicua sereãte ra equia.

Mbia embuchecua raque jêje. Nyebe ra jemano, i que Dios cose ra, i que Pablo ra.

⁴² Pablo que usê nyoï echumunuasa si cote ra. —Jenyube rã sábadu nongue. Ũquĩ jêsenei seneimbe rã u ure je, i que mbia ee ra. ⁴³ Mbia que usê ja echumunuasa si cote ra. Judíos tubiriã ngue nyoï Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jêingo tuchi jê, i tuchi que equia ee ra.

⁴⁴ Sábado nongue mose que sucha tubiriã jenda ñumunua ja ra. Ñumunua nua ja Dios cheẽ andu. ⁴⁵ Judíos mo ngue chi mae mae mbia chumunua ndese ra. —Pablo cheẽ ño echanduchi nguiã. Nandechẽ andu rocoĩ, i que judíos ngueteã mbia rese Pablo si ra. Nyebe judíos ñee icuã icuã nguiã Pablo je. ⁴⁶ Pablo que siquicheã tuchi ñee judíos je ra. Bernabé rese. —Jê nane je ureico rei Dios cheẽ nenei nenei ã. Dios cheẽ nguire ureico rei nguiã erenei nenei jê nane je ã. Ibate jêingo bei sereã ñochĩ. Nyebe jêingo nguiã Dios cheẽ isiteã teã ã. Nyebe ureso nguiã erenei nenei judíos eã je co. ⁴⁷ ã ngue Dios ñee ure je cose ra: “Aremingo que secheẽ nenei nenei sacuã mbia ja je ra. Judíos eã ja je. Mbia ibi jenda ja je. Secheẽ isiquia ra siqui bei”, i que Dios ure je ra, i que Pablo ra.

⁴⁸ Judíos eã ia tuchi que Pablo cheẽ ndese ra. Ñee turã turã ngue Dios cheẽ ñii nda. Dios que mbia irabo ata ra. Emingo bei sacuã ibate. Ũquĩ ngue Jesús icua ja cote ra. ⁴⁹ Hue jenda ja que embucha mbucha quia Dios cheẽ nenei nenei nda. ⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chiicua mbuqueta tuchi que ra.

Amei mbia chiicua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguiã hue si. Bernabé abe mombo no. ⁵¹ Nyoï nonde que hui tubi mbutomo tomo mbia je ra. —Jêicuã têicuã, i ñe hue jenda je re. Aquere que echoi Iconio nda. ⁵² Jesús quiato ia tuchi que chi ra. Espíritu Turã ngue siqui tuchi quia erese ra.

14

Pablo que siqui Iconio nda, Bernabé rese

¹ Pablo que ngasẽ Iconio nda. Bernabé rese. Judíos chumunuasa que echoi ra. Dios cheẽ ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda. ² Judíos ataque que Jesús cheẽ isiteã teã no nda. Ũquĩ ngue judíos eã mbiicua icuã Pablo je ra. Bernabé je abe no. Ñee icuã icuã tuchi eriĩ. ³ Pablo que chi arete huee ra. Bernabé abe no. Siquicheã tuchi que equia Dios cheẽ nenei nenei nda. Ebia tuchi Dios rese. Dios que embuquiracuã nda. Nyebe que eriqui mbia mae sayã naa naa nda. —Ichõĩño eã ño equia re, i chee mbia Pablo cheẽ je. Bernabé cheẽ je abe no. ⁴ Mbia cuabẽ ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda. ⁵ Nyebe judíos icuã icuã Pablo je. Pablo resenda je abe no. Judíos eã abe eicuã icuã ee no. Mbia rerecua abe que eicuã icuã ee ra. — ¡Pablo nandeiquia jê! ¡Bernabé abe nandeiquia jê! ¡Sita nande mombo mombo erese jê! i rei que mbia ra. ⁶ Pablo que jirandu erese ra. Bernabé abe. Nyebe echoi uchã sucha tubiriã mo. Licaonia jenda. Litra, i sucha tubiriã mo je. Derbe, i emo je. Hue rurubi que echoi ra. ⁷ Hue jenda je que Dios cheẽ nenei nenei nda.

Mbia sita mombo mombo Pablo rese

⁸ Ngasẽ ngue Lистра ra. Huee que emo ngatayã ñi ee ra. Eitãquieĩ mosenda bei ei icuã. Nyebe ngatayã mbei. ⁹ Aque que Pablo cheẽ ñandu ra. —Sembucherõ arõ, i ndua uchiangui re. Pablo que eicua ra. Nyebe e mae nguiatu erese. ¹⁰ Ñee nyecua que ee ra. —Ehuã ndei rese, i que Pablo ee ra. Ecuatayã ngue juã asi ngata cote ra. ¹¹ Mbia tubiriã ngue chi mae Pablo chimbucherõ ndese ra. Nyebe ucheẽ naa naa u nyue. Pablo riĩ ñee ñee. —Dios ngaẽ nguichi nande je mbia rã sí a, i rei que nyuruirã ra. Tasẽ tasẽ. Licaonia, i hue jenda cheẽ je. ¹² Mercurio reĩ nda Pablo mbia je. Mercurio, i mbia umbae dios mo je. Pablo que ñee mbeite quia ra. Nyebe “Mercurio” i mbia ee. Jupiter reĩ nda Bernabé mbia je. Jupiter, i mbia umbae dios mo je no. ¹³ Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuasú quimbae queru Pablo je ra. Ira uti resebe ereru ee. —Ticuasú nandeiquia iquia rã Pablo je. Nandesei sei ee, i ja que mbia ra. —Pablo rei Dios rã si. Bernabé rese. Nyebe ticuasú nandeiquia iquia rã ee. Dios raanguia je, i rei que mbia ra. ¹⁴ Pablo que echandu ra. Bernabé rese. Nyebe huiirao ndoro ndoro paama i ee. —Ureya eã jendese, i ñe ne. Ique que echoi mbia ite ite rĩ nda. Ñee asi asi mbia je. ¹⁵ —¿Mbaerã nda re, mbia? ¿Mbaerã nda ticuasú jëiquia ure je re? Mbia chõ ure re. Jë na si chõ ure resẽ. Dios eã ño ure resẽ. Nyebe urechu nguia Dios cheẽ turã nenei nenei jëje ã. Ñ mbae icuã jësecha ja chõ. Dios quiarei ereco. ¡Ae rui jëingo! Ae que ibei chao ra. Ae que ibi chao no nda. Ae que ama nyao no nda. Ae que mbae chao ja ra. Mbae aosa rui jëingo. ¹⁶ Dios que

mbia teachõ cose ra. Mbia tesarei mose esi. ¹⁷ Dios que eturã saã saã mbei quia mbia je ra. Mbi a eicua sacua. Dios chõ ama mbuchaaqui bei nguia nande je. Ae quia mbae a mee mbei nguia nandechiurã. Dios chõ nandembia mbia bei nguia co, i que Pablo mbia je ra. ¹⁸ Eĩ ngue Pablo embiirandu Dios rese ra. Nyebe que mbia ticuasú iquia eã nyee ee ra.

¹⁹ Emo jiri mose que judíos ngaẽ huee ra. Antioquia si. Iconio si abe no. Uquĩ ngue mbia mbiicua icuã Pablo je ra. Nyebe que mbia sita mombo mombo tuchi Pablo rese ra. Pablo manote rei nguia ee. Mbia que ecuruchoi mbutiriri pe jiri sucha tubiriã si. ²⁰ Hue que Jesús icuasa chi Pablo matãte hue ra. Pablo que juã quera cote ra. Osobe que nyebi sucha tubiriã nda. Isamami ngue esi Derbe ra. Bernabé rese. ²¹ Dios cheẽ turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístaa ra. Iconio abe. Antioquia abe. Huee sucha tubiriã ngue echoi nyebi ra. ²² Pablo que Jesús icuasa mbaaquiату quiatu hue jenda ra. Bernabé rese. —¡Jesús rese jëingo tuchi jë! Mbia ra nandembasi mbasi tuchi. Aquere ra Dios nandererecuarã tuchi cote, i que Pablo mbia je ra. Bernabé rese. ²³ Amei mo ngue eirabo rabo mii ino huee ra. Jesús icuasa rerecuarã no hue. Ñumunua je rerecuarã jaaja. Aquere que hui uchiu si ra. Quiaruã. Ñee ñee ngue equia Dios je ra. Ñee ñee ee ererecua namonda riĩ. —Ñ jëingo Dios icuate ã. Sã Dios jendaarõ arõ, i que Pablo ererecuarã je ra. Bernabé rese.

Pablo ngãembe Antioquia, Bernabé rese

²⁴ Nyoĩ que erecha cote ra. Písidia, i equia ibi je, hue rĩ ngue echoi ra. Ngasẽ ngue Panfilia no

nda. ²⁵ Jesús cheẽ turã ngue esenei senei sucha tubiriã Perge jenda je ra. Aquere que echoi Atalia no nda. ²⁶ Hue si que echoi amandui ra. Nguique riita quiti que ecuaẽ tiba Antioquia cote ra. Mbia hue jenda rane nguiatu que Pablo mondo Bernabé rese Dios cheẽ nenei nenei sacua nyii ra. —Chã Dios turã jendeaquiato jẽso mose, i que ee nyii ra. Huee que tiba obei cote ra. ²⁷ Ngasẽ mose Antioquiaa, Jesús icuasa que emunua nua cote ra. Mbae ja que esenei tuchi ee ra. —Dios que ureraquiato tuchi quia ra. Dios que urembucheẽ ñee nguia judíos eã je ra. Dios que Jesús icua tuchi ee ra. Nyebe etubiriã ndiqui nguia Jesús icua cote, ure echeẽ nenei nenei mose, i que Pablo ra. Bernabé rese. ²⁸ Chi arete que Antioquiaa ra. Jesús icuasa ja rese echi huee.

15

Jesús quiato rerecua ñumunua ja

¹ Judea jenda mo ngue ngaẽ Antioquiaa ra. Ngaẽ ngue Jesús icuasa mbaaquiato quiatu icua nda. —Circuncisión jẽsaã saã ja. Moisés cheẽ nguire jẽsaã saã, i rei que Jesús icuasa je ra. Eracoĩ ire o ji je chõ eriqui nguia circuncisión, i ùquĩ je. —Eĩ jenye eã mose ra jẽsoã ibate, i rei que ra. ²—Tei, eĩ eã ñene, i tuchi que Pablo ee ra. Bernabé rese. —Ae beite. Pablo ñee ñoño nguia, i tuchi Judea jenda. Nyebe ñee tuchi nguia nyue circuncisión ñii. Nyebe Jesús icuasa mondochoi Jerusalén. Jirandu sacua circuncisión ndese. Pablo mondochoi. Bernabé abe no. Mbia mo abe no. Ùquĩ mondochoi ja. —Jẽso Jerusalén. Jeñee Jesús quiato rerecua je. “¿Circuncisión nda uresaã saã nde?” jenye oso ee. Sã Jesús quiato rerecua ñee jẽje. Jenyu ñee ure je cote, i que ñee uchimondo je ra. ³ Jesús icuasa

que embucuata turã cote ra. Mondochoi Jerusalén. Fenicia rui que echoi ra. Samaria rui abe no. Judíos eã je rese que hue jenda mbiirandurandu ra. —Judíos eã abe que Jesús isi isi quia cote ra. Judíos eã ngue hui hui quia hui cuã si cote ra, i que hue jenda mbiirandurandu ra. Jesús icuasa ia tuchi que eandura. ⁴ Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecua abe que eisi turã no nda. Pablo que Dios turã senei senei ee ra. —Dios quirãcuã ngue siqui quia ure rese ra. Ure echeẽ naa naa mose, i que embiirandu ra. ⁵ Fariseos Jesús icuasa mo ngue juã ñee cote ra. —Judíos eã Jesús icua mose, circuncisión jẽsaã saã ee. Jeñee na ee. “Moisés cheẽ ndui jẽingo bei”, jenye chõ ee, i rei que Fariseos ee ra.

⁶ Nyebe Jesús quiato rerecua ñumunua ja aque riĩ. ⁷ Ñee ñee tuchi nyue circuncisión ñii. Aquere que Pedro juã ñee nda. —Tacheẽ se, Seresenda. Dios que seirabo cose ra. Ucheẽ turã nenei nenei sacua judíos eã je. Ùquĩ Jesús icua sacua ngue seirabo cose ra. Ùquĩ jẽicuate quia ã. ⁸ Dios quia aba chiã icua jate nguia co. Judíos eã je abe Dios Espíritu Turã mondo mondo cote. Nande achõ je eã emondo. Ùquĩ abe je emondo mondo Jesús icua mose no. “Judíos eã abe sequiato”, i ñe Dios re. ⁹ Judíos eã Jesús icua mose, Dios ùquĩ ñia mbiasu cote. Nande rã si. Nyebe Dios riqui nguia judíos eã je abe siqui turã. Nande rã si. ¹⁰ ¿Mbaerã jẽingo Dios cheẽ abi abi chõ nde? Dios cheẽ jembeta mbeta chõchi nguia re. Judíos eã je chõ jẽingochi embeta re. Embeta ji chi nda eãtã tuchi aba je cot e re. Ùquĩ nanderu cose ndare saã aroneate. ¹¹ Dios turã nguia nandemingo bei nguia ã. Dios turã

nguia nandemingo bei nguiã ibate. Nande Jesucristo icua mose. Dios turã nguia judíos eã abe mingo bei nguiã ã no. Nande rã si no, i que Pedro ra.

¹² Pablo que mbae senei ja mbia je cote ra. Bernabé rese. Mbía tubiriã ngue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. — Dios que urererao judíos eã je ra. Urembirãcuã tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese. ¹³ Pablo cheẽ huire que Jacobo ñee cote ra. —Seandu rã se, Seresenda. ¹⁴ Pedro que ñee jêje namo nda. Dios turãte que judíos eã je ra. Dios que ãquĩ mo irabo rabo nguesendarã nda. Pedro que jembiirandu erese namo nda. ¹⁵ Eĩ ngue Dios cheẽ mbuchecuasa embesa cosete ra. Nyebe eriqui nguiã eĩ eĩ ã cote. ¹⁶ ã ndei embesa ji ã:

Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echiã mbitirõ si cote.

Siqui si ra serese cote.

¹⁷ Judíos eã abe ra siqui serese cote. Mbía sembaerã nda siqui ja serese cote,

i que Dios ra. ¹⁸ Eĩ ngue Dios ñee mbia mbiirandu cose ra, i que Jacobo ra. ¹⁹ —Judíos eã mo ngue Dios icua icua quia cote ra. ¡Nandechẽ nandembetayã jiri ee jê!

²⁰ ¡Nandechẽ mii ño nandembesa mondo ee jê! Nandechẽ mumbayã sacua. “Mbía soo mondo mondo mose dios raanguia je, ¡aque soo ra jêuchĩ jê!” nande rã ee. “¡Jeninisi rese siqui rocoĩ nda jêngochĩ emo ndese jê! jendu rese siqui rocoĩ nda jêngochĩ emo ndes e jê!” nande chõ ee. “¡Eruqui resebe ra soo jêuchĩ jê! ¡Mbae ruqui ra jêuchĩ jê!” nande chõ ee. Ñquĩ mii nandembesa rã mondo

ee. Nandechẽ mumbayã sacua. ²¹ Ñquĩ mii nande rã ee. Ñquĩ ño mbia ñandu ñandu mbei quia cose ndare bei. Mbía Moisés chimbasa saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²² —Coche ñene, i ja Jesús quiato rerecua Jacobo cheẽ je. Jesús icuasa ja abe. Nyebe mbia nyeremo mondo Pablo rese. Bernabé rese abe. Silas, i que ee ra. Judas, i que enongue je ra. Barsabás, i abe que equia Judas je ra. Ñquĩ ndei Jesús quiato rerecua mo. Ñquĩ ngue emondo Antioquíaa ra. — Urecheẽ jẽsenei senei Jesús icuasa hue jenda je, i que Jerusalén jenda ra. ²³ Jesús icuasa que ucheẽ mbesa mondo ee ra. A rei embesai a: —Ure rei Jesús quiato rerecua. Ure rei Jesús icuasa. A ureico embesa mbesa jêje a, Jesús icuasa. Judíos eã je. Antioquía jenda je. Siria jenda je. Cilicia jenda je. Saludos. ²⁴ Urerenda mo ngue nyoichĩ jembaaquiato icua icua nda. Ñquĩ ñee jemingo asi asite rei. “Circuncisión jẽsaã saã”, i chõchĩ equia jêje reaẽ. “Moises cheẽ ndui jêingo bei”, i chõchĩ equia jêje re. Ñquĩ uremondo eã ñee jêje. Ae ae chõ nyoĩ nguiã ñee ñooño jêje. ²⁵ Nyebe ureico nguiã ñumunua a. Emo ngue ureirabo emondo sacua jendea ra. Nyeremo uremondo quia aque. Pablo rese. Bernabé abe rese. Urequiato tuchi que ñquĩ nda. ²⁶ Ñquĩ ireĩ ireĩ eã tuchi nyoĩ Jesucristo cheẽ nenei nenei. Mbía eiquia arondete raque. Siquicheã tuchi. ²⁷ Aque Judas uremondo quia jendea aque. Silas rese. Ñquĩ nda jembiirandu ja. Ñquĩ nda urecheẽ senei senei jêje. ²⁸ Espíritu Turã ngue urembaquiato ra. Nyebe ra urecheẽ tuchiã jêje. Echeẽ mumbayã sacua. ã mii ño uremondo quia jêje aque. ²⁹ “Mbía

soo mondo mondo mose dios raanguia je, ¡aque soo ra jëuchĩ jê! ¡Eruqui resebe ra soo jëuchĩ jê! ¡Mbae ruqui ra jëuchĩ jê! ¡Jeninisi rese siqui rocoĩ nda jëingochĩ emo ndese jê! ¡Jendu rese siqui rocoĩ nda jëingochĩ emo ndese jê!” Coche ùquĩ jemumbayã nguiã. Aque mĩ ño urecheẽ urembesa mondo aque, i que embesa ra. Eĩ ngue Jerusalén jenda embesa ee ra.

³⁰ Uchimondo que emondochoi turã nda. Ngasẽ ngue Antioquíaa cote ra. Jesús icuasa hue jenda que emunua ja ra. Embesa ji que emee ee ra. ³¹ Echumunua mos e que leer i ee cote ra. Eya tuchi que erese ra. Eya tuchi Jerusalén jenda chimbese isi mose. ³² Dios cheẽ mbuchecuaa rei Judas. Silas rese. Nyebe que ùquĩ Dios cheẽ nenei nenei tuchi Jesús icuasa je ra. Jesús icuasa mbaaquiatsu quiatu tuchi. ³³ Chi are jiri que huee ra. Jesús icuasa que embuchebi turã mondochoi cote ra. Nyoĩ que nyebi Jerusalén nda. ³⁴ Silas que siquichõ nda. ³⁵ Pablo abe que siquichõ Antioquíaa ra. Bernabé rese. Mbia que embaaquiatsu quiatu quia ra. Dios cheẽ turã ngue esenei senei nguia ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique rui Jesús icuasa mbuchesea sea mae ja erese. Dios cheẽ ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra. ³⁷ —Eno. Juan Marcos abe nanderao, i rei que Bernabé ra. ³⁸ —Tei. Ae que nanderecha Panfília nyii resẽ. Hui jei que nande si resẽ, nande Dios cheẽ nenei nenei mose. ¿Mañi nande ra ererao si re? i que Pablo ra. ³⁹ Ñee asi asi chee que nyue ra. Marcos rĩ. Nyebe que nyao nyesi ra. Bernabé que Marcos

querao ra. Ama ndui que echoi Chípree ra. ⁴⁰ Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiatsu bei jẽso mose, i ja que ee ra. Pablo que nyoĩ cote ra. Silas rese. ⁴¹ Siria rĩ ngue echoi ra. Cilicia rĩ abe no. Hue jenda Jesús icuasa mbaaquiatsu quiatu que echoi ra.

16

Pablo resenda bei que Timoteo cote ra

¹ Pablo que nyoĩ Dérbee ra. Lístraa abe echoi. Huee que Jesús icuasa mo ndiqui ee ra. Timoteo, i que ee ra. Esi rei judía. Esi rei Dios icuasa. Judío eã ngue eru ra. ² Jesús icuasa hue jenda que Timoteo icua ja ra. Timoteo turãte, i ja que Jesús quiato quia ee ra. ³ —Timoteo tarao serese, i que Pablo ra. Judíos tubiriã ngue chi aque ibi rui ra. —Judío eã ndei Timoteo ru, i ja judíos. Nyebe Pablo circuncisión naa Timoteo je. Nguerao nguesendarã cote. ⁴ Nyoĩ que sucha tubiriã mbuchesea sea cote ra. Jesús quiato rerecua cheẽ ngue esenei senei ja quia mbia je ra. Jerusalén jenda cheẽ. —¡Ūquĩ ñee nda jemumba mumbachĩ jê! i que Pablo nyoĩ quia ra. ⁵ Pablo que Jesús oseĩ uquia Jesús quiato je ra. Jesús icuasa tubiriã nia ngue esi quia cote ra.

Echu urembaaquiatsu quiatu, i que Macedonia jenda Pablo je cuu ra

⁶ —Nyao Dios cheẽ nenei nenei Asia, i rei ngue re. Espíritu Turã ngue nya i ee ra. Nyebe echoi nguĩ Frígiaa. Galáciaa abe. ⁷ Ngasẽ ngue Mísiaa ra. Nyao Bitinia, i rei ngue re. Espíritu Turã ngue nya i ee ra. ⁸ Misia que echucuaño nyoĩ ra. Ngasẽ nyee Troas. ⁹ Huee que Pablo Macedonia jenda mo ndea isa ra. Tea que cuu ra. Chĩ nda juã ñee ñee Pablo je cuu

ra. —¡Echu aa Macedóniaa jê! Echu urembaaquiату quiatu, i nda Pablo je cuu ra. ¹⁰ Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheê nenei nenei sacua, ure que urechue cote ra. Nyebe urecuata nguiã cote.

Pablo tarô ji que chi Filipos ra

¹¹ Ama ndui que ureso Troas si ra. Eriimbe que ureso iasa ra. Urecuasê nyee que oso Samotracia ra. Isamami ngue ureso Neápolis cote ra. ¹² Hue si que ureso ibi rĩ nda. Urecuasê nyee oso sucha tubiriã tuchi je. Filipos, i hue sucha tubiriã je. Romanos mbae rei sucha tubiriã. Macedonia, i que ibi ja je ra. Huee que urecu arete ra. ¹³ Sábado mose que ureso ama nimíaa nda. Sucha tubiriã ndecha. Huee que judíos riqui ñumunua nua mbei ñee ñee Dios je ra. Ari que ngaê ngaê nguia huee ra. Acuani mo ndese. Urecoi que Dios cheê nenei nenei ee ra. ¹⁴ Lidia, i que urecheê andusa mo je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheê mbuchecua ee ra. Pablo cheê ngue eisi ra. ¹⁵ Nyebe que bautizar i ee ra. Echuchua jenda je abe que bautizar i ra. —Se Jesús resenda tuchi mose jêje, jenyu uque sechuchúaa, i que Lidia ure je ra. Ñee tuchi ure je. Nyebe urererao nguiã uchuchua.

¹⁶ Emo mose que ureso quia mbia ndua nduásaa Dios rese ra. Nyucuaaque mo ngue uresobeishi nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je. ¹⁷ Nyucuaaque que tu Pablo rui ra. Tu ure ja rui. Ñee ngue urerĩ nda. —Ã ndei Dios rimba ã. Ibatenda rimba. A echí aba icuã mbutiãsa

nenei nenei jêje a. A echí Jesús renei nenei jêje a, i bei que nyucuaaque quia urerĩ nda. ¹⁸ I bei que nyucuaaque quia urerĩ nda. Pablo que echeê nyosei chiã nyee ra. Uba que ñee aba checuayã icuã je cote ra. —Jesús rĩ aico ñee ndeje a. Esê nyucuaaque si, i que Pablo aba checuayã icuã je ra. Echeê mosebe que usê esi ra.

¹⁹ Nyucuaaque rerecua que paama i Pablo je ra. —Mbia ra mbae isiquia mondo monoa techĩ nande je cote re, i nyue. Nyebe que Pablo isi ra. Silas rese. Curuchoi que plaza ra. ²⁰ Mondo que mbia rerecua je ra. —Ã ndei judíos ã. Mbia mbícuã icuãte equia ñee ñee ã. ²¹ “Ure rã jëingo”, ichĩ nguiã nande je. Romanos ndaque nande. Ûquĩ nandesaa aronea tuchi quiarei, i que mbia nguerecua je ra. ²² Nyebe que mbia paama i Pablo je ra. Silas abe je. Ererecua que eirao mbui asi ra. —Ira je jëiruã nua, i que ererecua ra. ²³ Mbia que eiruã nua tuchi ra. Tarô ngue cote ra. —Jësaarô tuchi, i que ererecua eraarôsa je ra. ²⁴ Echeende que etarô tuchi cote ra. Ei abe que emumbi ino ira je ra.

²⁵ Pablo que ñee ñee nguia Dios je itondiite mose ra. Silas rese. Irasei rasei abe no. Etarô i que echandu ja quia ra. ²⁶ Aque mose que ibi titi titi i ra. Etarôsa abe que quiata quiata ja ra. Eiquesa abe que quiata ja ra. Eicuasa que nyera ja cadenas nda. Etarô ji si que nyera ja ra. ²⁷ Eraarôsa que ñumumba ra. Eiquesa eequia ji rese que mae nda. Etarô ji uchã nei nguiã ee. Nyebe ñee nguiã. —Tachíquia, i que tiquise rirô nda. ²⁸ Pablo que tasê ee ra. —¿Mbaerã nda erechíquia re? ¡A urecu chôte a resê! i que Pablo ee ra. ²⁹ —Tata eru, i que eraarôsa mbia mo je ra. Ique que Pablo rea cote ra. Titi titi i tuchi que ra. Ngoi que nguiã ndese

17

Pablo je ra. Silas abe je. ³⁰ Eraarōsa que ecuruchoi taicuee cote ra. Ñee ee. —Sã Dios serirō seicuã si. ¿Mañi ae ra se re? Siqui bei sacua Dios rese re, i que eraarōsa ra. ³¹ Pablo que ñee ee cote ra. Silas rese. —Jesucristo eicua. Ũqui mose ra Dios nderirō ndeicuã si. Ũqui mose ra Dios ndechuchua jenda abe rirō huicuã si, i que Pablo ee ra. ³² Jesús cheẽ ngue esenei senei ee ra. Echuchua jenda je abe que erenei nenei nda. ³³ Pablo iruã nua ji que eraarōsa irei irei ra. Silas iruã nua ji abe. Itondii mose raque. Bautizar i que eraarōsa je cote ra. Echuchua jenda ja je abe que bautizar i ra. ³⁴ Eraarōsa que Pablo querao mbuquiaru uchuchúaa ra. Silas abe no. Ey a tuchi que ra. Echuchua jenda abe ia tuchi. —Nandeico Dios icua co cote, i ñene. Nyebe eya tuchi Dios rese.

³⁵ Isamamimbe que ererecua ñee policía je ra. —Jẽso Pablo mbusẽ cote. Silas abe jembusẽ, i que ee ra. ³⁶ Eraarōsa que ñee Pablo je ra. —A policía cuaẽ a. Jembusẽ sacua. Hui que jẽsi ra. Jẽso turã cote, i rei que eraarōsa Pablo je ra. ³⁷ —Nya, i que Pablo ee ra. —¿Mbaerã ererecua ureirua ñooño nde? Mbiasa. Mbae icuã naa mose rocoi. Romanos ndaque ur e abe. Uretarō ñooño ngue ra. “Nandembusẽ checuayã”, i raque ure je co cote. Tei. Sã ũqui ngaẽ urembusẽ nyecua, i que Pablo ee ra. ³⁸ Pablo cheẽ ngue policía senei nguerecua je ra. “Romanos”, i mose que ererecua chiã cuaacuã i ja ra. ³⁹ Ererecua que nyoï Pablo rea cote ra. Silas abe rea. —Ureicuã ñochĩ jẽje. Ureicuã eã nda cote. Jẽso a si cote, i que ererecua embusẽ turã mondo cote ra. ⁴⁰ Pablo que usẽ etarōsa si cote ra. Silas rese. Nyoï que Lidia chuchua ra. Hue que echi mbirĩ Jesús icuasa mundua ndua ra. Nyoï que hue si cote ra. Sucha tubiriã si.

Pablo que siqui Tesalónicaa ra

¹ Pablo que nyoï Antípolis rĩ nda. Apolonia nĩ abe echoi. Silas rese. Hue si que echoi ngasẽ Tesalónicaa ra. Huee que judíos chumu nuasa mo huee ra. Sina goga, i equia tuchua je. ² Pablo que oso hue sábado mose ra. Querabe que eriqui oso oso bei judíos chumunuásaa ra. Tres sábado que Pablo mbia mbaaquiatu quiatu huee ra. ³ Dios cheẽ ngue esenei senei ee ra. —“Mbía ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩ aico ñee ñee jẽje, ae rei Cristo. Ae jẽsaarō arō mbeite quia, aque rei Jesús, i que Pablo embaaquiatu quiatu ra. ⁴ Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei ũqui. Griego ninisi tubiriã abe que siqui Pablo rui ra. Mbía chiicua tuchi rei ũqui. ⁵ Judíos que ngueteãte quia mbia rese Pablo je ra. Mbía siqui mose Pablo rui. Aẽ Dios cheẽ andu sereãte quia, ũqui ngue ngueteãte quia mbia rese ra. Nyebe ngata chooño je munua nguia. Ũqui ngue sucha tubiriã jenda mbupaama i tuchi ra. Mbía tubiriã ngue mbaba chee Jasón chuchua je cote ra. —¿Ma Pablo ma nde? ¿Ma Silas ma nde? Uremee nda mbía icuã je, i rei que judíos ra. ⁶ Pablo oreã ngue ee ra. Silas abe oreã ngue ee ra. Nyebe que Jasón nduruchoi mbutiriri nguerecua je ra. Jasón ndesenda rese. Ñee nguerecua je. —Pablo ngaẽ ñochĩ mbía mbíicuã icuã ja aa. Pe jenda mbíicuã icuã jare. ⁷ Jasón eisi turã ñochĩ nguia uchuchúaa a. Ũqui icuã ja que eriqui nandererecua je. César cheẽ emumba mumba bei chõchĩ nguia ã. “Jesús quia ererecua tuchi César si re”, i chõchĩ Pablo, i que

mbia paama i Pablo je ra. ⁸ Mbia ataque eandu mose que paama i ra. Ererecua abe que paama i ra. ⁹ Ererecua que mbae isiquia isi Jasón si ra. Jasón ndesenda si abe. —Uremeembe ra jêje Pablo choi mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondo-choi jei Berea ra. Silas rese. Aque isa mose bei. Ngasê ngue Berea ra. Nyoï que judíos chumunuasa cote ra. ¹¹ Judíos Berea jenda que earacua ra. Tesalónica jenda si. Berea jenda quiatu que Dios cheê ñanduse rete ra. Berea jenda que embesa ji tea jei jei ra. —Ma Pablo ñee Dios cheê ndui si, i que nyue ra. ¹² Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chiicua rei griego s ninisi. ¹³ Pablo que Dios cheê senei senei Berea jenda je ra. Judíos Tesalónica jenda que jirandu ra. Jirandure que echoi Beréaa mbia mbiicua icua Pablo je ra. ¹⁴ Jesús icuasa que Pablo mondo ama ndisha quití ra. Silas que siquichô Beréaa ra. Timoteo rese. ¹⁵ Ae Pablo curuchoi, ñquĩ ngue tiba esi ra. Atenas, i que sucha tubiriã je ra. —A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

¹⁶ Pablo que siqui Silas raarô arô Atenas nda. Timoteo abe raarô arô. Dios abareã tubiriã ngue huee ra. Ñquĩ ndese quiatu que mbia riqui oo tuchi ra. Pablo que mae icua ñquĩ ndese ra. Pablo que paama ite mbia rese mae nda. Mbia Dios abareã nderequia requia mose. ¹⁷ Nyebe Pablo oso oso bei nguiã judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia

je. Dios icuasa je. Plázaa abe que Pablo riqui ñee ñee tuchi mbia je ra. ¹⁸ Epicúreos resenda mo ngue ngaê ñee tuchi Pablo je ra. Estoicos resenda mo abe que ngaê ñee Pablo je ra. —¿Mbae ichôte Pablo quia nande je re? Echeêse rete eriqui reae, i que emo emo nda. —Dios mo ñii eriqui ñee ñee nande je reae, i que emo emo nda. Pablo ñee ñee mose Jesús rii. Pablo Jesús quera renei nenei mose. ¹⁹ Mbia que Pablo curuchoi ibi ato mo cote ra. Huee que ererecua riqui ñmunua nua mbei ra. Ñee ngue Pablo je cote ra. —¿Mbae rii ereico ñee ure je re? Embuchecua ure je. ²⁰ A ngue urechanuate quia ra. Ndecheê embuchecua ure je. ¿Mbae ere quia re? i que mbia Pablo j e ra. ²¹ Atenas jenda mingo uquia reã mbae mo ndese. Ae siqui Atenas jenda rese, ñquĩ abe mingo uquia reã mbae mo ndese. Echeemo andu andu bei. Echeemo ndese bei.

²² Nyebe que Pablo juã mbia ite re ra. Ibi ato. Ñe e ngue mbia je cote ra. —Tacheê jêje, Atenas jenda. Dios ata rete rese jêingo reae. ²³ Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenye que embesa mi nda. Ae je jêingo ñee ñee ñquĩ. Jemae sayã ndaque. Ae rii aico ñe e jêje co. ²⁴ Co Dios que ibi chao ra. Mbae ao ja. Ae rei mbae rerecua. Ibi rinda rerecua. Ibei jenda abe rerecua. Dios siquiã ño nguiã tuchiaqui re mbia chiao. ²⁵ —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mingosa rei ae. ²⁶ Mbia mii ngue Dios chao ra. Aque rei mbia i ja aque. Emo eã ño nandeico nguiã ã. Nande ja chô nandeico nguiã ã. Dios rei nandeaosa. Nyebe Dios mbae rerecua ja. —Co ra nyeacuquia co mose. Co ra mano

co mose, i bei que Dios quia ra. Mbia recuarã ngue Dios mee mee mbia je ra. ²⁷ Dios que mbia mingo ibi rĩ nda. ĩ nda mbia Dios requia. ĩ nda mbia Dios icua. Isho eãte Dios riqui a. Nande ja jii eriqui a. ²⁸ Dios rĩ ae nandeico nguiã. Erĩ ae nandeico nguiã ngata. Jemo abe que ñee nda. “Dios ririĩ ño nandeico ja nguiã ã”, i que jemo nda. ²⁹ Ae bei chõ nandeico nguiã ã. Dios ririĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je. ³⁰ Dios que mbia icuã teachõ cose ra. Mbia aquiatuã mose. Namõ ño Dios riqui nguiã ñee mbia je co. “Jẽhui chõ jẽicuã si”, i Dios quia mbia jaje co. ³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jẽso tata cuasu”, i ra ee. “Jẽso ibate”, i ra emo je no. Manose chõ nda ñee. Dios mii ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibate. Emo mondo tata cuasu no. ³² —Jesucristo que quera si manonde ra, i que Pablo ee ra. Mbia que iquia iquia chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndecheẽ urechandu, i que eataque ra. ³³ Pablo que oso mbia recha cote ra. ³⁴ Emo emo ngue siqui erui ra. Ae Jesús cheẽ isi turã, ãquĩ ngue siqui bei erui ra. Dionisio, i que ãquĩ mo je ra. Ae rei mbia rerecua mo. Dámaris, i que cuña mo je ra. Emo emo abe que siqui Pablo rui ra.

18

Pablo que siqui Coríntoo ra

¹ Pablo que oso Atenas ndecha cote ra. Ngasẽ ngue sucha tubiriã mo cote ra. Corinto, i que hue je ra. ² Hue que judío monduqui ee ra. Aquila, i que ee ra. Ponto jenda que ae ra. Priscila, i que eninisi je ra. ãquĩ ngue ngãẽ namo Italia si ra.

Italia recha ramo. Claudio judíos mombo ja mose Roma si. Pablo que oso Aquila chuchua ra. ³ Pablo que tuchua saã saã nguiã mbae ire je ra. Eĩ ngue Aquila no nda. Tuchua raã naa mbei mbae ire je. Nyebe Pablo siquichõ nguiã erese. Quiei quiei erese. ⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. —Jesús rei Cristo. Ae jẽsaarõ arõ mbeite e quia, aque rei Jesús, i tuchi que Pablo ee ra. ⁶ Judíos que paama i Pablo je cote ra. Ñee icuã icuã tuchi que ee ra. Nyebe Pablo huiirao mbaaba aba ee. Taso jendecha, i ñene. —“Aemingo bei ra se”, i rei Dios nande je. Jẽ nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¡Dios cheẽ ngue asenei tuchi rei jẽje ra jẽ! Nyebe taendecha. Judíos eã je Dios cheẽ tasenei senei cote, i que Pablo huiirao mbaaba aba ee ra. ⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra. ⁸ Crispo que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto jenda tubiriã ngue Dios cheẽ ñandu ra. Mbia tubiriã ngue Jesús icua cote ra. Bautizar i que cote ra. ⁹ Itondaru mo ngue Pablo Jesús rea ra. Ñee ngue Pablo je cuu ra. —Eresiquichechĩ nda mbia si jẽ. Secheẽ esenei senei mbei. Erehuichĩ nda esi jẽ. ¹⁰ Co aico nderea quiatu co. Mbae icuã nda ñ eã ndeje. Secheẽ esenei senei

mbei. A jenda ra seicua ja jiri cote, i que Jesús Pablo je cuu ra. ¹¹ Pablo que sigui arete Corinto ra. Un año ndobeichō jiri que eriqui huee ra. Mbia mbaaquiatu quiatu bei Dios rñi.

¹² Galión ngue Acayo jenda rerecua ra. Aque mose que judíos ñimbñicuā tuchi Pablo je ra. Oo que erese ra. Curuchoi que nguerecua je ra. ¹³ Judíos que ñee ererecua je ra.

—Pablo que mbia mbaaquiatu icuā icuā nguia ra. Dios rñi. Nandererecua cheē ndui eā, i que judíos ra. ¹⁴ Pablo nda ñee nguñā ña. Ererecua Galión nane nguia ñee nguñā esi. Ñee judíos je. —Mbae icuā ndese que Pablo riqui āte. Eñ nguia nda jeñee achandu nguñā ña. ¹⁵ Mbae icuā ngue esañ eāte. Pablo cheē je chō jēingo nguñā paama i. Judíos cheē ñi ño jēingo nguñā paama i Pablo je. Nyebe ra jeñee achannua. Jē ae jeñee turā jenyue ae, i que Galión judíos je ra. ¹⁶ Mombo ja que uchuchua si cote ra. ¹⁷ Sóstenes, i que judíos chumunua nuasa rerecua je ra. Judíos eā ngue paama i Sóstenes je ra. Isi icuā ngue ra. Iruā nua tuchi que ra. Ererecua Galión ndésaa que eiruā nua nda. Ererecua que teachō nda.

Pablo tube Antioquíaa

¹⁸ Pablo que sigui atate Coríntoo ra. —Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasē ngue ama nimíaa nda. Such a tubiriā. Cencrea, i que hue sucha tubiriā je ra. Pablo que ua chisia cote ra. —Acheē ngue Dios je, aque que amumbayā nda, i que ua sia cote ra. Siria icha rui que echoi cote ra. Ama ndisha icoi tuchi rui. ¹⁹ Sucha tubiriā je que ngasē cote ra. Efeso, i que sucha tubiriā je ra. Aquila que siquichō eresebe huee ra. Priscila, i que eninisi je ra. Pablo que oso

judío s chumunuásaa ra. Ñee ñee tuchi que judíos je ra. ²⁰ —Eico are jiri aa, i rei que judíos ee ra. Pablo que echeē mumba bei oso ra. ²¹ —Taso Jerusalén. Mbia chumunua mose taico rā Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra. ²² Ngasē ngue Cesaréaa ra. Hue si que Pablo si Jerusalén cote ra. Hue jenda rese que mae nda. Jesús quiato. Hue si que esi Antioquíaa ra. ²³ Siqui arete que Antioquíaa ra. Oso que Galacia cote ra. Frigia abe no. Sucha tubiriā ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheē senei senei

²⁴ Aque mose que judío mo ngasē huee ra. Efésoo. Apolos, i que ee ra. Alejandría jenda que ae ra. Dios cheē nenei neneisa tuchi mbia je. Dios cheē icuasa tuchi. ²⁵ Apolos que Dios icha icuate ra. Mbia que embaaquiatu quiatu turā tuchi quia ra. Mbia mbaaquiatu turā Jesús rñi. Juan Bautista cheē achō ngue eicua quia ra. Juan bautizar i mose mbia je. ²⁶ Apolos siquicheā tuchi que eriqui mbia mbaaquiatu quiatu ra. Judíos chumunuásaa. Aquila que echandu ra. Priscila rese. Nyebe que ũquĩ Apolos rerao mbaaquiatu quiatu tuchi ra. Dios icha que embuchecua tuchi ee ra. ²⁷ Apolos que osose Acáyaa ra. Nyebe Jesús quiato emondo turā. Papel que embesa Acaya jenda je ra. Jesús quiato je Acaya jenda je. —Apolos jēisi turā, i ee. Apolos que ngasē cote ra. Ae Jesús icua quia, ũquĩ mbaaquiatu quiatu tuchi. ²⁸ Apolos que judíos cheē siquisā tuchi ra. Judíos mbia mbaaquiatu choño mose. Jesús rñi eā. Nyebe Apolos echeē ndiquisā.

Dios cheê ngue esenei senei nguia ee ra. —Jesús rei Cristo. Ae jêsaarõ arõ nguia, aque rei Jesús i tuchi que Dios cheê nenei ee ra.

19

Pablo que siqui Efésoo ra

¹ Sita ibate bate ite rĩ ngue Pablo si ra. Ngasê ngue Efeso cote ra. Apolos siqui mose Corinto. Jesús quiato mo je que Pablo ngasê Efésoo ra. ² Pablo que ñee ee ra. —Jê Jesús isi mose, ¿Espíritu Turã abe ique jeñiangui re re? i que Pablo ee ra. —Espíritu Turã ndese ureiranuate, i que mbia Pablo je ra. ³ Pablo que ñee ee ra. —¿Mbae rĩ bautizar i jêje re? i que ra. —Juan ñee nĩ ngue bautizar i ure je ra, i que Pablo je cote ra. ⁴ Pablo que ñee ee ra. —Juan ngue bautizar i mbia je ra. Mbia hui mose huiçuã si. “Ae ra tu serui, aque jêicua jê. Jesucristo chõ aque re”, i que Juan nda, i que Pablo ra. ⁵ Pablo cheê andu mose que bautizar i Jesús rĩ cote ra. ⁶ Pablo que o chono earõ nda. Espíritu Turã ngue ique echianguí re cote ra. Ucheemo ngue esaã saã nguia cote ra. Dios cheê ngue embuchecua checua quia mbia je cote ra. ⁷ Doce que ùquĩ nda. Jesús quiato.

⁸ Pablo que oso oso quia judíos chumunuasa ra. Tres meses. Siquicheã tuchi que equia Dios cheê nenei nenei nda. —Ererecua tuchi quiarei Dios. Jesús jêicua rã, i que Pablo quia mbia je ra. ⁹ Emo emo ngue Pablo cheê ñandu sereã nda. Echeê mumba mumba. Jesús rĩ ñee icuã icuã mbei mbia ja je. Nyebe Pablo nyao nguia esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiatu quiatu cote ra. ¹⁰ Dos años ngue Pablo riqui huee ra. Nyebe mbia Asia jenda jirandu ja nguia Jesús

rese. Judíos jirandu ja erese. Judíos eã abe no.

¹¹ Pablo que mbae saã saã tuchi quia Dios quirãcuã je ra. Mbia mae sayã ngue esaã saã nguia ra. ¹² Mbia rasi mbucherõ sacuã ngue mbia riqui tiru mbucha mbucha Pablo rese ra. Ûquĩ tiru que ecuruchoi choi quia mbia rasi je cote ra. Ûquĩ tiru ruruchoi mose, mbia rasi que nyerõ nyerõ nguia cote ra. Aba checuayã icuã abe que usê usê nguia mbia chiã si cote ra. ¹³ Judíos mo ngue ngata beite quia ra. Sucha tubiriã mbuchesea sea bei que equia ra. —Aba checuayã icuã mbusê aquiatute que ure ra, i que equia ra. —Jesús rĩ abe checuayã icuã nandembusê, i rei que nyue ra. Nyebe que ñee abe checuayã icuã mo je ra. —Jesús quirãcuã nĩ aico jembusê mbia si co. Ae Pablo senei senei nguia, i rei que judíos abe checuayã icuã je ra. ¹⁴ Sacerdote rerecua ririĩ abe que eĩ si ra. Siete eririĩ. Esceva, i que sacerdote rerecua je ra. Judío que ae ra. Ae ririĩ ngue eĩ si rei no nda. ¹⁵ Ûquĩ ngue ñee ndei abe checuayã icuã je ra. Aba checuayã icuã ngue echeê mumba ra. —Jesús aicua. Pablo abe aicua. ¿Aba chõ jê nde? Jaêicuayãte se, i que abe checuayã icuã nda. ¹⁶ Aba checuayã nyireco que oo erese cote ra. Ucua ucua tuchi que ùquĩ ja rese cote ra. Ûquĩ siete rese. Aba checuayã icuã nyireco quirãcuã tuchi que esi ra. Aba checuayã nyireco que ùquĩ mbasi ja ra. Nyebe ùquĩ ndasi rasi uchã abe checuayã icuã si. Eirao eã ngu e nyoĩ uchã itaicuee rĩ nda. ¹⁷ Efeso, i que hue sucha tubiriã je ra. Hue jenda que jirandu ja erese ra. Judíos que jirandu ja erese ra. Judíos eã abe no. Nyebe hue jenda siquiche ja. Nyebe mbia ñee turã turã jate Jesús rĩ. ¹⁸ Jesús quiato mo ngue ngaê ngaê nguia ra. Eya eãte que huiçuã ndese

ra. Nyebe huiꝑcuã nenei nenei.
¹⁹ Mbia tubiriã ngue mbae icuã papel mbesa ji curucuaẽ nda. Libros de brujería. Munua ja que huee ra. Ûquĩ ngue esei sei mbia ja résaa cote ra. Mba e isiquia ata tuchi raque que ùquĩ libros isiquia ra. Cincuenta mil plata. ²⁰ Mbia tubiriã ngue Dios cheẽ isi isi quia ra. Dios cheẽ irātāte que mbia tea quia cote ra.

²¹ Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra. ²² Nguesenda nyeremo ngue emondo Macedonia nda. Timoteo. Erasto rese. Pablo que siquichõ are jiri huee ra. Asia.

Efeso jenda paama i ja Pablo je

²³ Aque mose que mbia paama i tuchi Jesús rĩ nda. ²⁴ Demetrio quia rei mbia mbiꝑcuã icuã nyii. Dios mbuae chuchua que esaã saã nguia ra. Mbae rendi ātā je que eriqui sucha ñetẽ naa naa nda. Sucha ñetẽ tubiriã ngue esaã saã nguia ra. Dios mbuae chuchuarã. Diana, i que Dios mbuae je ra. Demetrio que mbae isi tuchi quia sucha ñetẽ ndibishorõ nda. Eresenda tubiriãte que sucha ñetẽ naa naasa ra. ²⁵ Nguesenda ja que emunua nda. Dios mbuae chuchua raãsa que emunua ja ra. Ñee ngue ee ra. —Mbae nandeisi turāte rei nguia nandechiao ribishorõ ā. ²⁶ Pablo riqui ñee ñee mbia je co. “Dios mbuae mbia chiao rei eicuāte”, i Pablo quia co. Mbia riqui echeẽ mumbayāte ā. Ajendachõ eā ñene. Efeso mii eā ñene. Asia jenda abe eriqui echeẽ andu ā. ²⁷ Ûquĩ icuāte nande je. Nandechiao ra mbia isi isiã ñochĩ cote re. Mbia ra hui ja chõchĩ Diana chuchua si cote re. Diana abe si ra mbia hui chõchĩ nde. Nandererrecua tuchi que Diana. Mbia chiꝑcua tuchi que ae. Asia jenda chiꝑcua tuchi que

ae. iMbia ra hui chõchĩ esi jẽ! i que Demetrio ra.

²⁸ Demetrio resenda echeẽ andu mose que paama ite ra. —iDiana quirācuāte jẽ! iEfeso jenda rerecua quirācuāte jẽ! i tuchi que mbia tasẽ tasẽ nda. ²⁹ Hue jenda que paama i ja ra. Pare pare i tuchi. Pablo resenda nyeremo ngue eisi ra. Gayo. Aristarco rese. Macedonia jenda. Ûquĩ nyeremo ngue ecuruchoi mbia chumunuāsaa ra. ³⁰ —Taique se abe. Tacheẽ ñee mbia je, i rei que Pablo ra. Jesús quiato que Pablo siquisā nda. ³¹ Asia jenda rerecua mo abe que ucheẽ mondo Pablo je ra. —iEreiquechĩ nda nde jẽ! i Pablo je. Pablo quiato que ùquĩ nda. ³² Mbia que pare pare i tuchi ra. Tasẽ tasẽ ja que ra. Hue rĩ ja mbia ndua eāte. Mbae mii ndese ndua eā. Paama i chooño ja. Eaquiātuā ño ñumunua ñooño nguia. ³³ Mbia mo ngue mbae senei senei ja Alejandro je ra. Judíos que Alejandro mua mbia ite re cote ra. —Echeẽ mbia ja je, i que ee ra. Alejandro que o mee mbia je ra. —jẽquiriri chõ jẽ! i rei ngue ee re. —Mbia je tacheẽ. i nda paama iā judíos je, i rei ngue re. ³⁴ —Judío chõ Alejandro riqui re, i ja que mbia ra. Nyebe mbia riqui tasẽ tasẽ mbeite re. Dos horas. —iDiana quirācuāte jẽ! iEfeso jenda rerecua quirācuāte jẽ! i tuchi que mbia tasẽ tasẽ nda. ³⁵ Secretario rei ererecua mo. Aque que mbia cheẽ siquisā cote ra. Ñee ngue ee cote ra. —Tacheẽ jẽje, Efeso jenda. Efeso jenda chõ nande re. Diana ndei nandererrecua. Nande rei Diana ndaarõsa. Diana naanguia ngue tu ibei si, aque raarõsa chõ nande re. Diana chuchua raarõsa abe chõ nande re. Mbia jirandu jate ùquĩ ndese. ³⁶ Emo eicuayā eāte. Nyebe jẽquiriri chõ jẽ. iJẽaquiātuā jẽsaã saã eā ño jẽ! ³⁷ Ae jẽisi seru nae, ùquĩ mbae mbuquiachā eāte dios mbuae chuchúaa. Ûquĩ ñee

icuã icuã eãte dios mbuae rĩ. Dios mbuae jenderecua rĩ. ³⁸ Demetrio ñee icuãse mose emo nĩ, sã esi nandererercua chuchúaa. Demetrio resenda ñee icuãse mose emo nĩ, sã echoi nandererercua chuchúaa. Huee chõ ererercua riqui nguiã mbia cheẽ andu. Sã echoi ja ererercua je. Sã ñee ñee ja nyue ererercua résaa. Mbae icuã nĩ. ³⁹ Mbae mo nĩ abe mose, jeñee mbia chumunua mose. ⁴⁰ Jesús quiato que nandeisi chooñochĩ nda. Nandechimbücuã ñooño ño nguiã. Nandererercua ñee arõte nande je. Echeẽ nda nandesibishorõ eã, i que secretario ra. ⁴¹ Aquere que hui mbia si ra. Mbiambui que cote ra.

20

Pablo nyoĩ Macedóniaa, Gréciaa abe

¹ Mbiamquiriri mose que Pablo Jesús quiato munua nda. Embaaquiātu quiātu jiri. —Co acua quia co, i que ee cote ra. Macedóniaa ngue echoi cote ra. ² Hue jenda sucha mbuchesea seate que echoi ra. Jesús quiato mundua ndua. Ngasẽ ngue Gréciaa cote ra. ³ Huee que eriqui are jiri ra. Tres nyasi. —Taso Siria amandisha rui, i rei que cote ra. Jirandu que judíos icuã ndese cote ra. —Nandeisi, i nda judíos quia Pablo rĩ nda. Nyebe Pablo ru nguiã nyebi si Macedonia. ⁴ Ñ ngue nyoĩ erese ra. Eata rete. Sópater. Berea jenda. Aristarco. Segundo abe. Tesalónica jenda rei ñquĩ. Gayo. Derbe jenda. Timoteo. Tíquico. Trófimo. Asia jenda rei ñquĩ. ⁵ Ñquĩ ja rane nguia nyoĩ nguiã ure si. Troas que echi nguiã ureraarõ. ⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasẽ namo ngue Troas cote ra. Ae ureraarõ arõ nguia, ñquĩ ngue uresiiti cote ra.

Urecu are jiri que hue cote ra. Siete días.

Pablo nyoĩ Troas

⁷ Jesús quiato que ñumunua ja domingo mose cote ra. Mbichae sia sia nyue. Pablo que embaaquiātu quiātu quia ra. —Taso isamami, i que ra. Nyebe embaaquiātu quiātu itondiite mose chee. ⁸ Sucha ibáttee que echi ñumunua nda. Eironguia ibate tuchi que ra. Ibate tuchi que echi ñumunua nda. Tata rendi tubiriã ngue etesae tuchi ra. ⁹ Mbiamo ngue chĩ ibate ra. Ventana tose. Etiarõ namo ngue ra. Eutico, i que ee ra. Uque que hui ngoi ibate ra. Pablo que ñee oco tuchi embeesi esi ra. Eque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ. ¹⁰ Pablo que nguichi u erea ra. Oo tuchi que erese ra. Quiaama ngue ra. —jẽsiquichechĩ nda jẽ! Manoãte, i que Pablo mbia je ra. ¹¹ Pablo que osoi nyui ra. Mbichae que echisia sia ra. U que ra. Mbiamque embaaquiātu quiatube ra. Eresaitõ ndabe chee. Oso que erecha cote ra. ¹² Ae ngoi nae, erasiã ño ngue mbia curuchoichĩ nguiã. Mbiamia tuchi que ngoi je rese cote ra.

Pablo nyoĩ Milétoo

¹³ Pablo que ñee nda. —Ibi rĩ taso se Asón. Hue si ra aso jendese cote. Amandisha rui, i que ra. Nyebe ure rane ureso nguiã ama ndisha rui. ¹⁴ Ae urecuasẽ nguiã Pablo je Asón cote. Pablo que oso urerese am amandisha rui cote ra. Canoa naanguia ye. Urecuasẽ ngue Mitilene cote ra. ¹⁵ Hue si que ureso ra. Isamami ngue ejoõ acua mo urechucuã cote ra. Quío, i que hue ejoõ acua je ra. Isamami nongue que urecuasẽ Samos cote ra. Hue si que ureso Trogíloo ra. Huee que urequeneã urecua ra. Isamami ngue urecuasẽ Milétoo cote ra. ¹⁶ Pablo que

quicoi asi Asia si ra. Nyebe ure-soã Efésoo. —Tacuasẽ quicoi oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mondo Efésoo ra. —Jenyu, i que amei je ra. Jesús quiato rerecua je. ¹⁸ Ûquí ngue ngaẽ ee ra. Pablo que ñee ee ra. —Cosete que achu Asia ra. Seicuate raque se. Sechisaã jêicuate raque. ¹⁹ Dios cheẽ ngue asenei senei turã tuchi quia jêje. Secuasu que asaã saã eãte quia jêje. Acheseo tuchi que sequia mbia rese. Judíos que sembasi mbasi tuchi quia ra. “Taiquia”, i rei que judíos quia seje ra. ²⁰ Dios cheẽ ngue asenei senei mbeite quia jêje. Asiquicheã mbei que sequia erenei nenei jêje. Jembitirõ sacuã. Jeñumunua nua mose. Jenyuchúaa ja abe que aico Dios cheẽ nenei nenei jêje. ²¹ Acheẽ tuchi que jêje. Judíos je. Judíos eã je ab e no. “jêicuã si jêhui rã! Jesucristo jêicua rã”, ae tuchi que sequia jêje. ²² Co aso quia Jerusalén co. Co Espíritu Turã sererao quia Jerusalén co. Mañi ño nda seje pee. ²³ Co mii ño aicua nguiã. Espíritu Turã ngue ñee seje ra. Sucha mbuchesea sea mose que eriqui ñee ñee seje. Mbia icuãte ra seje. Sembasi rae. Sematã ndae. Setarõ ndae. Espíritu Turã ngue sembiirandu ra. ²⁴ Sesiquicheãte Ûquí si. Sã seiquia quiatu. “Dios turã esenei senei mbei quia mbia je”, i que Jesús seje ra. Aque mii ndese chõ aico nguiã ndu a co. Echeẽ mii ndese. † nda echeẽ amumba eã. ²⁵ Dios nandererecua que asenei senei tuchi jêje. Jemae eã mbei ra serese cote. Aicuate se quia co. ²⁶ Jemo siqui sereã mose Jesús rese, se eã ño cote re. Jê ño cote re. Jê ja je chõ ngue asenei senei ndesẽ. ²⁷ Dios cheẽ ngue asenei senei jate

jêje. Asiquicheã mbei que sequia erenei nenei jêje. Dios cheẽ mo ngue atibo tibo eãte jêje. ²⁸ jêingo turã ño nyiese jê! Jesús quiato abe jêteaquiato quia jê! Espíritu Turã ngue ñee jêje resẽ. “Jesús quiato rerecuarã jê”, i que Espíritu Turã jêje resẽ. Jesús quiato jêteaquiato quia jê. Ûquí ndibishorõ ngue Jesús nguqui mondo ra. Umano mose. ²⁹ Seso mose ra emo ngaẽ ñee ñoõno jêje. Tambiirĩ irĩ, i ra jêje. Eicuã ño Ûquí nde. Nyacua rã sí. ³⁰ Jendese ra emo ndiqui. Jesús quiato mbaaquiato icuã icuã. Jesús quiato mbiirĩ irĩ. “† nda Jesús quiato siqui nanderese”, i ra Ûquí. ³¹ Jêteaquiato jê. Jaembaaquiato quiato tuchi que se. Tres años. Jê ja que jaembaaquiato quiato. Acheseo tuchi que sequia jendese. ³² Aico jendecha Dios je a. Aico jendecha Dios turã je a. jDios cheẽ turã jemumbayã mbei quia jê! Dios cheẽ nda jembuquirãcuã. Dios cheẽ nda jemingo tuchi Jesús quiato rese. ³³ Mbae isiquia que achosei chousei ãte quia mbia mbae aẽ. Mbia irao abe que achosei chiãte quia aẽ. ³⁴ Seicuate rei que equia aẽ. Se sí chõ aquiẽ quieĩ nguiã icua. Seresenda mbaerã abe que aquiẽ quieĩ quia aẽ. ³⁵ Jaembaaquiato quiato beite que se. “Jêquieĩ quieĩ”, ae beite que sequia jêje. “Mbaecha reã je mbae jemee mee”, ae que sequia jêje. Jesús cheẽ ndese jendua. “Ae mbae meeño nguia emo je, eya tuchi chõ aque re. Ae eo jenda isi, aque quia eya tuchiã jiri”, i que Jesús nande je ra, i que Pablo Efeso jenda je ra.

³⁶ Aquere que Pablo ngoi ngũĩã ndese ra. Ñee ngue Dios je ra. Ûquí ndes e ja. ³⁷ Mbia que nyese o ja Pablo rese ra. Quiaama ama ngue ra. Eritii que esiite it e ra. ³⁸ —Jemae iã nda serese cote, i que Pablo ee ra. Nyebe que eya eã tuchi

ra. Pablo rese que echoi erasaa ra. Ama ndisha rimia ndese. Pablo so rese mae.

21

Pablo nyoí Jerusalén

¹ Urecuata que ùquĩ ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue si que ureso Pátaraa cote ra. ² Huee que canoa mo chi ure je ra. Fenisia rĩ ngue esi quia ra. Aque ye que urea cote ra. Eye que ureso cote ra. ³ Chipre rese que uremae nda. Ejoõ acua. Ejii rĩ ngue ureso ra. Síriaa que ureso ra. Tiro que ure cu mbirĩ cote ra. Huee que canoa yenda jea jea ra. ⁴ Jesús quiato que urembirõ hue jenda ra. Siete días que ureico erese ra. Espíritu Turã ngue hue jenda mbucheẽ Pablo je ra. —¡Eresochĩ nda Jerusalén jê! i rei ngue Pablo je re. ⁵ Aquere que ureso cote ra. Jesús quiato que nyoí ja urerese ra. Ama nimia ndese. Eresebe echoi urerese. Nguiĩrĩ abe ruruchoi. Ama ndisha rimia ndese e que urecoi ja urenia ndese ra. Ñee ñee Dios je. ⁶ Urechiquiaama ama ja que cote ra. —Co urecua quia co, ure que ee ra. Canoa ye que ureso cote ra. Hue jenda que nyoí nyebi uchuchúaa cote ra.

⁷ Tiro si que ureso cote ra. Ureso que Tolemaida ra. Huee que urecheẽ ñee Jesús quiato je ra. Ure- itõ mii ngue erese ra. ⁸ Isamami ngue ureso cote ra. Cesaréaa que urecuasẽ nda. Felipe chuchúaa que ureso ra. Ae que Jesús cheẽ nenei neneisa ra. Ae que mbaecha reã mbuquiaru sa ra. Diáconos, i que mbaecha reã mbu quiarusa je ra. Aque chuchúaa que urecu ra. ⁹ Cuatro que Felipe rucucha ra. Eruã ja. Dios cheẽ nenei neneisa ja que ùquĩ nda. ¹⁰ Huee urecu are jiri mose que emo ndu ra. Judea si. Agabo, i que ee ra. Dios cheẽ

nenei neneisa que ae abe ra. ¹¹ Ae que tu ure je ra. Pablo numbicuasa que eisi ra. O que echucua eye ra. Hui abe que echucua ra. Pablo numbicuasa je. Ñee ngue cote ra. —Espíritu Turã ndiqui ñee ndeje a. “Í nda judíos ndecua pee Jerusalén. Nemee nda judíos eã je cote”, i que Espíritu Turã nda, i que Agabo Pablo je ra. ¹² Ure eandu mose queurecheẽ Pablo je ra. Cesarea jenda abe que ñee ee ra. —¡Eresochĩ nda Jerusalén jê! ure ja rei ngue ee re. ¹³ Pablo que ñee ure je ra. —¿Mbaerã jẽingo nyeseo seo serese re? ¿Mbaerã jẽingo sembia eãte re? ¿Mbaete ere? Sã secua Jerusalén ae. Sã seiquia Jesús rĩĩ ae, i que Pablo ra. ¹⁴ Pablo que uresiquisã aroneate ra. Nyebe urecheẽ eã nguiã e e cote. —Sã Dios ae riqui ñee ñee ee no, ure chee que ra.

¹⁵ Ureico quiatu que cote ra. Ureso que Jerusalén cote ra. ¹⁶ Jesús quiato mo abe que nyoí urerese ra. Cesarea jenda. Chipre jenda mo ngue siqui Jerusalén nda. Masón, i que ee ra. Jesús quiato tuchi que ra. Cose tuchi que eriqui Jesús rese ra. Cesarea jenda que urererao Masón nyuchúaa ra. Huee que urecu erese ra.

Pablo oso Jacobo rea

¹⁷ Jesús quiato ia tuchi que urecuasẽ mose Jerusalén nda. Ure- isi turã ngue ra. ¹⁸ Isamami ngue Pablo si Jacobo rea ra. Ure abe que ureso erese ra. Huee que amei ja chi ra. Jesús quiato rerecua. ¹⁹ Pablo que ñee ee ra. Mba e renei nenei ja ee. —Dios que siqui tuchi serese ra. Se echeẽ nenei nenei mose judíos eã je, i que Pablo Jesús quiato rerecua je ra. ²⁰ Pablo cheẽ andu mose que ñee turã turã Dios je ra. Ñee ngue Pablo je cote ra. —Jesús quiato tubiriãte que judíos cote ra. “¡Moisés cheẽ ndui si chõ nandeico jê!” i tuchi que

ũquĩ nguia ra. ²¹ Ũquĩ ndiqui ñee icuã icuã nderĩ ãquĩ. “Pablo que judíos ataque mbui Moisés cheẽ si ra”, i equia nderĩ ãquĩ. “‘Coche rei Moisés cheẽ jemumba. ¡Circuncisión jësaãchĩ jendiĩrĩ je jê! ¡Judíos ataque chisaã saã nda jësaãchĩ jê!’, i que Pablo quia judíos je ra”, i rei equia nderĩ ãquĩ. ²² ¿Mañi nande ra re? Jesús quiato ra ñumunua ja judíos. Jirandu mose ndereco mose a. ²³ ¡ĩ ere jê! Mbia cuatro que siqui urerese ra. Ũquĩ ngue ñee Dios je ra. “Ã nda uresaã ndeje”, i que ãquĩ Dios je ra. Ũquĩ nda esaã ee cote. ²⁴ Ũquĩ erao Dios chuchúaa. Ũquĩ na si esaã nde abe. Nembuturã sacuã. Mbae isiquia emondo ee Dios chuchúaa. Queñi ua sia cote. ¡ ere quiatu. Mbia ra jirandu jate nderese. “Pablo abe riqui Moisés cheẽ mumbayã tuchichĩ nande rã si”, i ra nderĩ cote. ²⁵ Judíos eã je que nandechẽ Jesús quiato je. Nandechẽ mi ño ngue nandemondo ee. ¡ nande chõ ngue ee. “Mbia soo mondo mondo mose dios mo je, ¡aque soo ra jëuchĩ jê! ¡Eruqui resebe ra soo jëuchĩ jê! ¡Mbae ruqui ra jëuchĩ jê! ¡Jeninisi rese rocoĩ nda jëingochĩ emo ndese jê! ¡Jendu rese rocoĩ nda jëingochĩ emo ndes e jê!” nande que judíos eã je, i que Jesús quiato rerecua Pablo je ra.

Soldados rerecua Pablo isi

²⁶ Pablo que ãquĩ cuatro querao cote ra. Dios chuchúaa que ererao ra. Isamami ngue Pablo ñĩmbitirõ nda. Ũquĩ cuatro rese. Oso que ñee Dios chuchua rerecua je cote ra. —Aque mose ra mbae mo ureiquia Dios je cote, i que Pablo ee ra. ²⁷ Siete días que echĩ huee ra. Judíos mo ngue mae Pablo rese cote ra. Asia jenda mo. Dios chuchúaa Pablo chĩ mose que judíos mae erese ra. Ũquĩ ngue

mbia mbĩcuã Pablo je ra. Oo que Pablo rese ra. Isi que ra. ²⁸ Tasẽ tasẽ ngue ñee mbia je ra. —¡Israel jenda! Jenyu rã urerese. Pablo nandeisi rã. Ae quia oso oso beite nguiã ñee icuã icuã judíos rĩ. Moisés cheẽ ni i abe quia eriqui nguiã ñee icuã icuã mbeite. Dios chuchua rĩ abe quia eriqui nguiã ñee icuã icuã mbeite. Judíos eã mo abete quia equeruchĩ nguiã Dios chuchúaa. Dios chuchua mbĩcuãte nyeresẽ, i que mbia paama i Pablo je ra. ²⁹ Pablo quia ñi siquichĩ nguiã Trófimo ndese. Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguia ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je. ³⁰ Hue jenda que ñĩmbĩcuã tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra. ³¹ Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serĩte quia pee, i que oso ee ra. ³² Soldados rerecua que soldados munua nda. Oficiales abe no. Nyoĩ asi que mbia icuã ndea cote ra. Mbia que Pablo iruã nua eã cote ra. Soldados rese mae mose. ³³ Ererecua que oso Pablo rea ra. Pablo isi que ra. —Echucua cadenas je, i que soldados je Pablo rĩ nda. Ererecua que ñee mbia je cote ra. —¿Aba co re? ¿Mbae icuã esaã jêje re? i que mbia je ra. ³⁴ Hue rĩ ja mbia ñee eã ee. Mbia que ñee ata ata ee ra. Tasẽ tasẽte que ñee ee ra. Ñee ñooño ererecua je. —¿Mbae ra aba icua jeñee nde? i chee que ererecua mbia je ra. —Pablo jenya mbĩrĩ na cuartel, i que ererecua soldados je ra. ³⁵ Pablo ruruchoi que ra. Ngasẽ ngue eiquesa rurubi cote ra. Hue que mbia icuã icuã sí

Pablo je no nda. Nyebe soldados ecuruchoi nguiã sui cote. ³⁶ Mbia que tasê tasê ngaê nguiã erui ra. —jêiquia rei ae! i que mbia cuaê nguiã erui ra.

Pablo ñee mbia cuabê je

³⁷ Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheê na, i que ererecua je ra. ³⁸ Ererecua que ñee Pablo je cote ra. —¿Griego cheê ereicuate nde re? Egipto jenda ereico reí seje. Ae eicuã icuã ndiqui gobierno je, ¿ũquĩ nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra. ³⁹ Pablo que ñee ee ra. —Tei. Judío chõ se re. Tarso jenda chõ se re. Sucha tubiriã tuchi que Tarso de Cilíciaa ra. Tacheê na mbia je, aechi nguiã ndeje, i que Pablo ererecua je ra. ⁴⁰ —Eno. Echeê ee, i que ererecua ra. Eironguia ibate rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheê ngue esaã mbia je ra.

22

¹ —Seataque, seandu rã. “Eicuã”, jenyechi nguiã seje. Nyebe tacheê jêje, i que Pablo ra. ² Pablo judíos cheê naa mose, mbia que quiriri ja tuchi cote ra. Pablo que ñee mbei mbia je ra. ³ —Judío chõ se re. Társoo que achaacuquia ra. Tarso de Cilícia. Aa que atiarõ nda. Jerusalén ngue atiarõ nda. Gamaliel que sembaaquiatusa ra. Nanderamei ndui si que sembaaquiatu quiatu ra. Eraã si. Dios cheê ngue amumba sereã tuchi ra. Sã jêingo namo ã no. ⁴ Seicuã tuchi que eriqui Jesús quiato je nyii ra. Emo emo ngue aiquia chee ra. Emo emo ngue aru aru quia tarõ nda. Mbia ninisi abe que atarõ tarõ nguiã

ra. ⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarõ ña. Aa nda aru nguiã eiruã nua ña. Jenderecua ũquĩ icuate raque. Jeñee ee ae.

Aico uba Dios rese co cote, i Pablo

⁶ Acuasê nda Damáscoo chã nde. Tenda ibate que tata mo tu sere-sae ra. Ibate si que eru ra. Tata rendi que seresae tuchi ra. Sembua tuchi que ra. ⁷ Tata rendi rese mae mose que acoi oso íbii ra. Echeê mo ngue achandu ra. “Saulo, Saulo. ¿Mbaerã ndeicuâte riqui seje re?” i que seje ra. ⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuâte riqui”, i que seje ra. ⁹ Seresenda que siquiche tuchi ra. Mae ndei ngue tata rese re. Echeê nguiã echanuate nguiã. ¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasê oso cote. Damáscoo. Mbae riñ nda acheê ja ndeje huee cote”, i que Jesús seje ra. ¹¹ Tata rendi que seresa mungue ra. Seresayã. Nyebe seresenda sererao nguiã seo rese. Damáscoo.

¹² Huee que emo ndiqui i ra. Ananías, i que ee ra. Moisé s cheê ngue emumbayã tuchi quia ra. Judíos hue jenda que ñee turã ja quia ee ra. ¹³ Ananías que tu serea ra. Ñee ngue seje ra. “Saulo, Jesús quiato ereico co cote. Emae cote”, i que seje ra. Seresa turã ngue cote ra. Amae ngue erese cote ra. ¹⁴ Ananías que ñee seje ra. “Nanderu rerecua que Dios ra. Dios que ndeisi cose ra. Ae Dios chosei quia, ũquĩ icua sacuã ngue Dios ndeisi cose ra. Jesús turã ndese mae sacuã ngue ndeisi cose ra. Jesús

cheẽ andu sacuaã ngue ndeisi cose ra. ¹⁵ Dios cheẽ nda eresenei senei mbia ja je cote. Ae erechandu, ãquĩ nda eresenei senei mbia ja je cote. Ae rese eremae, ãquĩ nda eresenei senei mbia ja je cote. ¹⁶ ¿Mbaerã ereico chõte a re? Ehuã na. Sã Jesús quiato bautizar i ndeje. Echeẽ na Jesucristo je. Sã Dios ndeicuã mbutiã”, i que Ananías seje ra.

Dios que atea cuu ra, i Pablo

¹⁷ Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra. ¹⁸ Jesús que atea ra. Ñee ngue seje ra. “Eso asi Jerusalén si. A jenda ra ndecheẽ mumba mumbate, nde serenei nenei mose. Eso erecha” i que Jesús seje ra. ¹⁹ Acheẽ ngue Jesús je ra. “Sererecua, a jenda que seicuate nyii ra. Seicuãte que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra. ²⁰ Mbía Esteban iquía mose, seyate que ãquĩ mose ra. Huee que aico ra. Eiquiasa irao que asaarõ nda”, ae que Jesús je cuu ra. ²¹ Jesús que ñee seje ra. “Eso. Taremondo ishõ. Secheẽ nda eresenei seneite judíos eã je”, i que Jesús seje ra, i que Pablo mbia je ra.

²² Judíos eã ñii ñee mose que mbia nyiibute cote ra. Pablo cheẽ andu sereã cote. —¿Pablo nandeiquia rei jê! f nda eriquiã cote, i que judíos tasẽ tasẽ nda. ²³ Mbía paama i ja Pablo je. Tasẽ tasẽ. Huiã mbaaba aba. Ibi tuba ara ara mombo mombo ibate. ²⁴ Soldados rerecua que ñee cote ra. —Pablo jendao matã. ¿Nandeiruã nua jê! f nda ñee, i que ererecua ra. —¿Mbaerã mbia ñee icuã icuã ndeje re? i Pablo je. ²⁵ Soldados que Pablo chucua ra. Iruã nua nda eña nde. Pablo que ñee capitán je cote ra. —¿Mbaerã nda seiruã nua nde? Romano ño se resẽ. Mbae icuã asaã eãte resẽ, i que ra. ²⁶ Capitán

ngue oso ererecua mbiirandu cote ra. Pablo cheẽ nguire. —¿Ereiruã nuachĩ nda jê! Romano ño ae re, i que capitán nda. ²⁷ Ererecua que oso ñee Pablo je cote ra. ¿Romano nde re? i que ee ra. Ae, i que ee ra. ²⁸ Ererecua que ñee mbe ee ra. —Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. —Romano mbei chõ se re. Sechiacuquia mosenda bei, i que ra. ²⁹ Pablo iruã nua eã ngue cote ra. Mbía que hui esi cote ra. Mbía siquiche ja tuchi que cote ra. —Pablo nandechucuachĩ. Romano ño eriqui re, i que mbia cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheẽ andu

³⁰ —¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. ãquĩ ererecua ñee sacuaã ee.

23

¹ Pablo que mae huĩ ererecua ja rese ra. Ñee ngue ee ra. —Seresenda, mbae turã ndese aico bei co. Namõ abe. Nyebe sesiquicheã mbei riqui Dios si co, i que Pablo ra. ² Ananías, i sacerdote rerecua je. Aque que ñee Pablo ji jenda je ra. —Pablo churu rese jengua, i que ra. ³ Pablo que ñee ee cote ra. —Dios ra ucua nderese jê. Ndeturã eresaã ñooñochoi nguia. “¿Moisés cheẽ nda jemumbachĩ jê!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguia seriĩ. Moisés cheẽ mumba, i que Pablo ee ra. ⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emingo rei a resẽ, i que Pablo je ra. ⁵ Pablo que

ñee ee ra. —Sacerdote rerecua eã eriqui rei nguiã seje. 1 nda acheẽ eãte eriĩ. Aicuayãte quia ñi se re. “Jenderecua riĩ jẽingochĩ nguiã ñee icuã”, i rei que Dios ñee nande je resẽ, i que Pablo ra.

6 Hue riĩ ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguiã ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguiã co. Ũqui je chõ mbia riqui nguiã paama i seje. Ũqui je chõ ngue sereru nguiã jẽje, i que Pablo ererecua je ra. 7 Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda. 8 Saduceos que ñee nguiã ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siqui ã ndesẽ. Mbia aĩ abe siqui ã ndesẽ, i que fariseos ra. Nyebe ererecua ñee icuã icuã nguiã nyue. 9 Tasẽ tasẽ tuchi que nyue ra. Fariseos mo ngue juã ñee nda. Ũqui ndei embesasa. Ñee ngue Pablo riĩ nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ũqui mose ra nandeico turã Dios je abe, i que fariseos ra. 10 Mbia que ñe e icuã icuã mbei chõchĩ nguiã nyue. Soldados rerecua ireĩte que eriqui ra. Mbia que Pablo iquia serĩte quia ee ra. Nyebe ñee soldados je. —Jẽso Pablo rea. Jendao rã jenyuchúaa, i que ererecua soldados je ra.

11 Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandeiquia, i rei mbia

12 Isamami ngue judíos ñee ja nyue ra. —¡Pablo nandeiquia jẽ! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuch i que judíos ñee nyue ra. 13 Ae Pablo iquia serĩte quia, ũqui cuabẽte que ra. Cuarenta que ra. 14 Ũqui ngue nyoĩ ja ñee mbia rerecua je ra. Sacerdote rerecua je abe no. —Mbae mo nda ureu eã mbei, Pablo iquiayã mbei mose. Chã Dios urembasi, Pablo iquiayã mose. 15 “¡Pablo embu ure jẽ!” jenyẽ soldados rerecua je. “Pablo rese uremae na”, jenyẽ soldados rerecua mbiĩri irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

16 Pablo nongue riirĩ ngue jirandu erese ra. Aque que oso Pablo mbiirandu ra. Soldados chuchúaa. —¡Mbia ra nyiquitirõ tirõ nderese jẽ! ¡Ndeiquiachĩ nda jẽ! i que Pablo je ra. 17 Nyebe Pablo ñee soldado mo je ra. —Senongue riirĩ erao ndererecua je. Ñee nda ndererecua je chã, i que Pablo ra. 18 Nyebe ererao nguiã nguerecua je. —Pablo que acuanindu mbu ra. Mbae i chõ nda ndeje, i nguerecua je. 19 Ererecua que acuanindu querao eo rese ra. Pe jiri que eñi ñee ee ra. —¿Mbae ere u ñee seje re? i que ererecua ra. 20 Acuanindu que ñee ererecua je cote ra. —Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”, i ra nembĩrĩ irĩ. 21 Ñee ñooño nda ndeje. ¡Echeẽ nda eremumbayãchĩ jẽ! Judíos cuabẽ nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, i tuchi judíos, i que acuanindu ererecua

mbiirandu ra. ²² Soldados rerecua que ñee acuanindu je ra. —¡Equiriri chõ oso! ¡Erecheẽchĩ nda emo je jẽ! i que ee ra.

Pablo mondo ererecua Félix je

²³ Ererecua que ñee ererecua ataque mo je cote ra. —Sã soldados icoquiatsu. Sã echoi Cesarea itondáruu. Sã doscientos choi ibi rĩ. Sã setenta choi ticuasú ato. Sã doscientos choi ira racuatirõ ji rerecua. Cesarea ra jẽso itondaru, i que soldados rerecua ñee nda. ²⁴ —¡Ticuasú jẽisi mua Pablo rendacuã jẽ! ¡Pablo jendao turã nguia jẽ! Jendao turã ererecua Félix je, i que soldados rerecua ra. ²⁵ Embesa ji que emondo Félix je ra. ¶ ngue carta mbesa ra: ²⁶ —Se rei Claudio Lisias. Co ambesa quia ndeje co, Félix. Mbia rerecua tuchi quiarei nde. ²⁷ Co amondo quia ndeje co. Pablo, i equia ee. Judíos eisichĩ neaẽ. “Nandeiquia”, i rei ereaẽ. Se chõ ngue asiquisã nguia. Romano ndei ae. Nyebe mbia asiquisã nguia esi. ²⁸ Judíos rerecua chumunua mose que Pablo arao ee ra. “¿Mbaerã mbia icuat e riqui Pablo je re?” ae rei ngue ñee ererecua je re. ²⁹ “Pablo nandetarõ”, i rei que judíos quia ra. “Pablo nandeiquia”, i rei que judíos quia ra. Pablo siquĩã ndaque mbae icuã ndese. Judíos cose ndare cheẽ nguire chõ ngue judíos paama i Pablo je ra. ³⁰ Airandu que erese ra. “Judíos ra Pablo iquia”, i que mbia mo ñee seje ra. Nyebe aico nguia Pablo mondo ndeje aque. Ae eicuã icuãte riqui Pablo je, ñquĩ je que acheẽ nda. “Jẽso quia ñee Félix je”, ae chõ ngue ee ra. Hasta luego. ¶ ngue carta mbesa ra.

³¹ Soldados que Pablo curuchoi isa ra. Nguerecua cheẽ nguire. Ngasẽ ngue Antípatris ra. ³² Soldados que nyoĩ ibi rĩ, ñquĩ ngue ngaẽ nyebi isamami nda. Ae nyoĩ ticuasú ato, ñquĩ ngue nyoĩ bei ngasẽ Pablo ruruchoi

ra. ³³ Ngasẽ ngue Cesaréaa ra. Soldados rerecua chimbese que emondo mbia rerecua je ra. Pablo abe que emondo mbia rerecua je ra. ³⁴ Mbia rerecua que mae huĩ carta echimbese rese ra. —¿Ma jenda nde re? i que Pablo je cote ra. —Cilicia jenda rei se, i que Pablo ee ra. ³⁵ —Ae ñee icuã icuã nguia ndeje, ñquĩ ngasẽ mose ra ndecheẽ achandu ja, i que ererecua Pablo je ra. —Pablo jẽteaquiatsu tuchi Herodes chuchúaa, i que soldados je cote ra.

24

Judíos ererecua mbĩcuãse Pablo rĩ

¹ Cinco días mose que sacerdote rerecua ngasẽ Cesaréaa cote ra. Ananías, i equia sacerdote rerecua je. Ererecua ataque mo ngue ngasẽ erese ra. Tértulo abe que ngasẽ erese ra. Abogado rei Tértulo. Ngasẽ ngue ecuaẽ ñee ñooño Félix je ra. Pablo rĩ. ² Soldados que Pablo curucuaẽ ererecua chumunua mose ra. Tértulo que ñee icuã tuchi Pablo rĩ cote ra. Ererecua nda embĩcuã nguia Pablo rĩcharã ña. Ñee ngue ererecua je ra. —Ndeturãte eriqui ure je co, Urererecua. Ndeaquiatute eriqui ur e je co. Urembate equia co. ³ Nyebe “iaanye” ure bei nguia ndeje co, Félix. ⁴ Ureandu mbirĩ na. Urecheẽ oco eã nda ndeje nye. ⁵ Pablo quiarei siqui chooñoa judíos je. Judíos mbuchesea sea ja. Embĩcuã icuã uchue. Nazarenos, i que judíos ataque mo je ra. Ñquĩ nderecua rei Pablo. ⁶ Pablo que Dios chuchua mbĩcuã serĩte rei ra. Nyebe ureisi nguia. Urerao rei que judíos rerecua chumunua mose ra. ⁷ Lisias tu chõchĩ soldados rurucuaẽ cote. Ureriquisã. Pablo rirõ icuã ureo si. ⁸ “Jeñee ño oso Félix je”, i que Lisias ure je ra. Echeẽ Pablo je no.

Ereirandu ra Pablo rese cote. Eicuã ndese, i rei que Tértulo Félix je ra. ⁹ —Ae beite, i ja judíos Tértulo cheẽ mose. Ñee icuã icuã ja Pablo rĩ.

Pablo ñee ererecua Félix je

¹⁰ Ererecua que ñoomee Pablo je cote ra. —Nde echeẽ seje cote, i chõ ñoomee nguiã ee. Pablo que ñee ee cote ra. —Urererecua ima nde. Ndeaquiatute. Nyebe sebite riqui nguiã secheẽ mose ndeje. Ñe gue ñee ñooño nguia seriĩ nda. Echeẽ tasibishorõ ndeje. ¹¹ Namo jiri que aso Jerusalén nda. Doce días. Acheẽ ñee ngue oso Dios je ra. Echeẽ ñee mbia je ae. Sã mbia nembiirandu ae. “Ae beite” i ra mbia ndeje. ¹² Emo je que aico ñee icuã icuã eãte Dios chuchúaa ra. Mbia que ambucheẽ icuã eã nguia nyue ra. Judíos chumunuásaa que aico eã mbia mbĩcuã icuã nda. Mbia chuchua ite re abe que aico eã mbia mbĩcuã icuã no nda. ¹³ Ñe ñee ñooño ño nguiã seriĩ. Ñe mae ãte seicuã mo ndese resẽ. ¹⁴ Aque mĩ ndese chõ aico resẽ. Dios cheẽ yasu rui bei chõ aico nguiã co. Dios cheẽ yasu quiarei eicuã eã. Dios rei ureru rerecua bei. Co aico Dios icua co. Co aico Moisés cheẽ icua co no. Co aico Dios cheẽ mbuchecuasa chimbesa icua co no. ¹⁵ Co aico Dios icua ñqui na si co. Mbia raaque ra quera si no. Ñqui aicuate. Mbia icuã nda quera si. Mbia turã na si. Quera ja chõ ndae. ¹⁶ Nyebe aico Dios cheẽ ndui bei co. Nyebe sechiã cuaãcuã i eã Dios si. Mbia si abe. ¹⁷ Cosete que aso a si ra. Muchos años. A achube a cote. Mbae mee mee sacua mbaecha reã je. Seresenda je. Dios je abe mbae mee. ¹⁸ Achimbuturã ngue Dios chuchúaa ra. Mbia eãsa. Mbia ambĩcuã eã. Judíos Asia jenda que mae sere se ra. Dios chuchúaa. ¹⁹ Sã ñqui ngaẽ serenei ndeje. Seicuã mose, sã ñqui ngaẽ ñee ndeje. ²⁰ Sã ã abe ñee ndeje. Seruruchoi rei que judíos rerecua chumunua mose ra. Mbae i ãte que seje ra. “Mbae icuã

ngue eresaã nda”, i eã ngue ererecua seje ra. ²¹ “Mbã mano je ra quera si, ae chõ ndei nguiã co. Ñqui je chõ ngue sereru nguiã jẽje”, ae que ererecua je ra. Ñqui i equia seje reae, i que Pablo Félix je ra. Félix rei ererecua.

²² —Emo mose ra acheẽ ndeje, i que Félix Pablo je ra. Félix jirandu tuchi rei Jesús chimbaaquiatsu rese reaẽ. —Sã soldados rerecua ru rã. Huee quia nda acheẽ nguiã cote. Mañi ño nda aba ndeje cote, i que ererecua Pablo je ra. ²³ Félix que ñee capitán je cote ra. —Pablo jẽteaquiatsu bei jẽ. Jẽhui jẽhui jiri esi. Sã equiatsu ngaẽ ngaẽ erea. Mbae mondo mondo ee, i que Félix ra.

²⁴ Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendurã. Pablo cheẽ tachandu rã. Jesucristo rĩ tachandu, i que Félix ra. ²⁵ Pablo que tu ñee ee ra. —Sã mbia siqui turã Jesús rã si. Sã mbia ñimbirãcuã mbae icuã si. Dios ra mbia icuã mbuchao, embasi sacua, i tuchi que Pablo Félix je ra. Félix chiã ngue cuaãcuã i Pablo cheẽ mose ra. Nyebe ñee Pablo je. —Eso cote. Serecochi mose ra achembe ndeje, i que Félix Pablo je ra. ²⁶ —Pablo ra mbae isiquia mondo chee seje. Se embui sacua, i rei que Félix ra. Nyebe Félix “echu” i i bei nguiã Pablo je. ²⁷ Eĩ mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei mĩ nda. —Ñ nda judíos paama iã seje, i que ra.

25

Pablo ñee ererecua Festo je

¹ Festo que ngasẽ Cesaréaa cote ra. Félix rendaque re, mbia rerecuarã. Tres días mose que esi Jerusalén cote ra. ² Huee que sacerdote rerecua ñee icuã ja Pablo rĩ nda. Judíos rerecua abe ñee icuã

ja Pablo riĩ. Festo je ñee ñee Pablo riĩ. ³—Urembia jiri rã. Pablo eru Jerusalén, i ja rei que sacerdote rerecua Festo je ra. Iquía nda eña nde. Ñeenda cúaa. ⁴—Pablo tarõ ji ñi Cesarea pee. Aruã nda se. Namo jiri ra aso pee, i que Festo ra. ⁵—Sã jenderecua abe nyoĩ serese Cesaréaa. ¿Mbae jenyé quia Pablo je re? ¿Mbae icuã esaã nde? Nyao pee teñee seje, i que Festo ra.

⁶ Festo que siqui mbirĩ Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. —Pablo jendu rã. Echeẽ tachandu cote, i que mbia je cote ra. ⁷ Pablo que ique cote ra. Judíos Jerusalén jenda que ñee icuã icuã Pablo riĩ nda. Maende rocoĩ mbae icuã naa mose. Ñee ñooño eriĩ. ⁸ Pablo que ñee echeẽ mose ra. Judíos cheẽ ngue esibishorõ nda. —Mbae icuã mo asaã eãte resẽ. Judíos chimbésa amumbayãte resẽ. Romanos nderecua cheẽ amumbayãte no ndesẽ. Dios chuchua abe ambicuaã eãte no ndesẽ, i que Pablo ra. ⁹ —¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. —Í nda judíos paama iã seje. Judíos tambia jiri, i que equia ndua ra. ¹⁰ Pablo que ñee ee ra. —Romanos nderecua raque jẽ. Aico raque jẽsaa a. Jẽ nguiatu jeñee seje. Á jẽingo raque seicuate ã. Mbae icuã mo asaã eãte judíos je resẽ. ¹¹ Se mbae icuã naa tuchi mose, i seiquia se jẽ! Judíos ñee ñooño mose seriĩ, ¿mbaerã nda semondobe judíos je re? Semondo aroneate ee. Ererecua tuchi je semondo rã. Sã ae quia ñee seje, i que Pablo Festo je ra. ¹² Festo que ñee nyecuayã cuayã nguesenda je ra. Aquere que ñee Pablo je cote ra. —“Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheẽ tachandu, i Agripa

¹³ Aquere que Agripa si Cesaréaa ra. Ererecua rei ae. Berenice rese que esi ra. Festo rea. ¹⁴ Huee que itõ mocoĩte ra. Festo que Agripa mbiirandu ja Pablo riĩ nda. —A emo tarõ ji ñi a. Félix que etarõ mii nda. ¹⁵ Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee icuã icuã tuchi Pablo riĩ. ¹⁶ Acheẽ ndei ngue ee re. “Tei. Mañi ae ra mbia mo iquiachõ nde. Mbia eicuã nenei eã mose seje. Ae ñee icuã nguia eriĩ, sã ùquĩ ngaẽ ñee ee. Sã ñee nguia nyue sésaa”, ae que ee ra. ¹⁷ Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rã”, ae que isamami serimba je cote ra. ¹⁸ Pablo ucuayãsa que juã ja rei cote ra. Ñee icuã tuchite rei nda Pablo riĩ seje. Pablo chisaã icuã mo ngue embuchecuayã ñochĩ nguiã seje. “Mbia ra Pablo mbicuaã tuchichĩ nde”, aechĩ ngue se re. ¹⁹ “Judíos rã eã ño Pablo. Judío ndua rã eã ño Pablo riqui nguiã ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús riĩ nda. “¿Jesús que quera si manonde ra’, i que Pablo judíos je ra”, i que Festo Agripa je ra. ²⁰ —“¿Mañi ae ra se re?” aete que se ra. Nyebe que acheẽ ee ra. “¿Ndeso sereãte Jerusalén nde? Huee quia nandechẽ”, ae rei que ee ra. ²¹ “Sã ererecua tuchi quia ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite mii nguiã, i que Festo Agripa je ra. ²² Agripa que ñee ee ra. —Se abe nda aque cheẽ achandu rã ña, i que Festo je ra. —Eno. Isamami nda echeẽ erechandu cote, i que Festo ra.

²³ Isamami ngue Agripa huiirao turã mingue ra. Berenice rese.

Ererecua irao. Ererecua ataque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. —Pablo jendu cote, i que Festo mbia je cote ra. ²⁴ Festo que ñee cote ra. —Tacheẽ ndeje, Agripa. Jẽ abe je tacheẽ, mbia rerecua. A eriqui a cote. Pablo, i equia ee. Ae rĩĩ judíos riqui ñee mbeite seje. “Eiquia”, i bei seje. Jerusalén jenda abe ñee mbei erĩĩ. Cesarea jenda rã. “Sã mano”, i bei seje. ²⁵ ¿Mbae rĩĩ nda aba eiquia re? Mbae icuã mo esaã eãte resẽ. Ae quiarei ñee. “Semondo rã ererecua tuchi je”, i que Pablo seje ra. Nyebe tamondo ee. ²⁶ ¿Mbae i ra aba embesa mondo ee re? Mbae icuã ngue esaã eãte. Nyebe Pablo aru nguiã jẽje a. Ndeje chõ ngue aru nguiã, Agripa. Echeẽ ee. ¶ nda eicuã erembuchecua. ¶ nda eicuã ambesa mondo ererecua tuchi je. ²⁷ ¿Ma nda aba etarõĩ mondochõ nde? Eicuã mbesa iriã mose, i que Festo Agripa je ra.

26

Pablo ñee ererecua Agripa je

¹ Agripa que ñee Pablo je ra. —¿Mbae i mbia quia ndeje re? Nde quia echeẽ cote, i Agripa. Pablo que o suĩ ñee ee ra. ² —Secheẽse rete ndeje, Sererecua. Judíos que ñee icuã tuchi quia serĩĩ nda, Sererecua. ³ Nde quiarei ureicuasa tuchi. Judíos icuasa tuchi nde. Urecheẽ icuã icuã ereicuate nde. Nyebe nderoseĩ nguiatu rã secheẽ andu.

⁴ Judíos maesate raque se, señetẽ mosenda bei. Sererecua quti. Jerusalén abe. ⁵ Se rei fariseo. Setiarõ namo mosendachõ ndei fariseo se. Judíos seicuate raque. Fariseos achõ ño ureramei ñee mumbayã mbei. ⁶ “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguiã ee. Ñquĩ nĩ ño judíos riqui nguiã seucuyã ã. Ñquĩ nĩ ño mbia riqui

nguiã ñimbĩcuã seje ã. ⁷ “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui bei nguiã echeẽ ndui si ã. “Mbia raaque ra Dios mbuquera si”, ae sequia se abe co. Ñquĩ je chõ judíos icuã icuã ndiqui nguiã seje, Agripa. ⁸ ¿Jẽ abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

⁹ Se abe que seicuã icuãse rete riqui Jesús quiato je cose ra. Nazaret jenda chõ Jesús re. ¹⁰ Seicuã icuãte que ee Jerusalén nda. Sacerdote rerecua que ñee seje ra. Nyebe ngue aico nguiã Jesús quiato tarõ tarõ mbeite cose. Sacerdote rerecua cheẽ nguire. Jesús quiato iquia iquia mose, “coche rei” ae que sequia ra. ¹¹ Jesús quiato que airuã nua tuchi quia ra. “¶ nda hui Jesús si”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacuã. Judíos chumunuasa mbuchesea sea. Paama ae tuchi que sequia Jesús quiato je nyii ra. Isho tuchi que aico oso oso Jesús quiato requia ra. Seicuã tuchi sacuã ee.

Aico uba Dios rese co cote, i Pablo

¹² Emo mose ngue aso rei nguiã Damáscoo. Sacerdote rerecua semondo mose. ¹³ Tacheẽ tuchi ndeje, Sererecua. Tenda nandeite re mose que tata mo tu seresae ra. Ibate si que seresae ra. Seresenda abe resae. Tata rendi que ureresae tuchichĩ nguiã tenda si. ¹⁴ Tata rendi rese ma e mose que urecoi íbii ra. Echeẽ mo ngue achandu ra. Hebreo cheẽ. “Saulo, Saulo, ¿mbaerã ndeicuãte riqui seje re? Nde sí chõ erechimbasi mbasi nguiã aque. Ticuasú rã tuchi quiarei nde aba cheẽ mumba mose. Sã ticuasú riqui nambacua mbuti no. Sã eriqui hui mbaba

ira racua echi no. Ũquĩ na tuchi quiarei nde”, i que seje ra. ¹⁵ “¿Aba nde re?” ae que ee ra. “Jesús rei se. Ae je ndeicuãte riqui”, i que seje ra. ¹⁶ “Ehuã na. Aico nyecua ndeje a. Serenei nenei sacua mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ũquĩ abe teresenei senei mbia je. ¹⁷ Judíos eã je taremondo. Secheẽ nenei nenei sacua. Ũquĩ o taisi eicuã icuã mose ndeje. Judíos o abe taisi eicuã icuã mose ndeje no. ¹⁸ Taremondo judíos eã je. Terembaaquiato quiatu. † nda eriquiã mbae icuã ndese. † nda eriqui mbae turã ndese. † nda eriquiã aba mbiĩrĩ iĩĩsa rui. † nda eriqui Dios rui. † nda Dios icua. † nda eicuã ambutiã esi. † nda Dios ũquĩ ngue recoe umbaerã”, i que Jesús seje ra.

Pablo Dios cheẽ senei tuchi Agripa je

¹⁹ Ibatenda cheẽ ngue amumbayã nda, Agripa. ²⁰ Dios cheẽ ngue asenei senei tuchi mbia je ra. Mbía Damasco jenda je. Jerusalén jenda je abe no. Judea rurubinda je abe no. Judíos eã je abe no. “¡Jẽicuã si jẽhui chõ jẽ! Dios icha rui jẽingo. Jẽingo turã. ‘Dios icha rui eriqui’, i nda mbia jẽje chã”, ae que ee ra. Embaaquiato quiatu. ²¹ Nyebe judíos seisi nguiã Dios chuchúaa. Nyebe eriqui nguiã “nandeiquia” i seje. ²² Dios que serea quiatu bei quia ra. Namó abe. Nyebe aico echeẽ nenei nenei mbei mbia ja je. Mbaecha je. Mbaecha reã je abe. Moisés cheẽ ndui si aico ñee ñee mbia je co. Dios cheẽ mbuchecuasa rui si aico ñee ñee mbia je co. ²³ † ngue Dios cheẽ mbuchecuasa embesa cose ra: “Mbía ra Cristo mbasi mbasi. Aquere ra mbia eiquia. Ae rane nda quera si mbia raaque si. Ae ra mbia mbiirandu nguco mose uquera riĩ. Judíos mbiirandu.

Judíos eã ab e mbii randu”, i que Dios cheẽ mbuchecuasa mbia je cose ra, i que Pablo Agripa je ra.

²⁴ Festo que ñee Pablo je cote ra. —Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra. ²⁵ —Aquiachã eãte se resẽ, Festo. Acheẽ nyecuate raque jẽje. Dios cheẽ tuchi chõ asenei nguiã jẽje co. ²⁶ A Agripa riqui raque a. Nandererercua tuchi. Echeẽ ee. Ae riĩ aico ñee jẽje, ũquĩ ngue Agripa icua tuchi ra. Nyebe sesiquiche eãte riqui nguiã ñee ee. Secheẽ icua jate equia co. Jesús que ñee nyecuayã eã mbia je ra. Jesús mbae saã nyecuayã eã, i que Pablo ra. ²⁷ —¿Dios cheẽ mbuchecuasa cheẽ ndebite re, Agripa? Ndebite que ra, i que Pablo ee ra. ²⁸ —“Jesús quiato ra nde cote”, ¿erechĩ equia seje re? i que Agripa Pablo je ra. ²⁹ Pablo que ñee ee ra. —Nde mii eã. Seandusa ja. A jengu ja a. Jesús quiatorã na jẽ, se rã si, aechĩ nguiã jẽje. Jengasa ra chi eã nguiã, se rã si, i que Pablo ra.

³⁰ Pablo ñeende que ererecua juã cote ra. Agripa. Festo abe. Berenice abe. Ae chi ngoi erese, ũquĩ abe que juã nda. ³¹ Nyoĩ que pe jiri cote ra. Ñee ñee nyue. —Pablo mbae icuã saã eã tuchi chõ nguiã re. Eiquia aroneate quia eriqui re. Etarõ abe aroneate quia eriqui re, i que ererecua nyue ra. ³² Agripa que ñee Festo je ra. —“Semondo rã ererecua tuchi je”, i chõchĩ Pablo. † nda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

27

Pablo mondo Roma quiti

¹ —Pablo tamondo Italia, i que ererecua ra. —Jẽisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que ũquĩ soldados

je ra. Emo abe que ecuruchoi isi ra. Se abe que aso erese ra. Lucas rei se. ² Aristarco abe que oso urerese ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quti que urecuata ra. Sucha mbuchesea sea sacua hue jenda. ³ Isamami ngue urecuasẽ Sidón cote ra. Julio turãte que Pablo je ra. Ecuatasa que eriqui ra. Nyebe Pablo si uquiato rea. Equiatio que etequiatio ra. ⁴ Urecuata si que ama ndui ra. Quiririã ngue ureriquisã nda. Canoa mbucuatayã. Nyebe ejoõ acua mo uresichã nguiã. Eibichi que ureso quia cot e ra. —I nda quiririã nandembutiba eã, ure que ra. Chipre, i que ejoõ je ra. ⁵ Cilicia que urechucua cote ra. Panfilia abe que urechucua nda. Urecuasẽ ngue Mira cote ra. Licia, i que ibi je ra. ⁶ Huee que soldados rerecu canoa cuasu nongue tea ra. Alejandría jenda rei canoa. —Oso ra Itália, i que ure je ra. —Aque ye jẽngue, i que ure je ra. Ae ureso nguiã eye cote. ⁷ Ureitõte que oso quia ra. Ureque atate que ama ndisha rasa ra. Urecuasẽ nyee que Gnídoo ra. Quiririã mbeite que ureruba quti ra. Nyebe ejoõ acua mo uresichã nguiã. Creta, i que ejoõ je ra. Salmón ngue urechucua nda. ⁸ Ejoõ acua que uremama jiri ra. Quiririã icua icua ngue ure je ra. Buenos Puertos que urecuasẽ cote ra. Lasea, i que hue rurubinda je ra. Sucha tubiriãte que ra.

⁹ Ureitõ mocoite que huee ra. Quiririã tuchite chee que ra. Aba ireite que quiririã cote ra. Ama mose. Nyebe que Pablo ñee mbia je ra. ¹⁰ —Nandecuata i i mose ra canoa ñimi nande je. Mbae ra ñimi ja canoa yenda. iNande abe ra nandemanochi jẽ! i que Pablo ee ra. ¹¹ Soldados rerecu que Pablo

cheẽ mumba ra. Canoanya cheẽ mumbayã. —Nyao rei, i que soldados rerecu ra. ¹² —Canoa ndua icuãte a. Quiririã aronea. Nyao rei a si. Ma nandecuasẽ ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. —Nandecuatasã jirichĩ cote, i que ureataque ra. Canoa que embucuata cote ra. Ejoõ acua ibi que ureso quia ra. ¹⁴ Urecuata ramo mose que quiririã icua tu ure je ra. Ejoõ acua quti que eru ra. Noreste, i que aque quiririã je ra. ¹⁵ Quiririã ngue canoa mbucuatayã ureruba quti ra. —Sã quiririã ae nanderuruchebi serao, ure chee que ra. ¹⁶ Ejoõ quitera quti que ureso ra. Ejoõ ngue quiririã nyooto ure si ra. Clauda, i que ejoõ je ra. Canoa ñetẽ ngue urembuti serao quia ra. Canoa cuasu riita rese. Ejoõ quitera quti que canoa ñetẽ urechuchã canoa cuasu ye cote ra. Eusite raque. ¹⁷ Canoa ñetẽ ngue urechuchã canoa cuasu ye ra. Canoa cuasu que echucua chucua ra. —Quiririã nda embuquiatachi nande je re, i que ra. Mbã siquiche tuchi que ra. —iEriiri iri quti ra nyaochĩ jẽ! Nandejã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia nandererao surucuata, i que nyue ra. ¹⁸ Isamami abe que quiririã icua icua mbeite ra. Nyebe mbia mbae mombo mombo nguiã ii. Canoa yenda. Emumbebi sacua. ¹⁹ Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote. ²⁰ Ureitõ mocoĩ mocoĩ tuchi ama ndisha riite re. Itõ nguicoĩ bei

que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaseã mbeichi nda ibi je re. Ama ndisha riite re ra nandemanochi nde, ure chee que ra.

²¹ Mbae que ureu eã mocoĩ mocoĩ nda. Nyebe que Pablo juã ñee mbia je ra. Canoa yenda je. —Seresenda, secheẽ ngue jemumbachi nda. Secheẽ aba mumbayã mbichi. Crétaa nandecuchõ mbichi. I nda canoa yenda nandemomboãte ii. Mbae mbuquiachã nondechĩ. ²² Jeñimbirãcuã ño jẽ! Nande mo nda mano eã. Canoa nda quiachã. Nande quiatu ra nandequiachã. ²³ Dios rimba rei se. Dios que ángel mo mbu ñee seje isa ra. ²⁴ “¡Eresiquichechi nda jẽ, Pablo! Eremano eã ndae. Erecuasẽ nyee r a ererecua Roma jenda je. Nderi nda nderesenda mo manõ. Dios ra etequiatu ja,” i que ibatenda seje ra. ²⁵ Seresenda, jeñimbirãcuã ño jẽ! Dios aicua tuchi quia co. Dios ra ucheẽ nyabiã nandẽ je. Ángel cheẽ nguire ra nandemanoã. ²⁶ Quiririã nda nandemondo ejoõ acua mo ndese, i que Pablo ra.

²⁷ Ureitõ mocoĩ mocoĩte que ama ndisha riite re ra. Catorce días. Quiririã ngue urerurucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose. ²⁸ Ama ndiite que embuchecha ra. ¿Ecu tuchi ere? i que nyue ra. Treinta y seis metros. Pe jiri que embuchecha si no nda. Veintisiete metros cote. ²⁹ —¡Canoa nda cua ichi sita je jẽ! ¡Quiatachi nda jẽ! i que mbia nyue ra. Nyebe mbae usi mondo mondo nguia ii canoa ndiquisã sacua. Mbae usi cuatro. Anclas, i que uqui je ra. Ae ecuasa chi nguia canoa ndese embutiba. —Quiatuchu, nyaashi, i tuchi que equia ra. ³⁰ —Nandechã nyecuayã, i que canoanya rimba ra. Nyebe

canoa ñetẽ mbuquichi mondo ii. —Mbae usi urechucua mondo ii. Urechucua canoa ai rese, i que urembiiri iri nda. —Nandechã nyecuayã, i chõ mbei que equia nyue ra. ³¹ Pablo que ñee soldados je ra. Ererecua abe je. —Ã chichõ eã mose canoa ye, jeñimi ja rae. Ama nda jẽiquia, i que Pablo ra. ³² Ae soldados canoa ñetẽ sã nyisia nguia. Emondo ii. Hui esi cote.

³³ Nyaashi namo mose que Pablo ñee ja mbia je ra. —Mbae mo jẽu jiri cote. Jeniãcuã mocoĩ mocoĩte que. Mbae mo ngue jẽuãte catorce días. Jengueãte que catorce días no. ³⁴ Mbae mo jẽu rã cote ae. I na jẽquirãcuã jiri. Mbae mo nda jẽi eã jẽje. Jemo nda mano eã, i que Pablo ee ra. ³⁵ Aquere que Pablo mbichae sirõ nda. Ianye, i que Dios je ra. Mbia resa rae. Nyisia que ra. U que cote ra. ³⁶ Pablo cheẽ ngue mbae oseiquia mbia je ra. Mbia ja que mbae u cote ra. ³⁷ Urecuabete que canoa yenda ra. Doscientos setenta y seis que ure ra. ³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacua.

Canoa jaã

³⁹ Urechaashi ngue cote ra. Ibi rese que uremae cote ra. —A ureicuayãte, i que mbia ibi je ra. Eicoinda rese que uremae nda. Ama nimia turã. —Nyao nguichi huee. Eicoinda, i rei que ererecua ra. ⁴⁰ Anclas sã ngue echisia sia ra. Anclas recha bei ii. Canoa mbuchaa chaasa que embuquiata ra. Tiru icoi que embucheseceobe quiririã je ra. Canoa ngue ngata ama nimia turã nguiti cote ra. ⁴¹ Iaãcuã eicoinda que canoa jaã nda. Eriquiraa eãsaa. Canoa ai que jaã tuchi ra. I rebera tubiriã ngue ra. Canoa ndiita mbaaba aba. Eriita que nyiquiiso ra. Quiata que ra. ⁴² Soldados que ñee cote ra. —Ã ecuasa riquiã nae, iã nandequia ja

jê! f nda echoi eã ita. Oso chee eã, i rei ngue soldados re. ⁴³ Soldados rerecua que Pablo iquia sereã nda. Nyebe ñee nguiã soldados je. — ¡Ecuasa mo nda jêiquiachĩ jê! i que soldados je ra. Ererecua que ñe e mbia je cote ra. —Eita aquiatu jêso ii. Jêso usê ama nimia ndese. ⁴⁴ Eita aquiatuã, jêso mbebi ira rese, i que soldados rerecua ure je cote ra. Eĩ ure ja que usê ama nimia ndese cote ra.

28

Ngasê ejoõ ácuua Máltaa

¹ Uresê ja que ama nimia ndese ra. —Malta, i que a je ra. Ejoõ acua je, i que hue jenda ure je ra. ² Hue jenda turâte que ure je ra. Tata que emendi ure je ra. Urechee sacuã. Tiquindiiseite que eriqui ure je ra. ³ Pablo que nyea queru mbuchuta ra. Nyea mbucha mose que mbei usê asi Pablo echĩ ra. Mbei que Pablo o shiu ra. ⁴ Eo resebe tuchi que eñi nda. Nyebe hue jenda ñee ñee nyue. —Mbia iquia iquiasa Pablo reae. Oso chee que ama ndisha si no. A mbei riqui eshiu a no. Mano nda cote reae. Huicua mose, i rei que hue jenda nyue ra. ⁵ Pablo que mbei mbaba tátaa ra. Erasiã mbei que Pablo je ra. ⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, i rei que ra. Mbia que mae nguiatute rei u nguiã erese. Erasiã mbeite que ee ra. Nyebe mbia ucheẽ mbuchebi nguiã. —Dios mo ndei Pablo, i que mbia cote ra.

⁷ Hue robeichõ ngue ererecua mbae ibi ra. Ejoõ acua rerecua. Publio, i que ererecua je ra. Urererao que uchuchúaa ra. Urembuquiaru turâte que ra. —Jêitõ mocoĩ jiri, i que ure je ra. Tres días que ureitõ erese ra. ⁸ Publio ru rasite que ra. Eracute que ra. Eruushi ruquite que ra. Pablo que oso erea ra. O que echono earõ

nda. Ñee ngue Dios je ra. Nyerõ ngue cote ra. ⁹ Aquere que mbia rasi ngaẽ ngaẽ ja Pablo je cote ra. Ejoõ jenda ja. Dios que embucherõ ja ra. ¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechĩurã.

Pablo ngasê Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, i que aque canoa je ra. Aque canoa ye que ureso cote ra. ¹² Siracusa, i que sucha tubiriã mo je ra. Huee que urecuasẽ nda. Huee que ureitõ mocoĩ nda. Tres días. ¹³ Hue si que ureso siquibi cot e ra. Urecuasẽ ngue Regio ra. Huee que ureitõ nda. Isamami ngue quiririã ureichu urequite quiti ra. Canoa maña turã. Co mii ngue ureque ama ndiite re ra. Urecuasẽ ngue Puteoli ra. Huee que urequichi bei canoa si cote ra. ¹⁴ Jesús quiato mo ngue uretea huee ra. —Jenguchõ na urerese, i que ure je ra. Ae urecuchõ nguiã una semana erese. Aquere que ureso Roma nguiti cote ra. Ibi rĩ. ¹⁵ Jesús quiato que jirandu urerese cote ra. Roma jenda. Nyebe ecuaẽ nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ ishĩ nda. —Iaanye, i que Pablo mae mose Jesús quiato rese ra. Pablo ia tuchi erobeishĩ mose. ¹⁶ Urecuasẽ ngue Roma cote ra. Sucha tubiriã tuchi que Roma nda. Soldados rerecua que ecuaa mondo ja mbia icuã ndaarõsa je cote ra. Pablo mbuchao que ra. —Ndechuchua chõ eico nde, i que ee ra. Soldado mii ngue Pablo reaquiato bei quia ra.

Pablo Dios cheẽ senei senei Rómaa

¹⁷ Urecuasẽ namo jiri mose que Pablo judíos rerecua munua j a ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeeño Romanos je ra. Jerusalén seico mose. ¹⁸ Romanos ngue ñee tuchi seje ra. “Nandehui esi”, i rei ngue seriĩ cote re. “¿Mbaerã nda nandequia re? Mbae icuã mo ngue esaã eãte”, i que seriĩ nda. ¹⁹ “¡Jẽhuichĩ nda esi jẽ!” i bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheẽ icuã eã ndei judíos riĩ. ²⁰ Nyebe “Jenyu. Tamae jendese. Tacheẽ jẽje”, ae que jẽje ra. Mbia mano je ra quera si, nande chõ ndaque equia co. Ñquĩ je chõ secuasa riqui nguiã co, i que Pablo judíos je ra. ²¹ Judíos rerecua que ñee Pablo je ra. —Jerusalén jenda que ucheẽ mbesa eãte imbu ure je ra. Ae ngaẽ ngaẽ nguia hue si, ñquĩ abe que ñee icuã eãte quia nderiĩ nda. ²² Ndecheẽ urechandu rã. Mangue chooño eã mbia ñee icuã icuã jeni. Jesús quiato riĩ. Nyebe echeẽ ure je, i que Roma jenda Pablo je ra.

²³ —Aque mose ra urechu ndecheẽ andu, i que judíos Pablo je ra. Aque mose que ecuaẽ jate cote ra. Pablo chuchúaa. Isamamimbe. Pablo que embaaquiato quiato tuchi ra. Tenda mondo chee. Jesús riĩ ngue eriqui ñee ñee mbia je ra. Moisés chimbesa que esenei senei ee ra. Dios cheẽ mbuchecuasa chimbesa abe que esenei senei ee ra. ¹ nda mbia Jesús icua. —Dios quiarei ererecua tuchi, i tuchi que Pablo judíos je ra. ²⁴ Emo emo ngue Jesús isi ra. Pablo cheẽ mose judíos je. Eataque que Pablo cheẽ isiteã teã nda. Ichõĩño nei equia ee reaẽ. ²⁵ Pablo cheẽ ndui ja eã

ngue ra. —Nyao rei erecha, i que eataque ra. Nyebe Pablo ñee ee. —Espíritu Turã ngue Isaías mbucheẽ turã nanderamei je cose ra. Ñĩ ngue ñee nda:

²⁶ Eso rã ñee judíos je: “Secheẽ nda jeñandu rei nguiã.

Jeñandu eã naanguia rae.

Jemae ndei nda erese re.

Jemae eã naanguia ra erese.

²⁷ Jeñia ãtãte.

Aba cheẽ mumba mumba.

Jendesa jemungue munguete.

Secheẽ jẽicua sereãte.

Jemba sereãte seicha rui.

Nyebe aico nguiã jembucheroãte”, i que Dios ra, ere ee,

i que Isaías chimbesa ra, i que Pablo

ra. ²⁸ Pablo que ñee mbei ra. —

Tacheẽ jẽje, judíos. Judíos eã je ra

Dios cheẽ uresenei senei cote. Ñquĩ

nguia ra eya tuchi erese. ¹ nda

Dios erirõ eicuã si, i que Pablo ra.

²⁹ Pablo cheẽ ñi ngue judíos choi

guiã ñee icuã icuã nyue ra. ³⁰ Dos

años ngue Pablo riqui huee ra.

Roma. Mbae isiquia que emondo

mondo tuchuacha je ra. Huee eico

mose. Pablo iate que eriqui ra.

Mbia nyoĩ nyoĩ mose erea. ³¹ Mbia

mo ngue Pablo cheẽ siquisã eãte ra.

Jesucristo riĩ ngue eriqui ñee ñee

mbia je ra. —Dios ra mbia rerecua

tuchi, i que equia mbia je ra. —

¿Mbaerã ereico ñee Jesús riĩ nde? i

eã ngue emo Pablo je ra.

LA CARTA DEL APOSTOL SAN PABLO A LOS ROMANOS

*Pablo ucheẽ mbesa mondo
Roma jenda je*

¹ Co aico co mbesa jẽje co. Se rei Pablo. Jesucristo rimba rei se. Dios que seirabo ra. Ucheẽ nenei nenei sacua. Dios que semingo icúe ra. Ucheẽ turã nenei nenei sacua. ² —Secheẽ turã tamondo mbia je, i que Dios cose ra. Ucheẽ nenei neneisa je ñee. Echeẽ ngue ique cote ra. ³ Dios cheẽ turã nandembiiranduchi Jesucristo riĩ cote. Dios riirĩ ndei Jesucristo. David riirina ngue tu íbii cote ra. ⁴ Jesucristo manonde, Espíritu Turã ngue embuquera ra. Dios quirãcuã je que embuquera ra. Dios riirĩ ndei Jesucristo. Nyebe Espíritu Turã embuquera nguiã. Mbia mbiirandu randu sacua Dios riirĩ ndese. ⁵ Dios turãte que ure je ra. Jesucristo riĩ. Nyebe ureirabo mingo nguiã ucheẽ nenei nenei sacua. ¹ nda mbia mague chooñoa jenda abe Jesucristo icua. ¹ nda mbia mague chooñoa jenda abe Jesucristo cheẽ mumbayã no. ⁶ Sã jẽ Jesucristo cheẽ jemumbayãte no. Sã Dios jẽirabo no. Jesucristo rimbarã. ⁷ Co ambesa mondo quia Rómaa jẽje co. Dios chesecua tuchi chõ jẽ nde. Dios que jemingo icúe uquiatorã nda. Nanderu chõ Dios re. Nander-erecua chõ Jesucristo re. Sã ùqui turã mbei riqui jẽje. Sã ùqui ndiqui jembia tuchi.

Pablo oso sete raque Rómaa

⁸ —Jesús quiato tuchi chõ ùqui ndiqui re, i jate mbia quia jenii ã. Mague chooñoa jenda abe. Nyebe aico nguiã gracias i tuchi Dios je co. ⁹ Dios cheẽ asenei senei mbeite quia mbia je co. Eriirĩ ñi. Dios resa rae aico embesa mbesa

jẽje a. Aico ñee mbeite Dios je jenii co. ¹⁰ Aico ñee ñee mbeite Dios je co. ¹ nda Dios semondo jendea. Semondose mose ra aso jendea. ¹¹ Seso sete raque jendea. Jembaaquiatu quiatu sacua Jesús riĩ. Jembirãcuã sacua Jesús riĩ. ¹² Seso sete jendea. Ñimbias sacua nyiese. Nandeico tuchi sacua Jesús rui. Nande Jesús nandeicuate resẽ. ¹³ Taso jendea, ae beite rei que se quia ra. Taembaaquiatu quiatu Jesús riĩ, ae rei se. Eĩ nda Jesús jẽicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea. ¹⁴ Jesús cheẽ nenei nenei si ahui aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiatuã abe je. ¹⁵ Nyebe aico nguiã icoquiatute co, Jesús cheẽ nenei nenei sacua jẽje. Roma jenda je.

Jesús cheẽ quirãcuã tuchi

¹⁶ Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chiangui riĩ. Aba rirõ sacua mbae icuã si. Judíos je rane ngue Jesús cheẽ quirãcuã nda. Judío eã je abe no. ¹⁷ Jesús cheẽ nandembiirandu quia ã. Nande Jesús icua mose, Dios ra nandeisi turã uquiatorã. Mbae turã mo nandesã eãte raque. Ae Jesús icua quia nae, Dios ra ùqui isi turã tuchi. Ûqui nda siqui bei cote, i ñi embesa ji re.

Mbia icuã tuchi Dios je

¹⁸ Ae siqui Dios rã eãte nae, ùqui nda Dios mbasi ja. Ae siqui icuãte quia nae, ùqui nda Ibatenda mbasi ja no. Ûqui nandeicuate quia nande co. Ichõĩñoa reã ñee andu sereãte quia ñene. ¹⁹ Jirandu tuchi rei que Dios rese ra. —Eĩ ae chõ nguiã co, i rei que Dios ee ra. Dios icua sereãte quia ñene. ²⁰ Dios rese mbia

mae aroneâte raque. Dios quirãcuã ndese mbia mae aroneâte raque. Mbía ra Dios icuã uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuâte”, i aroneâte. ²¹ Jirandu tuchi rei que Dios rese resẽ. Ñee turãyã tuchi chõchĩ Dios rĩ. Gracias iã ñochĩ Dios je. Nyebe eriqui nguiã ndua icuã icuã mbei. Nyebe eriqui nguiã itongui rĩ mbei. ²² “Ureaquiature” ichõño ñochĩ equia ũqui. Eaquiatuã ño siqui nguiã ũqui. ²³ Hui tuchi que Dios si ra. Ae manoã mbeite quia, aque si. Sererecua i chõchĩ mbae ao ao ji je cote. Ae ra mano, ũqui je chõ eriquichĩ nguiã “sererecua”, i. Mbía raanguia je. Quiaa rĩnda je chõ eriquichĩ nguiã “sererecua” i. Ae mbebe quia. Ae uchã nguiã. Ae nguata quia nguie rese. Ũqui je chõ eriquichĩ nguiã “sererecua” i.

²⁴ Nyebe Dios hui nguiã esi cote. Mbae icuã naa naa mbei sacuã cote. ²⁵ Ñee ñooño tuchi Dios rĩ cote. “Nandererecua” i chõchĩ Dios chiao je cote. “Nandererecua” i rocoĩ Dios mii je. “Nandererecua” i bei chõ mbichĩ aba quia Dios mii je. Amén.

²⁶ Nyebe Dios erecha ja nguiã cote. Oco chooño sacuã mbae icuã ndese. Ubi icuã ndese. Cuña mo oco oco nyiese si. Cuña ngu raã naa cuña nongue je. Siqui rocoĩ ngu rese. ²⁷ Hombre mo abe hombre nongue mo osei osei. —Seninisirã nde, i ñee ñee uchue si. Oco oco nyiese. Siqui rocoĩ ngũnisi rese. Icha tuchi Dios si. Nyebe Dios riqui nguiã embasi tuchi co cote.

²⁸ Dios rese jirandu sereã. Nyebe Dios hui nguiã esi. Siqui bei bei sacuã ubi icuã ndese. Nyebe eĩ eĩ nguiã nyue mbae icuã ndese. ²⁹ Eicuã tuchi eriqui ũqui. Ico chooño tuchi equia cuña ndese

ũqui. Ndua ndua icuã mbei tuchi equia ũqui. —Aque rã nda se chã, i beite equia emo mbae je ũqui. Mbía mbasi chooño equia ũqui. Mbaecha ucuayã ñooño tuchi equia ũqui. Mbía iquia iquia chooño tuchi equia ũqui. Paama i chooño equia uchue ũqui. Mbía mbiĩrĩ irĩ ñote equia ũqui. Mbía ucuayã ñooño mbeite equia ũqui. ³⁰ Ñee ñooño mbeite equia mbia mo nii ũqui. Dios ucuayã tuchi equia ũqui. Ñee icuã icuã mbeite equia aba cheẽ ndibishorõ ũqui. Ucuasu raã naa ñooño equia ũqui. “Se quiarei i tuchi”, i beite equia ũqui. Emo mbiĩcuã icuã mbeite equia ũqui. Ngu cheẽ mumba mumba chooño equia ũqui. Usi cheẽ abe mumba mumba chooño equia ũqui. ³¹ Eaquiatuã tuchite ũqui. Ucheẽ mumba mumbate ũqui. Emo je eturã eãte riqui ũqui. Emo icuã si eriqui tesareiãte ũqui. Eya eã eãte riqui emo ndese ũqui. ³² —Ae ũqui saã saã nguiã mbae icuã nae, ũqui nda amondo tata cuasu, i que Dios ra. Dios cheẽ icuare quiatu eriqui nguiã mbae icuã naa i ite. —Sã emo abe mbae icuã naa naa nandechabe, i chee chee.

2

Dios mbia cuata tea ja

¹ —Dios ra ũqui mbasi rã ña, erechĩ nda ũqui mbia icuã je. Nde i mose, nde abe ra ndeicuã nyecua mbia je. —Seturâte aico co, jerechĩ nda jẽ! —Ũqui ndiqui mbae icuã naa naa ũqui, nde i mose, ũqui icuã sí chõ eresaã saã nguiã nde abe aque. ² —Ae ũqui icuã saã saã nguiã, ũqui tambasi, i mose Dios, Dios ra embasi chooño eã. Maende erese quia ra embasi. ³ —Dios ra ũqui mbasi rã ña, erechĩ nguiã huee. Eraã sí tuchi chõ ereicohĩ nguiã ũqui sí raã naa aque. Nde abe

ra Dios nembasi ũquĩ ndese resẽ.
⁴ Dios ia eãte raque aba icuã ndese. Dios aba mbasi jei eã ndaque aba icuã mosebe. Ñĩmbirãcuãte aba icuã je. Coche ñene, ereã ñochĩ Dios chĩmbirãcuã mose ndeje. —Eyayã jẽ nda huĩcuã ndese chã, i Dios quia nderĩ co. Nyebe eriqui nguĩã ñĩmbirãcuã ndeicuã je. ⁵ Ndechĩã ãtã tuchi chõchĩ. Ndeico sereã tuchi chõchĩ Dios ruĩ. Ndeicuã eremunua tuchi chõ nguia aque re. Dios nembasi nonde. Dios mbia icuã mbasi ja mose ra nde abe mbasi. ⁶ Aque mose ra Dios mbia mbuchao chao. Emo emo nda emondo tata cuãsuu. Emo emo nda emingo bei no. ⁷ Ae eturã mbeite riqui, ũquĩ nda Dios mingõ bei. Nyoĩ sete quia Dios rea re. Siqui bei serete quia mbia mingõ beisa rese re. Nyebe ra Dios emingo bei cote. ⁸ Dios ra paama i tuchi mbia icuã je. Mbasi tuchi rae. Mbia mbĩcuãsa tuchi quia ũquĩ nde. Dios cheẽ mumbate quiatu nguĩã. Nyebe ra Dios embasi tuchi. ⁹ Ae siqui mbae icuã ndese, ũquĩ ja ra Dios mbasi. Judĩos icuã nane nda embasi. Judĩos eã abe ra embasi no. ¹⁰ Ae siqui mbae turã ndese, ũquĩ je ra Dios turã mbei. Judĩos turã nane. Judĩos eã abe cote. Mbia ra ũquĩ turã icua tuchi. Dios ra ũquĩ mbia tuchi. ¹¹ Co quiatu, i eã nda Dios mbia mo mĩ je. Mbia mĩ ndese ra ebia eã. Mae turã ja chõ nda erese.

¹² Ae jirandu eãte Moisés chimbese rese nae, ũquĩ siqui icuã mose ra Dios embasi. Jirandu eãte raque Moisés chimbese rese. Ae Moisés chimbese icua nae, ũquĩ siqui icuã mose ra Dios embasi. Moisés chimbese cheẽ nguire ra Dios embasi. ¹³ Ae Dios cheẽ ñandu chooño nguia nae, “taẽisi turã” iã nda Dios ũquĩ je. Ae Dios cheẽ mumbayã nguia nae, ũquĩ nguia tu ra Dios isi turã. ¹⁴ Ae judĩos eã nae, ũquĩ Moisés chimbese ñandu eã mbeite raque. Ũquĩ mo ae siqui

turã turã mbei mbae turã ndese. —Mbae turã nandesaã, ite eicua. Dios cheẽ andu eãte raque emo mose. ¹⁵ Ae ae chõ mbae turã icua nguĩã. Mbae icuã abe icua. Mbae icuã naa mose, “eicuã asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no. ¹⁶ Aque mose ra Dios ñee Jesucristo je. Ae icuã mbia saã nyecuayã cuayã nguia nae, ũquĩ nda Jesucristo mbuchecua ja cote. Jesucristo ra mbia icuã mbasi mbae icuã nĩ cote.

Judĩos Moisés cheẽ mumba mumba

¹⁷ —Judĩos chõ ure re, jenyẽ equia ũquĩ. —Moisés chimbese ra nandemingo bei, jenyẽ chõchĩ equia ũquĩ. —Dios quiarei ebia tuchi ure mĩ ndese, jenyẽ chõchĩ equia ũquĩ. ¹⁸ Ae Dios bite nae, ũquĩ jẽicuate quia jẽ ũquĩ. —Moisés cheẽ ureicuate quia ã. Nyebe mbae turã ureicua jate quia ã, jenyẽ chõchĩ nguia ũquĩ. ¹⁹ —Ure mĩ ño ñeenda Dios icha ureicuachĩ, jenyẽ bei chõchĩ equia ũquĩ. —Itondaru jenda uretesaete, jenyẽ chõchĩ equia ũquĩ. ²⁰ —Mbĩa aquiatuã urembaaquiatu quiatu, jenyẽ chõchĩ nguia ũquĩ. —Mbĩa aracuayã urembaaquiatu quiatu, jenyẽ chõchĩ nguia ũquĩ. Jẽ Moisés chimbese jẽicua aba reãte quia ũquĩ. —Moisés chimbese ñee ñooño eãte, jenyẽ raque quia eicua ũquĩ. ²¹ Jẽaracuayã mbĩa jembaaquiatu quiatuchi nguĩã. ¿Mbaerã jẽĩmbaaquiatu iã jẽ nyĩ re? —Mbae ra jembuquĩachĩ, jenyẽ chõchĩ equia ũquĩ. Jẽ sí chõ mbae jembuquĩachã nguĩã ũquĩ. ²² —Emo ninisi rese ra jẽingochĩ, jenyẽ chõchĩ equia ũquĩ. Jẽ sí chõ jẽingo nguĩã emo ninisi rese ũquĩ. —Ae je mbia riqui “Dios” i chooño nae, ũquĩ ndese ra jẽingochĩ, jenyẽ chõchĩ equia ũquĩ. Dios abareã

mbae jembuquiachã quiachã ñochĩ nguiã ùqui. ²³—Dios cheẽ ureicua tuchi quia ure ã, jenyẽ chõchĩ equia ùqui. Jẽ sí echeẽ jemumbate quia ùqui. Nyebe mbia riqui nguiã ñee turã eãte Dios rĩ ã. ²⁴ Nyebe embesa ji cheẽ ndiqui nguiã ique ã cote. Jẽ Dios cheẽ mumba mose, judíos eã ndiqui ñee icuã tuchi Dios rĩ ã.

²⁵ Coche circuncisión jẽsaã saã nguiã Dios je, jẽingo bei mose Dios cheẽ ndese. Jẽingo eã mose Dios cheẽ ndese, circuncisión naa eã naanguia chõ jẽingo nguiã ùqui.

²⁶ Ae circuncisión saã eã nguia nae, ùqui siqui mose Dios cheẽ ndese, circuncisión naande raanguia chõ eriqui nguiã ùqui. ²⁷ Ae circuncisión saã eã nguia nae, ùqui siqui mose Dios cheẽ ndese, Dios ia tuchi chõ ùqui ndese re. Eyare rocoĩ jendese. Jẽ nguia Dios cheẽ jemumba mumbate nguiã. Dios cheẽ jẽicuate raque. Circuncisión jẽsaã saãte raque. ²⁸ Ae judíos Dios cheẽ mumba mumba quia nae, judíos tuchi eã ño ùqui nde. Circuncisión naa naa ndaque. Ae circuncisión saã nguia nae, ùqui siquiã mose Espiritu Turã ndese, circuncisión turã eã ño ùqui nde. ²⁹ Ae Dios isi tuchi quia uchiangui re, ùqui nguiarei judíos tuchi. Ae siqui Espiritu Turã ndese, circuncisión tuchi chõ ùqui cote re. Ùqui je ra mbia achõ ñee turã eã. Dios abe quia ra ñee turã ee.

3

¹ ¿Mbaerã judiorã sete riqui mbia re? ¿Mbaerã circuncisión sete riqui mbia re? ² Eturãte quia mbia je re. Judíos je quiatu ngue Dios ucheẽ mondo nguiã. Mbia mo je eã. ³⁻⁴ Judíos mo hui hui raque Dios cheẽ si. Dios quia ra ñee ñooñoã mbei. Echeẽ nguia ra io bei. Mbia hui hui raque esi. Mbia ñee ñooño ndaque. I ñi embesa ji re:

Ndecheẽ nda io tuchi mbia resa rae.

Mbia icuã mose ndeje, nde quia ra ere tuchi mbia si, i que embesa ji ra. ⁵ Jemo ngue ñee no nda: —Dios turãte riqui nandeicuã je co. Mbae icuã nandesaã saã mbei chõ nguia. Mbia mae sacua Dios turã ndese. Dios nandeicuã mbasi mose, Dios icuãte, i chõchĩ jemo. ¿Mañi nande ra ùqui ñee mose re? ⁶ Ichõño tuchi chõ ùqui nde. Dios icuã aroneãte. Dios icuã mose, eĩ nda Dios mbia icuã mbasi aroneãte rei. ⁷ Jemo ngue ñee ño nda. —iNandechẽ ñooño ño nguia jẽ! Nandechẽ ñooño mose, mbia ra ñee turã Dios rĩ. “Ñee ñooñosa reã tuchi quia Dios riqui re,” i ra mbia Dios rĩ cote. Nyebe Dios riqui nguiã nandembasi ãte nandechẽ ñooño mose, i chõchĩ jemo. ⁸ —Mbae icuã nandesaã saã ño. I nda Dios turã nyecua mbia je, i chõchĩ jemo. Urecheẽ ãte ure ùqui ndesẽ. Ae ñee nguia ùqui, ùqui nda Dios mbasi.

Mbia mo eturã eãte

⁹ Judíos chõ nande re. ¿Nandeturã nda eriqui reĩ mbia mo si re? Tei. Nandeturã eã ño esi re. Nandeicuã ja chõ ñene. Judíos eã icuã ja chõ ñene. Judíos icuã ja chõ eno nde. ¹⁰ I ñi embesa ji re:

Emo eturã eãte. Aque mĩ mo eã.

¹¹ “Dios icha taicua”, iãte emo.

“Dios rese taico”, iãte emo.

¹² Mbia que icha icha jate Dios si ra. Eicuã jate que eriqui ra.

Emo mbae turã mo saã eãte.

Aque mĩ mo eã.

¹³ Ùqui quiarei mbia raaque tã tãsa rã.

Aba mbia eã.

Sã eriqui ñee icuã mbei.

Mbia mbĩrĩ irĩ tuchi ñee ñooño uchuru je.

Mbei rasi rã ño echeẽ nde.

Aba mbasi.

¹⁴ Echeẽ icuã achõ tuchi chõ ñene.

Mbia mbĩcuãsa tuchi chõ echeẽ nde.

¹⁵ Mbia icua chooño ño ñene.

¹⁶ Mangué chooñoa ño eriqui nguiã mbae icuã naa naa. Mbia mbiayã ñooño.

¹⁷ Ico chooñoa mbei mbia je.

¹⁸ Dios rese ndua eã tuchi, i ñi embesa ji re. ¹⁹ Dios que Moisés chimbese mee ja judíos je ra. Embesa ji mumbayã sacuã. Mbia huiicuã icua ja sacuã. —Dios cheẽ nandemumba tuchi chõ nguia re, i nda mbia ja chã. ²⁰ Emo ñee aroneãte. —Embese ji amumbayã mbeite quia co. Nyebe ra Dios seisi turã, i aroneãte emo. Dios que Moisés chimbese mee mbia je ra. Mbia huiicuã icua ja sacuã.

Dios icuasa quia ra siqui bei

²¹⁻²² Dios que Jesús turã teacuquia nande je cote ra. Ae que mano nandeicuã ndiquicharõ sacuã nda. Nande Jesús icua mose, Dios ra nandeisi turã cote. Eĩ ja chõ Dios mbia je re. Dios bia eã ño mbia mo mii ndese. —Jẽ Moisés chimbese mumbayã mose, taẽisi turã, iãte Dios. —Jẽ Jesús icua mose, ùquĩ mose quiatu ra jaẽisi turã, ite Dios. Embesa ji ñiinda abe que ñee ñee Jesús rii nyii no nda. ²³ Nandeicuã ja chõ ñene. —Aque eturãte, iã nda Dios nandemo je. ²⁴ Nandeicuãte raque. Dios quia eturãte nande je re. —Mbae mo jemondo jẽicuã ndibishorõ, i ãte Dios. Jesucristo que mano nandeicuã ndibishorõ ndesẽ. Nyebe Dios riqui nguiã mae turã nanderese co. ²⁵ Dios que Jesucristo mondo mbia je ra. Mano sacuã mbia icuã ndiquicharõ. —Jesús que mano seicuã ndibishorõ nda, nande i mose, ùquĩ mose ra Dios nandemingo bei. Dios que mae ñooño mbia icuã ndese nyii ra. —Seriirĩ nguia ra mano nguiã eicuã ndiquicharõ, i que ra. Echeẽ ngue ique cote ra. Dios uturã ndeacuquia mose que echeẽ ique cote ra. ²⁶ Dios riirĩ ngue mano

mbia icuã ndiquicharõ nda. Mbia mae sacuã Dios turã ndese. Dios turã mbeite. Mbia icuã isi turã nonde. Mbia Jesús icua mose ra Dios mbia isi turã.

²⁷ Nande ae ra nandeicuã nandembutiã eã. Dios ae quia nandeicuã mbutiã nguiã, Jesús icua mose. Nyebe nandeico nguiã nandecuas raã naa aroneãte. Moisés chimbese que nandemumba mumbate quia resẽ. ²⁸ Mbia Jesús icua mose, aque mose quia ra Dios mbia isi turã. —Taẽisi turã, jẽ Moisés chimbese mumbayã mose, iãte Dios nande je. —Jẽ Jesús icua mose, ùquĩ mose quiatu ra jaẽisi turã, ite Dios nande je. ²⁹ Judíos achõ nderecua eã ño Dios re. Judíos eã abe rerecua chõ ñene. ³⁰ Emo abe eãte Dios. Dios mii ño ñene. Ae Jesús icua quia nae, ùquĩ nda Dios isi turã ja. Judíos abe isi, Jesús icua mose. Judíos eã abe isi, Jesús icua mose no. ³¹ Nande Jesús icua mose, Dios cheẽ mbesa ji riqui ua eã mbeite nande je co. Nande Jesús icua mose, Dios cheẽ nda nandemumbayã tuchi cote.

4

Abraham abe Dios icua

¹ Nandendua mbirĩ na Abraham ndese. Nandei ñiinda tuchi quia Abraham nde. ² Cose que Dios Abraham isi turã nda. Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã. ³ I ñi embesa ji re:

Abraham ngue Dios icua ra.

Nyebe Dios eisi turã nguiã,

i ñi embesa ji re. ⁴ Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re. ⁵ Dios chõ mbia icuã isi turã nguiã. Emo Jesús icua mose, ùquĩ nda Dios isi turã.

Emo mbae turã naa naa eã ndaque. Jesús icua mose, aque mose chõ Dios “ndeturâte seje,” i ee. Mbae turã naa naa eã ndaque. ⁶ David abe que ñee nda: “Ae je Dios ñee, ‘ndeturâte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda. ⁷ Co rei David chimbessa co:

Ae icuã Dios mbutiã nae, ñquĩ ia tuchi chõ ñene.

⁸ Ae icuã ndese Dios riqui mae ãte nae, eicuãte raque, Dios ra eisi turã.

Ñquĩ ia tuchi chõ ñene,

i ñi David chimbessa re. ⁹ ¿Aba icuã ño nda Dios mbutiã ña? Embia sacua ña. ¿Judíos icuã achõ nda embutiã nde? ¿Ae circuncisión saã nae, ñquĩ achõ icuã nda embutiã nde? Tei. Ñquĩ achõ eã ñene. Abraham Dios icua mose, aque mose tuchi chõ Dios eicuã mbutiã nguiã esi. ¹⁰ Abraham circuncisión naa eã mose chõ Dios eicuã mbutiã nguiã. Circuncisión naa nonde. ¹¹ Abraham Dios icua mose chõ ngue Dios eicuã mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. —Abraham ngue aisi turã nda, i ñe Dios re. Ae circuncisión saã eã nae, ñquĩ abe chõ “seru” i nguiã Abraham je, Jesús icua mose. ¹² Ae circuncisión saã nae, ñquĩ abe chõ “seru” i nguiã Abraham je, Jesús icua mose. Ñquĩ nyiicua chõ Dios re. Sã Abraham nyiicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbei ee

¹³ Dios que ñee Abraham je cose ra. —Ibi tamondo ja ndeje nembaerã. Nderiirĩ mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. —Ae seicua quia, aque je

chõ tamondo, i que Dios Abraham ñi nda. ¹⁴ —Nandeico bei mose Moisés chimbessa rui, aque mose ra Dios nandemingo bei, i chõchĩ judíos mo. Ñquĩ mose quiatu ra nandeico rei Jesús icua chooño. Ñquĩ mose quiatu ra Dios cheẽ ique ãte rei nande je. ¹⁵ —Ã jësaã saã, i mose Dios, emo echeẽ mumba mose, ñquĩ nda embasi. —Ã jësaã saã, iã mose, emo nda embasiã cote.

¹⁶ Dios turâte quia ñene. Nyebe eriqui nguiã mbae mondo chooño nande je eicua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã.

¹⁷ Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que

Dios Abraham je ra,

i que embesa ji ra. Dios ra mbia mangue chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã. Ae emoãte namo nae, Dios ae ra ñquĩ nyao no. ¹⁸ —Nderiirina tameẽ ndeje. Eretiirĩ nda cote. Mbia ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiirĩ aroneãte raque aba je. ¹⁹ Amei tuchite raque. Cien añote raque. Eninisi abe arite raque. Eninisi rie chuimate raque. —Dios ra seriirina mee seje ucheẽ nguire, i que Abraham nda. —Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda. ²⁰ Abraham ngue “nducua” iã mbeite quia Dios cheẽ mose ra. “Nyia, eno”, i beite que equia Dios cheẽ mose ra. Ñee turã mbei

que equia Dios rĩ nda. ²¹ —Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda. ²² Nyebe Dios Abraham isi turã nguiã. — Abraham ndiqui seicua tuchite co, i que Dios ra. ²³⁻²⁴ Abraham mĩ je eã ño Dios riqui nguiã ñee. — Abraham seicuate. Nyebe aico nguiã eisi turã co, i que Dios ra. Abraham mĩ je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios si que Jesús raaque mbuquera ra. ²⁵ Dios que Jesús mbu ibii nande je ra. Mano ngue nandeicuã ndiquicharõ nda. Aquere que Dios embuquera si cote ra. Nandembitirõ sacua ngue Dios embuquera ra.

5

Nande Jesús icua mose, Dios riqui nandeisi turã

¹ Ñ nandeico Jesucristo icuate ã. Nyebe Dios riqui nguiã nandeisi turãte cote. Nyebe Dios riqui nguiã nandembiate cote. ² Ñ nandeico Jesucristo icuate ã. Nyebe Dios riqui turãte nguiã nande je co. Dios turã tuchi. Dios ra nandemingo Jesucristo rã si tuchi cote. Ñquĩ ño nandesaarõ arõ nguiã ã. ³ Ñquĩ mĩ eã ño nandembia nguiã. Mbia icuã icuã ndaque ra nande je, ñquĩ mose abe chõ nda Dios nandembia no. Mbia icuã icuã mose nande je, Dios ra nandechiã mbucoi turã. Nandeico tochi sacua. ⁴ Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesaarõ arõ na. Sã echeẽ ique rã nande je. ⁵ Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espiritu Turã mondo nguiã nande je. —Dios riqui nyesecuate jendese co, i Espiritu Turã nguia nande je co.

⁶ Mbae turã ngue nandesã aroneãte nandechue, aque mose que Cristo mano nande je ra. Nandeicuã mbitirõ sacua. ⁷ Mbia mo mano aroneate emo ndibishorõ. Nande turã mose, aque mose abe ra emo mano aroneãte nanderibishorõ. Eturã tuchi mo ndibishorõ nguia emo mano sete raque reae. ⁸ Cristo quiatu que mano nanderibishorõ nandeicuã tuchi mose ra. Nyebe nandeico nguiã ñee: —Dios riqui nyesecua tuchite nanderese co, i. ⁹ Cristo mano mose que nandeicuã mbitirõ cote ra. Ae ra nandemingo icuẽ Dios mbia icuã mbasi mose. ¹⁰ Dios riiĩ ngue mano nande je ra. Nande Dios ucuayã mose. Ae quia ngue eturã mbeite riqui nguiã nande je. Dios que “sequiatorã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichĩ nguiã nande je cote. ¹¹ Nyebe nandeya tuchi riqui nguiã Dios rese co. Jesucristo rĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹² Mbia mĩ nane ngue siqui nyii ra. Aque rane ngue mbae icuã saã nande je ra. Nyebe mbia icuã jate riqui nguiã cote. Nyebe Dios riqui nguiã ñee. —Mbia ra mano ja, i cote. ¹³ Mbia que mbae icuã saã saã ndei quia nyii ra. Moisés Dios cheẽ mbesa nonde. —Dios cheẽ ngue jemumbachĩ nda, i aroneãte que aque mose ra. Dios cheẽ mbuchecua iriãte quiatu ngue aque mose re. ¹⁴ Adán nane ngue Dios cheẽ mumba cose ra. Aque mose bei chõ ngue mbia mbae icuã naa naa nguiã cote. Nyebe mbia riqui nguiã mano mano ja huicua mose cote. Moisés que Dios cheẽ mbesa chee ra. Moisés embesa nonde que mbia mano mano ja huicua mose ra. Jesucristo rã eã tuchi chõ Adán nde.

15 Adán nane tuchi que mbae icuã saã nda. Jesucristo quiatu que mbia rirõ nguia mbae icuã si ra. Adán mbae icuã naa mose, aque mose bei que mbia mano mano cote ra. Jesucristo mbae turã naa mose, ae que mbia icuã mbitirõ tirõ cote ra. Dios turã ñi. Jesús chisaã nguia rei Adán chisaã na eã tuchi. 16 Adán ae rane ngue mbae icuã saã cose ra. —Mbia ra mano mano ja cote, i que Dios cote ra. Adán icuã ndese maende. Ae Adán saã icuã nande je nae, aque je que Jesucristo mano nda. Jesucristo turãte que mbia je cote ra. Nyebe Dios riqui nguia nandeisi turã, nandeicuã ndese mae ndocoĩ. 17 Adán ae que mbae icuã saã nyii ra. —Mbia ra mano mano ja cote, Adán mbae icuã naande, i que Dios cote ra. Jesucristo ae que mbae turã saã mbia je cote ra. Mbia icuã mbutiã sacuã esi. Ae Jesús turã icua quia nae, ñquĩ nda Dios mingo turã mbei, ñquĩ icuã ndese mae ndocoĩ.

18 Adán ae que mbae icuã saã nyii ra. —Mbia ra mano mano ja cote, i que Dios cote ra. Adán icuã ndese maende. Aquere que Jesucristo mbae turã naa mbia je cote ra. Mano nguia nguie mbia riquicharõ nde. Nyebe Dios riqui nguia nandemingo bei co cote. Jesús rĩ ae ñene. 19 Adán Dios cheẽ mumba mose, mbia mbicuã ja que ñquĩ cote ra. Jesucristo Dios cheẽ mumbayã mose chõ mbia tubiriã mbuturã nguia no. 20 Dios que ñee Moisés je ra. —Secheẽ embesa mbia je, i que ee ra. fnda mbia jirandu tuchi huicuã ndese. Mbia icuã i i tuchi mose, eĩ ño Dios turã i i tuchi mbia je no nde. 21 Adán mbae icuã naa mose, mbia mbicuã ja chõ ñquĩ nde. —Mbia ra mano mano cote, i que Dios cote ra. Jesucristo que mano nandeicuã ndiquicharõ cote ra. Aque mose que Dios uturã ndeaciquia tuchi nande je cote ra.

Nandembuturã sacuã cote. Nandemingo bei sacuã cote.

6

Nandeyasu chõ nandeico nguia ã cote

1 ¿Mañi nande ra cote re? ¿Mbae icuã nda nandesã i i re? ¿Dios turã i i sacuã nande je re? 2 Tei. Dios biãte ñquĩ. Jesús rese que nandemano ndesẽ. Nandemano ngue mbae icuã naa eã sacuã ndesẽ. ¿Mañi nande ra mbae icuã naa naa si re? 3 ¿Jẽiranuãte bautizar i rese re? —Jesús resenda tuchi chõ ñquĩ ndiqui re, i nda mbia bautizar ire nande je chã. Nande bautizar ire, nandemanonde raanguia chõ ñquĩ nde. Mbae icuã naa eã sacuã cote. 4 ¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcuã Jesús mbuquera eraaque mose no. Eĩ nande chõ siqui nandeyasu ae.

5 Nandeico Cristo rese ã. Nandemano mose Cristo rese, nandereco yasu chõ nandeico nguia erese ã. 6 Cristo mbucha mose ira rese, nandeicuã abe que Dios mbucha ira rese ra. Nande mbae icuã oseĩ chiã sacuã ño ñquĩ nde. Mbae icuã nimba nda nandeico eã cote chã. 7 Mbia raaque quia mbae icuã saã aroneãte nguia. Eĩ nande chõ nguia mano mose Cristo rese ã. Mbae icuã naa aroneã. 8 Nandemano mose Cristo rese ira rese, nandemingo bei ra uchiese cote. Ae rã si. 9 Cristo que mano nda. Quera si que cote ra. Aquere ra mano siã cote. 10 Aque mii ngue Cristo mano mbia icuã je ra. Quera si que cote ra. Mano si eã ndae. Siqui bei equia Dios rese co. 11 Jendaaque chõ jẽsã saã mbae icuã je. Jenderecuarã eã mbae icuã cote. Jesucristo rese nandeico tuchite ã cote. Mbae yasu rã ño nandeico nguia Jesucristo rese ã cote.

¹² Mbale icuã ndese ra jẽingochĩ jenderecuarã jẽ! Jẽ mba e icuã oseĩ mose, jẽteachõ ño jẽ! ¹³ Jendete ra jemee meechĩ mbale icuã je jẽ! Dios je quia jendete jemee. Mbale turã naa sacuã. Cristo rese que jemano ndesẽ. Jẽyasu chõ ngue jẽquera si Cristo rese resẽ. ¹⁴ Nandererecuarã eã nda mbale icuã cote. Moisés chimbasa rui eã ño nandeico nguiã ã cote. Dios turã ndui ae chõ nandeico nguiã ã cote.

Mbale turã nimba chõ nandeico cote

¹⁵ Dios turã ae nandemingo nguiã. ¿Ũquĩ mose ra mbale icuã nandesã saã nde? Teĩ. Dios biãte ũquĩ. ¹⁶ Nande nandechimondo mose mbale icuã je, mbale icuã nda nandererecuarã cote. Mbale icuã nda nandeiquia chee cote. Nande nandechimondo mose Dios je, ae ra nandererecuarã cote. Ae ra nandemingo bei mbale turã ndese cote. ¹⁷ Jẽingo bei que mbale icuã ndese jenderecuarã nyii ra. Mbale Jesús cheẽ nenei nenei mose jẽje, jẽisi turã ño ngue cote ra. ã jẽingo echeẽ mumbayã ã cote. Nyebe aico nguiã gracias ite Dios je co. ¹⁸ Dios que jendirõ mbale icuã si cote ra. Mbale icuã ndese ra jẽingoã cote. Mbale turã ndese bei ra jẽingo cote. ¹⁹ Secheẽ ambuchecua tuchi quia jẽje co. Jẽ eicua tuchi sacuã. Jendete que jemondo tuchi mbale icuã je nyii ra. Jẽ ngue jẽingo i i tuchi mbale icuã ndese nyii ra. Jendete jemondo Dios je cote. Mbale turã naa i i sacuã cote.

²⁰ Mbale icuã mbaerã ño jẽingo nguiã cose. Mbale turã ngue jẽsaã aroneãte quia aque mose ra. ²¹ Jẽireĩte mbale icuã naa naande cote. Jenyisaã saã mbale icuã ñiinda, ũquĩ ngue mbale turã mo mondo ãte jẽje resẽ. Ae mbale icuã saã i ite quia, ũquĩ nda mano. ²² Dios que jendirõ mbale icuã si cote ra. Dios rimba chõ jẽ cote re. Nyebe Dios jemingo nguiã icuẽ mbale icuã si.

Nyebe ra Dios jemingo bei ibate manonde cote. ²³ Ae mbale icuã saã saã nguiã nae, ũquĩ nda Dios mbale bei manonde. Ae Jesucristo icua quia nae, ũquĩ nguiatu ra Dios turã mingo bei. Mbale turã naa eã ndaque. Dios turãte quia ee re.

7

Eraaque rã ño nandeico nguiã Moisés chimbasa je cote

¹ Sã jenderecua ibi jenda mo no. Echeẽ jemumba aroneate no. Jemano mose, jenderecuayã nda cote. ² Sã cuña mo ndiqui ngu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siquĩã erese cote. Aque mose ramo nda ae ae riqui cote. ³ Ngu reco mose, siquĩ aroneãte emo ndese. Siqui mose emo ndese, Dios cheẽ mumba chõ ũquĩ nde. Eru mano mose, aque mose quiatu ra ngu mo ndea cote. Dios cheẽ mumba eã ño ũquĩ nde.

⁴ Eraaque rã ño jẽingo nguiã Moisés chimbasa je ũquĩ cote. Cristo quiatu que mano jeni nda. Quera si que jeni no nda. Cristo rese chõ jẽingo nguiã ũquĩ cote. Dios je mbale turã naa naa sacuã ño jẽingo nguiã erese ũquĩ cote. ⁵ Nandeico mose mbale icuã ndese nyii, mbale icuã achõ ño ngue nandechosei chosei quia aque mose ra. Nandebi tuchi que Dio s cheẽ mumba mumba aque mose ra. Nyebe que nandeico mbale icuã naa i i tuchi aque mose ra. Eĩ nda nandecua nandequia rei aque mose. Espiritu Turã nandembiasu eã mose. ⁶ Eraaque rã ño nandeico nguiã Moisés chimbasa je ã cote. Moisés chimbasa rui eã ño nandeico nguiã ã cote. Dios cheẽ mui ndui chõ nandeico nguiã ã cote. Espiritu Turã nguiatu ngue nandembiasu nguiã. Espiritu Turã ño nandembaaquiutu nguiã ã cote.

Moisés chimbese achõ eã ño cote re.

⁷ —Moisés chimbese icuãte, ae ãte raque quia co. Moisés chimbese quiatu que sembiirandu seicuã ndese resẽ. —Eicuãte quia emo mbae osei osei riqui re, i que Moisés chimbese ra. Ei nda seiranuãte rei ãqui ndese. Moisés chimbese eande ndae. Moisés chimbese ae ngue sembiirandu nguia ãqui ndese. —Eicuãte ãqui, i seje.

⁸ Moisés chimbese sembiirandure mbae icuã ndese, mbae icuã achosei i i tuchichĩ cote. —Mbae icuã nda jẽsaã saãchĩ, i mose chõ mbae icuã achosei i i tuchichĩ cote. Emo Moisés chimbese icuayã mose, mbae icuã abe ra eicuayã no.

⁹ Moisés chimbese que aicuayãte quia nyii ra. Seturã aico reĩ aque mose. Moisés chimbese que aicua cote ra. Eicua mose que echeẽ amumba i i tuchi cote ra. ãqui mose que seicuã aicua cote ra. ¹⁰ Mbia mingo bei sacuã ndaque Moisés chimbese. Ae que semingo bei eã nda. Moisés chimbese amumba mumba bei chõchĩ. Nyebe aico nguia isho tuchi Dios si aque mose.

¹¹ Seicuã ño ngue sembiirĩ irĩ mbei quia nyii ra. Se Moisés chimbese icua mose, seya eã tuchi que aque mose cote ra. Seicuã nda seiquia chee, ae que se ra. ¹² Moisés chimbese turãte raque. Dios cheẽ ndaque.

¹³ Moisés chimbese turãte. ãqui je eã ngue Dios paama i seje ra. Seicuã ae quiatu que Dios mbupaama i seje ra. Moisés chimbese que sembiirandu tuchi seicuã ndese ra. Se Moisés chimbese turã icua mose, ãqui mose que seicuã Dios mbupaama i seje ra. Nyebe Dios Moisés chimbese mee nguia nande je. Nandeicuã mbuchecua tuchi sacuã nande je.

Nandechianqui renda icuã ño nandeisi isi nguia

¹⁴ Moisés chimbese turãte raque. Se ae seicuã nde. Mbia chõ se re. Moisés chimbese amumba mumba chõchĩ nguia co. ¹⁵ Mbae turã asaã mbite raque. Mbae icuã asaã eã mbite raque. Mbae icuã nguia seisi isite nguia. Mbae turã uquia reã. ¿Mbaerã aico mbae turã naa eãte re? ¹⁶ Ae asaã sereãte quia nae, ãqui asaã mbeichĩ. Moisés chimbese turãt e raque. Aico echeẽ mumba mumba beichĩ. ¹⁷ Se ae chõ eã ño aico nguia mbae icuã naa naa co. Sechiangui renda icuã nguia “mbae icuã esaã saã”, ite nguia seje co. Nyebe aico nguia mbae turã mo naa eã mbeite co. ¹⁸ Seicuã tuchi chõchĩ se. Seturã mo eã tuchichĩ se. —Mbae turã tasaã, aete raque quia co. Aico mbae icuã naa naa mbei chõchĩ co. ¹⁹ Sebite raque mba e turã. ¿Mbaerã aico mbae turã naa eãte re? Sebiãte raque mbae icuã. ¿Mbaerã aico mbae icuã naa naa mbeite re? ²⁰ Se ae eã mbae icuã asaã saã nguia. Sechiangui renda icuã nguia “mbae icuã esaã saã” ite nguia seje. Sechiangui renda icuã ño seisi isi nguia mbae turã si co.

²¹ “Mbae turã tasaã”, i mose se, mbae icuã ño seriquisã quisãchĩ nguia co. ²² Sebite raque Dios cheẽ sechiangui re. ²³ —Dios cheẽ ndese taico, ae rei nguia sechiangui re co. Sechiangui renda icuã nguia seriquisã quisãte nguia. Nyebe aico nguia mbae icuã naa i ite. ²⁴⁻²⁵ Dios cheẽ ndese aico sete raque. Sechiangui renda icuã nguia semingo beite nguia mbae icuã ndese. Seraaquete aico co. Nyebe seya eãte aico co. ¿Aba quia ra seicuã mbitirõ nde? Jesucristo quia ra seicuã mbitirõ cote. Nyebe aico gracias i tuchi Dios je co.

8

Espíritu Turã ndiqui nandembui mbae icuã si

¹ Ae Jesucristo icua quia nae, ãqui nda Dios mbasiã mbei. ² Nande Jesucristo icua mose, Espíritu

Turã nda nandechiã mbiasu. Espíritu Turã nda siqui nanderese, mbae icuã naa eã sacuã. Eĩ nda nandemano mbeite rei, mbae icuã naa naa mbei mose. ³ Moisés chimbessa que nanderirõ aroneãte mbae icuã si ra. Echeẽ nguiatu ngue nandemumbayã aroneãte nguiã. Mbiate quiatu ngue nander. Nandequiracuã nea. Dios que ndua nanderese ra. Nyebe nguiirĩ mondo nguiã nande je. Mbia rã ngue Jesús ru íbii ra. Mbia icuã jate raque. Ae mii ngue eicuã eã nda. Ae que mano nandeicuã ndiquicharõ nda. Nyebe nandererecua eã ño mbae icuã cote re. ⁴ Jesús que mano nande je ra. Nyebe mbae icuã ñimbiracuã eãte nande je cote. Nyebe Dios cheẽ nandemumbayã arondete namo cote. Espíritu Turã ndui chõ nandeico nguiã cote. Mbia icuã ndui eã ño nandeico nguiã ã cote. ⁵ Ae siqui quia Espíritu Turã ndese nae, ñuqĩ ño siqui nguiã Dios cheẽ ndui si. Ae siquiã nguia Espíritu Turã ndese nae, ñuqĩ ño siqui nguiã uchiangui renda icuã ndui si. ⁶ Ae siqui quia Espíritu Turã ndese, ñuqĩ ia bei ra eriqui. Siqui bei rae. Ae siquiã nguia Espíritu Turã ndese, ñuqĩ nda siquiã. Mano ndae. ⁷ Nandechiangui renda icuã nguia siqui icuã icuã mbeite nguiã Dios je. Nandechiangui renda icuã nguiarei Dios cheẽ mumbayã aroneã. ⁸ Ae siqui bei quia uchiangui renda icuã ndui, ñuqĩ siqui aroneãte Dios cheẽ ndui.

⁹ Eĩ jenyee eãte raque jẽ. Espíritu Turã ndui chõ jẽingo nguiã jẽ. Espíritu Turã nguia siqui nguiã jeñiangui re. Espíritu Turã siquiã mose emo ñiangui re, Cristo rimba eã ño ñuqĩ nde. ¹⁰ Jesucristo riqui jeñiangui re ñuqĩ. Jendete ra mano ndaque mbae icuã je. Espíritu Turã nda jeãingue mingõ bei ibate. Dios quiatu ngue jẽisi turã nguiã. ¹¹ Dios

que Jesucristo raaque mbuquera ra. Eĩ si ra Dios nanderete raaque mbuquera Espíritu Turã quiracuã je no. Eĩ si ra nanderete mbi-asu, Espíritu Turã siqui mose nandechiangui re.

¹² Nandechiangui renda icuã ndui nandeico aroneãte cote. ¹³ Nandechiangui renda icuã ndui nandeico mose, nandemano mbei ra equia. Espíritu Turã nandebi icuã mbutiã mose, nandemingo bei rae. ¹⁴ Ae je Espíritu Turã ndiqui ñee nae, “eĩ jenyee” i nae, Dios rimba chõ ñuqĩ nde. ¹⁵ Nande Espíritu Turã isi mose, aque mose bei chõ Dios riirĩ nande cote re. Dios rimbachõ eã ño nande cote re. Dios riirĩ tuchi chõ nande cote re. Nandesiquiche tuchi que equia Dios si nyii ra. Nandesiquicheãte esi namo cote. —Paba, nande chõ nguiã e e co cote. ¹⁶ —Dios riirĩ tuchite jẽ, i chõ Espíritu Turã nguia nandembiirandu tuchi. —Dios riirĩ tuchi rei nande re, nande chõ nguiã nande abe nandechiangui re co. ¹⁷ Dios riirĩ tuchite quia nande re. Nyebe ra Dios mbae mondo tuchi nande je Jesucristo rese. Sã ñi mbia Jesucristo mbasi cose no, eĩ si ra mbia nandembasi nande abe. Aquere ra nandeico turã mbei erese ibate cote.

Mbae turã mbei jee ra nande je nandeico mose ibate

¹⁸ Mbia ra nandembasi raque a nyii. Dios ra nandererao bei ibate cote. Aque mose ra mbae turã mbei nande je cote. Nyebe ra nandetesarei nanderasi jua si cote. Nandeico bei mose ibate. ¹⁹ Dios ra huicuaasa mbuchecua ja aque mose. —Co rei seicuaasa co. Co abe no. Co abe no, i ra Dios aque mose. Ñuqĩ ño nandesaarõ arõ nguiã ã. Ae Dios chao mbae ja, ñuqĩ abe riqui ñuqĩ ndaarõ arõ ã. ²⁰ Adán mbae icuã naa namo mose, mbae icuã ja que aquere cote ra. Dios chiao icuã ja cote. Dios que

mbae mb̃cuã ja Adán mbae icuã naa namo mose ra. ²¹ Eĩ mbei eã nda mbae. Mbae ra nĩmbitirõ ja cote. Nĩmbiasu ra cote, Jesús tu mose íbii cote. Mbae ra manoã cote. Mbae ra shi eã cote. Jesús quiato rese ra mbae nyĩcuabo ja aque mose cote. ²² Dios chiao ra nyĩcuabo ja aque mose. Dios chiao ia eãte quia namo nde. Äquẽ ndasi rã ño eriqui nguiã namo. Nyebe ra Dios uchiao mbiasu ja cote. ²³ Dios que Espiritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuchĩcuabo tuchi uchiao ja rese cote. Namó ño nanderasi rasi re. Nandeya eãte abe no. Nandembuchĩcuabo mose, nanderete abe ra embiasu. ²⁴ —Jendete tambiasu, i que Dios nanderirõ mose mbae icuã si ra. Ũquĩ ño nandesaarõ arõ nguiã ã. Nanderete yasu eãte namo. Nyebe nandeico nguiã eraarõ arõ ã. ²⁵ —Jendete tambiasu, i que Dios nande je ra. Nyebe nandeico nguiã eraarõ arõ mingue ã.

²⁶ Nandequirãcuã neate nande. Nyebe Espiritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechẽẽ ndequia requia mose chõ nandeico nguiã iabu abu. Nandeiabu mose chõ Espiritu Turã ndiqui nguiã ñee turã Dios je nanderĩ. Nandeuru ñee Dios je nandechiangui re. ²⁷ Dios mbia chiã icua jate quia co. Espiritu Turã ñee mose Dios je nandeuru, Dios echeẽ icua chõ nguiã aque. Dios cheẽ ndui si chõ Espiritu Turã ndiqui nguiã ñee Dios je Dios icuasa rĩ. ²⁸ Ae nyesecua quia Dios rese, ũquĩ je chõ Dios riqui nguiã mbae turã naa ja. Dios quiatu ngue eirabo nguiã. Ndua quiatu ngue erese nyii re.

²⁹ Ae res e Dios riqui nduate nyii

nae, ũquĩ ngue Dios mingo icúe nyii ra. Jesucristo rã si embiasu sacuã. Nyebe nandeico nguiã Dios riirĩ tuchi Jesucristo rese cote. Jesucristo rei nanderiqui cote. Nande tubiriãte ra Dios quiato cote. ³⁰ Dios que ndua nanderese nyii ra. Aquere que nandemingo icúe umbaerã cote ra. Nandeisi turã ngue cote ra. —Mbia tamumae turã ja jendese jẽingo mose ibate, i que Dios nande je cote ra.

Mbae mo nda nandembui eã mbei Dios si

³¹ Dios riqui tuchi nanderese co resẽ. Nyebe ra emo nĩmbirãcuã eã nande je cote. ³² Dios que nguiirĩ mii mondo nande je ra. Mano sacuã nandeicuã je. Eĩ nda mbae mondo ja nande je no. Sã nguiirĩ mondo nande ja je no. ³³ Dios chesecua tuchi chõ nande re. Emo ñee icuã aroneãte nande je. Dios quiatu ngue nandeisi turã nguiã. ³⁴ Cristo que mano nandeicuã je ra. Quera si que ra. Dios quiatocuti eñi ngoi hue cote. Ñee turã turã nanderĩ Dios je hue cote. Nyebe emo ndiqui nguiã ñee icuã aroneãte nande je cote. ³⁵ Mbae mo Dios mbesarei aroneãte nandesi. Nyesecua beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nandairao eã arondete raque. Mbia nandequia arondete raque. Ũquĩ ja ra Dios mbesarei eã tuchi nandesi. ³⁶ Mbia icuãte riqui nande je ã. Sã embesa ji riqui i no: Nderĩ ño mbia riqui nguiã ureiquia serĩ mbeite ã.

Oveja iquia iquia rã ño eriqui nguiã ure je ã,

i ñi embesa ji re. ³⁷ Mbia icuã icuãte raque nande je. Nĩmbirãcuã eã mbei ra nande je. Jesucristo quia siqui nguiã nanderese co.

Nyesecua beite quiatu nguiã nanderese co. ³⁸⁻³⁹ Dios nyesecua tuchite quiatu nguiã nanderese co. Dios hui aroneãte nandesí. Mbia nandeiquia iquia mose, aque mose abe Dios hui aroneãte nandesí. Mbae mo nda embui eã nandesí. Angeles. Aba checuayã icuã. Mbia rerecua. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios chiao mo. Ũquĩ ja ra Dios mbui eã nandesí. Dios quia nyesecua tuchite nguiã nanderese Jesucristo rĩ co.

9

Dios que judíos mĩ icúe umbaerã tuchi ra

¹ Jesús icuasa chõ se resẽ. Aico ñee ñooño eãte co resẽ. Espiritu Turã abe riqui sembiirandu sechiangui re co resẽ. ² Seya eãte aico co. Seya eãte aico judíos rese co. ³ Se sí raque judío. Judíos ja chõ ure re. Judíos siqui sereãte chõchĩ Jesús rese. Seso sete raque tata cuasu, judíos mingo bei sacua Jesús rese. Eĩ ndei ra sesose rete tata cuasu judíos rendaque re. Seresenda tuchite quia ñene. ⁴ Israel ndei judíos i tuchi. Seriirĩ, i rei que Dios judíos je ra. Dios que uquiracuã teacuquia rei judíos je ra. Dios que contrato saã ndei judíos je ra. Moisés chimbessa que judíos quereco rei ra. —Eĩ jenye chõ ñee seje, i rei que Dios judíos mbaaquiato quiatu ra. —Mbae turã nda asaã saã mbei quia jẽje, i bei que Dios quia judíos je ra. ⁵ Nanderamei ñiinda tuchi quiarei judíos i. Cristo tu mose ibi, judío que ae abe cote ra. Cristo rei Dios tuchi. Mbia rerecua bei tuchi rei Cristo. Amén.

⁶ Dios turã tuchi raque judíos je. Judíos que siquiãte Dios rese cote ra. Dios quiatu que ucheẽ mbuchebiã ndei ee ra. Ũquĩ mo nguiatu que judíos tuchi eã nda.

Siquiã tuchi que Dios rese ra. ⁷ Abraham ndiirĩ nyeremo ndei que ra. Ismael. Isaac. Ũquĩ nyeremo ngue eriirĩ ja rei ra. Dios que Isaac mĩ isi ra. — Abraham ndiirĩ, i eã ngue Dios Ismael riirĩ je ra. — Abraham riirĩ, i chõ ngue Dios Isaac ndiirĩ je ra. Isaac ndiirĩ jaje que Dios “judíos” i cote ra. ⁸ Abraham ndiirĩ nducucha que Dios isi turã ja eã ndese. Ae Dios cheẽ isi turã nguia, ũquĩ je chõ Dios riqui nguiã “seriirĩ” i. ⁹ Dios que ñee Abraham je ra. —Tenda nongue ra achu. Aque mose ra ãquẽ nacuĩ mo nyaacuquia neninisi Sara je, i que Dios Abraham je ra. ¹⁰ Ìquẽ ngue tiarõ cote ra. Isaac, i que ee ra. Isaac que ngũinisi tea chee ra. Rebeca, i que eninisi je ra. Eata riru rerequia mose que Dios ñee ee ra. ¹¹⁻¹² —Ae rane nda nyaacuquia ãquẽ, ngõngue rimba tuchi chõ nda aque, i que Dios Rebeca je ñee nda. Echaacuquia nonde. Eriirĩ mbae icuã naa nonde. Mbae turã abe naa nonde. —Co chõ taisi, i que Dios ra. —Co chõ taisi, i beite Dios quia co no. Mbia mbae turã naa nonde chõ Dios eirabo nguiã. Dios turãte quia ñene. Nyebe mbia mo irabochõ nguiã. Ebite quia ñene. ¹³ Dios que ñee Rebeca riirĩ nĩ nda. Ũquĩ nyeremo nĩ: Jacob ndese chõ aio nguiã nyese-cua. Esaú rese achesequa eãte, i que Dios ra, i que embessa ji ra.

¹⁴ ¿Mbaerã Dios riqui aque mĩ irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque. ¹⁵ Sã Dios ñee Moisés je nyii no:

Seya eãse mose emo ndese, seya eãte erese.

Setutãse mose emo je, seturãte ee, i que Dios Moisés je ra. ¹⁶ —Dios turã naa nda seje chã, i mose emo, ũquĩ je eã ño Dios turã ndiqui nguiã.

Ae mbae turã saã saã ndei quia, ùquĩ je eã ño Dios turã ndiqui nguiã. Ae rese Dios ia eã ndiqui, ùquĩ je quiatu Dios turã ndiqui nguiã. ¹⁷ Sã faraón no. Egipto jenda rerecua. Dios que ñee ee ra. —Aremii ngue mbia rerecuarã nda. Sequirãcuã ndeacuquia sacua mbia je. Mbiam jirandu ja sacua serese, i que Dios faraón je ra. ¹⁸ Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

¹⁹ Jemo nda ñee seje reae. —Dios ae emo ñia mãtã mose, ¿mbaerã nda jeñee asi echiaã átã je re? i ra jemo ñee seje reae. ²⁰ Dios cheẽ nandesobeishĩ aroneãte. Sã nandembaecua ñio ñee aroneãte uaosaja je no. —¿Mbaerã seraã ei nde? i aroneãte ñio ñee uaosaja je no. ²¹ Ñio aosara ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sique je no. Embae quia tuchu re. Tuchu rã ño nande re. Ñio aosarã ño Dios re. ²² Ae eicuã icuã mbeite riqui Dios je nae, ùquĩ je Dios siqui mingue i ite co. Ùquĩ nda nyoi je tata cuasu. Ùquĩ Dios mbasi serite cote. ²³ Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandea uchesecuarã nda. Nandeico sacua erese. ²⁴ Diobi chõ nande re. Dios que nandeirabo ra. Nandemo ndei judíos. Judíos eã abe abe. Dios chiirabo ja chõ nande re. ²⁵ Sã Oseas Dios cheẽ mbesa no: Ae serimba eã nyii nae, ùquĩ nda serimbarã cote. Ae rese mbia nyesecuayã nyii, ùquĩ ndese ra achesecua tuchi se cote. ²⁶ “Seresenda eã ño jẽ nde”, i que Dios ñee ee nyii ra. Hue jenda sí je ra Dios ñee cote. “Seresenda chõ jẽ cote re”, i ra Dios si ñee ee cote, i que Oseas Dios cheẽ mbesa ra.

²⁷ Eĩ ngue Isaías Dios cheẽ mbesa cose ra:

Judíos tubiriã tuchite raque rae.

Siqui ja eã nda Dios rese.

Co mii mii ño nda siqui erese.

²⁸ Dios quia ra uquiatoã mbasi ja ibi jenda cote.

Mbasi jei ra cote, i que Isaías embesa ra. ²⁹ Isaías que ã mbesa cose no nda:

Mbia rese Dios ndua eande rae, eĩ nda judíos ua ja rei.

Dios judíos mo ndecha eande rae, eĩ nda judíos ua ja rei.

Sã Sodoma jenda ua ja no.

Gomorra jenda abe no,

i que Isaías embesa ra.

Judíos siqui sereã Jesús rese

³⁰ Tacheẽ nyecua jẽje. Ae judíos eã nae, ùquĩ ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echiaã mbitorõ cote ra. ³¹ Judíos quiatu que ñee ndei ra. —Dios cheẽ ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã nguiatu ngue Dios cheẽ ndese re. ³² —Jesucristo nandeicua, i eã ñochĩ judíos. —Nande ae nandeico Dios cheẽ ndui, i chõchĩ. —Nandeico mose erui, Dios ra nandemingo bei, i chõchĩ. Judíos biãte que Jesús riqui ra. Nyebe judíos riqui turã eãte nguiã. ³³ Eĩ ngue embesa ji Dios cheẽ nda:

Serucucha que amii judíos rae ra.

Judíos ra eisiteã.

Judíos ra cuã i nyoi ee.

Ngoi ra echoi cuã i mose ee.

Sita rã ño serucucha ee re.

Ae serucucha icua quia nae, ùquĩ nguiã ra ngoi eã nyoi.

“Dios rucucha aisi jirichĩ nguiã no”, i eã nda Cristo icuasa mo ñee,

i que Dios cheẽ mbesa ji ra.

10

¹—Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co. ² Judíos siqui sete raque Dios cheẽ ndui. Ñeenda quia eicuayãte nguiã Dios icha. ³ — Dios ra nandechiã mbitirõ Jesucristo riĩ, i eã ñochĩ. Ae ae uchiã mbitirõse chõchĩ. Jesucristo icua sereã nea mbei chõchĩ. Nyebe Dios riqui nguiã echiã mbitirõ eã mbei. ⁴ Jesucristo tu nonde que judíos siquise tuchi Moisés chimbresa rese ra. Jesús que tu íbii cote ra. — Moisés chimbresa rui jẽingo mose, taembitirõ turã, i áte que Jesús ra. —Seicua mose quiatu ra jaembitirõ, i que ra.

Sã mbia siqui ja serese, i Dios

⁵ —Emo mbae icuã mo saã eã mbei emo mose, ùquĩ nda Dios mingõ bei, i rei que Moisés ra. ⁶⁻⁷ Æ nandeico Jesús icuate ã. Nyebe ae riqui nguiã nandemingo bei i ite ã. Nyebe nandeico nguiã ñee áte. —Aba quia ra oso Jesús reru ibate si nande je, i áte. —Aba quia ra oso mbia raaque rea, Jesús mbuquera sacua, i áte nande mo. ⁸ Æ ureico Jesucristo renei nenei mbia je ã. —Jẽ Jesucristo icua mose, jẽingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jite a. Echeẽ aba chiãua bite aba chianguĩ re, i ra Jesucristo icuasa ñee. ⁹ —Jesucristo rei sererecua, ere chõ ñee. —Dios que Jesucristo raaque mbuquera ra, ere chõ nguia ndechianguĩ re. Nde i mose, Dios ra nemingõ bei. ¹⁰ Emo Jesucristo icua mose uchianguĩ re, Dios ra echiã mbitirõ. —Jesucristo aicua quia co, i mose, Dios ra esirõ mbae icuã si. ¹¹ —Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda. ¹² Dios quia mbia ja rerecua tuchi re. Judíos achõ ndeēcua

eã. Judíos eã achõ nderecua eã no. Eĩ ja chõ mbia Dios je re. —Mbae mo embu seje, i mose emo Dios je, mondo turã tuchi ra ee. ¹³ Sã embesa ji riqui i no:

“Paba, seicua embitorõ”, i mose emo, Dios ra ùquĩ mingõ bei tuchi,

i que embesa ji ra. ¹⁴ Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese. ¹⁵ Dios mbia mo mondo eã mose echeẽ nenei nenei sacua, echeẽ nenei nenei aroneãte. Sã embesa ji riqui ñee no. Eĩ si chõ ñene:

Aba bite emo tu mose Dios cheẽ nenei nenei ure je.

Ureya tuchite erese,

i que embesa ji cose ra. ¹⁶ Mbia miĩ miĩ ño siquichĩ Dios cheẽ turã ndese ùquĩ. Sã Isaías ñee no:

Dios, mbia que urecheẽ ñandu sereãte ra,

i que Isaías embesa ra. ¹⁷ Mbia ra Jesucristo icuayã mbeite, jiranuã mose erese. Mbia ra jiranuãte Jesucristo rese, emo echeẽ nenei neneiã mose ee.

¹⁸ ¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangue chooño eã ngue echoi Dios cheẽ nenei nenei ndesẽ. ¹⁹ ¿Judíos jiranuãte Jesús cheẽ turã ndese re? Jirandu tuchite rei que ra. Sã Moisés Dios cheẽ mbesa no: Dios rei se. Judíos eã ndese taico turã.

Mbia aquiatuã taisi serimbarã. Judíos nda queteã tuchi serese chã,

i que Moisés Dios cheẽ mbesa ra. ²⁰ Isaías abe que Dios cheẽ mbesa ra. Æ ngue embesa ra:

Ae serequia eãte quia, ùquĩ ño ngue serea ra.

Ae ndua eãte quia serese, ùquĩ je chõ achecua nguiã, i que Dios ra,

i que Isaías siquicheâte Dios cheê mbesa ra. ²¹ Isaías que ñee judíos je no nda:

Dios riqui ñee jêje co. “Jêingo serese”, ae beite raque se quia judíos je co.

Secheê mumba bei chõchĩ.

“Jêingo serese”, ae beite raque quia secheê mumbasa je co,

i que Dios ra, i que Isaías Dios cheê mbesa ra.

11

Dios ia eâte judíos rese

¹ Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañi nda Dios hui judíos si re?

²—Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jêtesarei chõ Elías cheê si Dios je re? Elías que ñee icuâte judíos ataque rĩ aque mose ra. ³—Dios, judíos que ndecheê nenei neneisa iquia ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos seiquia chee, i rei que Elías Dios je ra. ⁴ Dios que ñee Elías je cote ra. —Nde mĩ eã ño serimba re. Serimba tubiriâte nyeresê. Siete mi l serimba que ngoi eâte ngũĩ ndese ñee ñee Baal naanguia je ra, i que Dios ñee Elías je cose ra. ⁵ Eĩ ño namo abe re. Judíos emo emo ño siqui nguiã Dios rese ã. Ũquĩ mĩ ño Dios chiirabo ũquĩ nde. Uturã je chõ Dios ũquĩ irabo nguiã. ⁶ Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa ndibishorõ mose, eĩ nda Dios aba irabo eâte rei uturã je. ⁷ Dios quiatorã nande, i rei que judíos ra. Dios quiatoã tuchi que eriqui ra. Jesucristo icua sereâte que equia ra. Co mĩ mĩ ño ngue Dios irabo uquiatorã nda. Eataque

que Jesucristo icua sereâte quia ra. ⁸ Sã embesa ji riqui ñee no:

Dios que embaaracua eã nda.

Nyebe mbae icua eâte nguiã, mae mose Dios chiao rese.

Nyebe Dios cheê icua eâte nguiã eandu mose no,

i que embesa ji cose ra. Eĩ mbei chõ namo abe re. ⁹ David abe que ucheê mbesa ra. Eĩ ngue embesa ra:

Sã eya chooño umbae tubiriã ndese.

“Nandeico turâte ã”, sã i, siqui icuã mose.

Sã Dios embua tuchi embasi mose.

¹⁰ Sã eresa nyiati ati bei.

Mae eã sacuã.

Sã mbae usi riqui eituquia bei,

i que David ñee nda.

¹¹ Judíos que Dios cheê secha rei ra. Uba je quia ra ecuaê Dios rese. Dios si judíos hui mose quiatu que judíos eã siqui arôte Dios rese cote ra. Dios judíos eã mingo bei tuchi sacuã cote. Judíos ra queteã tuchi chee Dios rese cote. Uba si sacuã erese cote. ¹² Judíos que Dios cheê isiteã nda. Nyebe mbia judíos eã ja Dios cheê andu ja nguiã cote. Judíos Dios cheê mumba mose, Dios que uturã teacuquia ja mbia mangue chooñoa jenda ja je cote ra. Judíos uba si mose Dios rese, mbia mangue chooñoa jenda ra siqui tuchi Dios rese cote.

Judíos eã ño Dios cheê isi

¹³ Jêje judíos eã je aico Dios cheê nenei nenei a. —Judíos eã je eico secheê nenei nenei, i que Dios semondo ra. Nyebe aico nguiã Dios cheê nenei nenei sete. ¹⁴ Judío chõ se no nde. Sã jê jêingo Dios rese no jê. Sã judíos abe riqui Dios rese jê na si. Dios erirõ sacuã mbae icuã si. ¹⁵ Judíos Dios isiteã mose que Dios hui chõ judíos si ra. Judíos eã nguiatu que Dios isi uquiatorã cote ra. —Mbia mo ja sequiotorã cote, i que Dios judíos eisiteã mose ra. Judíos ra uba si chee Dios rese emo mose cote. Mbia raaque quera si

rã tuchi ra aque mose cote. ¹⁶ Sã mbia mo mbichae raã no. Mbichae ñiinda uchi turã mose, eruinda abe ra uchi turã no. Mbichae ñiinda rã ño Abraham nde. Judío i tuchi chõ Abraham nde. Sã Abraham siqui turã tuchi Dios je no. Nyebe ra eriirĩ abe uba chee Dios rese no. Ei turã mose, erãquiã abe ra eturã no.

¹⁷ Olivo rãquiã na ño judíos re. Judíos siquiã mose Dios rese, olivo rãquiã na ño ngue Dios echisia mombo ra. Ñquĩ naquiã nendaque re chõ ngue Dios jemĩ nda. Jẽ judíos eã. Injertar i raanguia chõ Dios jembucha nguiã ei rese. Jemingo tuchi sacua Dios rese. Olivo rãquiã na eã ndaque jẽ.

¹⁸ Jenguasu ra jẽsaã saãchĩ judíos je jẽ! J Dios jẽisi turã mose jẽ! Erãquiã injertar i ji rã achõ ño jẽ nde. Erãquiã nda hui mingo eã. Ei quia nda erãquiã mingo nguiã. Erãquiã na ño jẽingo nguiã jẽ. ¹⁹ —Olivo rãquiã ngue Dios chisia urembucha sacua ei rese, jjenyechĩ nda jenguasu raã naa jẽ!

²⁰ Dios que echisia sia Jesucristo icua sereã mose ra. Jẽ Jesucristo icua mose chõ ngue Dios jembucha olivo i rese ra. Jemingo bei sacua. Nyebe jẽingo jenguasu raã naa eã. Jẽireĩ ireĩ jiri quia Dios si. ²¹ Dios que olivo rãquiã nyisia mombo Jesús icuayã mos e ra. Eĩ nda Dios jemombo jẽ abe Jesús icuayã mose.

²² Jã Dios turãte mbia siqui mose erui no jẽ! Jã mbia mbasi echeẽ mumba mose no jẽ! Jã eturãte jẽje no jẽ! Jẽingo bei chõ Dios turã ndese jẽ! Jẽingo eã mose Dios rui, Dios ra jemombo. Ira rãquiã sia ji mombo rã si. ²³ Judíos uba si mose Dios rese, Dios ra embucha si esiasa rese. Injertar i si ra ee. Dios mĩ ño eaquiatsu ñquĩ naa nde. ²⁴ Judíos eã ño jẽ nde. Olivos turã naquiã eã ño jẽ nde. Olivo mbuae rãquiã na ño jẽ nde. Dios ae que jembucha nguiã olivo i rese. Injertar i jẽje. Ae Dios nyisia

nyii nae, ñquĩ nda Dios mbucha si uchisia rese.

Judíos abe ra siqui chee Jesús rese

²⁵ Tacheẽ nyecuayã na jẽisaa. Mbia chiicuayã tasenei na jẽje. Jenguasu raã naa sacua eã judíos je. Judíos yete tuchi que hui rei Dios si ra. Judíos eã nguia siqui tuchi Dios icua ã cote. Judíos eã Dios chiirabo Jesús icua ja mose, judíos abe ra uba ja erese cote. ²⁶ Aque mose ra Dios judíos rirõ ja huicua si cote. Sã embesa ji riqui i no:

Mbia mbuturãsa ra tu Sion si. Ae ra Jacob ririĩ sirõ ja huicua si.

Judíos rirõ ja huicua si.

²⁷ Aque mose ra judíos icua ambutiã ja esi.

Secheẽ nda ique aque mose cote, i que Dios ra,

i que embesa ji ra. ²⁸ Judíos yete tuchi chõ Jesús cheẽ turã ucuayã nguiã ñquĩ. Nyebe Dios uturã ndeacuquia nguiã jẽje. Judíos eã je. Dios quia nyesecua beite nguiã judíos rese. Irabo que nyii ra. Eramei ja rĩ ño Dios judíos irabo nguiã. ²⁹ —Mbae mo tamee jẽje, i mose Dios, mondo rae. Dios ra uchimondo sirombe eã. Dios ra hui eã mbei uchiirabo si. ³⁰ Jesucristo que jẽicuayãte quia nyii ra. Judíos hui mose Dios si, Dios que uturã teacuquia jẽje cote resẽ. ³¹ Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je. ³² Eĩ ja chõ mbia Dios je re. Emo ngue echeẽ mumbayã eãte quia ra. Nyebe eya eãte riqui nguiã nande ja rese.

³³ Dios turã tuchite. Dios aracua tuchite. —¿Mbaerã Dios ñquĩ naa nde? nande aroneate. Dios chisaã nandeicua aroneãte quia ã. ³⁴ ¿Emo ndua ndua quia Dios rã nde? ¿Emo mose mbia riqui Dios mbaaquiatsu re? ³⁵ ¿Emo nane mbae mo mondo quia Dios je re? ¿Dios mbae mondo

nonde re? ³⁶ Dios ae que mbae chao ja ra. Umbaerã ño echao ja nguia mbae. Ae quia ecuasú jiri mbae ja si re. Nandechêê turã mbei ra equia erĩ. Amén.

12

Je sí chõ jeñimondo Dios je

¹ Dios ia eã mbeite riqui nanderese co. Nyebe jẽ sí chõ jeñimee Dios je. Jendeco chõ jemee Dios je. Jeñia turã jemee Dios je. Ebite ũquĩ. Dios que mbae mondo tuchi nande je ra. Eĩ nande chõ ñimondo ee ae. ² ¡Jesús quiatoã na nda jẽingochĩ jẽ! —Nde rã si semundua ndua ramo, Paba, jenyẽ chõ nguia Dios je. Eĩ jenyẽ mose ra Dios ñeenda huicha teacuquia jẽje. —Eĩ jenyẽ, eĩ jenyẽ chõ, i bei ra Dios quia jẽje cote.

³ Dios turã ngue seirabo ucheẽ nenei nenei sacua jẽje ra. Nyebe aico nguia jembiirandu randu co. —Se jiri quia mbia si re, jenyẽ tuchite chĩ na jẽ! ¡Endua ndua turã ño ndechue jẽ! Dios nembaaquiatsu tuchi mose, ebite quia nde re. ⁴⁻⁵ Mbae tubiriãte nanderete rese. Nanderesa. Nandeo. Nandeisa. Ũquĩ jate nanderete rese. Mbae mĩ nda siquĩã nanderete rese. Nandeo oco mbae rese. Nandeisa mbae andu. Nanderesa mae mbae rese. Nandechuru ñee. Nanderete quiarei “ã nandesaa”, i tuchi nyue. Eĩ si chõ Jesús icuasa nande re. Jesús rete ja chõ nande re. “Ã nandesaa”, nandete equia nandechue ã. Mbae rese jaajate que Dios uquiato mingo ra. ⁶ Dios turã tuchi que nande je ra. —Co rese eico nde. Æ ndese eico nde, i Dios quia nandembuchao chao co. Ũquĩ naa sacua Dios riqui uquirãcuã mee mee nande je co. —Secheẽ esenei senei, i mose Dios emo je, sã aque echeẽ nenei nenei turã echeẽ ndui si. ⁷ —Mbae turã esaã saã mbia je, i mose Dios emo je, sã aque mbae

turã naa naa mbei mbia je. —Mbia embaaquiatsu quiatsu, i mose Dios emo je, sã embaaquiatsu turã tuchi. ⁸ —Seosei uquia mbia je, i mose Dios emo je, sã aque Dios osei uquia turã tuchi mbia je. —Mbae emee mee mbia je, i mose Dios emo je, sã aque abei tuchi. Sã ngueteã eã tuchi mbae rese ee. Dios emo mĩ mose ererecuarã, sã ererecuaturã tuchi aque. —Mbaecha reã je mbae esaã saã, Dios i mose emo je, sã aque ia tuchi mbae turã naa naa mbaecha reã je.

⁹ ¡Jenyesequa chooñoohĩ nda jenyiese jẽ! ¡Mbae icuã si jenyicuasẽ cuasẽ tuchi quiatsu jẽ! ¡Mbae turã ndese chõ jẽingo tuchi jẽ! ¹⁰ ¡Jembi turã ño jenyiese jẽ! ¡Jenongue rã nguia tuchi jenyue jẽ! ¡Jeñee turã turã ño nguia emo nĩ jẽ! ¡Nderĩ nda erecheẽ turã turãchĩ jẽ! ¹¹ ¡Jeñimbutomo tomochĩ nda jẽ! ¡Jeñimbiratã tuchi quiatsu Dios je jẽ! ¹² Jesucristo cheẽ nda io chee nande je emo mose cote. Ũquĩ ño nandesaarõ arõ nguia ã. Nyebe jẽya tuchi quiatsu siqui eraarõ arõ. Mbia jembasei mbasei mose, jenyecuachõ ño nguia ee. Jeñee ñee mbei quiatsu quia Dios je. ¹³ Mbae eã mose Jesús quiato je, mbae mo jemondo ee. Mbia mo oso mose jenyuchúaa, ¡jẽisi turã ño jẽ!

¹⁴ Mbia mo icuã icuã mose jẽje, ¡jẽturã ño ee jẽ! —Paba, mbae turã emondo rã ee. Ae icuãte riqui seje, ũquĩ je, jenyẽ chõ Dios je. ¹⁵ Ae eyate riqui, ũquĩ ndese chõ jẽya jẽ abe. Ae nyeseo quia, ũquĩ je ndese abe jenyeseo no. ¹⁶ Hue rĩ ja chõ jẽingo ndua turã. ¡Jenguasu ra jẽsaã saãchĩ emo je jẽ! ¡Jẽseteã ño jẽingo jẽ! ¡Jẽaquiatsu ra jẽsaã saãchĩ jẽ! ¹⁷ Mbia mo icuã icuã mose jẽje, jenyecuachõ ño nguia ee. Mbae turã ño jẽsaã nguia mbia resa rae. ¹⁸ ¡Jẽingo turã ño mbia je jẽ! ¡Nda jẽingo ubi turã jenyiese. ¹⁹ Mbia icuã mose jẽje, ¡jeñee icuãchĩ nda

erobeishĩ jê! Dios quia ra embasi nguiã eicuã mose. Sã embesa ji riqui i no:

Se quia mbia tambasi eicuã mose, i que Dios ra,

i que embesa ji ra. ²⁰ Ae eicuãt e riqui jêje, ũquĩ jembuquiaru chõ eriãcuã mose. Ũquĩ jembiu chõ eisei mose. Eĩ jenye mose ee, eireĩ te ra huĩcuã mose cote. ²¹ Mbia icuã mose jêje, jeñeechĩ nda echeẽ ndibishorõ. Jẽingo turã ño ee. Mbae turã nguia equirãcuã jiri mbae icuã si re. Mbae icuã mombo jiri.

13

Sã mbia riqui turã ererecua ja je

¹ Mbia ja ererecua cheẽ mumbayã nguiatu. Dios ae chõ ererecua mui nguiã. Dios chimui ja chõ mbia rerecua re. ² Ae mbia rerecua cheẽ mumba quia, Dios cheẽ abe mumba chõ nguiã aque. Dios quia emui tare nguiã. Ae ererecua cheẽ mumba mumba quia, ũquĩ nda mbae rasi saã cote. ³ Mbia turã mbusiquiche sacuã eã ño ererecua re. Mbia icuã mbusiquiche sacuã nguia ñene. Nde ndeico turã mose, ererecua ra nembusiquiche eã. Ndeico turã mose, ererecua ra ñee turã mbei ndeje. ⁴ Dios ae chõ ererecua mui nguiã. Nandereaquiutu turã sacuã. Nde mbae icuã naa mose, ndesiquiche jiri nda esi chã. Ndeicuã mose ra ndeiruã nua arõte. Dios quiatu emui nguiã ererecuarã mbia icuã mbasi mbasi sacuã. ⁵ Ererecua cheẽ nandemumbayã ño nguia. Nandembaasi asiã sacuã achõ eã ño ñene. Nandendua turã sacuã abe chõ ñene. ⁶ —Impuestos jêisi isi mbia si, i que Dios ererecua mui nda. Nyebe nandeico nguiã impuestos mondo mondo turã ererecua je. Dio s cheẽ nguire chõ ererecua riqui nguiã eisi isi. ⁷ Jê deber i mose emo je, mbae jembuchebi jei chõ ee. Jê deber i

mose impuestos, jemondo chõ ee. Ererecua je jẽingo turã ño. Jeñee turã ño erĩ.

Jenyesequa ja quia jenyiese

⁸ Emo mbae mondo mose jêje, jẽingo are arete chĩ nguiã mbae mondo rocoĩ ee. Deber jenyechĩ nda emo je. ¡Jenyesequa ja quiatu quia jenyiese jê! Jenyesequa mose mbia rese, Moisés chimbasa ja jemumbayã ño nguiã ũquĩ. ⁹ ã ndei Moisés chimbasa ã: Emo ninisi rese ra ereicochĩ. Mbia mo nda ereiquiachĩ.

Mbae mo nda erembuquiachãchĩ.

Emo je ra erecheẽ ñooñochĩ.

Emo mbae ra erechosi choseichĩ, i que Moisés chimbasa ra. Nandechesecua mose mbia rese, nandeico embesa ji cheẽ mumbayã ã. ã ndei Jesucristo cheẽ ã: Sã ereico nyesequa nderete rese no, eĩ ere si chõ nyesequa emo ndese. Nde ã naa mose, Moisés chimbasa ja eremumbayã nguia ã. ¹⁰ Ae nyesequa quia mbia rese, ũquĩ nda mbae icuã saã eã mbei emo je. Emo nyesequa mose mbia rese, Dios cheẽ ndui si chõ eriqui nguiã mbae turã naa naa ũquĩ.

¹¹ Dios rese jẽingo tuchi ũquĩ. Nandemae jei ra Jesucristo rese cote. Nandechẽ ngue equia nyii. —Nandemae je ra Jesucristo rese, nande que equia nyii. Namu nda nandemae erese cote. Aichite eñi tu a cote. ¹² Itondaru rã ño mbae icuã ja namu nde. Jesucristo ra tu mbae mbuturã cote. Nyaashĩ na nda cote. Nyebe nandeico bei rã mbae turã ndese cote. Dios rese nandeico tuchi rã cote. Mbae icuã ndiquisã sacuã nandesi.

¹³ Nandeico turã ño Dios resa rae, ¡Mbia quiacua ra nandesichãchĩ jê! ¡Nandeiquacuachĩ nda jê! ¡Emo ninisi rese ra nandeico icochĩ jê! ¡Mbae icuã nda nandechosi choseichĩ je! ¡Nandeicuã icuãchĩ nda emo mbaicuã icuã jê! ¡Emo

mbae ra nandechosei choseichĩ jê!
 14 Jeñimee tuchi quia Jesucristo je.
 Ae nda uquirãcuã mee tuchi jêje
 chã. Mbae icuã ndiquisã sacuã jêsi.
 Ae icuã mbia chosei chosei quia
 nae, ũquĩ nda jêsaã saãchĩ jê Jesús
 resenda chõ jê ndesê.

14

Jeñee asiã mbei jenongue je

¹ Jesús quiato mo Jesús icua
 tuchiã mose, jêisi turã ño. Jeñee asi
 asichĩ nda ee. ² Emo emo mbae u ja.
 Emo emo soo u eã tuchi no. Ae soo
 u eãte quia nae, embaaquiatu tuchi
 iriã ño ũquĩ nde. ³ Ae soo u guia nae,
 sã ũquĩ ñee asiã mbei soocua reã
 je. Ae soo u eãte guia nae, sã ũquĩ
 ñee asiã mbei soocua je no. Dios
 quiato ja chõ ñene. ⁴ Erecheẽ icuã
 aroneãte ererecua rimba mo je. Ae
 ae mbae saã nguiã nguerecua je.
 Dios ae nda ñee nguiã nguimba je.
 Mbae raã turã mose. Mbae raã icuã
 mose abe no. Dios quirãcuã ae nda
 ngũimba mingo nguiã mbae turã
 ndese.

⁵ —Nyaashĩ mo ngue Dios irabo
 mbiicúe cose ra. Ũquĩ nyaashĩ
 mose nandechimbaacua rã, i Jesús
 quiato mo nguia co. Jesús quiato
 mo nguia ñee nguiã: —Eĩ ja chõ
 nyaashĩ ndesê, i emo no. Sã Dios
 quiato ja ae riqui ndua ndua
 uchiangui re ae. ⁶ Dios quiato mo
 ñimbaacua mose aque nyaashĩ
 mose, Dios je chõ eriqui nguiã
 ñimbaacua. Dios quiato mo mbae
 raã naa mose aque nyaashĩ mose,
 Jesús je chõ eriqui nguiã mbae raã
 naa aque nyaashĩ mose. Ae soo
 u quia, Dios je chõ eriqui nguiã
 soo u. Gracias, i que Dios je nyii
 ra. Ae soo u eã nguia, Dios je chõ
 eriqui nguiã soo u eã no. Ae abe
 gracias i chõ nguiã Dios je ague.
⁷ —Sebi rese chõ taico bei, nande
 aroneãte. —Semanose mose quia
 tamano, nande aroneãte. ⁸ Dios
 ae chõ nandereco mingo nguiã.

“Emano”, i mose Dios nande je,
 nandeico nguiã mano. Nandereco
 siqui mose, Dios rimbarã ño ñene.
 Nandemano mose, Dios rimbarã
 ño nda nandeico nguiã no. ⁹ Cristo
 que mano nda. Quera si que ra.
 Mbia rerecuarã ngue quera si ra.
 Mbia reco rerecuarã. Mbia mano
 je rerecuarã abe no.

¹⁰ Nandechẽ icuã icuã aroneãte
 nanderesenda mo je. Emo mose
 quia ra Dios mae tuchi nanderese
 cote. Nandechiangui renda ra etea
 tuchi cote. Ae quia nda nandeicuã
 tea nguiã. Nandeturã abe rea. ¹¹ Ñ
 ndei embesa j i ã:

Dios ndei se. Se rei sereco bei.
 Sésaa ra mbia chĩ ja ngoi ngũĩã
 ndese.

Ñee jaaja ra seje cote.

“Dios tuchi chõ nde re”, i jaaja ra
 seje cote, i que Dios ra,

i que embesa ji ra. ¹² Nande ae
 ae ra mbae nandesenei senei Dios
 je aque mose. —Ñe ngue asaã saã
 nguia seico mose íbii ra, nande ja ja
 ra ee cote.

Jenongue jembicuã eã

¹³ Nyebe nandechẽ icuã eã
 nguia nanderesenda mo ñii.
 iNandembia eãte chĩ nda jê! iMbae
 icuã nda nandesã uquiachĩ ee jê!
¹⁴ Jesucristo que sembaaquiatu ra.
 —Mbae turã ja chõ mbia chiurã
 nde, i que ra. —iCo ra jêuchĩ jê! iãte
 Dios mbae mo ñii. —Eicuãte co, i
 mose emo, sã ae mii eu eã. Ae eu
 mose, eicuãte ee. ¹⁵ —iCo nandeu
 eã jê! Eicuãte, i mose nderesenda
 mo ndeje, eu eã. Nde eu mose,
 erechesecua eã ño nguiã ndere-
 senda rese aque. Nderesenda
 je abe chõ ngue Jesucristo mano
 ndesê. iMbaerã nda nderesenda
 erembicuã ndechuubi je re?
¹⁶ Ndechuubi turã ndaque ndeje.
 “Eicuãte” i mose nderesenda mo,
 eu eã ae. Nde eu mose, mbia
 ra erembucheẽ icuã ndechue.
¹⁷ Dios chõ nandererecua cote
 re. Nyebe nanderendua tuchi eã
 nguia nandechiurã ndese. Ae

nandembei quia, ũquí abe rese. Dios rese quia nandendua. Ae chõ nandemingo nguiã mbae turã ndese co. Ae chõ nandechiã mbucoi nguiã co. Espiritu turã ae nandembia mingo nguiã co. ¹⁸ Eĩ nande mose Cristo je, Dios ia tuchi ra nanderese. Mbia abe ia ra nanderese. ¹⁹ Nandeico turã nda nandechue chã. Eĩ nande nda Jesús oseĩ oseĩ uquia nandechue chã. ²⁰ —¡Aque soo ra nandeuchi jê! i mose Jesús quiato mo, jereuchi nda jê! Jesús quiato ra erembicuã arõte nde eu mose. Mbae turã ja raque mbia chiũ. “Eicuãte”, i mose Jesús quiato mo, eu eã ae. ²¹ Soo Jesús quiato mbicuã mose, soo ra nandeu eã. Vĩno Jesús quiato mbicuã mose, vĩno nda nandembei eã. Mbae mo Jesús quiato mo mbicuã mose, nandeico eã erese nande abe. Mbae mo Jesús quiato mo mbicha serĩ mose Dios icha si, ũquí ndese nandeicoã nande. Eĩ nda ichayã esi. ²² —So o icuã eã ño ñene, i mose Dios ndeje, echecuachõ ño nguia eu. Endua tuchi mbae mo naa nonde. Eicuã arõ mose ndeje, esaã eã. Eturã mose ndeje, echecuachõ ño eraã. Nde ũquí naa naa mose, ndeya tuchi rae. ²³ Nde ndeiranuã mose mbae mo ndese, esaã eã. —Eturãte ereae. Eicuãte ere no ae, nde i mose eriisu isu, esaã eã ño. Ndeiranuã eraã ñoono mose, eicuãte ũquí. Ndechiisu isu u mose soo, eicuãte ũquí. —Eicuãte ereae, nde i mose, ereicochĩ nguiã eu.

15

Nandebi rese ra nandeicochĩ jê; nandenongue bi rese quia nandeico

¹ Nande mo Jesús icuat e quia co. Ae Jesús icua tuchiãte quia nae, ũquí je nandeico turã jiri ae. Nandembaaquiato quiato ae. Nandebi achõ ndese ra nandendua eã. ² Ae nandebite nande ae, ũquí ndese nandeicoã. Ae Jesús quiato nongue bite nae, ũquí ndese quia

nandeico. ũquí mose nandeico nanderesenda mbaaquiato tuchi Jesús rĩ co. ³ Cristo chee que siquĩ ubi rese ra. Sã embesa ji riquĩ ñee Cristo rĩ no:

Paba, ae ndeucuayãte quia nae, ũquí ngue ñee icuã mbeite quia seje ra,

i que Cristo ñee ngu je ra,

i que embesa ji ra. ⁴ Dios chee mbesa ji cose ndare chõ nandembaaquiatusa re. Nandemingo mingue sacua. Nandembiracuã sacua Jesucristo rĩ. Nyebe nandeico nguiã Jesucristo raarõ arõ minguite ã. ⁵ Dios chõ nandemingo mingue nguiã. Dios chõ nandembiracuã nguiã. Dios nda jemingo turã mbei nyiese Jesucristo chee ndui si chã. ⁶ ũquí mose ra jẽingo ñee turã mbei Dios je. Hue rĩ ja ra jẽingo ndua turã Dios rese. Dios quia Jesucristo ru re.

Dios iate judíos eã ndese

⁷ Sã Cristo nandeisi turã no, eĩ jenye si chõ nguia nyiisi turã. Eĩ nda mbia ñee turã Dios rĩ. ⁸ —Eĩ tae tae, i que Dios judíos i ñiinda ja je cose ra. Nyebe Cristo ru nguiã mbae turã naa naa judíos je cote. —Dios chee iochĩ cote, i nda judíos chã. ⁹ Judíos eã abe mundua sacua Dios rese que Cristo ru ra. Dios turã ndese emundua sacua ño ngue eru nguiã. Co rei David chimbese co: Paba, ndeturã tasenei senei judíos eã je.

Tairasei rasei abe ndeje,

i que David embesa ra. ¹⁰ Co rei embesa ji chee mo co:

Judíos eã, jẽya chõ Dios rese.

Sã Dios rimba iate erese no, eĩ jenye chõ jẽ abe jẽya erese,

i que embesa ji ñee nda. ¹¹ Co rei embesa ji chee mo co no:

Sã mbia ibi jenda ja ñee turã ja Dios rĩ,

i que embesa ji ra. ¹² Isaías que co mbesa ra:

Isaí riirĩ nguia ra mbia judíos eã
nderecuarã tuchi cote.

Mbia judíos eã nda “ichõĩñoa reã”,
i tuchi ee,

i que Isaías embesa Jesús rĩ nda.

¹³ Ũquĩ jẽingo Dios icuate ũquĩ. Dios
nda jembia tuchi mingo chã. Dios
nda jeñia mbucoi chã. Dios ae
chõ “Cristo jẽsaarõ arõ”, i chõ nguia
nandemingo mingue ã. Espíritu
Turã ndiqu i nandembirãcuã tuchi
ã. Nandembia mingo Cristo raarõ
arõ ã.

¹⁴ Seyate aico jendese co, Sere-
senda. Jẽingo turãte quia jenyiese
ũquĩ. Mbae jẽicua tuchite cote. Jẽ ae
jẽingo nĩmbaaquiato quiato turã
jenyue ũquĩ. ¹⁵ Aireĩ ireĩ ãte ã mbesa
jẽje, Seresenda. Jẽtesareiã sacua ã
si. Dios turã ae ngue seirabo nguia.
Mbia mbesarei eã sacua Jesús cheẽ
si. ¹⁶ Dios que seirabo Jesucristo
rimbarã nda. Ucheẽ nenei nenei
sacua mbia judíos eã je. Mbia
judíos eã secheẽ isi turã mose,
Espíritu Turã nda emingo icue Dios
mbaerã cote. Ũquĩ mose ra Dios
judíos eã isi turã cote. ¹⁷ Se Dios
cheẽ nenei nenei mose mbia je,
mbia que siqui tuchi erese secheẽ
nguire ra. Nyebe ũquĩ ndiqui
nguia sembia tuchi. ¹⁸ Jesucristo
que sembirãcuã nda. Ucheẽ nenei
nenei sacua judíos eã je. Nyebe
judíos eã ndiqui nguia siqui tuchi
Dios rese cote. Secheẽ nguire cote.
Sechisaã ndese abe maende cote.
Mbae mo nĩ abe ra acheẽ iã cote.
Jesucristo que sembirãcuã, ũquĩ mĩ
ño aico nguia ñee jẽje a. ¹⁹ Espíritu
Turã ngue uquirãcuã mee seje ra.
Nyebe aico nguia mbia mae sayã
naa naa tuchi mbia je. Ũquĩ mos e
que mbia riqui tuchi Dios rese cote
ra. Jesucristo cheẽ ngue asenei
senei Jerusalén nda. Mbia mangue
chooñoa jenda je abe. Ilírico jenda
je abe. ²⁰ —Ae mbia riqui Jesu-
cristo cheẽ nenei nenei eãte nae,
huee Jesucristo cheẽ tasenei senei
se, ae que se ra. Emo Jesucristo

cheẽ nenei neneisa, huee taico bei
eã, ae que se ra. ²¹ Sã embesa ji
riqui ñee no:

Ae jiranuãte quia Cristo rese, ũquĩ
nda jirandu erese cote.

Ũquĩ nda eicua cote,

i que embesa ji ra.

Aso ra Rómaa, i Pablo

²² Ae mbia riqui Dios cheẽ
nenei nenei eãte, huee quiato
ngue aico nguia Dios cheẽ nenei
nenei. Nyebe aico nguia osoãte
jendea. ²³ Cose ndarechõ mbei chõ
aico rei nguia “taso jendea”, i. A
jenda mbia que Dios cheẽ ñandu
tuchi cote ra. Nyebe taso jendea
cote. ²⁴ Seso mose España nda aso
jendea. Sembia jiri sacua jendese.
Taico mbirĩ na jendese huee. Jẽ
nda sembucua turã mondo hue si
cote chã. ²⁵ Jerusalén nane nda aso.
Ofrenda mo arao quia Jesús quiato
je co. ²⁶ Jesús quiato Macedonia
jenda que ofrenda munua nua
nda. Jesús quiato Acaya jenda
rese. —Jesús quiato mbaecha reã
je mbae nandemondo rã Jerusalén
jenda je, i que ñee nyue nyii ra.
Ũquĩ ño arao nguia co. ²⁷ Coche
ũquĩ ndiqui nguia mbae mondo
judíos Jesús quiato je. Judíos
rane nguia Dios cheẽ senei senei
tare nguia judíos eã je. Nyebe
ra judíos eã mbae mo mondo
judíos Jerusalén jenda je cote.
²⁸ Nyebe ra ofrenda munua ji arao
ee. Jesús quiato mbaecha reã
je. Aquere ra aso España quiti
cote. Aicha ra ñeenda cúa si mae
jendese. ²⁹ Jesucristo ra semondo
turã jendea. Ae ra nandembia ja
uturã je. ³⁰ Seresenda, Jesucristo
quiato quia jẽ nde. Espíritu Turã
ño jembuchesequa nguia jenyiese
ũquĩ. Nyebe jeñee tuchi quia Dios je
serĩ. Nandechẽ ja tuchi quiato ee
serĩ. ³¹ —Paba, mbia icuã Judea
jenda esiquisã Pablo si. Paba,
ndequiato Jerusalén jenda nda
ofrenda isi turã Pablo si chã, jenyee

chõ Dios je. ³² Ũquĩ mose ra seya tuchi mae jendese cote, Dios “eno” i mose seje. Jendese seico mose ra sequenea aucua tuchi cote. ³³ Sã Dios riqui bei jendese. Sã eriqui jembia.

16

Pablo saluda i ja mbia je

¹ Febe jëisi turã ño. Jesús quiato chõ aque cuña nde. Mbae turã esaã saã mbeite quia Jesús quiato Cencrea jenda je aque. ² Jëisi turã ño nguia Jesús rĩ. Sã Jesús quiato riqui nyiisi turã no, eĩ jenye chõ Febe isi turã no. Ae que mbae turã saã saã mbeite Jesús quiato je ra. Seje abe no. Nyebe jëturã ño jë abe ee. ³ Aquila je saluda jenye rã seje. Eninisi Priscila je abe no. Serese que ũquĩ ndiqui Jesucristo cheẽ nenei nenei tuchi ra. ⁴ Mbia que eiquia serĩ serite rei quia serĩ nda. Siquicheã mbeite que equia ra. Nyebe aico nguiaã gracias i tuchi ee. Se ae eã. Jesús quiato judíos eã abe riqui gracias i jate ee ã. ⁵ Ae Jesús quiato ñumunua nua nguia Aquila chuchua, ũquĩ je abe saluda jenye. Epeneto je abe saluda jenye. Sequiato tuchite que aque ra. Ae rane ngue Cristo isi Acaya jenda ra. ⁶ María je abe saluda jenye. Ae que mbae saã saã tuchi Dios je jësaa ra. ⁷ Andrónico je abe saluda jenye. Junias je abe. Se sí chõ ũquĩ nde. Serese que etarõ ji riqui cárcel nda. Dios cheẽ nenei neneisa tuchi chõ ũquĩ nde. Ũquĩ nane ngue Cristo icua sesi cose ra. ⁸ Amplias je abe saluda jenye. Sequiato tuchi chõ Dios resenda aque re. ⁹ Urbano je abe saluda jenye. Ae que Dios cheẽ senei senei nguia urerese ra. Sequiato Estaquis je abe saluda jenye. ¹⁰ Apeles je abe saluda jenye. —Seicuaa tuchi Apeles riqui co, i que Dios Apeles rĩ nda. Aristóbulo chuchua jenda

je saluda jenye seje. ¹¹ Herodiõn je abe saluda jenye. Se sí chõ ae re. Narciso chuchua jenda, ae Jesús quiato nae, ũquĩ je saluda jenye. ¹² Trifena je abe saluda jenye seje. Trifosa je abe. Ũquĩ ndiqui mbae raã naa tuchi Dios je ũquĩ. Nandequiato Pércida je abe saluda jenye. Ae que mbae saã saã tuchi quia Dios je ra. ¹³ Rufo je abe saluda jenye. Dios chiirabo tuchi chõ ae re. Esi je abe saluda jenye. Taĩ na tuchi que eriqui seje ra. Mbae que esaã ja tuchi quia seje ra. ¹⁴ Asíncrito je saluda jenye seje. Flegonte je abe. Hermas je abe. Patrobas je abe. Hermes je abe. Ae Jesús quiato riqui ũquĩ ndese, ũquĩ je abe saluda jenye. ¹⁵ Filólogo je abe saluda jenye. Julia je abe. Nereo je abe. Enongue je abe. Olimpás je abe. Ae Jesús quiato riqui ũquĩ ndese, ũquĩ je abe saluda jenye. ¹⁶ Jenyiquiaama ama saluda i nyue. Tuchuamo jenda ja Cristo quiato riqui saluda i jëje ã.

¹⁷ Huee emo ndiqui Jesús quiato mbicuã sete hue. Hue emo ndiqui “Jesús quiato tambicha Jesús sí”, ite hue. Jenyicuasẽ ño nguia ũquĩ sí. Jesús cheẽ ndui sí eã ño eriqui nguiaã mbia mbaaquiatu quiatu ũquĩ. ¹⁸ —Ae Jesucristo bite, ũquĩ nandesaa saã, iã ño nguiaã ũquĩ. Ubi achõ ño esaã saã nguiaã ũquĩ. Echeẽ turã aba reã ño eriqui nguiaã mbia je ũquĩ. Ae Jesucristo icua tuchi eãte quia nae, ũquĩ mbĩrĩ irĩ ño nguiaã ũquĩ. Jenyicuasẽ tuchi chõ nguia ũquĩ sí. Aba mbĩrĩ irĩsa tuchi chõ ũquĩ nde. ¹⁹ Jë ngue Dios cheẽ jemumbayãte ra. Mbia que jirandu jate jendese ra. Nyebe seyate riqui nguiaã jendese co. Jëingo bei nda equia mbae turã ndese chã. Mbia nda jembĩrĩ irĩ eã jiri quia mbae icuã je chã. ²⁰ Dios quiarei aba mbiasa. Namo jiri ra ae Satanás ndiquisã mbei jësi cote.

Sã Jesucristo riqui turã mbei jêje.

²¹ Timoteo ucheẽ mondo quia saludar i jêje aque. Siqui beite equia serese Dios cheẽ nenei nenei co. Lucio abe ucheẽ mondo quia saludar i jêje aque. Jasón abe no. Sosipáter abe no. Se sí chõ ãquĩ nde.

²² Se abe secheẽ amondo quia saludar i jêje aque. Tercio rei se. Se chõ aico nguiã Pablo cheẽ mbesa mbesa jêje co. Jesús icuasa ja chõ nande re. ²³ Gayo abe ucheẽ mondo quia saludar i jêje aque. A aico rã echuchua uque a. Jesús quiato chumunua nuasa bei chõ a re. Gayo chuchua. Erast o abe ucheẽ mondo quia jêje aque. Ae chõ tesorero sucha tubiriã jenda je. Cuarto nandequiato abe ucheẽ mondo quia jêje aque. ²⁴ Sã Jesucristo riqui jendeaquiato turã mbei. Amén.

Pablo ñee hui bei sacua cote

²⁵ Nandechẽẽ turã mbei chõ nguia Dios rĩ. Ae ra jembirãcuã tuchi mingo ucheẽ turã je. Echeẽ turã ngue asenei senei nguia Jesucristo rĩ nda. Aque cheẽ turã ngue mbia icuayãte quia cose nyii ra. Dios que embuchecua eã mbei mbae ao ramo mosenda bei ra. ²⁶ Namo ño Dios ucheẽ turã mbuchecua nguiã mbia je cote. Jesucristo rĩ. Dios cheẽ nenei neneisa que echeẽ mbuchecua nande je cote ra. Mbesa que nande je ra. Dios que ñee seje ra. —Secheẽ turã esenei senei mbei quia mbia jaje cote. Siqui sacua secheẽ ndese. Secheẽ mumbayã sacua, i que Dios seje cote ra. ²⁷ Dios mĩ nguiarei siqui bei. Dios mĩ ño mae ja nguiã mbae ja rese. Sã Jesucristo riqui mbia mbucheẽ turã mbeite Dios rĩ. Amén.

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacuã nda. Aico ã mbesa jêje a. Nanderesenda Sóstenes ndese aico embesa jêje a. ² Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rĩ ãquĩ. Dios riqui jemingo icúe umbaerã ãquĩ. Sã Dios riqui mangue jenda chooñoa mingó icúe umbaerã no, eĩ si. Ñee mose Jesucristo je. Jesucristo rei ãquĩ abe rerecua no. Sã nandererecua nande no. ³ Sã Dios nanderu uturã mingó tuchi jendese. Sã Dios jem-bia bei mingó. Sã Jesucristo abe siqui jem-bia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rĩ nda. Nyebe aico nguĩã gracias i tuchi Dios je jeni co. ⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiato tuchi ucheẽ nenei nenei sacuã mbia je. Jembaa racua tuchi que ucheẽ nĩ nda. ⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ãquĩ cote. ⁷ Nyebe Dios turã ndiqui nguĩã hui ãte jêsi co. Jembirãcuã mbeite equia querabe co. ãquĩ jêingo Jesucristo raarõ arõ ãquĩ. ⁸ Dios ra jembirãcuã mbei mingó mbae ua ja chee. Mbia mo nda ñee icuã eã jêje Jesucristo tu mose. ⁹ Dios ra jendeaquiato bei. Ucheẽ nda embuchebiã mbei ñeende jêje. Ae quiatu ngue ñee nguĩã jêje. — Taemingó bei seriirĩ ndese Jesucristo rese, i.

Jesús quiato nyao nyao chõchĩ nyesi

¹⁰ Seresenda, nandererecua ja chõ Jesucristo resẽ. Jenyao chao mose nyesi, eicuãte ãquĩ. Hue rĩ ja chõ jêingo ndua ndua. Mbae mĩ ndese chõ jêingo. ¹¹ Mbia quiatu ngue ñee nguĩã seje. — Eicuã icuãte que nyue ra, i que Cloé chuchua jenda ñee sembiirandu jeni nda. ¹² — Pablo mbae chõ se re, i chõchĩ jemo nguĩã seriĩ ãquĩ. — Apolos mbae chõ se re, i chõchĩ jemo nguĩã ãquĩ no. — Pedro mbae chõ se re, i chõchĩ jemo nguĩã no. — Cristo mbae chõ se re, i jemo no. ¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo rĩ bautizar i jêje re no? ¹⁴ Se que bautizar ae eã jêje resẽ. Crispo mĩ je que bautizar ae ra. Gayo je abe. ¹⁵ — Pablo rĩ ño ngue bautizar i nguĩã seje, i aroneate jemo ñee seriĩ. ¹⁶ Estéfanas chuchua jenda abe que bautizar ae ra. Aquere que bautizar ae ãte jemo je ra. ¹⁷ Bautizar i sacuã eã ngue Cristo semondo ra. Ucheẽ turã nenei nenei sacuã ño ngue semondo nguĩã. Seaquiato asaã saã eã ño nguĩã Dios cheẽ nenei nenei co. Cristo cheẽ ambiasa mingue turã ño nguĩã co. Se seaquiato raã naa mose, i nda mbia ndua ndua eãte rei Cristo mano ndese.

Dios cheẽ quirãcuã tuchi Jesús rĩ

¹⁸ Ae ra nyoĩ tata cuásuu, ãquĩ ndei “ichõĩñosa” isa Dios cheẽ nenei neneisa rĩ. — Cristo que mano mbia riquicharõ nda, i mose ee, “ichõĩño ñene” i chõ nguĩã. Nande quiatu que Dios nanderirõ nandeicuã si ra. Nyebe Dios cheẽ turã ndiqui nguĩã uquirãcuã ndeacuquia nande je co. ¹⁹ ã ndei Dios cheẽ mbesa ji ã:

Ae “seaquiato tuchi” i quia, ãquĩ aquiato ra ambuquiachã esi.

Ae “searacua tuchi” i quia, ũquí aracua abe ra ambuquiachã esi no,

i que Dios cheẽ mbesa ji ra. ²⁰ Ae uaquiatu saã saã nguia, ibi jenda ja chõ ũquí nde. Ae ucheẽ aquiatu saã saã nguia, ibi jenda ja chõ ũquí no nde. Eaquiatuãte ũquí, i chõ Dios nguia ũquí je. ²¹ Mbia ae ra Dios icuayã mbei uaquiatu ae je. Dios cheẽ ae je quia nda mbia Dios icua nguia emo Dios cheẽ nenei nenei mose ee. Ae Dios cheẽ isi nae, ũquí nda Dios sirõ eicuã si. Ichõĩño nguia, i raque mbia ataque Dios cheẽ nĩ. ²² — Mbia mae sayã ndese nda ure-mae na ña, i bei que judíos quia ra. —Urechimbaaquiatu tuchi rã, i bei que judíos eã nguia ñee nyue no nda. ²³ Nande quiatu Cristo nandesenei senei nguia ã. Ae mbia mbucha quia ira rese, aque chõ nandesenei senei nguia nande ã. ũquí si judíos ireĩte riqui ã. Cristo renei nenei mose, judíos eã ndua eã tuchi chõ nguia erese ã. ²⁴ Nande quiatu nandebite riqui nguia Cristo renei nenei mose ã. Dios judíos mo irabo chõ nguia. Judíos eã mo abe irabo chõ nguia no. ũquí je chõ ngue Cristo Dios quirãcuã mee nguia. ũquí je chõ Cristo Dios aquiatu mee nguia. ²⁵ Dios aquiatuãte, i raque mbia mo ñee Jesús mano je rĩ. Dios quia eaquiatu tuchi jiri riqui nguia mbia si co. Dios quirãcuã neate, i raque emo ñee no. Dios quia equirãcuã tuchi jiri riqui nguia mbia si co.

²⁶ Dios que jẽirabo ja ra. Jẽaquiatu tuchi eã ndaque ee. Ererrecua eã ndaque jẽ. Mbaecha eã ndaque jẽ. Dios ae chõ ngue jẽirabo nguia. ũquí ndese jendua jiri. ²⁷ Ae je mbia riqui “eaquiatuãte” i nae, ũquí ño ngue Dios irabo nguia. Ae ucuasu saã saã nguia nae, ũquí ireĩ ireĩ sacua esi. ²⁸ Ae mbia ataque ucuayãte quia nae, ũquí ño

ngue Dios irabo nguia. Ae ucuasu saã saã nguia nae, ũquí mbutiã sacua. ²⁹ Nyebe nandeico nguia nandaquiatu raã naa aroneate Dios je ã. Nande mĩ mo jiri jiriã. ³⁰ Dios quiatu que nandembucha Jesucristo rese ra. Ae quiatu que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda. ³¹ Sã embesa ji riqui ñee ã no:

Ae Dios saã nande je nae, ũquí nĩ nandechẽ turã.
A e nandesã nande ae nae, ũquí nĩ nandechẽ turã eã,
i que embesa ji ra.

2

Jesucristo mĩ Pablo senei senei mbia je

¹ Seresenda, seso mose jendea que Dios cheẽ asenei senei turã jẽje huee resẽ. Seaquiatu asaã saã eã ño nguia jẽje Dios cheẽ nenei nenei. ² —Jesucristo mĩ ño tasenei senei jẽje. Jesucristo mano nguia mbia icuã ndiquicharõ nae, ũquí mĩ ño tasenei senei jẽje, ae chõ ngue oso nguia ñee jẽje. ³ Seireĩte que seso mose ñee jẽje nyii ra. Semburirite que aque mose ra. ⁴ Seaquiatu que asaã saã eãte quia ra. Dios cheẽ ngue ambuchecua tuchi quia ñee ñee jẽje ra. Espíritu Turã nguiatu que secheẽ mbirãcuã tuchi quia ñee ñee jẽje ra. Nyebe mbia ñee nguia. —Dios cheẽ ño eriqui re, i nguia secheẽ mose. ⁵ Dios quirãcuã ae jemingo nguia Jesucristo rese ũquí. Mbia mo aquiatu eã ño jemingo nguia Jesucristo rese ũquí.

Espíritu Turã ndiqui mbae icua jate nande je co

⁶ Ae seaquiatute, ũquí ja chõ asenei senei mbei nguia Jesús quiato je co. Ae seaquiatute nae, ibi jenda rã eã ño seaquiatu riqui nguia co. Ae seaquiatu nae, ibi

jenda rerecua rã eã ño seaquiatu riqui nguiã co. Ûquĩ aquiatu quia ra tiã jei. ⁷ Ae ureico ñee ñee nae, ùquĩ nguia mbia mbaaquiatu jiri nguiã. Dios cheête quia ñene. — Secheẽ nda ambuchecua je nguiã mbia je. Mbiamingo bei sacua, i que Dios nyii mbae ao nonde ra. Dios que esenei eã nyii ra. Namo ño embuchecua nguiã nande je cote. ⁸ Mbiam rerecua que Dios aquiatu icua eãte ra. ¹ nda eriri mbucha eãte rei ira rese. ⁹ Sã embesaji riqui ñee ã no:

Dios ra mbae turã saã tuchi nande je. Uchsecua je.

Ae ra Dios saã nande je, ùquĩ ndese emo iranuate namo.

Emo mae ãte erese namo, i que embesaji ra. ¹⁰ Nande quia nandeico nguiã irandu erese ã. Espiritu Turã quiatu nandembiirandu nguiã. Espiritu Turã nguia mbae icua jate nguiã co. Dios chiao abe icua jate equia co. ¹¹ Ae rese emo ndiqui ndua, mbiam mo ùquĩ ndua ndua icuayãte. Ae rese nandeico ndua, nande ae nandeicua nguiã. Ae rese Dios riqui ndua, Espiritu Turã mii ño eicua nguiã. Dios sí chõ Espiritu Turã nde. ¹² Dios que espiritu mbuae mo monoã nande je ra. Espiritu Turã ño ngue emondo nguiã nande je. Ae Dios saã turã nguia nande je nae, ùquĩ ndese nandembiirandu sacua ño ngue Espiritu Turã mondo nguiã nande je. ¹³ Ae Dios saã turã nguia ure je nae, ùquĩ uresenei senei nguia ã. ã ndese chõ ngue Espiritu Turã urembaaquiatu nguiã. Mbiam cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ùquĩ sí Espiritu Turã ñee icuayãte quia ã. Echeẽ mbaranguiatuãte riqui ee ã. Nyebe eriqui nguiã echeẽ isiãte. ¹⁵ Ae Jesucristo icuate nae,

ùquĩ nguia mbae icua jate nguiã ã. Ae eturãte nae, ae eicuãte nae, ùquĩ icua ja equia ã. ¿Mañi Jesús quiato quia re? i chõ mbiam nguiã Jesús quiato cheẽ icuayã ã. ¹⁶ Tarembaaquiatu, i aroneate mbiam mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

3

Mbae mii na ño ureico nguiã Dios cheẽ nenei nenei

¹ Jesús resenda jẽingo raque ùquĩ. Jẽingo tuchiãte quiatu nguiã erese ùquĩ. Ae jembite riqui nae, ùquĩ mii ndese chõ jẽingochĩ nguiã ùquĩ. Ae Cristo bite nae, ùquĩ ndese jẽingoã ñochĩ nguiã ùquĩ. Nyebe jaembaaquiatu tuchi aroneate equia co. ² Mbiam riiri na ño jẽingochĩ nguiã secheẽ andu mbiri mbiri cose. Querabe chõ jẽingo nguiã secheẽ andu sereã ùquĩ. Nyebe jaembaaquiatu quiatu tuchiã nguiã Jesús cheẽ ndese. Ae jembite riqui nae, ùquĩ ndese jẽingo mose ra Dios cheẽ jẽicuayã mbei. ³ Jẽicuã icuãte quia jẽingo nguiã jenyue ùquĩ. Jendua turã ja eãte equia ùquĩ. Jeñee turã turã eãte quiatu nguiã jenyue ùquĩ. Nyebe acheẽ nguiã jẽje. —Ae Cristo bite nae, ùquĩ ndese jẽingoã ñochĩ nguiã ùquĩ, ae chõ ndei nguiã jẽje co. ⁴ —Se rei Pablo mbae, i chõchĩ jemo nguiã ñee ùquĩ. —Se rei Apolos mbae, i chõchĩ jemo no. Nyebe jẽingo eã nguiã Cristo bi rese ùquĩ.

⁵ ¿Aba chõ se chã? ¿Aba chõ Apolos no ña? Mbiam rerecua eã ño ureico nguiã ã. Dios cheẽ nenei neneisa chõ ureico nguiã ã. Ure Dios cheẽ nenei nenei mose jẽje que Jesús jẽicua resẽ. ⁶ Mbae tiquia ji rã ño jẽ nde. Sã emo mbae eĩ tiquia no. Sã emo

i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ mingue nguiã jendese. Apolos chõ ngue jembaaquiatu quiatu nguiã cote. Dios quiarei ucheẽ mbusuri raanguia jeñiangui re. ⁷ Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã. ⁸ Ae echitiquia quia, ae i icherẽ cherẽ nguiã erese, eĩ si chõ ùquĩ nde. Dios ra mbae turã mee ee, ae esaã ùquĩ ndibishorõ. ⁹ Ure rei Dios cheẽ naa naasa. Sã chacocho no, eĩ si chõ Dios mbae jẽ nde. Sã tuchuacha no, eĩ si chõ Dios mbae jẽ nde.

¹⁰ Dios turã tuchi que seje ra. Seje quiatu ngue ucheẽ mee nguiã. Mbia mbaaquiatu quiatu sacua. Tuchua ao aquiatu rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã. ¹¹ Tuchua i raanguia chõ Jesucristo riqui nguiã. Ae mii tuchi chõ tuchua i raanguia re. ¹²⁻¹³ Ae arõ tuchua mo nandesaa arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ùquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja. ¹⁴ Nandechisaã siqui i i mose, Dios ra mbae turã mee nande je. ¹⁵ Nandechisaã oquei mose, nandembae ra quiachã nandesĩ. Nande quia ra nandequiachã yã ndaque. Nandecuasẽ ndaque ra ibate Dios je. Nandechi quiatu ra nandeico cote.

¹⁶ ¿Jêtesarei chõ ere? Dios chuchua chõ nanderete riqui co resẽ. Dios riqui beite nandeye co. Espiritu Turã ndiqui beite nandeye co. ¹⁷ Emo Dios chuchua mbicuaã

mose, aque ra Dios mbutiã. Nande quia Dios chuchua re. Dios que uchuchua mii icúe umbaerã nda. Nanderete je sichõ nandeico nguiã ñee co. Dios chõ nandemingo nguiã icúe umbaerã co.

¹⁸ —Nandeaquiatute, jenyechĩ nguiã jeñiangui re ùquĩ. Ae eaquiatute ibi jenda achõ ndese, sã ùquĩ uaquiatu raã naa eã. Siqui mingue mose ra Dios embaaquiatu turã cote. ¹⁹ Ae eaquiatute ibi jenda achõ ndese, “eaquiatuã”, i chõ Dios nguiã ùquĩ je co. Sã embesa ji riqui ñee no:

Dios ra ùquĩ aquiatu mbutiã ño cote.

“Seaquiatu tuchite aico co”, i quiatuchĩ ngue nyii re, i que embesa ji ra. ²⁰ Sã embesa ji riqui ñee no:

Ae rese eaquiatu riqui ndua nae, ùquĩ Dios icua tuchite quia co.

Ndua ndua iru chõ nguiã, i que embesa ji ra. ²¹ ¡Mbia aquiatu mo ndese ra jeñimbucha chooñochĩ jẽ! Dios quiatu que mbae mondo ja jẽje ra. ²² Jembae chõ se re. Apolos abe rei jembae no. Pedro abe rei jembae no. Mbae ibi jenda ja rei jembae. Dios mbia mingo mose, jẽje chõ emingo. Dios mbia mingo eã mose, jẽje chõ emingo eã. Ae siqui quia namo, jembae ja chõ ùquĩ nde. Ae ra siqui aquere, jembae ja chõ ùquĩ no nde. Jembae ja chõ ñene. ²³ Cristo mbae chõ jẽ nde. Dios mbae chõ Cristo no nde.

4

Ureaquiatu tuchi Jesús chĩmbaaquiatu si, jenyechĩ nda jẽ

¹ —Cristo rimba ja chõ ùquĩ nde, jenye chõ seriĩ. Apolos riĩ abe no. —Ae ambuchecua eã mbia je nyii, ùquĩ jembuchecua checua mbia je seriĩ cote, i que Dios ure je ra. ² Dios rimba mose nande, Dios cheẽ nandemumbayã mbei chõ nguiã. ³ —Serimba turã ño nde re, i ra Dios

seje reae. Nducuã. Aicuayãte se. —¿i se jêje re? ae âte se quia jêje co. Ae âte se quia emo je co no. Dios mii ño seicua nguiã. ⁴ Dios rimba turãte aico reae. Dios ae chõ seicua nguiã. ⁵ —Dios rimba turã ño aque re, jjenye jeichĩ nda emo nii jê! Jesucristo tu mose, ae quia ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶ Jembaaquiato sacua ño aico nguiã ñee jêje co. Sechue si chõ aico nguiã ñee. Apolos rii abe chõ aico nguiã ñee. Dios rimba achõ ño ure re. Ure mii mo ndui jêingo bei aroneate. Dios rimba ja rui chõ jêingo. Eĩ jjenye mose ra embesa ji jemumbayã. ⁷ ¿Mbaerã nda jêcuasu jêsaã saã nde? Ae jendeco jembraerã nae, Dios chimondo ja chõ ñquĩ nde. Jêaquiato mose, Dios ae jembaaquiato nguiã. —Se ae que sembae asaã saã nda, jjenyechĩ nda jêcuasu raã naa jê!

⁸ —Ureaquiato tuchite cote, jjenyechĩ ngue ñee nda. —Ureico Dios cheẽ icua jate co, jjenyechĩ ngue ñee no nda. Ererecua tuchi jêsaã saãchĩ ureririrõ cote. Ererecua jêsaã ñooño na jê no. Se abe ra ererecua asaã saã ndei jê na ndeae. ⁹ Dios ucheẽ nenei neneisa quirirõ jiri ure reae. Mbua tarõ ji rã ño ureico uremano ndaarõ arõ ndeae. —¿Mañi ã nguia re? i tuchi mbia quia mae nguia urerese co. Angeles abe ñee nyee mae nguia urerese. ¹⁰ Ureico tuchi mose Cristo rese, “eaquiata”, jjenye chõchĩ equia ure je ñquĩ. “Ureaquiature ure”, jjenye chõchĩ equia jê jêingo mose Cristo rese ñquĩ. Urequirãcuã neãte ure, jê jêquirãcuã mose. Mbua ureosei chiãte ure; jê nguia mbia jêoseite nguiã. ¹¹ Mbae eã mbeite urembae namo abe. Urerirãcuã ãcuãte que

eriqui emo mose ra. Ureiseite abe que eriqui ra. Ureirao eãte abe no. Mbua icuã icuã mbeite ure je. Urechuchua eãte abe no. ¹² Mbae uresaã saã tuchite quia ureo je co. Mbua icuã icuã mbeite riqui ure je co. Urecheẽ turã turã mbeite equia ure ee ã, ñquĩ ñee icuã icuã mose ure je. Urechecua chõte equia ñimbirãcuã ee ã. ¹³ Urecheẽ mingue beite equia ñquĩ ñee icuã mose ure je ã. Mbae quia rã tuchi chõ ureico nguiã mbua je ure ã. Mbua ureririrõ mbeite quia namo nyee ure ã.

¹⁴ Jêireĩ ireĩ sacua eã ño aico nguiã ã mbesa jêje ã. Jemundua ndua sacua ño ñene. Seriirite quia jê nde. ¹⁵ Jembaaquiato quia-tusa tubiriãte raque Cristo rii. Se mii tuchi chõ jendu re. Se rane nguia ngue echeẽ turã asenei senei nguiã jêje nyii. Se quia ngue Cristo aicua uquia nguiã jêje. Nyebe aico nguiã “seriirĩ” i beite jêje co. ¹⁶ Nyebe jêingo se rã si. ¹⁷ Timoteo amondo quia jêje aque. Ae rei sechimbaaquiato tuchi. Nyebe “seriirĩ” ae tuchi nguiã ee. Ae quiarei siqui turã tuchi Dios rese. Ae ra jemundua bei secheẽ ndese. Sechisaã ndese abe no. —Eĩ ngue Pablo quia Jesús quia mbaaquiato quia sucha mbuchesea sea mose ra, i ra Timoteo jêje seriĩ. ¹⁸ Jemo ndiqui uaquiato raã naa tuchichĩ ñquĩ. —Pablo ra tu eã mbei urerea, i chõchĩ jemo nguia seriĩ ñquĩ. ¹⁹ Aso jei ra jendea, Dios eno i mose seje. Ae uaquiato saã saã tuchi quia jemo nae, ñquĩ tatea cote. Mañi nda equia mbae raã ndeae. Echeẽ achõ achõ aroneate. Siqui eã mose Dios quirãcuã ndese. ²¹ Manyae ra jêje seso mose jendea reae. Acheẽ asi asi ra jêje reae. Aico mingue chõ nda jêje renoae. Jêhui mose jêicuã si, acheẽ asi asi eã nda seso mose

jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jêataque jêtea chooño mbae icuã naa mose re? Ae Jesús quiato âte nae, ùquĩ ño siqui âte ngu ninisi rese. ¿Mbaerã Jesús quiato quiatu siqui ngu ninisi rese re? ² Jêturã jêsaã saã mbei chõchĩ nguiã jê ùquĩ. Jêya eã eã ño jêingochĩ ùquĩ ndese ùquĩ. Jêireĩ ngũĩ tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si.

³ Ishote aico raque jêsi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiã sechiangui re co. Se siqui raanguia jendese. ⁴ Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose. ⁵ Ae siqui ngu ninisi rese nae, aque jemombo chõ jêsi. Jesús quiato si. Jemee ño Satanás je. †nda Satanás erete mbasi. †nda eã siqui bei Jesucristo tu mose cote.

⁶ ¿Mbaerã jeingo jêturã naa naa mbae icuã ndea chooño nde? Levadura rã ño mbae icuã nde. “Levadura ñetê nda oso raque mbichae raã namo mose. Mbuchimatã ja raã”. ¿Ûquĩ jeñanuãte quia re? ⁷ Ae eicuãte nae, aque jemombo jêsi. †nda jê abe mbae icuã jêsaã eã. Dios que Jesucristo iquia nandeicuã ndibishorõ nda. Sã mbia riqui oveja iquia iquia huicua ndibishorõ no. ⁸ Nyebe nandeico turã na Dios rese, mbae icuã naa naa ndocoĩ. Cochee nandeico. Nandeicuã nandesecha ja.

⁹ —Ae siqui emo ninisi rese, ùquĩ je ra jeñee ñeechĩ, ae que secheẽ mbesa mondo jêje nyii. ¹⁰ Ae Jesús

quiato âte, ùquĩ nii eã ño ngue acheẽ nguiã jêje. Nandeeheẽ eã aroneate Jesús quiatoã je nandeico mose ibii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ùquĩ je nandeeheẽ eã aroneate. ¹¹ Jesús quiato mo ùquĩ icuã naa mose, jemombo chõ jêsi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia chooñoã mose. Quiacua mose. Mbae mbuquiachã mose. Jesús quiato ùquĩ naa naa mose, jêhui chõ esi. Jêquiaru jiri jiriã tuchi ùquĩ ndese. ¹² Jesús quiatoã nandeteaquiato aroneate. Ae Jesús quiato, ùquĩ nguiatu nandeteaquiato. ¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jêsi.

6

Jemo icuã icuã mose nyue, jê ae chõ jêingo

¹ Jemo icuã icuã mose nyue, jêsochĩ nguiã ñee Jesús quiatoã nderecua je. Jê ae chõ jemae erese ae. Jêicua ae. Sã Dios quiato achõ ño ñee ùquĩ je. —¡Eĩ jenyee jê! i ùquĩ je. ² Dios quiato quia ra “¡eĩ jenyee jê!” i ja Dios quiatoã je emo mose. Jê nguia ra “¡eĩ jenyee jê!” jenyee mbia ataque je emo mose. ¿Mbaerã jêingo “¡eĩ je nye jê!” ise reã mbae ñetê naa mose re? ³ Angeles je abe chee ra “¡eĩ jenyee jê!” nande. ¿Ûquĩ ndese jêiranuãte re? ã ibi jenda je “¡eĩ jenyee jê!” nande turã ja rã ae. ⁴ Jesús quiato chõ jê nde. Ibi jenda mo nii jemo icuã icuã mose nyue, jê ae chõ jemae ùquĩ ndese. Jêsochĩ nguiã ñee Jesús quiatoã nderecua je. Dios quiato eãte quia ùquĩ nde. ⁵ Jesús quiato mo ñee icuã icuã

mose nyue, ¿jemo jëaquiatuâte ñee ee re? “¿Eĩ jenye jê!” i ee re. Jê jëireĩ ireĩ sacuã ño aico nguiã ñee jêje ùquĩ. ⁶ —¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echĩã turã tuchi âte quia ñene. Jeñimbirãcuã ño mbae icuã naa mose jêje. Jeñimbirãcuã ño jembae mbuquiachã mose no. ⁸ Jê abe mbae icuã jësaã saã ñochĩ, ñimbirãcuã ndocoĩ. Jê abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbia rerecuarã tuchi ra Dios cote. Aque mose ra mbia icuã siquĩã tuchi Dios rese. Ae siqui emo ninisi rese nae. Ae siqui ngüinisiã ndese nae. Ae ndua chooño nguia Dios abareã ndese nae. Ae siqui quia nyiese ngüinisi raã naa nguesenda je nae. Ae mbae mbuquiachã quiachã nguia nae. Ae abei chiâte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ûquĩ nda siquĩã tuchi Dios rese. —Eicuã abe ra siqui bei Dios rese, ¿jenyechĩ nda ñimbiĩĩ irĩ jê! ¹¹ Eĩ ngue jemo icuã cose ra. Dios ae jembitirõ nguiã cote. Dios chõ jemĩ nguiã icúe umbaerã cote. Espíritu Turã ngue jëisi turã Jesucristo rĩ cote ra.

Espíritu Turã nyuchua chõ jendete re

¹² —Co rese ra ereicochĩ, i âte raque Dios quia seje mbae mo mĩ. Dios biâte nande mbae raã ja chooño mose. Mbae mo sembĩcuã serĩ mose, asaã eã mbei ra se. ¹³ Nandechĩurã ndei nanderie ye sacuã. Nanderie rei nandechĩu rirurã. Ûquĩ ja ra Dios mbutiã emo mose cote. Dios mbaerã ño nanderete re. Siqui chooño sacuã eã ño emo ninisi rese chõ nanderete re. Nanderete rerecua chõ Dios

re. ¹⁴ Dios quirãcuã ño ngue Jesucristo raaque mbuquera nguiã. Eĩ ño nda Dios quirãcuã nanderaaque mbuquera nguiã nande abe no. ¹⁵ ¿Jëiranuâte quia jendete rese re? Cristo nanderete mbucha quia uchiese co. Cristo rete chõ nandeico nguiã co cote. Cristo rete nandembucha aroneate cuña icuã ndete mo ndese. ¹⁶ Emo siqui mose cuña icuã mo ndese, erete ucha chõ nguiã nyiese aque. Erete nyeremo eã ño cote re. Ûquĩ ndete ja ra co mĩ cote, i que Dios cose ra. ¹⁷ Emo siqui mose Cristo rese, nguete mbucha chõ nguiã erese ùquĩ cote. Erete mĩ na ño ùquĩ cote re. ¹⁸ ¿Jeninisiã ndese ra jëingochĩ jê! Mbae icuã mo naa mose, ùquĩ nda nanderete mbĩcuãĩ jiri. Siqui mose ngüinisiã ndese, ùquĩ nguia ra nanderete mbĩcuã tuchi cote. ¹⁹ Espíritu Turã siqui chee jeñiangui re ùquĩ. Espíritu Turã nyuchua chõ jendete re. Dios mbae chõ jê nde. Jembae ae eã ño jendete re. ²⁰ Eicuã nimba rei ngue jê nyii re. Dios quiatu ngue jëisi nguiã cote. Nguiĩĩ ngue emondo jendibishorõ nda. Nyebe jëingo jendete mee Dios je. Jëaĩ abe jemee ee noae.

7

Pablo mbia mbaaquiату emo ngüinisi rerequia rĩ

¹ Jeñee ngue jembesa mondo seje nyii nae, ùquĩ tasibishorõ jêje cote. Coche emo siquĩã nguiã cuña mo ndese. ² Coche mbia ngüinisi ae rerequia nguiã. Coche cuña ngu mĩ nderequia nguiã no. Emo ndese siqui chooño eã sacuã ño ùquĩ nde. ³ Sã eru riqui turã ngüinisi rese. Sã eninisi abe riqui turã ngu rese. Nyao aroneate nyesi. ⁴ Eninisi rete chõ eru mbae cote re. Eru rete chõ eninisi mbae cote no nde. ⁵ Nya i aroneate eru ngüinisi je nguete rese ngueteã. Nya i aroneate eninisi nguete rese

ngueteã ngu je no. —Nandechêẽ mbei Dios je namo, siqui rocoĩ nyiese, i mose nyue, eturâte ùquĩ. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embiũcuã arõte cote. ⁶—Jeninisirã jendeco, ae âte quia jêje co. —Jeninisibi mose, jendeco ae, ae chõ nguã jêje co. ⁷—Sã Jesús quiato ja ninisiã ndiqui se rã si, ae rei que se ra. Dios cheẽ eã ño ùquĩ nde. Nandechisaã ae aerã ño Dios mondo nguã nande je. Emo ninisiã siqui turã arondete. Emo ae ngũinisi quereco sete nguã no.

⁸Ae eninisiãte nae, ùquĩ je tacheẽ. Eru cheecha je abe tacheẽ no. Coche jẽingo nguã jendu eã. Coche jeninisiã ndiqui nguã no. Se rã si. ⁹Jeñimbirãcuãyã mose jendete je, jeninisirã mo jẽtea ae. Jendurã mo jendeco noae. Mbia mo oseĩ oseĩ rocoĩ.

¹⁰Ae ngu quereco nae, sã ùquĩ ngu rechayã mbei. Jesús cheẽ tuchi chõ ùquĩ nde. Secheẽ ae eã ño ùquĩ nde. ¹¹Cuñã mo ngu recha mose, sã eriquiã mbei emo ndese. Sã ae ae chõ ndiqui bei, ñimbucha si eã mose ngu rese. Sã eru abe ngũinisi rechayã mbei.

¹²Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngũinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³Jesús quiato mose cuñã mo, sã eriqui bei ngu rese no. Jesús quiatoã ndaque eru. Eru siquise mose ngũinisi rese, sã eninisi siquichõ erese no. ¹⁴Jesús quiato mose eru, eru ngũinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriĩrĩ abe Jesús icuayãte rei, ùquĩ ande. ¹⁵Jesús quiato mo ninisi siquiã mose Jesús rese, “seru

tasecha” i bei mose, sã eru eriquisã quisã eã. Cuñã mo Jesús quiato mo ndu siquiã mose Jesús rese, “seninisi tasecha” i bei mose, sã eninisi ngu riquisã quisã eã no. Ùquĩ naa mose, Jesús quiato mbae icuã saã eãte. —Sã seriĩrĩ ndiqui turã nyue, i quiatu que Dios nande je ra. ¹⁶Ae Jesús quiato nae, ùquĩ ngũinisi mingo arõte Jesús rese. Ae Jesús quiato cuñã nae, ùquĩ ngu mingo arõte Jesús rese no.

¹⁷—Eĩ jenyẽ chõ nguia jẽ ae ae, i que Dios nandechiaorã mee mee nande je ra. Ùquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ùquĩ ño asenei senei nguã Jesús quiato ishonda jaje abe. ¹⁸—Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ùquĩ nguia Dios bite re. ²⁰Eĩ nande que equia Dios ñee namo mose nande je nyii, aque mosenda rã mbei chõ nandeico. ²¹Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²²—Eico serui, i mose Dios mbia rimba mo je, Dios embui chõ nguã eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³Jesucristo que mano jêje ra. Nyebe Jesucristo rimba ae chõ jẽingo nguã ùquĩ cote. Mbia rimba ae eã ño jẽingo nguã ùquĩ cote. ²⁴Dios que ñee nande je nyii, aque mosenda raanguia bei chõ nandeico Dios rese.

²⁵Nyucuaaque rĩĩ tacheẽ ndaque jêje cote. Dios que ñee âte seje ùquĩ nii nda. Se ae chõ tacheẽ

jêje. Airandu que Dios ia eã mose serese ra. Nyebe aico nguiã ñee ñooño eã tuchi jêje co. ²⁶ Sã mbia ngūinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote. ²⁷ Neninisi mose, eico bei chõ erese erechayã mbei. Neninisiã mose, nde ae eico bei. ²⁸ Neninisirã ndea mose, eicuã eã ño ũquĩ no nde. Nyucuaaque ngurã mo ndea mose, eicuã eã ño ũquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jêje. —Jê ae jẽingo jeninisiã, i jêje. ²⁹ Tacheẽ tuchi rã jêje, Seresenda. Mbae ra ua jei ja nande je cote. Ae ngūinisi quereco quia, sã ũquĩ ndiqui ngūinisi rerequia eã naanguia. ³⁰ Ae eya eãte riqui, sã ũquĩ ia tuchi raanguia riqui no. Ae eyate riqui, sã ũquĩ ia eãte raanguia riqui no. Ae mbae isi quia, sã ũquĩ ndiqui mbae isiã naanguia no. ³¹ ã nandeico rei nguiã ibii ã. ¡Ibi jenda rese ra nandendua tuchichĩ jê! ¡ã ibi jenda ja ra ua ja chõ jê!

³² —Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ũquĩ ndua ndua bei arõte Dios mii ndese. Ae Dios bite, ũquĩ esaã saã mbei arõte. ³³ Ae eninisi nae, ũquĩ ndua ndua bei arondete ibi jenda achõ ndese. Ae eninisi bite nae, ũquĩ esaã saã mbei arondete. ³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ũquĩ nda esaã saã mbei ee. Siqui tuchi ra Dios rese. Ae ngu quereco nae, ũquĩ ndua ndua bei arondete ibi jenda achõ ndese. Ae eru bite nae, ũquĩ esaã saã mbei arõte. Siqui rocoĩ Dios rese. ³⁵ Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguiã ñee jêje co. Jendua eã sacua

mbae mo ndese chõ ñene. Jeninisi mose jendua bei aroneate Dios rese.

³⁶ —Seriiĩ ndu bite chĩ cote. Etiarõte chĩ cote, i mose ameĩ mo, sã eriiĩ ngurã mo nderequia. Eicuã eã ño nguiĩ ndurã mee ee re. ³⁷ —Sã seriiĩ ndu eã ae riqui. Erurã nda amee eã ee, i tuchi mose ameĩ mo, eturãte ũquĩ abe. ³⁸ Ae nguiĩ ndurã mo mee ee, eturã ño ũquĩ nde. Ae nguiĩ ndurã mo mee eã ee, eturã tuchi chõ ũquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ũquĩ ndeae. Espiritu Turã abe sembuchee nguia reae.

8

Ae soo mbia mondo rei dios abareã je nae

¹ —Mbia soo mondo mondo quia dios abareã je nae, ¿ũquĩ soo ra nandeu re? jenye que seje. ũquĩ tasenei jêje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesecua mose mbia rese, Dios abe rese ra nyesecua bei. ² Seaquiatute se, i mose emo, eaquiatuã ño ũquĩ nde. ³ Emo nyesecua mose Dios rese, Dios ũquĩ icua chõ nguiã ũquĩ.

⁴ Mbia soo mondo mondo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co mii tuchi chõ Dios re. ⁵ Dios abareã nguia etubiriãte re. Ibi jenda. Ibei rinda abe no. Dios raanguia tubiriãte raque no. ⁶ Dios quia co mii tuchi nande je re. Ae quiarei nanderu tuchi. Ae mii ngue mbae chao ja tuchi ra. Ae mii ngue nandea umbaerã nda. Nandererecua mii tuchi chõ siqui nguiã co

no. Jesucristo, i equia ee. Ae que mbae chao ja tuchi Dios rese ra. Ae mii ño nandemingo nguiã ã.

⁷ Dios quiato mo iranuate quia ũquĩ ndese ã. Siquiche beite quiatu nguiã ndese abareã si ũquĩ. Ae soo mbia mondo dios abareã je, ũquĩ mbaeiae riqui reĩ nguiã ee. —ĩũquĩ soo jẽu eã jẽ! i reĩ Dios nguiã ee. ⁸ Ae nandeu quia nae, ũquĩ nda nandembuturã eã Dios je. Nandechiu mo nda nandembuturã eã mingo. Nandechiurã nandeisi teã teã mose, ũquĩ nda nandembucua eã no. ⁹ —ĩũquĩ soo ra jẽuchĩ jẽ! iãte raque Dios nande je. Mbaeiae eãte raque ũquĩ soo. Mbaeiae nda eriqui reĩ Jesús quiato namonda je raẽ. Jẽ eu mose, ũquĩ abe ra eu chee. — Mbaeiae au chõchĩ, i ra ñimbucua tuchi cote. ¹⁰ Jẽquiaru mose dios abareã chuchua, Jesús quiato namonda ra mae jendese. ũquĩ abe ra soo u chee, ae mbia mondo Dios abareã je. Maende jendese. Eicuã ndaque eriqui reĩ nguiã ee. ¹¹ Jẽ ndaque jẽirandu ũquĩ soo rese. Eicuã eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenyẽ chõchĩ ũquĩ mbicha arõte Dios si. ũquĩ ñi abe chõ ngue Jesucristo mano nguiã. ¹² Soo mbaeiae riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuãte ũquĩ Cristo je. ¹³ Jesús quiato mo ambucua sereã tuchi chõ nguiã se. Se soo u mose, ũquĩ Jesús quiato mo mbucua mose, soo ra auã mbei cote.

9

Mbae mo jembu seja Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererrecua mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguiã Jesucristo icua

ũquĩ cote. ² Jesucristo cheẽ nenei neneisa eã ño co re, i arõte raque emo seja. Jẽ quiatu jẽnee aroneate nguiã ũquĩ seja. ũquĩ jẽingo seicua tuchite ũquĩ. Secheẽ nguire quiatu que Jesús jẽicua cote resẽ.

³ Eĩ ae chõ nguiã ñee mbia ñee icuã mose seja. ⁴ Se abe Jesús quiato sembuquiaru quiaru arondete raque. ⁵ Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús riĩ. Sã Pedro riqui ngũinisi rerao rao no. Jesús nongue abe no. Sã Jesús cheẽ nenei neneisa ja ngũinisi rerao rao no. ⁶ ¿Se mii ño nda Jesús quiato sembuquiaru aroneate reĩ jẽje re? Bernabé abe rese. Ure Jesús cheẽ nenei nenei mose. ⁷ Sã soldado siqui choõño eã comandante mbae mee eã mose ee. Sã emo ndiqui mbae tiquia choõñoa no. —Sechitiquia nda au chã, i chõ nguiã. Sã emo ndiqui ticuasuararõ ñooñoa no. —Equiandi nda ambei chã, i chõ nguiã.

⁸ Secheẽ ae eã ño ũquĩ nde. Embesa ji chõ asenei nguiã jẽje. ⁹ Corei Moisés chimbesa co: Jẽ ticuasu mbuquiei quiei mose, echuru jemumbi eã.

Sã ae ae si quia mbae cua, i que embesa ji ra. Ticuasuarachõ je eã ngue Dios ñee nguiã. ¹⁰ Nande abe je chõ ngue ñee nguiã. — Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechiqui tau”, i chõ nguiã eiqui iqui. ¹¹ Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureirarã jemee aroneate quia ure je cote re? ¹² Mbae mo jemee mee nguia Jesús cheẽ nenei neneisa mo je ũquĩ. ¿Mbaerã jẽingo

emee eã ure abe je quiatu re? — ¡Mbae mo nandei teã eo si jê! ure que equia oso mose jendea ra. Dios si jembiicha eã sacua ño ngue mbae mo ureisi teã nguiã jêsi. ¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ũqui ndiqui ofrenda u u bei ae, i que Dios ñee cose ra. ¹⁴ Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguia nae, sã sequiato ataque riqui mbae mee mee mbei ũqui je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ âte jêsi ra. Se ae chõ mbae achao chao nguiã sembaerã co. —Mbae mo jemee seje, ae âte chõ nguiã co mbesa mbesa jêje co. Tamano ae, “mbae embu seje”, i rocoĩ jêje. ¹⁶ Dios cheẽ nenei neneisa tuchi chõ se re. ũqui nĩ seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje. ¹⁷ Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, eĩ nda Dios mbae mo mee ndei seje ucheẽ nenei nenei ndibishorõ. Dios rimbate quia se re. ¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ũqui ño sebi re. —Mbae mo embu seje Dios cheẽ nenei nenei ndibishorõ, ae âte quia co. ũqui nguia sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰ Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbese rui nae, ũqui ite re seico mose, Moisés chimbese asaã saã ño nguiã se abe. ũqui Jesucristo

icua sacua. —Moisés chimbese rui eico, i âte raque Dios seje. ²¹ Ae siquiã nguia Moisés chimbese cheẽ ndui nae, ũqui ite re seico mose, se abe Moisés chimbese asaã saã eã ño nguiã cote. ũqui Jesucristo icua sacua. Cristo mĩ ñee ño amumba mumbayã nguiã co. ²² Jesús quiato quirãcuã nea ite re seico mose, ũqui asaã saã ño nguiã se abe, sequirãcuã nea naa naa. ũqui Jesucristo icua sacua. Ae ite re aico oso oso beite nae, ũqui na ño aico nguiã se abe. ũqui Jesucristo icua sacua. ²³ ũqui ja chõ asaã saã nguiã Dios cheẽ turã nĩ co. Nandeico turã ja sacua Jesús rese.

²⁴ Sã mbia carrera raã naa no. Mbija chõ uchã ndaque. Co mĩ ño nda premio isi. Aque rã tuchi chõ jêingo Jesús rese. Premio isi sacua naanguia. ²⁵ Ae ra carrera saã saã nae, ũqui mbae icua secha ja chõ nguiã ũqui. Premio isi sacua ño eriqui nguiã mbae icua naa eã. Premio nda ua jei raque. Ae Jesús mee arõte quia nande je premio nae, ũqui nguia ra ua eã mbei nandesi. ²⁶ Se aico chooñoa nguia Jesús rese co. Jesús rese aico turã tuchi chõ nguiã se co. ²⁷ Mbae asaã saã ño nguiã serete mbirãcuã co. Serete secheẽ mumbayã sacua. Se premio ganar i sacua ño aico nguiã eraã naa co. Premio isiã sebiãte, se Dios cheẽ nenei nenei tuchire. Nyebe aico nguiã siqui tuchi Jesús rese co.

10

Dios raanguia rese ra jêingochĩ jê

¹ ¡Jêtesareichĩ nda nandei ñiinda si jê! ¡Moisés mosenda si jê! ¡ũqui ngue siqui ja rei ibeishĩ ndui ra jê! ¡ũqui ngue nyoi ja rei Ama Ireĩ ndasa Dios ñee mose ee ra jê! ² — Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama Ireĩ ndasa

mose ra. ³ Ae Dios mee ndei ee echuurā nae, ũquĩ ngue mbia ja u u rei ra. ⁴ Ae Dios mee ndei ee embei sacua nae, ũquĩ ngue mbia ja mbei mbei rei ra. I que tuutu quia sita si nae, ũquĩ ngue mbia ja mbei mbei rei ra. Aque sita rei Cristo rā. Cristo que siqui tuchi quia ũquĩ mbia rese ra. ⁵ Ũquĩ ataque rese que Dios ia eā tuchi riqui ra. Siqui turā eā tuchi que equia Dios rui ra. Nyebe Dios eataque iquia iquia nguiā turúquiaa.

⁶ Nandemundua sacua ño ũquĩ nde. Mbae icuā osei osei eā sacua nande chō ũquĩ nde. Sā ũquĩ mbae icuā osei osei no. ⁷ Jëingochĩ nda dios abareā ndese. Sā ũquĩ ndiqui dios abareā ndese no. Sā embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuas raanguia je ra”, i que embesa ji ra. Jë nguiā jëingo eā dios abareā ndese. ⁸ Ũquĩ nandei que siqui siqui ngũnisiā ndese no nda. Nyebe Dios eiquia iquia tuchi nguiā. Veintitrés mil que mano aque nyaashĩ mose ra. ¡Mbae icuā nda nandesā saāchĩ ũquĩ na jê! ⁹ —Ma Cristo roseĩte, nandechĩ nda mbae icuā naa jê. Sā nandei riqui “ma Dios roseĩte” i nyii no. Sā ñi ngue eriqui mbae icuā naa mbei cose no. Sā mbei tásie riqui eiquia iquia no. ¡Ũquĩ nandesā saā eā tuchi chō nguiā nande jê! ¹⁰ ¡Jëñee icuā icuāchĩ nda Dios riĩ jê! Sā ũquĩ nandei ñee icuā icuā nguiā Dios riĩ no. Nyebe ángel nandei ñiinda iquia iquia tuchi nguiā. ¹¹ Eĩ si tuchi que nandei ñiinda quia nyii ra. Dios que embesa mĩ nandetesarei eā sacua nda. Mbae ua ja serĩ mose chō Dios riqui nguiā nandembesarei eā co. ¹² —Sequirācuā tuchi chō se re, i mose emo, jsā aque riqui nyicua tuchi quiatu jê! Mbae icuā jêĩ nonde ee. ¹³ —¡Mbae icuā esaā jê! i mose diablo jêje, eĩ si chō

nguiā ñee mbia ataque je. Jê mĩ je eā. Dios quia ra ucheẽ mbuchebiā mbei. Jendeaquiato bei ra diablo ñee mose jêje. Jembirācuā ndae. Jê “nya” i sacua mbae icuā je.

¹⁴ Seresenda, ¡dios raanguia rese ra jëingochĩ jê! ¹⁵ Jëaracuate rei jê ndesẽ. Secheẽ ndese jemae quiatu. ¿Acheẽ ñooño se re? Acheẽ ñooño eā se reae. Jëtea quiatu. ¹⁶ Nande Santa Cena naa naa mose, Cristo ruqui mbei raanguia chō nandeico nguiā uva rique mbei mbei. —Cristo ruqui nandembitirō ja bei quia ā, i chō nguiā uva rique mbei mbei. Mbichae nandesiquio quio quia eu nonde nae, Cristo roo rā ño ũquĩ nde. —Cristo roo nandembitirō ja bei quia ā, i chō nguiā mbichae u u. ¹⁷ Nandetubiriāte raque Jesús quiato. Nande ja chō aque mbichae mĩ nandeu ja nguiā. Mbae mĩ na nguiatu nandeico nguiā nande ja ā. ¹⁸ Judíos rese chō jendua. Ũquĩ sacrificio raā naa mose, sacrificio eu chō nguiā ā. —Dios resete quia nandeico nguiā ā, i equia ā. ¹⁹ —Dios abareā mbae mo saā arondete, ae āte raque quia co. Ae soo mbia mondo mondo quia dios abareā je, soo chō ndaque ũquĩ. ²⁰ Mbia soo mondo mondo mose dios abareā je, Dios tuchi je eā ño eriqui nguiā emee mee. Aba checuayā icuā je chō eriqui nguiā emee mee. ¡Aba checuayā icuā ndese ra jëingo jiri jirichĩ jê! ²¹ Jê mbae mbei mose aba checuayā ndese, Jesús ruqui mbei raanguia jesaā aronea ño nguiā cote. Jëquiaru quiaru mose aba checuayā nyuchua, Santa Cena jesaā aronea ño nguiā cote. ²² ¿Mbaerā jëingo Jesucristo mbupaama ite re? ¿Jëquirācuā tuchi chō eriqui esi jê nde?

Jesús quiato ataque rese quia jëingo ndua

²³ —Ae soo mbia mee mee nguiā dios abareā je nae, ũquĩ ndese ra

jëocochĩ, i äte raque Dios nande je. Dios biäte nande mbae raã ja chooño mose. Ûquĩ nii Dios ñee äte raque nande je. Nande ae chõ nandeicua. Mbae mo Jesús quiato mo mundua icuã mose, ùquĩ si nandehui chõ. ²⁴ —Nande ae nandeico Dios rese, jenyechĩ nda jẽ. —Mbia ja quiatu nandemingo ere, jenyẽ quiatu. ²⁵ Soo jëisichõ ño nguia mbae vender ísaa. —¿Dios abareã je co soo jemondo nyii re? jjenye chĩ nda ñee ee jẽ! Jëiranua mose, mbaeiae eã ño soo jẽje cote re. Jëisichõ ño nguia jëiranua. ²⁶ Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ùquĩ ndei nandechiurã ja. ²⁷ —Nyao rã quiaru serese, i mose emo jẽje, jẽso chõ quiaru ere jẽso mose. Ae ra echara mondo jẽje, jẽuchõ ño. —¿Co mbia mondo dios abareã je nyii re? jenyechĩ nda ee. Jëiranua mose, mbaeiae eã ño jẽje cote re. Jëiranua ño jẽquiaru. ²⁸ —Co soo que mbia mondo dios abareã je ra, i mose emo jẽje, jẽu eã ño cote. Ae ñee jẽje nae, aque mbiacuã eã sacua ño jẽu eã. Aque soo jẽu eã cote, jëirandu mose ere. Jẽ eu mose, Jesús quiato ra ndua icuã icuã cote. ²⁹ Jendua icuã eã ndaque jẽ. Emo nguia ndua icuã arõte nguia cote, jirandu mose jẽ eu rese. —¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje. ³⁰ —Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

³¹ ã ndese chõ jendua. Ae nandesã saã nguia nae, Dios je chõ nandesã. Ae nandeu ndeu quia mbae nae, Dios je chõ nandeu. Ae nandembei mbei quia mbae nae, Dios je chõ nandembei no. Mbia

ra ñee turã Dios je, nandeico turã mose. ³² ¡Mbia ra jemundua ata atate chĩ jẽ! —Ã icuã ereae, i mose emo jẽje, jũquĩ nda jësaachĩ jẽ! Jẽ eraã mose, ùquĩ nda ndua icuã Jesús rese cote. Judíos. Judíos eã abe. Jesús quiato abe. Ûquĩ ndua icuã arõ Dios rese, jẽ eraã mose. ³³ —Se ae taico Dios rese, ae äte quia co. —Mbia ja quiatu tamingo ere, ae quia co. Dios mbia rirõ sacua eicuã si. Mbia siqui bei sacua Dios rese.

11

¹ Se rã si chõ jëingo. Sã aico Cristo rã si se no.

Eĩ jenyẽ chõ nguia u ñumunua nua mose, i Pablo cuña je

² Acheẽ turãte quia jeni co. Jendua beite quiatu quia serese. Acheẽ ngue jẽje nyii, ùquĩ jemumbayã mbeite quia secheẽ ùquĩ. ³ Ae ra ambesa jẽje namo, jũquĩ jëicua tuchi quiatu jẽ! Cristo rei hombre ja rerecua. Hombre rei ngüinisi rerecua no. Sã Dios Cristo rerecua no. ⁴ Mbia ñumunua mose, sã hombre mo ñee eã Dios je huiite sucha resebe. Sã eãquĩ nyecua chõ siqui Dios cheẽ nenei nenei. Uãquĩ ati mose, aba ireĩte ùquĩ. ⁵ Mbia ñumunua mose, sã cuña mo ñee eã Dios je huiite suchayã. Sã cuña aãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ùquĩ. Uãquĩ huĩ na ño eriqui nguia uãquĩ ati eã no. ⁶ Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no. ⁷ Hombre mo nguia uãquĩ chati aroneate nguia Dios cheẽ nenei nenei. Dios quiatu ngue hombre chao nguia umbaerã. Aquere que cuña mo ao hombre mbaerã cote ra. ⁸ Cuña ndoquieĩ je eã ño ngue Dios hombre ao nguia. Hombre roquieĩ je quiatu ngue Dios cuña mo ao nguia. ⁹ Cuña chirecorã eã

ño ngue Dios hombre ao nguiã. Hombre chirecorã nguiatu ngue Dios cuña ao nguiã. ¹⁰ Nyebe ra cuña uãquĩ ati quiatu. —Seru chõ sererecua re, i chõ nguiã uãquĩ ati. Angeles quia maete nguiã erese. ¹¹ Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no. ¹² Hombre roquieĩ je chõ ngue Dios cuña ao rei nguiã nyii. Cuña abe riqui tiirĩ irĩ hombre co cote. Dios chiaõ ja chõ ñene. Cuña. Hombre abe. ¹³ Jẽ ae chõ jendua mae erese. Eicuãte cuña ãquĩ ati iriã ñee Dios je. ¹⁴ Hombre a boco mo siqui mose, aba ireĩte ùquĩ. —Eicuãte ùquĩ, i ja tuchi mbiamo ñooñoa nguia ùquĩ je ã. ¹⁵ Cuña mo nguiatu ea boco siqui mose, ùquĩ nguia earõte re. Ea boco que Dios mee ee ra. Eãquĩ ati sacua. ¹⁶ —Cuña a boco sebiã, i mose jemo, sã ndua chõ Jesús quiato ataque rese. —Sã cuña a boco riquichõ, i ja chõ Jesús quiato nguiã serese ùquĩ.

Jenyao chaochĩ nda Santa Cena u mose jẽ

¹⁷ —Santa Cena naa icuã icuã ño ngue equia ñumunua nua nda, i que mbia mo sembiirandu jeni nda. Nyebe seya eãte riqui nguiã jendese. ¹⁸ —Hue rĩ ja eã eriqui ndua ndua ñumunua nua mose ùquĩ, i que emo sembiirandu jeni nda. —Ichõño eã ereae, ae sequia ndua ndua co. ¹⁹ Jeñimbuchao chao chõchĩ equia ùquĩ. Mbia Jesús quiato tuchi icua sacua ño jeñimbuchao chao nguiã. ²⁰ Santa Cena naa naa mose, abei chiã tuchi chõ jẽingo nguiã jenyue ùquĩ. Eĩ eã tuchi que Jesucristo nandembaaquiato ra. ²¹ —Se rane sembae tau ja, jenyee jaaja chõchĩ nguiã Santa Cena naa naa ùquĩ. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²² Jẽquiaru tuchi

mose Santa Cena, jẽingo icuã ño nguiã Jesús quiato ataque je ùquĩ. Mbaecha reã ireĩ ireĩ ño nguiã jẽsi ùquĩ. ¿Mañi ae ra ñee jẽje re? Eicuãte ùquĩ ndesẽ. Jenyuchua ae ae rei jẽquiaru sacua ndesẽ.

Jesús quiaru mose uchimbaaquiato rese

²³ Jesucristo ae sí que sembaaquiato ra. ã ngue asenei ndei jẽje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda. ²⁴ Gracias, i que ñee Dios je cote ra. Mbichae que esiquio uchimbaaquiato je cote ra. — ¡Co jẽ! Jẽu. Serete rã ño mbichae riquio ji co re. Jeni ño nda serete riquio ji cote. Co jẽu mose, jendua ndua bei quia serese, i que Jesús mbichae mondo ee ra. ²⁵ Quiaru jare que Jesús eyuquia rirõ cote ra. Ñee ngue uchimbaaquiato je cote ra. —Seruqui rã ño uva rique co re. Mbia icuã mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra. ²⁶ Jẽ co mbichae u mose, jẽ uva rique mbei mose, Santa Cena, i chõ nguiã ùquĩ je. Jẽ Santa Cena naa naa mose, Jesucristo mano nenei nenei ño nguiã mbia je ùquĩ. Santa Cena jẽsaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icuã icuã mose, ùquĩ siqui icuã icuã ño nguiã Jesucristo rete je ùquĩ. Ùquĩ siqui icuã icuã ño nguiã Jesucristo ruqui je ùquĩ no. ²⁸ Nyebe nandendua ndua tuchi quiatu quia Santa Cena naa nonde. ²⁹ Emo Santa Cena naa icuã icuã mose, emo ndua eã mose Jesucristo rete rese, ùquĩ nda Dios mbasi. ³⁰ Ùquĩ je chõ jendasi rasi bei riqui nguiã. Ùquĩ je

chõ jẽingo nguiã mano mano tuchi.
³¹ Nande ae nandereco nandeicua jiri ae. Eĩ nda Dios nandembasiã cote. ³² Jesucristo nandembasi mose, nandemundua sacua ño ãquĩ nde. Nandembitorõ sacua ño cote re. Dios nandemombo eã sacua tata cuasu chõ ãquĩ nde. Jesús quia-toã mombo mose tata cuasu.

³³ Nyebe aico nguiã ñee nyecua jẽje co. Jẽ Santa Cena naa naa mose, jeñumunua nua turã ño. Jẽingo turã ño jenyue. Jenyisaarõ turã ja chõ Santa Cena u nonde. ³⁴ Jemo niacuã siqui mose, sã quiaru uchuchua, Santa Cena naa nonde. Eĩ jentye mose, Dios ra siqui turã jẽje cote, jeñumunua nua mose. Seso mose jendea ra secheẽ ataque asenei jẽje cote.

12

Espíritu Turã ño nandechisaã saã sacua mondo nguiã nande ae ae je

¹ Espiritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. ãquĩ ndese taembi-irandu cote. ² Dios abareã ndese que jẽingo tuchi nyii ra. Mbia que jemingo tuchi dios abareã tubiriã ndese nyii ra. Dios abareã aba cheẽ andu aroneãte. ãquĩ jẽingo Jesucristo rese ãquĩ cote. ³ ã ndese jendua tuchi: —Jesús icuãte riqui Dios je co, i mose emo, echeẽ ae chõ ãquĩ nde. Espiritu Turã embucheẽ eã ño nguiã ãquĩ. —Jesús rei Dios tuchi, i mose emo, echeẽ ae eã ño ãquĩ nde. Espiritu Turã ño embucheẽ nguiã ãquĩ.

⁴⁻⁶ —Co esaã nde, co rese eico nde, i jaaja que Dios nande ae ae je ra. Espiritu Turã mii ño siqui bei nguiã nande ja rese co. Jesucristo mii ño siqui nguiã nandere co. Jesucristo mo eãte emo. Dios mii ño siqui nguiã nandem- buquirãcuã co no. Dios mo eãte emo. ⁷ Espiritu Turã uquirãcuã

teacuquia chõ nguiã nande ae ae je co. Nandeico turã ja tuchi sacua Dios rese. ⁸ Espiritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiatu turã mbei quia, i chõ nguiã nandemo je no. ⁹ —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no. ¹⁰ —Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espiritu eicua icua bei quia nde. Eturã icua. Eicuã abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumun- bara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. ¹¹ Eĩ ño Espiritu Turã mii nguiã ucheẽ mbuchao chao nande je co. Nandechisaã saã sacua mee mee nande ae ae je co. Eĩ ño Espiritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na. ¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na.

Eĩ ño Espíritu Turã mii nguiã nanderemingo ã.

¹⁴ Nanderete mii ae siqui âte. Nanderete resenda tubiriâte riqui ã. ¹⁵ Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re. ¹⁶ Nandeisa achõ ñee aroneate. —Eresa eã ñochĩ se. Nyebe erete resenda eã se re, i aroneate nandeisa ñee. Nanderete resenda bei chõ nandeisa re. ¹⁷ Nanderesa achõ mose nanderete resenda, i nda nandeico rei mbae anuate co. Nandeisa achõ mose nanderete resenda, i nda nandeico rei mbae retõ âte co. ¹⁸ Dios ae que nanderete resenda mii ja ja cose ra. —Co tamii a, co abe tamii a no, i jaaja que nanderete resenda mii mii nda. ¹⁹ Nanderete resenda mii mose, eĩ ndei ra nanderete eâte. ²⁰ Nanderete resenda ja que Dios mee nande je ra. Nanderete resenda tubiriâte raque. Nanderete mii tuchi chõ ñene. ²¹ —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquí nandei je no. ²² Ae nanderete resenda ñetẽ tuchi nae, ae nanderete resenda quirãcuã nea tuchi nae, ñquí nguiarei nandechireco tuchi. ²³ Ae nanderete resenda aba ireĩte nae, ñquí nandetea quiatu chõ nguiã. Nandechati turã ño nguiã. ²⁴ Ae nanderete resenda checuete riqui nae, ñquí nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ñquí quiatu aba queteamba re. ²⁵ Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese. ²⁶ Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷ Ñ ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã. ²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguia nde, i chõ nguiã emo je no. —Mbia rasi embucherõ cherõ nguia nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguia nde, i chõ nguiã emo je no. ²⁹ Cristo chimbaaquiato ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde. ³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiassa asasa ja eã ño nande no nde. ³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ñquí mo asaã saã se abe, nande quia ñee Dios je. Mbae turã tuchi mo tasenei na jêje.

13

Nandechesecua eã mose, Dios chirirõ ño nander e

¹ Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ² Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je. ³ Se nyesecua eã

mose mbia rese, aico chooño mbei chõ nda se. Sembæ ra amee ja raque mbia mbaecha reã je. Mbia ra serei raque, se Dios cheẽ nenei nenei mose.

⁴ Ae nyesequate quia mbia rese nae, ùquĩ nguia siqui mingüete nguĩ mbia je ã. Ûquĩ nguia eturãte riqui nguĩ mbia je co. Ûquĩ nguia mae icuã icuã eãte nguĩ emo mbæ rese ã. Ûquĩ nguia “seaquiatu tuchite se”, iãte nguĩ co. ⁵ Ae nyesequa quia mbia rese nae, ùquĩ nguia “se quiatu”, iãte nguĩ mbæ mo je. Ae aba ireĩte nae, ùquĩ mo esaã saã eãte quia co. Ae nyesequa quia mbia rese nae, ùquĩ nguia paama i jei jei eãte nguĩ ã. Ûquĩ nguia ndua icuã icuã eãte nguĩ emo icuã mose ee ã. ⁶ Ae nyesequa quia mbia rese nae, ùquĩ nguia eya eãte riqui nguĩ, emo mbæ icuã naa mose ã. Emo mbæ turã naa mose quia eyate riqui nguĩ ã. ⁷ Ae nyesequa quia mbia rese nae, ùquĩ ñĩmbirãcuã ño nguĩ mbæ ja je ã. —Hchõĩño nguĩ, iã ño nguĩ mbia cheẽ je. Siqui tochi chõ nguĩ.

⁸ Dios quiato ra nyesequa bei mbia rese, mbæ ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesã eã emo mose cote. Mbia mbæaquiatusa mo eã nda emo mose cote. Ûquĩ nda ua ja chee. Dios quiato quiatu ra nyesequa bei quia. ⁹⁻¹⁰ Mbæ mĩ mĩ ño nandeicua icua nguĩ namo ã. Jesús tu mose quia ra mbæ mĩ nandeicua eã cote. Dios cheẽ mĩte nandesenei senei nguia namo ã. Jesús tu mose quia ra mbæ nandeicua ja cote. ¹¹ Señetẽ mose que aico ñee ñee mbia riirĩ na nda. Mbia riirĩ na ño ngue aico ndua ndua señetẽ mose ra. Mbæ que aicua icua chõ nguia mbia riirĩ na no nda. Secuasú mose que señetẽ mosenda asecha ja cote ra. ¹² Mbæ cuu rese mae naanguia chõ nandeico nguĩ mae namo.

Jesús tu mose quiatu ra mbæ checua ja nande je cote. Mbæ mĩ mĩ ño aicua icua nguĩ namo co. Jesús tu mose quia ra mbæ aicua ja cote. ¹³ ã nandeico Dios icuate ã. ã nandeico Jesucristo ru raarõ arõ ã. ã nandeico nyesequa jate mbia rese ã. Nandechesecua mose quiarei, ùquĩ eturã tuchi mbæ ja si.

14

Mbiamo cheẽ naa naa mose

¹ Jnyesequase tuchi quiatu quia mbia rese jẽ! Jeñee ño nguia Dios je. —Paba, ndequirãcuã emee na seje. Mbæ raã naa sacuã ndeje, jenyebi chõ nguia Dios je. —Ndecheẽ asenei senei sete ndequirãcuã je, jenyebi chõ nguia ee. ² Jesús quiato mo mbiamo cheẽ naa naa mose, mbia ra eicuayã jate. Dios mĩ ño nda eicua nguĩ. Dios mĩ je chõ eriqui nguĩ ñee. Uchue si chõ eriqui nguĩ ñee. Mbia quia echeẽ icuayãte nguĩ. ³ Ae Dios cheẽ senei senei nguia, ùquĩ nguia ñee nyecuate nguĩ mbia je. Ûquĩ nguia mbia mbaaracua turãte nguĩ Jesucristo rĩ. Ûquĩ nguia mbia mingo uquia tuchi nguĩ Jesucristo rese no. Ûquĩ nguia mbia mbia tuchi nguĩ Jesucristo rese no. ⁴ Ae mbiamo cheẽ saã saã nguia nae, mbia mingo uquia reã ño nguĩ Jesucristo rese. Ae ae umingo uquia nguĩ ere. Ae Dios cheẽ senei senei nguia nae, ùquĩ nguia Jesús quiato mingo uquiate nguĩ Jesús rese. ⁵ Mbiamo cheẽ nda jẽsaã aquiatu ja raquete seje chã. Dios cheẽ nenei nenei aquiatu mose, ùquĩ nguia eturã tuchi re. Ûquĩ nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiasa mose Jesús quiato je, eturã ño ùquĩ no nde. Jesús quiato mingo uquia chõ nguĩ Jesús rese ùquĩ.

⁶ Se mbiamo cheẽ naa naa mose jẽje, ùquĩ nda jemingo uquia reãte

Dios rese. Se ñee nyecua mose jêje, ùquĩ nguia eturâte re. Ae rese Dios sembiirandu nae, ùquĩ nenei nenei mose jêje, ùquĩ nguia eturâte re. Se Dios cheê mbuchecua tuchi mose jêje, ùquĩ nguia eturâte no nde. Se Dios cheê icua icua tuchi mose jêje, ùquĩ nguia eturâte no nde. Mbiamo cheê naa naa si. ⁷ Sã música no. Emo flauta mbuchêê icuã icuã mose, mbia ra tonada icuayâte. Emo guitarra mbuchêê icuã icuã mose, mbia ra tonada icuayã no. ⁸ Sã soldados no. Emo corneta mbuchêê icuã icuã mose, soldados ra icoquiatsuã. ⁹ Eĩ si chõ jê no nde. Jê mbiamo cheê naa naa mose, mbia ra jeñee icuayâte. Jê mbiamo cheê naa naa mose, mbia eãsa ñee ñee na ño ùquĩ nde. ¹⁰ Mbia cheê ñumumbarate eriqui rei. Ucheê ae raã naa mose, echecuate ee. ¹¹ Emo ucheê naa naa mose seje, se eicuayã mose, mbiamo ño aico nguia ee. Mbiamo ño ae riqui nguia seje no. ¹² Espíritu Turã quirãcuã jenyosei tuchi quia reae. Coche tuchi chõ ùquĩ nde. Jesús quiato mingo tuchi sacuã Jesús rese chõ equirãcuã jenyosei jê.

¹³ Nde mbiamo cheê naa naa mose Jesús quiato je, echeê na Dios je. —Paba, ndequirãcuã emee na seje. Secheê mbiasa sacuã mbia je, ere chõ Dios je. ¹⁴ Se mbiamo cheê naa mose Dios je, acheê ñee ndaque Dios je. Mañi ae quiatu ñi se quia ñee ee. ¹⁵ Mbiamo cheê abe ra asaã saã ndaque Dios je. Secheê abe ra asaã saã ee no. Mbia secheê icua ja sacuã. Mbiamo cheê abe ra asaã saã se irasei rasei mose. Secheê abe ra asaã saã se irasei rasei mose no. ¹⁶ Nde mbiamo cheê naa naa mose Dios je, mbia ra ndecheê icuayâte. Ae eaquiatsuã, ùquĩ nda ndecheê icuayâte. Nyebe eriqui nguia ñee aroneate Dios je nderese. Nyebe nandechêê sí chõ nandesaã Dios je. ¹⁷ Coche jêingo nguia ñee Dios je. Jeñee sí quia nda aba saã

Dios je re. Jê mbiamo cheê naa naa mose ee, jendesenda quia nda jeñee icuayâte nguia. Ùquĩ mose ra jendesenda jemingo uquia reãte Jesús rese. ¹⁸ Mbiamo cheê aicua tuchite raque quia jêsi co. Gracias, aete raque quia Dios je ùquĩ nii co. ¹⁹ Dios quiato ñumunua mose, acheê nyecuase rete ee. Secheê jua chõ ndaque. Cinco palabras. Mbiamo cheê nda asaã eã ee. Mbiamo cheê icuayâte quia ñene. Emo nda ñee oco raque ee, icuayâte rae.

²⁰ Mbia riirĩ naate ra jêingochĩ, Seresenda. Jendua quiatu secheê ndese mbia cuasu rã. Coche jêingo nguia mbia riirĩ na mbae icuã naa ndocoĩ. ²¹ ã ndei Dios cheê mbesa ji ã:

Mbiamo tamondo rei secheê nenei nenei sacuã ã serimba je.

Secheê nda esenei senei ndei serimba je mbiamo cheê je.

Aquere ra serimba secheê mumba
i i tuchi querabe, i que Dios
ra,

i que embesa ji ra. ²² Jemo mbiamo cheê naa naa mose, Jesús quiatoã mundua sacuã Dios rese chõ ùquĩ nde. Jê Dios cheê nenei nenei mose, Jesús quiato mundua sacuã ño Dios rese chõ ùquĩ no nde. ²³ Jesús quiato ñumunua nua mose u, sã mbiamo cheê naa naa ja eã u. Jê mbiamo cheê naa naa ja mose ra Jesús quiatoã ñee jêje. “Earacuayã” i ra ique mose mae jendese. ²⁴ Coche jêingo nguia Dios cheê nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicua ndese. —Seicuã tuchi chõ aico se re, i ra jeñee andu mose. ²⁵ Ae rese ndua ndua uchiangui renda icuã nae, Espíritu Turã ae ra ùquĩ mbuchecua checua nguia ee. Nyebe ra ngoi ngũã ndese ñee turã Dios je. —Dios riqui tuchi jendese a, i ra ñee jêje.

Mbae jěsaã turã turã ja chõ nguia jeñumunua nua mose

²⁶ —Eĩ jenyẽ quiatu quia ñumunua Jesús rĩĩ, ae ra jėje cote. Emo iraseĩ raseĩ. Emo mbia mbaaquiatsu quiatu Jesús rĩĩ. Emo Dios cheẽ icua icua mbia je no. Emo mbiamo cheẽ naa naa no. Emo mbiamo cheẽ mbiasa asa ee no. Jenyuuru uru chõ nguia. Mbiamingo ja sacua Dios rese chõ ũquĩ nde. ²⁷ Mbiamo cheẽ jěsaã saã mose ñumunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiasa asa. ²⁸ Jemo echeemo mbiasa aquiatsu mose, mbiamo cheẽ nda jěsaã saachĩ, jeñumunua mose. Jeñumunua eã mose quiatu mbiamo cheẽ jěsaã saã jẽ ae Dios je. ²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua ũquĩ ñee ndese. Eĩ ngue ra, i sacua. Eĩ eã ngue ra, i sacua abe echeẽ icua mose no. ³⁰ Emo chĩ mose Jesús quiato ataque mbaa quiatu quiatu, emo nda ñeechĩ echeẽ cúa. —Nde abe ã embuchecua mbia je, i mose Dios emo je, sã ñiinda ñee ja rã nyii. ³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbiamos Dios cheẽ icua ja sacua. Mbiamosiqui tuchi sacua Dios rese. ³² —Nde abe ã embuchecua mbia je, i mose Dios emo je, sã emo ndaarõ mbĩĩ na huĩ, emo chĩ mose Dios cheẽ nenei nenei. ³³ Jemo ñee mose jenongue cheẽ cúa, Dios biãte ũquĩ. Jeñee turã mose nyuuru uru, ũquĩ nguia Dios bite re. Eĩ ja chõ Dios quiato nguia iglesia jenda ja. ³⁴ Jeñumunua nua mose Dios rĩĩ, cuña mo nda ñeechĩ. Eĩ si que Moisés chimbesa no nda. Sã cuña ndiqui mbia cheẽ mumbayã mbei. ³⁵ —Ũquĩ embuchecua seje, i aroneate cuña ñee mbia chumunua mose. Uchuchua quia cuña ñee ngu je,

ñimbaaquiatusẽ mose. Cuña mo ñee aroneate Jesús quiato chumunua nua ite re. ³⁶ —Ichõño nguia jenyẽ quia secheẽ mose re? Jẽ nane je eã ngue Dios ñee ndesẽ. Jẽ mii je eã ngue Dios ñee ndesẽ.

³⁷ Secheẽ ae eã ambesa nguia jėje co. Dios cheẽ ño ambesa nguia jėje. —Dios que uquiracuã mee seje ra. Ucheẽ nenei nenei sacua, i mose jemo ñee, sã ũquĩ nane ñee serĩĩ. —Dios cheẽ tuchi chõ Pablo senei senei nguia, sã i serĩĩ. ³⁸ Ũquĩ secheẽ isi sereã mose, jẽhui chõ esi. Sã eaquiatsu ae riqui. ³⁹ iDios cheẽ jěsenei seneise tuchi quiatu jẽ! Jemo mbiamo cheẽ naa naa mose jechẽ nda jěsiquisã quisachĩ jẽ! ⁴⁰ iMbae jěsaã turã turã ja chõ nguia jeñumunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jėje Jesucristo rĩĩ nae, ũquĩ sí rese chõ aico nguia jemundua ndua co. Ũquĩ ngue jěisi turãte. Jẽingo beite ũquĩ ndese ũquĩ. ² Ũquĩ ndiqui jemingo beite ũquĩ, jẽtesareia mose secheẽ si. Ũquĩ jẽingo Jesucristo icua iruã ũquĩ. ³ Ae Dios senei senei seje nae, ũquĩ nane ngue asenei senei jėje ra: Jesucristo que mano nandeicuã ndiquicharõ. Embesa ji cheẽ nguire. ⁴ Mbiamos que echati rei. Tres días mose que quera si. Embesa ji cheẽ nguire. ⁵ Quera si mose que nyecua Pedro je. Aquere que nyecua uchimbaaquiatsu doce je cote. ⁶ Quinientos uquiatsu je que nyecua cote. Hue equiatsu chi ja mose ñumunua. Ũquĩ tubiriãte riqui ã. Emo emo ngue mano nda. ⁷ Nyecua que Jacobo abe je cote no. Aquere que nyecua uchimbaaquiatsu jaje cote. ⁸ Nyecua nyecua jare mbia je que

nyecua chee se abe je cote ra. Sã cuña ndiqui erã mo mbua no, ùquĩ na si chõ aico rei nguiã se co. ⁹ Se quia señetẽ jiri riqui nguiã Jesús chimbaaquiatu ataque si co. — Jesús chimbaaquiatu chõ se re, ae eã jiri quia co. Seicua tuchi quiatu ngue Dios quiato je nyii re. ¹⁰ Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri riqui nguiã Jesús rese echimbaaquiatu ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese. ¹¹—Aba Dios cheẽ senei senei tuchite quia reae, ure ate equia co. Ûquíã ñene. Uresenei senei ja chõ equia ã ndesẽ. Jẽ ngue urechisenei senei jẽisi turãte quia resẽ.

Mbia raaque quera si mose

¹²—Cristo que quera si manonde ra, ure que equia erenei nenei jẽje. Urecheẽ ngue jẽisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re. ¹³ ¿Cristo raaque bei namo nde? —Mbia raaque ra querayã mbei, jenyẽ mose, ¿mañi Cristo raaque quera re no? ¹⁴ Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jẽicua iru chõ ndei. ¹⁵ Cristo raaque quera si eã mose, eĩ nda ureico rei ñee ñooño Dios rĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, i nda Dios Jesucristo raaque mbuquera si eã ndei no. ¹⁶ Mbia raaque querayã mose, eĩ nda Cristo raaque quera eãte rei no. ¹⁷ Cristo raaque quera eã mose, eĩ nda jẽingo rei Cristo icua iru no. Eĩ nda jẽingo rei jẽicua nderequia beite no. ¹⁸ Eĩ nda Cristo quiato quia chã mbei rei manonde no. ¹⁹ A mĩ eã ño Cristo riqui nguiã nanderese. Nandemanonde abe ra eriqui bei

nanderese no. A mĩ mose, eĩ nda nandeya eã tuchite riqui rei mbia mo si no. ²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no. ²¹ Adán mĩ nane ngue mano huicua je cose ra. Nyebe nandeico nguiã mano mano mbei cote. Eĩ si chõ Cristo mĩ quera si nguiã cote. Nyebe ra uquiato mbuquera si ja cote. ²² Sã nandeico mano mano ja Adán ndui ã no, eĩ si ra Cristo nandembuquera quera no. ²³ Dios que Cristo rane mbuquera nandesĩ ra. Cristo tube mose, uquiato raaque ra embuquera ja cote. ²⁴ Cristo tube mose ra mbae ibi jenda ua ja cote. Mbia mo nda siquĩ ererecua cote. Cristo ra mbae mee ja Dios je cote. Cristo ra mbia rerecua mbutiã ja cote. ²⁵ Ererecuarã tuchi ra Cristo cote. Uquiatoã nda embuquiachã ja tuchi chee cote, ae siquĩ mose ererecuarã. ²⁶ Mbia mano mano mose, Cristo biãte ùquĩ. Ûquĩ abe ra Cristo mbuquiachã tuchi mbia si cote. Mbae icua ataque ra embuquiachã ja rã nyii. ²⁷ Dios que mbae mee ja Cristo je ra. Cristo mbae rerecua ja tuchi sacua. — Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo. ²⁸ Dios mbae mee ja mose Cristo je, Cristo ra ñimee Dios je cote no. Eriirite quia ñene. Eĩ nda Dios mbia rerecua ja tuchi cote.

²⁹ Emo emo ño bautizar i nguiã eraaque rĩ ùquĩ. Eraaque quera si eã mose ¿mbaerã ùquĩ ndiqui bautizar i eraaque rĩ nde? ³⁰ Mbia raaque quera eã mose, eĩ nda ureico rei Dios cheẽ nenei nenei ate mbia je co. Eĩ nda mbia riqui rei ureiquia serĩ serĩ ate. ³¹ Mbia “taiquia” i bei beite quia seje ã. Acheẽ ñooño eãte jẽje. Sã seyate riqui jendese co no. ³² Nyacua rã tuchi que Efeso jenda riqui seje ra.

Ũquĩ ngue asiquisã tuchi rei quia ñee nda. Eĩ nda asiquisã quisã iru rei no, mbia raaque quera eã mose. Mbíaraaque quera eã mose, eĩ nda nandeico rei ñee. —Mbae nandembeí chooño. Mbae nandeu chooño. Mano mbeí cote, i. ³³—Eĩ jenyé quiatu ñichĩ nda mbia jembĩĩrĩ irĩ jẽ! Jeingo mose mbia icuã ndese, jembĩĩcuã icuã nda jẽ abe cote. ³⁴Jendua quiatu. Mbae turã nguiau jẽsaã saã nguia. Mbae icuã jẽsaã eã nguiau quia. Jemo emo ndiqui Dios icuayãte ũquĩ. Aba ireĩ tuchi quiareí ũquĩ.

Jesús quiato rete yasu ja ra cote

³⁵ Jemo nda ñee ndei. —¿Mañĩ nda eraaque quera si re? ¿Mañĩ nda erete cote re? i ra jemo ñee ndeae. ³⁶ Ndua eã ño nguia ũquĩ. Sã nandeico mbae eĩ tiquia no. Mbae eĩ nda soõ suri sacuã cote. Eĩ si chõ nda nanderete soõ nandemano mose. Nanderete yasu sacuã cote. ³⁷ Sã nandeico mbae eĩ tiquia no. Ei ra nandechitiquiayã. Ieĩ achõ ño nandechitiquia nguia. Quiata a eĩ. Mbaemo eĩ abe no. Ei quia nda suri nguia cote. ³⁸—Í ño nda ndei, i chõ Dios nguia mbae eĩ jaje. ³⁹ Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa rĩnda rete no nde. Ae mbebe quia, erete ae chõ ũquĩ no nde. Sira ae erete mo no nde. ⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re. ⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eĩ si chõ mbia raaque quera je re. Ae mbia raaque nandechitiquia quia nae, ũquĩ ndei soõ je ũquĩ. Ae ra quera si nae, ũquĩ nda soõ eã mbeí cote. Manoa mbeí ra eno. ⁴³ Ae nandechitiquia quia

nae, eraaque tuchi chõ ũquĩ nde. Ae ra quera si nae, enininya tuchi chõ ũquĩ cote re. Etiquia mose, equirãcuã nea tuchi chõ aque mose re. Equera si mose, equirãcuã tuchi chõ aque mose cote re. ⁴⁴ ã nanderete nandereco ã nae, erete achõ ño ũquĩ nde. Quera si mose ra nyicabo tuchi cote. Mbae ibi jenda ra mano ja. Ae ibi jenda eã nae, ũquĩ nda manoa no. ⁴⁵ ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingo beisa rei aque. ⁴⁶ ã nanderete nandereco ã nae, mano mano mbeí arõte. ũquĩ nane nandereco nanderete ã. Aquere quiatu ra nanderetemo nandereco cote. Manoa mbeí sacuã cote. ⁴⁷ Ae Dios chao Adán nyii nae, ibi je chõ eao nguia nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸ ã nanderete nandereco ã nae, Adán ndete rã si chõ nanderete nandereco nguia ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ũquĩ cote. ⁴⁹ Ae Dios chao ibi je nyii nae, Adán i equia ee nae, aque rã si chõ nandeico nguia nande abe namo ã. Aquere ra nandeico ibatenda rete rã cote. ⁵⁰ Nanderoo achõ ño nanderete re. Nanderuqui abe no. ũquĩ oso aroneate ibate Dios récuua. Ae mano nguia soõ nae, ũquĩ nyoí aroneate Dios récuua. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ũquĩ tasenei na jẽje. Nandemano ja eã ndae. Nandechiicabo ja chõ ndae. ⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbeí nonde cote. Aque mose ra nandechiicabo bei

nande abe cote. ⁵³ Ae nanderete nandereco namo ā nae, ā nda nyi-icabo tuchi cote. Manoa mbei sacua cote. Soō eā mbei nonde cote. ⁵⁴ Nanderete nyiicabo mose, ũquĩ mose ra embesa ji cheē io cote: “Nandemano ngue ua tuchi cote ra”, i ñi embesa ji re. ⁵⁵ Nanderasi ra nandeiquiayā cote. Ibicua ra nanderaaroā cote. ⁵⁶ Nandeicua ño nandemano mbu uquia nguiā nande je co. Moisés chimbese chō nandeicua mbuchecua nguiā nande je co. ⁵⁷ Dios ra nandemano siquisā mbei nandesi cote Jesucristo rĩ. Nyebe nandeico nguiā gracias i tuchi Dios je ā cote. ⁵⁸ Seresenda ijeñimbirācuā tuchi quiatu quia jē! Jesucristo rese jēingo bei quiatu quia jē! iEcheē jēsenei senei mbei tuchi quiatu quia jē! Ae jēsaā saā nguiā Jesucristo rese nae, jēsaā iru iruā ño nguiā ũquĩ.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ũquĩ tasenei jēje. Acheē ngue Jesús quiato je ra. Galacia jenda je ra. Eraā si chō jēingo ae. ² Domingo mose bei jēingo mbae rerecúe cúe ae. Ofrendar ā. Ae mbae isi atate quia, sã aque mbae rerecúe ata jiri ae. Ae mbae isi mĩte quia, sã aque co mĩ jiri rerecúe ofrendarā ae. Ũquĩ jemunua ino seso nonde jendea ae. Eĩ mose ra ofrendarā jēsaā eā seico mose jendese cote. ³ Secuasē mose huee, jeñimondo sacua mo jēirabo ino, ofrenda rerao sacua. Cartas nandemondo ũquĩ oo. Ofrenda rese. Ũquĩ nda amondo Jerusalén ña. Ofrenda rerao sacua hue jenda Jesús quiato je. ⁴ Ofrenda tubiriā mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasē jēje cote.

⁶ Aico arete jiri ra jendese huee reae. Ama mose bei ra aico jendese huee reae. Eĩ jenyē nda sembucuata turā mondo cote, seso mose mbaranguiti. ⁷ Amaeño sereāte jendese secua mose. Aico arese rete jendese huee, Dios eno i mose seje. ⁸ Efeso taico are rā nyii. Fiesta de Pentecostēs mose. ⁹ Dios cheē asenei senei arō tuchite mbia je a. Mbia seanduse rete. Emo emo icuā icuāte riqui Dios cheē nenei nenei mose seje ā no.

¹⁰ Timoteo ngasē mose jēje jēisi turā ño jē! iSã eireĩ nguiā tuchi jēsi jē! Se rā si chō eriqui bei nguiā Dios cheē nenei nenei mbia je aque. ¹¹ iNyebe jemo Timoteo isiteā eā jē! iJembucuata turā ño imbu seje jē! Aico eraarō arō tuchi se a. Nanderesenda ataque rese.

¹² Acheē ndei que nanderesenda Apolos je ra. —Nde abe eso erea, ae rei que ee jeni nda. Oso sereā ngue namo nda. Osobi mose quia nda esi nguiā jendea cote.

Pablo ñee hui bei

¹³ iJendua tuchi quiatu quia jē! iJesucristo jēicua tuchi quiatu quia jē! iJēsiquicheā tuchi quiatu quia jē! iJēquirācuā tuchi quiatu quia jē! ¹⁴ iMbía rese jenyesequa tuchi quiatu quia mbae raā naa mose jē! ¹⁵ Seresenda, jēingo Estéfanos chuchua jenda icua jate ũquĩ. Ũquĩ nane tuchi ngue Jesús icua Acaya jenda nyii nae. Ũquĩ ndiqui mbae mondo mondo bei Jesús quiato je ũquĩ. Ũquĩ ndiqui mbae raā naa mbei Jesús quiato je ũquĩ. ¹⁶ Ũquĩ na si chō jēingo. Ũquĩ ñee nda jemumbachĩ. Ae Dios cheē senei senei nguiā nae iũquĩ ñee nda jemumbachĩ jē! ¹⁷ Seya tuchi Estéfanos ngaē mose serea. Fortunato abe. Acaico abe. Ũquĩ ngue sembia tuchi ngaē jēingoā mose a ra. Ae jēsaā aroneate quia seje nae, ũquĩ ño ngue esaā ngaē seje a ra. ¹⁸ Ũquĩ ngue sechiā mbucoite Dios rese ra.

Jeñia abe mbucoite ereae. Gracias
jenye bei ũquĩ je.

¹⁹ Jesús quiato Asia jenda ja chõ
saludos mondo quia jẽje aque.
Aquila abe saludos mondo quia jẽje
aque. Priscila abe. Ae Jesús quiato
ñumunua nua nguia ũquĩ nyuchua
nae, ũquĩ ja abe saludos mondo
quia jẽje Jesucristo rĩĩ aque. ²⁰ Jesús
quiato a jenda ja saludos mondo
quia jẽje aque. Jenyiquiaama ama
ja quiatu quia Jesús rĩĩ.

²¹ Seo je tuchi co saludo ambesa
mondo quia jẽje aque. Pablo
tuchi chõ se re. ²² Emo nyese-
cuayã mose Jesucristo rese, sã
Dios embasi. Echu, Jesucristo.
²³ Jesucristo turã nda siqui jendese
chã. ²⁴ Achesecua ja chõ nguĩã
jendese Jesucristo rĩĩ co. Amén.

SEGUNDA CARTA DEL APOSTOL SAN PABLO A LOS CORINTIOS

Pablo ucheẽ mbesa mondo Corinto jenda je

¹ Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jêje aque. Jesús quiato Corinto jenda ja je. Acaya jenda ja je abe no. ² Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³ Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co. ⁴ Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacuã abe chõ ñene. Mbae icuã tu mose ee. ⁵ Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo rĩĩ ã. Cristo riqui urembia tuchi ure abe ùquĩ mose co. ⁶ Ure mbae rasi raã mose, jêje chõ ñene. Ure mbae rasi raã mose nyii, jêingo sacuã Dios rese chõ ñene. ⁷ ñ nda jêya bei riqui mbae rasi raã mose. Dios ureya eã mbuquiachã mose, jêya eã mbuquiachã sacuã abe chõ ñene. Eĩ nda jẽñimbirãcuã tuchi mbae rasi raã mose. Sã ureico mbae rasi raã ure no. ⁸ —Mbae icuã tu mose ee, ñimbirãcuã turã nda Dios rĩĩ, ure beite equia jenii ã. Mbae icuã tu mose jêje, Dios ra jêya eã mbuquiachã jẽsi. Sã seya eã mbuquiachã sesi no.

⁸ Mbae rasi que uresaã tuchite ureico mose Asia ra. Ùquĩ ndese taembiirandu. Mbia que ureucuyãte quia ra. Aete ureico

ñimbirãcuã eã. —Mbae icuã nda hui eã mbeichĩ nandesi re, ure rei que equia ra. ⁹ —Mbae icuã nda nandemingoã nyee, ure rei que equia ra. Mbae icuã tuutu bei mose ure je. Ure Dios icua sacuã ño ngue ùquĩ nde. —Nande ae eã ñene, ure i sacuã ño ñene. Sã Dios ae riqui mbia raaque mbuquera uquirãcuã je no. ¹⁰ Mbae icuã ureiquia serĩ nguia nae, ùquĩ si que Dios ae urerirõ nda. Ùquĩ si eriqui urerirõ ndirõ mbei ã. Ùquĩ si ra eriqui urerirõ mbei no. Ùquĩ ureicuate quia ã. ¹¹ Jẽ abe jeñee Dios je urerĩĩ no. Mbia tubiriã ñee mose Dios je urerĩĩ, Dios ra ùquĩ ñee ñandu. Dios ra uturã mondo tuchi ure je. Ùquĩ nda gracias i tuchi Dios je urerĩĩ cote.

Pablo oso jei eã Corinto

¹² Ure que mbia mo urembiĩĩ irĩ ãte quia ra. Jẽ abe mbĩĩĩ irĩã no. Dios resendate que ureico jêje ra. Ureyate mbae turã naa naa mose jêje. Nyebe urechiã iate riqui nguiã. Dios ae chõ ngue uremingo mbae turã ndese huee ra. Ureaquiatu ae eã ngue ra. ¹³ Ae urembesa mondo quia jêje nyii, ùquĩ jẽicuate raque quia ùquĩ. Urechimbesa checuate raque. Urechimbesa nda jẽicua ja tuchi rã seje chã. ¹⁴ Jẽ seicua jiri raque quia ùquĩ. Jêya tuchi rã nda urerese Jesucristo tu mose chã. Sã ureyate riqui jendese ã no.

¹⁵ Sã jêyate riqui serese co no. Ùquĩ aicuate quia se abe co. Nyebe acheẽ ndei nguiã sechiangui re nyii. —Tasobe rã erea. ñ nda eyabe jiri sesobe mose erea, ae rei que se nyii ra. ¹⁶ —Seso mose Macedonia, taicha bei oso jendea, ae rei que se ra. —Obei abe nda aichabe erea chã. ñ nda mbae mo mee seje sembu bei sacuã Judea, ae rei que se no nda. ¹⁷ Se ndua mose ùquĩ ndese, ¿eicuãte ùquĩ nde? ¿Acheẽ

ñooño ño se quia ũquí nde? Se eno i mose, eno ae bei chõ nda se. Secheẽ nda ambuchebiã mbei. Jesús quia-toã ae ũquí saã nguiã. ¹⁸ Sã Dios ñee ñooñoa no. Eĩ ure quia ure abe ure-cheẽ mbuchebiã jêje ã. ¹⁹ Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ ño ngue asenei senei nguia jêje resẽ. Timoteo rese. Silvano abe rese no. ²⁰ —Mbae turã nda asaã jêje, i tuchi rei que Dios quia nande je nyii ra. Jesús rĩ ño eriqui nguia ũquí naa naa nande je ã cote. Jesús rĩ ño nandeico nguia Amén i Dios je ã cote. ²¹ Dios ae chõ nandembirãcuã mingo nguia Cristo rese co. Nandemingo icúe umbaerã. ²² Dios que nandeisirõ umbaerã nda. Umbae marca que emii naanguia nanderese ra. Espíritu Turã ngue emondo nandechiangui re ra. Nanderereco quiatu sacua umbaerã.

²³ Aso eã equia jendea nae, jêireĩ nguiã sacua ño asoã nguia jendea aque mose. Seso sereã ae eã ngue eno nde. Acheẽ ñooño eã ño nguia jêje co. Dios riqui sechiã icuate co. ²⁴ —Jenderecuarã nda se, ae ãte quia co. —Co rese chõ jëingo ndua, ae aroneate quia jêje co. Taambia chõ Jesús rese. Ũquí mii ño asaã nguia jêje. Jê ae chõ jeñimbirãcuã nguia Jesús icua ũquí.

2

¹ —Aso si eã nda ñee asi asi jêje jembia eã, ae que se ra. ² Seso mose jembia eã, aba quia ra sembia se cote. Jê ño sembia quia resẽ. ³ Nyebe ambesa mondo jêje nyii resẽ. Jê mbae mbitirõ sacua seso nonde jendea. Seso sereãte que oso mae jêicuã ndese ra. Sembia eã sacua. Jê nguia nda sembia nguia ña. —Seya mose ra jêya jê abe, ae que se ra. ⁴ Ae ambesa mondo jêje nyii nae, ũquí mose que seya

eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguia jêje. —Pablo ndua tuchichĩ nanderese, i sacua ño ngue ambesa mondo nguia jêje.

Ae mbae icua saã nguia nyii nae, aque jêisi turã ño cote, i Pablo

⁵ Ae siqui ngu ninisi rese nyii nae, sembia eã tuchi chõ aque re. Se mii eã ngue sembia eã nda. Jemo abe abe mbia eã ngue ra. ⁶ Mbae rasi que esaã tuchi huicua nii cote ra. Jê emombo mose nyii. Jêisi turã ño cote. ⁷ Aque icua si jêtesarei chõ cote. Jêturã ño ee cote. Jembia jiri. ⁸ Jênda eya eã embiicha eã Dios si. ⁸ Jenyesequa tuchi chõ nguia erese jê. Jêturã sí chõ ee jê. ⁹ —Ma secheẽ mumba eã, ae que embesa mondo jêje nyii ra. ¹⁰ Jêtesarei mose aque icua si, se abe atesarei chõ nguia esi co. Jenii ño aico nguia tesarei esi co. Cristo resa rae chõ aico nguia tesarei esi. ¹¹ Nandetesarei mose emo icua si, Satanás siquiã sacua nanderese chõ ñene. Sã Satanás ndiqui aba mbiiri iri mbeite no.

Sechiã ngue ngoi eã mbei Troas ra, i ñi Pablo re

¹² Secuasẽ mose Troas Cristo cheẽ nenei nenei sacua, Cristo que mbia mbuchiisaquia tuchi rei secheẽ andu ra. ¹³ Tito oreãte que seje huee ra. Nyebe sechiã ngoi eã mbeite nguia. Nyebe “co acua quia co” ae nguia hue jenda je. Macedóniaa ngue aso cote ra.

Dios uremingo turã mbeite quia Cristo rĩ co

¹⁴ Aico gracias i beite Dios je co. Ae chõ uremingo turã mbeite nguia Cristo rĩ co. Ae chõ urembirãcuã nguia mbae icua si co. Ae chõ ucheẽ senei senei uquia nguia ure je mangue jenda chooñoa je co. Aba mbushimbusa rã tuchi chõ echeẽ nde. Sã aba mbushimbusa riqui mbae mbushimbu turã jate no. ¹⁵ Cristo

riqui urechiangui re co. Nyebe ureico nguiã aba mbushimbusera râte Dios je ã. Ure Dios cheê nenei nenei mose, emo emo ño echeê isi nguiã. Siqui bei sacua. Emo emo ño echeê isiã nguiã no. Nyoi sacua tata cuasu. ¹⁶ Ae ra nyoi tata cuasu nae, mbae shimbu icua naanguia chõ Dios cheê ndiqui nguiã ee. Ae ra siqui bei quia nae, aba mbushimbusera turã naanguia chõ Dios cheê ndiqui nguiã ee. ¿Aba chõ eaquiata Dios cheê nenei nenei ña? ¹⁷ Ae Dios cheê senei senei ñooño nguia nae, ñuqui na eã ño ureico nguiã Dios cheê nenei nenei ure ã. —Mbae mo jembu rã ure je, ureã tuchi chõ nguiã Dios cheê nenei nenei mose jêje ã. Sã eataque riqui Dios cheê abi abi erenei nenei mose no. Eĩ eã ño ure re. Dios cheê uresenei turã ja chõ nguiã ure. Ureico mingue chõ nguiã erenei nenei ure ã. Dios chõ ngue ureirabo nguiã ure. Cristo quiato chõ ure re. Dios resaa chõ ureico nguiã echeê nenei nenei ã.

3

Jesús cheê yasu nandereco quia ã cofe

¹ ¿Ure cuasu uresaã saã si rei nguia jêje ã nde? Tei. Jenyicua ja chõ ure resẽ. ¿Emo nda ureturã senei mbesa mondo jêje re? ¿Emo nda jêturã senei mbesa imbu ure je re no? Tei. Nandechicua ja chõ equia ã ndesẽ. ² Aico jenderequia beite sechiangui re co. Embesa ji rese mae na ño mbia riqui nguiã mae jendese ã. ³ Urechimbaaquiata chõ jẽ ndesẽ. Cristo chimbese rã ño jẽingo nguiã. Tinta je eã ngue jembesa ra. Espíritu Turã je chõ ngue jembesa nguiã. Sita eã ngue Cristo mbesa nguiã. Jeñia ño ngue embesa nguiã.

⁴ Cristo chõ ã icua nguiã seje. Dios resaa chõ aico nguiã ñee jêje ã. ⁵ Sequiracua ae je ra mbae aicuayã. Dios chõ uquiracua mee

nguiã seje mbae icua sacua. ⁶ Dios chõ uquiracua mee nguiã seje, ucheê yasu nenei nenei sacua. — Embesa ji cheê jemumbayã mose ra jaeminga bei, i ãte Dios quia nande je ã. Espíritu Turã ae chõ aba mingo bei nguiã. — Embesa ji cheê tamumbayã mbei chõ nguia seico bei sacua, i mose emo, aque ra siqui bei eã. Espíritu Turã ae nandeminga beisa re.

⁷ Sita mbesa ji Moisés quereco quia nae, mbae nininya tuchi que eriqui aque mose ra. Mbia mae sayã tuchi que Moisés ruba riqui ra. Moisés ruba nininyate quiatu ngue eriqui nguiã ee. Enininya que uque uquete oso quia cote ra. Moisés chimbese mbia mingo bei aroneate. — Mbia siqui icua mose, mbia ra mano, i que Moisés chimbese mbia mbiirandu ra. ⁸ Mbae nininyate raque aque mose. Ae Jesús cheê yasu nandereco namo ã nae, ñuqui nguiarei enininya tuchi Moisés chimbese si. ⁹ Moisés chimbese quiatu que mbia mbiirandu tuchi huicua ndese ra. Jesús cheê yasu quiarei nandembiirandu nandeicua mbitirõ ndese. Jesús cheê yasu quiarei enininya tuchi Moisés chimbese si. ¹⁰ Moisés chimbese quiarei enininya eã jiri Jesús cheê yasu si. Jesús cheê yasu quiarei i tuchi Moisés chimbese si. ¹¹ Moisés chimbese que siqui bei sacua eã nda. Jesús cheê yasu quia siqui bei sacua nde. Nyebe Jesús cheê yasu enininya tuchi Moisés chimbese si re.

¹² Jesús cheê yasu ra siqui bei. Ñuqui nandeicuate quia ã. Nyebe ureico nguiã ñee tuchi jêje ã. Mbae mbuchecua tuchi jêje. ¹³ Moisés rã eã ño ureico nguiã ure ã. Moisés que nguba chatite quia aque mose ra. — I nda judíos mae eã seruba nininya que rese, i. ¹⁴ Judíos que Moisés chimbese icuayate quia ra. Namu abe eicuayate. Emo leer i

mose Moisés chimbese je judíos je, icuayã mbeite. Ae siqui Cristo rese nae, ùquĩ mĩ ño Moisés chimbese icua nguiã. ¹⁵ Namo abe judíos Moisés chimbese icuayãte quia ã. Emo leer i mose ee, echecuayã mbeite riqui ee ã. ¹⁶ Emo uba mose Jesús rese, Moisés chimbese abe ra echecuate ee cote. ¹⁷ Jesús si rei Espíritu Turã. Nandeico mose Espíritu Turã ndese, ae chõ nandembui mingo nguiã Moisés chimbese si ã. ¹⁸ Nande Jesús icua mose, espejo rã ño nanderuba riqui nguiã. Jesús ruba nininya rã i i chõ nande re. Espíritu Turã abe siqui i i chõ nguiã nanderese. Nyebe nandeico i i nguiã Cristo rã ã.

4

¹ Dios turãte eriqui ure je co. —Jesús cheẽ yasu jẽsenei senei mbei mbia je, i Dios quia ure je co. Nyebe ureico nguiã ñimondocho ãte echeẽ nenei nenei mbia je ã. ² Mbae icuã asaã saã nyecuayã eãte quia co. Ae aba ireĩte riqui nae, ùquĩ asaã saã eãte quia co no. Mbia ambĩrĩ irĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui si tuchi chõ aico nguiã erenei nenei co. Dios résaa chõ aico nguiã erenei nenei co. Secheẽ ñooñoa mbia icuate raque quia uchiangui re ùquĩ. ³ Ae asenei senei mbeite quia Jesús rĩ nae, echecuayã eã ño ùquĩ nde. Ae ra nyoĩ tata cuasu nae, ùquĩ mĩ je chõ echecuayã nde. ⁴ Jesús icua eãte quiatu nguiã. Nyebe aba checuayã nderecua riqui nguiã embaaracuayã Cristo cheẽ turã nĩ co. Nyebe eriqui nguiã Cristo nininya icuayãte co. Dios rã tuchi rei Cristo. ⁵ Se mbia mbaaquiutu quiatu mose, serĩ eã ño aico nguiã ñee ee. Jesucristo rĩ ño ñene. Ae rei mbia rerecuarã tuchi. Jenimba rã ño aico

nguiã Jesús rĩ se co. ⁶ Dios que nyaashĩ saã nyii ra. Itondaru beire nyii. Ae sí que nandembaaquiutu quiatu Jesucristo rĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã si.

Dios ae rese aico co, i ñi Pablo re

⁷ Ure ae urenininya eãte raque. Tuchu achõ na ño ureico nguiã Jesucristo nininya siquĩ mose urerese. Dios ae chõ uquirãcuã mee nguiã ure je co. ⁸ Mbae icuã tã i bei beite raque ure je. Urechimondocho eã mbei rae. Mbae aba mbecoteã chũchĩte raque. Urehui eã mbei ra Jesús si. ⁹ Mbia siqui icuã icuãte raque ure je. Dios quia hui ãte nguiã uresi co. Mbia urerirĩrõte raque. Urembui eã mbei quia nda Dios si re. ¹⁰ Sã mbia icuã icuã ndiqui Jesús je cose no. Sã eiquia no. Eĩ si chõ mbia nguiã ureiquia serĩ serĩte ã no. Mbia mae sacuã Jesús quirãcuã ndese chõ ùquĩ nde. Ae quera si nae, aque quirãcuã ndese mae sacuã ño ùquĩ nde. ¹¹ Ureico raque ure ã. Mbia ureiquia serĩ serĩ mbeite quia Jesús rĩ ã. Jesús quirãcuã siqui sacuã urerete quirãcuã nea ndese chõ ùquĩ nde. Mbia mae sacuã Jesús quirãcuã ndese chõ ùquĩ nde. ¹² Uremano serĩ serĩte equia ã. Jẽingo turã sacuã Jesús rese chõ ùquĩ nde. ¹³ Sã embesa ji ñee no: “Dios icuare chõ aico nguiã ñee”, sã i no. Eĩ si chõ ure no nde. Dios icuare chõ ureico nguiã ñee. ¹⁴ Sã Dios quirãcuã Jesús raaque mbuquera no. Eĩ si ra Dios nandembuquera Jesús rĩ nande abe. Ae ra nandemingo turã ja ujii cote. ¹⁵ Seje mbae icuã icuã mose, jemingo turã sacuã ño ùquĩ nde. † nda Dios uturã mee mbia tubiriã je. † nda mbia tubiriã gracias i tuchi Dios je. Dios iate mbia ùquĩ naa mose.

¹⁶Nyebe ureico nguiã ñimondocho eã mbei. Urerete si raque quia ngoite qui cote. Urechimbiasu i i chõ nguiã urechiangui re ã. ¹⁷Ae rasi uresaã nguia ã nae, ùquĩ ndasi ra ua jei chõ. Ùquĩ ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote. ¹⁸Ae rese nandeico mae mbae nae, ùquĩ nda ua jei. Ae rese nandeico mae eãte nae, ùquĩ nguia ra ua eã mbei. Nyebe ureico nguiã ndua mbae nandemae sayã ndese.

5

¹Sã tuchua riqui shii jeite no jẽ. Eĩ si chõ nanderete no nde. Mano jei. Mbia serete iquia mose, tuchua ao ji mo ñi ibate seraarõ arõ pe. Dios chisaã ño hue re. Hue tuchua ra shii eã mbei. Mbia chisaã eã ño ñene. ²Tuchua mo na ndei nanderete. Shii jei. Co serete rerequia mose, aico jiabute co. Co aico oso sete sechuchua ibatenda rea co. ³I nda serete yasu areco bei pee ibate. ⁴Tuchua mo na ndei nanderete. Co serete rerequia mose, aico jiabute co. Seya eãte aico co. Semano sereãte raque. Serete yasu quia areco sete nguiã. Mbae yasu ja ra aque mose seje cote. Amanoa mbei ra aque mose cote. ⁵Ùquĩ je chõ ngue Dios sererecoquiatsu nguiã. Semingo turã mbei ra cote. Nyebe Espíritu Turã mondo nguiã seje. Sembiirandu sacua ùquĩ ndese. Dios Espíritu Turã mondo mose seje, umbae marca mii naanguia serese chõ ùquĩ nde.

⁶Nyebe aico nguiã ñimondocho eãte co. ã nanderete rerequia bei mose, eĩ nda nandesos aroneate rei ibate siqui Jesús rese. ⁷Aico beite Dios icua co. Amae ãte raque erese. Ae rese nandeico mae nae, ùquĩ ndese aico ãte co. ⁸Nyebe aico nguiã ñimondocho eãte co. Co serete ajea bite raque oso sacua ibate

siqui bei nonde Jesús rese. ⁹Ae Dios bite nae, ùquĩ asaã sete quia ee co. Dios seisi turã nonde chõ ùquĩ nde. Aa seico mose. Pee ibate seico mose abe no. ¹⁰Cristo resaa ra nandecu ja emo mose. Ae nanderea sacua. Nandeicua sacua. Ae mbae turã saã saã nguia siqui mose íbii nae, Cristo ra mbae turã mondo ùquĩ je pee cote. Ae mbae icua saã saã nguia siqui mose íbii nae, ùquĩ je ra Cristo mbae icua mondo

Dios ae nandemingo turã nguiã uchiese Jesucristo rã co

¹¹Aba siquichesa tuchi cho Dios re, mbia siqui eã mose erese. Nyebe ureico nguiã mbia mbuti mbuti tuchi co. Dios riqui ureicuate co. Jẽ abe jẽingo ureicuate ùquĩ ndenoae. ¹²ã ureico urecuas raã naa si ãte raque ã. Jembia sacua ño ureico nguiã ñee urerĩ sí ã. I nda jeñee aquiatsu mbia icua ñee ndibishorõ. Ae uturã saã ñooño nguia nae, ùquĩ ñee ndibishorõ sacua ño ñene. ¹³Urearacuayã mose, Dios cheẽ ndese siqui sacua ño ñene. Urearacua mose, jembaaquiatsu sacua ño ùquĩ no nde. ¹⁴Sã Cristo nyesecua tuchite nanderese no. Ae chõ sembuti mbuti nguiã co no. Cristo que mano nande ja je ra. Nyebe nande abe nandemano ja nguiã erese. ¹⁵Cristo que mano nande ja je ra. Ae nandebite riqui nae, ùquĩ ndese nandeico eã sacua ño Cristo mano nguiã. Ae Cristo bite riqui nae, ùquĩ ndese nandeico sacua nguiatsu ngue Cristo mano nguiã. Nande je que Cristo mano nda. Nande je que Cristo quera si no nda.

¹⁶Jesús quiatoã na eã ño ureico nguiã mae mbia rese ã. Urechese-cua chõ nguiã mbia rese ã cote. Urechese-cua eãte raque Cristo rese nyii. ¹⁷Emo ñimbucha mose Cristo rese, mbia yasu rã ño ùquĩ cote re. Ae esaã saã nguia mbae icua

nyii nae, ũquĩ si que hui ja cote ra. Mbae yasu ja chõ ee cote re. ¹⁸ Dios ae ũquĩ saã ja nguiã nande je co. Dios ae nandemingo turã nguiã uchiese Jesucristo rĩĩ co. — Mbia emingo mingo bei serese sequia torã jẽ, i que Dios seje ra. ¹⁹ — Sã mbia sequiatorã ja, i que Dios Cristo rĩĩ nda. Ũquĩ je chõ ngue Cristo mano nguiã. Mbia icuã mbutiã sacua esi chõ ngue Cristo mano nguiã. — Mbia emingo mingo bei serese sequiatorã jẽ, i que Dios seje ra. ²⁰ Cristo chõ sembuchẽ nguiã co. Secheẽ ae eã ñene. Dios ñee na jẽje chõ aico nguiã ñee jẽje co: Dios quiatorã ño jẽingo jẽ. ²¹ Mbae icuã mo ngue Cristo saã eãte rei ra. Dios que mbae icuã naasa saã tuchi ee ra. Dios nandemingo turã mbei sacua ño ũquĩ nde. Sã Dios nandemingo turã mbei nandeico mose Cristo rese no.

6

¹ Dios resenda chõ ureico nguiã Dios cheẽ nenei nenei ã. Dios turã jẽisi chooñoa ño nguiã jẽ. Jẽisi tuchi quiatu jẽ. ² Eĩ ngue embesa ji hui Dios cheẽ nda:

“Jeñee mose seje, jeñee ngue achandu ra.

Aendirõ ngue mbae icuã si ra”, i que Dios mbi a je cose ra,

i ñi embesa ji re. Namo ño Dios riqui nguiã aba cheẽ anduse co. Namo ño Dios riqui nguiã mbia rirõse eicuã si co no. ³ ã ureico mbia mo mbĩĩrĩ irĩ eãt e ã. I nda mbia urecheẽ andu turã Jesús rĩĩ.

⁴ Mbae uresaã turã sete quia ure ã. — Dios rimba turã ño ũquĩ nde, i nonde mbia ure rĩĩ. Nyebe ureico nguiã ñimbirãcuã tuchi mbia icuã mose ure je ã. Mbae tiã mose abe ure je. ⁵ Ureiruã nua ngue equia ra. Uretarõ tarõ mbei que equia ra. Ureecoteã mbei que eriqui ra. Ureque reã tuchi que equia ra. Uteriãcuã tuchi que eriqui no nda. ⁶ Ũquĩ icuã eĩ eĩ mose

ure je, ureico turãte que equia ra. Ure que Dios ureicuate quia ra. Urechimbirãcuãte que equia ra. Ureico turãte que equia mbia je no nda. Espĩritu Turã ngue siqui tuchi urerese no nda. Urechesequa chooñoa ngue equia mbia rese no nda. ⁷ Dios cheẽ ichoĩñoa reã ngue uresenei senei tuchi quia mbia je ra. Dios quirãcuã ngue siqui tuchi quia urerese ra. Ae uturã Jesucristo mee nguia ure je nae, ũquĩ mĩĩ ño urereaquiato bei nguiã co. ⁸ Emo emo mose mbia riqui ñee turã urerĩĩ ã. Emo emo mose mbia ñee icuã urerĩĩ no. — Aba mbĩĩrĩ irĩsa, i tuchi que mbia quia ure je emo emo mose no nda. — Ae bei jẽ! i tuchi que equia urecheẽ je emo emo mose no nda. ⁹ Mbia riqui ureririrõ ndirõ emo mose ã. Emo emo mose eriqui ureisi turã turãte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no. ¹⁰ Ureya eãte raque. Dios rese quia ureyate re. Mbaecha reã ndaque ure no. Mbaecha que uresaã uquia tuchi mbia je ra. Mbae eã tuchi raque urembae. Dios rese quia urembae tubiriã tuchi re.

¹¹ Urecheẽ nyecuate que jẽje ra. Urecheẽ ngue jembĩĩrĩ irĩã tuchi quia ra, Corinto jenda. Ureico nyesecua tuchi jendese a. ¹² Ure que urechao eã jẽsi ra. Jẽ nguiatu ngue jenyao nguiã ure si. ¹³ Sã mbia mo ndiqui ñee nguiĩrĩ je no. Eĩ ae chõ nguiã ñee jẽje. Jendu rã ño aico nguiã jẽje. Jenyesequa tuchi chõ nguia serese. Sã aico nyesequa jendese no.

Dios chuchua tuchi chõ jendete re

¹⁴ Dios quiatoã ndese ra jeñimbuchachĩ jẽ. Dios quiatoã na eã ño jẽ nde. Sã mbae turã ndiqui mbae icuã mbiroã no. Sã nyaashĩ ndiqui itondaru mbiroã no. ¹⁵ Sã Cristo riquiã Satanás ndese no. Eĩ

si chõ Cristo quiato siqui aroneate nguiã Cristo quiatoã ndese no. ¹⁶ Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ùquĩ. Sã Dios ñee ã no: Erete ye ra aico. Ererecuarã nda se. Mbia ra siqui serui, sã i Dios no. ¹⁷ Dios cheẽ ño ã no nde: Jêhui chõ mbae icuã si. Icuẽ jêingo. Mbae icuã ndese ra jêocochĩ. Jaẽisi turã nda se chã. ¹⁸ Jendurã nda se chã. Seriirina nda jê ña. Sequirãcuãte se, i que Dios cheẽ mbesa ji ra.

7

¹ Dios cheẽ ño ã nde. —Aico bei ra jendese, i que ra. Nyebe nan-dehui mbae icuã si ñimbitirõ mbei. Cochee chõ nandeico Dios je. Nandereco nandemee tuchi ee.

Seyate aico jendese co cote, i ñi Pablo re

² Ureisi turã ño jê. Mbae icuã mo ngue uresaã ãte jemo je ra jê. Ureico que equia jembĩrĩ irĩ ãte ra jê. ³ Jêicuã i sacuã eã ño aico nguiã ñee jêje. Achesecua tuchite quia jendese co. Semano mose chee. Sã ñi acheẽ jêje nyii no. ⁴ Seyate aico jendese co. Secheẽ nda emumbayã, aete se quia jenii co. Mbia icuã icuã mose seje, seyate aico jendese co.

⁵ Urechu que aa Macedóniaa, aque mose bei que urerecteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi ãte rei quia ra. ⁶ Dios que sechiã mbocoi Tito ngasẽ mose cote ra. Sã Dios riqui uquiato mbia beite eya eã mose no. ⁷ Tito mii ndese eã ño seya re. Seya tuchi que sembiirandu mose jendese no nda. Jê nane ngue jeñee Tito mbirãcuã nda. Aquere que Tito ru sembirãcuã

cote ra. —Hue echi ndua tuchite nderese huee, i que u ñee seje ra. Nyebe seya tuchite riqui nguiã jendese. Jêtesarei eãte quia equia sesi reaẽ. ⁸ Ae ambesa mondo jêje nyii nae, ùquĩ ngue jembia eãte rei ra. Erea ramo mose. —Amondo jirichĩ nguia, ae rei que se quia nyii ra. —Amondo jirichĩ nguia, ae ãte se quia co cote. ⁹ Seyate aico jendese co cote. Jêya eã nii eã ño ñene. Jeñimbitirõ nguiatu ngue re. Maende sechimbesa rese. Sechimbesa jembia eã mose jêicuã ndese, Dios rese que jendua cote ra. Sechimbesa chõ jemingo turã nguiã cote. ¹⁰ Emo ia eã ñooño mose huiicuã ndese, ùquĩ nda nyoĩ tata cuasu. Emo ia eã tuchi mose huiicuã ndese, hui ra huiicuã si cote. Dios ra emingo bei cote. — Ahui jirichĩ nguia seicuã si, iã tuchi rae. ¹¹ Sechimbesa oso mose jêje, jêya eã tuchi que jêicuã ndese ra. Nyebe Dios ia tuchi riqui nguiã jendese. Jendua tuchi que ra. — Mbae icuã ngue uresaã eãte resẽ, jenye eãte que ra. Mbae icuã ndese que jemaẽ sereã tuchi cote ra. Jêireĩ ireite que equia mbae icuã si ra. Jemaẽ sete que equia serese ra. Ae siqui ngu ninisi rese nae, aque que jemombo cote ra. Mbae que jêsaã turã jate ra. Eicuãte i aroneate que emo nguia jêje ra. ¹² Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jê ja je chõ ngue ambesa mondo nguiã. —Pablo riqui nyesecua tuchichĩ nanderese, i ja nonde chõ ngue ambesa mondo nguiã. ¹³ Nyebe ureya tuchi riqui nguiã jendese co cote. Jê ngue Tito abe jembia cote ra. Jê hui mose mbae icuã si. Seirandu mose ùquĩ ndese que seya tuchi se abe cote ra. ¹⁴ Sã ñi aico jêturã nenei nenei Tito je nyii no. Eĩ jenye si tuchi equia siqui turãte ùquĩ. Nyebe seireĩ nguiãte

riqui nguiã ñee jenî ãquĩ. Acheẽ ñooñoa ngue jêturã nî Tito je ra. Sã aico ñee ñooñoa emo mose jêje no. ¹⁵ Tito riqui nyeseuca i ite jendese co. Ndua beite equia jendese co. Echeẽ nguiatu que jemumbayã tuchi quia ra. Cocheete quiatu que jêingo ee ra. Jêisi turâte quiatu que equia ra. ¹⁶ —Ũquĩ nda siqui tuchi Dios rese, ae tuchi se quia jenî co. Co seyate aico jendese co.

8

Jembae jemee jiri quia Dios je

¹ Jesús quiato Macedonia jenda tasenei jêje cote, Seresenda. Hue jenda ja iglesias. Dios turã tuchi que eriqui ãquĩ ja je ra. ² Mbia icuâte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guia Jesús quiato je ra. Mbaecha rã tuchi mbae mondo mbia je. ³ Umbae que emee tuchi ra. Embae tubiriã eã ndaque. Abei tuchi quiatu ngue re. Amae ngue erese ra. ⁴ —Ure abe ra urembae uremee tuchi Jesús quiato je, i tuchi que seje ra. ⁵ Mbaechõ eã ngue emee Dios je ra. Nguete rane ngue emee ee ra. Ure je abe que ngueco mee nda. Mbae turã naa naa mbei sacua ure je Dios ri. Aquere que umbae mee tuchi Jesús quiato je cote ra. ⁶ Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacua. Sã Tito ñee nyii no. —Tamunua nua ja, sã i no. ⁷ Sã jêingo Dios icua tuchi no. Sã jêingo Dios cheẽ icua jate no. Sã jêaquiatute mbia mbaaquiato no. Sã jêingo sete riqui Dios cheẽ ndese no. Sã jêingo nyesequate serese no. Nyebe jembae jemee tuchi quiatu ofrendarã cote.

⁸ —Secheẽ nguire quiatu jembae jemondo Dios je, ae âte se quia co. Jê ae chõ jendua mbae

mee nonde. Jesús rese jenyeseuca tuchi mose, jembae ra jemee mee Jesús quiato je. Sã Macedonia jenda umbae mee mee Jesús quiato je no. ⁹ Nanderereuca tuchi chõ Jesucristo re. Jesucristo turã jêicuate quia ãquĩ. Mbaecha tuchi rei que ae ereco mose ibate ra. Mbaecha reã ngue esaã tuchi u íbii nande je ra. Erĩ ño Dios riqui nguiã mbae mondo tuchi nande je. Ae mbaecha reã naa mose u íbii. ¹⁰ Tacheẽ tuchi rã jêje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jê nane ngue “ofrenda nandemondo” jenyê Macedonia jenda si ra. Cosete que jeñee ñee. Jemondo turã cote. ¹¹ Ae ra jemondo nae, ãquĩ ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae mii mose, co mii jemondo ee. ¹² Nande mbae mo meese mose, Diobi tuchi chõ ãquĩ nde. —Mbae tubiriã embu seje, iã nda Dios mbaecha reã je. ¹³ —Jembae jemondo ja tuchi mbaecha reã je, ae âte quia jêje co. ¹⁴ Sã jembae nyiabiã jiri mbaecha reã mbae rese. Sã jembae tubiriã namo no. Emee sacua ãquĩ je. Emo mose ra ãquĩ mbae tubiriãte no. Emondo sacua jêje jembae eã mose no. Ũquĩ mose ra jembae nyiabiã jiri ja cote.

¹⁵ Sã embesa ji riqui ñee no:

Ae mbae tubiriãte nae, embae rire eãte que ra.

Ae embae mite nae, embae que ua eãte ra,
i que embesa ji ra.

Tito ra nyoi jendea, i Pablo

¹⁶ Sã aico ndua tuchi jendese co no. Eĩ si tuchi Dios quia Tito mundua jendese co. Nyebe aico nguiã gracias ite Dios je co. ¹⁷ Tito si quia jendea aque. Secheẽ nguire

achõ eã esi nguiã jendea aque. Ae abe que ndua jendese ra. ¹⁸ Tito rese Jesús quiato mo amondo quia jendea aque. Jesús quiato ñee turã jate quia aque riã aque. Jesús cheẽ nguiatu esenei senei mbeite nguiã aque. ¹⁹ Jesús quiato que aque irabo ra. Oso sacua serese. Ofrenda munua nua sacua serese. Sã ureico ofrenda munua nua Dios mbia sacua no. Mbia “abei” i sacua jêje. ²⁰ Ae que siqui beite urerese ofrenda isi isi mose ra. Mbia ñee icua eã sacua ure riã. “Ofrenda que embuquiachã nda”, i eã sacua mbia urerã. ²¹ Mbae uresaã turãse rete quia ã. Dios ia tuchi sacua ure rese. Mbia abe ñee icua eã sacua ure riã. ²² Uresenda mo abe uremondo quia ũqui ndese aque. Ae quiarei mbae raã naase bei Dios je. Oso sete equia jendea co. ²³ Tito rei seresenda tuchi. Siqui bei que equia serese Dios cheẽ nenei nenei mose ra. Ae nyoï quia jendea Tito rese nae, iglesias chõ emondo nguiã jendea ũqui. Cristo quiato tuchi chõ ũqui nde. ²⁴ ũqui jêisi turã ja chõ jê. Sã urecheẽ ee jenii nyii no. —Jêisi turã ndae. Nyesecua tuchi ra jendese, ure que ee nyii ra. Nyebe jêisi turã ño. Eĩ nda iglesias jenda ja abe “eturã” i jenii.

9

Jembae ofrenda jemunua ja rã emondo sacua mbaecha reã je

¹ Aete aico embesa eã jêje ofrenda riã. —Ae ae chõ nda mbae mo mondo nguiã Jesús quiato je, se ñee mose rocoi ee, ae que se ra. ² Jê ae chõ mbae jemondose nguiã Jesús quiato mbaecha reã je ũqui. Jenii ño aico nguiã ñee Macedonia jenda je co. —Tenda nongue mosenda bei chõ Acaya jenda riqui nguiã mbae mondose Jesús quiato je ũqui, ae se quia Macedonia jenda je jenii co. Nyebe ũqui abe riqui nguiã mbae mee sete ee cote. Jirandure jendese. ³ Aque

mbia amondo quia jendea aque. Jê icoquiato sacua. Mbae jemondo sacua Jesús quiato mbaecha reã je. Ureireite ra jê ofrenda mondo eã mose se ñeende jenii nyii. ⁴ Seso mose jendea, Macedonia jenda mo abe ra nyoï serese reae. Jê ofrenda munua eã mbei mose, ureireite ra urecuasẽ mose hue. ⁵ Nyebe ã nane amondo nguiã jendea aque. Jembae ofrenda munua ja sacua. Ae riã jêñee ndei tenda nongue mose. —Ofrenda jemunua na, ae bei sereãte se. Jê ae chõ ofrenda jemunua nua, jenyesequa mose mbia rese.

⁶ Jendua rã ã ndese: Ae mbae mii jiri chitiquia quia, aque ra mbae a ucua mii jiri. Ae mbae chitiquia tuchi quia, aque quia ra mbae a ucua tuchi. ⁷ Mbae ata nandemondose mose nandechiangui re, mbae ata nandemondo chõ. Mbae mii nandemondose mose nandechiangui re, mbae mii nandemondo chõ. —Mbae amondo jirichĩ, nande mose nandechiangui re, eicuãte ũqui. Ae eyate riqui umbae mee mose emo je nae, Dios bite ũqui. ⁸ Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacua nandesĩ. Mbae nandemondo mondo bei sacua Dios quiato mbaecha reã je. ⁹ Sã embesa ji riqui ñee no:

Mbae que Dios quiato mondo mondo bei quia mbaecha reã je ra.

Echisaã turã si ra mbia tesarei eã mbei,

i que embesa ji ra. ¹⁰ Dios chõ mbae eĩ mondo nguiã nande je etiquia sacua. Dios chõ mbae mondo nguiã nandechiurã no. Dios chõ “jabei chõ jê jê!” i nguiã nande je. Dios chõ mbae mee nguiã nande je emondo sacua mbia mo je. ¹¹ Dios ra mbae mondo tuchi jêje. Eĩ nda jê mbae jemondo tuchi ofrendarã. Se jeñimee ofrenda mondo mose

mbaecha reã je, gracias i tuchi ra Dios je cote. ¹² Nande mbae mo mondo mose Jesús quiato mbaecha reã je, quiaru turã jiri ra equia cote. Ûquiño eã nda esaã nguia. Gracias i abe ra Dios je. ¹³ Jẽ mbae mo mee mose Jesús quiato mbaecha reã je, mbaecha reã nda ñee turã Dios je jeni cote. —Cristo cheẽ emumbayã tuchi quia ã, i ra jeni cote. —Eriqui mbae mee tuchi chĩ mbia ja je, i ra ñee turã jeni cote. ¹⁴ Mbaecha reã nda ñee tuchi jeni Dios je cote. Dios jendeaquiato sacua. Mbaecha reã nda ndua tuchite jendese cote. Jẽ mbae mon-dore ee nyii. ¹⁵ Dios quiatu que mbae turã tuchi mondo nande je ra. Nyebe nandeico nguia gracias i ee.

10

Mbia mbaaquiato sacua ño Dios semĩ nguia

¹ Se rei Pablo. Tacheẽ nyecua jẽje. Nandeico mingue chõ nguia Cristo rã si jẽ. Cochee chõ nandeico Cristo rã si jẽ. —Cochee chõ Pablo riqui nguia siqui mose nanderese. Siqui eã mose nanderese, ucuasu esaã saã ño nguia aque, jenyẽ chõchĩ equia seriĩ ùqui. ² Mbae jẽsaã turã turã ja chõ nguia. I nda acheẽ asi asiã jẽje seso mose jendea. Emo emo ñee icua ño nguia seriĩ. —Dios je eã ño Pablo riqui nguia mbae raã naa, i seriĩ. Ûqui je quiatu acheẽ asi asi arõte nguia. ³ Mbia chõ ndaque se. Mbia quirãcuã je eã ño aico nguia mbae raã naa co. Dios quirãcuã je chõ aico nguia mbae raã co. ⁴ Sequirãcuã je eã ño aico nguia mbae raã. Dios quirãcuã je chõ ñene. Nyebe aico nguia mbia icua ndiquisã quisã co. Mbia icua quirã cuãteraque. ⁵ Ae mbia mundua icua icua nguia Dios rĩ nae, ùqui asiquisã quisã ño nguia co. Mbia amundua turã ja quia Cristo rĩ co. Cristo cheẽ mumbayã

sacuã cote. ⁶ Jẽ nane Dios cheẽ jemumbayã na jẽ. Aquere ra Dios cheẽ mumbasa amombo ja cote.

⁷ Mbia chiangui renda rese jemaẽ ate. Earonda rese chõ jẽingo nguia mae. —Cristo mbae chõ se re, i mose emo, ae mii eã ño Cristo mbae re. Se abe chõ ñene. ⁸ Se ecuasú raã naa mose, seireĩ ngũiate. Dios quiatu ngue semĩ nguia ererecuarã. Jembaaquiato turã sacua ño ngue Dios semĩ nguia ererecuarã. Jembĩcuã sacua eã ño ñene. ⁹ Jaembusiquiche sereate sechimbasa je. ¹⁰ Mbia ñee icuate raque seje. —Pablo reco mose isho, ñee asi asite equia ucheẽ mbesa mbesa mondo nande je co, i jemo nguia seriĩ ùqui. —Siqui mose nanderese, ererecu raã naa aquiataate cote, i jemo nguia seriĩ ùqui. ¹¹ Ae ñee nguia ùqui nae, ùqui je tacheẽ. Co secheẽ asi asi ambesa mondo quia jẽje aque nae, anyae sí ra ñee asi asite seso mose jendea huee. Secheẽ mbesa ji ra achabiã seso mose jendea huee. ¹² Ae ñee mbeite quia uturã nĩ, ùqui na eã ño se re. —Aque rã si chõ aico nguia se co, i beite equia ùqui. —Seturãte aico aque si co, i beite equia ùqui no. Ûqui ñee mose ùqui, earacuayãte riqui ùqui.

¹³ Seturã nda asaã saã eã. Dios ae chõ “hue eso, pe eso”, i nguia seje co. Ae chõ ngue semondo nguia jendea. ¹⁴ Se rane ngue Dios semondo jẽje Cristo cheẽ nenei nenei sacua nda. Nyebe hue jenda ja sembaerã, se embaaquiato sacua Dios cheẽ ndese. Ae Dios riqui “hue eso” i ate seje nae, huee ra asoã. ¹⁵ —Sechimbaaquiato chõ ùqui nde, ae aronea tuchite quia emo ñimbaaquiato je co. Jẽ Cristo icua i i tuchi mose, jendobeinda quia ra ambaaquiato i i tuchi oso cote reae. ¹⁶ Seso sete jendobei Cristo cheẽ nenei nenei hue jenda je. Sechimbaaquiato ae aroneate

emo ñimbaaquiato je. ¹⁷ Emo ñee turāse mose mbae mo ñi, sã Dios riĩ nguiatu ñee turã. ¹⁸ Ae uturã saã saã nguiā nae, Dios biāte ũqui. Ae riĩ nguiatu Dios riqui ñee turāte nae, ũqui nguiatu Diobi tuchi re.

11

Mbia mbaaquiato icuã icuãsa resera jẽingo chĩ

¹ Jeñimbirãcuã jiri se ñee mose jẽje jẽ. Seturã tasaã saã jiri ñee jẽje. ² Aqueteāte jendese jẽ. Dios mbaerã jẽ, ae que se ra jẽ. Sã acuanĩ mo ndiqui siquĩ eã mbei ngu mo ndese no. Sã mbia emee acuanĩdu mo je cote no. Eĩ tae si chõ jemee Cristo je. Cristo mĩ mbaerã nda jẽ cote chã. ³ Sã mbei Eva mbiĩrĩ irĩ cose no. Eĩ jenyẽ si arõte jẽ ndeae. Eĩ si arõ mbia jembũcha Cristo icha si. Jemundua icuāte chõ nda reae. Cristo mĩ ndese chõ jẽingo jẽ. Sã acuanĩ ndiqui ngu mĩ ndese no. ⁴ ¿Mbaerã jenyiisaquia turã mbia jembaaquiato icuã icuã mose re? Mbia Jesús abareã nenei nenei mose jẽje re. Mbia Espĩritu Turã abareã abe renei nenei mose jẽje re. Mbia Jesús cheẽ turã abareã nenei nenei mose jẽje re no. Se que ũqui asenei senei āte quia jẽje resẽ. ⁵ ũqui ñee ndese que jenyiisaquia, ¿mbaerã nda jenyiisaquia eã secheẽ abe rese re? Se quia Jesús cheẽ aicua tuchi quia ũqui si co resẽ. ⁶ Secheẽ turã eāt e raque. Seaquiature quia aico nguiã Dios cheẽ ndese co. Jẽingo seicuate ũqui ndesẽ.

⁷ —Mbae jemondo seje, ae āte que se quia Dios cheẽ nenei nenei mose jẽje ra. ¿Eicuāte ũqui nde? Aico minguate que se quia jẽje ra. Jẽingo turã sacua Cristo rese. ¿Eicuāte ũqui nde no? ⁸ Seico mose jendese jembaaquiato quiatu mose, mbae mo ngue jemee āte quia seje ra. Jesús quiato

ishonda quiatu que mbae mo mee mee nguiā seje ra, se siquĩ mose jendese. ⁹ Seico mose jendese que mbae jemondo eāte seje resẽ. Sembae eã mose que “mbae embu seje” ae āte jẽje resẽ. Jesús quiato que ngaẽ Macedonia si nae, ũqui nguiatu que mbae mee tuchi sembae eã mose resẽ. “Mbae embu seje” ae eã mbei ra jẽje. ¹⁰ Cristo riqui sechiangui re co. ũqui aicuate. Sebite “mbae embu seje” iã mose se jẽje. “Acaya jenda que mbae mee tuchi ndeje ra”, i aroneate emo seje jeniĩ. ¹¹ ¿Mbaerã ño mbae aisiã jẽsi chã? Achesequa eāte quia jendese reae. Tei. ũqui eã ñene. Achesequate rei jendese resẽ.

¹² Mbia ñee eã sacua nda mbae aisiã mbei jẽsi resẽ. Ae Jesús abareã senei senei nguiā nae, ũqui ñee eã sacua. “Pablo rã sí chõ ure re” ũqui i eã sacua. ¹³ Cristo cheẽ nenei neneisa turã eã ño ũqui nde. Mbia mbiĩrĩ irĩsa chõ ũqui nde. Cristo cheẽ nenei neneisa raã ñooño ño nguiã ũqui. ¹⁴ Satanás na sí chõ ũqui ndiqui nguiã ũqui. Satanás uturã saã saã ño nguiã. Angel turã naa naa ño nguiã no. ¹⁵ Ae siquĩ Satanás ndui nae, ũqui nda uturã saã ñooño Satanás na sí. Nyebe ra Dios ũqui mbutiã tuchi emo mose.

Pablo mbae rasi saã tuchi

¹⁶ “Earacuayã” jenyechĩ nda seje jẽ. “Earacuayã” jenyẽ raque seje, seandu rã se. Secuasú tasaã saã mbiĩrĩ na jẽje. ¹⁷ Ae aico ñee jẽje namo nae, Dios cheẽ eã ño ũqui nde. Earacuayã na ño aico nguiã ñee jẽje. Secuasú asaã saã ño nguiã ñee jẽje co. ¹⁸ Sã mbia riqui ucuasu raã naa jate no. Eĩ tae rã se abe secuasú raã naa jẽje. ¹⁹ Jẽaquiature rei jẽ ndeae. Jẽingo ñimbirãcuāte eaquiātuã je ũqui. Seaquiātuã je abe jeñimbirãcuã ño. ²⁰ Ae icuã icuã mbeite riqui jẽje nae, ũqui je jẽingo ñimbirãcuã mbeite ũqui. Jembuquieĩ quieĩ chooño

mose. Jembae mbutiã chooño mose abe no. Ucuasu raã naa mose abe no. Ucu mose jêsiba rese abe no. Ũquí je jêingo ñimbirâcuâte ũquí.
²¹ Se quiatu que ũquí asaã saã eâte quia jêje ra. Aico mingue chõchĩ jêje. Acheẽ asi asi eã ñochĩ jêje. Emo ucuasu raã naa mose, se quia secuasus asaã saã mbite nguiã esi. Earacuayã na ño aico nguiã ñee se co. ²² ¿Hebreos ũquí nde? Se abe chõ ñene. ¿Israelitas ũquí nde? Se abe chõ ñene. ¿Abraham nducucha riirĩ ũquí nde? Se abe chõ eno nde. ²³ ¿Cristo rimba chõ ũquí nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheẽ nenei nenei mose esi re. Se quia mbia seiruã nua tuchi nguiã esi. Se quiatu ngue mbia sematã matã tuchi nguiã esi. Se quiatu ngue mbia seiquia serĩ serĩ tuchi nguiã.
²⁴ Judíos que seiruã nua mbei quia ra. Treinta y nueve azotes bei que eriqui seiruã nua nda. Emo mose treinta y nueve no. Emo mose eĩ sí no. Cinco veces chee. ²⁵ Ira que euru uru serese tres veces ra. Emo mose que sei sei sita je ra. Tres veces que barco ñiimi ama ndiite re seje ra. Emo mose que aitõ ama ndiite re barco eã nda. Abebi chõ ngue sequia ra. Nyaashĩ mii abe que amumba quia mbei ra. Barco ñiimi mose seje. ²⁶ Acuata tuchi que sequia ra. Mbae icuã ngue seiquia arõ arõ tuchi quia ra. Secuata mose ama ndui. Seico mose abe sucha cuasu no. Seico mose turuquia rĩ no. Mbia mbae mbuquiachãsa que seiquia arõ arõ tuchi quia no nda. Seresenda abe que seiquia arõ tuchi no nda. Judíos eã abe que seiquia arõte no nda. Jesús quiato chooño abe que seiquia arõte no nda. ²⁷ Serisirõ ngue nyichuarõ arõ tuchi quia ra. Aqueã mocoĩ mocoĩ tuchi que se quia no nda. Seriãcuã mocoĩ mocoĩ tuchi que eriqui ra.

Seisei abe tuchi que eriqui ra. Nyi-iseĩ ngue airara mocoĩ mocoĩ tuchi quia ra. Seirao eã tuchi que eriqui no nda. ²⁸ Ũquí mii eã ngue ra. Jesús quiato rese abe que aico ndua ndua ra. Sã iglesia jenda ja ja siqui tuchi Jesús rese, ae beite sequia ndua co. ²⁹ Jesús quiato mo mbae rasi raã mose, se abe seya eã ndasite riqui erese co. Emo icuã icuã mose Jesús quiato mo je, se abe paama i rasite aico co.

³⁰ Sequirãcuã ndese eã nda seya riqui nguiã. Sequirãcuã nea ndese chõ nda seya riqui nguiã. ³¹ Acheẽ ñooño eâte quia co. Dios quia secheẽ icuate nguiã. Jesucristo ru chõ Dios re. Sã mbia riqui ñee turã mbei erĩ. ³² Aretas resenda que serequia rei Damáscuo ra. Seiquia sacuã. Ae que alcalde ra. Ae que mbia mondo rei eiquesa raarõ nda. Setarõ nda eña nde. ³³ Hue rĩ ngue asoã mbei ra. Mbia que sembuquichi imbu irairu ye ra. Ventana ni. Eĩ ae que oso chee mbia icuã si ra.

12

Pablo ibatenda tea cuu

¹ Secuasus asaã saã ñochĩ ngua co. Ae rese Dios semumae mae mbeite cuu nae, ũquí nguiatu tasenei jêje. ²⁻³ Cosete que Dios sererao ibate cuu ra. Hace catorce años. Serete resebe Dios sererao reae. Seaĩ achõ ere no ae. Aicuayãte se. Dios ae eicua nguiã. ⁴ Dios que sererao ibate ra. Huee que ibatenda cheẽ turã achandu ra. —Ae erechandu nae, ũquí nda ereseneichi mbia je, i que Dios seje ra. ⁵ Ibatenda cheẽ andure secuasus asaã saã arondete raque se. Sequirãcuã je ra secuasus asaã saã eã. Sequirãcuã nea ndese chõ seya riqui nguiã. Sequirãcuã nea mose quia Dios uquirãcuã mee tuchi nguiã seje cote. ⁶ Secuasus ra asaã saã ndaque, asaã ñooño eã ño se re. Dios quia que uquirãcuã mee seje ra. Mbae ja raã sacuã. Secuasus ra asaã saã eâte jêje. Jê ae chõ nda

jemae nguiã serese seicua nonde. Jê ae chõ nda secheẽ jeñandu nguiã seicua no. ⁷ Ae rese Dios semumae cuu nae, ùquĩ eturã tuchite seje. Ûquĩ ndese maende que aico secuasú raã naa arõte raque ra. Nyebe Dios nyu raanguia mondo nguiã sequi rĩ. Satanás sembecoteã sacuã. Dios semingo tochi sacuã. ⁸ —Nyu raanguia esiqui sesi, ae tuchi rei que Cristo je tres veces ra. ⁹ Cristo que ñee seje ra. —Coche rei ñene. Sã ñiño ndei. Seturã nguiatu amondo mbeite nguiã ndeje co. Ndequirãcuã nea mose quiatu sequirãcuã amee tuchi nguiã ndeje, i que Cristo seje ra. Nyebe seyate riqui nguiã sequirãcuã nea ndese co cote. Ûquĩ mose quia Cristo riqui nguiã uquirãcuã mee tuchi seje co. ¹⁰ Nyebe seyate riqui nguiã sequirãcuã nea mose. Mbia ñee icuã mose abe. Mbia icuã icuã mose seje abe. Mbae eã mose seje abe no. Se mbae icuã irara mose Cristo rĩ abe no. Ûquĩ ja mose seyate riqui co. Cristo quiatu uquirãcuã mee tuchite nguiã seje, sequirãcuã nea mose.

Jeñia jembitorõ se oso nonde jendea, i Pablo

¹¹ Sebiãte raque se sí ñee turã mose seriĩ. Jê nguiatu jeñee turã mbite raque seriĩ, mbia ñee icuã mose seje. Ae rui jẽingo nae, ùquĩ eaquiutu ãte riqui sesi ùquĩ. Seaquiutu eã ndaque se abe. Ae rui jẽingo nae, Jesús cheẽ mbuchecuasa chooño ño ùquĩ nde. ¹² Dios cheẽ mbuchecuasa tuchi chõ se re. Seico mose jendese. Aico minguite que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra. ¹³ Aico turãte que sequia jêje ra. Sã aico turãte iglesias ataque jenda je no. Eĩ si. Jê mii je chõ ngue “mbae jembu seje” ae eã

nguiã. Ûquĩ eicuãte jêje re? “Mbae jembu seje”, iã mose jêje.

¹⁴ Aico icoquiutu oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jêje. Mbae achosei chiãte jembae. Jesús rese jẽingo mose, ùquĩ mii ño achosei nguiã. Jendu rã ño aico nguiã jêje. Sã mbia riirĩ ndiqui mbae mo mondo mondo eã ngu je no. Sã eru chõ ndiqui mbae mondo mondo nguiirĩ je no. ¹⁵ Sembae amondo ja bite raque jẽingo sacuã Cristo rui. Sereco abe amondo bite raque jẽingo sacuã Cristo rui. Sechesecua tuchi mose jendese, ¿mbaerã jẽingo nyesecua eãte serese jê nde? ¹⁶ “Mbae jembu seje”, ae ãte que sequia jêje. Ûquĩ jẽicuate raque. ¿Mbaerã nguia jẽingo ñee ñooño nde? “Pablo que nandembĩrĩ irĩ nda”, ¿mbaerã jenye re? ¹⁷ ¿Mbaerã jeñee ùquĩ nde? Ae amondo jêje jembaaquiutu sacuã nae, ùquĩ abe que jembĩrĩ irĩ eãte resẽ. Ûquĩ ngue jembae isiãte sembaerã ndesẽ. ¹⁸ Tito que amondo jendea nanderesenda rese resẽ. Ae abe que jembae isiãte resẽ. Se rã si chõ ngue eriqui jêje resẽ.

¹⁹ Achiquisã eãte sequia jẽsi co resẽ. Dios résaa chõ aico nguiã ñee jêje. Cristo rĩ ño aico nguiã ñee jêje. Se mbae mo naa mose jêje, jẽingo tuchi sacuã Cristo rese chõ ñene. ²⁰ Seso mose jendea, sembia eã arõte. Ae sebite se, ùquĩ jẽsaã eã arõte seje. Ae jembite nae, ùquĩ asaã eã arõte se abe jêje. Jeñee icuã icuã nda jenyue serésaa reae. Jẽingo icuã icuã ja ra jenyue reae. Jenongue mbae ra jenyosei chosei jê sí chõ ndeae. Jenguasu ra jẽsaã ñooño sésaa reae. ²¹ Seso mose jendea ra Dios sembia eã tuchi se mae mose jẽicuã ndese reae. Seireite ra jẽicuã ndese mae mose. Jẽicuã cose ndare si jẽhui eã mbei chõchĩ namo

nyee. Ae jeninisiã nae, ùquĩ ndese jëingo bei chõchĩ ùquĩ. Ae jendu eã nae, ùquĩ ndese abe jëingo bei chõchĩ ùquĩ no. Mbae aba ireingua rese jëingo bei chõchĩ ùquĩ.

13

Hui bei Pablo saluda i mbia je

¹ Aso quia jendea aque cote. Co rei tres veces co cote. Emo mii sembiirandu mose mbae icuã ndese, achanduchõ nda se. Emo nyeremo ñee mose, aque mose quiatu ra echeẽ achandu cote. ² Ae eicuã saã saã nguia nyii nae, sã aico ñee asi asite ee nyii no. Ûquĩ sí je chõ aico nguia ã mbesa ã. Huiicuã ndecha eã mose ra achimbiracuã eã ee cote. Jë ja je chõ aico nguia ñee ùquĩ. Seico mose raanguia jendese. ³ —¿Ma Cristo quiracuã ndiqui Pablo rese ma nde? jenye equia nyii nae. Cristo quiracuã ndese ra jema secheẽ asi mose quiatu jëje cote. Cristo que mbae saã ja tuchi jëje uquiracuã je ra. ⁴ Cristo mbia mbucha quia ira rese iquia nyii nae, aque mose que equiracuã neate rei ra. Dios quiracuã nguia emingo bei nguia co cote. Sã Cristo quiracuã nea ndei nyii no. Eĩ ño urequiracuã nea ure namo nde. Ureico rei nguia erese co. Ae chõ uremingo nguia Dios quiracuã je co. Ae quiracuã je ra ureico jembaaquiату quiatu.

⁵ Jë ae chõ jendua. —¿Cristo aicua quia sechiangui re re? jenye ja ja chõ jeñiangui re. Jema nguia jenyiese sí. Jë Cristo icua chooñoa mose, Cristo riqui jeñiangui re ùquĩ. ¿Ùquĩ ndese jëingo iranuate re? ⁶ Ure quia Cristo ureicua chooñoa nguia ã. Ûquĩ ndese nda jëirandu rá seje chã. ⁷ Urecheẽ tuchi quia Dios je jeni ã. Jë mbae icuã naa eã sacua. Mbia ndua turã sacua eã ure riñ ño ureico nguia ñee Dios je jeni ã. Jë mbae icuã naa eã sacua ño ñene. Mbia ra ñee

icuã ndaque ure je. ⁸ Mbae icuã mo nandesaã aroneate Dios cheẽ ndobeishi. Mbae turã nguia tu nandesaã Dios cheẽ mose. Dios cheẽ nguia ichõño eã nde. ⁹ Coche mbia riqui nguia ñee icuã icuã ure je. Jë nguia jëingo bei Cristo quiracuã ndese. Jë nda Cristo jëicua tuchi rá seje chã. ¹⁰ Secheẽ asi asi ambesa quia seso nonde jendea a. Se ñee asi eã sacua seico mose jendese. Dios quiatu ngue uquiracuã mee nguia seje. Jembacuã sacua eã ño ngue Dios uquiracuã mee nguia seje. Jemingo tuchi sacua Cristo rese chõ ñene.

¹¹ Aico hui secheẽ mbesa mbesa si a cote, Seresenda. Jesucristo jëicua tuchi quia. Jëya bei tuchi jëingo erese. Jëingo turã mbei chõ nguia jenyiese. Ûquĩ mose ra Dios siqui tuchi jendese. Ae ra jemingo turã mbei jenyiese. ¹² Saludar jenye turã mbei quiatu quia jenyue. ¹³ Jesús quiato a jenda saludos mondo quia jëje aque. ¹⁴ Sã Jesucristo turã ndiqui bei jendese. Sã Dios riqui nyesecua tuchi jendese. Sã Espíritu Turã ndiqui bei jendese no. Amén.

LA CARTA DEL APOSTOL SAN PABLO A LOS GÁLATAS

Ilo ucheẽ mbesa mondo Galacia jenda je

¹ Pablo chõ se re. Jesucristo chi-irabo chõ se re. Mbia mo ngue seirabo eã nguiã. Dios ae chõ ngue seirabo ra. Ucheẽ nenei nenei sacuã. Ae sí que Jesucristo raaque mbuquera ra. ² Seresenda ja rese chõ aico nguiã ã mbesa jêje a. Jesús quiato Galacia jenda ja je.

³ Sã Dios turã ndiqui bei jendese. Sã ae riqui jembia bei. Nanderu chõ ae re. Sã Jesucristo turã abe riqui jendese. ⁴ Ae quiatu ngue mano nguiã nandeicuã ndibishorõ. Nandembui sacuã mbae icuã si. Ae icuã ndese nandeico mae mae nae, ùquĩ si. Nanderu cheẽ nguire chõ ngue Jesucristo mano nguiã nande je. ⁵ Sã mbia riqui ñee turã mbei Dios je. Amén.

Cristo mĩ mbia rirõsa huĩcuã si

⁶ ¿Mbaerã jẽingo hui hui jei Dios si ùquĩ nde? Ae sí chõ ngue “jẽingo Cristo turã ndese” i jêje resẽ. ¿Mbaerã jẽingo Cristo cheẽ abi abi re? Siqui emo ñee ndese re. ⁷ Nyeremo eã ño Cristo icha ñeenda re. Uturã mĩ je chõ Cristo riqui nguiã nandemingo bei. Nandechisaã turã je eã ño Cristo riqui nguiã nandemingo bei co. —Nandechisaã turã je ra Cristo nandemingo bei, i chõchĩ mbia nguiã jêje ùquĩ. ⁸ Acheẽ se quia jêje nyii nae. —Uturã je achõ ño Dios riqui nguiã nandemingo bei co, ae se quia jêje nyii nae. Eĩ mbei chõ ñene. —Hue rĩ eã ño Dios icha re, i mose emo jêje, sã Dios ùquĩ mbasi tuchi. —Hue rĩ eã ño Dios icha re, se abe i mose, sã Dios sembasi tuchi se abe. Angel ibatenda abe mbasi

rae, ùquĩ ñee mose. ⁹ Acheẽ namo ngue jêje, ùquĩ taseneimbe jêje: —Nandechisaã turã je chõ Dios riqui nguiã nandemingo bei co, i mose emo, sã Dios ùquĩ mbasi tuchi. Ae acheẽ jêje nyii nae, ùquĩ abi tuchi chõ eriqui nguiã ñee ùquĩ. ¹⁰ “Sã mbia riqui turã seje”, ae ãte quia co. “Dios ae chõ nda seisi turã nguiã”, ae chõ nguiã co. “Sã mbia riqui turã seje”, se i bei mose, eĩnda Cristo rimba eãte rei se.

Cristo chimbaaquiatu chee que Pablor a

¹¹ Tacheẽ nyecua jêje, Seresenda. Dios icha asenei nguia jêje nae, secheẽ ae eã ño ùquĩ nde. Mbia cheẽ ae eã ño eno nde. Dios cheẽ ae chõ ñene. ¹² Mbia mo ngue esenei eãte seje ra. Jesucristo mĩ ño ngue esenei nguiã seje. ¹³ Jẽirandu que equia serese cose resẽ. Jesús icuayã mose se nyii. Seico mose judíos ramei ñee ndui. Siqui rocoĩ Jesús cheẽ ndui. Seicuã tuchite que eriqui Dios quiato je nyii ra. “Jesús quiato tambutiã ja tuchi”, ae que se quia aque mose ra. ¹⁴ Moisés cheẽ ndui que aico tuchi rei sem-buchechaa ja si ra. Seramei ñee ndui que aico tuchi rei quia mbia ja si ra. ¹⁵ Aquere que Dios seisi Jesús quiatorã cote ra. Dios que seirabo cose seã mose nyii ra. Uturã je que seirabo ra. ¹⁶ Dios que nguiriĩ teacuquia seje cote ra. Se Dios ririĩ nenei nenei sacuã judíos eã je. “¿Mañi ae ra se re?” ae eã ngue oso ñee mbia mo je ra. Dios nguiriĩ ndeacuquia mose seje. ¹⁷ Jerusalén abe que asoã no nda. “¿Mañi ae ra se re?” ae eã ngue oso hue jenda Jesús chimbaaquiatu ñiinda je no nda. Arabia que aso jei se ae ra. Aquere que aso nyebi Damasco ra.

¹⁸ Tres años mose ramo ngue aso Jerusalén cote ra. Pedro rea que aso aque mose ra. Huee que aico erese quince días ra. ¹⁹ Jacobo abe rese que amae huee ra. Jesús

nongue que ae ra. Ũquĩ mĩ ndese que amae Jesús chimbaaquiatu ra. ²⁰ Acheẽ ñooñoa tuchi chõ nguiã ã mbesa jêje a. Dios secheẽ ñandute quia co. ²¹ Jerusalén ngue asecha oso Siria cote ra. Cilicia abe no. ²² Jesús quiato Judea jenda que seicuayã mbeite quia aque mose ra. ²³ Jirandu randuchõ ño ngue equia serese ra. “Ae icuã icuã ndiqui Jesús quiato je nyii nae, aque riqui Jesús renei nenei co cote. Mbia Jesús icua sacuã”, i que equia jirandu randu serese ra. ²⁴ Nyebe eyate riqui nguiã serese cote. Ñee turã turã Dios je.

2

Cristo chimbaaquiatu ataque Pablo isi turã

¹ Catorce años mose ramo ngue asobe Jerusalén cote ra. Bernabé rese. Tito abe que arao serese ra. ² Dios ae que “eso Jerusalén” i seje ra. Huee que acheẽ nyecuayã Jesús quiato rerecua ja je ra. Ae asenei senei mbeite quia Dios cheẽ judíos eã je co nae, ũquĩ nĩ ngue acheẽ ja Jesús quiato rerecua je ra. Ũquĩ secheẽ icua sacuã. Ũquĩ sembaaquiatu sacuã se Dios cheẽ abi mose. ³ “Circuncisión nandesã na Tito je”, i ãte que Jesús quiato rerecua quia ra. Judío eã ndaque Tito. ⁴ Jesús quiato chooño abe que chi hue Jesús quiato tuchi mumbara mbara ra. Ndua ndua rei que equia ra. Ure mbae icuã naa naa sacuã ndaque. “Sã circuncisión naa naa Moisés cheẽ ndui”, i rei que equia urerĩ nda. Ebiã tuchi que eriqui ureico mose Cristo mĩ ndese ra. “Sã eriqui judíos ramei ñee ndui bei”, i chõ ngue equia ra. ⁵ Ũquĩ ñee ngue uresiquisã tuchi quia ra. Jẽingo bei sacuã Dios cheẽ turã mĩ ndese. “Jesucristo turã ae nandemingo bei nguiã co”, jenye

sacuã. Jẽingo rocoĩ judíos rerecua cheẽ ndui. ⁶ Dios quiato rerecua que sembaaquiatu quiatu eãte mbae mo nĩ nda. “Ã abe esenei senei nguiã judíos eã je”, i ãte que ererecua seje ra. Dios quiato rerecua tuchi ũquĩ ndeae. Aicuayãte se. “Ererecua achõ ño taisi turã”, i ãte Dios. Nandechiã ndese quia eriqui nguiã mae ja. ⁷ Jesús quiato rerecua iate que serese ra. Se Dios cheẽ nenei nenei mose judíos eã je. Ererecua que ñee nyue ra. — Sã Dios Pedro mondo judíos je no jẽ. Dios cheẽ nenei nenei sacuã no. Eĩ si chõ Dios Pablo mondo quia judíos eã je re. Dios cheẽ nenei nenei sacuã ee re, i que ererecua ñee nyue ra. ⁸ Sã Dios Pedro mondo judíos je no. Dios sí chõ ngue semondo nguiã judíos eã je no. Se echẽẽ nenei nenei sacuã ee. Dios ũquĩ mingo bei nonde. ⁹ —Dios chõ Pablo mondo quia judíos eã je re, i ja que Jesús quiato rerecua ja cote ra. Jacobo. Pedro rese. Juan ndese. Nyebe eriqui nguiã seo isi isi. Bernabé o abe isi no. —Coche jẽingo nguiã Dios cheẽ nenei nenei judíos eã je. Ure Dios cheẽ nenei nenei mose judíos je, i que ñee turã ja ure je ra. ¹⁰ —Mbaecha reã je chõ jẽingo mbae mondo mondo, i mĩ ño ngue ure je ra. Ũquĩ ño asaã saã mbei rei nguiã co.

Pablo ñee asi Pedro je Antioquíaa

¹¹ Pedro tu mose Antioquíaa, acheẽ asite que ee ra. Mbae icuã nguiatu que esaã huee ra. ¹² Quiaru turãte que equia judíos eã ndese nyii ra. Aquere que judíos mo ngaẽ ngasẽ cote ra. Jacobo resenda. Pedro que quiaru sereã judíos eã ndese cote ra. Eireite que judíos si ra. Nyebe nyĩcuasẽ nguiã judíos eã si cote. Ucuasu raã naa esi cote. Judíos abe raque Jesús quiato. ¹³ Nyebe Jesús quiato judíos abe nyĩcuasẽ nguiã judíos eã si cote. Pedro rui sí. Ucuasu raã naa judíos

eã si cote. Bernabé abe chee que nyĩcuasẽ judíos eã si cote ra. Pedro rui si no. ¹⁴ Dios cheẽ ndui si eã ño ngue Pedro riqui nguĩã. Judíos nguesenda rese. Nyĩcuasẽ mose judíos eã si. Nyebe acheẽ asi nguĩã Pedro je mbiásaa. —Nde Jesucristo icua mose, erehui que judíos ramei ñee si cote ra. Judío raque nde. ¿Mbaerã ereico ñee judíos eã je re? “Judíos ramei ñee ndui jẽingo”, i ee re.

Judíos abe ra siqui bei Jesucristo icua mose

¹⁵ Judíos chõ ndaque nande. Judíos eã na eã ndaque nande. Mbia icuã na eã ndaque nande. ¹⁶ Emo mĩ siqui turãã mbeite quia Moisés cheẽ ndui si co. Dios emingo bei sacuã. Moisés cheẽ mumbasa ja tuchi chõ nande re. Jesucristo icua mose quiatu ra Dios nandemingo bei. Nyebe nandeico nguĩã Jesucristo icua ã. Dios nandemingo bei sacuã. Moisés cheẽ ndui si nandeico eã ndaque, ae que ee ra. ¹⁷ “Cristo que mano nandeicuã nii nda”, nande bei equia ã. ¿Ūquĩ ño nandembĩcuã nguia re? Tei. Cristo riqui nandembĩcuã eã mbei co. Cristo quiatu nandembĩirandu quia nandeicuã ndese co resẽ. ¹⁸ Se Jesucristo icua mose, judíos ramei ñee si que ahui cote ra. Se siqui si mose erui, eicuãte ūquĩ cote. ¹⁹ Moisés cheẽ ngue aicuate rei ra. Ūquĩ ngue seicuã mbutiã eã mbei ra. Moisés cheẽ sí chõ ngue sembiirandu Jesucristo rese cote ra. Jesucristo que seicuã mbutiã cote ra. Seico bei nonde cote. ²⁰ Cristo mano mose, se abe que amano erese ra. Se ae aicoã nguĩã co cote. Cristo riqui sechiangui re co cote. Equirãcuã je chõ aico nguĩã mbae rãã naa co. Dios riirĩ aicuate quia co. Ae chõ ngue nyesecua tuchi nguĩã serese. Ae chõ ngue mano nguĩã seicuã nii. ²¹ Dios turã aisiteã teã eãte quia co.

Moisés cheẽ mumbayã mose eã ño Dios riqui nguĩã aba icuã mbutiã. Ūquĩnde rae, Jesús manoño.

3

Moisés chimbese aba mingo bei aronea

¹ ¿Mbaerã jẽaquiatuã tuchi riqui re, Galacia jenda? ¿Aba jem-baaquiatu icuã tuchi quia Cristo rĩĩ nde? Cristo mano ngue asenei tuchi rei jẽje resẽ. Jẽisi turãte rei que equia nyii. ¿Mbaerã jẽingo hui serĩ serĩte esi cote re? ² Moisés cheẽ mumbayã mose eã ño Espíritu Turã ique nguĩã jẽñiangui re. Jẽ Jesucristo icua mose chõ ngue re. Se Jesucristo renei mose jẽje chõ ngue re. ³ ¿Mbaerã jẽaquiatuãte riqui re? Moisés chimbese que jẽicuã mbutiã eã ndesẽ. ¿Mbaerã jẽingo siqui beite erese re? Siqui rocoĩ Jesucristo mĩ ndese. ⁴ Mbae rasi que jẽsaã tuchi quia Jesucristo rĩĩ nyii resẽ. Jẽhui eã ño esi jẽ. I nda ae rasi jẽsaã nguia nyii nae, ūquĩĩru eã. ⁵ ¿Mbaerã Dios Espíritu Turã mondo jẽje chã? ¿Mbaerã ño Dios mbia mae sayã naa naa jẽje chã? ¿Moisés cheẽ jemumbayãte quiatu quia ee re? Tei. Ūquĩ eã ñene. Jẽ nguia Jesucristo jẽicuate nguĩã ūquĩ.

⁶ Sã Abraham no. Abraham ngue Dios icuate quia ra. Nyebe Dios Abraham isi turã nguĩã. ⁷ Nyebe Dios riqui nguĩã “Abraham nducucha” i huĩcuasa je co. ⁸ “Judíos eã abe ra Dios riirĩ icua. Ūquĩ abe ra Dios mingo bei”, i que embesa ji cose ra. “Nderĩĩ nda aico turã mbia ja je’, i que Dios Abraham je ra”, i que embesa ji ra. ⁹ Sã Abraham Dios icua tuchi no. Sã Dios turãte riqui ee no. Ae Dios icua quia namo nae, ūquĩ je abe chõ Dios turã ndiqui nguĩã Abraham ndese.

¹⁰ Sã emo ndiqui ñee no. “Moisés cheẽ ndui taico bei Dios semingo bei nonde”, sã emo ndiqui i no. Ūquĩ nda nyoĩ chõ tata cuasu. Sã

embesa ji riqui ñee no. “Emo embesa ji cheẽ mumba mbirĩ mose, echeẽ mumba tuchi raanguia chõ ùquĩ nde”, i que embesa ji ra. ¹¹ Dios ra ñee jiri jiriã emo nii. “Co que embesa ji cheẽ mumbayã mbei quia ra. Nyebe taisi turã”, i eã nda Dios emo je. Ae je Dios riqui “co taisi turã”, i nae, Dios icuate quiatu nguiã ee ùquĩ. Nyebe ra ùquĩ ndeco siqui bei. ¹² “Dios cheẽ mumba eã mbei mose quia ra Dios nandemingo bei”, i mose emo, Dios icuayã ño nguiã ùquĩ. ¹³ Cristo que nandembui Moisés cheẽ si cote ra. Nande Moisés cheẽ mumba mose, ùquĩ nda nandemombo eã tata cuasu cote. Cristo quiatu ngue mbae rasi aba ireingua saã tuchi nguiã nande je. Sã embesa ji riqui ñee no. “Aba ireingua tuchi mae mose embucheseco ji ira resenda rese”, i que embesa ji cose ra. Jesús mbucha nonde ira rese. ¹⁴ Dios turã sacua judíos eã je chõ ngue Jesús mbae rasi aba ireingua saã tuchi nguiã. Dios judíos eã mingo bei sacua ño ngue re. Sã Dios turãte riqui Abraham je nyii no nae. Eĩ si sacua Dios turã judíos eã je chõ ngue eno nde.

Dios contrato saã Abraham je

¹⁵ Sã mbia mo ndiqui contrato raã emo je no. Sã firmar i embesa mii no. “Eĩ nguiatu”, i aroneate emo ee cote. Embesa jite quia cote re. ¹⁶ Eĩ si que Dios contrato raã Abraham je no nda. Abraham ndiirĩ je abe no. “Abraham ndiirĩ ja je”, i eã ngue embesa ji ra. “Abraham ndiirĩ je”, i chõ ngue ñee nguiã aque mii je. Cristo riĩ ño ngue ñee nguiã. ¹⁷ Tacheẽ nyecua tuchi rã jẽje. Dios que contrato saã Abraham je cose ra. —Mbae tasaã ndeje. Nderiirĩ je abe no, i que Dios Abraham je cose ra. Mbesa que aque mose ra. Aquere que Moisés ucheẽ mbesa cote ra. Aquere tuchi 430 años ua mose cote. Moisés cheẽ

ngue contrato mbutiã aroneate ra. Dios cheẽte quiatu ngue contrato re. ¹⁸ Dios que ñee Abraham je cose ra. —Mbae tasaã ño ndeje. Nde mbae mo naa ndocoĩ seje, i que Dios ñee Abraham je cose ra. —Nde Moisés cheẽ mumbayã mose quiatu mbae tasaã ndeje, iã ngue Dios ee ra. —Nde mbae mo naa ndocoĩ, i chõ ngue ee ra. ¹⁹ ¿Mbaerã ño nda Moisés chimbese cheẽ nandechandu chã? Mbia huicua icua sacua ño Moisés chimbese re. Cristo tu mose chõ ngue Moisés chimbese cheẽ ua nguiã. Sã Dios contrato naa Abraham ndiirĩ je nyii no. Cristo je chõ eriqui nguiã “Abraham ndiirĩ” i. Dios rane ngue ucheẽ mondo ángeles je ra. Angeles que emondo Moisés je cote ra. Aquere que Moisés embesa mbia je cote ra. Mbia echeẽ mumbayã nonde. ²⁰ Sã Dios contrato naa Abraham je no. Ae sí chõ ngue ñee nguiã Abraham je. “Secheẽ esenei Abraham je”, iã ngue Dios emo mondo ñee Abraham je ra.

Nandeico Cristo icua ã cote; Moisés cheẽ ndui siqui rocoĩ

²¹ Ae contrato Dios saã Abraham je nae, Moisés chimbese ùquĩ mbutiã aroneate quia co. Moisés chimbese aba mingo bei arõ mose, eĩ nda Jesucristo manoate rei. Moisés chimbese aba mingo bei aroneate. Nandechiã abe mbitirõ aroneate no. ²² “Mbia icua ja chõ ñene”, i que embesa ji ra. Nyebe nandemo mbae mo turã naa aroneate siqui bei sacua. Jesucristo icuasa quia ra Dios mingo bei ucheẽ nguire. Jesucristo icuate quia ñene. Mbae mo naa ndocoĩ Dios je nyii.

²³ Cristo tu nonde que nandeico rei ñee nda. “Moisés cheẽ nandemumbayã” i rei ra. Moisés cheẽ ngue nandemumbayã aroneate quia ra. “Cristo ra tu” i que equia nande je, ùquĩ ño ngue nandesaarõ

arõ nguia ra. ²⁴ Mbia mbaaquia-tusa rã ño Moisés chimbese re. Mbia mbiirandu que Cristo rese ra. Mbia siqui nonde Cristo mii ndese tu mose cote. Cristo icua nonde. Dios Cristo icuasa isi turã mbei nonde cote. ²⁵ Nandeico Cristo icua ã cote. Nyebe ra nandeicoã Moisés cheẽ ndui cote. ²⁶ Nandeico Jesucristo icua jate ã. Nyebe Dios riirĩ ja chõ nande re. ²⁷ Nandembucha ji nandeico mose Cristo riĩ, Cristo rã sí chõ nandeico nguia ã cote. ²⁸ Nande Jesucristo icua ja mose, nyiabiã ja chõ nandeico nguia ã cote. Judíos ra siqui turã judíos eã je cote. Ererecua ra siqui turã ngũimba je cote no. Mbia ra siqui turã ja nyiese no. Aque mii na tuchi chõ nda nandeico ja nguia Cristo rese cote. ²⁹ Cristo icuasa chõ jẽingo nguia ãquĩ. Nyebe Abraham ndiirĩ abe chõ jẽingo nguia ãquĩ no. Ae turã nda Dios saã Abraham ndiirĩ je nae, jẽje chõ nda eraã nguia.

4

¹ Sã mbaecha riirĩ mo no. Sã mbae raã aroneate ae ae uñetẽ mose no. Erimba rã si chõ nda eriqui mbia cheẽ mumba eã. Mbaecha riirĩ ndaque. ² Ae rese eriqui ndua nae, ãquĩ ndese eriqui aroneate. Uraarõsa nduasa achõ ndese chõ nda eriqui. Ucuasu mose ramo ño nda eriqui ndua ae ae cote. “Co tasaã”, i cote. ³ Eĩ si chõ nande nyii re. Mbia riirĩ na si. Jesús tu nonde. Mbia cheẽ achõ ndui chõ ngue nandeico nyii ra. Jesús tu nonde. ⁴ Dios que “coche ñene” i cote ra. ãquĩ mose que nguiirĩ mondo mbia je íbii cote ra. Dios riirĩ ngue tu mbiarã nda. Moisés cheẽ ngue emumbayã mbei quia eico mose íbii ra. ⁵ Ae que tu nandembui bei Moisés cheẽ si cote ra. Dios nandererequia sacua nguiirĩ na cote. ⁶ Dios riirĩ ño nande cote re. Nyebe Dios Espíritu Turã mondo nguia nandechiangui

re cote. Nyebe nandeico nguia Paba i tuchi Dios je namo cote. ⁷ Dios riirĩ tuchi chõ nande cote re. Erimbachõ eã. Nyebe ra Dios mbae mondo tuchi nande je cote ucheẽ nguire.

Pablo ndua tuchi Jesús quiato rese

⁸ Jẽ ngue Dios jẽicuayãte quia nyii ra. Dios abareã ndese chõ ngue jẽingo aque mose ra. ⁹ ãquĩ jẽingo Dios icuate ãquĩ cote. Dios abe riqui jẽicuate co cote. ¿Mbaerã nguia jẽingo hui serĩte esi cote re? ¿Mbaerã nda jẽingo sí dios abareã nimbarã nde? Dios abareã quirãcuã eãte nyeresẽ. Mbae mo naa aroneãte nande je resẽ. ¹⁰ “Co tenda mbae mo nandesã Dios je Dios nandeisi turã sacua”, jenyẽ chõchĩ nguia ãquĩ. “Co nyasi mbae mo nandesã Dios je Dios nandeisi turã sacua”, jenyẽ chõchĩ nguia ãquĩ no. Eicuã tuchi chõ ãquĩ nde. ¹¹ Jaembaaquiatu quiatu iru chõ se reae.

¹² Se rã ño jẽingo ae. Sã aico eãte Moisés chimbese cheẽ ndui sí co no. Sã jẽ abe jẽingo eãte erui nyii no. Sã jẽicuã eãte emo mose seje no. ¹³ Se Jesucristo renei namo mose jẽje, serasite quiatu ngue se aque mose re. ãquĩ jẽicuate quia ãquĩ. ¹⁴ Mbae rasi que asaã tuchite rei aque mose ra. Serasi que jẽucuayã eãte quia aque mose ra. Serasi que jẽisiteã eãte quia aque mose no nda. Angeles que jẽsaã ño seisi turã aque mose ra. Jesucristo que jẽsaã ño seisi turã aque mose ra. ¹⁵ Seisi turã tuchi que se aque mose ra. Jendesa que jemondo bite quia seje aque mose ra. ¿Mbaerã jẽingo secheẽ isi sereãte cote re? ¹⁶ Dios cheẽ ngue asenei turã tuchi quia jẽje. ¿ãquĩ je chõ jẽingo seucuayãte cote re? ¹⁷ Ae riqui jembaaquiatu icua icuate ãquĩ nae, ãquĩ siqui sete raque jendese ãquĩ. Mbae turã nii eã ño ñene. Jembũcha

sacuã ure si chõ ñene. Jẽingo sacuã ùquĩ achõ ndese chõ ñene. ¹⁸ Coche rei ùquĩ siqui jendese Dios cheẽ nenei nenei turã mose jẽje. Sã eriqui jembaaquiatu turã turã mbei. Seicoã mose abe jendese. ¹⁹ ¿Mbaerã jẽingo sembia eã tuchi ùquĩ nde? Jẽhui serĩ serĩ mose Dios turã si. Sã ãquẽ ndasi riqui cuña je no. Eĩ ño seya eã ndasi nguiã jendese co. Jẽingo sacuã Cristo rã si. ²⁰ ¿Mañi ae ra se quia jẽje re? Aico rã nda jendese chã. Se ñee tuchi nonde jẽje. Secheẽ mbesa rocoĩ mondo jẽje.

Sã Abraham ndiirĩ nyeremo no

²¹ ¿Mbaerã jẽingo ñee nde? “Moisés cheẽ nandemumbayã, Dios nandemingo bei sacuã”, ¿mbaerã jẽingo i re? Moisés cheẽ jẽicuayãte quia reae. ²² Moisés chimbesa chõ nandembiiirandu nguiã Abraham rese co. Abraham ndiirĩ nyeremo ndei que ra. Co mui ngue eninisite riirĩ nda. Sara, i que eninisite je ra. Agar, i que erimba je ra. Aque abe que Abraham nbiirĩ ndei ra. Nyebe Abraham ndiirĩ nyeremo ndei nguiã. ²³ Mbia rã si chõ ngue erimba tiirĩ ee ra. Dios ñeende ee nyii quiatu que eninisite tiirĩ ee ra. —Neninisi ra tiirĩ ndeje, sã Dios i ee nyii no. Ùquĩ io sacuã ño eninisite tiirĩ cote ra. ²⁴ Nandemundua sacuã ño ùquĩ nde. Contrato rã si chõ Sara re. Contrato mó na ño Agar no nde. Ae contrato Dios saã Moisés je Sinaí no nae, Agar rã si chõ ùquĩ nde. Ae siqui bei quia ùquĩ contrato rui nae, mbia rimbachõ na ño ùquĩ nde. ²⁵ Sinaí rã si chõ Agar re. Arabia jenda chõ Sinaí re. Jerusalén na si chõ Sinaí re. Ae siqui quia Jerusalén nae, erimba rã si chõ ùquĩ nde. Erimba rã si chõ judíos ja no nde. Jesucristo icua rocoĩ. ²⁶ Jerusalén mo ño chĩ nguiã ibate pe no. Ae mbia hue jenda nae, mbia rimba mo eã ño

ùquĩ nde. Hue jenda chõ nande abe no nde. ²⁷ Sã embesa ji riqui ñee no:

Ndeya chõ eico, tiiriã je.

Ndeya chõ eico, ãquẽ ndasi raãsa eã.

Nderiirĩ nda eretea tuchi cote.

Eru chirirõ nguia ra tiirĩ tuchi eru rerecua si cote,

i que embesa ji ra. ²⁸ Dios riirĩ tuchi chõ nande re. “Serjiirĩ tuchi ra ùquĩ”, ã i Dios nanderiĩ nyii no. Sã ñee Isaac nii nyii no. ²⁹ Sã Dios ñee Abraham je nyii no. “Nderiirina tamondo ndeje Isaac”, sã i ee no. Sã Isaac nyaacuquia Espiritu Turã nii no. Sã Agar riirĩ icuã icuã Isaac je cote no. Eĩ si chõ namo no nde. Ae siqui tuchi judíos cheẽ ndui nae, ùquĩ icuã icuã ndiqui namo nande je ã no. ³⁰ ¿Mañi ño embesa ji cheẽ ña? “Erimba emombo chõ. Eriirĩ ndese. Eninisite riirĩ na eã ño erimba riirĩ nde. Erimba riirĩ siqui aroneate eninisite riirĩ ndese”, i que embesa ji ra. Eĩ si chõ ae siqui tuchi quia judíos cheẽ ndui nae. Siqui aroneate Jesús quia-torã. ³¹ Erimba riirĩ na eã tuchi chõ nande re. Eninisite riirĩ na tuchi chõ nande re. Nande Jesús icua mose.

5

Cristo nandembui Moisés chimbesa si cote

¹ Cristo que nandembui Moisés chimbesa si cote ra. “Moisés chimbesa cheẽ nda semingo bei”, jenyechĩ nda jẽ. Ae ra i ùquĩ, mbia rimba rã ño ùquĩ nde. ² Tacheẽ nyecua tuchi rã jẽje. Circuncisión nda jẽsaachĩ. Moisés chimbesa cheẽ ndui ra jẽngochĩ cote jẽ. Cristo mui ndese chõ jẽingo cote. Jẽ circuncisión naa mose, jẽingo turã eã ño nguiã Cristo rui ùquĩ cote. ³ “Moisés chimbesa cheẽ tamumbayã mbei”, i raanguia chõ circuncisión nde. ⁴ “Dios ra seisi turã seico bei mose Moisés cheẽ ndui” i mose jemo, Dios cheẽ abi tuchi chõ ùquĩ nde. Dios turã si nyiicuasẽ tuchi chõ ùquĩ nde.

⁵ Espíritu Turã ndiqui nanderese co. Nande Jesucristo nandeicuate quia ã. Nyebe ra Dios nandeisi turã Jesucristo mii nii. ⁶ Nandeico mose Jesucristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Jesucristo icua mose, ũquĩ nguia eturã tuchi re. Nandechesecua mose mbia rese, ũquĩ nguia eturã tuchi no nde. ⁷ Jẽingo turãte rei que equia nyii. ¿Aba jembui Cristo cheẽ si cote re? ⁸ Dios eã ño ngue jembui nguia esi. Dios chõ ngue “jenyu” i nguia jẽje. ⁹ Sã levadura riqui no. Eñetẽ mondo mose mbichae ye, mbuquiche ja rae. ¹⁰ Dios ra jendeaquiato bei. Mbia mo jembũcha eã sacua esi. Ae jembũcha serĩte quia esi nae, ũquĩ nda Dios mbasi. Ererecua raque ra emo. ¹¹ “Circuncisión jẽsaã na”, ae ãte quia mbia mo je co. “Circuncisión jẽsaã na”, se i mose, eĩ nda judíos icuã icuã eãte rei seje. Eĩ nda judíos paama i ãte rei seje Cristo mano nenei nenei mose mbia je. ¹² Ae “circuncisión jẽsaã na”, i quia jẽje nae, ũquĩ nda nguete chisia tuchi rã jendecha chã.

¹³ Jesucristo que jembui Moisés cheẽ si ra, Seresenda. Ae icuã jenyosei chosei quia nae, ũquĩ ndese ra jẽingochĩ cote jẽ. Jẽingo turã nguia quia jenyue. Jenyese-cua tuchi quiatu quia jenyiese. ¹⁴ Dios cheẽ ja tuchi chõ ã nde: “Sã ereico nyesecua ndechiese no. Eĩ ere si chõ nyesecua emo ndese”, i que Dios cheẽ nda. Nandechesecua mose mbia rese, Dios cheẽ nandemumbayã tuchi chõ nguia ũquĩ. ¹⁵ Paama jenyechĩ nda jenyue jẽ. Jenyishũ shũchĩ nda eno jẽ. ũquĩ naa naa mose ra jẽhui ja ja chee Cristo si.

Ae icuã nandechosei chosei quia nae, ũquĩ si nandehui

¹⁶ Tacheẽ nyecua tuchi jẽje. Espíritu Turã ñee ndui bei jẽingo. Ae icuã jenyosei chosei quia nae, ũquĩ ndese nda jẽingoã cote chã. ¹⁷ Ae mbae icuã nandechosei chosei quia nae, Espíritu Turã quiatoã tuchi chõ ũquĩ nde. ũquĩ quiatoã tuchi chõ Espíritu Turã no nde. Ae nandechosei chosei quia, nyebe ra ũquĩ nandesaa eã. ¹⁸ Jẽingo mose Espíritu Turã ndui, “Moisés cheẽ nda nandemingo bei” jenyue eã nda cote. ¹⁹ Ae siqui quia ubi icuã ndese nae, mbae icuã esaã ata atate quia ã. Siqui siqui chõ nguia ngũinisiã ndese. Cuña abe siqui siqui chõ nguia ngu eã ndese no. Siqui chooño mbia rese. ²⁰ Dios abareã ndese siqui chooño. Brujeria abe rese siqui chooño. Mbia ucuãyã cuãyã. Siqui icuã icuã nyue. Mae icuã icuã emo ndese. Paama i jei jei emo je. Abei chiã. Mbia mbuqueta queta. ²¹ “I ãchĩ sembae”, i mbia mbae osei osei. Mbia iquia. Quiacua. Siqui chooño mbae ja rese. Ae ã icuã ñumumbara saã saã mbeite quia nae, ũquĩ nderecuarã eã mbei ra Dios.

Espíritu Turã ño aba mingo nguia mbae turã ndese

²² Ae siqui quia Espíritu Turã ndese nae, Espíritu Turã ño emingo nguia mbae turã ndese ã. Nyese-cua chõ nguia mbia rese. Eya chõ eriqui nguia. Quicoi coi eã ño nguia. Siqui tochi chõ nguia. Siqui turã ño nguia. Ucheẽ mbuchebe chebiã ño nguia. ²³ Eseteã ño eriqui nguia. Ae ae chõ nyiteaquiato nguia mbae icuã si. Nande ũquĩ naa naa mose, emo ñee aroneate nande je cote. ²⁴ Sã Cristo mano nyii no. Eĩ si chõ Cristo quiato undua icuã mbutiã nguia no. Cristo mano nyabe.

²⁵ Sã Espíritu Turã ndiqui nandereco mingo turã co no. Eĩ nande

sí siqui turã erui jê. Ae nandererequia turã bei nonde mbae turã ndese. ²⁶ Nandecuasú ra nandesaa saãchĩ jê. Nandeicua techĩ nda nandechue jê. “Aque rã eãchĩ se”, nandechĩ nda mae icuã icuã nandengue rese jê.

6

Jendua chõ nguia nyiese mbae mo naa jenongue je

¹ Emo mbae icuã naase i i mose, “Dios rui eico” jenyê chõ ee. Ae jemo siqui tuchi quia Dios rese, ùquĩ mo ñee ee. Embucuata turã sí nonde Dios rese. Jeñee mingue mingue chõ nguia ee. “Mbae icuã tã i arõte se abe je”, jenyê chõ nguia ndua jê abe. ² Jendesenda ia eã ndasi mose, jendua chõ nguia erese mbae mo naa naa ee. Cristo cheẽ mumbayã ja chõ ùquĩ nde. ³ “Seaquiature rei ñene”, i mose eaquiata mo, ae sí chõ ñimbĩrĩ irĩ nguia aque. ⁴ Ae ra eresaã mbae mo nae, esaã turã mbei chõ nguia. Ùquĩ mose ra ndeya quiatu tuchi ndechisaã ndese. Mae ndocoi emo nyisaã ndese. ⁵ Nande ae ae nandechimbirãcuã nguiaatu nandeya eã ndasi ae ae je.

⁶ Emo siqui mose jembaaquiata quiatu Cristo rĩ, mbae ja quia jemondo mondo quia ee. ⁷ Erechimbĩrĩ irĩchĩ nda ndechue sí jê. Dios abe erembĩrĩ irĩ aroneate. Ae ra erechitiquia mbae mo nae, ùquĩ sí chõ nda ereucua. ⁸ Ae siqui quia ubi achõ ndese nae, ùquĩ nda ua chee. Ae siqui Espiritu Turã ndui nae, ùquĩ nda Espiritu Turã mingo bei. ⁹ Nandechimondocho eã ño nguia mbae turã naa naa mbei jê. Nandehui eã mbei chõ nguia esi jê. Ùquĩ mose ra Dios mbae mee tuchi jee nande je cote. ¹⁰ Mbae turã nandesaa saã mbei chõ nguia mbia je. Jesús quiato je quia mbae turã nandesaa saã tuchi jiri.

Pablo hui bei saludar i mbia je

¹¹ Seo ae je chõ co ambesa mondo nguia jêje aque. Sã letras cuasute.

¹² Ae “circuncisión jêsaã”, i quia jêje nae, siqui turã sacua mbia rese chõ ùquĩ nde. Siqui turã ndocoi Cristo rese. “Cristo ae ra aba mingo bei” i sereã. Siquichete quiatu mbia sí re.

¹³ Ae circuncisión saã nguia nae, ùquĩ abe riqui eã Moisés cheẽ ndui ùquĩ. “I nda mbia riqui urerui”, i chõ nguia “circuncisión jêsaã” i jêje ùquĩ. Ucuasu ra esaã saã jê circuncisión naa mose. Eyate ra jendese cote, jêingo mose erese.

¹⁴ Jesucristo mii ndese chõ nda seya se. Ae mano ira rese. Ae mii ñi nda acheẽ ñee mbia je. Mbaemo ndese abe eã nda seya se. Jesucristo mano mose ira rese, se abe que amano mbae icuã sí ra. Mbae icuã abe que mano sesi no nda.

¹⁵ Nandeico mose Cristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Dios nandechiã mbiasu mose, ùquĩ nguiaatu eturã tuchi re. ¹⁶ Ae siqui quia Jesucristo mii ndese nae, sã Dios turã ndiqui bei ùquĩ ndese. Sã Dios riqui embia bei. Sã Dios turã ndiqui bei ngũimba ja je. ¹⁷ Secheẽ nda jêsbishorõchĩ namo jê. Emo mose abe jê. “Pablo eaquiatae”, sã emo i eã cote. Sã mbae rasi airara rara beite quia Cristo rĩ co no. Sã seirua nuasa cherõ areco serete rese co no jê. Jesucristo rĩ ño ùquĩ nde. ¹⁸ Sã Jesucristo turã ndiqui bei jendese, Seresenda. Amén.

LA CARTA DEL APOSTOL SAN PABLO A LOS EFESIOS

Pablo embesa Jesús quiato Efeso jenda je

¹ Se rei Pablo. Dios que seirabo ra. Jesucristo chimbaaquiatu sacua. Co ambesa mondo quia jêje aque. Jesús icuasa je. Efeso jenda je. ² Sã Dios riqui uturã ndeacuquia bei jêje. Jesucristo abe no. Sã ũquĩ ndiqui jembia bei.

Cristo mbae turã saã ja nande je

³ Nandechê turã mbei chõ nguia Dios rĩ. Jesucristo ru rĩ. Jesucristo rese chõ nandeico nguia ã cote. Ibatenda chõ nandeico nguia ã cote. Nyebe Dios riqui nguia mbae turã naa jate nande je co. ⁴ Dios que nandeirabo nyii ra. Cristo rĩ. Mbae ao ja nonde. Nyese-cua tuchi que nanderese ra. Nyebe nandeicuã mbutiã ja nguia nandesi. Nandeico turã sacua enonde. ⁵ Dios que nandeirabo tuchi coose ra. Mbae ao nonde. —Jesucristo rĩ nda seriirina jê, i que nande je nandeicuã mose ra. ⁶ Nandechê mbei sacua Dios turã nĩ. Uturã je chõ nandeisi nguia Jesucristo rĩ. ⁷ Jesucristo mĩ ngue mano nanderirõ sacua mbae icua si ra. Ae rĩ ño Dios nandeicuã mbutiã nguia nande si cote. Dios turãte quia nande je re. ⁸ Dios que uturã teacuquia ja nande je ra. Nyebe eriqui nguia mbae icua jate nande je. ⁹ —Seriirĩ nda amondo mbia je íbii. Ae ra mbia mangue chooñoa jenda mingo ja serese cote, i que Dios cose ra. ũquĩ ngue eteacuquia nande je cote ra. Nande eicua sacua. ¹⁰ Dios icoquiatu mose ra mbae mbuchicuabo ja cote. Nandemunua ja ra ño Cristo nonde. Cristo ra mbae rerecua ja tuchi

aque mose cote. Ibi jenda rerecua ja. Ibatenda abe rerecua ja.

¹¹ Ae Cristo saã nande je nae, ũquĩ nĩ ño ngue Dios nandeirabo nguia cose. Mbae tiã mose que Dios nandeirabo nyii ra. Ae sĩ mbae turã naa naa sacua nande je. Dios cheẽ nguire mbae riqui nyecua bei ã. ¹² Urecheẽ turã mbei sacua Dios rĩ ño ngue ureirabo nguia. Ure rane ngue Cristo ureicua nyii ra. ¹³ Jê abe que Cristo jêicua chee cote ra. Jê echeẽ turã andu mose. —Cristo ra jendirõ jêicuã si, i mose jêje. Jê Cristo icua mose que Espiritu Turã Cristo mbae marca mĩ jendese ra. —Espiritu Turã tamondo Cristo icuasa je, i Dios quia nyii nae, aque sĩ que Cristo mbae marca mĩ jendese cote ra. ¹⁴ Espiritu Turã ndiqui nandechiangui re co. Nyebe nandeico nguia ñee. —Dios ra mbae mee ja nande je ucheẽ nguire, i. Dios que nandeisi Jesús ruqui ribishorõ nda. Nandemingo bei ra erese cote. ũquĩ nĩ ño Espiritu Turã Cristo mbae marca mĩ nguia nanderese. Nandechê turã mbei sacua Dios rĩ ño ngue ũquĩ nde.

Sã Dios jembirandu uquirãcuã ndese, i Pablo

¹⁵ Airandu que jendese ra. Jesús jêicua tuchite quia ũquĩ. Jenyese-cua tuchite equia Dios quiato ja rese ũquĩ. ¹⁶ Nyebe aico nguia ñee hui ãte Dios je. Gracias, i bei ee jeni. ¹⁷ —Paba, ndequiato embaaquiatu tuchi Cristo rĩ. Cristo eicua uquia tuchi ee, ae beite se quia Dios turã je jeni co. ¹⁸ Acheẽ mbeite quia Dios je jeni co. —Paba, ae turã nda eresaã je ndequiato je nae, ũquĩ ndese embiirandu jiri namo. Ae turã nda eremeje ee nae, ũquĩ ndese abe embiirandu. ¹⁹ Ndequirãcuã ndese abe embiirandu, ae beite quia Dios je jeni co. Dios quirãcuã nda ua eã mbei. Equirãcuã ndiqui Jesús

quiato chianguí re ja ã. ²⁰ Dios quirãcuã ae que Jesús raaque mbuquera si ra. Dios quirãcuã ae que Jesús mbocoi mii ujii ra. ²¹ Dios que Jesús mii mbae rerecuarã ja ra. Ae quia rei i tuchi ererecu mo si. Gobierno mo ab e si. Ae quia rei ecuasú tuchi ibi jenda ja si. Ibatenda abe mo si. ²² —Mbae ja rerecu tuchi rei Jesús, i que Dios ra. —Sequiato rerecu ja chõ ae re, i que Dios ra. ²³ Dios quiato rei Jesús rete rã. Jesús riqui uquiato chianguí re co. Manguiti eriqui eã aroneate. Mbae aosa ja chõ ae re.

2

Uturã nii Dios abarirõ abaicuã si
¹ Dios que ngueco mondo jêje cote ra. Jêicuã nii ño ngue jêingo nguiã eraaque rã nyii. ² Mbia ataque rã tuchi que jêingo aque mose ra. Mbae icuã naa naa ndesechi. Satanás ñee ndui beite que jêingo nyii ra. Equirãcuãte que eriqui jêje ra. Ae siquĩ ãte quia Dios rese nae, ãquĩ ño Satanás ñee mumbayã nguiã ã. ³ Eĩ nande que equia cose nyii ra. Ae nandebite riqui mbae icuã nyii nae, ãquĩ ndesechõ ño ngue nandeico ra. Ae rese nandeico ndua beite mbae icuã nyii nae, ãquĩ ndesechõ ño ngue nandeico nyii ra. Mbia ataque rã si chõ ngue nandeico mbae icuã naa naa nda. Dios nda nandembasi nguiã nandeicuã nii ña. ⁴ Eyayãte quiatu ngue eriqui rei nguiã nanderese. Nyesequa tuchite quiatu que equia nanderese ra. ⁵ Eraaque raãte raque nande nandeicuã nii nyii. Nyebe ngueco turã mondo nguiã nande je Cristo raaque mbuquera si mose. Dios turã ae chõ jendirõ nguiã jêicuã si. ⁶ Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra. ⁷ Dios turã tuchi riqui nande je Jesucristo rii co. fnda mbia jirandu randu Dios chisaã turã ndese emo

mose. Ibátee nandeico mose abe no. ⁸ Jê ngue Jesús jêicua ra. Nyebe que Dios jendirõ jêicuã si ra. Uturã nii ño ngue jendirõ nguiã jêicuã si. Jê ae jêimbucha aroneate Jesús rese. Dios ae ngue jembucha nguiã erese. ⁹ Nandechisaã turã nii eã ño Dios nandembucha nguiã Jesús rese. Nyebe nandemo ndiqui uturã naa naa aroneate. ¹⁰ Dios ae que nandeao ra. —Se emingo mose Jesucristo rese, aque mose quia ra mbae turã naa naa cote, i que Dios nanderiã cose ra.

Cristo mii ño mbia mingo turã turã nguiã nyiese

¹¹ Dios rese que jêingo ãte nyii ra. ãquĩ si jêtesareia ño. Judíos eã ño ngue jê ndesẽ. Nyebe judíos jendirirõ nguiã. Circuncisión ngue jêsaã eãte judíos rã ndesẽ. ¹² Jêingo eãte que Cristo rese nyii resẽ. Jêingo turã eãte que equia Dios rimba je resẽ. Dios cheẽ si que jêingo ishote resẽ. —Dios ra mbae turã saã nande je, jenye ãte que equia ndua aque mose resẽ. ¹³ Jesucristo mbae chõ jê cote re. Ishote jêingo raque Dios si cose. Dios que jembucha tuchi uchiese Jesucristo mano nii nda. ¹⁴ Cristo mii ño nandemingo turã nguiã nyiese ã. Ae mii ño judíos mingo turã nguiã judíos eã ndese co. Ae mii ño judíos eã mingo turã nguiã judíos rese co no. ãquĩ ngue siquĩ icuãte quia nyue Cristo icuayã mose nyii ra. Mbia mii na ño eriqui nguiã siquĩ turã nyue ã cote. ¹⁵ Umano mose que Jesús judíos mbui mondo Moisés cheẽ si cote ra. Ae Moisés ñee, judíos echeẽ mumba eã sacuã nae, ãquĩ si que Jesús embui cote ra. Nyebe judíos siquĩ turã arõte judíos eã ndese ã cote. Judíos eã abe siquĩ turã arõte judíos rese cote. ãquĩ siquĩ mose Jesús rese, co mii na ño eriqui nguiã ã cote. Mbia mii mbiasu ji rã ño eriqui nguiã ã cote. ¹⁶ ãquĩ icuã

icua mose nyue que Cristo mano ũquĩ icua ndiquicharõ nda. Ũquĩ mingo turã ja nonde Dios rese. Siqui turã mose Dios rese, siqui turã nda nyue cote. ¹⁷ Cristo que mano mbia mingo turã sacua Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese. ¹⁸ Cristo que mano nande ja je ra. Judíos je. Judíos eã je abe no. Nyebe Espíritu Turã mii nandemingo ja nguiã nyiese ã. Dios nandesichã ja arõte qui a ã cote. ¹⁹ Mbiamo eã ño jẽ Dios je cote re. ã jẽingo isho eãte Dios si ã cote. Dios riiri tuchi chõ jẽ cote re. Cristo resenda ataque rã sí chõ jẽingo nguiã ã cote. ²⁰ Tuchua raã ji mo na ndei jẽ. Jesús chimbaaquiatu rei tuchua i rã. Dios cheẽ mbuchecuaa cose ndare abe rei tuchu a i rã no. Jesucristo rei ũquĩ i tuchi. ²¹ Nande Jesús icua mose, Dios chuchua turã naanguia chõ nandeico nguiã Jesús je ã. Nande Jesús quiato tubiriã i ite riqui ã. ²² Espíritu Turã ño jemingo nguiã Dios rese jẽ abe ũquĩ. Nyebe jẽ abe jẽingo Dios chuchuarã ũquĩ. Dios riqui jeñiangui re ũquĩ.

3

Judíos eã abe ra siqui Dios rese, i Pablo

¹ Se rei Pablo. Jesucristo rimba. A setarõ ji ñi jeni a. Jẽ judíos eã nii. —Judíos eã abe riqui Dios rimba ã, ae beite que se quia jeni nda. Nyebe setarõ ji ñi nguiã a. ² —Judíos eã je chõ seturã esenei senei nde, i que Dios seje ra. Ũquĩ ndese beite aico co. Jẽirandu equia serese reae. ³ —Judíos eã abe ra siqui serese. Secheẽ turã esenei senei ee, i tuchi que Dios sembaaquiatu ra. Ũquĩ ngue asenei jua chõ jẽje ra, se embesa mose jẽje nyii. ⁴ Sechimbesa rese jemaes mose ra jeñee cote. —Pablo Dios cheẽ icua tuchi chõ nguia judíos

eã nii nde, jenyee ra cote. ⁵ —Judíos eã abe ra siqui serese judíos rã si tuchi, i eã ngue Dios mbia mo je cose ra. Namo ño mbia jirandu nguiã ũquĩ ndese. Namo ño Espíritu Turã Jesús chimbaaquiatu mbiirandu nguiã ũquĩ ndese. Dios cheẽ mbuchecuaa abe mbiirandu ũquĩ ndese. ⁶ ã ndei Dios cheẽ mbuchecua ramo ji ã: Judíos eã abe ra siqui Dios rese judíos rã si tuchi cote. Mbiam rete mii na nda eriqui ja cote. —Mbae turã tasaã jẽje Jesucristo rii, i mose Dios, judíos achõ je eã ño eriqui nguiã ñee. Judíos eã abe je chõ ñene.

⁷ —Ũquĩ secheẽ esenei senei mbei quia mbia je, i que Dios seje ra. Mbae turã mo asaã eã ndaque Dios je nyii. Uquiracuã abe que emee seje ũquĩ naa sacua nda. ⁸ Dios turã tuchite que seje ra. Se mbae raande rocoĩ ee nyii. Nyebe ñee nguiã seje. —Secheẽ esenei senei mbei quia judíos eã je. Ae rese mbia riqui jiranuate Cristo turã nae, ũquĩ esenei senei judíos eã je, i que seje ra. ⁹ —Ae turã nda asaã judíos eã je nae, ũquĩ ndese mbia embiirandu ja cote, i que Dios seje ra. Dios quiarei ndua ndua ũquĩ nyii. Mbae ao ja nonde nyii. ¹⁰ Mbaerã ño Dios mbia mbiirandu ũquĩ ndese cote chã. Mbiam jirandu sacua Dios aquiatur rese chõ ñene. Dios judíos eã mingo turã mose judíos rese, mbia ra nyuruira tuchi mae Dios quiracuã ndese. Ibatenda abe ra nyuruira tuchi mae erese no. ¹¹ Dios ndua ndua ũquĩ nyii. —Mbiam chumumbarate riqui raque ã. Emo emo nda ambucha nyiese Cristo mano mose, i que Dios cose ra. Ũquĩ ngue esaã Jesucristo rii cote ra. ¹² Nandeico Jesucristo icuate ã cote. Nyebe nandeico nguiã siquicheãte ñee Dios je ã cote. ¹³ Ae mbae rasi asaã nguia cárcel co nae, jeni ño ñene. Seyate se mbae rasi raã mose jeni. Jẽ abe jeñimbiam

chõ nguia serese.

Cristo nyesecua tuchi uquiato rese

¹⁴ Judíos eã abe chõ Dios mingo nguiã uchiese. Nyebe aico nguiã gracias i bei Dios je co. ¹⁵ ã nandechumumbarate riqui íbii ã nae, ùquĩ ndu ja chõ Dios re. Ibatenda abe ru chõ ae no nde. ¹⁶ Dios mbae saã ja arõte nande je. Ebite mbae raã mose nande je. Nyebe aico nguiã ñee ee jenii a. —Paba, Espíritu Turã emondo tuchi echiangui re. Embuquirãcuã sacua, ae chõ nguiã ee a. ¹⁷—Paba, sã Cristo riqui tuchi echiangui re. Sã Cristo ícua tuchi. Sã eriqui nyesecua tuchi Cristo rese, ae beite se quia Dios je jenii co. ¹⁸⁻¹⁹ Mbaerã ño Dios riqui nyesecua tuchite nanderese co. Co eriqui nyesecua tuchite nande rese co. Jendua tuchi quiatu quia ùquĩ ndese. Sã Cristo quiato riqui ndua ja ùquĩ ndese. Sã Dios riqui tuchi jeñiangui re. ²⁰ Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ùquĩ abe chee esaã arõte quia nande je co. ²¹ Sã Jesucristo quiato riqui ñee turã mbei Dios je Jesucristo rĩĩ. Mbae ua ja mose chee. Eĩ si ra equiato quia ñee turã mbei erĩĩ. Amén.

4

Hue rĩ ja chõ Espíritu Turã ndiqui nguiã Jesús quiato mundua

¹ Setarõ ji aĩ Jesús rĩĩ a. Secheẽ amondo quia jẽje aque. Jẽingo turã ño nguia Cristo rã si. Dios chiirabote quia jẽ nde. ² Jẽseteã ño jẽingo. Jẽingo tochi chõ nguia. Jendoseĩ nguiatu chõ nguia jenyue. Jenyesecua chõ nguia jenyiese. ³— Hue rĩ ja chõ nandeico ndua jẽ, jenyue chõ nguia jenyue. Sã Espíritu Turã ndiqui jemundua hue rĩ ja.

⁴ Jesús rete mii na ño nande re. Espíritu Turã mii ño siqui nguiã nandechiangui re co no. Jesús mii na nda nande ja nandeico. ⁵ Ae mii ño nandererrecua ja re. Ae mii ndese chõ nandeico ja nguiã ã. Aque mii nii ño ngue bautizar i nguiã nande je no. ⁶ Dios mii ño nanderu ja re. Ae mii ño nandemingo nguiã mbae rese. Ae mii ño siqui nguiã nandeite re co no. ⁷ Dios que nandechisaã ae aerã mee nande je ra. Cristo que uturã mee mee nande je ra. Ae ra nandesaã saã, ùquĩ naa naa turã sacua. ⁸ Sã embesa ji riqui ñee no:

Cristo que nyui oso ibate ra.

Mbia tarõ ji que equerao ra.

Mbia chisaã ae aerã ngue emee mee mbia je ra,

i que embesa ji ra. ⁹ Jesús que siqui ibátee nyii ra. Aquere que eru nguichi íbii cote ra. ¹⁰ Ae sí que oso nyui ibei robei cote ra. Mbae rerecuarã ja sacua ngue ae cote ra. ¹¹ Ae que mbia chisaã ae aerã mee ee ra. —Apóstoles ra jẽ, i que emo emo je ra. —Secheẽ embuchecua checua quia mbia je, i que emo emo je ra. —Mbia sequiatoã je secheẽ turã esenei senei mbei seriĩ, i que emo emo je ra. —Mbia serimba eteaquiato bei, i que emo emo je ra. —Mbia embaaquiato quiato bei quia, i que emo emo je no nda.

¹² Eĩ ngue Dios uquiato mbaaracua racua ja uchisaã ae aerã ndese ra. Ùquĩ mose ra Jesús quiato Jesús oseĩ i i tuchi cote. ¹³ Ùquĩ mose ra nandendua ja Jesucristo rese hue rĩ ja. Ùquĩ mose ra Jesucristo nandeicua i i tuchi. Jesucristo rã nda nandeico chee ùquĩ mose. ¹⁴ Ùquĩ mose ra nandeico ñimbirãcuã tuchi Cristo rese. “Tambĩĩ irĩ Cristo rĩĩ” i mose emo nande je, nandeicoã nda ùquĩ ndese. Nandendua ata ata eã nda Cristo rĩĩ. Ae mii ndese chõ nda nandeico bei. Mbia rĩĩ na nda nandeico ndua ata ata

eã. ¹⁵ Ũquĩ mose ra nandechẽẽ ñooño eã. Mbia ra nandembĩĩrĩ iriã. Nandehesecua ja ra equia mbia rese. Cristo rã si chõ nda nandeico turã. Dios quiato rerecua tuchite quia ae re. Sã nandẽaquĩ nanderete rerecua no. ¹⁶ Sã nanderete riqui ñimbirãcuã ja no. Eĩ si chõ Cristo rimba nguiã ñimbirãcuã ja siqui turã nyiese. Sã nanderete no. Nanderete resenda siqui turã ja mose, nanderete rasiã ja rae.

Ae icuã jẽsaã saã nguia nyii nae, ũquĩ jẽsaã saã eãte quia namo ã

¹⁷ Jesús cheẽ tuchi chõ ã nde: Dios icuasa reã na nda jẽingochĩ cote jẽ. Ndua chooño ño nguiã mbae rese ũquĩ. ¹⁸ Eãquĩ ãtã ño ũquĩ nde. Dios cheẽ andu sereã nea je chõ ũquĩ nde. Nyebe Dios riqui nguiã nguico mee eã tuchi ũquĩ je. ¹⁹ Mbae icuã achõ ndese chõ eriqui nguiã ndua ndua. Eireĩ nguiãte mbae icuã naa naa mose cote. Oo oo tuchi mbae icuã ja rese. ²⁰ Ũquĩ ngue Cristo jembaaquiato quiato eã jẽ nda. ²¹ Jẽirandu que Jesús rese resẽ. Ae sí chõ ngue jembaaquiato resẽ. Jembaaquiato que ucheẽ turã nii nda. ²² Jẽñiangui renda icuã si jẽhui chõ. Aba mbĩĩcuãsa tuchi chõ ũquĩ nde. Aba mbĩĩrĩ irĩ ño ũquĩ nde. ²³ Jendua ndua jembiasu chõ ae. Ae rese jẽingo ndua icuã icuã nyii nae, ũquĩ si jẽtesarei chõ cote ae. ²⁴ Jẽñimbiasu chõ nguia ae. Ũquĩ mose ra jẽingo Dios rã si. Jẽingo turã tuchi ra equia ee.

²⁵ Jeñee ñooño eã ná nguia jendesenda mo je cote ae. Nyiesenda ja chõ nande cote re. ²⁶ Jẽ paama i mose, paama jenye turã ño nguia. Paama jenye ocoã ño nguia. Tenda oso nonde ti jenye. ²⁷ Jẽ paama i oco mose, diablo ra jembiũcuãte cote. ²⁸ Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o je icua cote.

Sã eriqui mbae mondo mondo mbaecha reã je cote. ²⁹ Jenyuru jendecochõ ño nguia ñee ndocoĩ mbae icuã nii jẽ. Mbae turã nii ño jẽingo ñee mbia je jẽ. Emundua ndua sacua Dios rese. ³⁰ Espiritu Turã nda jembia eã eãchĩ jẽ jẽ. Ae chõ ngue Cristo mbae marca mii nguiã jendese. Nyebe jẽingo nguiã ñee. —Cristo ra nandembiasu erã si, i. ³¹ Paama jenyechĩ nda emo nii. —I ãchĩ se, jenyechĩ nda emo nii jẽ. Jẽtasẽ tasẽchĩ nda emo je. Jeñee icuã icuãchĩ nda emo nii. ³² Jẽturã ño jẽingo jenyue. Jẽseteã ño jẽingo jenyue. Jendesenda icuã icuã mose jẽje, jẽtesarei chõ eicuã si. Sã Dios jẽicuã mbutiã jẽ Cristo rĩ nyii no.

5

Dios quiato siqui bei mbae turã ndese

¹ Dios riirĩ tuchi chõ jẽingo nguiã ã. Nyesecua tuchi equia jendese co. Erã si chõ jẽingo. ² Jenyesecua tuchi quia mbia rese. Sã Cristo riqui nyesecua tuchite nanderese no. Sã mano nandẽicuã ndiquicharõ oveja rã no. Emano mose que Dios ia tuchi erese ra.

³ Cristo mbae chõ jẽ cote re. Nyebe jẽingo eã emo ninisi rese. Eruã mo ndese abe no. Emo mbae ra jenyosei choseichĩ. Eicuãte ũquĩ. ⁴ Jenyuru jendecochõ ño nguia ñee ndocoĩ mbae icuã nii. Mbae icuã aba ireingua rĩ jeñee eã. Eicuãte ñee mose ũquĩ. Gracias jenye quiato quia Dios je. ⁵ Emo siqui mose ngũnisiã ndese, aque ra siqui eã Cristo rese, Cristo siqui mose ererecua. Ae mbae icuã saã saã mbeite quia nae. Ae emo mbae chosei chosei quia nae, ũquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ũquĩ no nde. ⁶ Ae ũquĩ saã saã nguia mbae icuã nae, ũquĩ je ra Dios mbae rasi raanguia tuchi. “Ichõĩño ñene” ichĩ nda emo

jembĩĩĩ irĩ jẽ. ⁷ Ae ũquĩ saã saã nguia mbae icuã nae, ũquĩ ndese ra jẽingochĩ jẽ. ⁸ Itondaruqui re rã ngue jẽingo cose ra. Nyaáshiĩ ño jẽingo nguia Jesús rese ã cote. Nyebe jẽingo turã. ⁹ Ae siqui nyaáshiĩ nae, ũquĩ siqui turã ño nguia ã. Ñee ñooño eã ño nguia emo je ã. Siqui áte equia mbae icuã mo ndese, ã. ¹⁰ Ae Dios bite riqui nae, ũquĩ ndese chõ jẽingo ñimbaaquiatu quiatu. ¹¹ Ae itondaruqui riinda saã saã nguia mbae icuã nae, ũquĩ nda jẽsaã saãchĩ erese jẽ. Echiao icuã ñĩ ño jeñee ee emundua jẽ. ¹² Ae ũquĩ saã nyecuayã cuayã nguia mbae icuã nae, aba ireite ñee ũquĩ ñĩ. ¹³ Jẽ ũquĩ nyiao icuã mbuchecua mose ee, ndua ndua ra erese cote. Emo emo siqui arõte Cristo rese cote. Itondaruqui riinda recha mbae icuã. ¹⁴ Sã embesa ji riqui ñee no:

Ae uque saã saã nguia nae, sã ũquĩ ñumumba.

Ae siqui quia eraaque rã nae, sã ũquĩ quera si.

Ũquĩ mose ra Cristo uturã ndeacuquia ee,
i que embesa ji ra.

¹⁵ Cochee tuchi chõ jẽingo Dios rese. Mbia aquiatuã na nda jẽingochĩ. Mbia aquiatu rã nguia jẽingo. ¹⁶ Ae Dios bite riqui nae, ũquĩ ndese chõ jẽingo ñĩmbecoteã. Mbae icuã icuãte eriqui ã cote. ¹⁷ Jẽaquiatuã eã ño jẽingo Dios rese. Ae Dios bite riqui nae, ũquĩ ndese chõ jẽingo ñimbaaquiatu quiatu. ¹⁸ Jẽquiacua quiacuachĩ nda equia jẽ. Jẽquiacua mose mbae icuã jẽsaã saã ja arondete. Espíritu Turã nguia jemingo tuchi jeñiangui re. ¹⁹ Cristo riĩ jeñee turã tuchi quiatu quia jenyue. Jẽirasei rasei tuchi quiatu quia Dios je. Himnos. Salmos. Jẽya chõ jẽingo irasei rasei Dios je. ²⁰ Dios rei nanderu. Ae chõ mbae ja mee mee nguia nande

je co. Nyebe “gracias” jenyue bei quiatu quia ee Jesucristo riĩ.

Jẽingo turã ja chõ nguia jenyuchua jenda jaje

²¹ Jenongue cheẽ jemumbayã ño nguia. Cristobi tuchi chõ ũquĩ nde. ²² Sã cuña ngu cheẽ mumbayã. Sã eriqui Dios cheẽ mumbayãte no. ²³ Eru quia rei ngũinisi rerecua. Sã Cristo uquiato rerecua no. Cristo quiato rei Cristo rete rã. Cristo quiatu ngue esirõ nguia eicuã si. ²⁴ Sã Cristo quiato riqui echeẽ mumbayãte no. Eĩ si chõ cuña nguia ngu cheẽ mumbayã mbei. ²⁵ Sã eru riqui nyecua tuchi ngũinisi rese. Sã Cristo nyecua tuchi uquiato rese no. Sã mano nyee eriquicharõ no. ²⁶ Uquiato no sacua icúe chõ ũquĩ nde. Irei que i je ra. Ucheẽ je abe que eirei no nda. ²⁷ Cristo uquiato mbuturã turã ja quia co. Mbae icuã ndese emingo uquia reãte. Nyebe eyate riqui nguia erese co. ²⁸ Sã Cristo riqui nyecua tuchi uquiato rese no. Eĩ si chõ mbia quia nyecua ngũinisi rese. Sã emo ndiqui ngueteãte nguete rese no. Emo ngueteã mose ngũinisi rese, nguete rese ngueteã naanguia chõ ũquĩ nde. ²⁹ Emo nda nguete ucuayã eã. Nguete ra equereco turã. Teaquiatu turã nda equia. Eĩ si Cristo quia uquiato rerequia turã co no. ³⁰ Cristo rete rã si chõ equiato re. Nande abe chõ Cristo rete rã no nde. ³¹ Dios que ñee nyii ra. Emo ngũinisirã ndea mose, sã nyao usi si. Ngu si abe no. Sã ngũinisi mĩ ndese chõ eriqui. Co mĩ siqui rã ño eriqui nguia nyiese cote. ³² Mbaranguiatuãte raque ũquĩ icua. Nyeremo siqui mose co mĩ na. Cristo riĩ ño eriqui nguia ñee. Equiato riĩ abe no. ³³ Jẽje abe chõ eriqui nguia ñee. Jẽ nyecua tuchi sacua jeninisi rese. Sã jẽingo nyecuate jendete rese no. Sã

cuña abe riqui ngu cheẽ mumbayã mbei.

6

¹ Mbia riirĩ, jendu cheẽ jemumbayã ño nguia. Jẽsi cheẽ abe. ²⁻³ ã ngue Dios ñee cose ra: “Jẽingo turã ño nguia jẽsi je jẽ. Jendu je abe. Jẽingo turã mbei ra equia ùquĩ mose. Jendeco ra jẽingo arete íbii,” i que Dios mbia je cose ra. ⁴ Eru je tacheẽ cote. Esi abe je. Jeñee icuã icuã tuchite chĩ nda jendiirĩ je jẽ. Paama i chee ra jẽje. Jembaaquiату turã turã quiату quia. Jemingo turã quiату quia Dios rese.

⁵ Mbia rimba je tacheẽ cote. Jenderecua cheẽ jemumbayã ño nguia. Cochee chõ jẽingo ee. Jẽingo turã ño nguia jenderecua je. Cristo bite ùquĩ. ⁶ Jenderecua mae eã mose jendese, ùquĩ mose abe chõ jẽingo embae raã naa turã ee. Mbae jẽsaã turã ja quiату quia Dios cheẽ ndui si. Cristo rimbate quia jẽ nde. ⁷ Jẽya chõ jẽingo mbae raã naa mose jenderecua je. Dios je chõ jẽingo nguiã eraã ùquĩ. Jenderecua ibi jenda mui je eã ño ñene. ⁸ Dios ra mbae turã mee jẽje emo mose jenyiao turã ndibishorõ. Jẽingo mose mbia rimba. Mbia rimba eã jẽingo mose ra re no ae. ⁹ Mbia rerecua je tacheẽ cote. Jẽingo turã ño nguia jẽ abe jenimba je. — Tareirua nua, jenyechĩ nda embiirĩ irĩ jẽ. Jẽ abe chõ jenderecua no nde. Jesucristo rei jenderecua. Jenimba abe rerecua. Eĩ ja chõ mbia Dios je re. Mbia mui ndese ra eriqui turã eã.

Soldados rã si chõ jẽingo nyiquisã mbae icuã si

¹⁰ Hui bei nonde ã tacheẽ jẽje. Dios quia rei equirãcuã tuchi. Dios quirãcuã je chõ jẽingo nguiã ñimbirãcuã. ¹¹ Sã soldado riqui armadura mingue no. Ùquĩ ndei nyiquisã sacua ùquĩ. Eĩ jenyete si chõ nguia siqui tuchi Dios rese

nyiquisã Satanás si. ¹² Ae icuã icuã ndiqui nande je Jesús rĩĩ nae, mbia eã ño ùquĩ nde. Satanás ño ùquĩ nde. Satanás nimba abe no. Aba checuayã icuã abe no. Mbae icuã nderecua ja chõ ùquĩ nde. Equirãcuã tuchi riqui ùquĩ. ¹³ Jẽingo tuchi Dios rese ùquĩ icuã si nyiquisã sacua. Jẽquirãcuã jẽingo tuchi sacua. Jẽquirãcuã mbei quia jẽingo, Satanás jembicua eã sacua. ¹⁴⁻¹⁷ Jẽquirãcuã tuchi chõ jẽingo. Sã soldado riqui icoquiату armadura mingue no. Eĩ jenyete si chõ nguia icoquiату diablo jembicua eã sacua. Sã soldado riqui ngũmbi cuasa mingue no. Huiisĩa riinda abe mingue nyiquisã sacua no. Sã soldado riqui huiyao mingue icoquiату no. Sã escudo abe rerequia oo no. Nyiquisã sacua emo uu mombo mose ee. Sã huiite sucha ãtã abe mingue uãquĩ ndiquisã sacua no. Sã tiquise abe rerequia no. Soldado rã si chõ jẽingo icoquiату nyiquisã sacua diablo si. Jeñee ñoono eã ño nguia. Jẽingo turã mbei chõ nguia. Jẽingoquiату bei quia Dios cheẽ turã nenei nenei mbia je. Dios jẽicua tuchi quiату quia. Dios icua tuchi mose ra diablo tã i eã jẽje. Dios quirãcuã ndese quia jẽingo tuchi mbae icuã naa eã sacua. Dios cheẽ jẽicua tuchi quiату quia. Ùquĩ mose ra Espiritu Turã siqui tuchi jendese. ¹⁸ Jeñee mbei quiату quia Dios je. Sã Espiritu Turã jembucheẽ turã mbei quia ee. — Mbae embu seje. ã embu seje, jenyete bei quiату quia Dios je. Dios quiato ja rĩĩ ño jẽingo ñee Dios je. Dios siqui turã sacua ere. ¹⁹ Serĩĩ abe quia jẽingo ñee mbei Dios je. Sembucheẽ turã sacua, se echeẽ nenei nenei mose mbia je. Ae rese mbia riqui jiranuate Cristo rĩĩ nae, ùquĩ asenei senei nguia mbia je co. ²⁰ Dios que semondo ucheẽ turã nenei nenei sacua nda. Ùquĩ nui ño setarõ ji aĩ

nguiã a. Jeñee mbei quiatu quia
Dios je serĩ. Se ireĩ ireĩ eã sacuã. Se
echeẽ turã nenei nenei mbei sacuã
mbia je.

Pablo ñee hui bei

²¹ Tiquico si quia jendea aque. Ae
ra mbae senei ja jẽje jembiirandu
serĩ. Ae que mbae saã turã mbeite
quia serese ra. Dios rimba turã
tuchi chõ ae re. ²² Nyebe amondo
nguiã jendea aque. Jembiirandu ja
sacuã urerese. Jembia tuchi sacuã
Cristo rese abe. ²³ Jesús quiato chõ
jẽ abe, se rã si re. Sã Paba iba-
tenda riqui jembia bei tuchi. Sã
eriqui jembuchesequa tuchi mbia
rese. Sã Jesucristo icua uquia tuchi
jẽje. ²⁴ Ae nyesecua tuchi quia Je-
sucristo rese nae, sã Dios turã siqui
tuchi ãquĩ ndese. Amén.

LA CARTA DEL APOSTOL SAN PABLO A LOS FILIPENSES

*Pablo tarō ji ucheē mbesa
mondo Jesús quiato je*

¹ Pablo chō se re. Timoteo rese. Jesucristo rimba chō ure re. A ureico ā mbesa jēje a. Felipos jenda Jesucristo quiato ja je a. Jesús quiato rerecua je abe ureico ā mbesa a. Diáconos je abe no. ² Sā Paba Ibatenda turā ndiqui jendese. Sā jembia mingo. Sā Jesucristo abe jembia mingo no.

Pablo ñee Dios je Jesús quiato rñ

³ Sendua ndua mose jendese, seya beite aico jendese co. Gracias ae beite sequia Dios je jenñ co. ⁴ Se ñee ñee mose Dios je jenñ, seyate riqui co. ⁵ Se Jesucristo cheē nenei namo mosenda bei chō jēingo nguiā ndua bei serese co. Nyebe jēingo nguiā mbae mondo mondo bei seje co. Nyebe seya tuchi riqui nguiā jendese co. ⁶ Dios que ucheē mingue jeñiangui re, ae si ra siqui bei jendese jembitirō tirō. Jesucristo tu chee. Ae bei. Siqui bei ra jendese. Aicuate se quia co. ⁷ Coche aico nguiā ndua ndua eñ jendese cco. Achese-cua tuchite quiatu nguiā jendese. Jē ngue jēingo beite quia serese ra. Jendua ndua beite que equia serese ra. Mbae mondo mondo bei seje. Mbia icuā icuā mose seje. Se mbia cheē ndiquisā quisā mose Jesús cheē si. Mbia setarō tarō mose. Ũquĩ mose abe que jēingo beite serese ra. Dios turā ndese que nandeico mae mae mbeite ra. ⁸ Dios resa aico ñee co. Jesucristo rā si aico nyesequa tuchite jendese co. ⁹ Aico ñee mbeite Paba je jenñ co. —Paba, ũquĩ embuchesequa i i tuchi mbia ja rese. Ndeaquiatu

emondo i i tuchi ee, ae beite quia Paba je jenñ co. ¹⁰ Eñ nda mbae turā jēicua. Eñ nda jēingo bei mbae turā ndese. Eñ nda Jesucristo ñee asiā jēje tu mose. ¹¹ Eñ nda Jesucristo jemingo bei mbae turā ndese. Eñ nda mbae turā jēsaā saā ja Dios je.

*Cristo mñ nñ ño aico nguiā se co, i
Pablo*

¹² Ā tasenei jēje. Mbae icuā ngue jēi jēi mbeite quia seje, ũquĩ ngue Jesús cheē mbutiba eā mbei ra. Ũquĩ jēi jēi mose seje, mbia que jirandu tuchite quia Jesucristo rese cote ra. ¹³ A setarō ji ñi cárcel a. —Cristo rñ ño etarō ji ñi nguiā hue, i jate mbia quia serñ ũquĩ. Mbia rerecua chuchua jenda ja. Tuchuamo jenda ja abe. ¹⁴ Jesús quiato jirandu mose setarō ji rese, esiquicheāte riqui Dios cheē nenei nenei ũquĩ cote. Jesús quiato ja riqui Dios cheē nenei nenei tuchi ũquĩ cote. —Dios riqui tuchi ure-rese co, i equia ũquĩ cote. Maende setarō ji rese.

¹⁵ Emo emo ndiqui Cristo renei ñooño ũquĩ. Ndua icuā icuā ño nguiā ũquĩ. Mae icuā icuā ño nguiā serese ũquĩ. Emo emo ndiqui Cristo renei turā tuchi ũquĩ no. ¹⁶ Ae Cristo senei ñooño nguia nae, ũquĩ icuāte riqui seje ā. —Sā Pablo tarō ji ñiño, i equia serñ ā. Cristo renei ñooño ā. Emo ndese ndua eā. Nyiese chō eriqui nguiā ndua. ¹⁷ Ae Cristo senei turā nguia nae, ũquĩ ndua chō nguiā emo ndese. —Jesucristo cheē nñ ño Pablo tarō ji ñi nguiā hue, i equia ndua serese ũquĩ. ¹⁸ Seyate emo Cristo renei turā mose. Seyate emo Cristo renei ñooño mose no. Cristo rñ nguiatu eriqui nguia ñee. Tachimbua tuchi chō nguia ũquĩ Cristo renei nenei mose.

¹⁹ Jēndese abe seyate aico co. Ũquĩ jēingo ñee Dios je serñ ũquĩ. Espiritu

Turã ndiqui serese a no. Ae Jesu-cristo mbu seje. Nyebe Dios riqui nguiã setarõ ji reaquiatsu tuchi a. Nyebe seya tuchi riqui nguiã a. ²⁰ Sesiquicheã tuchi ra se reae. Seireĩ ngũfã mbei nda eriqui Cristo cheẽ nenei nenei ña. Cristo bi achõ ndese taico bei setarõ ji. Mbia nda seiquia rei nguiã, se taico bei Cristo rese. Mbiã nda sembusẽ ndei nguiã no, ãquĩ mose abe taico bei erese no. Eĩ ja chõ seje re. Eturã ja chõ seje no nde. ²¹ Cristo mii nĩ ño aico nguiã se co. Semano mose, eturã tuchi quiarei ãquĩ seje cote. ²² Dios semingobe mose, ae si je chõ aico nguiã mbae turã naa naa co. Ma ño eturã jiri riqui seje. Mano mose ereae. Siquibe jiri mose ere no ae. Aicua eãte se. ²³ Ma ño sebi jiri. Semano sete raque oso sacua Cristo rese. ãquĩ nda eturã jiri seje. ²⁴ Se seicobe mose ibii, ãquĩ nda eturã jiri jẽje reae. ²⁵ ãquĩ aicuate se. Seicobe mose, ãquĩ nda eturã jiri jẽje reae. Nyebe ra Dios semingobe jiri jendese. Se Cristo icua uquia sacua jẽje. Se jembiaabe jiri sacua Cristo rese. ²⁶ Anyae ra oso jendea. Aque mose nda jẽya tuchi Jesucristo rese chã.

²⁷ Ae uresenei senei nguia Cristo riĩ nae, ãquĩ andure chõ jẽingo turã. Airandu turã nda se quia jendese chã. Eĩ nda mbia ñee seje chã. —Hue rĩ ja chõ eriqui ndua turã nye. Huee echĩ mbia cheẽ ndiquisã quisã Jesucristo cheẽ si hue, i nda mbia seje chã. I nda mbia seico mose isho chã. Seico mose abe jendese. ²⁸ iTiri jenyechĩ nda Jesús ucuãyãsa si jẽ! Jẽsiquicheã mose, Dios ra ãquĩ mundua tata cuasu rese cote. “Huee ra asochĩ nde”, i chee rae. “Jesús icuasa ra Dios mingõ bei”, i ra ãquĩ jenĩ cote, jẽsiquicheã mose esi. ²⁹ Jẽ Cristo jẽicuate quia ãquĩ cote. ãquĩ miiñõ eã. —Jeñimbirãcuã abe quiatsu quia serĩ, mbia icuã icuã mose jẽje, i

Cristo quia jẽje co. ³⁰ Sã mbia icuã icuãte riqui seje no. Eĩ si chõ mbia icuã icuã ndiqui nguiã jẽje ãquĩ. Nande jaje bei chõ ñene. Jemaee ndei que equia serese cose resẽ. Se mbia icuã ndiquisã quisã mose. ãquĩ si rese chõ jẽingo nguiã jirandu randu serese namo no.

2

Cristo seteã tuchi que tu ra

¹ Jesucristo jembĩu turãte quia co. Cristo nyesecua mose jendese, jẽyate riqui ãquĩ. Espĩritu Turã abe riqui jendese ãquĩ. Jendua turãte equia emo ndese ãquĩ. ² Nyebe aico nguiã ñee jẽje. Seyate aico raque jendese co. iSecheẽ jemumbayã tuchi quiatsu quia jẽ! iSembia tuchi quiatsu se jẽ! iJendua ata atachĩ nda jẽ! iHue rĩ ja chõ jẽingo ndua jẽ! iHue rĩ ja chõ jẽingo nyesecua nyiese no jẽ! ³ iAbei chiãte ra jẽingochĩ jẽ! iJenguasu ra jẽsaã saãchĩ! iJẽseteã ño jẽingo! —Nde chõchĩ ndeturã sesi, jjenye chõ jenyue! ⁴ “Se chõ jẽ” jjenyechĩ nda jẽ! Emo mbaerã abe rese quia nandeico ndua. ⁵ Sã Jesucristo riqui ndua eãte uchiese no. Erã si chõ nandeico ndua nande abe jẽ. ⁶ Dios rã si rei que Jesucristo ra. Ñimbuseteã tuchi que u ibii ra. Ererecua rã eã ngue eru ibii ra. —Dios rã si chõ taico bei se, iã ngue u ibii ra. ⁷ Mbia rerecua tuchi rei que Jesucristo ra. Huiico mose ibate. Mbia mo na ngue eru ibii cote ra. Mbia mbaecha reã na ño ngue eriqui ibii cote ra. Mbia rimba rã. ⁸ Mbia mo na ño ngue ae ra. Ibii eico mose cote. Mbia rerecua que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireite mano ira rese. ⁹ Nyebe Dios riqui nguiã Jesucristo mbuchecua beite co cote. Mbia rerecuarã tuchi Dios Jesucristo mingõ co cote. ¹⁰ Mbia ra

ngoi ja chee ngũĩã ndese Jesucristo je ñee. Ae siqui ja íbii. Ae siqui ja íbátee no. Ae siqui ja íbiqui rĩ. Ũquí ja ra ñee turã Jesucristo je. ¹¹—Jesucristo rei mbia rerecua ja, i chee ra ũquí ja ñee. Ũquí mose ra Dios ia tuchi cote.

Secheẽ jëisi chooño eẽ ño nguiã, i Pablo

¹² Secheẽ ngue jemumbayãte quia seico mose jendese. Ishote aico jësi co. Secheẽ jemumbayã tuchi quiatu quia isho seico mose abe. Cochee jiri quiatu jëingo Dios je. Jëingo bei tuchi quia erese. Jenderao chee ra ibate mbae icuã si. ¹³ Dios quirãcuã ndiqui jeñiangui re ũquí. Dios quia mbae turã nyosei uquia nguiã jëje. Dios mii ño jemingo nguiã ubi rese.

¹⁴ Mbae turã jësaã turã ja chõ. Ñee icuã icuã ndocoi. Teã teã ndocoi. ¹⁵ Eĩ nda mbia mo ñee icuã icuã eã jëje. Eĩ nda jëicuã eã emo je. Dios riirĩ ño jë nde. Sã nyasitata riqui mbae resae jate itondáruu no. Eĩ ño jë nde. Nyasitata rã si chõ jë nde. Mbia icuã ndesae ja. ¹⁶ Jëingo mbia mingo beisa renei nenei tuchi mbia je ũquí. Nyebe ra seya tuchi jendese Cristo tu mose. Secheẽ jëisi chooño eã ño nguiã. Jaembaaquiato chooño eã ngue Cristo rĩ nda. ¹⁷ Secheẽ nguire jëingo Dios icuate ũquí cote. Secheẽ nguire jendete jemee tuchi mose Dios je, seya tuchite ra jendese cote. Mbia nda sei quia rei nguiã Jesucristo rĩ, seya bei ra aico jendese, jendete jemee tuchi mose Dios je. ¹⁸ Jeñimbua chõ nguia serese. Sã seyate aico co no.

Timoteo tamondo jëje Epafrodito rese, i Pablo

¹⁹ Jesús eno i mose, Timoteo tamondo rã jendea. Eĩ nda seya jirandu mose jendese. ²⁰ Timoteo rã si ãte emo ndua tuchi jendese. ²¹ Umbarã achõ ndese chõ eataque riqui nguiã ndua ndua.

—Ã tasaã saã mbei Jesucristo je, i ãte equia ũquí. ²² Sã eriri ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei nenei mose serese. Siqui turã mbeite que equia serese ra. Ũquí jëicuate quia ũquí. ²³ Nyebe ra Timoteo amondo jendea. ãtatea rã nyii. Mbia ra setarõ ji mii mbei a reae. Sembusẽ nda re no ae. Ũquí tatea rã nyii. Ũquí ndeare ra Timoteo amondo jendea. ²⁴ Aĩ mbeite ndua Dios rese a. Ae ra sembusẽ jei reae. Semondo ra jendea cote reae.

²⁵ Epafrodito abe tamondobe jëje. Ae jemondo seje nyii seraarõ sacua nae. Seresenda turãte riqui seje co. Dios cheẽ nenei nenei serese. Senongue rã tuchi eriqui seje co. ²⁶ Mae sete equia jendese co cote. —Mbia jiranduchi serasi rese re, i equia jeni co. Nyebe eya eã ndiqui nguiã nduate jendese cote. ²⁷ Ae bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no. ²⁸ Nyebe Epafrodito amondo nguiã jëje aque. Jembia sacua erasiã ndese cote. Seya eã nda sasẽ jiri jemae mose erese cote. ²⁹ Nanderesenda tuchi chõ ae Jesucristo rese re. Ngasẽ mose pee, jëya chõ erese. Jëisi turã ño. Eraanguia rese jëingo turã mbei Jesús quiato. ³⁰ Jesucristo rĩ ngue mano serĩ serĩte ra. Jesucristo cheẽ nenei nenei mose. Siquiche ãte que equia ra. —Amanochĩ nda se re, i ãte que equia ra. Sereaquiato turã tuchi que equia ra. Ishote quiatu ngue jëingo nguiã jë. Sereaquiato aronea.

3

Cristo mii ndese aico cote, i Pablo

¹ ¡Jêya bei chõ jêingo Jesucristo rese jê! Ae asenei senei nguia jêje nyii nae, ùquĩ sí tasenei senei jêje. Sebite secheẽ nenei nenei sí jêje. Jendua bei sacuaẽ erese.

² Ae siqui nyacua raãte nae, ùquĩ si jenyicuasẽ ño nguia. Eicuãte riqui ùquĩ. Aba rete sia chooño ño ùquĩ nde. Mbia mbaaquiato turã ndocoĩ. ³ Circuncisión ño nande re. Nandechiangui re chõ nandeico nguia Dios rerequia nande ã. Nande chõ nandeya riqui nguia Jesucristo rese ã. —Mbia circuncisión naa mose, aque mose quia ra Dios emingo bei cote, i chõchĩ emo hue jenda nguia ùquĩ. Nandequiato jiriã tuchi chõ ùquĩ nde. ⁴—Dios ra semingo bei, mbae turã naa naa mose, ae rei que se quia nyii ra. —Seturã ñi nda Dios semingo bei, i chõchĩ emo. Seturã tuchi raque eriqui ùquĩ si. ⁵ Sechacuia mose, ocho días mose que circuncisión naa seje ra. Israelita chõ se re. Benjamín ndiirĩ nducucha chõ se re. Hebreo chõ se re. Paba abe que hebreo ra. Fariseo que se nyii ra. Moisés chimbessa que amumbayã nguia ra. ⁶ Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbessa mumbate co, i aroneate que equia serĩ nda. ⁷ Ùquĩ ñi ngue aico secuas raã naa tuchi cose ra. Jesús icuayã mose se. Mbae eã tuchi chõ ùquĩ seje cote re. Cristo rese quiato aico nguia co cote. ⁸ Mbae mo ndese aico queteã eãte co cote. Aico ndua eãte mbae mo ndese co cote. Jesucristo mĩ aicuate quia co cote. Ùquĩ eturãte mbae ja si seje cote. Jesucristo rĩ aico hui jate mbae si co cote. Iti rã ño mbae ja riqui nguia seje cote. Seico bei sacua Cristo rese. ⁹ Cristo rese tuchi chõ aico nguia co cote. Aico bei rei que Moisés chimbessa rui nyii ra. Ùquĩ

ñi eã ño Dios seisi turã nguia. Se Jesucristo icua mose, ùquĩ mose quiato ngue Dios seisi turã nguia. Ae Jesucristo icua quia nae, ùquĩ Dios isi turã ño nguia. ¹⁰ Cristo aicuae tuchichĩ nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandeicuã ndiquicharõ no. Eĩ ae rã nda mano mbae icuã si chã. ¹¹ Eĩ mose ra Dios seraaque mbuquera si mingo bei cote.

Cristo mĩ ndese aico ndua co cote, i Pablo

¹² Mbae quia asaã ja eãte rei nguia. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacua ae rã si ra. Jesucristo turã na tuchi aicoã ndaque namo co. Nyebe aico nguia siqui tuchi erui co. Seico sacua tuchi chee ae rã si cote. ¹³ Ae ra Dios mee seje, ùquĩ asiiti ja eãte. Ae eĩ eĩ seje cose, ùquĩ si aico tesareite co. Ae ra Dios mee seje, ùquĩ nda asiiti. Ùquĩ mĩ ndese chõ aico nguia ndua co cote. ¹⁴ Ae siqui tuchi quia Jesucristo rese, ùquĩ je quia ra Dios premio mee. Nyebe aico tuchi nguia erese co. Premio isi sacua. ¹⁵ ¡Eĩ nande ja tuchi quiato quia siqui Jesucristo rese jê! Nande eicua tuchi mose. Jendua ja eã mose hue rĩ, Dios ra ñee jêje. —Ã ndese chõ jêingo, i ra jêje. ¹⁶ Ae nandesiiiti nae, ùquĩ ndese bei chõ nandeico. Ae rĩ Dios nandembaaquiato quiato nyii nae, ùquĩ ndese bei chõ nandeico. ¹⁷ Serui bei jêingo, Seresenda. Ureico bei Jesucristo rui ã. Sã mbia siqui bei urerui. ¹⁸ Mbia tubiriã ndiqui Cristo ucuayãte ã. Ùquĩ ae rei que se quia jêje nyii resẽ. Aba mbucheseo serĩ. “Cristo que mano mbia riquicharõ nda”, ùquĩ andu

sereâte. ¹⁹ Ũquĩ nda nyoi ja tata cuásuu. Ubi rese achõ ño ũquĩ ndiqui nguiã. Eireĩ nguiâte. Eya chõ eriquichĩ nguiã huĩcuã ndese. Ibi jenda achõ ndese chõ eriquichĩ nguiã ndua. ²⁰ Jesucristo riqui nanderirõ mbae icuã si co. Ibei jenda chõ nande cote re. Jesucristo ra tu ibei si nanderea cote. ã nandeico eraarõ arõ ã namo. ²¹ Jesucristo tu mose nande je ibii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chõ siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirõ ja arõte uquirãcuã je no. Eĩ nda nanderete je.

4

Jëya bei chõ jëingo Cristo rese

¹ Sechesecua, andua tuchite quia jendese a. Amaese tuchi se quia jendese a. Seya tuchite aico jendese a no. jëingo turã tuchi chõ Jesucristo rese jẽ! ² Evodia je tacheẽ. Síntique abe je tacheẽ. ¿Mbaerã jëingo siqui icuâte nyue re? Jëingo turã ño jenyue ae. Jesús quiato chõ jẽ ndesẽ. ³ Nde abe je tacheẽ, Seresenda. Ũquĩ cuña emingo turã nyiese. Eteaquiatu bei quia. Ũquĩ ngue siqui bei serese Jesús cheẽ nenei nenei mose ra. Clemente rese abe no. Eataque rese abe no. Dios que ũquĩ mbae nombre mii mii libro umbae rese ra. —Ũquĩ nda siqui bei serese, i que ra. ⁴ Jeñimbã bei Jesucristo rese. Jeñimbã tuchi jẽ! ⁵ Sã mbia mae ja jëturã ndese. Jẽ abei rese. Achite Jesucristo ñi tu a. ⁶ Pari pari jenyechĩ nda mbae mo je. Jeñee ja quiatu Dios je. —Mbae mo embu ure je, jenye chõ nguia ee. Gracias jenyee chõ nguia ee. ⁷ Ũquĩ mose ra Dios jembia tuchi. —Mañi Dios quia ã mbia tuchi re, i nda mbia mae mose jendese chã.

Jesucristo ra jeñia mbucoi tuchi. Jesucristo ra jembia bei mingo no.

Mbae turã ndese chõ jëingo ndua

⁸ Hui bei nonde ã abe tambesa jëje. ¡Mbae icuã ndese ra jenduachĩ jẽ! Mbae turã ndese chõ jëingo ndua. Ae riĩ nandeico ñee turâte, ũquĩ ndese chõ jëingo ndua. Ichõĩñosa reã ndese chõ jëingo ndua. Ae Dios bite nae, ũquĩ ndese chõ jëingo ndua. Mbae quishĩ ndese chõ jëingo ndua. Ae rese mbia turã ndiqui mae sete, ũquĩ ndese chõ jëingo ndua. ⁹ Ae asenei senei nguia jëje nyii, ũquĩ ndese chõ jëingo jẽ. Ae eraã ndese jëingo mae mae seje nae, ũquĩ ño jesaã saã mbei quia. Ũquĩ naa naa mose, Dios ra siquijendese. Jembia bei ra equia.

Jesús quiato ofrendas mondo Pablo je

¹⁰ Jendua ramombe equia serese ũquĩ. Dios sembia tuchite quia ũquĩ ndese co. Jëtesarei eãte rei que equia sesi nyii ra. Mbae que jemondo aroneate quia seje nyii ra. ¹¹ —Mbae ãte seje. Mbae mo embu seje, ae ãte se quia jëje co. Sembae eã mose, seyate ũquĩ mose. Sembae ñetẽ mose, seyate ũquĩ mose no. Ũquĩ je que achimbaaquiatu se ra. ¹² Sembae eã mose, seyate ũquĩ mose se. Sembae tubiriã mose, seyate ũquĩ mose no. Seya beite aico co. Seriãcuã mose. Serio mose abe no. Sembae tubiriã mose. Sembae eã mose abe no. ¹³ Cristo que uquirãcuã mee seje ra. Equirãcuã je mbae asaã ja arondete. ¹⁴ Coche ngue mbae jemondo nguia seje. Sembae eã mose. Seyate raque sembã eã mose. ¹⁵ Jẽ ae chõ ngue mbae jemondo mondo bei nguia seje. Se Jesús cheẽ nenei namo mose bei chõ ngue mbae jemondo mondo nguia seje. Iglesia mo abe que mbae mee ãte seje ra. Jẽ ae chõ ngue re. Filipos jenda ja. Se Jesús cheẽ nenei nenei

namo mose jêje, aque mose bei chõ ngue mbae jemondo mondo seje. Seso ramo mose Macedonia si. ¹⁶ Sã ñi mbae mo jemondo mondo seje Tesalónica seico mose no. Mbae eã mose seje. ¹⁷ —Mbae mo jemondochõ seje, ae ãte quia jêje a. Dios je chõ jêingo nguiã emondo ãquĩ. Dios ra mbae mondo tuchi jêje eribishorõ. ãquĩ ndese quiatu seya riqui nguiã. ¹⁸ Ae jemondo seje namo Epafrodito rese nae, ãquĩ ngue aisi ja ra. Dios bite jeñimondo. Ofrenda turã tuchi que ãquĩ Dios je ra. Mbaete rei sembae cote re. ¹⁹ Jesucristo resenda chõ jẽ nde. Ae emoate jêje nae, ãquĩ nda Dios mee ja jêje. Dios quia mbae quereco ja nguiã. Equirãcuãte quia ñene. ²⁰ Sã mbia ñee turã mbei Dios riĩ. Nanderu riĩ. Amén.

Hui bei chõ ã cote re

²¹ Jesucristo quiato je saludar jenye ja seje. Ae Jesús quiato riqui serese nae, ãquĩ ucheẽ mondo quia saludar i jêje aque. ²² Jesús quiato a jenda ja ucheẽ mondo quia saludar i jêje aque. César chuchua jenda abe ucheẽ mondo quia jêje aque. Ae siqui quia Jesús rese, ãquĩ. ²³ Sã Jesucristo turã tuchi riqui jẽ ja je. Amén.

LA CARTA DEL APOSTOL SAN PABLO A LOS COLOSENSES

Pablo embesa mbesa Colosas jenda je

¹ Pablo chõ se re. Dios chiirabo chõ se re. Jesucristo que seirabo mingo ucheẽ nenei nenei sacuaã nda. Timoteo rese aico ã mbesa mbesa jêje a. Nanderesenda Timoteo. ² Dios rimba Colosas jenda je chõ aico nguiã co mbesa mbesa a. Cristo icuasa hue jenda ja je. Ae Cristo icua tuchi quia nae, ãquĩ ja je. Sã Dios turã ndiqui bei jendese. Sã eriqui jembia bei. Sã Jesucristo abe riqui bei jendese.

Pablo ñee Dios je Jesús quiato rĩ

³ Nandererecua tuchi rei Jesucristo. Dios rei eru. Ureico beite ñee Dios je jenĩ ã. Gracias ure beite equia jenĩ ã. ⁴ Ureirandu turãte quiatu ngue jendese re. Jesucristo jêicuate quiatu nguiã ure je ãquĩ. Jenyesequa tuchi quiatu nguiã Dios quiato rese ãquĩ. ⁵—Cristo rese ra nandeico je ibate, jenyete quiarei equia eicua ãquĩ. ãquĩ ndese que jêirandu tuchite nyii ra. Jesucristo cheẽ nenei nenei namo mose jêje nyii. ⁶ Jesucristo quiato echeẽ senei senei mbeite quia mangue chooñoa jenda ja je ã. Nyebe Jesús quiato riqui nguiã ñimbeta i i tuchi ã. Sã nandeico mbae a ucua ucua no, eĩ si chõ ñene. Sã eriqui Jesucristo cheẽ nenei nenei jêje nyii no. Sã Jesucristo cheẽ jeñia mbitirõ eandu ramo mose no. ⁷ Epafras abe que jembaaquiato quiato Cristo rĩ nda. Cristo resenda tuchi chõ ae re. Ae chõ Cristo cheẽ senei senei turã nguiã co. Nanderesenda tuchi chõ ae re. ⁸ Ae que sembiirandu turãte jendese ra. Espíritu Turã ndiqui tuchi jendese ãquĩ. Nyebe jêingo

nguiã nyesequa turãte mbia rese ãquĩ.

⁹ Ureirandu mose jendese ãquĩ ndese, aque mose bei chõ ureico nguiã ñee Dios je jenĩ ã. Dios jemingo bei sacuaã ubi rese. Ucheẽ abe rese. Dios uaquiato mee sacuaã jêje. ¹⁰ Jêingo turã sacuaã Dios mbia. Jêingo turã sacuaã mbae turã ja rese. Jê Dios icua i i tuchi sacuaã. ¹¹ Dios jembirãcuã tuchi sacuaã uaquiato je. Jeñimbirãcuã tuchi sacuaã mbae rasi je. ¹ nda jêingo tochi tuchi mbae ja je. ãquĩ mose ra jêyate no. ¹² Ureico gracias i tuchi Dios je ã. Ae quiatu ngue nandembuchiicabo nguiã. Ae ra Dios mee uquiato ja je mbae turã nae, nande abe je ra emee. Dios quia nandererequia turãte nguiã nyaashĩ na co cote. ¹³ Mbae icua nguiatu que nanderereco quia itondáruu nyii ra. Dios que nandembui ãquĩ si cote ra. Nguiĩrĩ ndese que nandemingo cote ra. ¹⁴ Dios riiĩrĩ ngue nandeisirõ umbaerã mbei ra. Mano ngue nanderiquicharõ nda. Nandeicua ngue embutiã mbei nyesi ra.

Cristo que mano nandemingo turã sacuaã Dios rese ra

¹⁵ Mbia mae aroneate raque Dios rese. Dios rã sí tuchi chõ Cristo re. Ae rane ngue siqui Dios chiao mbae ja si ra. Ae que nyecua u mbia je cote ra. ¹⁶ Dios ae que mbae chao eã nda. Nguiĩrĩ ndese quiatu ngue mbae ja ao nguiã. Mbae iba-tenda ao ja. Mbae ibi rĩnda abe ao ja no. Ae rese nandeico mae ã nae, ãquĩ ja que Dios chao nguiĩrĩ ndese ra. Ae rese nandeico mae aroneate nae, ãquĩ abe que echao nguiĩrĩ ndese no nda. Mbia rerecua ja abe no. Aba checuayã ja abe no. ãquĩ ja que Cristo chao ngu rese ra. Cristo mbaerã ño ãquĩ ja re. ¹⁷ Mbae ao ja nonde Cristo riqui rei nyii. Erĩ ño mbae riqui ja

nguiã ã cote. ¹⁸ Dios quiato rerecua j a chõ Cristo riqui nguiã co. Sã nandeãquĩ nanderete rerecua no. Cristo rei mbae i tuchi. Mbae i ja. Ae rane ngue quera si manonde ra. Ae rei mbae rerecua j a tuchi. ¹⁹ —Se rã sí tuchi Cristo jẽ, i que Dios ra. ²⁰ Cristo mano mose, nandemingo turã sacua Dios rese chõ ñene. Nande mii mingo turã sacua eã ño ñene. Mbae ja mingo turã sacua Dios rese chõ Cristo mano nguiã. Mbae ja ibi riinda. Mbae ibei riinda ja abe no.

²¹ Ishote que jẽingo Dios si nyii ra. Mbae icua naa naa mose. Uquĩ mose que jẽingo Dios ucayãte ra. Jendua ndua icuate que equia erĩ nda. Namo nguiã eriqui nguiã jemingo turãte uchiese ũquĩ. ²² Cristo quiatu ngue mano nguiã jenii. Mbia rete raanguia rerequia mose. Mbae rasi que esaã tuchi umano mose ra. Jenii ño ngue mbae rasi raã nguiã. Jẽicua mbutiã sacua. Jemingo turã sacua icue Dios mbaerã. ²³ Nyebe jeñimbirãtã jiri quia Jesús icha rui. Jeñimondocho eã mbei quiatu quia jẽ. Jẽhui eã ño Jesús cheẽ turã si jẽ. Jesús cheẽ turã ngue jeñandu tuchi quia. Mangue chooñoa jenda ja que echandu ra. Se abe asenei senei tuchi quia Dios cheẽ nguire co. Pablo chõ se re.

Dios que seirabo ra, i Pablo

²⁴ Se mbae rasi raã mose jẽje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui nguiã. Nyebe seyate riqui nguiã serete mbae rasi raã mose Cristo quiato je. ²⁵ Dios que seirabo uquiato mbaaquiato quiatu ja sacua nda. Iglesia jenda ja. Dios cheẽ mbuchecua ja tuchi sacua jẽje. ²⁶⁻²⁷ Dios que seirabo judíos eã mbaaquiato quiatu

sacua nda. Ae Dios mbuchecua eã mbei judíos je nyii nae, aico ũquĩ mbuchecua Jesús quiato ja je ã cote. ã ndei ã: Cristo riqui jeñiangui re ã cote. Ae mii ño abamingo arõ nguiã Dios rese co. Uquĩ ño Dios mbuchecua ramo nguiã uquiato je co. ²⁸ Cristo mii nii ño aico nguiã ñee mbia je co. Mbia ambuti mbuti chõ nguiã Cristo icha rui co. Seaquiato je chõ aico nguiã mbia mbaaquiato quiatu Cristo rĩ co. I nda Jesús quiato ja riqui siqui i i tuchi erese. ²⁹ Nyebe serecoteã tuchite riqui nguiã ũquĩ ndese co. Dios quia sembirãcuã mbeite nguiã co. Mbia mbuti mbuti sacua Cristo icha rui.

2

¹ Co secheẽ jeñandu rã. Andua ndua tuchite se quia nimbecoteã jendese co. Acheẽ tuchite se quia Dios je jenii co. Laodicea jenda nii abe no. Ae mae ãte quia serese Jesús quiato nae, ũquĩ nii abe no. Mbia mbaaquiato icua icuãsa riqui jembui serite Cristo si ũquĩ. ² Jẽ ja rĩ aico ñee Dios je co. Jẽingo i i sacua Dios rese jeñiangui re. Jenyesequa ja sacua jenyiese. Jendua ja sacua hue rĩ si. Jẽaquiato tuchi sacua Cristo rĩ. I nda Cristo jẽicua tuchi cote. ³ Cristo mii tuchi chõ aba mbaaracua nguiã co. Ae mii tuchi chõ aba mbaaquiato nguiã Dios rese co. ⁴ Mbia jembuirĩ irĩ eã sacua ño aico nguiã ñee jẽje co. Mbia cheẽ turã abareãte raque. Jesús cheẽ ndui eãte quia ñene. ⁵ Aico ndua ndua tuchi jendese co. Siqui rocoĩ jendese. Ae rese airandu jendese nae, sembia tuchi chõ ũquĩ nde. Jẽingo turã mose jenyiese. Jẽ Cristo icua i i tuchi mose. Nyebe seya bei tuchi riqui nguiã jendese co. ⁶ Sã Jesucristo jẽisi nyii no, eĩ jenye si chõ nguia siqui bei erese. ⁷ Sã ira riqui ngao mondo tuchi ibiqui rĩ no. Ñimbirãcuã tuchi sacua. Eĩ jenye si

chõ nguia jê abe jê. Jeñimbirãcuã ño nguia Cristo rui. Cristo jêicua tuchi quiatu quia. Secheẽ ñiinda rui sí. Gracias jenye bei chõ nguia Dios je.

Dios que jembiasu Cristo rã cote ra

⁸ Mbia ra jembiĩrĩ irĩchĩ jembiĩcha nonde Cristo si jê. Ũquĩ ñee turã arõte raque. Ñee iru iru chõ nguiã ũquĩ. Ñimbucha eãte equia Cristo rese ũquĩ. Mbia cheẽ achõ ño echeẽ nde. ⁹ Dios rã si tuchi rei Cristo. Mbia rete raãte raaque Cristo rete. ¹⁰ Ũquĩ jẽingo ñimbucha Cristo rese ũquĩ. Cristo rã sí tuchi rei nande cote. Cristo quiarei ererecua tuchi mbia rerecua ja si. ¹¹ Cristo que jembei jenyioseisei icuã si cote ra. Jemingo que icuẽ Dios mbaerã cote ra. ¹² Ũquĩ jẽingo Dios quirãcuã icuate ũquĩ. Sã mbia Jesús raaque ati rei no. Eĩ si chõ jê Jesús icua mose re. Jendaaque ati rã si chõ jê Jesús icua mose re. Sã Dios Jesús mbuquera si uquirãcuã je no. Eĩ si chõ jê Jesús icua mose re. Jembuquera si rã ño jê Jesús icua mose re. Dios chõ Jesús icua uquia nguiã jêje. ¹³ Isho que jẽingo rei Dios si cose ra. Jenyioseisei osei icuã ndese siqui bei mose. Jê jêicuã nderequia bei mose. Dios que nguco mee jêje cote ra. Jê Cristo icua mose. Dios que jêicuã mbutiã cote ra. ¹⁴ Ae icuã nandesã saã nguia Dios je nae, Dios que ũquĩ mbutiã nandesĩ ra. Ae cheẽ nandemumba mumba quia mbia nae, ũquĩ ñee ngue Dios mbutiã nandesĩ cote ra. Dios nandeicuã mbucha raanguia Cristo rese chõ ñene. Cristo chĩ mose cruz rese. ¹⁵ Cristo mano mose que aba checuayã nderecua quirãcuã mbutiã nda. Cristo que aba checuayã mbuquirãcuã nea ja ra. Mbia resa rae que embuquirãcuã nea ja ra.

Mbia chisaã saã ndese ra jẽingochĩ jê

¹⁶ Sã emo jendiquisã quisã eã mbei mbaeiae mo si. Jê mbaeiae u sereã mose, jêu eã ño. Jê euse mose, jêu chõ. Jê jẽingose mose mbae mo ndese sábadu mose, jẽingo chõ erese. Jê jẽingose mose mbae mo ndese nyasi yasu mose, jẽingo chõ erese. Jẽingo sereã mose erese, jẽingoã erese. ¹⁷ Cristo siqui nonde ibii chõ ngue ũquĩ ja nyii re. Mbia Cristo ru raarõ sacua ño ngue ũquĩ nyii re. Cristo tu mose que ũquĩ quiachã ja cote ra. ¹⁸ Mbia jembiĩrĩ irĩchĩ jembiĩcha nonde Cristo si jê. Ae useteã saã ñooño nguia nae. Ae “Dios chõ ñene” i quia ángeles je nae. “Se quiatu” i chooño ño nguiã eaquiato rocoĩ. Ndua turã eã ño nguiã Dios rese ũquĩ. Unduasa rese achõ ño eriqui nguiã ucuasu raã naa ũquĩ. Ũquĩ nda jembiĩchachĩ Cristo si jê. ¹⁹ Ñimbucha eã ño nguiã Cristo rese ũquĩ. Ererecua raque Cristo. Sã nandeãquĩ ndiqui nanderete mingo turã ja no. Eĩ si chõ Cristo uquiato mingo turã ja nguiã nyiese ã. Nyebe Cristo quiato riqui nguiã Cristo icua i ite ã. Dios chõ Cristo icua uquia i i nguiã ee.

²⁰ Cristo mano mose que jê abe jemano erese resẽ. Mbia chisaã saã ima si que jêhui turã ndesẽ. ¿Mbaerã nda ũquĩ ñee ndui si jẽingo si cote re? ²¹ Sã ũquĩ ndiqui ñee no: “Jẽocochĩ nda ã ndese. ã nda jẽuchĩ no. Ũquĩ nda jẽisichĩ jêo je no”, sã eriqui i no. ¿Mbaerã jẽingo ũquĩ ñee mumbayãte re? ²² Mbia cheẽ achõ ño ũquĩ ndesẽ. Dios cheẽ eã ño ũquĩ ndesẽ. Nandechiurã ño mbae ja resẽ. ²³ Ũquĩ ñee turã arõte raque. Eturã arõte raque mbia mbaeiae uã mose. Mbia mbaeiae uã mose, eaquiato arõte raque. Siqui mingue arõte raque. Ũquĩ nda aba chioseisei osei icuã mbutiã eã. Ũquĩ nda aba mingo eã Dios mii

ndese.

3

Jendua chã mbae ibatenda rese

¹ Dios que jendaaque mbuquera si Cristo rese resê. Nyebe jêingo mbae ibatenda oseï. Mbae ibi jenda oseï rocoï. Cristo quia chĩ nguiã ngoi ibate ngu jii hue. ² Jendua quiatu quia mbae ibatenda rese. Mbae ibi jenda rese ndua rocoï. ³ Jemano ngue Cristo rese resê. Dios que jembucha Cristo rese resê. Nyebe Dios riqui nguiã jendeco rerecoquiato jêje co. ⁴ Dios chõ nandereco mingo nguiã Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

Cose ndare rã eã ño jêingo nguiã ã cote

⁵ Ae icuã jendeco quia jeñiangui re nae, ãquĩ icuã jêquiti chõ jenyiesi. Jenyioseï oseï icuã jêquiti chõ jenyiesi. Jêingochĩ nda jeninisiã mo ndese. Jendu eã ndese ra jêingochĩ no. “Aque rese nda aico rã ña”, jenyechĩ nda emo nii jê. Mbae icuã mo ndese ra jendua ndua jirichĩ jê. Emo mbae ra jenyoseï choseichĩ jê. Dios abareã ndese siqui raanguia chõ ãquĩ nde. ⁶ ã icuã ja riĩ nda Dios mbia mbasi. Ae echeẽ mumba mumbate quia. ⁷ Jê abe que ã icuã jêsaã saã tuchi quia nyii ra. Cristo icuayã mose. ⁸ ã icuã jêjea ja chõ jenyesi cote. Jê paama i. Jêicuã icuã nyue. Jeñee nyecua nyecua emo nii. Jenyuru icuã. ã jêjea ja chõ jenyesi. ⁹ Jeñee ñooñochĩ nda jendesenda jê jê. Jê mbae oseï oseï icuã ñiinda que jembuquiachã jenyesi resê. Jenyisaã saã ima jêsaã eãte quia ãquĩ cote resê. ¹⁰ Jeñimbiasu ji chõ jêingo nguiã ãquĩ. Nyebe Cristo riqui nguiã jembaaquiato tuchi Dios riĩ ãquĩ. Jêingo turã sacuã Dios rã si. ¹¹ Cristo quia rei

mbia mbuchiabi abiã tuchi. Judíos raque. Judíos eã ndaque. Ishonda mo ndaque. Ae eaquiataate raque. Mbia rimba raque. Mbia rimba eã ndaque. ãquĩ ja Cristo mbuchiabi abiã tuchi. ãquĩ ja chianguï re Cristo riquise rete. Cristo siqui mose nandechiangui re, ãquĩ nguia rei eturã tuchi mbae ja si.

¹² Co Dios riqui nyesecua tuchi jendese co. Dios que jêirabo mingo icúe umbaerã nda. Nyebe jêingo nguiã siqui turâte. Jêya eã ño jêingo mbia rese. Jêseteã ño jêingo mbia rese. Jêingo tochi chõ nguia. Jendoseĩ nguiatu chõ jêingo. ¹³ Jeñimbiracuã ño nguia jendesenda rese. Jêtesarei chõ nguia jendesenda icuã icuã mose jêje. Sã Cristo tesarei jêicuã si no. ¹⁴ Jenyesequa tuchi quiatu quia mbia rese jê. Dios cheẽ tuchi chõ ã nde. Jenyesequa tuchi mose mbia rese, mbae turã ja rese chõ nda jêingo tuchi cote. ¹⁵ Jeñimbria bei chõ nguia Dios rese. f nda jemingo turã mbei jenyue. ãquĩ nii ño Dios jemingo nguiã icúe umbaerã. Jesús rete mii na ño Dios jemingo nguiã ãquĩ. “Coche ñene” jenyê bei chõ nguia Dios je. ¹⁶ Sã Cristo cheẽ ndiqui tuchi jeñiangui re. Jêaquiato tuchi nda jêingo chã. Jenongue jembaaquiato quiatu chõ nguia. Jenongue jembuti mbuti quiatu quia Cristo cuti. Jêirasei rasei tuchi quiatu quia Dios je. Himnos. Salmos. Jêya chõ jêingo irasei rasei Dios je. ¹⁷ Jê mbae raã mose, Jesús riĩ ño jêsaã. Ae jêingo ñee nae, Jesús riĩ ño jeñee. Gracias jenyê bei chõ nguia Dios je Jesús riĩ.

Ae jêsaã nguia nae, jêsaã ño Cristo je

¹⁸ Tacheẽ mbia ninisi je. Jendu cheẽ jemumbayã ño nguia. Diosbi tuchi chõ ãquĩ nde. ¹⁹ Eru, jenyesequa tuchi quiatu quia jeninisi rese. Jêingo tochi chõ nguia ee. ²⁰ Mbia

riirĩ, jendu cheẽ jemumbayã mbei chõ nguia. Jẽsi cheẽ abe no. Diosbi tuchi chõ ùquĩ nde. ²¹ Jendiirĩ nda jembupaama ichĩ jenyue jẽ. Ɛ nda ñimondocho eã. ²² Tacheẽ erimba je cote. Jenderecua cheẽ jemumbayã mbei quiatu quia. Emae eã mose abe quiatu echeẽ jemumba eã. Jẽseteã jẽsaã ñooñoa nguia quia ee. Dios je quiatu jẽingo mbae raã turã ja. Ae quia mae mbeite nguia jendese co. ²³ Jẽ mbae raã mose, jẽsaã turã ño nguia. Mbia je eã ño jẽingo nguia mbae raã. Dios je chõ jẽingo nguia eraã. ²⁴ Dios ra mbae turã mee jẽje jenyisaã turã ndibishorõ. Cristo je chõ jẽingo nguia mbae ao ao ùquĩ. Jenderecua tuchi chõ ae re. ²⁵ Ae mbae icuã saã nguia nae, Dios abe ra mbae icuã mee ee echisaã icuã ndibishorõ. Dios ra emo mbasi chooño eã. Emo nda eisi turã ñooñoa no.

4

¹ Mbia rerecua je tacheẽ cote. Jenimba jembuquiei quiei chooño eã ño nguia. Mbae jẽsaã turã jiri quiatu quia jenimba je. Jẽ abe jenderecua riqui Dios co no.

² Jeñee ñee mbei quiatu quia Dios je. Jẽtesa tesa bei quiatu quia Dios rese. Gracias jenyee bei quiatu quia ee. ³ Jeñee ñee mbei quiatu quia Dios je ure riĩ. Ɛ nda Dios riqui sembucheẽ ñee mbei tuchi mbia je Cristo riĩ. Ae rese mbia riqui jiranuate Cristo rese nae, ùquĩ asenei senei sete mbia je. Nyebe setarõ ji aĩ nguia a. ⁴ —Paba, sã Pablo Jesucristo mbuchecua checua tuchi quia mbia je, jenyee bei quiatu quia Dios je.

⁵ Jeñimbaaracua chõ nguia siqui turã Jesús quiatoã je. Ae Dios bite nae, ùquĩ ndese chõ jẽingo ñimbecoteã. ⁶ Sã embiquesa riqui mbae mbiise no. Eĩ jenyee si chõ nguia ñee turã mbia je. Ɛ nda jẽaquiature ñee Jesús quiatoã ñee ndibishorõ.

Pablo ñee hui bei

⁷ Tiquico si quia jendea aque. Ae ra mbae senei ja jẽje jembiiirandu seriĩ. Ae que mbae saã turã mbeite quia serese ra. Dios rimba turã tuchi chõ ae re. ⁸ Nyebe amondo nguia jendea aque. Jembiiirandu ja sacua serese. Jembia tuchi sacua Cristo rese abe. ⁹ Onésimo abe si quia erese aque. Hue jenda sí chõ ae re. Jesús quiato tuchi chõ ae abe re. Ùquĩ nyeremo nda jembiiirandu tuchi a jenda ja rese.

¹⁰ Aristarco tarõ ji ñi serese a. Ae abe saludos mondo quia jẽje aque. Marcos abe saludos mondo quia jẽje aque. Bernabé nongue riirĩ ño ae re. Ae oso mose jendea, jẽisi turã ño secheẽ nguire. Acheẽ ngue jẽje eri nyii. ¹¹ Jesús Justo abe saludos mondo quia jẽje aque no. Ùquĩ mii judíos que siqui tuchi quia serese Dios cheẽ nenei nenei nda. Ùquĩ ngue sembiante quia mbae raã turã mose serese ra. ¹² Epafras abe saludos mondo quia jẽje aque no. Cristo rimba rei ae no. Jendesenda sí chõ ae no nde. Ae ñee mbeite quia Dios je jeni co. Jẽingo iratã sacua Dios rui. Ae Dios bite riqui nae, ùquĩ ndese jẽingo tuchi sacua. ¹³ Epafras riqui nyesecua tuchite jendese co. Aicuate se quia co. Laodicea jenda rese abe eriqui nyesecua tuchite co. Hierápolis jenda rese abe no. ¹⁴ Lucas abe saludos mondo quia jẽje aque no. Aba rasi rea reasa rei ae. Médico rei ae. Jesús chesecua tuchi chõ ae re. Demas abe saludos mondo quia jẽje aque no. ¹⁵ Jesús quiato Laodicea jenda je saludar jenyee rã ure je. Ninfas je abe saludar jenyee. Ae ñumunua nua nguia Ninfas chuchua Jesús quiato nae, ùquĩ abe je saludar jenyee rã ure je. ¹⁶ Ae ambesa mbesa quia a nae, emondo nonde jẽje a nae, a je leer jenyee ja rã. Aquere jemondo rã Jesús quiato Laodicea jenda je. Ùquĩ abe leer i sacua ee. Ae carta ambesa

Laodicea jenda je nae, jẽ abe leer
jenye ee no. ¹⁷ Jeñee na Arquipo je.
—Ae je Jesús ñee nae, “co esaã seje”
i ndeje nae, ãquĩ esaã turã ja chõ,
jenye Arquipo je.

¹⁸ Hui bei sacuã co ambesa
mbesa quia seo ae je co. Pablo chõ
se re. Jendua serese setarõ ji rese.
Sã Dios riqui turã tuchi jẽje. Amén.

PRIMERA CARTA DEL APOSTOL SAN PABLO A LOS TESALONICENSES

Pablo ã mbesa

¹ Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús riñ. Jesucristo icuasa chõ jê nde. Dios icuasa abe chõ jê no nde. Dios rei nanderu. Jesucristo rei nandererecua. Sã ãquĩ turã ndiqui bei jêje. Sã ãquĩ ndiqui jem-bia bei.

Jesús jêicuate quia ãquĩ

² Gracias, ure bei quia Dios je jeniã ã. Jê ja riñ. Ure ñee mose Dios je, jeniã ño ureico nguiã ñee ñee ee ã. ³ Jesús jêicuate quia ãquĩ. Nyebe jêingo beite nguiã mbae turã ndese ãquĩ. Jenyesequate quia Jesús rese ãquĩ. Nyebe jêingo nguiã Dios cheẽ nenei nenei mbei mbia je ãquĩ. Jesús nyebi sí mose, ãquĩ ño jêsaarõ arõ u nguiã hue. Jeñimbirãcuã tuchi equia eraarõ arõ ãquĩ. ⁴ Seresenda, Dios riqui nyesequa tuchi jendese co. Dios que jêirabo umbaerã nda. ⁵ Dios cheẽ turã ngue uresenei senei nguia jêje ra. Urecheẽ achõ je eã. Espíritu Turã abe que jembaaquiatu quiatu ra. —Ichõñõ eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. ãquĩ ndese que jêingo mae nda. ⁶ Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbiam icuã mose jêje que Espíritu Turã ndiqui tuchi jendese ra. Jembia tuchi sacuã. ⁷ Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya

jenda abe no. ⁸ Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbiam que jirandu ja quia jendese ra. — Dios icuasa rei ãquĩ, i equia jeniã ãquĩ. ¿Mbaerã nda Dios cheẽ asenei ee re? Jembiiirandu turã ngue eno. ⁹ ãquĩ nguia ñee turãte nguiã jeniã ãquĩ. —Tesalónica jenda que Pablo isi turã nda. Pablo resenda abe isi turã. Hui tuchi que Dios raanguia si ra. Siqui bei nonde Dios reco rese cote, i equia jeniã ãquĩ. ¹⁰ — Tesalónica jenda chi Jesús raarõ arõ huee. “Tu ra nyebi ibate si”, i u huee, i equia jeniã ãquĩ. Jesús rei Dios reco riirĩ. Dios que Jesús raaque mbuquera si ra. Jesús ra nanderiquisã mbae rasi si. Dios mbiam icuã mbasi mose.

2

Dios cheẽ uresenei tuchi jêje

¹ Ureso chooño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea. ² Ureso que Filipos nyii ra. Hue jenda que mbiam icuãte riqui ure je ra. Ureirua nua ngue ra. ãquĩ jêicuate quia ãquĩ. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbiam icuã tuchi raque ure je. ³ Dios cheẽ ngue urechabi chabiã tuchi quia erenei nenei nda. Urendua icuã icuã eã ngue equia ñee mose jêje ra. Jembiiirĩ irĩ eã. ⁴ —Mañi nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacuã. Mbiam mbiam sacuã eã ño ureico nguiã Dios cheẽ nenei nenei jêje. Dios mbiam sacuã ño ñene. Dios riqui mae mbeite urechianguí renda rese co. ⁵ Urecuasú que

uresaã saã eãte quia jêje ra. Ure-cheê ñooño eãte que equia jêje ra. Jembĩĩĩ irĩ eãt e que ureico quia ra. —Sã mbia mbae mo mee mee ure je, ure eãte que equia jembĩĩĩ irĩ nda. Dios riqui maete urerese co. ⁶—Jenderecuarã nda ure cote jêl ure eãte que equia jêje ra. Ure eãte que equia mbia mo abe je ra. Cristo chimondo raque ure, echeê nenei nenei sacua jêje. ⁷Ureico turã ngue equia jêje ra. Sã esi mo ndiqui nguiĩĩ nderequia turã, eĩ ure chõ ngue equia jêje ra. ⁸Urechesequa tuchi que equia jendese ra. Nyebe Dios cheê achõ eã uremee nguiã jêje. Mbae ja uremeese rete raque jêje.

⁹Urechisaã saã ndese que jêingo mae tuchite ra, Seresenda. Ureico mose jendese. Mbae que uresaã saã mbeite quia ra. Ure ae chõ urechiurã ureisi isi nguiã. Nyaashĩ mose achõ eã ngue ureico mbae raa naa nda. Itondaru mose ab e que ra. ¹nda je mbae jemondoã ure je. Ure Dios cheê nenei nenei mose jêje. ¹⁰Jesús icuasa chõ jê cote re. Urecuata turãte que equia jêje ra. Jemae ngue equia urerese ra. Dios abe que mae nguiã urerese ra. Ureico mose jendese. Ureico turãte que equia ra. Nyebe emo ñee icuã aroneate urerĩ. ¹¹Jendurã ngue ureico jêje resẽ. Sã emo ndiqui nguiĩĩ mundua turã no. Sã emo ndiqui nguiĩĩ mbucuata turã no. Eĩ si chõ ure re. Jemundua ndua. Jembucuata turã nonde. ¹²Urecheê tuchi que equia jêje. —Dios quiato chõ jê cote re. Nyebe jêingo nguiã Dios mbia beite cote. Dios que jêirabo ra. Dios ra jenderecua tuchi cote. Dios ra uturã mee jêje, ure beite que equia jêje ra.

¹³Gracias, ure bei equia Dios je jeniĩ a. Dios cheê nguiatu ngue jêisi turãte nguiã. Ure Dios cheê nenei nenei mose jêje, jêisi turã ngue ra. Mbia cheê na eã ngue Dios cheê

jêje ra. Dios cheê ngue jembuturã nda. Jê eisi mose. Gracias ure que Dios je, jê echeê isi mose ra. ¹⁴Sã judíos icuã icuã Jesús quiato Judea jenda je no. Eĩ si chõchĩ mbia icuã icuã jêje no, Seresenda. Jê ji jenda chõ eicuã icuã ndiqui nguiã jêje Jesús rĩ ãquĩ. ¹⁵Judíos sí que Jesús iquia nanderererecua ra. Sã Dios cheê mbuchecuasa iquia nyii no, eĩ sí que Jesús iquia no nda. Ure abe mombo no. Judíos icuã tuchi que ãquĩ nda. ã eicuãte riqui Dios je ã. Mbia abe je eicuãte riqui ã no. Mbia ja je. ¹⁶—¿Mbaerã nda jêso Dios cheê nenei nenei Judíos eã je re? i que equia ure je ra. Ureriquisã quisã ndei que equia ra. Dios cheê ngue uresenei mbei bei chõ judíos eã je ra. Dios erirõ sacua eicuã si. Judíos que urecheê siquisã quisã ño nguiã ra. Judíos que huicua saã i i tuchi quia ra. Nyebe que Dios paama i tuchi ee cote ra. Dios ra embasi tuchi cote.

Sesose rete jendea

¹⁷Seresenda, ishote urecu jêsi a. Nyebe ureya eãte riqui nguiã jendese ã. Uremaese rete quia jendese ã. Urendua beite quia jendese ã. ¹⁸Uresose rete rei que equia jendea ra. —Taso erea, ae beite rei que se quia ra. Pablo rei se. Satanás que ureriquisã quisã ño nguiã ra. ¹⁹⁻²⁰Jesucristo ra tu si nyebi nanderea. Seya tuchi aico eraarõ arõ a. Jê nguiã uremom-bia mbia beite nguiã ãquĩ. Jêchĩ Jesús quiato. Nyebe ra ureya jendese Jesús tube mose. Ure Jesús cheê nenei nenei mose que jêisi turã nda. Nyebe ra Jesús ia tuchi urerese eru mose.

3

¹—Tairandu tuchi rã erese, ure tuchi que equia jeniĩ nda. Urendua ndua tuchi que equia jendese ra. Nyebe ure ae ureico nguiã Ate-nas. ²Nyebe que Timoteo amondo

rei nguiã jendea. Jirandu sacua jendese. Dios rimba tuchi que ae ra. Nanderesenda tuchi que ra. Cristo cheẽ turã nenei neneisa que ae ra. Ae que uremondo jendea jemundua ndua sacua Jesús rese ra. ³ Timoteo que amondo jendea ra. ¹ nda jẽhui eã Dios cheẽ si mbia icua mose jẽje. Mbiam icua tuchi que eriqui jẽje ra. Nande je ja que eicuãte riqui ra. Jesús icuasate quia nande re. Nyebe mbiam icuãte riqui nguiã nande je. ⁴ Ureico que equia jendese nyii, aque mose que ureico rei ñee jẽje resẽ. —Mbiam icua tuchi ra eriqui nande je, ure rei que equia jẽje nyii resẽ. ¹ sã ngasẽ cote jẽ! ¹ sã mbiam icua icua nande je cote jẽ! ⁵ Nyebe seiranduse beite riqui nguiã jendese. Nyebe Timoteo amondo rei nguiã jendea. Ureirandu sacua. —¹Quiatu Jesús quiato rea jẽ! Siqui bei rei equia Jesús rui reae. Aba mbĩĩrĩ irĩsa embĩcuã eã ndei reae. Dios cheẽ nandesenei ñooño eã ndei ee reae, ae que Timoteo mondo jendea ra.

⁶ Ae que Timoteo tu jẽsi cote ra. Ñee turãte que u jeni nda. —Hue que echĩ Dios icua tuchi ra. Hue que echĩ nyesecua tuchi Dios rese ra. Nande abe rese que echĩ nduate huee ra. Eyayãte eriqui rei nanderese, ¹ que Timoteo u urembiirandu jeni nda. Ure abe ureyayãte riqui jendese ã. ⁷ —Hue que echĩ Dios icua tuchi ra, ¹ mose que ureya tuchi ra. Mbiam icuãte raque ure je. Seresenda, jẽ urembiate quia ãquĩ. ⁸ Ureya tuchite jendese, jẽingo bei mose nandererecua rese. ⁹ Dios urembia tuchite quia jendese co. Nyebe ureico nguiã gracias ¹ ee co. ¹⁰ Dios je que ureico ñee mbei ra. Nyaashĩ mosechõ eã. Itondaru abe. —Paba, urererao rã mbiam rea, ure bei que equia Dios je jeni nda. ¹ nda jembaaquiato jĩ jẽingo tuchi Dios rese.

¹¹ Dios rei nanderu. Jesucristo

rei nandererecua. ãquĩ je ureico ñee tuchi ã. Urererao sacua jendea. ¹² Sã nandererecua jembuchesequa tuchi jenyiese. Mbiam ja rese. Sã ureico nyesecua tuchi jendese no. Eĩ jenyese si chõ nguia nyesecua mbiam rese jẽ abe no. ¹³ ¹ nda Cristo uquirãcuã mee jẽje. ¹ nda Cristo jemingo icue umbaerã tuchi. ¹ nda jemingo turã mbei Dios rese. Jesucristo tu mose chee ibate si. Mbiam ra ñee icua aroneate jeni cote. Ñee icua aroneate ra Dios je jeni. Jesucristo tu mose ra Dios mae jẽturã ndese. Jesucristo ra tube uquiato ja rese.

4

Jẽingo turã, ¹ Dios mbiam je

¹ Seresenda, tacheẽ tuchi jẽje. Jesús cheẽ ngue uresenei senei tuchi quia jẽje ra. ãquĩ ndui chõ jẽingo turã ndei nguiã ãquĩ. Jẽingo ¹ ¹ tuchi quiato erui jẽ. ¹ nda Dios ia tuchi jendese. Secheẽ ae eã ño ã nde. Jesucristo cheẽ ño ñene. ² Nandererecua tuchi chõ Jesús re. Ae chõ urembucheẽ nguiã jẽje. Ae cheẽ si jẽingo tesarei ãte ãquĩ. ³ Dios jemingo sete quia icue umbaerã co. ¹ Emo ninisi rese ra jẽingochĩ jẽ! ¹ Eru eã mo ndese abe ra jẽingochĩ jẽ! ⁴ ¹ Jeninisi ae rese chõ jẽingo! Jeninisi jendeco turã ño nguia. ⁵ Dios icuasa reã ño mbiam ninisi oseĩ oseĩ nguiã ãquĩ. ¹ Eĩ jenyechĩ nda jẽ jẽ! ⁶ ¹ Jenongue ra jembiĩrĩ irĩchĩ eninisi rese jẽ! ãquĩ naa naa mose ra Dios jembaasi tuchi. Nyebe urecheẽ nguiã jẽje nyii. ⁷ —Jẽingo turã icue sembaerã, ¹ que Dios nande je ra jẽ. —Jẽingo icua icua, iã equia nande je co. ⁸ ¹ Urecheẽ jẽisi turã ño nguia jẽ! Jẽ urecheẽ isiã mose, eĩ jenyese chõ nguiã Dios ucuayã. Urecheẽ achõ eã ño uresenei senei nguiã jẽje. Dios cheẽ ño ñene. Dios sí que Espĩritu Turã mondo nande je ra. ⁹ —Jenyesequa jenyiese, aeã nda jẽje cote. ¹ Mbaerã nda acheẽ jẽje

re? Dios que ñee jêje no. Nyebe jêingo nguiã nyesequa jenongue rese ûqui cote. ¹⁰ Macedonia jenda rese jêingo nyesequa ûqui. Jesús quiato rese. Jenyesequa i tuchi jiri erese jê. ¹¹ jêingo turã ño nguia jê! jêñimbecoteã ño nguia jembae rese jê! jêquiei quiei bei equia jê! Ûqui ngue urecheê jêje nyii resê. ¹² Ûqui naa mose ra Jesús icuasa reã ñee turã turã jêje. Ûqui naa mose ra mbae tiã eã jêje no.

Jesús ra tu nyebi íbii

¹³ Mbia raaque rese taembi-irandu rã. Í nda jêyayã eã mbia raaque rese. Jesús icuasa reã ngue eyayã tuchite riqui mbia raaque rese ra. —Quera si na nye. Nandemae si na erese re, i eã ño Jesús icuasa reã nguiã mbia raaque je ûqui. ¹⁴ Jesús que mano ndei nguiã nyii. Quera si que ra. Nyebe ra Jesús icuasa raaque abe quera si. Sañi Jesús quera si no. Eĩ si ra Jesús icuasa raaque quera si no. Dios ra embuquera si. Jesús rese ra ecuaê. Ûqui nandeicuate quia ã. ¹⁵ Nandererequa Jesús cheê uresenei senei nguia jêje ã. Jesús ra tube íbii. Aque mose ra mano je rane nyoí erea. Ae nandereco nandeico ã nae, ûqui abe ra nyoí erui cote. ¹⁶ Cristo ra tu nguichi ibei si. Ererequa rã nda eru ñee mbia je. Angel nderequa ibatenda ra ñeemombo. Corneta abe ra pu i Dios mbae. Cristo nguichi mose íbii. Aque mose tuchi ra Cristo icuasa mano je quera si. Ûqui nane nda quera si. ¹⁷ Aquere ra nandereco rerao ûqui ndese cote. Ibeishĩ ni nda nandererao ja. Huee ra nandemae tuchi Cristo rese cote. Nandeico bei ra erese cote. ¹⁸ Á ndei Dios cheê ã. Jeñimundua ndua bei quia erese. Í nda jêya tuchi erese.

5

Jêquiche je na Jesús ru chã

¹ —Aque mose ra Jesús ru, ae eã nda jêje, Seresenda. ² Isa chõ mbae mbuquiachãsa riqui nguiã tu. Mbia ndua eã mose ra eru. Eĩ si ra Jesús u, mbia ndua eã mose erese. ³ —Ureico turãt e quia ã ndesê, i ra mbia. Ajee tuchi ra Jesús ru aque mose. Mbia mbutiã nonde cote. Sã nanimbae rasi riqui tu ajee no nae, eĩ si tuchi ra Jesús u ajee. Emo nda oso chee eã. ⁴ Jê nguia jêingo âte nguiã itondaru ûqui, Seresenda. Jêaquiatuã eã ño jê nde. Jê nguia ra Jesús jembae eã u. Mbae mbuquiachãsa rã eã nda eru jêje. ⁵ Nyaashĩ na ño jêingo nguiã jê ja ûqui. Itondaru rã eã ño nandeico nguiã nande ã. ⁶ Nyebe nandechumumba rã mbei chõ nandeico nguiã tesa. Mbia ataque quiarei uque bei. ⁷ Ae uque quia, ûqui ño uque nguiã itondaru. Ae quiacua quiacua quia, ûqui ño quiacua nguiã itondaru. ⁸ Nyaashĩ jenda chõ nande re. Nyebe nandechimbaarua bei quiatu quia nande. Dios nandeicua tuchi quia nande. Nandechesecua tuchi quia erese nande. Dios ra nanderirõ tuchi mbae icuã ja si. Ûqui nandeicuate quia ã. Nyebe ra mbae icuã ocoã nanderese. ⁹ Nandembasi sacua eã ngue Dios nandeirabo ra. Nanderirõ sacua eicuã si chõ ngue nandeirabo nguia. Jesucristo rĩ nda nanderirõ eicuã si. Jesucristo rei nandererequa. ¹⁰ Ae que mano nande je ra. Nandeico sacua erese. Tu ra nandererao siqui sacua erese. Nandereco siqui mose ra nandererao. Nanderaaque chi mose ra nandererao no. Eĩ ja chõ ñene. ¹¹ Á ndei Dios cheê ã. Jê ño jeñimundua ndua nguiã erese ûqui. jûqui jêsaã saã mbei quia jê!

Pablo embaaquiatu

¹² Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguia. Jembaaquiatu quiatuchĩ equia ũquĩ. ¹³ Nyebe jẽingo turã ño nguia ee. Jenyesequa tuchi quia erese. Jembaaquiatu quiatu sacua ño ũquĩ nde. jẽingo turã ño nguia jenyue! ¹⁴ Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ũquĩ jemingobe erese. Ae equirãcuã neate, ũquĩ jembirãcuã. Jẽingo mingue chõ nguia mbia ja je. ¹⁵ Mbia icuã mose jẽje jẽicuã eã ño ee jẽ! jẽingo turã ño jenyue jẽ! jẽingo turã ño mbia ja je no jẽ! ¹⁶ Jẽya bei jẽingo. ¹⁷ jẽñee ñee mbei quia Dios je jẽ! ¹⁸ Gracias, jenyue quia Dios je mbae ja rĩ. Ebi tuchi quiarei ũquĩ. Jesucristo icuasa chõ jẽ nde. ¹⁹ Espíritu Turã nda jẽsiquisãchĩ jẽ. ²⁰ Dios cheẽ mbuchecuaasa cheẽ jeñandu turã ño nguia jẽ. ²¹ —Ma ñee ñooñoa, jenyue tuchi quiatu eicua jẽ. Ñee ñooño eã mose, erui jẽingo. ²² jMbae icuã ja rese ra jẽingochĩ jẽ!

²³ Aba mombiasa chõ Dios riqui nguia co. Sã ae si jemingo icue umbaerã tuchi. Sã ae jemingo turã mbei. Jesucristo tu chee mose ibate si. Mbia ra ñee icuã aroneate jeni cote. ²⁴ ũquĩ nda Dios saã ja jẽje. Ae quiarei ichõñosa reã tuchi.

Pablo ñee hui bei

²⁵ jẽñee mbei quia Dios je urerĩ, Seresenda. ²⁶ Mbia nanderesenda jẽquiaam a ama ja ure je hue jenda. ²⁷ Ñ sechimbesa jẽsenei ja rã nandengue hue jenda je. —Jẽsenei na, i Cristo quia jẽje co. ²⁸ Jesucristo rei nandererecua. Sã ae riqui siqui turã mbei jendese. Amén.

SEGUNDA CARTA DEL APOSTOL SAN PABLO A LOS TESALONICENSES

Pablo chimbesa

¹ Pablo rei se. Silas riqui serese a. Timoteo abe no. Ureico ã mbesa jêje a, Tesalónica jenda. Jê nguia jeñumunua mbeite nguia Jesús je ùquĩ. Jesucristo icuasa chõ jêingo nguia ùquĩ. Dios rei nanderu. Jesucristo rei nandererecua. ² Sã ùquĩ turã ndiqui jêje. Sã ùquĩ ndiqui jemombia bei.

Dios ra mbia icuã mbasi

³ Gracias, ure beite quia Dios je jeniã. Coche ureico nguia ñee Dios je jeniã. Jê nguia jêingo nguia Dios icua tuchite ùquĩ. Jê nguia jêingo nguia nyesequa tuchite jenyiese ùquĩ. ⁴ Nyebe ureico nguia ñee turãt e jeniã. Ae ñumunua nua nguia Dios je, ùquĩ ja urembiirandu turã nguia jendese ã. Jêingo minguede quia mbia icuã je ùquĩ. Jêingo Dios icua tuchite ùquĩ. Mbias icuãte riqui raque jêje. Mbias icuã mose jêje, jê jêturãte riqui ee ùquĩ.

⁵ Sã Dios turã tuchi riqui no jê. Sã mbia mbuchecha turã no. Ae ra ñimbirãcuãte quia mbias icuã icuã mose Jesús rĩ ee nae, ùquĩ je ra mbae turã mondo. Mbae ra emondo mbias chisã turã ndibishorõ. Mbias chisã icuã abe ribishorõ no. ⁶ Ae jembasi mbasi quia nae, Dios ra ùquĩ mbasi tuchi cote. ⁷ Jesucristo ra tu ibate si. I ra eu quia nyecua. Angel cuabẽ ndese ra eru. Jesús ra ángel quirãcuã tuchi queru. Tata rendi rã nda Jesús ru. Eru mose ra mbias icuã icuã eã nande je cote. ⁸ Jesús tu mose ra Dios icuasa reã mbasi mbasi cote. Echeẽ turã mumba mumbasa ra embasi Dios cheẽ turã Jesucristo rĩ. ⁹ Jesús ra ucheẽ mumba mumbasa mbasi tuchi.

Jesús ra emombo isho. Echeẽ mumba mumbasa ra siquã mbei Dios rese cote. Dios quirãcuã ndese abe ra eriquã no. ¹⁰ Ùquĩ nda Jesús saã ucheẽ mumba mumbasa je tu mose. Echiirabo quia ra ñee turã turã mbei erĩ eru mose. Eicuasa ra ñee turã turã mbei erĩ eru mose. Jê abe ra jêingo erese. Ure Dios cheẽ nenei mose, jêisi que ra. Nyebe ra jê abe jêingo erese eru mose. ¹¹ Nyebe ureico nguia ñee ñee mbei Dios je jeniã. Ae Dios bite nae, i nda ùquĩ jêsaã saã mbei quia. Ùquĩ je que Dios “jenyu” i jêje ra. Mbae turã jêsaã saãse rete quia ùquĩ. Sã Dios uquirãcuã mee jêje. Mbae turã naa naa nonde cote. Jesús icuasa chõ jengu nguia huee. ¹² Jê mbae turã naa naa mose, mbias ra ñee turã turã Jesucristo rĩ. Jê abe rĩ nda Jesucristo mbias mbucheẽ turã turã. Dios quia eturãte riqui nguia nande je. Jesucristo abe eturãte nande je. Ae rei nandererecua.

2

Dios ucuãyãsa

¹ Jesucristo rei nandererecua. Ae ra tu nandemunua mbucha uchiese. Ùquĩ ño asenei senei nguia jêje. ² —“Co Jesús ru quia co”, i que Pablo ra, ichõñõ nda mbias serĩ jêje. Jeñanduchõ ño ùquĩ mose. — Co Jesús ru quia co, ae eã se quia embesa jêje a. Mbias mo nda ñee ñooño jêje. —Jesús ra tu cote. Dios que sembiirandu ra, ichõñõ nda jêje. Ùquĩ jeñanduchõ ño. ³ iMbias ra ñee ñooño chĩ jembĩrĩ irĩ jê! Jesús rane nda tuã nguia. Mbias rane nda hui hui Dios si. Dios ucuãyãsa rane nda tu Jesús si. —Emo mose aque tambutiã, i que Dios aque rĩ nda. ⁴ Aque ra Dios resenda ucuãyã tuchi. Dios abe ucuãyã tuchi rae. Dios chuchúaa ra eñi ngoi mbias mbĩrĩ irĩ. —Se rei Dios, ichõñõ nda hui mbias mbĩrĩ irĩ. ⁵ Seico mose jendese que asenei

ja jêje ra. ¿Jêtesareia ndei equia secheê si re? ⁶ Dios ucuâyâsa ra tu emo mose. Eriquisâ ji ae riqui nguiâ aque. Eriquisâ iriâ mose ra eru. Eriquisâsa jêicua quia ûquĩ. ⁷ Mbia Dios cheê mumba tuchi quia ã cote. Dios ucuâyâsa ra tuchõ eã. Eriquisâsa iriâ mose quia ra eru cote. ⁸ Nyecua tuchi ra u mbia je cote. Jesús ra tu eri-charã cote. Jesús nininya tuchi ra tu. Aque mose ra Dios ucuâyâsa iquia. ⁹ Satanás nda uquirâcuã mondo Dios ucuâyâsa je. Dios ucuâyâsa mbuquirâcuã sacua. Mbae icuã chumumbara tuchi ra equeru. Ñee ñooño nda u mbia je. Mbia mae sayã nda esaã saã u mbia mbiirĩ irĩ sacua. ¹⁰ Dios ucuâyâsa icuã tuchi ra Jesús quiatoã je. Jesús quiatoã mbiirĩ irĩ tuchi ra u. Jesús quiatoã nyesecua eã nguia Dios rese resê. Nyebe ra Dios ûquĩ ndiroã eicuã si. Dios ra uquiatoã mbutiã tuchi. ¹¹ Dios rese eriqui nyesecua eãte ã. Nyebe Dios aba mbiirĩ irĩsa mondo nguia ee. Nyebe eriqui nguia “ae beite”, i aba mbiirĩ irĩsa je. ¹² Nyebe ra Dios ñee tuchi Jesús icuasa reã je. Ae mbae icuã saã sete quia, ûquĩ je. —Jêso tata cuásuu, i ra Dios ee.

Dios chiirabo rei jê

¹³ Seresenda, Jesubite jêingo ûquĩ. Gracias, ure bei quia Dios je jeni a. Dios que jêirabo cose nyii ra. Jendirõ sacua jêicuã si. Espíritu Turã jemingo sacua icúe. Jê ichõiñosa reã jêicua sacua. Ûquĩ je chõ ngue Dios jêirabo nguia. ¹⁴ Jesús cheê ngue uresenei senei nguia jêje hueue ra. Aque mose que Dios “jenyu” i jêje ra. Jembuquirâcuã sacua Jesucristo quirâcuã je. ¹⁵ Seresenda, jêhui jêhuichĩ nda esi jê! ¡Urecheê ndui jêingo bei jê! ¡Urechimbasa abe rui jêingo jê! ¹⁶ Dios rei nanderu. Ae quia rei eturã tuchi nande je. Ae quia rei nyesecua tuchi nanderese.

Ae quia rei nandemombia mbiasa. Nandeya tuchi nandeico Jesús raarõ arõ ã. Tube ra nyebi uquiato rea. ¹⁷ Sa Jesucristo riqui jemombia mbia bei. Dios abe no. Sã ûquĩ ndiqui tuchi jendese. Jêhui eã sacua echeê si. **1** nda jênee turã mbei quia querabe. **1** nda jêingo bei mbae turã ndese querabe.

3

Jeñee Dios je

¹ Seresenda, jênee mbei quia Dios je ure rĩ. **1** nda isho ishonda Dios cheê andu ja. **1** nda eandu chooño eã. **1** nda eisi turã jê na si. ² **1** nda Dios mbia icuã ndiquisã ure si. Mbia mĩ mĩ ño Dios icua nguia ã. Mbia ja eã. ³ Nandererecua ñee ñooño eã nguia co. Uquirâcuã nda emee jêje ucheê nguire. Mbae icuã nda esiquisã jêsi. ⁴ Urecheê ndui si chõ jêingo nguia ûquĩ. Ae ure-senei senei nguia jêje, ûquĩ ndese ra Dios jemingo tuchi. Ûquĩ ño aicua nguia ã. ⁵ ¡Sã nandererecua siqui tuchi jendese jê! Jêirandu sacua Dios nyesecua rese nanderese. Jê abe jêingo mingue sacua Jesucristo rã si.

jJêtoite ra jêingochĩ jê!

⁶ Jesucristo cheê tuchi chõ ã nde, Seresenda. Jesús quiato mo tomei mose, jêhui chõ esi. Jesús quiato siqui sereã mose mbae mo ndese, jêhui chõ esi no. Jesús cheê tuchi chõ ã nde. ⁷ Ure rã si chõ jêingo. Uretomei ngue uresaã saã eãte quia jêje ra. ⁸ Jê mo ngue urembuquiaru chooño eãte quia resê. Mbae mo ño ngue uremondo mondo quia urechiurã ndibishorõ ndesê. Urequiei quiei beite que equia resê. Itondaru mose abe. Jê mbae mondochõ eã sacua ure je. ⁹ —Mbae mo embu se, ureã mbei que equia jêje resê. Eturâte raque ûquĩ. Urequiei quiei chõ ngue equia urembaerã ndesê. Jembaaquiatu

sacuã. Ure rã si jẽingo sacuã quiei quiei. ¹⁰ Ureico mose jendese que jaembiirandu rei resẽ. Ae quiei quiei sereãte quia, ûquĩ nda quiaruã. ¹¹ Ureirandu que jendese ra. Jẽataque nda quiei quiei eã tuchi quia ra. Siqui chooñose tuchi nda equia ra. Uchuru mondo chooño ñee emo je. ¹² Sã ûquĩ ae riqui quiei quiei uchurã ao sacuã. Jesucristo cheẽ tuchi chõ ã nde. Nandererecua tuchi chõ a e re. ¹³ Seresenda, jmbae turã ndese chõ jẽingo bei jẽ! jẽhuichĩ nda esi jẽ!

¹⁴ A urecu urecheẽ mbesa mbesa emondo sacuã jẽje a. Jẽ mo urecheẽ mumba mumba mose, ûquĩ ndese jemae tuchi. Jẽhui chõ ûquĩ si. ¶ nda ireĩ ireĩ jiri urecheẽ mumbare. ¹⁵ jũquĩ nda jẽucuãyã cuãyãchĩ jẽ! jẽñee turã ño equia ee jẽ! jẽmbaaquiatu quiatu turã ño jẽ! Jende-senda chõ ñene. Urecheẽ mumba mumbate raque.

Hui bei

¹⁶ Cristo rei aba mombiasa. jẽsã ae riqui jemombia bei jẽ! Jẽingo mose jenyuchúaa. Jengatásaa abe no. jẽsã eriqui bei jendese jẽ! ¹⁷ Pablo rei se. Se ae chõ ã ambesa nguiã hui bei a. Sechimbese ae chõ ã nde. Sechimbese jẽicuate quia ûquĩ ndesẽ. Sembae letras. Se bei que ambesa quia hui bei ra. ¹⁸ Sã Jesucristo turã ndiqui bei jẽ ja je.

PRIMERA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu, Jesucristo chimondo. Dios abe chimondo. Dios ae nanderirō nguiā nandeicuā si. Jesucristo chō nandesaarō arō nguiā ā. ² Aico ā mbesa ndeje a, Timoteo. Secheē nguire chō ereico nguiā Jesús icua aque. Nyebe aico nguiā seriirī i ndeje co. Dios rei nanderu. Jesucristo rei nandererecua. Sā ũquĩ turā mbei riqui ndeje. Sā ũquĩ ia eā mbei riqui nderese. Sā ũquĩ nembia tuchi.

Emo ndiqui mbia mbaaquiatu icuā icuā ā, i Pablo

³ Sā acheē ndeje seso mose Macedonia no. “Efeso eico” ae que ndeje, huee bei chō eico. Ae ñee ñooño nguia mbia mbaaquiatu icuā icuā hue nae, ũquĩ ñee embutiba. ⁴ Ũquĩ siqui bei quia mbia cheē ima nenei nenei mbia je ũquĩ. Ũquĩ siqui bei quia amei cose ndare nenei nenei mbia je ũquĩ no. Ũquĩ ñee embutiba. Ũquĩ ñee icuā icuāte quia ũquĩ. Ũquĩ ñee ño mbia mbiicuā icuā nguiā nyue. Ũquĩ ñee nda aba mbaaquiatuā Dios riī. Ũquĩ mose Dios icua aroneate. ⁵ Sā hue jenda turā mbei riqui Dios je jē. Sā hue jenda riqui ndua turā mbei jē. Sā hue jenda riqui Dios icua tuchi jē. Nyesequa tuchi nda nyiese cote chā. ⁶ Mbia hue jend a mo ndiqui tesarei Dios cheē si ũquĩ. Dios cheē abi abi. Ñee ñooño mbei equia nyue ũquĩ. ⁷ Moisés cheē ndese mbia tambaaquiatu, i raque equia ũquĩ. Moisés cheē icua rocoī. Eaquiatu rocoī. Echeeño ño ñene.

⁸ Dios que Moisés mbucheē turā mbia je ra. Mbia icuā je que embucheē nda. Mbia mundua sacua huīicuā ndese. ⁹ Mbia turā je eā ngue Dios Moisés mbucheē nguiā. Mbia turā je eā ngue Dios ley mii nguiā. Dios cheē mumbasa je chō ngue emii nguiā. Mbia icuā je. Dios quiatoā je. Mbia teā teā je. Usi ucuāyāsa je. Ngu abe ucuāyāsa je. Mbia iquiasa je. ¹⁰ Ucheē mumbasa je chō ngue Dios ley mii nguiā. Ae siqui quia emo ninisi rese, ũquĩ je. Ae eninisirā saā saā nguia nguesenda mo je, ũquĩ je. Mbia rirōsa je abe no. Ñeeñoñosa je abe no. Ae eicuā icuāte riqui Dios cheē turā je, ũquĩ je abe no. Ũquĩ ja je chō ngue Dios ley mii nguiā. ¹¹ Dios que ñee ucheē turā nii seje ra. —Secheē esenei senei mbia je, i que Dios seje ra.

Dios que uturā teacuquia seje ra, i Pablo

¹² “Coche ñene” ae se quia Jesucristo je co. Ae que seirabo ra. Ae que sembuquirācuā nda. Ae que semondo ucheē nenei nenei sacua mbia je ra. ¹³ Seicuā tuchi raque ee nyii. Acheē icuā icuā ndei que se quia ee nyii ra. Equiato je abe que seicuā icuā ndiqui nyii ra. Se Jesús icuayā mose. Seaquiatuā mose. Nyebe Dios ia eāte riqui nguiā serese. Nyebe Dios seicuā mbutiā nguiā sesi cote. ¹⁴ Uturā ngue eteacuquia seje ra. Nguiirī ngue embuchecua seje ra. Nyebe aico nguiā Jesucristo icua co cote. Nyebe aico nguiā nyesequa Jesucristo rese co cote. ¹⁵ Jesucristo que tu íbii ra. Mbia icuā mbitirō sacua. Emingo bei nonde. Ichōñoa tuchi chō ā nde. Sā mbia “ae beite” i ja ā je. Seicuāte raque se quiatu mbia ja si. ¹⁶ Dios ia eāte que eriqui serese ra. Erosee nguiatu tuchi que eriqui seje ra. Nyebe mbia riqui nguiā jirandu ja Dios rosei nguiatu rese. Sā Dios

semingo bei se abe, i chee ra emo abe ñee ñee. Dios roseĩ nguiatu rese jirandu mose. ¹⁷ Sã mbia riqui ñee turã mbei Dios je. Ae mii ño mbia rerecua tuchi re. Ae mii ño siqui bei tuchi nguiã co. Ae mii ño ererecua nandemae sayã nde. Ae mii ño mbae icua tuchi nguiã. Amén. ¹⁸ Timoteo, seriirĩ na tuchi chõ nde re. Dios cheẽ mbuchecuasa que sembiirandu nderese nyii ra. Nyebe aico nguiã ñee tuchi ndeje ãquĩ ñee na si. Mbae icuã esiquisã quisã mbei chõ nguia Jesús quiato si jẽ. ¹⁹ Dios eicua tuchi quia jẽ. Erendua ata atate chĩ nda jẽ. Mbae turã ndese chõ eico. Emo emo ngue ndua chooño mbei quia ra. Mbae turã naa naa ndocoĩ. Nyebe eriqui nguiã siqui icuã icuã mbeite. Nyebe tesarei nguiã Dios cheẽ si cote. ²⁰ Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacua. Ñee icuã icuã eã sacua Dios riĩ.

2

Sã mbia ñee turã ja Dios je, i Pablo

¹ Aacheẽ Jesús quiato ja je: Mbia ja riĩ jẽingo bei ñee Dios je. ¹ nda Dios uturã mee mbia je. Gracias jenye bei quia Dios je mbia ja riĩ. ² Ae ererecua nae, ãquĩ ja riĩ abe jẽingo ñee mbei Dios je. Dios uturã mee sacua ee. ãquĩ mose ra nandeico turã ja cote. ãquĩ mose ra nandeya bei nandeico cote. ãquĩ mose ra nandeico tuchi Dios rese cote. ³ ãquĩ mose ra Dios abe ia tuchi nanderese. Eicuã si mbia rirõsa chõ ae re. ⁴ Dios mbia rirõ ja sete quia eicuã si co. Dios mbia mbaaquiato quiatu sete quia co no. ⁵ Dios mii ño siqui nguiã co. Mbia que icha icha jate esi ra. Jesucristo mii ño siqui nguiã mbite re co. Mbia mbucha sacua Dios rese. Mbia sí chõ ae

re. ⁶ Jesucristo que mano mbia icuã ndiquicharõ sacua nda. ãquĩ ndese que Dios mbia mbiirandu cote ra. ⁷ ãquĩ nii ngue Dios seirabo ra. Semondo que judíos eã je embaaquiato quiatu sacua nda. ãquĩ Dios icua sacua ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸ Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue. ⁹ Sã cuña abe riqui siqui mingue. Sã eriqui ndua tuchi eã jiri huiirao rese. Uachu riinda hui rese abe. Ua rese abe no. Lujose abe no. ¹⁰ Sã eriqui quiatu ndua Dios rese. Sã eriqui mbae turã naa naa mbia je. ¹¹ Sã cuña quiriri chõ nguia mbia ñumunua mose. Sã eriqui nyiisaquia turã. Sã eriqui mingue. ¹² Mbia ñumunua nua mose, cuña mbia mbaaquiato quiatu aroneate. Sã cuña mo ererecua raã naa eã ngu je. Sã eriqui chõ nguia quiriri. ¹³ Adán nane nguiatu ngue Dios chao nguiã. Aquere quiatu ngue Eva ao nguiã cote. ¹⁴ Adán nane eã ngue Satanás mbiirĩ irĩ nda. Eva rane nguiatu ngue re. Eva rane ngue mbae icuã saã nyii ra. ¹⁵ Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesecua mose mbia rese.

3

Sã Jesús quiato rerecua siqui turã

¹ Acheẽ ñooño eã ño se re. Jesús quiato reaquiato sacua ño taico se, i mose emo, eturãte ãquĩ. ² Sã Jesús quiato rerecua riqui siqui turã mbei. Mbia ñee eã sacua ee. Sã ngũinisi mii ño nderequia. Sã eriqui ndua turã turã mbei. Sã earacua tuchi riqui. Sã eriqui mbia isi turã turã mbia mo oso mose echuchúaa. Sã eriqui mbia mbaaquiato quiatu aracua. ³ Sã

eriqui quiacuayã. Sã eicuã icuã eã mbei riqui emo je. Sã eriqui oo tuchiã mbae isiquia rese. Sã eriqui ico mingue. ⁴ Sã eriqui mbia uchuchua jenda rerequia turã. Sã eriqui nguiirĩ mbaaquiatsu quiatu turã. Aba cheẽ mumbayã sacuã. ¹ Nda eriirĩ eĩ ñooño eã mbia je. ⁵ Nguiirĩ ndea chooño mose, Dios quiato reaquiatsu turã aroneate. ⁶ Ae Jesús icua ramote nae, Jesús quiato rerecua aroneate ñquĩ. Ñquĩ mose ucuasu raã naa arõte. Eicuã arõte cote. Sã Satanás abe ucuasu raã naa ñmbiicuã nonde no. ⁷ Sã Jesús quiato rerecua riqui siqui turã mbei Jesús quiatoã abe je. ¹ Nda diablo embiirĩ irĩ eã embiicuã. ¹ Nda Jesús quiatoã ñee turã mbei eriĩ.

Sã diáconos siqui turã

⁸ Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã eriqui quiacuayã. Sã eriqui oo tuchiã mbae isiquia rese. ⁹ Sã diáconos siqui eã tuchi mbae icuã mo ndese. Sã Dios mii ndese quiatsu eriqui bei. Sã Dios icua tuchi. ¹⁰ Ae ra diácono nae, sã mbia mae na nguiatsu erese nyii. Eturã mose mbia je, sã diácono ae cote. ¹¹ Sã diácono ninisi abe riqui siqui turã mbia je. Sã mbia mbuchee ñee eã emo nii. Sã eriqui quiacuayã. Sã eriqui ucheẽ mbuchebiã mbae raã nonde. ¹² Sã diácono ngüinisi mii ño nderequia. Sã eriqui nguiirĩ nderequia turã. Uchuchua jenda ja abe no. ¹³ Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacuã mbia je.

Ae Dios saã nande je, ñquĩ aba icua ja aroneate raque

¹⁴ Seso jeise rete raque nderea. Seso eã moi ño aico nguiã co mbesa ndeje a. ¹⁵ Nde Jesús quiato rerecuarã irabo aquíatsu sacuã ño aico

nguiã ã mbesa ndeje a. Iglesia jenda rerecua irabo sacuã. Dios reco mbae rei iglesia. Iglesia quia rei Dios cheẽ nderequia tuchi mbia ja je. ¹⁶ Ae Dios saã nguia nande je nae, ñquĩ aba icua ja aroneate raque:

Dios que tu mbiarã íbii ra. Jesús, i equia ee.

“Eturã tuchi” i que Espíritu Turã eriĩ nda.

Angeles abe que mae erese ra.

Ae Jesús quiato nae, ñquĩ ngue esenei senei mbia ataque je ra.

Mbia mangue chooñoa jenda ja que eicua ra.

Aquere que Dios equeraobe ibate cote ra.

4

Mbia ra hui hui Dios cheẽ si

¹ Espíritu Turã ndiqui ñee co: Mbae ua ja nonde ra mbia hui hui tuchi Dios si. Aba mbiirĩ irisa rese ra mbia riqui tuchi. Ñquĩ nda mbia mbaaquiatsu icuã icuã aba checuayã icuã na. ² Ae uturã saã saã nguia nae, ñquĩ ndui rui ra mbia riqui. Ae ñee ñooño nguia nae, ñquĩ ndui rui ra mbia riqui no. Ñquĩ siqui beite mbae icuã ndese ñquĩ. Nyebe eriqui nguiã mbae turã icuayãte chee cote. ³ Ñquĩ nda mbia mbaaquiatsu icuã icuã. Jenin-isirã nda jendecoã. Jendurã abe ra jendecoã no, i ra equia ñee mbia je. —Mbae ra jẽu chooño chí jẽ, i ra equia mbia mbaaquiatsu icuã icuã. Dios mbae chao ja raque mbia chiurã. —Sã sequiatsu mbae ja u, gracias ire seje, i que Dios ra. ⁴ Dios chiao mbae turã ja. Mbae nandeisi teã teã eã ño nguia echiao. Mbae nandeu turã ja chõ nguia. Gracias nande bei chõ nguia Dios je. ⁵ Dios cheẽ nguire mbae turã ja riqui nandechiurã ã. Nande “gracias” i mose Dios je, mbae turã ja chõ eriqui nguiã nande je.

Jesús quiato rerecua turã

⁶ Ñ secheẽ esenei senei mbei quia Dios quiato je, Timoteo. Nde mbia mbaaquiato turã turã mose. Dios rimba turã tuchi ra nde cote. Jesús cheẽ ndui ra ereico tuchi cote. Dios ra ereicua tuchi cote. Sã ereico beite erese co no. ⁷ Mbia cheẽ ñooño je cheẽ ndese ra erechiisaquiachĩ jẽ. Echimbirãcuã tuchi quiatu quia siqui Dios rese jẽ. ⁸ Nanderete quirãcuã mose, eturãte raque. Nandeico mose Jesús rese, ñquĩ nguiatu eturã tuchi nanderete quirãcuã si re. Aachõ eã nandeico Jesús rese. Ibate abe quiatu nandeico erese. ⁹ Acheẽ ñooño eã ño se re. Sã mbia “ae beite” i ja secheẽ je. Dios cheẽ ño ñene. ¹⁰ Dios cheẽ ñi ño ureico nguiã quicoi coi ã. Dios cheẽ ñi ño ureico nguiã ñimbirãcuã mbae ja rese ã. Dios reco quiatu ureicuate nguiã ã. Ae que mano mbia ja je ra. Ae eicuate quia nae, ñquĩ nda emingo bei.

¹¹ Ñ esenei senei mbei quia mbia je. Mbia Dios cheẽ mumbayã sacua. ¹² Sã mbia ndecheẽ andu turã. Amei eã ndaque nde. Mbae turã esaã saã nguia Jesús quiato résaa. Ñquĩ siqui turã sacua nde rã si. Echeẽ turã mbei quia mbia je. Eico turã mbae quia mbae turã ndese. Echesecua tuchi quia mbia rese. Dios eicua tuchi quia. Mbae icua ndese ra eremae mae jirichĩ. ¹³ Mbia mbaaquiato quiatu bei quia seso mose chee nderea. Dios cheẽ esenei senei mbei quia leer i ee. ¹⁴ Jesús quiato rerecua o chono mose ndearõ, aque mose que Dios nembaaracua tuchi ra. —Ñ esaã, i que ndeje ra. Ñquĩ si ra eretesareichĩ. ¹⁵ Ñquĩ ndese eico bei. Endua ndua bei quia erese. Ñquĩ mose ra Dios ereicua i i tuchi. Mbia ra jirandu ja nderese. ¹⁶ Emae ño nguia nde ae ndechiese. Echicuasẽ cuasẽ ño nguia mbae icua si. Ae eresenei senei nguia mbia je Dios cheẽ nae, ñquĩ emumbayã ño nguia

nde abe. Ñquĩ mose ra Dios nemingo turã tuchi. Ndecheẽ andusa abe ra emingo turã tuchi.

5

Jesús quiato siqui turã sacua

¹ Erecheẽ icua ñcuãchĩ nda amei je nde mbaaquiato quiato mose jẽ. Amei mbaaquiato turã turã ño nguia jẽ. Nderu esaã ño nguia siqui turã ee. Ndenongue rã ño eico mbia yasu je no.

² Ndesi esaã ño nguia ari je jẽ. Ndenongue esaã ño nguia ubichõ nyucuaaque rese jẽ. Endua icua icua eã ño nguia eriĩ jẽ. ³ Eru cheecha mo mbae eã mose, sã Jesús quiato riqui mbae mo mee mee ee. ⁴ Eriirĩ tiarõ mose, sã aque chõ mbae mee mee mbei quia usi je. Eriirĩ nducucha mose, sã aque chõ mbae mee mee ee no. Ngu abe je. Umumbebosa je. Ñquĩ Dios bite. ⁵ Sã eru cheecha mo ae riqui no. Sã embae eãte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee. ⁶ Ae ebite nae, ñquĩ ndese achõ eru cheecha mo siqui mose, eicuãte ñquĩ. Eraaque rã ño aque riqui nguiã. Ereco siqui raque. ⁷ Ñ esenei senei nguia mbia Jesús quiato hue jenda je. ⁸ Emo ndua eã mose usi rese, ngu abe rese, eicuãte ñquĩ. Mbae mee mee eã mose ee, eicuãte ñquĩ. Ñquĩ siqui ãte quia Dios rese ñquĩ. Eicua tuchi chõ ñquĩ Dios quiatoã si re.

⁹ Ari eru cheecha je inscribir jenye rã mámbii. Ae sesenta años eãte nae, ñquĩ je inscribir jenye eã. Ae eru ata nyii nae, ñquĩ je inscribir jenye eã no. Ae eru mii nyii nae, ñquĩ mii je chõ inscribir jenye. ¹⁰ Ae ari turã abachicuate nae, ñquĩ achõ je chõ inscribir jenye. Ae ari nguiirĩ mbu-tiarõ turã mbeite quia nae. Ae ari mbia isi turãte quia uchuchúaa

nae. Ae ari mbae turã saã saã mbeite quia Jesús quiato je nae. Ae ari erasi teaquiato turã mbeite quia nae. Ae ari siqui beite quia mbae turã ndese nae. Ûquí ari je chõ inscribir jenyê. ¹¹ Eru cheecha ari eã mose, ùquí je inscribir jenyê eã. Ûquí nyao arondete Cristo si. Ae ebite, ùquí achõ ndese ndua mose. —Serurã mo tateabe, i ra cote. ¹² Ûquí mose ra Dios paama i ee. Ucheẽ mbuchebi chõ nguiã ngu rea mose cote. ¹³ Eru cheecha ari eã mose, siqui eã arõte mbae mo ndese. Tuchua embuchesea sea choõno arõte. Mbia mbucheẽ ñee ñooño arõte emo nã. Uchuru rerequia choõno eã arõte. ¹⁴ Nyebe aico nguiã ñee eru cheecha, ae ari eãte, ùquí je. Sã ngurã mo ndea. Sã tiirĩ. Sã eriqui mbae turã naa naa mbei uchuchúaa. Ûquí mose ra Jesús quiatoã ñee eã ee cote. ¹⁵ Emo emo ngue nyao Dios si cote ra. Satanás ndese eriqui ã cote. ¹⁶ Sã Jesús quiato riqui mbae mee mee ucharĩ eru cheecha je. Usi abe je eru cheecha mose. Iglesia mbae mee mee eã sacua ee. Ae eru cheecha eriiriãte nae, ùquí je quiatu iglesia mbae mee mee.

¹⁷ Jesús quiato rerecua mbae saã turã turã mbei mose, sã mbia ia tuchi riqui ere. Dios cheẽ nenei nenei turã mose, sã Jesús quiato riqui mbae mee mee mbei ee. ¹⁸ Sã embesa ji riqui ñee no: “Emo nimba ticuas mbae usi raã mose, echuru ra jenyatichĩ mbae mo je jẽ. Sã ae ae si quia quiaru quiaru”, i que embesa ji ra. “Ae quiei quiei quia emo je nae, sã echa mbae isiquia mo mee ee”, i que embesa ji ra. ¹⁹ —Jesús quiato rerecua que mbae icuã saã nda, i mose emo, echeẽ nda jeñanduchĩ, ae mii ñee mose. Nyeremo ñee mose, ùquí ñee ñooñoa arõte cote. ²⁰ Jesús quiato rerecua mo siqui siqui bei mose mbae icuã ndese, echeẽ asi asi ee Jesús quiato ataque résaa. †

nda ùquí abe siquiche mbae icuã naa naa eã. ²¹ Eĩ ere chõ Jesús quiato rerecua je, siqui mose mbae icuã ndese. Ndequiatote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no. ²² Jesús quiato rerecuarã nda eremii jeichĩ jẽ. Emae nguiatu turã na ere nyii. Emii jei mose, eicuã arõte emo mose. —Eremii jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

²³ I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

²⁴ Emo emo nyisaã mbae icuã nyecuate riqui nande je ã. Emo nyisaã icuã ndese quia nandeico nguiã mae ãte namo. Dios eicuã mbasi mose, aque mose ramo nda nandemaẽ ùquí nyisaã icuã ndese cote. ²⁵ Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6

¹ Ae Jesús quiato ererecua rimba mo nae, sã ùquí ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia ñee icuã eã Dios cheẽ nii cote. ² Timoteo, mbia rimba embaaquiato quiatu quia. Æ echeẽ ee. —Jenderecua Jesús quiato mose, echeẽ jemumbayã ño nguia mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jësaã turã tuchi quiatu quia ee. Jëingo turã tuchi chõ nguia ee, ere ererecua rimba je ñee.

Nandendua tuchiã jiri quiatu quia mbae isiquia rese

³ ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiātu quiātu mose ã abi, Dios cheẽ ndui eã ño ãquĩ ndiqui nguiã. ⁴ Ucuasu raã naa ño nguiã ãquĩ. Ñee tuchi beite equia ãquĩ. Eaquiātu rocoĩ. Mbia mbĩcuã icuãte equia ãquĩ. Mbia mbucheẽ icuã icuãte equia nyue ãquĩ. Mbia mumae icuã icuãte equia nyiese ãquĩ. ⁵ Ndua icuã icuã mbeite equia ñee turã ndocoĩ ãquĩ. Eicuã icuã mbeite riqui emo je ãquĩ. —Mbia ra mbae isiquia mee seje, se Dios cheẽ nenei nenei mose ee, i beite equia ãquĩ. ãquĩ ndese eicoã tuchi, Timoteo. ⁶ Nandeico mose Dios rui, ae ae ra nandembia nandembae mĩ ndese. ⁷ Mbae mo ngue nanderuãte nandechaacuquia mose ra. Eĩ nande si ra nandemano mose mbae mo nderao eã no. ⁸ Nandechĩturã nandereco mose, nanderao abe nandereco mose, nandeya chõ nandeico ãquĩ ndese. ⁹ Ae “mbaecha tuchi ra se” i bei quia ndua ndua, ãquĩ nda nimbĩrãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiātu ebi tuchite riqui nguiã. Echioseĩ oseĩ icuã nda equerao chee tata cuásuu. ¹⁰ Ae ndua beite quia mbae isiquia rese, ãquĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguiã hui Dios si ã. Nyebe eya eã ndasi tuchi riqui nguiã ã.

Dios eicua tuchi, i Pablo ñee Timoteo je

¹¹ Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguiã. Echesequa bei chõ nguiã mbia rese. Eico mingue chõ nguiã. Ndecuasu ra eresã saãchĩ nguiã jẽ. ¹² Echĩmbĩrãcuã tuchi quiātu quia Dios cheẽ ndese jẽ. Aba mingo beisa rese quia eico tuchi jẽ. Ae

quia ngue ndeirabo nguiã nyii. Sã erecheẽ turãte mbia résaa nyii no. —Dios riqui semingo beite co, ere que equia nyii. ãquĩ ndese bei chõ eico. ¹³ Dios ae chõ mbae mingo ja nguiã co. Erésaa tacheẽ ndeje. Jesucristo résaa abe tacheẽ ndeje. Sã Jesucristo siquicheã ñee Poncio Pilato je no. ¹⁴ Ae rĩ Dios ñee ndeje nae, ãquĩ emumbayã ja chõ nguiã eraã turã. Jesucristo tu mose chee eico echeẽ mumbayã mbei. f nda emo ñee eã ndeje. ¹⁵ Dios quia rei equirãcuã tuchi mbia mo si. Ae quia ererequa tuchi mbia mo si re. Emo mose ra Dios “Jesucristo tamondo lbii mbia rea” i. Aque mose ra Jesucristo nyecua tuchi mbia je. ¹⁶ Dios mĩ nda manoa. Ae mĩ ño siqui bei nguiã nyaashĩ na co. Mbia mo nda esĩchã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia erĩ. Sã eriqui ñee turã mbei equirãcuã nĩ. Amén.

¹⁷ Ae mbaechate nae, ãquĩ je echeẽ. Sã ucuasu raã naa eã. Sã eya siquiã umbae mĩ ndese. Embae ra ua emo mose. Sã Dios rese quiātu eya riqui. Ae mĩ ño mbae mee nguiã nande je. ¹⁸ Echeẽ mbaecha je. —Mbae turã jẽsaã saã mbei quia jembae je jẽ. Jẽingo turã jiri quia mbaecha reã je. Abeĩ chiãte ra jẽingochĩ jẽ, ere mbaecha mbaaquiātu quiātu. ¹⁹ ãquĩ naa naa mose ra Dios mbae mee tuchi ee ibate. ãquĩ naa naa mose ra siqui turã tuchi no.

Pablo ñee hui bei Timoteo je

²⁰ Timoteo, ae rĩ Dios ñee ndeje, ãquĩ emumbayã mbei quia. Mbia ñee ñooño mose nyue, nde abe ra erecheẽchĩ. ãquĩ ñee aba mundua turã eã ño nguiã. Uaquiātu raã naasa chõ ãquĩ nde. ²¹ Dios cheẽ abi chõ eriqui nguiã ãquĩ naa naa ãuuuuu uuuquĩ. Dios icuasa reã ño ãquĩ nde. Sã Dios turã ndiqui bei ndeje. mén.

SEGUNDA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu rei se. Dios que semondo mbia mbaaquiatu quiatu sacua nda. —Jesucristo icuasa ra siqui bei, i sacua ngue Dios semondo mbia je ra. ² Aico ã mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriirĩ i ndeje co. Dios rei nanderu. Jesucristo rei nandererecua. Sã ãquĩ turã mbei riqui ndeje. Sã ãquĩ ia eã mbei riqui nderese. Sã ãquĩ nembia tuchi.

Pablo Dios osei uquia Timoteo je

³ Gracias, ae bei se quia nderĩ Dios je co. Aico turãte quia Dios je co. Seramei ja rã si. Senduasa tuchi Dios riqui co. Nderĩ aico ñee mbeite Dios je co. Nyaashĩ mose. Isa abe. ⁴ Anduate quia nderese co. Achimbiatẽ rã nda mae nderese chã. Erecheseote que nandechao ramo mose nandechesi ra. ⁵ Ereico Dios icua tuchite aque. Ndesi rã si Eunice. Ndechari abe rã si Loida. ãquĩ ngue Dios icua tuchite quia ra. Eĩ ere si quia Dios icua tuchite nde abe aque. ⁶ Nyebe aico nguiã ñee ndeje a. Seo achono nguia ndearõ nae, aque mose que Dios nembraacua tuchi ra. Ndearacua eico bei Dios cheẽ ndese. Dios cheẽ nenei nenei mbia je. ⁷ Dios siquĩã nguiã nandembu siquiche mbia si ã. Dios nandembirãcuãte quia ã. Dios nandembuchesequate quia mbia rese ã no. Dios nandembaaracuate quia ã no.

⁸ Dios quirãcuã ndese eico bei. ãquĩ mose ra ereireĩ ireĩ eã Jesús renei nenei mbia je. ãquĩ mose ra ereireĩ ireĩ eã setarõ ji si. A setarõ ji ñi Jesús rĩ a. Mbia icuã icuã

mose ndeje Jesús rĩ, echimbirãcuã ño. Dios ra nembirãcuã. Sã sembirãcuã no. ⁹ Dios quiatu ngue nanderirõ nguiã nandeicuã si. Dios que nandembuturã mingo icuẽ umbaerã nda. Nandeturã je eã ngue nandemingo nguiã icuẽ umbaerã. Nduate quiatu nguiã nanderese. Mbae ao ja nonde que nduate nanderese ra. Jesucristo rĩ ño ngue Dios riqui nguiã nyesequa nanderese. ¹⁰ Nyebe Jesucristo mondo nguiã nanderirõ sacua nandeicuã si. Nyebe nandeico nguiã ñee: —Dios nyesequate nanderese, i cote. Jesucristo que nandembusiquicheã u nandemano si ra. Ae riqui nandemingo bei co. Ae riqui ucheẽ isiquia mingo bei co. Jesucristo tu mose que nandembiirandu ja ãquĩ ndese ra. ¹¹ Ucheẽ turã nenei nenei sacua ngue Dios seirabo ra. Semondo que mbia mbaaquiatu quiatu ra. Mbia mangu choõña jenda ja mbaaquiatu quiatu. ¹² ãquĩ je chõ mbia riqui nguiã mbae rasi raanguquia tuchi seje co. Aireĩ ireĩ eãte quia Dios si co. Dios aicuate quia co. Sereco que amee tuchi ee ra. Ae ra sereco teaquiatu bei seje. Jesucristo tube chee mose. ¹³ Arembaaquiatu turãte que se, ãquĩ ndui eico bei. Dios eicua bei quia Jesucristo rĩ. Mbia rese echesequa bei quia Jesucristo rĩ. ¹⁴ Ae rĩ Dios ñee ndeje nae, nembraacua equia nae, ãquĩ ndese eico tuchi. Espiritu Turã nda nembesari eã. Eriqui tuchite nandechiangui re co.

¹⁵ Ereirandu que Asia jenda serecha rese ra. Figelo. Hermógenes. ãquĩ ngue hui ja sesi ra. ¹⁶ Onesíforo quiatu que tuutu quia serea sembia ra. Ireĩ ireĩ eãte que equia setarõ ji si ra. Sã Dios turã mbeite riqui ee. Echuchua jenda ja abe je. ¹⁷ Tu mose aa Rómaa que serequia tuchi ra. Ngasẽ nyee

que seje ra. ¹⁸ Efeso seico mose abe que eriqui tuchite serese ra. Serese que eriqui Dios cheẽ nenei nenei nda. A ereicuate quia aque. Sã Dios mbae turã tuchi mondo ee Jesús tu mose.

2

Mbae esaã saã tuchi quia Jesús je, i Pablo Timoteo je

¹ Seriirĩ naate nde, Timoteo. Jesucristo quirãcuã ndese eico ñimbucha tuchi. ² Arembaaquiatu quiatu que se mbia résaa, ùquĩ esenei senei tuchi quia mbia je. Mbia ndua je secheẽ esenei senei. Ùquĩ nda esenei senei emo je no ña. ³ Mbae rasi tu mose ndeje, echimbirãcuã ño. Soldado rã ño eico ñimbirãcuã. Jesús rimba turã ño eico. ⁴ Jesús rimba chõ nde re. Echeẽ emumbayã mbei chõ nguia. Mbae mo ndese ra erendua nduachĩ. Ndererecua mĩ ndese endua bei. ⁵ Sã deporte no. Emo nda ganar i eã, nguerecua cheẽ mumba mose. ⁶ Sã emo ndiqui quiei quiei tuchi úcoo no. Aque mbae tubiriã tuchi rae. Eĩ ere si quiatu mbae raã naa tuchi Jesús je. ⁷ Ae ambesa mbesa quia ndeje ã, ã ndese endua tuchi. Dios ra embuchecua tuchi ndeje.

⁸ Endua tuchi quia Jesucristo rese. Quera si que manonde ra. Mbiate raque. David rucucha raque. Quera si que manonde ra. Ùquĩ asenei senei nguia mbia je co. ⁹ Ùquĩ je chõ mbia riqui nguĩã mbae rasi raanguquia tuchi seje ã. Ùquĩ nĩ ño setarõ mĩ nguĩã a. Se mbia iquiare rocoĩ nyii setarõ tarõ. Se chõ setarõ ndaque. Dios cheẽ nguia etarõ aroneate re. ¹⁰ Coche mbia icuã ndiqui nguĩã seje. † nda Dios chiirabo Dios cheẽ isi bei cote. † nda Dios emingo bei cote. † nda ùquĩ siqui bei ibate Jesucristo rese cote. ¹¹ Ñee ñooñoa tuchi chõ mbia cheẽ ã nde:

Nandemano ngue Jesucristo rese ra.

Nyebe ra nandeico bei erese cote.

¹² Cristo rĩ mbae rasi nandesã saã mose, Cristo ra nandemĩ ererecuarã, ererecua tuchi mose ae.

“Cristo aicuayãte” nande i mose, Cristo abe ra ñee nande je.

“Se abe jaẽicuayãte” i ra nande je.

¹³ Nandechẽ iru raque ra nande, Dios quia ra ñee iru eã mbei. Dios quia ra ucheẽ mbuchebi aroneate nande je,

i que embesa ji ra.

Ndeico tuchi mose Dios rese, ereireĩ ireĩ eã ndae

¹⁴ A ndese mbia hue jenda embaaquiatu quiatu tuchi. Díosaa embaaquiatu quiatu tuchi. Ñee icuã icuã eã nda nyue chã. Ñee icuã icuã mose, emingo turã eã nyiese chõ ùquĩ nde. Mbae turã si embui chõ ùquĩ no nde. ¹⁵ Equiei quiei tuchi chõ nguia Dios je jẽ. † nda Dios “coche ñene” i ndeje. Sã emo ndiqui quiei quiei turãte nguerecua je no. Eireĩ nguĩate ra nguerecua si cote. Eĩ ere si chõ nguia Dios cheẽ nenei nenei mbia je. Dios cheẽ abi abiã. ¹⁶ Ae uchuru mondo chooñote quia nae, ùquĩ ndese eicoã. Ùquĩ ndiqui isho i ite Dios si ùquĩ. ¹⁷ Ùquĩ ñee mbuchei i ite echoi quia qui. Sã mbae rasi riqui oso i ite no. Eĩ si chõ Himeneo nguĩã ùquĩ. Fileto rese. ¹⁸ Ùquĩ ndiqui ñee Dios cheẽ abi abi tuchi ùquĩ. —Mbia rete raaque ra quera si eã, i chõño mbei equia ùquĩ. Nyebe eriqui nguĩã mbia mbui mbuite Dios si ùquĩ. ¹⁹ Sita cuasu mo na ndei Dios cheẽ. Embuquiata aronea. Aque ñi mbei chõ nda echi. Eĩ si chõ Dios cheẽ nande je no nde. Dios cheẽ ño ã nde: “Dios riqui nguĩmba icua jate ã,” i que ra. Co abe rei Dios cheẽ co: “Ae ‘Dios rimba rei se’ i quia nae, sã ùquĩ ndiqui nyao ja mbae icuã si”, i que ra.

²⁰ Sã mbae riru chumumbarate riqui mbaecha mo nyuchúaa no. Sã oro ao ji riqui emo no. Sã plata ao ji emo no. Sã ira ao ji emo no. Sã tuchu ao ji emo no. Emo emo ndei iti mombo sacua no. Emo emo mbae turã ndirurã no. ²¹ Sã Jesús quiato riqui mbae turã ndirurã na. Sã eriqui icúe bei Dios mbaerã. Sã nyao tuchi mbae icuã si. Ûquí mose ra Jesús ia tuchi erese. ²² Ae icuã acuanindu chosei chosei quia nae, ùquí si ehui chõ jẽ. Eico turã ño Dios icha rui jẽ. Dios eicua tuchi chõ nguia jẽ. Echesequa tuchi chõ nguia mbia rese jẽ. Echimbua chõ nguia mbia rese jẽ. Eĩ ño Jesús quiato nguia siqui turã nyiese ã, echia quishĩ ja mose. ²³ Mbua uchuru mondo choõno mose ñee nyue, nde abechĩ nda jẽ. Mbua mbuicua sacua ño ùquí nde. ²⁴ Dios rimba quia mbia mbuicua aroneate re. Eturã tuchite quia mbia ja je re. Mbua mbaaquiatu quiatu turãte quia ñene. Siqui minguite quia mbia je re. ²⁵ Ae Dios cheẽ isi teã teã, ùquí nda embaaquiatu quiatu mingue quia. Ûquí nĩ nda ñee ñee Dios je. Dios emundua si sacua. Dios cheẽ isi turã sacua. ²⁶ I nda echoi oso chee uchã diablo si, ndua si mose Dios cheẽ ndese. Diablo quia eisite nguia co. —Ã esaã jẽ, i beite diablo quia ee co.

3

Mbia ireĩ nguia te ra mbae icuã naa i i

¹ Jesús quiato ra mbae rasi saã tuchi Jesús tu serĩ mose. Ûquí eicua quiatu tuchi, Timoteo. ² Umbae ae ae rese ra mbia ndua cote. Mbae isiquia mĩ ndese chõ nda mbia riqui ndua ndua cote. Mbua ra ucuasu saã saã tuchi. Ñee icuã icuã mbei ra equia emo nĩ. Mbua ra ngu cheẽ mumba mumba tuchi. Usi cheẽ abe no. Mbua ra gracias iã tuchi nyue aque mose. Siqui sereã tuchi ra Dios rese. ³ Mbua ia eã eã nda emo ndese. Nĩmbuturã

sereã tuchi ra emo je. Emo nda embuqueta queta bei quia. Hui aroneate ra mbae icuã si. Nyaba nyaba reã tuchi rae. Mbae turã nda eucuayã tuchi. ⁴ Mbua ra embucheẽ ñee ngõngue rĩ. Mbua ra mbae i ñooño. Mbua ra uaquiatu saã ñooño. Ubi achõ ndese ra eriqui. Siqui rocoĩ Dios bi rese. ⁵ Dios quiato ra mbia saã ñooño. Dios quiracuã icua rocoĩ. Ûquí mbia icuã si echao tuchi, Timoteo. ⁶ Ûquí mo ndiqui ique ique emo nyuchua ã. Cuña aquiatuã mbuĩrĩ irĩ. Ae ndua ndua beite quia huicua ndese cuña nae, ùquí mbuĩrĩ irĩ. Ûquí cuña ndiqui uchioseĩ raã naa mbei mbae icuã ùquí. ⁷ Ûquí cuña ndiqui “tachimbuaquiatu” i beite raque ùquí. Nimbuaquiatu aroneate Dios cheẽ ndese. ⁸ Sã brujos Moisés cheẽ mumba no. Janes, i equia ee. Jambres abe no. Eĩ si chõ cuña mbuĩrĩ irĩsa nguia Dios cheẽ mumba mumba ùquí. Ndua aquiatuã je chõ ùquí nde. Ûquí ndiqui emo mingo aroneate Dios cheẽ ndese ùquí. ⁹ Mbua ra siqui eã ùquí ñee ndui cote. Mbua ra “eaquiatuã” i chee erĩ. Sã “eaquiatuã” i chee Moisés cheẽ mumbasa rĩ brujos no.

Jesús quiato ra mbae rasi saã, i Pablo

¹⁰ Ereico turãte que se rã si ra, Timoteo. Dios cheẽ ngue eresenei senei nguia se rã si ra. Ae asaã saã nguia Dios je nae, ùquí ngue eresaã saã nguia nde abe ra. Ae “tasaã Jesús je” ae quia co nae, nde abe eresaã saã turã nguia aque. Dios ereicua tuchite se rã si. Ereico minguite equia aque. Erechesequate equia mbia rese aque. ¹¹ Ereico turãte que equia mbia icuã icuã mose ndeje ra. Sã mbia icuãte riqui seje Antioquíaa no. Icónioo abe. Lístraa abe. Sã ñi aico mbae rasi raã tuchi huee

no. Dios que sereaquiatsu ũquĩ si ra. ¹² Ae siquise rete quia Jesucristo rese nae, ũquĩ nda mbae rasi saã tuchi. Mbia icuã icuã tuchi ra ee. ¹³ Ae icuã icuãte riqui Dios je nae, ũquĩ nguia ra eicuã i i tuchi cote. Ae mbia mbĩĩrĩ irĩ nguia nae, ũquĩ ngui a ra mbia mbĩĩrĩ i i tuchi cote. Nĩmbĩĩrĩ i i tuchi ra equia no. ¹⁴ Nde chõ eico tuchi Dios cheẽ ndese. Ae rese erechimbaaquiatsu nae, ũquĩ ndese eico tuchi. —Ichoiñoa tuchi que ã nda, erete equia eicua aque. Nembaaquiatusa abe ereicuate quia aque. ¹⁵ Ndeñetẽ mosenda bei chõ ereico nguĩã Dios cheẽ icua aque. Dios cheẽ nembaaracuate quia aque. Nyebe ereico Jesucristo icuate aque. Nyebe Dios nderirõ nguĩã ndeicuã si. ¹⁶ Dios cheẽ turã ja chõ ñene. Dios chimondo ja chõ ñene. Dios cheẽ nguia rei mbia mbaaquiatsu. Dios cheẽ ngui a rei mbia icuã mbuchecua ee. Dios cheẽ nguia rei “ei jenyẽ” i tuchi nande je. Dios cheẽ nguia rei aba mingo Dios bi rese. ¹⁷ † nda Dios quiatsu siqui turã tuchi. † nda eaquiatsu mbae turã naa naa ja.

4

¹ Aico ñee ndeje Dios nonde a, Timoteo. Jesucristo nonde abe no. Ae r a tube mae ja mbia rese. Mbia reco rese. Mbia mano je rese abe. Ae nonde aico ñee ndeje a. ² Dios cheẽ esenei senei tuchi quia mbia je, Timoteo. Mbia eanduse mose. Mbia eandu sereã mose abe no. Embaaquiatsu quiatsu mingue bei chõ nguia. Embuti mbuti bei quiatsu quia Dios cuti. “Eĩ jenyẽ” ere bei quiatsu quia mbia je. ³ Namo jiri quiatsu ra mbia Dios cheẽ turã andu sereã cote. Ubi achõ ndese chõ nda huiisa rerequia tuchi cote. Nyebe ra Dios cheẽ andu sereã. Ae mbia mbaaquiatsu icuã icuãte quia Dios cheẽ ndui eã nae, ũquĩ ndui chõ nda mbia riqui tuchi cote. ⁴ Nyiisaquia tuchi chõ nda equia

mbia ñee ñooño je rese cote. Ñee ñooño eã je rese nyiisaquia rocoĩ. ⁵ Cochee chõ eico nde, Timoteo. Nderoseĩ nguiatsu chõ eico mbia icuã icuã mose ndeje. Equiei quiei tuchi chõ nguia Dios je. Dios cheẽ esenei senei tuchi chõ nguia mbia je.

⁶ Achuruchate ucua quia co cote. Aico mano utate co cote. ⁷ Mbae que asaã saã tuchi quia Dios je ra. Ae je Dios riqui ñee seje nae, ũquĩ ngue asaã jate quia ee ra. Ahui eã mbeite que se quia esi ra. ⁸ Dios que sechiã mbuturã nda. Ũquinde que aico ngata turã nda. Nyebe eriqui nguĩã premio nderecoquiatsu seje pe. Jesucristo tu mose ra Dios mae ja mbia rese cote. Aque mose quia ra premio mee seje cote. Se mĩi je eã ndae. Ae Jesucristo ru choseite quia nae, ũquĩ ja je abe ra premio mee.

Echu serea, i Pablo Timoteo je

⁹ Echu jei chõ serea, Timoteo. ¹⁰ Demas quiatsu ngue serecha nguĩã. Ibi jenda achõ ndese chõ eriqui nguĩã ndua. Ubi mĩi ndese chõ eriqui nguĩã ndua. Nyebe esi nguĩã serecha Tesalónicaa. Crescente quiatsu que oso Galáciaa ra. Tito quiatsu que oso Dalmáciaa no nda. ¹¹ Lucas mĩi ño siqui nguĩã serese co cote. Marcos abe eru bei seje. Ae nda quiei quiei jiri nguĩã serese aa. ¹² Tíquico quiatsu que amondo Efésoo ra. ¹³ Ae asecha saco sembae nae, eru bei seje ndechu mose. Asecha que Troas ra. Carpo chuchua. Libros abe eru bei seje. Sechimbesa papeles si ra eretesareichĩ. Eru bei seje. ¹⁴ Alejandro el herrero que mbae icuã saã saã tuchi quia seje ra. Dios ra mbae icuã mee ee eicuã ndibishorõ. ¹⁵ Echiteaquiatsu quia esi jẽ. Nande Dios cheẽ nenei nenei mose, ebiãte eriqui co. ¹⁶ Mbia sererao mose ererecua je, emo ngue nyaroã tuchi serese ra.

Serecha ja chõ ngue ra. Dios nda paama i eã ee ãquĩ nĩĩ ña. ¹⁷ Jesús mĩĩ ngue serecha eã nda. Ae mĩĩ ngue sembirãcuã nda. Se echeẽ turã nenei nenei tuchĩ sacuã. Ae judíos eã nae, ãquĩ Jesús cheẽ turã andu tuchĩ sacuã. Nyebe Jesús sembui mondo nguiã mbia icuã si. ¹⁸ Ae ra sereaquiato bei quia mbae icuã si. Sererao chee mose ibate nyiese. Sã mbia riqui ñee turã mbei eriĩ. Amén.

Pablo hui mbae mbesa mbesare

¹⁹ Saludar ere rã Prisca je. Aquila abe je. Onesíforo chuchua jenda ja je abe. ²⁰ Erasto que siquichõ Coríntoo ra. Trófimo ndasi que asecha Milétoo ra. ²¹ Nyiiseĩ tuutu nonde chõ echu. Eubulo saludos mondo quia ndeje aque. Pudente abe no. Lino abe no. Claudia abe no. Jesús quiato ja a jenda abe no. ²² Sã Jesucristo riqui bei nderese. Sã Dios turã ndiqui bei jendese. Amén.

CARTA DEL APOSTOL SAN PABLO A TITO

Pablo embesa mondo Tito je

¹ Pablo rei se. Dios rimba. Je-sucristo chimbaaquiatu. Dios que semondo ñee ñee sacua uchiirabo je ra. Ũquĩ Dios icua tuchi sacua ngue semondo ra. Siqui turã sacua Dios rã si. ²—Sechiirabo ra amingo bei, i que Dios cose ra. Ñee ñooño eã ndae. Ũquĩ ndese embiirandu sacua ño ngue semondo nguiã. ³Dios rei nanderirõsa mbae icua si. Ae que seirabo ucheẽ nenei nenei sacua mbia je ra. Eĩ ngue Dios ucheẽ mbuchecua mbia je cote ra. ⁴Aico ã mbesa ndeje a, Tito. Ereico Jesús icuate se rã si aque. Nyebe aico nguiã “seriirĩ” i ndeje co. Nanderu chõ Dios re. Sã nanderu turã ndiqui bei ndeje. Sã Jesucristo abe turã ndiqui ndeje. Sã ũquĩ ia eã tuchi riqui nderese. Sã ũquĩ ndiqui nembia turã tuchi.

Sã Jesús quiato rerecua riqui turã

⁵ Ae nandesaa ja eã huee nae, ũquĩ esaã ja rã nguia nde huee. Amei mo eirabo rabo Jesús quiato rerecuarã. Mbiam recua ja ja jenda. Secheende ndeje eirabo rabo ino huee. Nyebe arerecha nguiã huee Crétaa. ⁶ Amei turã ño eirabo rabo Jesús quiato rerecuarã. Eninisi mĩ nderecua chõ eirabo. Ae ririĩ Jesús icua quia nae, ũquĩ mĩ ño eirabo rabo. Ae eririĩ seteãte riqui nae, ũquĩ ño eirabo rabo. Ae eririĩ teã eãte nae, ũquĩ ño eirabo rabo. Jesús quiato rerecuarã. ⁷ Jesús quiato rerecua quia Jesús quiato teaquiatu quiatu quia. Ũquĩ siqui icua aroneate. Ucuasu abe raã naa aroneate. Eroseĩ nguiã aroneate. Quiacua aroneate. O rerequia chooñoa aroneate. Mbiam mo mbae oseĩ oseĩ aroneate no. ⁸ Mbiam

nyoi mose echuchúaa, isi turã ndae. Siqui turã ndae. Ndua ndua ra mbae ao nonde. Siqui eã nda mbae icua ndese. Dios rã si chõ nda eriqui. Echiichati eã ndae. Jesús quiato rerecua ra eĩ mbei quia. ⁹ Sã eriqui bei Dios cheẽ ndese nandechẽ nguire. Ũquĩ mose ra ũquĩ abe mbiam mbaaquiatu quiatu turã. Jesús oseĩ uquia ee. Mbiam icua ñee nda embutiba Dios si. Ũquĩ ño eirabo rabo Jesús quiato rerecuarã, Tito. ¹⁰ Mbiam teã teã je tubiriãte riqui ã. Judíos teã teã je abe tubiriãte no. Ñee ñooño tuchite equia ã. ¹¹ Ũquĩ nyuru esiquisã tuchi. Mbiam mbaaquia tu icua icuate quiatu nguiã ũquĩ. Eru mbiĩĩ irĩ. Eninisi abe mbiĩĩ irĩ. Eriĩĩ ja abe no. —Mbiam umbae mee mee nande je, i chõ nguiã ã. ¹² Hue jenda mo ngue ñee nda. —Ñee ñooño je chõ ure re, Creta jenda re. Ureicua mbei chõ ure re. Nyacua icua na ño ure re. Uretomei ño ure re. Mbae mburireãsa chõ ure no nde, i que Creta jenda mo nda. ¹³ Ichõĩñoa tuchi chõ ñene. Nyebe echeẽ asi tuchi ũquĩ je, Tito. Fnda eriqui tuchi Jesús rese. ¹⁴ Fnda eriqui eã judíos icua ñee ndese. Mbiam tubiriã Dios cheẽ isi teã teãte quia ũquĩ. —Ũquĩ ñee nda jemumbayãchĩ jẽ, ere chõ mbiam hue jenda je. ¹⁵ Echiã mbuturã ji je chõ mbae turã ja riqui nguiã ã. Echiã mbuturã jiriã je quiatu mbae mo turã eãte re. Dios icuasa reã je mbae mo turã eãte. Ndua turã eã mbei. —Eicua eã, i chõchĩ nguiã mbae icua ndese siqui siqui. ¹⁶ —Dios ureicuate quia ã, ichõĩño equia ũquĩ. Echisaã nguia eicuate re. Nyebe nandeico nguiã eicuate, Dios rese siquiã mose. Aba biã tuchi chõ ũquĩ nde. Aba cheẽ mumbasa. Siqui aroneate mbae turã mo ndese.

Mbia embaaquiatsu turã, i Pablo ñee Tito je

¹ Nde quia mbia embaaquiatsu quiatsu turã jẽ. Dios cheẽ ndui si embaaquiatsu quiatsu. ² Amei embaaquiatsu quiatsu. Enyere chõ ñee ee: —Jẽquiacua quiacuachĩ nda jẽ. Jengata turã mbei chõ nguia jẽ. Jẽaracua bei chõ nguia jẽ. Dios jẽicua tuchi chõ nguia jẽ. Jenyescua tuchi quia mbia rese jẽ. Jẽingo tochi chõ nguia no jẽ, ere chõ amei mbaaquiatsu quiatsu, Tito. ³ Ari abe embaaquiatsu quiatsu. Enyere chõ ñee ee: —Jengata turã mbei quia Dios resa rae. Jeñee icuã icuã techĩ nda mbia mo nii jẽ. Jẽquiacua quiacuachĩ nda jẽ. Mbae jẽsaã turã ño nguia mbia resa ráee jẽ, ere chõ ari mbaaquiatsu quiatsu, Tito. ⁴ Sã ari acuanĩ mbaaquiatsu quiatsu. ¶ nda acuanĩ nyescua jaaja ngu rese. ¶ nda nyescua jaaja nguiirĩ abe rese. ⁵ ¶ nda acuanĩ aracua ja ja. ¶ nda ndua ndua ja mbae turã ndese. ¶ nda uchuchua jenda abe mbuturã turã ino no. ¶ nda eturã mbia je. ¶ nda ngu cheẽ abe mumbayã no. Sã ari eĩ acuanĩ mbaaquiatsu quiatsu. Ũquĩ mose mbia ñee icuã icuã aroneate Dios cheẽ nii. ⁶ Acuanĩndu abe embaaquiatsu quiatsu quia no. ¶ nda earacua racua ja. ⁷ Nde abe ecuata turã mbei, Tito. Mbae turã esaã uquia mbia je. Ndeico mose mbia mbaaquiatsu quiatsu, cohee chõ eico. Echĩmbirãtã tuchi chõ nguia. ⁸ Ndeico mose mbia mbaaquiatsu quiatsu, echeẽ turã turã ño nguia ee. ¶ nda mbia ñee icuã eã ndecheẽ mose. ¶ nda Dios cheẽ ndesenda reã ireĩ ireĩ ndecheẽ si. ¶ nda ñee icuã eã jẽje. ⁹ Mbia rimba abe embaaquiatsu quiatsu. Enyere chõ ñee ee: —Jenderecua cheẽ nda jemumba mumba techĩ nguia jẽ. Echeẽ nguire jẽingo bei chõ mbae turã ndese jẽ. Jeñeechĩ nda echeẽ ndibishorõ jẽ. ¹⁰ Mbae mo nda jembuquia chãchĩ jẽ. Jẽseteã ño

jẽingo mbae turã ndese jẽ. Eĩ jenyẽ mose ra mbia ñee turã Dios cheẽ nii, jenyẽ chõ nguia mbia rimba je.

¹¹ Dios que uturã teacuquia mbia je cote ra. Mbia rirõ ja nonde mbae icuã si. ¹² Mbae ja rĩĩ Dios riqui nandembaaquiatsu quiatsu co. Ae echosei chiãte quia nae, ũquĩ nandesecha ja sacuã. Ae icuã nandebite riqui nae, ũquĩ ndecha ja sacuã no. Nandearacua sacuã abe no. Nandeico sacuã mbae turã ndese no. Nandendua bei sacuã Dios rese abe no. Eĩ nande bei quiatsu quia nande namo. ¹³ Jesucristo ra tu íbii ucheẽ nguire. Enininya tuchi ra tu. Nandeico eraarõ arõ ã. Ae ra nandembiate u. Ae rei Dios tuchi. Nanderirõsa mbae icuã si. ¹⁴ Ae que tu mano nande je ra. Nandeicuã ndibishorõ ngue mano nda. Nandechiã mbuquishĩ ngue u umbaerã nda. Nandeico tuchi sacuã mbae turã ndese. ¹⁵ Enyere chõ mbia mbaaquiatsu quiatsu, Tito. Ererecua rã ño eico embaaquiatsu quiatsu. Echeẽ asi asi jiri quia ee. Sã emo ndiqui ndecheẽ andu sereã nea eã.

3

Dios uturã teacuquia nande je

¹ Echeẽ mbia je, Tito. —Ererecua cheẽ nda jemumba mumba techĩ nguia jẽ. Ererecua cheẽ jeñandu quiatsu quiatsu quia jẽ. Jeñĩmbirãtã tuchi quiatsu mbae turã naa naa nonde jẽ. ² Jeñee icuã icuãchĩ nda emo nii jẽ. Jeñee icuã icuãchĩ nda jenyue jẽ. Jeseteã ño jẽingo jẽ. Jenguasu ra jẽsaã saãchĩ emo je jẽ, ere chõ mbia je, Tito. ³ Nandearacuayã techĩ nande abe nyii. Nandeteã teã techĩ equia nyii. Nandembĩrĩ irĩ ji raanguiate nandeicochĩ nyii. Ae nandechosei chosei quia mbae icuã nyii nae, ũquĩ achõ ndesete nandeicochĩ nyii. Mbae icuã ndese nandeico techĩ nguia nyii. Mbia mbae nandechosei chosei techĩ nguia nyii. Mbae mae icuã icuã techĩ nguia nanderese nyii. Nande

abe nandemae icuã icuã techĩ nguia nandechiese nyii no. ⁴ Dios ia eãte que mbia rese aque mose ra. Uya eã ngue eteacuquia nande je ra. Uturã abe que eteacuquia nande je no nda. ⁵ Aque mose que nanderirõ mbae icuã si ra. Eya eãte quiatu ngue eriqui nguia nanderese. Nyebe nanderirõ nguia mbae icuã si. Nandeturã nii eã ngue re. Nandechiã ngue eirei mbiasu ra. Espíritu Turã je que nandechiã mbiasu ra. ⁶ Dios que Espíritu Turã mondo tuchi nande je ra. Jesucristo riĩ ngue emondo nande je ra. Jesucristo rei nanderirõsa tuchi nandeicuã si. ⁷ Dios que Espíritu Turã mondo nande je ra. Uturã je nandembitirõ sacua. Nandemingo bei tuchi sacua no. —Nandemingo bei tuchi rae, sã nandeico i ã no. ⁸ I chõĩñoa tuchi chõ ã nde. ã esenei senei tuchi quia mbia je. ã nda mbia emumbayã. ã nda Dios icuasa siqui ja mbae turã ndese. Ae riĩ aico ñee jêje nae, sã mbia ãquĩ ñee mumbayã ja quiatu. Aba bite ãquĩ. ⁹ Mbia ñee asi asi je si ehui chõ. Mbia ñee mbei mose ngãmei ndaaque riĩ, ãquĩ abe si ehui chõ. Mbia ñee icuã icuã mose nyue, ãquĩ abe si ehui chõ. Ae Dios senei senei nquia judíos je cose nae, ãquĩ nii mbia ñee icuã mose nyue, ãquĩ abe si ehui chõ no. Aba biãte ãquĩ ñee. Aba mbaaquiato ãte ãquĩ. ¹⁰ Emo Jesús quiato mbuqueta queta mose embicuã nonde uchue, ãquĩ abe si ehui chõ. Eicuãte ãquĩ, ere ee. Ndecheẽ andu eã mose, echeembe ee. Aquere ehui chõ esi. ¹¹ Aba chiicuate ãquĩ icuã. ãquĩ siqui turã aroneate quia ãquĩ. Huicua eicuate quia ãquĩ.

Pablo embesa hui bei

¹² Artemas nda amondo nderea reae. Ae oso eã mose, Tíquico ra amondo ndeje. ãquĩ mo ngasẽ mose huee, echu serea Nicápolis

cote. Huee taico bei ama mose, ae que se ra. ¹³ Apolos embucuata turã mondo. Zenas ndese. Zenas ndei embesasa. Jesús quiatote ãquĩ. Mbae mo emondo ee. ã nda echoi turã. ã nda mbae tia eã ee. ¹⁴ Sã nanderesenda riqui mbae turã naa naa mbei ñimbaaquiato. Emo mbae ua mose, sã mbae mo mee mee ee. ãquĩ naa naa mose, siqui turã ño nguia ãquĩ cote. ¹⁵ Ae chi ja serese a nae, ãquĩ saludos mondo quia ndeje aque. Ae Jesús quiato nyesecuate quia urerese hue jenda nae, ãquĩ je saludar ere ure je. Sã Dios turã ndiqui tuchi jẽ ja rese. Amén.

LA CARTA DEL APOSTOL SAN PABLO A FILEMÓN

Pablo embesa Filemón je

¹ Se rei Pablo. Setarõ ji aĩ a. Mbia que setarõ Jesucristo riĩ nda. Timoteo rese aico ã mbesa mbesa ndeje a, Filemón. Uresenda tuchi chõ nde re. Jesucristo rimba. ² Ae Jesús quiato ñumunua nua mbei quia ndechuchúaa nae, ùquĩ je abe ureico ã mbesa mbesa a. Apia je abe ureico embesa mbesa a. Arquipo abe je no. Ae que siqui bei urerese ra. Mbia icuã icuã mose ure je Jesús cheẽ nii. ³ Sã Dios riqui turã mbei jêje. Sã jêya bei riqui erese. Jesucristo rese abe no.

Filemón Jesús quiato tuchi

⁴ Secheẽ mose Dios je, “gracias” ae bei se quia Dios je nderĩ co. ⁵ Mbia que sembiirandu randu nderese ra. —Filemón ndiqui Jesús icua tuchi co. Co eriqui nyesequa tuchite Jesús rese co. Dios quiato ja rese abe no, i que equia sembiirandu randu nderese ra. ⁶ Aico ñee mbeite Dios je nderĩ co. Ae je ereico Jesús nenei nenei nae, i nda ùquĩ abe Jesús icua tuchi nde rã si. ⁷ Aque ereico nyesequa tuchi Jesús quiato ja rese aque. Nyebe seya beite riqui nguiã nderese co. Nde que Jesús erechosei uquia quia Jesús quiato je ra.

Onésimo eisi turã, i Pablo ñee

⁸ Cristo chĩmbaaquiato aico raque co. Sã ererequa riqui ñee ngũimba je no. Uquĩ asaã arõte raque ndeje. Asaã eã nda se. ⁹ Tacheẽ mingue chõ ndeje. —Mbae esaã seje, tae turã ño ndeje. Ameite se cote. Setarõ ji aĩ Jesús riĩ a no. Se rei Pablo. ¹⁰ Mbae mo esaã Onésimo je. Seico mose aa cárcel que aico Onésimo mbaaquiato quiato Jesús riĩ nda. Jesús quiato

riqui co cote. Seriirĩ tuchi rã ño eriqui nguiã co cote. Jesús icua mose co cote. ¹¹ Nderimbachõ ño ngue eriqui nguiã nyii. Erequeteã eã jiri que equia erese nyii ra. Aqueteãte quia erese co cote. Nde abe ra erequeteãte erese cote. Siqui turãte ra nande je cote. ¹² Aque amondo quia ndeje aque. Eisi turã mámbii. Sã ereico seisi turãte no. Uquĩ esaã si ee. ¹³ Amondo sereãte raque. Siquichõ ndei nda serese aa chã. Mbae mee mee sacua setarõ ji je ndecutiã. A setarõ ji ñi Jesús cheẽ turã nii a. ¹⁴ Aisi eã nda mingo serese a, nde “eno” iã mose seje. “Eĩ ere chõ”, ae eã nda ndeje. Nde ae chõ eisi turã. Nde ae chõ echeẽ turã ee. Se ae ra arembucheẽ turã eã ee.

¹⁵ Uchã ndei que ndesi nyii ra. Siqui bei ra nderese cote reae. ¹⁶ Nderimbachõ eã nda cote. Ndequiato chõ nda cote. Nderesenda chõ nda cote. Co aico nyesequate erese co. Nde quiatu ra erechesequa tuchi erese cote. Cristo resenda chõ siqui nguiã co cote. nderese. ¹⁷ Ndequiato tuchi chõ se re. Sã ñi ereico seisi turã turãte no. Eĩ ere si chõ Onésimo isi turã se rã si. ¹⁸ Onésimo, deber i mose ndeje, cobrar erechi nda ee. Seje quiatu cobrar ere. ¹⁹ Pablo chõ se re. Seo je chõ aico nguiã co mbesa ndeje a. Onésimo deber i mose ndeje, asibishorõ nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios nemingo bei sacua. Nyebe deber ere tuchite raque seje. ²⁰ Nyebe Onésimo eisi turã na seje. fnda seya tuchi jiri nderese. Dios abe ra eyate nderese.

²¹ —Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderĩ co. ²² Seruacuã jendecoquiato ino mámbii. Dios ra sembusẽ mondo, jeñee mbei mose ee reae. Uquĩ mose ra aso jendea.

Pablo ñee hui bei

²³ Epafra saludos mondo quia
ndeje aque. Ae tarõ ji ñi serese a.
Jesucristo cheẽ ñi. ²⁴ Marcos abe
saludos mondo quia ndeje aque.
Aristarco abe. Demas abe no. Lu-
cas abe no. ã ndiqui Dios cheẽ
nenei nenei serese ã. ²⁵ Sã Jesu-
cristo riqui uturã ndeacuquia bei
jêje. Amén.

LA CARTA A LOS HEBREOS

Jesucristo mui ño Dios cheẽ mbuchecua nguiã

¹ Dios que ucheẽ mbiãsa asa tuchi quia mbia nandei ñiinda je cose ra. Hue rĩ ji eã ngue eriqui ucheẽ mbiãsa asa ee ra. Dios cheẽ mbuchecua checuasa atate que aque mose ra. ² Ei eã ño namo nde. Jesucristo mui ño Dios cheẽ mbuchecua checuã nguiã nande je co cote. Dios nguiĩrĩte mbucheẽ nande je cote. Ae mui ndese chõ ngue Dios ibi ao nyii ra. Dios que emui mbae ja rerecuarã nda. ³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandecuã mbutiã sacuã nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriĩrĩ tuchi” i chõ Dios nguiã ee. ⁵ Ñe ngue Dios ñee áte ángeles mo je ra:

Seriĩrĩ ño nde re.

Ndereco que amee ndeje ra, i áte que Dios ángeles mo je ra.

Nderu chõ se re.

Seriĩrĩ ño nde re,

i áte que Dios ángeles mo je ra. ⁶ Dios nguiĩrĩ mbu mose íbii que ñee nda: Sã ángeles riqui adorar i ja seriĩrĩ je, i que ra. ⁷ Ñe ngue Dios ñee ángeles rĩĩ nda:

Quiriĩrĩã tu asi rã tuchi chõ ángeles re.

Serimba chõ ángeles re.

Tata rendi rã tuchi,

i que Dios ñee ángeles rĩĩ nda.

⁸ Nguiĩrĩ je quiatu que ñee ã nda:

Nde rei Dios. Ererecuarã mbei ra nde.

Ererecuã turã tuchi ereico nde co.

⁹ Mbae turã eresaã sete quia co.

Mbae icuã nguia erechosei chiãte nguiã.

Nyebe Dios riqui nguiã nembia tuchi nderesenda mo si.

¹⁰ Nde que mbae erechao ja tuchi ibi jenda nyii ra.

Ndeo je que ibei erechao no nda.

¹¹ Ûquiĩ nda ua ja chee.

Nde quia ra ereico bei.

Tiru ima na ja chee ra ùquiĩ.

¹² Sã mbia riqui tiru ima mombo no.

Eyasu rerequia erendaque re.

Ei si ra ibi cote. Ibei abe no.

Nde quia ra ei mbei ereico.

Eremanoa mbei ra nde quiatu,

i que Dios ñee Jesucristo je ra. ¹³ Ñe ngue Dios ñee áte ángeles mo je ra:

Ecoi sejii. Nde abe ra ererecuã serese.

Ae ndeucuyãte quia nae, ùquiĩ je ra ndequirãcuã ateacuquia tuchi.

Ndequirãcuã tuchi chee ra ùquiĩ si, i áte que Dios ángeles mo je ra. Jesús mui je que ñee ùquiĩ nda. ¹⁴ Dios riiĩrĩ eã ño ángeles re. Dios rimba chõ ñene. Ae ra Dios mingo bei, ùquiĩ ndaarõ sacuã ño ngue Dios ángeles mui nguiã.

2

Nandeichayã sacuã Dios icha si

¹ Ae nandechandu quia Dios cheẽ nae, ùquiĩ ndese nandeico ndua tuchi. ¹ nda nandeichayã mbei Dios icha si. ² Ae rĩĩ ángeles riqui ñee mbia je cose nae, ñee ñooñoa tuchi chõ ñene. Ae ùquiĩ ñee mumba nae, mbae rasi que esaã cote ra. ³ Jesucristo sí que ñee nda. —Mbia tamingo bei, i que ra. Mbia que echeẽ senei senei mbiãsa nande je cote ra. Nande echeẽ mumba mose ra mbae rasi nandesã tuchi nande quiatu cote.

⁴ —Jesucristo ñee ñooñoa ño nguia re, i sacuã mbia que Dios mbia mae sayã naa naa nda. Milagros tubiriã.

—Jesucristo ñee ñooñoa ño nguia re, i sacuã mbia que Dios Espiritu

Turã mondo mbia je no nda. Ae je Dios Espíritu Turã mondo mondo sete nae, ũquĩ je chõ ngue Espíritu Turã mondo ra.

Mbia rã ngue Jesucristo ru nyii ra

⁵ Ae ra nandesemo mose nae, hue jenda rerecua eã nda ángeles.

⁶ Sã embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Angeles que eremingo turã tuchi rei mbia si aque mose ra.

Ũquinde ereico bei mbia mingo turã tuchi ángeles si co cote.

Mbia que eremii mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda,

i embesa ji huĩ ñee a. —Mbae rerecuarã ja ra mbia, i mose Dios, mbae ja riĩ ñee nguiã. Mbae mbia cheẽ mumbate raque quia ã. ⁹ Jesús mii ndese chõ nandeico nguiã mae ã.

Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia riĩ” i nguiã Jesús je. Emanonde que Dios emii mbia rerecuarã tuchi cote ra. ¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbia tubiriã mingo bei sacua ño ũquĩ nde. Jesús mbae rasi raã mose, ererecua turã tuchi sacua ño ũquĩ nde. ¹¹ Jesús que nandembitirõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i ireĩ nguiã nande je.

¹² Sã Jesús cheẽ ñi embesa ji rese a no:

Paba ibatenda tasenei senongue je. Senongue rese tairasei rasei ee,

i que Jesús cheẽ mbesa ji huĩ nda.

¹³ Dios taicua tuchi,

i abe que Jesús cheẽ huĩ nda.

A aico seriirĩ Dios chimondo rese a,

i abe que Jesús cheẽ huĩ nda.

¹⁴ Mbiate quiatu ngue nande re. Nyebe Jesús abe mbiarã no nde.

Mano sacua nande je. Mano mose nande je que diablo quirãcuã mbutiã cote ra.

Diablo quiarei equirãcuã tuchi aba iquia sacua.

¹⁵ Ae siquiche beite quia umano si nae, mbae icua nimba raanguia chõ ũquĩ nde.

Ũquĩ siquiche eã sacua ño ngue Jesús mano nguiã.

¹⁶ Angel sacua eã ngue Jesús ru ra. Mbiarã ño ngue eru nguiã.

Judiorã ño ngue eru nguiã. Mbia mbitirõ sacua.

¹⁷ Nyebe Jesús ru nguiã mbiarã nande rã. Ñee turã sacua Dios je nande riĩ.

Dios nandembasi eã sacua nandeicuã nii. Jesús siqui mose mbiarã ngue mano mbia icua nii nda.

Mbia icua mbutiã sacua esi. ¹⁸ Mbae icua ngue tã i tuchi rei Jesús je ra.

Nyebe ra eriqui tuchi nanderese uquirãcuã mee nande je, mbae icua tã i mose nande je.

3

Jesús quia rei i tuchi Moisés si

¹ Seresenda, Dios que jemii icue umbaerã tuchi ra. Nyebe aico nguiã ñee tuchi Jesucristo riĩ jêje co.

Secheẽ ndese jenyiisaquia tuchi quiatu quia. Jesucristo rei nandererecua tuchi cote.

Sacerdote rerecua rã tuchi nande je cote.

² Jesucristo que Dios cheẽ mumbayã tuchi quia mbae raã ja echeẽ nguire ra.

Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si.

Ae que Moisés chao ra. Sã emo ndiqui tuchua ao no.

Tuchua aosa quia rei i tuchi tuchua uchiao si. ⁴ Mbia mo tuchua chao arondete raque.

Dios mii nguia rei mbae ao ja tuchi.

⁵ Moisés que Dios cheẽ mumba eãte rei quia ra.

Erimbachõ ño ngue ae ra. —Ã nda Dios saã je mbia je, i chõ ngue Moisés quia ra.

⁶ Cristo quia rei i tuchi Moisés si. Ae quia rei Dios ririĩ tuchi.

Dios chuchua rerecua tuchi chõ ae re. Nande rei

Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyoï Dios récuua

⁷ Jesús quia i tuchi re. Nyebe Espíritu Turã ndiqui nguiã ñee nande je ã:

Dios cheẽ jeñandu rã namo.

⁸ Jeñia ãtãte ra jẽingochĩ jẽ.

Sã cose ndare chiã ãtã mbeite riqui Dios cheẽ andu sereã turúquiaa eico mose no.

Ũquĩ icuãte que eriqui Dios je ra.

Dios que ñimbirãcuã ñote quia ee ra.

⁹ Dios que siqui minguite quia ũquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui minguite nande je”, i rei que mbia jenamei nguia cose ra.

¹⁰ Nyebe Dios paama i nguiã ñee ee.

“Siqui icuã mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyoï serécuaa”, i tuchi que Dios eriĩ nda,

i que Espíritu Turã ñee embesa ji huĩ nda. ¹² Cochee chõ jẽingo, Sere-senda. Jẽicha eã sacua Dios reco si jeñiangui re. Dios jẽicua bei sacua jeñiangui re no. ¹³ —Nandeico i i tuchi quiatu quia Dios rese, jenye jenye bei quiatu quia jenye. Jendeco mose ibii. ¶ nda mbae icuã jembĩiri iri eã. ¶ nda jẽteã teã eã Dios cheẽ je no. ¹⁴ Sã nande Cristo nandeicua raque nyii no, eĩ nande bei chõ ngua eicua i i. Ũquĩ mose ra Cristo resenda tuchi nande cote. ¹⁵ Sã embesa ji riqui ñee ã no:

Dios cheẽ jeñandu rã namo.

Jeñia ãtãte ra jẽingochĩ jẽ.

Sã cose ndare chiã ãtã mbeite riqui Dios cheẽ andu sereã turúquiaa eico mose no,

i que embesa ji ra. ¹⁶ ¿Aba chõ Dios cheẽ ñandu sereã eandure cose chã? Ae Moisés querao Egipto si nae, ũquĩ ño ngue resẽ. ¹⁷ ¿Aba je chõ Dios paama i cuarenta años cose chã? Ae mbae icuã saã saã nae, ũquĩ ño ngue resẽ. Nyebe mano mano nguiã turúquiaa. ¹⁸ ¿Aba je chõ Dios ñee tuchi chã? —Jenguenea nda jẽucuayã mbei oso serécuaa, i chã. Ae echeẽ mumba quia nae, ũquĩ je chõ ngue re. ¹⁹ Nyebe ngasẽ eã nguiã Dios récuua. Dios icua eãte quiatu ngue re.

4

¹ —Ae seicua quia nae, ũquĩ nda nyoï serécuaa, i chõte Dios quia nande je co. Nyebe nandeico cochee. Cochee jẽingo eã mose, jemo jengasẽ eã arõte Dios récuua.

² Nande abe je chõ Dios riqui nguiã ñee co. —Ae seicua quia nae, ũquĩ nda nyoï serécuaa, i. Moisés reco mosenda achõ je eã ño ngue ñee nguiã. Ũquĩ ngue Dios chandu iru chooño nda. Dios icua rocoĩ. ³ Ae Dios icua quia nae, ũquĩ achõ ño nda nyoï ngasẽ Dios récuua. Uquenea ucua sacua huee. Dios que ñee tuchi ucheẽ andu sereãsa je cose ra: Aico paama ite ee co.

Uquenea nda eucua eã mbei nyoï serécuaa,

i que ra. —Ma siqui serese, i bei rei que equia eraarõ arõ nda. Ibi ao mosenda bei. ⁴ ã mbesa ji que chĩ nda:

Dios mbae ao jare que uquenea ucua séptimo día ra,

i que embesa ji ra. ⁵ ã abe que chĩ embesa ji rese ra:

Uquenea nda eucua eã mbei nyoï serécuaa, i que embesa ji huĩ no nda. ⁶ Emo emo abe ra Dios icua. Siqui sacua erécuaa. Ae Dios cheẽ ñandu nyii nae, ũquĩ ngue Dios icua

eâte ra. Nyebe ngasê eâte nguiã Dios récuua. Dios cheê nguiatu ngue emumbate nguiã. ⁷ Nyebe Dios riqiui nguiã ñee nande je quiatu co. Nandeico sacua ere se namo. Uqui echeê mumbare nyii. Sã David Dios cheê mbesa no:

Dios cheê jeñandu rã namo.

Jeñia âtâte ra jëingochi, i que Dios ra,

i que David embesa ra. ⁸ Josué que mbia isrealitas mii aroneate Dios récuua ra. Uqueneã ucua sacua. ¹ nda Dios ñee âte rei. —Taemingoserécuua jenguenea ucua sacua, i âte rei. ⁹ Nyebe ra Dios quiato nyoí ngasê Dios récuua. Huee ra uqueneã ucua tuchi huee cote. ¹⁰ Ae ra ngasê Dios récuua nae, uqui nda uqueneã ucua tuchi. Sã Dios uqueneã ucua tuchi mbae ao jare no.

¹¹ Nandechimbirâcuã tuchi oso nonde Dios récuua. Nandequenea ucua sacua. Ae Dios icuayâte quia cose nae, uqui na nda nandeicochi nande mo namo jê. ¹² Dios cheê nguia rei ereco tuchi. Equirâcuã tuchi. Ique tuchi aba chiangui re. Sã tiquise rimbe riqui ique chôte oso no. Eí si chõ Dios cheê nde. Ique tuchi aba ndua nduasa ri. Aba ndua nduasa mbuchecua tuchi aba je. Aba chioseí oseí abe mbuchecua tuchi aba je no. ¹³ Mbae mo ndese Dios riqui jirandu eã eâte co. Mbae mo nandesã nyecuayã cuayã aroneate quia esi ã.

Jesús ñee turã mbei Dios je nande riñ

¹⁴ Jesús rei Dios riirĩ tuchi. Sacerdote rerecuu tuchi chõ eriqui nguiã nande je co. Oso que ibate Dios rea ñee ñee sacua nanderĩ nda. Eriqui ñee ñee mbei Dios je nanderĩ co. Nyebe nandeico tuchi quiatu quia ere se. ¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu

ngue diablo tã i tuchi nguiã nyii. “Ma Jesús mbae icuã naa” i nguiã. Mbae icuã ngue Jesús saã eã mbei chõ nda. ¹⁶ Nyebe nandesiquicheã nguiatu quia Dios riichã. Nyese-cuate quiatu nguiã nanderese co. Nandesiquicheã nguiatu quia ñee ñee ee. Eya eã sacua nanderese. Uquirâcuã mee sacua nande je, diablo tã i mose nande je.

5

¹ Sacerdote rerecuu judío mbae rei mbia chõ. Ae chõ ñee turã mbei nguiã mbia riñ Dios je. Ae chõ mbae quishĩ ji mondo mondo nguiã Dios je. Dios mbia chisaã saã icuã mbutiã sacua esi. ² Sã sacerdote rerecuu abe riqui mbia nande rã si no. Nyebe eriqui nguiã siqui tochte mbia quirâcuã nea je. Mbia aquiatuã je abe. Mbia icha icha je abe no. ³ Sã sacerdote abe riqui Dios cheê mumba no. Sã eriqui mbae quishĩ ji mondo mondo Dios je no. Dios eicuã mbutiã sacua esi. Mbia chisaã icuã abe mbutiã sacua esi no. ⁴ “Sacerdote rerecuu se” i aroneate emo, Dios eirabo eã mose. Dios ae que sacerdote mii mii nda. Sã Aarón mii cose no. ⁵ Eí si que Cristo ra. “Sacerdote rerecuu se” iã ngue ae ae ra. Dios quiatu ngue emii nguiã. Sã Dios cheê mbesa ji riqui ñee no:

Seriirĩ ño nde re.

Ndere co que amee ndeje ra,

sã Dios i ñe e ee no. ⁶ Sã embesa ji mo ndiqui ñee no:

Sacerdote bei rei nde.

Melquisedec na tuchi ereico nde co,

sã embesa ji riqui i no. ⁷ Jesús siqui mose a íbií, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeê ñandu ra. Jesús quiatu que Dios cheê mumba sereã mbeite quia ra. ⁸ Dios riirĩte raque Cristo. Mbae rasi que esaã tuchi ra. Ñimbaaquiatu chõ

ngue equia ũquí ndese Dios cheẽ mumbayã nda. ⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ũquí emingo bei quia co. ¹⁰ Dios quiatu ngue emi nguia sacerdote rerecuarã. Melquisedec na si no.

Jeñmbaaquiatsu mbei chõchĩ equia Cristo rese ã

¹¹ —Mbae tasenei tuchi Jesu-cristo rĩ jêje, ae rei que se ra. Jê nguia secheẽ jeñandu sereate nguia. Nyebe aico nguia embiasa asa aroneate jêje co. ¹² Cosete que jêingo rei Jesús icua resẽ. ¿Mbaerã jêingo ñimbaaquiatsu mbeite re? † nguia nda jêingo nguia emo mbaaquiatsu quiatu chã. Jêaquiatsu mbei chõchĩ. Dios cheẽ aba chiicua jêicuayã mbei chõchĩ. Æquẽ na ño jêingochĩ ã. Sã Æquẽ ndiqui usi quiandi achõ mbei no. Soo quiatu eu aroneate nguia. ¹³ Æquẽ na jêingo bei mose, jêaquiatsu siqui mbae turã ndese. ¹⁴ Ae ñimbaaquiatsu quiatu tuchi quia Cristo rĩ nae, ũquí nguia rei mbae turã icua tuchi, mbae icuã icua rocoĩ. Mbia cuasu rã ño ũquí nde.

6

¹⁻² Ae rese jeñmbaaquiatsu nyii nae, aba chiicuate ũquí. ũquí mĩte rese jêingochĩ nguia. Mbae aba chiicua mo abe jêicua jiri Jesús rĩ ae. Æ aba chiicua que asenei ja jêje nyii ra: —Jenyisaã mbae icuã si jêhui, ae que jêje nyii ra. —Dios jêicua, ae que jêje nyii no nda. Bautismo abe que asenei jêje nyii ra. —Jêo jeñono Jesús quiato arõ, ae que jêje nyii no nda. —Mbia raque ra quera si, ae que jêje nyii ra. —Mbia Dios quiatoã nda mbae rasi saã tuchi tata cuásuu, ae que jêje nyii no nda. ³ ũquí aba chiicuate riqui ã ndesẽ. Aba chiicua tasenei jêje

cote, Dios “eno” i mose. ⁴ Emo emo ngue siqui rei Dios quiatorã nyii ra. Dios chĩmee icua raque nyii. Espĩritu Turã abe icua raque nyii no. ⁵ Dios cheẽ turã abe icua raque nyii. Dios quirãcuã abe icua raque nyii no. ⁶ ũquí hui mose Dios si, uba si aroneate erese cote. Jesús mbucha si chõ nguia ira rese ũquí. Iquia icua chõ nguia Jesús je mbia resaa ũquí. ⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸ Ñui achõ suri mose huee, eicuãte ũquí. Eĩ si chõ mbia Dios cheẽ andu chooñosa no nde. Eicuãte ũquí. ũquí nda Dios mombo chõ tata cuásuu.

Dios ra ucheẽ mbuchebiã mbei

⁹ Jeni aico nguia ñee eã, Sere-senda. Dios cheẽ jeñandu chooño eã nguia jê ndeae. Jesús jêicuate quia ũquí. Nyebe jêingo tuchi quia erese ũquí ndeae. ¹⁰ Dios turãte eriqui co. Tesareia nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ũquí. ¹¹ Eĩ jenyje bei quiatu equia nyesecua bei emo ndese. † nda Dios mbae mee tuchi je jêje. ¹² Jeñimbirãtã mbei chõ nguia mbae raã jê. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguia ee. Eriqui beite mbae mee mee ee co.

¹³⁻¹⁴ Sã Dios ñee Abraham je cose no: —Taico turã mbei ndeje. Nderi-irĩ nducucha tubiriã ndae, sã i Dios Abraham je no. ũquí mose que Dios jurar i umbae nombre rĩ nda. ¹⁵ —Dios ra seriirina mee seje ucheẽ nguire, i que Abraham nguia er-aarõ arõ mingue ra. Dios que eri-irĩ mondo chee ee ucheẽ nguire cote ra. ¹⁶ Mbia jurar i mose, Dios

riĩ ño eriqui nguiã jurar i. —Ũquĩ nda asaã eã, i aroneate cote, jurar ire nyii. ¹⁷ —Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene. ¹⁸ Dios “mbae tasaã jêje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguiã nander-aarõ turãte nandeso mose erichã. —Taemingo bei, i mose Dios nande je, ucheẽ nda embuchebiã. ¹⁹ —Dios ra semingo bei ibate ucheẽ nguire, nande equia ã. Nande ũquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios riichã sacua no. Eĩ nande chõ nguia nande abe Dios riichã, nande eicua mose. ²⁰ Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderiĩ pe. Sã sacerdote riqui ñee turã mbei Dios je mbia riĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

¹ Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec que esobeishĩ oso ra. Melquisedec que bendecir i ee ra. ² Abraham ngue el décimo mee Melquisedec je ra. “Ererecua Turã” i chõ nguiã “Melquisedec” i mose. “Mbia mingo turãsa nyiese” i abe chõ nguiã “Melquisedec” i mose no. “Mbia siqui turã nyiese” i chõ nguiã “Salem” i mose no. ³ Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui

nguiã Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguiã ee. Ae emee ee décimo sacua nda. ⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no. ⁶ Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷ Ae bendecir i nae, aque quia rei i tuchi bendecir i ji si. ⁸ Ae mbia décimo isi isi quia uataque si ã nae, mbiachõ ño ũquĩ nde. Ũquĩ mano arondete. Melquisedec quiatu que mano eã mbei ra. ⁹ Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. Ũquĩ décimo isi isi raque nguesenda si. ¹⁰ Abraham ngue ũquĩ i ja ra. Eriiriã ndaque nyii, décimo mee mose Melquisedec je.

¹¹ Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. ¹ nda Jesús tu ãte rei. Ae quia ñi tu nguiã sacerdote bei nonde cote. Melquisedec na sí. Aarón na eã. ¹² —Sacerdotes ra nyuuru uru eã ngõngue rendaque re cote, i que Dios aque mose cote ra. —Jesús mĩ nda siqui sacerdoterã mbei cote, i que Dios cote ra. ¹³⁻¹⁴ Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquĩã

ndaque sacerdoterã cose. —Ũquĩ mo sacerdoterã aroneate, i rei que Moisés nyii ra.

¹⁵ Sacerdotes cose ndare rã eã ño Dios Jesús mĩ nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei. ¹⁶ Moisés chimbese rui si eã ño Jesús riqui nguiã sacerdoterã co. Levĩ rĩrĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷ Sã Dios ñee ee embesa ji rese no:

Nde quiatu ereico bei nguiã sacerdoterã mbei co.

Melquisedec na si, sã Dios i ñee ee no. ¹⁸ —Sacerdotes ra nyuuru uru eã ngõngue ndaque re cote, i que Dios aque mose cote ra. Ũquĩ nguiatu ngue mbia mingo aroneate nguiã Dios rese. ¹⁹ Moisés chimbese quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰⁻²¹ —Sacerdoterã nde, i mose emo je nyii, emo ngue jurar i âte quia ra. Dios Jesús mĩ mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.

“Nde quiatu ereico bei nguiã sacerdoterã mbei co.

Melquisedec na si”,

i que Dios cheẽ huĩ embesa ji rese ra. ²² Ae contrato Dios saã mbia je nyii nae, ũquĩ contrato que mbia mingo eã Dios rese ra. Ae contrato Dios saã Jesús rĩ namo nae, ũquĩ nguiã rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴ Jesús quia siqui nguiã sacerdoterã mbei co cote. Emo nda chi eã mbei euru erendaque re emo mose cote. ²⁵ Ae ra Dios siichã Jesús rĩ nae, ũquĩ nda Jesús mingo bei

tuchi. Jesús quia siqui beite nguiã co, ñee turã sacua Dios je ũquĩ nĩ.

²⁶ Ae chõ sacerdote turã tuchi riqui nguiã nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embicuã aronea tuchi quia ra. Ae quia ibatenda rerecua tuchi riqui nguiã namo co. ²⁷ Jesús quia rei sacerdote rerecua ataque rã eã tuchi. Ũquĩ nguiatu ticuas quishĩ quishĩ mbeite nguiã sacrificio raã naa. Dios eicuã mbutiã sacua esi. Mbia abe icuã mbutiã sacua esi. Jesús quiatu ngue ticuas mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacua. Mbia icuã mbutiã ja sacua ño ngue mano nguiã aque mose. ²⁸ Mbiachõ ño ngue sacerdote rerecua ja ñiinda ra. Ũquĩ ngue mbae turã saã mbei aroneate quia ra. Dios quiatu que Jesús mĩ sacerdoterã mbei cote ra. Ae quia mbae icuã saã jiri jiriã tuchi nguiã.

8

Dios contrato yasu saã Jesús rĩ

¹ Ababi tuchi quia rei Jesús siqui mose sacerdoterã. Sacerdote turã tuchi quia rei ae nande je. Hue eñi ngoi Dios Ibatenda ribisho quiti nande je huee. ² Hue eriqui mbae raã naa Dio s chuchua ibatendaa huee. Dios ae chisaã tuchi chõ hue tuchia re. Mbia mo nyisaã eã ño ñene. Nyebe Dios chuchua tuchi chõ hue re. ³ Sacerdote rerecua ja chõ sacrificio raã naa sacua nde. Nyebe Cristo abe sacrificio saã nguiã umano mose. ⁴ Ae sacrificio Cristo saã nae, ũquĩ nguiã eturã tuchi sacerdote chisaã si re. Cristo siqui mose ibi, ei nda sacerdote eãte rei ae. Moisés chimbese cheẽ ndui achõ ño sacerdotes ibi jenda riqui nguiã sacrificio raã naa. ⁵ Ae sacerdotes ibi jenda saã saã nguiã mbae nae, ibei jenda rese

aba mundua sacua ño ñene. Sã Dios ñee Moisés je Dios chuchua ao nonde no. —Ndeico mose ibi ibátee que sechuchua ibei jenda ateacuquia ndeje, ũquí na si chõ sechucharã ibi jenda esaã, i que Dios ñee Moisés je ra. ⁶ Ae contrato Dios saã mbia je nyii nae, mbaranquiatuãte que ũquí nda. Ae contrato Dios saã nande je namo Jesús rĩ nae, eturã tuchi chõ ũquí cote re. —Ã tasaã jêje. Ã abe tasaã jêje no, i tuchi Dios quia contrato namonda rĩ nande je co. ⁷ Contrato ñiinda mbia mingo bei mose Dios rese, i nda contrato yasu raã eãte rei nande je. ⁸ Dios ia eãte que eriqui mbia aque mosenda rese ra. Sã embesa ji riqui no:

Ã ño ngue Dios ñee nguiã: Contrato yasu ra asaã je Israel jenda je.

Judá jenda je abe no.

⁹ Contrato asaã nguia ũquí namei je nyii nae, ũquí contrato rã eã nda eyasu asaã cote.

Mbia arao quia Egipto si nae, ũquí mosenda rã eã nda contrato asaã je mbia namondo je.

Mbia cose ndare chõ ngue contrato saã iru seje resẽ.

Contrato raande que secheẽ mumba mumba chõ nda.

Nyebe ũquí asecha chõ nguiã, i que Dios ra.

¹⁰ Ae contrato ra asaã je Israel jenda je, ã ndei e ã:

Secheẽ nda ami tuchi eãquĩ ndese.

Secheẽ nda amondo tuchi echiangui re.

Se ra ererecua turã tuchi ee.

Serimba tuchi ra ũquí.

¹¹ Seicua ja tuchi rae. Mbia cuasu ja.

Eñetẽ abe ja chee.

Seicua ja mose, ũquí mose emo uataque mbaaquiatu quiatu aroneate serĩ cote.

Seicua ja tuchi quiatu ra aque mose.

¹² ũquí icuã nda ambutiã ja esi.

Atesarei bei ra eicuã si, i que Dios cheẽ huĩ embesa ji rese ra. ¹³ —Contrato yasu tasaã, i que Dios cote ra. Contrato ñiinda imate quiatu ngue ee re. Mbae ima nda ua ja cote.

9

Cristo rei sacerdote tuchi cote; sacerdotes ñiinda rã eã

¹ —Eĩ jenyee jenyee bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi jenda rĩ ño eriqui nguiã ñee, “sechuchua” i mose. ² Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que hue cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chĩ huee no nda.

³ Cortina mbucheseco ji que siqui tuchia ite rĩ nda. Aque quitera quiti que cuarto nongue ñi nda. Lugar Santísimo, i que hue cuarto je ra. ⁴ Huee que altar mo ñi oro ao ji ra. Mbae shimbu turã ndei sacua. Ira ao ji mbae riru mo abe que chĩ huee ra. Oro quiti ji resebe que ra. Contrato Dios cheẽ mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye ra. Mbichae resebe que eñi nda. Maná i equia ee. Aarón chitchoquia ruri abe que chĩ mbae riru imi ye no nda. ⁵ Angeles raanguia ao ji que chĩ ibate mbae riru arõ nda. Querubines, i que ũquí je ra. Ujeo que embiitee u mbae riru arõ nda. Sacrificio renda rei mbae riru. ũquí cuartos nyeremo jenda asenei ja aroneate jêje namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacua Dios je.

⁷ Cuarto cortina quitera quitinda quiarei mbia mo ique aronea tuchi. Sacerdote rerecua mĩ ño ngue i que quia huee ra. Ique chiibe

ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huiique mose huee ra. Dios eicuã mbutiã sacuaã. Mbia icuã abe mbutiã sacuaã. ⁸ Aque mose bei que mbia mo ndiqui ique aroneate Lugar Santísimo nda. Dios riichã tuchi sacuaã. Ûquĩ ndese Espíritu Turã ndiqui urembiirandute ã. ⁹ Sacerdotes que ticuasú iquia iquia tuchi rei quia aque mose ra. Ûquĩ ngue mbia chiã mbitirõ eã mbei chõ nda. Mbia mundua ndua sacuaã Cristo ruqui rese chõ ngue ùquĩ nda. Ûquĩ nandeicuate quia ã cote. ¹⁰ Contrato ñiinda que mbia mingo turã aroneate quia ra. Mbae riñ achõ ño ngue eriqui nguiã ñee. Mbaeiaie riñ. Mbia chiú riñ. Mbia chimbei riñ. Mbia choita riñ. Ûquĩ nñ ja. Ûquĩ ñee ndui sí chõ ngue mbia riqui rei nguiã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mñ ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiã mbae raã naa nande je pe. ¹² Cristo quiatu ngue ticuasú ruqui sii sii eã u nguiã nande je. Chivo ruqui abe. Nguqui ae je chõ ngue nandeicuã mbutiã nguiã. Mano mñ ngue mbia ja je ra. Mbia mingo bei sacuaã cote. ¹³ Ticuasú ruqui que mbia mbitirõ tirõ ndei quia sacerdote je ra. Chivo ruqui abe. Ticuasú riirĩ ndaque rei ji cusubu abe no. ¹⁴ Cristo ruqui quia rei equirãcuã tuchi ùquĩ mbae ruqui sí. Cristo ruqui mñ nguiã rei nandendua nduasa mbitirõ tuchi. Ae ruqui mñ nguiã rei nandemingo turã Dios reco rese. —Se ae tamano mbia icuã mbitirõ sacuaã. Mbia mbae turã naa naa sacuaã Dios je cote, i que Cristo mano nda. Mbae icuã mo ngue esaã jiri jiriã tuchi ra. Espíritu Turã ngue siqui tuchi ere

emano mose ra.

¹⁵ Cristo que contrato yasu saã nande je cote ra. Dios chiirabo eriichã tuchi sacuaã cote. Dios chiirabo siqui tuchi sacuaã ere se Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ùquĩ icuã nñ ngue Cristo mano nda. ¹⁶ Ae contrato Cristo saã nande je nae, testamento chõ ùquĩ nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote. ¹⁷ Testamento raãsa manoa mose, testamento chõño ño aque mose re. ¹⁸ Dios contrato ñiinda raã namo mose que ticuasú iquia uquia mbia je ra. ¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no. ²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacuaã jẽje, i que Moisés ñee mbia je erii rii cote ra. ²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda. ²² Contrato ñiinda mose, mbae ruqui achõ je chõ ngue Dios riqui nguiã mbia icuã mbutiã esi. Dios que mbia icuã mbutiã chooño eã nda. Mbae quishĩ mose bei quiatu ngue eriqui nguiã mbia icuã mbutiã mbei esi.

Cristo mñ aba icuã mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda sí. Ibi jenda que Moisés sii sii mbae ruqui je embitirõ sacuaã nda. Ibatenda quiatu que embitirõ eã mbae

ruqui je ra. Cristo ruqui mii je quiatu que ra. ²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderiñ huee. ²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacua mbae ruqui je. Nguqui j e eã ño ñene. Cristo quiatu que mano mii nda. Nguqui que eichusẽ tuchi nande je ra. ²⁶ Cristo que tu mii ibi ra. Mano mii sacua nande je. Nandeicua mbutia sacua. Mbae ua serĩ mose que eru mano aa ra. Mano nyiibeĩ ibei eã equia co. ²⁷ Sã mbia riqui mano mii no. Sã Dios riqui ecuata mee aquere no. ²⁸ Eĩ si que Cristo mano aque mii no nda. Mbua icua ja mbutia sacua esi. Cristo ra tu si ibii emo mose. Aque mose ra manoa mbia icua ndiquicharõ cote. Uquiato mingo bei sacua nguiatu ra eru. Ae esaarõ arõ nguiã nae, uqui mingo bei sacua.

10

¹ Moisés chimbese que mbia mingo turã eã ndaque ra. Mbua mundua ndua sacua Dios ririĩ mano ndese chõ ngue re. Ticuasua mbia quishĩ nyiibeĩ ibei rei quia nae, uqui nduqui que mbia mingo turã eã no nda. ² Uqui mbia chiã mbitirõ mbei mose, eĩ nda sacerdotes equishĩ nyiibeĩ ibei ate rei. Eĩ nda ticuasua mii quishĩ ndei mbia mbitirõ ja sacua. Eĩ nda mbia tesarei rei huicua si. ³ Mbua ticuasua quishĩ nyiibeĩ ibei mose, uqui ngue embutesareiãte huicua si ra. Munduate quiatu que huicua ndese ra. ⁴ Ticuasua ruqui ra mbia icua mbutia eã mbei. Chivo ruqui abe no.

⁵ Cristo ruqui mii nguiatu mbia icua mbutia nguiã esi co. Sã Cristo ñee Dios je siqui mose ibii no:

Ticuasua ruqui mbia mbitirõ eã mbeite quia ndeje co.

Nyebe que serete eremeese je ra.

Se mano sacua mbia icua nii.

⁶ Mbae raaque rei ji abe ndebiãte.

Ticuasua mbia quishĩ quishĩ nguiã huicua nii nae, uqui abe ndebiãte no.

⁷ Nyebe ngue acheẽ nguiã ndeje: “Ae ndebite nae, uqui ndese seico sacua ño ngue achu nguiã.

Sã embese ji riqui ñee serĩ no, uqui ñee nguire que achu ra”, ae que ndeje ra,

i que Cristo ngu je ra. ⁸ Nyebe Dios biãte riqui nguiã sacrificios. Mbua ticuasua quishĩ quishĩ mose huicua nii. Mbae raaque rei ji abe ebiãte no. —Uqui jesaã saã, i raque Moisés chimbese huĩ. ⁹ —Ae ndebite nae, uqui ndese seico sacua ño ngue achu nguiã, sã Cristo i Dios je no. Mbua mbui sacua sacrificios raã naa si chõ ngue eru nguiã. Sacrificio mii tuchi que esaã u mano mbia icua nii nda. Cristo ruqui mii ño mbia icua mbitirõ mbei nguiã co cote. Sacrificio raã i i rocoĩ. ¹⁰ Ae Dios bite nae, uqui ngue Jesucristo saã tuchi u ra. Mano mose mbia ja icua nii. Mano mii tuchi que u ra. Nanderirõ mbei que nandeicua si cote ra. ¹¹ Sacerdotes riqui beite raque Dios chuchua ã. Ticuasua equishĩ nyiibeĩ ibeite raque quia mbia icua mbutia sacua ã. Uqui nda mbia icua mbutia eã mbei. ¹² Jesucristo quiatu que mano mii aque mose bei ra. Mbua icua ndiquicharõ sacua ño ngue re. Aquere eñi ngoi bei Dios ribisho quiti nande je hue. ¹³ Pe eñi ngoi beite Dios jii pee. Ererecua tuchi ra Dios rese cote. Uquiracua nda eteacuquia tuchi chee uquiatoã je cote. ¹⁴ Sacrificio mii ngue esaã nda. Aque mii sacrificio je que uquiato chiã mbitirõ ja bei ra. ¹⁵ Sã Espíritu Turã abe riqui ñee uqui no:

16 Ae contrato ra asaã je judíos je nae, ã ndei e ã: Secheẽ nda amii tuchi echiangui re. Secheẽ nda amii tuchi eãquĩ ndese no.

17 Atesarei bei ra eicuã si, i que Espíritu Turã nda. 18 Dios nandeicuã mbutiã mose, mbae mo nandequishĩ aroneate quia nandeicuã ndiquicharõ ã cote.

Dios nandesichã na

19 Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique Diósaa. Jesucristo ruqui riĩ nandequi Diósaa. 20 Cristo rete rei cortina mbuchesece ji rã. Cristo rete mano mose, cortina abe que embui ra. Nyebe nandeico ique arõte Dios rea Lugar Santísimo ã cote. Cose ndare rã eã tuchi chõ cote re. 21 Jesucristo mii ndei sacerdote tuchi nande je cote. Dios quiato ja je cote. 22 Diósaa ra nandesiquicheã ique oso cote. Nandechiã turã ño nandeico oso Dios riichã. — Dios ra nandeisi turã, nande chõ nguia nandechiangui re. Cristo quiatu ngue nanderii rii nguia nguqui je nyii. Nandeicuã mbutiã sacua nande si. I turã je que nandeirei ra. 23 —Taemingõ bei, i que Dios nande je ra. Ñeende ùquĩ nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, i. 24 Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandengue nandembuchesece turã nguia quia nyiese. Mbae turã nandesaa uquia bei quiatu quia nandenongue je. 25 Cristo quiato ñmunua nua mose, nandetesareiã mbei quiatu quia ñmunua nua. Sã emo emo ndiqui ñmunua nua eãte no. Cristo nandehosei uquia uquia bei quia nanderesenda je. Achite quiatu Cristo ñi nguia tu a.

26 —Mbae icuã tasaã, nande i i mose Jesucristo icuare, emo nda manoa nandeicuã ndiquicharõ cote. 27 Ûquĩ mose, mbae icuã nda nandesaa tuchi. Ûquĩ mose, nandesoo chee ra tata cuásuu no. Huee ra Dios ucuâyãsa nyoĩ ja. 28 Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbia que etiisu isu eã tuchi eiquia ra. 29 Dios riiri ucuâyãsa quia ra mbae rasi saã tuchi ùquĩ si. Cristo ruqui ucuâyãsa abe no. Ae Espíritu Turã isiteã teãte quia nae, ùquĩ abe no. Cristo ruqui je quiatu ngue Dios ùquĩ mii ndei nguia icúe. 30 Sã Dios ñee no: —Se ra mbia icuã asibishorõ mbae rasi je, sã i no. —Dios sí ra mbae rasi saanguquia ngũimba je, erimba icuã mose ee, i abe que embesa ji huĩ nda. 31 Ae ra Dios mbasi eicuã nã nae, mbasi tochi eã ndae. Aba mbusiquiche tuchi chõ ùquĩ nde.

32 Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jẽimbiracuã mingue que equia aque mose ra. Ûquĩ ndese jendua jiri ae. 33 Mbia que ñee icuã icuã tuchite quia jemo je ra. Mbia que mbae rasi saanguquia tuchi quia jemo je no nda. Mbia tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra. 34 Jẽya eãte que eriqui mbia tarõ ji rese ra. Mbia jembae rirõ ndirõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei. 35 Dios jẽicua bei quiatu quia aque mosenda rã mbei. Ûquĩ mose ra Dios mbae turã tuchi mee jẽje. 36 Ae Dios bite nae, ùquĩ ndese bei chõ jẽingo. Ae mbae turã nda

Dios mee jêje nae, ũquĩ jêsaarõ arõ mingue chõ nguia cote. ³⁷ Achite Jesucristo ñi tu a. ³⁸ Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra hui Dios si nae, Dios ia eã tuchi ra erese. ³⁹ Nande quia ra nandehui eã mbei esi. Ae ra hui esi nae, ũquĩ nda Dios mbutiã. Nande quiatu Dios nandeicua tuchite nguia ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ũquĩ ña? Ae Dios icua nae, ũquĩ nda ñee. —Ucheẽ nguire ra Dios mbae mondo seje, i rae. —Ae asaarõ arõ nguia nae, ũquĩ nda emondo seje ucheẽ nguire no, i ra eno. Mae eã ndaque erese. ² Dios quiato cose ndare que Dios icua tuchi quia ra. Nyebe mbia riqui nguia jirandu jate erese. ³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandeicuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caín mbae si ra. Nyebe Dios embae ofrenda isi turã nguia. —Co eturãte riqui seje co, nyebe Dios i nguia Abel ñi. Nyebe mbia riqui nguia jirandu jate Abel rese. ⁵ Enoc que Dios icua ra. Nyebe Dios ererao nguia ibate emano mose rocoĩ. Mbiambuete que eorẽ cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc ñi nyii reaẽ. ⁶ Emo Dios icua eã mose, ũquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios riichã mose, Dios turãte ra ee, sã i quiatu no. Aquere quiatu ra Dios eisi turã cote. ⁷ Noé que Dios icua ra. —Ama nda uchi,

mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguiirĩ mingue sacua eye. Mbiambaque que Dios icua eãte quia ra. Noé mĩ ño ngue eicua quia ra. Nyebe Dios Noé isi turã nguia.

⁸ Abraham ngue Dios icua ra. Nyebe Dios cheẽ mumbayã nguia. Dios que ñee ee ra. —Eso rã a si. Ibi mo tamee ndeje mámbi, i que Dios ee ra. Abraham ngue Dios cheẽ mumbayã oso ra. Ae quiti esi nae, jiranuate raque erese nyii. ⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huee ra. Nguiirĩ ndese. Isaac. Jacob abe no. Ũquĩ je abe que Dios ñee nda. —A ibi tamondo jẽ abe je, i. ¹⁰ Abraham quiatu que Dios icua tuchi quia ra. Nyebe ñee nguia. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra. ¹¹ Abraham ninisi abe que Dios icua ra. Sara, i equia ee. Nyebe que nguiirĩ ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra. ¹² Amei tuchi raque Abraham, Dios eriirina mee mose ee. Mbiamtubiriã i tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quĩshĩ tubiriãte riqui no.

¹³ Ũquĩ ngue mano ja Dios mbae mondo ja eã mose ee ra. Ae je “co tamondo jêje” i Dios ee nae, ũquĩ ndurubi quia ño ngue mano nda. —Dios ra emondo ure je uremanonde, i que eyate quia ndua ndua ũquĩ ndese ra. Ũquĩ nguia que Dios icuate quia ra. —Nandeico mbirĩ ndaque equia ibi ã. Ibatenda chõ nande re, ite que

equia eicua ra. ¹⁴ Emo ñee mose ùquĩ, siqui sete quiatu nguiã Dios récuua. ¹⁵ Ûquĩ ndua ndua mose nguecua rese nda nyoĩ si nyebi re chã ae. ¹⁶ —Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ùquĩ ndecua turana quereco co.

¹⁷ —Ma Abraham secheẽ mumbayã, i que Dios Abraham ñii nda. —Nderiĩrĩ eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiĩrĩ mii ñii. ¹⁸ —Isaac nda tiĩrĩ tuchi ndeje, i rei que Dios ee nyii ra. ¹⁹ Abraham ngue Dios icua tuchite quia ra. —Dios seriĩrĩ mbuquera arondete se eiquia mose nyii, i que ndua ndua uchiangui re ra. Abraham nguiĩrĩ iquia serĩ mose que Dios eo isi ra. Abraham Dios cheẽ mumbayã mose, nguiĩrĩ iquia raanguia chõ ngue re. Dios embuquera si raanguia chõ ngue eno nde. ²⁰ Isaac que Dios icua ra. Nyebe ñee nguiã nguiĩrĩ je. —Dios ra mbae turã saã jẽje, i que Jacob je ra. Esaú abe je. ²¹ Jacob que Dios icua ra. Nyebe ñee nguiã José riĩrĩ ja je umano serĩ mose. —Dios ra mbae turã saã jẽje, i que ee ra. Uchitochoquia rese que nyeco rei nyibi ñee turã Dios je ra. ²² José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequianguie abe jendao a si, i que israelitas je ra.

²³ Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua eiquia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe. ²⁴ Moisés s abe que Dios icua quia aquere cote ra. Nyebe “Egipto jenda rerecua riĩrĩ nducucha eã se” i nguiã. ²⁵ “Dios quiato rese taico

se. Mbia icuã icuã ndaque ra seje. Dios quiatoã ndese ra aicõã”, i que Moisés ucuasu mose cote ra. Mbae icuã ndese aba oote raque. Aba mbia mbiriĩ ño ñene. ²⁶ —Taico chõ Dios rimba rese. Mbia ra sembaši mbasi raque Cristo riĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷ Moisés que Dios icua ra. Nyebe esi nguiã Egipto si. Siquiche ãte ererecua paama i si. Ñĩmbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jẽiquesa ja jẽsii sii. f nda ángel jendiĩrĩ i iquia eã, i que Moisés ñee mbia je ra. Angel que israelita riĩrĩ mo iquia eã tuchi cote ra.

²⁹ Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandesio iasa emombita, i rei que Egipto jenda abe ra. I que tuchõ eati eiquia ja ra. ³⁰ Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee. ³¹ Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ùquĩ ndese. Rahab que Dios quiato isi turã nda. Mbuchemi ngue ererecua icuã si ra.

³² ¿Aba riĩ abe ra aba ñee jẽje re? Dios quiato tubiriãte quiatu ñene. Ûquĩ asenei ja aroneate jẽje. Gedeón. Barac. Sansón. Jefté. David. Samuel. Dios cheẽ mbuchecuasa ja riĩ. ³³ Ûquĩ ngue Dios icuate quia ra. Nyebe eriqui

nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que etequiatu quiatu bei quia ny-acua mbaba mose abe ee ra. ³⁴ Ũquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que etequiatu quia ũquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacuã. ³⁵ Cuña abe que Dios icuate quia ra. Nyebe Dios eriirĩ ndaaque mbuquera si nguiã ee. Emo emo abe que mbae rasi saãte quia Jesús rĩ nda. Hui sereãte quiatu que equia esi ra. — Sã seiquia rei. Dios ra sembuquera si nguiã. Serete mbuchiicuabo turã ndae, i que equia ra. ³⁶ Emo emo ngue ñimbirãcuã nguia mbia iquia iquia chooño mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios si ra. ³⁷ Emo emo ngue mbia iquia iquia rei sita je no nda. Tiquise je abe que eriqui rei eiquia iquia ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios si ra. ³⁸ Ũquĩ ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

³⁹ Ũquĩ ngue Dios icua tuchite rei quia ra. — Mbae turã tamondo jêje, i rei Dios quia ee nyii nae, mee jei eã ngue ee ra. Mee je quia ra ee

cote. ⁴⁰ Ũquĩ mii je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ũquĩ ndese.

12

Jesús mii ndese nandendua ndua

¹ Sã Dios icuasa tubiriãte cose no. Ũquĩ na ño nandeico nande abe Dios icua tuchi. Ae nandembuti mbuti quia Dios si nae, ũquĩ si nandehui. Ae mbae icuã aba mbuchiishĩ arõte quia nae, ũquĩ si nandechiicuasẽ ño. Jesús mii ndui chõ nandeico ngata. Nandechim-birãcuã ño nguia siqui erese. ² Jesús mii ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireite raque uqui. — Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³ Jeñimondochote chí nda siqui mose Dios rese jẽ. Sã Jesús no. Mbia icuã icuã mose ee, ñimbirãcuã mbei que equia ra. Ñimondochote eã ngue ra. ⁴ Jesús mii ngue mano mbae icuã ndiquisã quisã sacuã mbia si ra. Jẽingo mose mbae icuã ndiquisã quisã, aba mo ngue jẽiquia eãte jẽ nguia tu ra. ⁵ ¿Embese ji si jêtesarei chõ nde? — Seriirĩte quia jẽ nde, ite Dios quia jêje co. Sã embese ji riqui ñee ã no: Seriirĩ, Dios mbae rasi saanguquia mose ndeicuã nii, ereisiteã teãchĩ nda jẽ.

Dios ñee mose ndeje ndeicuã nii, echeẽ eisi turã ño.

⁶ Ae rese Dios nyesecua nae, mbae rasi ra esaanguquia ee eicuã mose.

Ae Dios isi nguuirina nae, ũquĩ je ra ñee eicuã nii,

i que embese ji hui ñee nda. ⁷ Dios “seriirĩ” i tuchi quia jêje co. Nyebe eriqui nguiã mbae rasi raanguquia jêje jẽicuã mose co. Sã mbia

ja riqui nguiirĩ iruã eicuã mose no. ⁸ Dios mbae rasi raanguquia eã mose jêje, eriiriã nguiatu rei jê. ⁹ Sã nanderu ibi jenda riqui nandeiruã nua nandefetê mose no. Nandembaaquiatsu sacuã. Sã nandeico echeê mumbayã cote no. Eĩ nande sí chõ Paba ibatenda je. Ae cheê nguiatu nandemumbayã tuchi. Uquĩ mose ra nandereco siqui turã tuchi. ¹⁰ Sã nanderu ibi jenda riqui nandembaaquiatsu jua raque no. Nandeico turã sacuã aa ibii. Dios quiatu nandembaaquiatsu turã tuchi nguiã nanderu ibi jenda si co. Nandechiã mbitirõ sacuã ae rã si. ¹¹ Dios mbae rasi saanguquia mose nande je, nandechosei chiãte raque. Erasite quia ñene. Aquere quiatu ra nandechimbitirõ cote. Aquere mose quiatu ra nandeya cote.

Dios cheê nda jêsiteã teächĩ jê

¹² Jêo tomei jembirãtã jiri ae. Jêtima abe jembirãtã jiri siqui sacuã Dios rese no ae. Jeñimondochoã jiri quia siqui Dios rese ae. ¹³ Jêingo tuchi quiatu quia erese. Ae ndua ata atate quia nae, i nda uquĩ abe siqui tuchi chee erese chã. ¹⁴ Jêingo turã mbia ja rese. Dios rã si chõ jêingo. Dios rã si nandeicoã mose, nandemae eã mbei ra erese. ¹⁵ Jenyiteaquiatsu turã ño nguia. I nda jemo Dios turã isiteã eã. Emo mbae icuã naa mose jêje, jêtesarei chõ esi. Jendua icuã icuãchĩ nda jenongue rĩ jê. Uquĩ mose ra jeñimbicuã jate. ¹⁶ Jeninisi ae rese chõ jêingo. Jemo nda siquichĩ emo ninisi rese jê. Dios mbae ra jêsiteã teächĩ jê. Sã Esaú no. Aque que umbae herencia mondo ja chõ soo ñetê ndibishorõ nda. ¹⁷ Aquere que “sembae herencia taisibe” i rei nyeseo tuchi ra. “Bendecir ere rã seje”, i rei que ngu je ra. Eru que teã teã ño ee echeê mose ra. Nyebe Esaú nyeseo tuchi nguiã cote.

¹⁸ Dios turã tuchi riqui jêje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirã pirirã i tuchi quia ee aque mose ra. ¹⁹ Trompeta que nyuihui ee no nda. Dios que ñee ee cote ra. Mbia que Dios cheê ñandu sereãte ra. ²⁰ Dios quiatu ngue ñee nguiã nyii: —Emo oco mose sita ibate rese, uquĩ jêiquia. Mbae quiaa rinda abe oco mose erese, uquĩ abe jêiquia no. Sita je jêiquia. Jeñio no ae, i quiatu que Dios ee nyii ra. ²¹ Aba mbusiquiche tuchi que mae mose uquĩ ndese ra. —Aico titi titi i tuchi esi co, i chee que Moisés abe ra. ²² Eĩ jenyee eã ño jê nde. Dios jembusiquiche ãte quia jê co. Dios recua jêsiichã tuchi quia jê ã. Dios reco chuchua. Jerusalén naanguia ibatenda jêsiichã tuchi quia jê ã. Angeles tubiriã abe jêsiichã tuchi quia ã no. ²³ Dios icuasa ñiinda abe jêsiichã nguia ã no. Uquĩ mbae nombres mbesa ji chi ibate pe. Dios abe jêsiichã nguia ã no. Ae ra Jesús quiatoã icuã tea tea ja emo mose. Mbasi ja rae. Jesús quiato mano je abe chõ jêsiichã ichã nguia ã no. Uquĩ ngue Dios mbuturã tuchi cote ra. Eicuã jiri jiriã tuchi chõ cote re. ²⁴ Jesús abe chee jêsiichãte quia ã no. Ae ruqui rĩ ngue Dios contrato yasu raã nande je ra. Ae ruqui rii rii ji jêsiichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jêje co. Echeê nda jêsiteã teächĩ jê. Dios que mbae rasi saanguquia mbia je cose ra. Echeê nenei neneisa andu sereã mose a ibii. Ibatenda riqui ñee nande je co. Ae cheê nandechandu sereã mose, mbae rasi ra esaanguquia tuchi nande je cote. ²⁶ Dios cheê mose que ibi nyere nyere aque mose coose ra. —Namo nda ibi ambuchere si no. Ibi mii ño

eã nda ambuchere. Ibei abe ra ambuchere no. Aque mii nda ambuchere cote, i Dios quia co. ²⁷ — Aque mii nda mbae ambuchere ja, i Dios quia co. Aque mose ra mbae ua ja Dios chiaio. Ae ra siqui bei, ũquĩ achõ nda ua eã. Mbae ataque ra ua ja aque mose. ²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. Ũquĩ mose ra eya tuchi nanderese. ²⁹ Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyesequa jenyiese

¹ Jenyesequa quia jenyiese jẽ. Nyiesenda chõ jẽ nde. ² Mbia ngaẽ mose jenyuchúaa, jẽisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui reĩ nguia ee. ³ Etarõ ji rese jẽingo ndua. Mbae turã jẽsaã saã ño nguia ee. Jẽtarõ ji raanguia chõ jẽ abe erese re. Ae je mbia icuã icuã ndiqui nae, ũquĩ je jẽingo turã ño. Sã jẽ abe jendete riqui no. Sã jẽ abe jẽiruã nua arõte no. ⁴ Emo siqui mose ngũinisi rese, ũquĩ Dios bite. Sã emo ngũinisi resechõ ño siqui. Sã eriquiã emo ndese. Emo siqui mose emo ninisi rese, Dios ra paama i tuchi ũquĩ je. Ae ninisi áte riqui nae, siqui mose emo ndese, Dios ra paama i tuchi ee no. ⁵ Mbae isiquia rese ra jendua nduachĩ jẽ. Jembae mii ndese chõ jẽya. —Jaendechayã mbei ra se, i quiatu Dios nguia co. ⁶ Ae bei jẽ. Dios ra nanderechayã mbei. Nyebe nandeico nguia ñee: Dios riqui beite sere se co. Mbia mo si ra asiquicheã, nyebe nandeico nguia i ã.

⁷ Jenderequa rese jẽingo ndua. Ũquĩ ño ngue Dios cheẽ senei senei jẽje ra. Ũquĩ ndiqui Dios icuate ũquĩ. Eĩ jenyẽ Dios icua jẽ abe

ũquĩ na si. Ũquĩ nguia siqui turãte nguia Dios rese ũquĩ. ⁸ Eĩ mbei chõ Jesucristo re. Cose mosenda bei. Namo abe chee. Eĩ mbei ra ae quia. ⁹ Mbia jembaaquiatsu ata mose, echeẽ si jẽhui chõ. Mbia jembaaquiatsu chooño mose, echeẽ si jẽhui chõ no. Ae je mbia riqui mbaeiaie i nande je nae, ũquĩ si nandehui mose, ũquĩ abe ra nandechiã mbuquirãcuã eã no. Nandechiũ abe ra nandechiã mbuquirãcuã eã no. Dios turã ae chõ nandechiã mbuquirãcuã nguia. ¹⁰ Jesús mii ngue mano nande je ra. Sacrificio rei ae mii nande je. Cose ndare rã eã namo cote re. Ticuasú ra mano eã nandechiã mbutiã sacua cote. Jesús ruqui mii ño nandechiã mbutiã nguia co cote. ¹¹ Sacerdote rerequa riqui ticuasú ruqui rerao rao Lugar Santísimo aque. Dios mbia icuã mbutiã sacua esi. Isho jiri sucha cuasu si echoi quia ticuasú roo rei rei aque. ¹² Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua nguqui je ra. ¹³ Jesús que aba ireingua saã tuchi ra. Nande abe nandesiquicheã nguia quia aba ireingua raã erese. ¹⁴ Nanderequa ibi jenda ra ua chõ. Dios ra nanderecuarã mee nande je ibate. Ũquĩ nguia ra ua eã mbei. ¹⁵ Jesús que mano nande je ra. Nyebe nandechẽ turã mbei quia Dios je. Sã nandechuru riqui ñee turã mbei erĩ. ¹⁶ Jẽingo turã ño nguia mbia je. Jembae jemee mee nguia emo je. Ũquĩ Dios bite.

¹⁷ Jẽingo turã jenderequa je. Echeẽ jemumbayã. Jenderequa riqui jendeaquiatsu quiatu Dios je ũquĩ. —¿Jeteaquiatsu turãte equia re? i chee ra Dios ee. Jenderequa cheẽ jemumbayã mose, eyate ra ũquĩ mose. Echeẽ jemumba mose, eya eãte ra jendese. Jẽ abe ra jẽya eãte no.

¹⁸ Jeñee mbei quia Dios je urerĩ. Ureico turã sete equia mbia ja je

ã. Ureico ndua icuã icuã eãte emo
nii ã no. ¹⁹ Jeñee tuchi quiatu quia
seriñ Dios je. I nda Dios semondo jei
jendea.

Echeẽ hui bei

²⁰ Dios ae aba mombia nguiã.
Dios ae que Jesús raaque mbu-
quera si ra. Jesús ruqui riñ ngue
Dios ucheẽ yasu mee nande je ra.
Jesús ruqui riñ ngue Dios embu-
quera no nda. Jesús rei oveja
raarõsa rã. Nanderaarõ arõ mbei
equia co. ²¹ Sã Dios riqui jem-
buquirãcuã tuchi. I nda jẽingo bei
ae Dios bite ãquĩ ndese. Sã ae
riqui tuchi nandechiangui re. Nan-
demingo tuchi sacuaẽ ae ebite ãquĩ
ndese. Jesucristo quiatote quiatu
nande re. Sã mbia ñee turã mbei
quiatu quia eriñ. Amén.

²² Seresenda, aico co mbesa ju-
ate jembiirandu sacuaẽ a. Secheẽ
jemii tuchi rã jẽaquĩ ndese. ²³ Aico
jembiirandu Timoteo rese a. Etarõ
iriã ndiqui namo co cote. Tu jei
mose serea, ae abe ra arao seso
mose jendea. ²⁴ Saludos amondo
quia jenderequiasa je aque. Jesús
quiato ja je saludos amondo quia
aque. A Italia jenda saludos mondo
quia jẽje aque. ²⁵ Sã Dios siqui turã
jẽ ja je. Amén.

LA CARTA DE SANTIAGO

Mbia icúe cúe jenda je Santiago ucheẽ mbesa mondo

¹ Santiago chõ se re. Dios rimba chõ se re. Jesucristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios mĩ ño aba mbaaquiату nguiã

² Mbae icuã tã i mose jêje, jêya bei chõ nguia, Seresenda. ³ —Ma Dios icua tuchite, i mose mbae mo tã i jêje, jêingo tuchi chõ nguia Dios rese ùquĩ mose. Jeñimbirãcuã aquiату sacuã. ⁴ Jeñimbirãcuã mbei chõ nguia Dios icua. ¹ nda Dios riqui jembitirõ tirõ mbei jembuchĩcuabo mingo. Ùquĩ mose ra jêturã tuchi cote.

⁵ Jêingo turã aquiатуã mose, jeñee ño Dios je. Jeñimbirãcuã aquiатуã mose, jeñee ño Dios je no. Ae ra jembaaquiату. Ae ñee nguia Dios je nae, ùquĩ ja je ra mbae mondo tuchi. Ñee asi asi eã nda ee no. ⁶ Jê ache i mose Dios je, “Dios quia ñene”, jenye tuchi quiату quia. —Dios ra emee âte rei seje, i mose jemo, eicuâte ùquĩ. Ama ndebera rã ño ùquĩ nde. Sã quiririã ndiqui ama ndebera rerao turã eã no. Sã eriqui embuchebi chebite no. ⁷ Ama ndebera rã emo siqui mose, Dios ra mbae mee eã ùquĩ je. ⁸ Emo ndua ata ata mose, mbae mĩ mo ndese eriqui aroneate.

⁹ Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aque. ¹⁰ Sã Jesús quiato mbaecha ia bei chõ siqui, mbae icuã tã i mose ee. Sã eya riquiã umbae tubiriã ndese. Sã Dios rese quiату eya riqui. Embae ua mose, sã eya riqui

ùquĩ mose abe no. Mbaecha mbae ra siqui bei eã. Sã quiata uti riqui soõ jeite no. ¹¹ Tenda rasi mose ee, quiata ra ñimama. Euti abe ra uqui. Eturã eã mbei ra cote. Eĩ si ra mbaecha. Umbae tubiriã nyabe chõ nda mano.

Mbae icuã tã i mose nande je

¹² —Ã esaã icuã, i mose emo jêje, jêsaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje. Jemingo bei rae. —Ae nyesecua quia serese nae, ùquĩ nda amingo bei, i que Dios cose ra. ¹³ —Ã esaã icuã, i mose emo jêje, Dios eã ño ñee nguiã jêje ùquĩ. —Dios que “ã esaã icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee. ¹⁴ Aba chiangui renda icuã nguiarei mbae icuã osei uquia aba je. Dios eã ñene. ¹⁵ Emo mbae icuã osei mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶ —Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê. ¹⁷ Ae mbae turã tuutu beite quia nande je nae, Dios chimondo chõ ùquĩ nde. Dios quiarei eturã mbei tuchi. Eicuã jiri jiriã emo mose. Sã Dios tenda ao no. Nyasi abe no. Ùquĩ nguia nyiabi abi jiri nguiã. Dios quiarei nyiabiã mbei emo mose. Eturã mbei tuchi eriqui co. ¹⁸ Sã Dios riqui seriirĩ i nande je no. Nande echeẽ icua mose nan-dechiangui re. —Jê nane je aico seriirĩ i co, i que Dios nane je ra. Dios riirĩ tubiriã tuchi ra ngaẽ nan-derui cote.

Dios cheẽ jemumbayã ño nguia eandu mose

¹⁹ Dios quiarei eturã tuchi. Nyebe echeẽ jeñanduse tuchi quiату quia jê. Jendua quiату quia ñee nonde. Paama jenye jei jei techĩ

nguiã emo je. ²⁰ Ae Dios bite riqui mbae nae, ùquĩ nandesã aroneate nande paama i mose. ²¹ Ae Dios ucheẽ mondo quia jeñiangui re nae, ùquĩ jẽisi tuchi quiatu quia. Jẽingo mingue chõ nguia Dios cheẽ je jẽ. Aba mingo beisa chõ Dios cheẽ nde. Ae mbae icuã ndese mbia riqui nae, ùquĩ icuã tubiriãte eriqui raque. Ùquĩ si jẽhui tuchi. Mbae icuã ja si jẽhui tuchi.

²² Dios cheẽ nda jeñandu chooño chĩ jẽ. Echeẽ jemumbayã tuchi quiatu jẽ. Emo Dios cheẽ andu chooño mose, ae sí chõ ñimbĩrĩ irĩ nguia aque. ²³⁻²⁴ Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooño re. Tesarei jei chõ nguia Dios cheẽ si. Echeẽ mumbayã ndocoĩ. ²⁵ Dios cheẽ nguiarei aba mbui tuchi mbae icuã si. Ae siqui tuchite quia Dios cheẽ ndese nae, ùquĩ ndese ra Dios riqui tuchi echeẽ mumbayã mose. Ùquĩ Dios cheẽ ñandu chooñoate quiatu nguia. Echeẽ emumbayãte quiatu nguia.

²⁶—Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ùquĩ nde. Ae sí chõ ñimbĩrĩ irĩ nguia ùquĩ. ²⁷ Ae Dios quiato chooñoa tuchi nae, ùquĩ ndiqui mbae turã naa naa ùquĩ. Ùquĩ ndiqui esi cheecha reaquiature ùquĩ. Ùquĩ ndiqui eru cheecha reaquiature ùquĩ no. Mbae eã mose eru cheecha mbae. Ùquĩ ndiqui ñimbĩcuã icuã eãte mbae icuã mo je ùquĩ.

2

Mbia nandesi turã ja chõ nguia nyiabiã

¹ Jesucristo quiato chõ jẽ nde. Jenderecua tuchi chõ ae re. Nyebe mbia jẽisi turã ja chõ nguia nyiabiã.

² Sã mbaecha mo ndiqui ngasẽ jeñimunua mose jẽje no. Huĩrao turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no. ³ Sã jẽingo mbaecha isi turã no. Sã jẽingo embucoi erenda turã tose no. Sã jẽingo mbaecha reã mbucoi turã eã no. ⁴ Eĩ jenyẽ mose, jẽisi turã ja eã ño nguia ùquĩ. Jembuchiabi chõ nguia ùquĩ. Hue rĩ ja eã ño jẽingo nguia mbia cuata mee ùquĩ. Jendua turã eã ñochĩ nguia ùquĩ. ⁵ Secheẽ jeñandu rã, Sere-senda. Mbia mbaecha reã ngue Dios irabo ra. Dios icua tuchi sacua. Ùquĩ ndese quiarei Dios o tuchi mbaecha mo si. —Ùquĩ nda siqui tuchi serese se ererecua tuchi mose, i que Dios ñee nyii ra. ⁶ Jẽ ngue mbia mbaecha reã jenguirirõ tuchi ra. Eicuã eãte ùquĩ ndiqui raque jẽje. Mbaecha quiatu eicuãte riqui nguia jẽje. Jembĩrĩ irĩ ño nguia. Jenderao rao chõ nguia ererecua je, jẽ mbae mo mee mee sacua ee. ⁷ Mbaecha chõ ñee icuã icuã nguia Cristo rii. Nandererecua chõ Cristo resẽ.

⁸—Sã ereico nyesecua ndechiese no. Eĩ ere si chõ nyesecua emo ndese, i que Dios mbia je cose ra. Dios cheẽ i tuchi chõ ùquĩ nde. Nande ùquĩ ñee mumbayã mose, nandeico turã ndae. ⁹ Nande mbia mo isi turã mose, emo isi icuã mose, eicuãte ùquĩ. Nande mbia isi chiabi abi mose, Dios cheẽ nandemumba chõ nguia ùquĩ. ¹⁰ Dios cheẽ tubiriãte raque nande je echeẽ mumbayã sacua. Nande echeẽ mii mo mumba mose, echeẽ ja mumba raanguia chõ ùquĩ nde. Echeẽ ataque mumbayã ndaque. ¹¹ Dios cheẽ tubiriãte. —Jẽingochĩ nda emo ninisi rese, i que ra. —Mbia mo nda jẽiquiachĩ, i que ae si ñee nda. Nande emo iquia mose, echeẽ nandemumba chõ nguia ùquĩ. Nandeicoã ndaque

emo ninisi rese. ¹² Dios cheẽ ngue nandembui mbae icuã si cote ra. Nandechesecua sacua mbia rese. Nyebe nandeico turã mbei chõ nguia mbia je. Dios quiatu ra nandecuata mee tuchi emo mose cote. ¹³ Ae eya eã eãte riqui emo ndese nae, ùquĩ ndese ra Dios ia eã eã nandecuata mee mose, Nandeya eã mose emo ndese, ùquĩ mose ra Dios nandembasiã.

Nande Dios icua mose, mbae turã abe nandesã ño nguia

¹⁴ Sã emo ndiqui ñee no. — Dios aicuate quia co, i. Ùquĩ mbae turã naa eã mose, ùquĩ nda Dios sirõ eã mbae icuã si. Dios icua chooño ño ñene. ¹⁵ Sã Jesús quiato mbaecha reã mo ndiqui ngasẽ jêje no. Sã eirao eã ndiqui no. Sã echirã mo eã ndiqui no. ¹⁶ Sã jemo ndiqui ñeeño ee no. —Nde ae chõ ndechirã etea. Nde ae chõ ndeiraorã etea. Eso turã ño, i jemo ee. Mbae mo mee ndocoĩ ee. Jẽñee iru chooño ño nguia ee ùquĩ. ¹⁷ Jẽingo turã eã mose emo je, Dios jẽicua chooño ño nguia ùquĩ. Jẽ Dios jẽicua mose, mbae turã jẽsaã jiri ae.

¹⁸ Sã emo ndiqui ñee no. — Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose ¿mañi ae ra jẽicua mbae turã naa naa eã mose re? Se quiatu mbae turã asaã saã nguia co. Nyebe ra mbia “eriqui Jesús icuate co”, i serĩ. ¹⁹ —Dios mĩ ño siqui nguia co, jenye chõ nguia ùquĩ. Eturãte raque ùquĩ. Aba checuayã abe riqui ñee ndaque Dios mĩ nĩ co no. Siquichete esi ñee ndaque erĩ. ²⁰ ¿Mbaerã jëracuayã tuchi riqui re? Emo mbae turã naa naa eã mose, Dios icua chooño ño nguia ùquĩ. ²¹ Sã nandei Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguia. ²² Abraham ngue

Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeico nguia ñee. “Abraham Dios icuate”, i. ²³ Sã embesa ji riqui ñee no: Abraham ngue Dios icua ra. Nyebe que Dios eisi turã mbei ra, i que embesa ji ra. Ùquĩ ngue ique tuchi cote ra. Nyebe “Dios Quiato” i nguia Abraham je. ²⁴ Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã. ²⁵ Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguia. ²⁶ Sã nanderete no. Umi umi eã mose, “eraaque” i chõ mbia nguia ùquĩ je. Ùquĩ na ño mbia mo ndiqui nguia ã. Mbae turã naa eã. Nyebe nandeico nguia “Dios icuayãte” i ee ã.

3

Cochee chõ nandechuru nandereco

¹ —Mbia mbaaquiatsu quiatu sacua se, jjenye jaaja techĩ nda equia jẽ! Emo emo mĩ ño. Mbia ra mae tuchi urerese. Urecuata ra emee tuchi. Mbia mbaaquiatsu quiatusate quia ure re. ² Dios cheẽ nandechabi chabi chõ nguia nande ja ã. Emo uchuru rerequia turã mose, nguete ja abe rerequia turã ño nguia ùquĩ. ³ Sã nandeico freno mĩ ticuas churu rese no. Nandechẽ mumbayã sacua ño ùquĩ nde. Sã freno ñetẽ je chõ nandeico ticuas rete rurucuata nandenduasa quiti no. Ticuas rete cuasute raque. ⁴ Sã lancha cuasute raque no. Sã quiririã quirĩcuãte riqui raque ee no. Ira ñetẽ je chõ echa riqui nguia embucuata turã unduasa quiti. ⁵ Eĩ ño nandechuru nguia. Nandechuru mbae saã ata ata chõ nguia. Eñetẽte

raque. Sã tata ñetête raque no. Mbae ra eseí ja tuchi oso quia.

⁶ Tata rã ño nandechuru re. Nandechuru quiaírei mbae icuã ñumumbara raã uquiã tuchi nande je. Nandechuru icuã na eãte nanderete resenda mo. Nandechuru chõ nanderete mbiacuã ja nguiã. Nandechuru chõ nandereco rerequia icuã mbei nguiã. Aba checuayã ño nandechuru rerequia icuã nguiã no. ⁷ Sã nandeico quiaa riinda mo mbuseteã arõte raque no. Ae mbebe quia nae, ùquĩ abe nande mbuseteã arõte raque. Mbei abe nandembuseteã arõte raque. Ae siqui ama ñi nae, ùquĩ abe nandembuseteã arõte raque no. Ùquĩ ja que mbia mbuseteã emo mose ra. ⁸ Nandechuru quiatu nandembuseteã aroneate nguiã. Nandechuru icuã nguiatu nandembuquiriri aroneate nguiã. Mbei tasi je rã tuchi chõ nandechuru riqui nguiã nande je ã. ⁹ Nandechuru je nandeico ñee turã ndaque nanderu Dios je. Nandechuru sí je chõ nandeico nguiã ñee icuã mbia Dios chiao je cote. Ae rã sí raque Dios mbia ao. ¹⁰ Nandechuru sí je nandeico ñee turã ndaque. Ñee icuã abe no. Ùquĩ Dios biãte, Seresenda. ¹¹ Sã icua riqui no. I turã mose, eturã ja bei chõ ñene. I reẽ mose, ereẽ ja bei chõ eno nde. I chumumbara chĩ aroneate icua mii ye. ¹² Sã isio riqui ia eã ira a mo no. Isio a bei chõ nda ia nguiã. Ira mo nda ia eã enongue a no. Ea sí chõ nda ia nguiã no. Sã nandeico i turã ndea eã i reẽ mbirõ no. Hue icua mii ye ra eñi ja eã. Eĩ si chõ nandechuru no nde. Nandechẽ ñumumbara mose, eicuãte ùquĩ.

Ae je Dios uaquiato mee nae

¹³ Jemo aquiato mose, sã eriqui mbae turã naa naa mbei. Sã eriqui tochi bei no. ¹⁴ —Paama jenyechecuayã mose jenyue, jẽaquiato

jẽsaã ñooño ño nguiã ùquĩ no. Jeñee ñooño ño nguiã ùquĩ. Dios cheẽ ndui eã tuchi chõ ùquĩ nde. ¹⁵ Eĩ jenyue eã nda cote, Dios uaquiato mee mose jẽje. Paama jenyechecuayã mose jenyue, Dios rã eã ño jẽ nde. Dios quiatoã nyisaã na ño ùquĩ nde. Aba checuayã nyisaã na ño ùquĩ no nde. ¹⁶ Mbia ndua eã mose emo ndese, eicuãte ùquĩ. Mbia paama i checuayã mose nyue, eicuãte ùquĩ no. Ùquĩ mose ra mbia siqui turã nyue. Mbae icuã icuã mbei ra ee. ¹⁷ Dios uaquiato mee mose nande je, nandechiã turãte ra cote. Nandechiã nda ngoite cote. Cocheete ra nandeico cote. Emo ñee nda nandemumba eãte cote. Nandeya eã nda mbia rese cote. Mbae ra nandesã turã mbei quia cote. Nandendua ata ata eã nda cote. Nandechẽ nyecuate ra eriqui mbia je cote. ¹⁸ Nande mbia nandemingo turã mose nyiese, nandechiã turã nda nandeico cote.

4

Ae mbae icuã quiatote nae, Dios quiatoã ño ùquĩ nde

¹ ¿Mbaerã ño jẽingo nyao nyao nyiese chã? ¿Mbaerã ño jẽingo ico icuã icuãte nyue chã? Jeñiangui renda icuã ñi ño ñene. “Se chõ jẽ”, jenyue jaaja quiato nguiã mbae icuã oseí oseí. ² Jembae eã jenyosei choseichĩ nguiã ã. Jẽ ererequiayã mbei mose, mbia jẽiquia arõ ñochĩ nguiã ã. Mbae jenyosei chosei chõchĩ nguiã ã. Nyebe jẽicuã icuã mbeite riqui nguiã jenyue ã. “Embu seje”, jenyue ãte quiato nguiã Dios je. Nyebe jẽingo nguiã eisiã. ³ “Embu seje”, jenyue mose Dios je, “embu seje” jenyue icuã icuã ño nguiã ee ã. Mbae mumba chooño sacua ño jẽingo nguiã “embu seje” i Dios je ã. Nyebe Dios riqui nguiã emee eã jẽje. ⁴ Sã cuña mo ndiqui hui ngu si no. Eĩ jenyue

si chõchĩ nguĩã hui hui Dios si ã. Ae Dios biãte nae, jẽ ùquĩ oseĩ oseĩ mose, Dios quiato aronea ño jẽ cote re. ¿Mañi jenyẽ quia ùquĩ icuayãte re? ⁵ Sã embesa ji riqui ñee ñooño ãte no:

Espíritu Turã Dios mee nguia nandechiangui re nae, aque riqui ngueteãte nanderese co.

Nandeco sacua Dios mii ndese, i que embesa ji ra. ⁶ Dios turã i ite riqui nande je co. Sã embesa ji riqui ñee no: Ae ucuasu saã saã nguia nae, Dios riqui ùquĩ ndiquisãte co. Ae siqui tochte quia nae, ùquĩ je quiatu Dios turã i ite riqui nguĩã co, i que embesa ji ra. ⁷ Jẽingo tochi chõ nguia Dios je. Aba checuayã jẽsiquisã ño nguia jenyesei. Ùquĩ mose ra uchã jẽsi cote. ⁸ Dios jẽsiichã tuchi quiatu quia. Ùquĩ mose ra Dios abe jendiichã tuchi. Jẽingo mose mbae icuã ndese, jẽhui chõ esi. Jendua ata ata mose, jẽnia jembitirõ ño. ⁹ ¿Mbaerã jẽingo iquia iquia mbae icuã naa mose re? ¿Mbaerã jẽyate riqui mbae icuã naa mose re no? Jenyeseo quiatu quia jẽicuã nii. Jẽya eã nguia quia jẽicuã ndese no ae. ¹⁰ Jẽingo tochi chõ nguia Cristo je. Aquere quia ra ae jẽturã mbuchecua mbia je cote.

Nandechẽ icuã eã emo nii

¹¹ Jẽnee icuãchĩ nda emo nii, Sere-senda. Dios cheẽ mumba chõ ùquĩ nde. —Jenyeseua chõ nguia jenyese, i que Dios ra. Jẽ Dios cheẽ mumba mose, “Dios cheẽ icuã” i raanguia chõ ùquĩ nde. “Dios cheẽ icuã” jenyechĩ nda echeẽ mumbayã ndocoĩ jẽ. ¹² Dios ae chõ mbia cuata mee nguĩã co. Dios mii ño ucheẽ mondo nguĩã nande je. Nande echeẽ mumbayã sacua. Dios ae chõ aba rirõ nguĩã aba icuã si. Dios ae chõ nda aba mondo tata cuãsuu no. Nande quiarei emo cuata nandemee aroneate.

Mbae mo tasaã isamami, nande aroneate

¹³ Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacua icua. Tenda nongue mose ra achube, i no. Ndua rane eã Dios rese. ¹⁴ Ùquĩ Dios biãte. Nandeiranuate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no. ¹⁵ —Mbae mo tasaã, nandechĩ nda nande ae ndua mose rocoĩ Dios rese jẽ. —Dios eno i mose seje, ùquĩ mose quiatu mbae tasaã, nande quiatu quia. ¹⁶ ¿Mbaerã jẽingo tesareĩ Dios si re? ¿Mbaerã jẽingo “se ae mbae tasaã” i re? Jenguasu jẽsaã saã ño nguĩã ùquĩ. Eicuãte ùquĩ. ¹⁷ Ae mbae turã icuate quia nae, sã ùquĩ ndiqui mbae turã naa mbei. Mbae turã naa eã mose, eicuãte ùquĩ cote. Dios biãte ùquĩ cote.

5

Santiago ñee asi mbaecha je

¹ Tacheẽ mbaecha je cote. Jẽya eã ndasi ra jẽsaã tuchi cote, mbaecha. Jenyeseo tuchi quiatu quia. ² Jembae ra ua ja tuchi cote. Chicuaquiarĩ nda jẽirao ua tuchi. ³ Jembae mbae isiquia ra quiachã ja cote. Jembae mbae isiquia rã nda jẽ abe jẽquiachã tuchi cote. Mbae isiquia rese chõ jẽingo nguĩã ndua. Dios rese ndua rocoĩ. Mbae isiquia jemunua nua tuchi chõ nguĩã Dios jembase sacua ã cote. ⁴ Mbia que quiei quiei rei quia jẽje resẽ. Mbae que jemondo turã turayã nguia jembae ishao shaosa je resẽ. Ùquĩ Dios mbiirandu raanguia chõ nguĩã jeni. Nyebe ra Dios jembase uquirãcuã je. ⁵ Sã ticuasú riqui quiaru bei ñimbuquira no. Eiquia nonde. Eĩ ño jẽ nde, mbaecha. Jembi rese chõ ngue jẽingo bei quia

ra. Jêquiaru chooño mbei que equia ra. Siqui rocoĩ Dios rese. Nyebe ra Dios jembasi cote. ⁶ Jê ngue mbia turã jembasi mbasi quia ra. Jê ngue mbia turã jêiquia iquia quia no nda. Mbae icuã mo esaã eãte raque jêje. Nyebe ra Dios paama i tuchi jêje, mbaecha.

Jesucristo jêsaarõ arõ mingue chõ nguia

⁷ Jesucristo ra tube íbii, Sere-senda. Jêsaarõ arõ mingue chõ nguia. Sã mbia riqui ama nyaaqui raarõ arõ mingue no. Mbae tiquia nonde no. Aquere ra eriqui minguebe umbae raarõ arõ no. Eucua ucua nonde. ⁸ Eĩ jenyê chõ nguia Jesucristo raarõ arõ mingue jê abe. Jeñimbirãcuã ño nguia Jesucristo raarõ arõ. Achite eñi tu a cote. ⁹ Jeñee icuã icuãchĩ nda jenyue, Seresenda. Ũquĩ mose ra Dios jembasi. Namo jiri ra Dios mbia icuã mbasi. ¹⁰ Jeñimbirãcuã mingue chõ nguia. Sã Dios cheẽ mbuchecuaasa mbia cose ndare no. Sã ñimbirãcuã mingue mbia icuã mose ee no. ¹¹ Aẽ ñimbirãcuã mingue quia nae, ũquĩ je chõ Dios turã ndiqui nguia. Sã Job cose no. Ñimbirãcuã mingue tuchi que equia ra. Aquere que Dios turã tuchi riqui ee cote ra. Ũquĩ jêicuate quia ã. Eĩ si chõ Dios turã tuchi nguia mbia je co.

¹² ã abe jeñandu tuchi. Jeñee ñooñochoĩ nda jê. Jurar jenyechĩ nda emo mose jê. Ibatenda rĩ. Ibi jenda mo ñii abe no. Mbae ja mo ñii nda jurar jenyê jirichĩ jê. Eno jenyê mose, ũquĩ mii mbei chõ jeñee. Tei jenyê mose, ũquĩ mii mbei chõ jeñee no. Eĩ jenyê mose ra Dios ñee asiã jêje.

¹³ Jemo ia eã mose, sã ñee Dios je. Jemo ia mose, sã irasei rasei Dios je no. ¹⁴ Jemo ndasi mose, sã “jenyu” i Jesús quiato rerecua je. Sã ũquĩ ñee Dios je erasi rĩ cote. Sã mbae

quira mo quiti erasi ãquĩ ndese Jesús rĩ. ¹⁵ —Jesús ra embucherõ, i mose uchiangui re ñee mose Jesús je, mbucherõ ndae. Erasi mbae icuã naa mose nyii, ũquĩ nda embutiã esi no. ¹⁶ —Mbae icuã ngue asaã eã nda, jenyechĩ nda jê. —Mbae icuã ngue asaã nda, jenyê quiatu quia jenyue. Jeñee quiatu quia Dios je jenongue rĩ. Ũquĩ mose ra Dios jembucherõ. Emo turã mo ñee tuchi mose Dios je, Dios ra mbae turã saã tuchi ee. ¹⁷ Sã Elías no. Nande rã si chõ ndaque Elías. Sã ñee tuchi Dios je ama mbuchaaqui eã nonde no. Nyaaqui eã mbei que cote ra. Tres años y medio chee que ra. ¹⁸ Aquere que Elías ñee Dios je cote ra. Ama mbuchaaqui sacua cote. Aque mose que nyaaqui cote ra. Mbae que suri ja cote ra. Mbae ia ja chee no.

¹⁹ Emo icha mose Dios si, sã enongue embuchebibe mingo Dios rui sí. ²⁰ Nde mbia mo mbui mose huicua si, eresiquisã quisã ño nguia eso eã sacua tata cuásuu ũquĩ. Dios ra eicuã mbutiã esi cote.

PRIMERA CARTA DEL APOSTOL SAN PEDRO

*Pedro ucheẽ mbesa mondo Jesũs
quiato ishonda jaaja je*

¹ Pedro chõ se re. Jesucristo chimbaaquiatu chõ se re. Aico ã mbesa jẽje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jẽ ja je aico ã mbesa a. ² Dios que jẽirabo umbaerã nyii jeã mose ra. Espĩritu Turã ngue jemũ icũe Dios mbaerã cote ra. Jẽ echeẽ mumbayã sacua. Jesucristo ruqui jembitirõ sacua abe jẽicuã si no. Sã Dios riqui turã i i tuchi jendese. Sã eriqui jembia i i tuchi no.

*Dios ra mbae turã mee ja nande
je*

³ Nandechẽ turã mbei quia Dios riĩ. Jesu cristu rute quia ae re. Ae que eya eãte riqui nanderese ra. Nyebe nandeisi nguiã mbiyasu nguiirina cote. Dios Jesucristo raaque mbuquera mose, aque mose que nandembiasu nande abe ra. Nyebe nandeico nguiã ñee ã. “Dios cheẽ nda io turã ja nande je”, i ã. ⁴ Dios ra nandemingo bei. Eriirĩte quia nande re. Nyebe ra mbae mee ja nande je nandeico mose ibate. Mbae icua ndese ra nandemae eã tuchi aque mose cote. ⁵ Jẽingo Dios icuate ũqui. Nyebe ae riqui nguiã jendeaquiatu tuchi uquirãcuã je co. Dios que mbae mbuquiche ja nande je ra. Nandererao sacua ibate. Mbae ua ja mose ra nandererao ja ibate cote. Co eriqui raã nguiã nanderaquiatu co. ⁶ Nyebe jẽyate riqui nguiã ũqui. Mbae rasi tu mbĩrĩ arõte raque jẽje. ⁷ Sã mbia riqui oro mbuchi no. Equia rirõ sacua esi. Eĩ ño Dios nguiã jẽje

co no. Jẽ Dios icua tuchi sacua ño mbae rasi riqui re. Nyebe Dios jẽicua. Mbae rasi raã naa ndaque. Eturã tuchi chõ ũqui oro si re. Oro quia ra ua emo mose. Jẽ nguia ra jẽhua eã mbei Dios icua mose. Jesucristo tu mose nda Dios ñee turã tuchi jeni ña. ⁸ Jẽingo nyesequate Jesucristo rese ũqui. Jemae eãte raque quia erese ũqui. Jẽingo eicuate jeñiangui re ũqui. Jẽya tuchite riqui erese ũqui. ⁹ Jẽingo Jesucristo icuate ũqui. Nyebe ra Dios jẽaĩ mingo turã mbei cote.

¹⁰ Sã Dios cheẽ mbuchecuaa ñee cose no. —Mbia ra mae jee Dios turã ndese, i que ñee nda. Nanderĩ ño ngue eriqui nguiã ñee. —Mañi nda Dios quia reae. Uturã je ra mbia mingo bei reae, i que Dios cheẽ mbuchecuaa ndua ndua cose ra. ¹¹ Espĩritu Turã ngue siqui quia Dios cheẽ mbuchecuaa chiangui re ra. Mbiirandu randu que equia Cristo riĩ nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espĩritu Turã Dios cheẽ mbuchecuaa mbiirandu nyii ra. —Manosete ra ũqui ndeae. Aba riĩ eriqui “Cristo” i remi, i tuchi que Dios cheẽ mbuchecuaa quia ndua ndua ra.

Dios que jemũ icũe umbaerã nda

¹² Dios que embiirandu ra. — Jẽ jẽtiamba quiatu ra Cristo mbae rasi saã mbia mingo bei sacua. Jẽtiamba quiatu ra Cristo mbae rasi saã mbia namonda je. Mbia emo mosenda je, i que Dios ra. Nanderĩ ño ngue eriqui nguiã “namonda” i. Nyebe mbia riqui nguiã ũqui ja renei nenei jẽje Cristo riĩ cote. Espĩritu Turã abe riqui erenei nenei jẽje co cote. Angeles abe ũqui icua sete raque quia Cristo riĩ ũqui. ¹³ Jendua tuchi rã nguia mbae raã nonde. Jẽtesa bei quiatu

quia. Jesucristo tu mose, eturã tuchi ra ae jêje aque mose. Ûquĩ ndese quia jêingo bei tesa eraarõ. ¹⁴ Ae jenyosei chosei quia nyii nae, Dios icuayã mose nyii nae, ùquĩ ndese jêingo ndua eã cote. Dios cheẽ jemumba eã ño nguia cote. ¹⁵ Dios quiarei jemingo icũe umbaerã tuchi. Nyebe jêingo turã tuchi ae rã si. ¹⁶ Sã Dios cheẽ mbesa ji riqui no: —Jêturã ño jêingo se rã si, i ñi embesa ji re. ¹⁷ Ûquĩ jêingo “Paba” i Dios je ùquĩ. Nyebe jêingo ireĩ ireĩ jiri esi jêingo mose ibii. Dios ra mae nandechiao ja ja rese. Emo chiao rese ra mae eã eã. ¹⁸ Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ùquĩ si cote ra. Dios que mbae isiquia mondo eã nanderirõ sacua nandeicua si ra. Oro que emondo eã no nda. Plata abe no. ¹⁹ Cristo ruqui quiatu ngue nanderirõ nguia nandeicua si. Aba queteamba tuchi chõ Cristo ruqui re. Cristo mano mose nande je que eruqui uchẽ tuchi ra. Sã sacerdote oveja turã ño iquia no. ²⁰ —Cristo ra mano mbia icua ndiquicharõ, i que Dios nyii mbae ao nonde ra. Namõ ño ùquĩ io nguia jêje cote. Namõ ño Cristo mano nguia jêje cote. ²¹ Cristo chõ Dios icua uquia nguia jêje ùquĩ. Dios chõ ngue Cristo raaque mbuquera nguia. Dios chõ uquirãcuã mee nguia Cristo je. Nyebe jêingo nguia Dios icua ùquĩ cote. Nyebe jêingo nguia ñee. “Dios ra nandemingo bei ibate” i ùquĩ.

²² Dios cheẽ jëisi turã mingo ùquĩ cote. Nyebe jeña mbitirõ nguia mbushĩ cote. Nyebe jêingo nguia nyesecua arõte mbia rese cote. Jenyesequa tuchi quiatu quia jenyiese jê. Nandechiangui re chõ nandeico nyesecua tuchi mbia rese jê. ²³ Nyaacuquia si je raanguia chõ jê cote re.

Nandechaacuquia que equia nyii nae, mbia chõ ngue nanderu nyii ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguia. Echeẽ nda ua eã bei. Siqui bei rae. ²⁴ Sã embesa ji riqui ñee no:

Quiata rã tuchi chõ mbia ja riqui nguia ã.

Sã quiata riqui mano jeite no.

Quiata uti rã ño mbia riqui nguia ã no.

Eturã mbirĩ ño chĩ ndaque nyii.

Aquere chõ ñimama cote. Mano cote.

²⁵ Dios cheẽ nguia ra ua eã mbei, i que embesa ji ra. Dios cheẽ sí chõ ngue jeñandu nguia Jesucristo riĩ. Jemingo bei sacua.

2

Jêo tuchi chõ nguia Dios cheẽ ndese

¹ Nyebe jêhui mbae icua ja si. Jê nda mbia jembirĩ irĩchĩ nguia jê. Jenguasu ra jësaã saãchĩ. Emo mbae ra jenyosei choseichĩ nguia jê. Jeñee icua icuachĩ nda equia emo nii jê. ² Sã ãquẽ itãqueĩ ndiqui uchiu achã asite no. Eĩ jenyese bei chõ nguia oo Dios cheẽ ndese. Eĩ nda jêquirãcuã tuchi riqui Dios rese. Sã ãquẽ quirãcuã ndiqui quiambure no. ³ Dios turã ngue jësaã ndei resẽ.

Sita turã na ño Cristo re

⁴ Jesucristo ra siqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguia Jesucristo ririrõ ndei ã. Dios queteamba tuchi quiatu Jesucristo re. Dios chiirabo tuchi chõ ae re. Jesucristo jësiichã i i tuchi quiatu quia jê. ⁵ Sita turã na ño jêingo nguia jê abe ùquĩ. Sã Dios chuchua ao ji sita turã je no. Dios chuchua ao ji rã ño jê no nde. Jeñee turã mbei quiatu quia Dios je. Jê sí chõ jendete jemondo quia ee. Jêingo bei quiatu quia icũe embaerã. Ûquĩ

mose ra Dios jêisi turã mbei Jesucristo rĩ cote. ⁶ Nyebe Dios cheẽ mbesa ji riqui nguiã ñee:

Jesucristo ra amũ Zíon.

Tuchua i turã na tuchi chõ Jesucristo re.

Sechiirabo tuchi chõ ae re.

Aba queteamba tuchi chõ ae re.

Ae Jesucristo icuate quia nae, ùquĩ mo nda ñee eã.

“Jesucristo rui aico jirichĩ co”, iã nda emo,

i que embesa ji ra. ⁷ Sã mbia mo tuchua ao sita turã je no. Ùquĩ sita turã na ño Jesucristo riqui nguiã co. Ùquĩ jẽingo Jesucristo icuate ùquĩ. Nyebe jengueteamba tuchi ae riqui nguiã co. Ae Jesucristo icua eãte quia nae, ùquĩ je ra embesa ji cheẽ io tuchi cote. ã ndei embesa ji cheẽ ã:

Ae tuchua aosa quirirõ sita nae, aque quia ra tuchua i turã tuchi cote,

i que embesa ji ra. ⁸ Sã embesa ji riqui ñee no:

Sã sita riqui pãtã i emo cú je no jẽ.

Embucoi no jẽ,

i que embesa ji ra. Eĩ si chõ nda mbia pãtã i raanguia Jesucristo cheẽ je. Jesucristo cheẽ mumbayã sereãte quia ñene. “Echeẽ mumbasa ra pãtã i raanguia”, i que Dios ñiinda mosenda bei ra.

Dios mbaerã tuchi chõ jẽ nde

⁹ Dios que jẽirabo umbaerã tuchi ra. Sacerdotes rã ño jẽingo nguiã Dios je ùquĩ. Dios que jemingo icúe umbaerã nda. Jẽ mbia mbiirandu randu bei sacua Dios chiao turã ñi. Ae quiatu que jendirõ itondaru si ra. Jẽingo sacua nyaashĩ Dios rese cote. ¹⁰ Mbia chimbutereãte que jẽ nyii ra. Dios quiato tuchi chõ namo jẽ cote re. Emo ngue ndua eãte quia jendese nyii ra. Dios quia ndua tuchi nguiã jendese co cote.

Dios rimba chõ jẽ nde; nyebe jẽingo turã

¹¹ Achesecua tuchite quia jendese co. Isho ishote jẽingo jendecua si ùquĩ. Ae mbia chosei chosei quia mbae icua nae, ùquĩ ndese ra jemaie maechĩ. Eicuãte riqui nandeaĩ je ùquĩ. ¹² Ae Dios icua eãte quia nae, ùquĩ ndesaa jẽingo turã ño nguia. Ùquĩ ndiqui ñee icua icuãte raque jenĩ ùquĩ. Jẽicua mose rocoĩ. Ùquĩ nda mae jee jẽturã ndese. Ñee turã jee ra Dios rĩ, Jesús tu mose.

¹³ Mbia rerecua ja cheẽ jemumbayã ño nguia Dios je. Ae ererecua tuchi ererecua ja si nae, aque cheẽ abe jemumbayã ño nguia no.

¹⁴ Sã ererecua tuchi riqui mbia rerecuarã mĩ jaaja no. Mbia icua mbasi mbasi sacua. Mbia turã ndequiatu sacua abe no. Ùquĩ ñee abe jemumbayã ño nguia no.

¹⁵ Jẽingo turã ño nguia jẽ. Jẽingo turã mose ra mbia aquiata ñee icua aroneate jẽje. Dios bite ùquĩ.

¹⁶ Jesucristo que jembui mbae ja si cote ra. Jenderecua eãte raque mbae mo cote. —Mbae icua tasaã. Sererecua eãte rei ñene, jenyechĩ ndae. Dios rimba chõ jẽingo.

¹⁷ Jẽingo turã ño nguia mbia ja je. Jenyesequa chõ nguia jendesenda Jesús quiato rese. Jẽireĩ ireĩ jiri Dios si. Mbia rerecua cheẽ nda jemumba mumbachĩ jẽ.

Cristo rã si chõ jẽingo ñimbiracuã turã mbae rasi je

¹⁸ Mbia rimba je tacheẽ cote. Jenderecua cheẽ jemumbayã ño nguia jẽ. Jẽireĩ ireĩ jiri quia esi jẽ. Jenderecua icua mose abe chõ echeẽ jemumbayã nguia. “Jenderecua turã mose achõ ño echeẽ jemumbayã”, ae eã nguiã jẽje co. ¹⁹ Mbia icua icua ñooño mose nande je, nanderoseĩ nguiatu chõ nandeico. Dios bite ùquĩ. Dios rĩ nanderoseĩ nguiatu mose, ebite ùquĩ. ²⁰ Mbae turã jẽsaã saã mbei chõ nguia. Mbia jẽiruã nua mose jẽturã ñi, jendoseĩ nguiatu chõ jẽingo. Ùquĩ mose

ra Dios ia tuchi jendese. Mbae icuã mo nda jêsaãchĩ. Jẽ mbae icuã naa mose, Dios biãte ùquĩ. Mbia jẽirua nua mose jẽicuã nii, jendoseĩ nguiátu raque rae, Dios biãte ùquĩ. Jẽicuã nii ño ñene. ²¹ Nyebe Dios “jẽingo serui”, i nguiã nande je. Sã Cristo roseĩ nguiátu tuchi mbae rasi raã mose nande je no. Nande abe nanderoseĩ nguiátu sacuã eraã si. ²² Cristo que mbae icuã mo saã eã tuchi ra. Mbia mo ngue embiĩri iriã tuchi quia ra. ²³ Mbia ñee icuã mose Cristo je, ae que ñee icuã eã mbei mbia cheẽ ndibishorõ nda. Mbia Cristo mbaasi asi mose, “tasaã se”, iã tuchi que equia ra. “Dios quiarei”, i chõ ngue equia ra. ²⁴ Jesús mano mose ira mbuchicuandasa ji rese, nandeicuã ndiquicharõ ño ngue mano nguiã. Eraaque rã nandeico sacuã mbae icuã je chõ ngue re. Nandeico sacuã mbae turã ndese chõ ngue re. Cristo mbae rasi raã mose, jembitirõ sacuã ño ùquĩ nde. ²⁵ Ovejas quiachã je rã ño ngue jẽingo nguiã nyii. Jenyebi que oso ngasẽ Cristo rea cote ra. Ovejas raarõsa rã ño ae riqui nguiã jẽje co cote. Ae chõ jendeaquiату nguiã co.

3

Jendu cheẽ jemumbayã ño nguia, i cuãa je

¹ Mbia ninisi je tacheẽ cote. Jendu cheẽ nda jemumbachĩ jẽ. Jesús quiatoã ndaque jendu. Echeẽ jemumbayã ño. Jendu nda Jesús icua chee cote chã. Jẽingo turã mose ee. Jẽ Jesús cheẽ nenei neneinde rocoĩ ee. Jesús nda eicua cote chã. ² Jẽingo turã ndese ra jendu mae nyee. Echeẽ jemumbayã mose. ³ —Mbae je nda serete ambarõ na ña, jenyechĩ nda ndua ndua jẽ. Jẽo resenda rese. Jẽhui rese abe no. Tiru turã ndese abe no. Jẽa uma ji turã ndese

abe no. Ùquĩ mii ndese chõ nda jẽingochĩ ndua beite jẽ. ⁴ Jeñiangui re quiatu jẽingo turã. Jẽingo tochi chõ nguia. ⁵ I nda jẽturã ua eã mbei jẽsi. Ùquĩ nguiatu Dios bite re. ⁶ Sã cuãa mo no. Dios quiato cose no. Ùquĩ nguiatu que eturãte riqui uchianguĩ re quiatu ra. Ngu cheẽ abe mumbayã no. Ndua rocoĩ nguete resenda umbarõsa rese. ⁷ Sã Sara Abraham ñee mumbayã no. Sererecua i ee. Jẽingo turã mose, Sara rã nda jẽ cote. Mbae mo si ra jẽsiquichechĩ cote jẽ.

Jẽingo turã ño nguia jeninisi je

⁷ Tacheẽ eninisi rerecua je cote. Jẽaquiату chõ jẽingo turã jeninisi je. Jeninisi jemingo turã. Jẽingo tochi chõ nguia ee. Jẽ nguia jeãtã jiri esi re. Dios quia eturãte jẽ ja je re. Jeninisi rese. Dios que jendeco mingo nyiese ra. Jeninisi rese. Nyebe jẽingo nguiã siqui turã jeninisi je. Ùquĩ mose ra Dios jeñee andu bei, jeñee mose ee.

Mbia icuã icuã mose jẽje jẽturã mose, jẽya chõ jẽingo

⁸ Jẽingo turã ja chõ nguia jenyue no. Jẽya eã jiri jẽingo jenyiese no. Hue rĩ ja chõ jẽingo ndua ja. Jenyeseecua ja chõ nguia nyiese. Jẽseteã ño jẽingo nyue. ⁹ Mbia icuã mose jẽje, jẽicuãchĩ nda jẽ abe ee. Mbia ñee icuã mose jẽje, jeñee icuãchĩ nda jẽ abe ee. Jeñee turã nguiatu quia ee jẽ. Jẽingo serui, i chõ ngue Dios jẽje re. Dios ñee turã mbei sacuã jeni ño ngue re. ¹⁰ Sã embesa ji riqui ñee no: Jẽingo turãse mose, jeñee icuã eã emo nii. Jẽingo chooño sereã mose, jeñee ñooño eã emo je no.

¹¹ Jenyicuasẽ ño nguia mbae icuã si. Mbae turã ño jẽsaã nguia. Jẽturã ño nguia mbia ja je jẽ.

¹² Ae siqui turã nguia nae, ùquĩ Dios teaquiату bei quia co.

Ũquĩ ñee Dios chandu turã mbei quia co.

Ae siqui quia mbae icuã ndese nae, Dios biã tuchi chõ ũquĩ nde, i que embesa ji ra.

¹³ Jëingo turã mose ¿mañi nda emo mbae icuã naa jëje re? ¹⁴ Mbia icuã icuã mose jëje mbae turã naa mose, jëya tuchi chõ ũquĩ mose re. —Mbae icuã nda asaã ndeje jë, i mose jëje, jësiquicheã ño esi.

¹⁵ Jesucristo jemingo tuchi chõ nguia jeñiangui re jenderecuarã. Emo ñee mose jëje, jeñee aquiату chõ ee. —¿Mbaerã ereico Jesucristo rese re? i mose emo jëje, jeñee aquiату chõ ee. Jëingo mingue chõ ee. ¹⁶ Jëingo turã mbei. Diosbi rese jëingo bei. I nda jëya bei riqui. I nda “mbae turã asaã eã ñochi”, jenyee eã. Ae ñee icuã icuã nguia jenii nae, ũquĩ nda ireĩ ireĩte quia ucheẽ icuã si cote. Ireĩ ireĩ nda jëingo turã mose Cristo rese. ¹⁷ Mbae rasi jësaã mose jëturã nii, ũquĩ nguiarei Diosbi tuchi. Mbae rasi jësaã mose jëicuã nii, ũquĩ nguiarei Dios biã tuchi. Mbae icuã niite quia ñene.

¹⁸ Cristo abe que mbae rasi saã nande je ra. Mbae icuã naande rocoĩ. Ae raque eturã. Mbae rasi que esaã nandeicuã ndiquicharõ nda. Nandemingo sacuaĩ Dios rese. Cristo rete que mano nda. Espíritu Turã ngue embuquera si ra. ¹⁹ Aque mose que Cristo si Dios cheẽ nenei nenei mbia aĩ tarõ ji je ra. ²⁰ Ũquĩ ngue Dios cheẽ mumba mumba quia nyii ra. Noé Dios cheẽ nenei nenei mose ee. Dios roseĩ nguiátu tuchi que eriqui mbia riisu isu aque mose ra. Noé siqui bei mose arca raã naa. Aquere que mbia miite ique arca ye ra. Ocho que mbia ra. Siqui bei sacuaĩ ama ndicuasú mose. ²¹ Sã ama Noé mumbebi mingó no. Eĩ si chõ bautismo co no. Nandei mbuchasu mose, aque quia ra nandemingo eã Dios rese. Nandechiã mbitirõ ji mose, aque mose quia ra Dios

nandemingo bei cote. Bautismo tuchi chõ ũquĩ nde. ²² Jesucristo quera sire que esi ibate ra. Hue eriqui beite Dios jii hue cote. Mbae ja rerecua tuchi chõ ae cote re. Angeles rerecua. Ibatenda rerecua ja.

4

Mbae jësaã turã ja

¹ Sã Cristo mbae rasi saã tuchi siqui mose ibii no. Eĩ jenyee si chõ nguia ñimbirãcuã nguiátu mbae rasi raã mose. Ae mbae rasi saã tuchi quia nae, ũquĩ nda mbae icuã saã eã mbei cote. ² Ae Dios bite nae, ũquĩ ndese ra eriqui bei cote. Ae echoseite quia nae, ũquĩ naa ndocoĩ. ³ Mbia ataque rã tuchi que nandeico nyii ra. Nandeicuã tuchite que eriqui nyii ra. Ae nandechosei quia nae, ũquĩ ndese achõ ño ngue nandeico nyii ra. Nandequiacua quiacua que equia nyii ra. Nandechimbusarei chooño mbei que equia nyii ra. Dios abareã ndese que nandeico ndua tuchi nyii ra. Huee chõ cote. Nandehui que ũquĩ ja si cote ra. ⁴ —¿Mbaerã jëingo bei eã mbae icuã naa naa urerese re? i nanderesenda ñiinda quia nande je ã. Nyebe eriqui nguiã ñee icuã icuãte nande je ã. ⁵ —¿Mbaerã ũquĩ jësaã nde? i chee ra Dios ũquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja. ⁶ Ae mano mbia nyii nae, ũquĩ je que Jesucristo Dios cheẽ nenei nenei nda. Eaĩ siqui turã sacuaĩ Dios rã si. Erete mano ndaque huiacuã je.

⁷ Achite mbae ñi ua ja a cote. Nyebe jëingo mbae turã naa naa ja bei. Nyebe jëingo ñee ñee mbei Dios je. ⁸ Jenyesequa tuchi quiату quia jenyiese. Ũquĩ mose ra jëtesarei jenongue icuã si. ⁹ Jenongue jëisi turã ño nguia nyoĩ mose

jenyuchua. Jêya chõ jêingo eisi mose. ¹⁰ Dios que nandechisaã saana mee nande ae ae je ra. Ûquĩ jêsaã turã turã ño nguia jêataque je. Dios uaquiatu mee mose jêje mbae mo naa sacuaã, ùquĩ jêsaã turã turã ño nguia jêataque je. ¹¹ Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã eriqui eraã turã Dios quirãcuã nii. Ae jêsaã saã nguia mbae nae, Dios je chõ jêsaã. **¶** nda mbia ñee turã mbei Dios riĩ. Jesucristo riĩ abe no. Sã mbia ñee turã mbei Dios riĩ. Amén.

Mbae icuã tuutu mose jêje, jêya chojêingo

¹² Mbae icuã tuutu mose jêje, “¿mbaerã eriqui seje re?” jenyechĩ nda nyuruirate, Seresenda. Eĩ mbei chõ mbae icuã nguia tuutu Jesús quiato je. ¹³ Mbae icuã tuutu mose jêje, jêya chõ jêingo. “Cristo rã si chõ nandeico nguia mbae rasi raã”, jenyechõ nguia ñimbria. Cristo nininya tu mose, aque mose abe nda jêya tuchi chã. ¹⁴ Mbia ñee icuã icuã mose jêje Cristo riĩ, coche ñene. Jêya chõ jêingo. Espiritu Turã ño jêichu ichu nguia ùquĩ. ¹⁵ Mbia jembaasi asi chooño mose Cristo riĩ, jêya chõ jêingo. Jêicuã nii mbia jembaasi asi mose, ùquĩ nguiatu aba ireĩte re. Jê mbia mo iquia mose. Jê mbae mo mbuquiachã mose. Jê mbia mo mbupaama i mose. Jê ùquĩ icuã mo naa mose, aba ireĩte ùquĩ. ¹⁶ Mbia jembaasi asi mose Cristo riĩ, jêireĩ ireichĩ nda ùquĩ mose. Cristo resendate quia jê nde. Nyebe jêya chõ jêingo. ¹⁷ Dios ra mae ja chee mbia chisaã ja rese. Achite Dios ñi mae uquiato chisaã ndese a. Nandechisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. Ûquĩ nguiatu ra embasi tuchi nandesĩ quiatu. Dios cheẽ turã

nguiatu ngue eisiãchĩ nguia. ¹⁸ Dios quiato riqui ñimbirãcuãã arõ arõte mbae icuã tuutu bei mose ee ã. Dios quiatote raque. Dios quia-toã nguiatu ra ñimbirãcuãã tuchi mbae icuã si. Dios ra emondo chee tata cuasu. ¹⁹ “Mbae rasi jêsaã”, i mose Dios nande je, nandesã turã ño nguia ee. Mbae turã nandesã i i chõ nguia ee. Nandereco nandemee tuchi nandeaosa Dios je. Ae ra ucheẽ mbuchebiã mbei nande je.

5

Jesús quiato jêteaquiatu turã ño nguia

¹ Jeñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote. ² Ae Jesús quiato siquĩ quia jendese nae, ùquĩ jêteaquiatu turã nguia. Sã ovejas raarõsa riqui ovejas raarõ turã no. Eĩ jenyechõ nguia Jesús quiato raarõ. Jêteã teã eã ño nguia mbia mbaaquiatu quiatu. Jendua ndua eã ño nguia mbae isiquia rese. ³ Jêingo tochi chõ nguia Jesús quiato chimunua nua je. Mbiacha ra jêsaã saã techĩ ee jê. Jêingo turã ño nguia eresa rae. **¶** nda jê na sí eriqui. ⁴ Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jêje premio. Ûquĩ nda ua eã mbei. ⁵ Acuanindu je tacheẽ cote. Amei ñee jemumbayã ño nguia jê. Jê ja jêataque cheẽ jemumbayã ño nguia jê. Jêingo tochi ja chõ nguia jenyue jê. Sã embesa ji riqui ñee no:

Ae ucuasusã saã nguia nae, Dios biã tuchi chõ ùquĩ nde.

Ae siquĩ tochi quia nae, ùquĩ je quiatu ra Dios turã mbei riqui, i que embesa ji ra.

⁶ Jêingo tochi chõ nguia Dios je jê. Equirãcuã tuchi chõ ae re. Ae

ra mbia mumae turã nyee jendese emo mose cote. ⁷ Jendua ndua ia eã si jẽhui chõ. Jemee ño Dios je. Ae riqui ndua beite jendese co. Jendeaquiato beite quia co. ⁸ Jeñimbaaracua chõ nguia jẽ. Jẽtesa bei chõ nguia jẽ. Aba checuayã nderecua riqui ngata beite co jẽ. “Mbia tambĩcuã icuã”, i beite equia co. Sã nyacua no. Sã nyacua risha riqui ureĩ mbocheite “mbae tau” i no. ⁹ Aba checuayã nderecua jẽsiquisã ño nguia jenyese. Dios jẽicua tuchi chõ nguia jeñiangui re. Sã jendesenda ishonda ja riqui mbae rasi raã tuchi no. Jẽ na si no. ¹⁰ Sã Dios turãte riqui nande je no. Mbae rasi ra jẽsaã ndaque nyii. Aquere ra Dios jembitirõ cote. Jembirãcuã tuchi cote. Dios sí chõ ngue ñee nguiã nande je. “Taemingo bei serese ibate Jesucristo riĩ”, i nguiã nande je. ¹¹ Dios quiarei equirãcuã mbei. Eturã mbei. Amén.

Pedro ñee hui bei sacua cote

¹² Co ambesa quia jẽje co. Jemingo i i sacua Dios rese. Jembaaquiato sacua Dios turã nii. Jẽingo bei chõ nguia erese. Co ambesa mondo quia jẽje aque. Silvano ndese aque. Jesús quiato turã tuchi chõ Silvano nde. Nanderesenda re. ¹³ Jesús quiato Babilonia jenda saludos mondo quia jẽje aque. Dios chiirabo chõ ã nde. Jẽ na si. Marcos abe saludos mondo quia jẽje aque no. Seriirĩ na ño aico nguiã ee co. ¹⁴ Saludar jenyete turã turã ño jenyete mambi. Jenongue ritii abe jẽsiite ite chõ nguia mambi. Jesucristo quiato jate quia jẽ nde. Sã jẽya beite riqui. Amén.

SEGUNDA CARTA DEL APOSTOL SAN PEDRO

*Pedro ucheẽ mbesa mondo Jesús
quiato je*

¹ Simón Pedro chõ se re. Jesucristo rimba chõ se re. Jesucristo chimbaaquiatu chõ se re. Aico co mbesa mbesa jêje co. Ure rã si chõ jêingo nguiã Jesucristo icua ùqui. Nandebi tuchi Jesucristo icua mose. Dios turã tuchi nandemingo mose Jesucristo rese. ² Sã Dios turã ndiqui tuchi jendese. Sã Dios jem-bia tuchi mingo. Jesucristo jêicua i i tuchi bei oso quia.

Jeñimbaaquiatu i i tuchi Dios rã

³ Jesucristo nandeicuate quia ã. Nyebe Dios riqui nguiã mbae raã ja tuchi nande je co. Nandemingo bei sacua. Nandeico sacua erã sí. Uquirãcuã je eriqui mbae raã ja tuchi nande je co. Uturã ngue emee nande je ra. ⁴ Dios que ucheẽ turã mee nande je ra: —Co tasaã jêje. ã tasaã jêje. Co abe, i tuchi que equia nande je ra. Ùqui ngue esaã ja nande je cote ra. Jesucristo rã si que nanderaã nda. Ae mbae icuã mbia chosei chosei quia nae, ùqui si eriqui nanderiquisã quisã co. ⁵ Jêingo Dios icuate ùqui. Jêingo turã ño nguia jê. Jeñimbaaquiatu i i tuchi quiatu quia Dios rã jê. ⁶ Jendeco jêingo turã ño nguia i co jê. Jêingo mingue chõ nguia jê. Dios rã si chõ jêingo jê. ⁷ Jêingo turã ño nguia jenyue. Jenyesequa chõ nguia jenyese no. ⁸ Eĩ jenyé mose, eturãte ùqui. Eĩ jenyé i i tuchi chõ nguia jê. Ùqui mose ra Jesucristo jêicua chooño eã. Mbae ra jêsaã saã tuchi quia ee. ⁹ Eĩ jenyé eã mose, mbia resayã na ño jêingo nguiã ùqui. Eĩ jenyé eã mose, jêtesarei chõ ndei equia jeñia irei

ji si ùqui. Jesús jêicuã cose ndare mbutiã mose. ¹⁰ Ùqui jesaã saã tuchi chõ nguia jê. Jê ùqui naa mose, jê sí chõ nda jenyicua quia. “Dios chiirabo chõ nande re”, jenyé tuchi ra equia. Jêhui eã mbei ra equia Dios si cote. ¹¹ Dios ra jêisi tuchi mingo Jesús récuua cote. Huee ra jêingo bei erese.

¹² Nyebe ra aico bei jemundua ndua ùqui ndese. Jêicuate raque. Jêingo turãte raque Dios cheẽ ndese. ¹³ Coche aico rei jemundua ndua ùqui ndese a. Sereco siqui mose a ra aico jemundua ndua bei ùqui ndese. ¹⁴ Jesucristo que ñee seje ra: —Ereico arete eã nda íbii, i que sembiirandu ra. ¹⁵ Taemundua ndua bei erese. I nda jêtesareiã mbei esi semanonde abe.

*Se sí amae Jesucristo rese, i Pe-
dro*

¹⁶ Jesucristo quirãcuã ngue ure-senei senei tuchi quia jêje ra. —Jesucristo ra tube íbii, ure tuchi que equia jêje ra. Ichoiñosa reã ñeetuchi chõ ùqui nde. Mbua ñee ñooño je eã tuchi chõ ùqui nde. Se sí chõ ngue amae Jesucristo nininya rese ra. ¹⁷⁻¹⁸ Dios que unininya mee ee sita íbátee ereco mose ra. Se abe reco mose huee que ra. Serésaa que Dios unininya mee Jesucristo je ra. —Seriirĩ ño co re. Sechese-cua chõ co re. Seyate erese, i que Ibatenda ñee aque mose ra. Echeẽ ngue achandu se abe ra. ¹⁹ Eĩ sí tuchi que Dios cheẽ mbuchecuaa chimbesa nyii ra. Echeẽ mbesa ji chooño eã ño ùqui nde. Jêingo tuchi quia echeẽ mbesa ji rese. Mbae resaesa tuchi chõ echeẽ mbesa ji re. Sã tata rendi riqui itondaru re-saete nyaashĩ nyee no. Jêingo tuchi mose echeẽ mbesa ji rese, Cristo ra jendique tesae tuchi quia jêje. Sã nyasitata riqui nanderesae no. ²⁰⁻²¹ Dios cheẽ mbuchecuaa mo ngue ñee ñooño eãte quia emo mose

ra. Ucheẽ ae que embesa mbesa eãte quia ra. Espíritu Turã ño ngue embucheẽ nguia ra. Espíritu Turã ño ngue Dios cheẽ mbesa mbesa uquia quia ee ra.

2

Ae mbia mbĩĩrĩ irĩ nguia embaaquiatu quiatu mose

¹ Mbia mo ngue Dios cheẽ mbuchecuasa saã ñooñote quia cose ra. Espíritu Turã ae que embucheẽ eã nda. Eĩ sĩ ra emo jembĩĩrĩ irĩ ñooño name. Ñee ñooño nda equia Dios rĩĩ jẽje. Hui huite chõ nda equia Jesucristo si. Ae mano nguia erĩĩ. Nyebe ra Dios ũquĩ mbutiã asi. ² Mbia ra siqui tuchi mbae icuã ndese ũquĩ ñee nguire. Mbia ra siqui chooño ño cuña mo ndese ũquĩ ñee nguire. Nyebe ra mbia ñee icuã icuã Jesús cheẽ turã nii. ³ Ũquĩ nda mbae isiquia choosei osei tuchi chõ nguia jembae. Nyebe ra jembaaquiatu icuã icuã. Dios que ñee ũquĩ nii coose ra. —Ũquĩ nda ambasi tuchi je, i que ra. Achite ũquĩ ñi a cote.

⁴ Angeles mbae icuã naa mose, ũquĩ nyee que Dios tiisu isu áte quia ra. Ecua ji que emombo tata cuásuu ra. Itondáruu que emombo ra. Siqui bei sacuã huee, Jesús tu chee mae eicuã ndese. ⁵ Mbia cose ndare abe que Dios tiisu isu áte quia ra. Noé mosenda. Ũquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasuu mbia iquia ja sacuã. Noé mĩ ngue Dios iquia eã nda. Mbia siete rese. Dios cheẽ nenei neneisate quiatu ngue Noé nde. ⁶ Sodoma jenda abe que Dios tiisu isu áte quia ra. Gomorra jenda abe no. Mbia icuã tuchite quiatu ngue re. Nyebe Dios ũquĩ ndei ja nguĩã tata je. Echuchua ja resebe. —Eĩchĩ nda nande abe je re, nandeico eã mose erese, i sacuã mbia icuã.

⁷ Lot mĩ ngue Dios iquia eã nda. Eturãte quiatu ngue eriqui nguĩã Dios je. Eya eãte que eriqui mbia hue jenda mbae icuã naa naa mose ra. ⁸ Mbia mbae icuã naa naa mbei mose que Lot ia eã mbeite riqui ra. Ae mĩ ño ngue echiã turã Dios je ra. Nyebe Dios ae mĩ iquia eã nguĩã. ⁹ Ae siqui beite quia Dios rese nae, Dios riqui ũquĩ ndeaquiatu beite co. Mbae icuã jea je esi tã i mose ee. Ae mbae icuã saã nguia nae, ũquĩ nda Dios mbasi tuchi. Jesucristo ra tu chee mae eicuã ndese. ¹⁰ Ae siqui quia mbae icuã ndese ubi nae, ũquĩ nda Dios mbasi tuchi. Ae aba cheẽ mumba quia, ũquĩ abe ra Dios mbasi no. Ae eĩ ñooñote quia mbia je nae, ũquĩ. Ae ñee ñooñote quia mbae ibatenda je nae, ũquĩ abe no. ¹¹ Mbae ibatenda rĩĩ ngue ángeles ñee icuã eãte quia Dios je ra. Angeles quirãcuãte raque mbia si. ¹² Ña mbia quiarei mbae quiaa riinda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa riinda rã ño nda ã mano cote. Dios ra eiquia tuchi. ¹³ Ña nda mbae rasi saã tuchi quia cote. Ubi icuã mĩ ndese chõ eriqui nguĩã ndua ã. Jembĩĩrĩ irĩ ño nguĩã ã. Quiaru chooño ño nguĩã jendese ã. Jesús quiato raã ñooño jẽje. Aba ireinguia tuchi chõ ũquĩ nde. ¹⁴ Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña iquia iquia chooño je rese ã. Mbae osei osei jate equia ã. Dios ra embasi tuchi cote. ¹⁵ Ishote eriqui Dios si ã. Nyĩcuasẽ equia Dios si ã. Sã Balaam ndiqui nyĩcuasẽte esi no. Beor rĩĩrĩ. Sã mbae icuã naa mbae isiquia isi nonde no jẽ. ¹⁶ Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

¹⁷ Icuã iru rã ño ã mbia re. Sã quirĩrĩã ndiqui ibeishĩ mbucuatate no. Eĩ sĩ chõ ã mbia re. Hue bei eã chí. Nyebe ra Dios emombo bei

itondáruu. ¹⁸ Uchisaã mbae icuã ñi ñee ñee ja mbia je. Ucuasu raã naate equia ã. Mbia mbĩĩrĩ irĩ mbeite equia mbae icuã je ã. Ae hui ramo ndei mbae icuã si nae, ũquĩ abe mbĩĩrĩ irĩte equia mbae icuã je ã. ¹⁹ —Jẽingo mose urerese, jẽingo turã ndae, i bei rei equia mbia je ã. Mbae icuã nimba sí chõ ñee ñee nguiã ee ũquĩ. Ae rui nandeico quia nae, ũquĩ nimba quiatu nande re. ²⁰ Sã emo Jesucristo icua raque nyii no. Sã mbae icuã naa eã ndaque ee aque mose no. Mbae icuã embĩĩrĩ irĩ mose ũquĩnde, eicuã tuchi ra cote. Mbae icuã nimba tuchi ra ae cote. Niinda si. ²¹ Dios quia nda ũquĩ icuayã mbei nyii re chã. Dios icuare quiatu ngue hui nguiã echeẽ si. ²² Siqui mbĩĩrĩ ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúẽ ndecha no. Nyebi jei chõ u ucúẽ u cote. Sã teasu socol mo ndiqui raque nyasu no. Aquere ñimoo moo ño utuchu je cote. Eĩ ño mbia re, ae siqui juate quia Jesús rese. Aquere siqui jei chõ mbae icuã ndese.

3

Jesucristo ra tube

¹ A aico segunda carta mbesa jẽje a. Jemundua turã sacua ño ũquĩ nde. Ae acheẽ jẽje nyii nae, ũquĩ ndese jemundua sacua ño aico nguiã ã mbesa jẽje a. ² Ae Dios quiato senei senei mbia je nyii nae, ũquĩ ndese jendua. Ae Jesús chimbaaquiato ñee mbia je nae, ũquĩ ñee jemumbayã ño. ³ ã ndese jendua: Jesucristo tu nonde ra mbia riqui iquia chooño Dios je. Ñee icuã icuã nda equia Dios je. Ae ebite mbae icuã nae, ũquĩ achõ ndese chõ nda eriqui. ⁴ ũquĩ nda ñee jẽje: —Sã Jesús tu ãte no jẽ. Sã ucheẽ mbuchebi chõ jẽ. Sã eĩ mbei chõ Dios chisaã ima jẽ, i ra ũquĩ ñee

icuã icuã jẽje. ⁵ Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra. ⁶ Aquere que Dios ama mbicuas ra. Mbae iquia ja nonde cote. ⁷ Dios riqui ibei rerecoquiato co. Ibi abe no. ã nandeico irõ erese ã nae, Dios ra emendi cote. Aquere mose ra mbia Jesús quiatoã oquei ja.

⁸ Co abe rese jendua, Seresenda: Nyaashĩ mui na ño mil años Dios je re. Mil años na ño nyaashĩ mui Dios je no nde. ⁹ —Jesús ra tu ãte rei no. Ucheẽ embuchebi rei quia mambi, i raque emo emo nguiã Jesús rĩ ã. Ico minguede equia mbia je pe. —Emo nda quiachãyã Dios si chã. Siqui ja nda erese chã, i equia erisu isu pe no. Nyebe eriqui nguiã tu jei eãte. ¹⁰ Mbia mbuate ra Jesús ru. Sã mbae mbuquiachãsa riqui tu itondiite mose no. Eĩ si ra Jesús u mbia mbua. ũquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquei tuchi. Mbae ja ra oquei ibi jenda.

¹¹ Nyebe Dios nandesiiichã tuchi quiatu quia. Dios rã si quiato nandeico mbae turã ndese. ¹² Jesucristo ru jenyosei quiatu quia. Ae Dios bite nae, ũquĩ ndese quiatu jẽingo. I nda Jesucristo ru jei. ũquĩ mose ra ibei oquei ja. Nyasitata abe ra membe tata je. ¹³ Aquere ra Dios ibei mbiasu cote. Ibi abe ra embiasu ucheẽ nguire no. ũquĩ ño nandesaarõ arõ nguiã ã. ũquĩ mose ra mbae turã achõ cote.

¹⁴ Nyebe jẽingo turã ño Dios rese. Mbae icuã je ra jeñimb#cuachĩ jẽ. Jeñimb#cuã eã mose ra Dios iate jendese eru mose chã. ¹⁵ Dios siqui minguede quia mbia je co. Mbia rirõ sacua eicuã si chõ ũquĩ nde. Eĩ si chõ ngue Pablo abe embesa nguiã jẽje no. Ae Dios ñee Pablo je nae, ũquĩ sí que Pablo

mbesa jêje ra. Nanderesenda tuchi
 chõ Pablo re. Nandechesecua chõ
 nguiã erese â. ¹⁶ Pablo carta mbesa
 mbesa bei mose, mbia mundua
 ndua sacua ã ndese chõ ñene. Aba
 chiicuayâte raque Pablo chimbesa
 emo emo. Ae eaquiatsuãte Dios rese
 nae, ãquĩ Pablo cheẽ nyabi chabi
 chõ nguiã. Sã embesa ji ataque abi
 abi no. Nyebe ãquĩ sí chõ ñĩmbĩcuã
 icuã nguiã ãquĩ. ¹⁷ Sechesecua, a
 aico jembiirandu jei a. Mbia icuã
 jembui eã sacua Dios si. Mbia icuã
 nda jembĩĩ irĩchĩ jẽ. Jẽingoquiatsu
 tuchi quiatsu jẽ. Huee jẽingo turãte
 Dios rese namo hue. ¹⁸ Jesucristo
 rei nandererecua tuchi. Jẽicua i i
 tuchi quiatsu jẽ. Jenyesecua i i tuchi
 quiatsu erese jẽ. Ae que nanderirõ
 mbae icuã si ra. Eturã mbeite que
 eriqui nande je ra. Sã mbia ñee
 turã mbei quia erĩ. Amén.

PRIMERA CARTA DEL APOSTOL SAN JUAN

Mbia mingosa

¹ Ae siqui quia mbae tiã mose nyii nae, aque tasenei jêje. Ae riqui beite namo co no. Ae cheê ngue urechandu chandu bei quia ra. Uremae mae mbei que equia erese ra. Ureoco oco que equia erese no nda. Jesucristo, i equia ee. Dios cheê, i abe equia ee. Mbia mingosa, i abe equia ee no. ² Mbia mingosa que siqui ngu rese nyii ra. Tu que nyecua ure je íbii cote ra. Uremae ngue equia erese ra. Uresenei senei equia jêje ã. ³ Ae rese uremae nae, aque uresenei senei nguia jêje ã. Ae urechandu nae, ûquí abe uresenei senei nguia jêje ã. Jê abe nda jêingo urerese chã. Sã ureico Dios rese ure no. Jesucristo abe rese. ⁴ Jêya tuchi sacua ão ureico nguia ã mbesa jêje ã.

Dios rei nyaashĩ na

⁵ Jesucristo que urembiirandu Dios rese nyii ra. Uquí si chõ uresaã saã nguia jembiiirandu sacua ã: Dios rei nyaashĩ na. Itondaru rá jiri jiriã tuchi chõ ae re. ⁶ “Dios resenda rei se” nandechĩ nda nandeico eã mose erui jê. Nande i mose, nandechêê ñooño ño nguia ûquí. Nande i mose, mbia mbiirĩ irĩsa chõ nande re. ⁷ Dios rá nandeico mose nyaashĩ, nandeico turã ño nguia nandechiese ûquí. Dios rá nandeico mose nyaashĩ, Jesús ruqui nandeicua mbutiã ja quia nandesĩ ã no. ⁸ “Mbae icua asaã eãte rese” nande i mose, nandechimbĩrĩ irĩ ño nguia ûquí. Nande i mose, ñee ñooñosa tuchi chõ nande re. ⁹ Nandeicua nandesenei mose Dios je, ae ra eturã nande je. Nandeicua nda embutiã ja nandesĩ ucheê nguire.

¹⁰ “Mbae icua asaã eãte rese” nande i mose, “Dios ñee ñooñosa” nandesaa ño nguia ee. Nande i mose, Dios cheê iqueã ño nguia nandechiangui re ûquí.

2

Jesús ñee turã Dios je nanderĩ

¹ Mbae icua jêsaã eã sacua ño aico nguia co mbesa jêje co, seriirĩ. Jemo mbae icua naa mose, Jesucristo ra ñee turã Dios je aque rĩ. Eicua mbutiã sacua esi. Jesucristo quia rei eturã mbei. ² Jesucristo rĩ ño Dios nandeicua mbutiã nguia nandesĩ. Ae rei nandeicua ndibishoronda. Nande mĩ icua ndibishoronda eã ño ñene. Mbia ja icua ndibishoronda chõ ñene. ³ Nande Dios cheê mumba eã mose, “Dios aicuate quia co” nande ra nandechiangui re cote. ⁴ “Dios aicuate quia co” i mose emo, Dios cheê mumba mose, ñee ñooño je chõ ûquí nde. ⁵ Ae Dios cheê mumba eãte nae, ûquí nguiatu nyesecuate nguia Dios rese ûquí. ⁶ Ae “aico tuchi Dios rese co” i quia nae, sã ûquí siqui tuchi quiatu quia Jesús rá.

Dios cheê yasu

⁷ Dios cheê yasu eã ño ambesa nguia jêje co, Sechesecua. Dios cheê ñiinda sí chõ ambesa mbesa nguia jêje a. Jê echeê mumbayã sacua. Ae jeñandu nyii nae, ûquí. ⁸ Jêingo Jesucristo icuate ã cote. Nyebe eyasu raãte eriqui nguia jêje. Jesucristo que nyesecua mbia rese ra. Jê abe jêingo nyesecua jenyiese ã cote. Itondaru eãte riqui jêje ã cote. Nyaashĩ ja chõ jêje cote re. ⁹ Nyaashĩ aico co, i mose emo, nguesenda ucuãya cuãya mose, itondaru bei chõ siqui nguia ûquí je aque. ¹⁰ Ae nyesecuate quia nguesenda rese nae, ûquí ndiqui nyaashĩ mbei ûquí. Uquí nda siqui icua eã. ¹¹ Ae nguesenda ucuãyãte quia nae, ûquí ndiqui

itondaru bei ũquĩ. Itondaru eresa chati chõ nguiã ũquĩ. Nyebe eriqui nguiã ngueco icuayãte ũquĩ.

¹² Jesucristo rĩ ngue Dios jêicuã mbutiã jêsi ra, Seriirĩ. Nyebe aico nguiã co mbesa mbesa jêje a. ¹³ Ae siqui beite quia nyii nae, aque jêicuate quia ũquĩ, Mbiaru. Nyebe aico nguiã co mbesa jêje a. Jêingo mbia mbĩrĩ irĩsa riquisã quisã ũquĩ, Acuanindu. Nyebe aico nguiã co mbesa jêje a. Nanderu jêicuate quia ũquĩ, Echo. Nyebe aico nguiã co mbesa jêje a. ¹⁴ Ae siqui beite quia nyii nae, aque jêicuate quia ũquĩ, Mbiaru. Nyebe aico nguiã co mbesa jêje a. Jêirâtate jêingo jeñiangui re ũquĩ, Acuanindu. Dios cheẽ ngue jêisi turâte jeñiangui re ra. Jêingo mbia mbĩrĩ irĩsa riquisã quisãte ũquĩ. Nyebe aico nguiã co mbesa jêje a.

¹⁵ Jenyesecuate chĩ nda mbae ibi jenda ja rese jê. Mbae ibi jenda ja rese jenyesecua mose, jenyesecua eãte ra Dios rese. ¹⁶ Ibi jenda icuã ja chõ ñene. Nanderesa mbae icuã oseĩ mose, eicuãte ũquĩ. Nanderete abe mbae icuã oseĩ oseĩ mose, eicuãte ũquĩ no. Nandecuasus abe nandesã saã mose, eicuãte ũquĩ no. Ibi jendachõ ño ũquĩ nde. ¹⁷ Mbae icuã nda ua ja ibi jenda. Ae mbia choseĩ choseĩ quia ibi jenda nae, ũquĩ abe ra ua no. Ae Dios cheẽ mumba eãte quia nae, ũquĩ nguia ra siqui bei.

Cristo ucuãyãsa

¹⁸ Achite mbae ñi ua ja a, Seriirĩ. Cristo ucuãyãsa ra tu mbia mbĩrĩ irĩ, i que jeñandu nyii, ngaẽ ngaẽte que cote ra. Nyebe ureico nguiã ñee, “mbae ra ua ja cote” i. ¹⁹ Cristo ucuãyãsa tubiriãte riquiã. Nanderesenda rei que nyii ra. Nanderesenda chooño ño ngue ra. Nanderesenda tuchi mose, eĩ nda hui âte rei nandesĩ. Hui chõ ngue echoĩ uresi ra. “Eresenda eã ño

eriqui re” i sacua mbia. ²⁰ Jêje quiatu que Cristo Espíritu Turã mondo nguiã. Nyebe jêingo nguiã mbae icua jate ũquĩ. ²¹ Ae bei, jenye eã ño nguiã ichõĩñosa je ũquĩ. Dios quia ichõĩñosa reã tuchi re. Dios cheẽ jêicuate quia ũquĩ. Nyebe aico nguiã ã mbesa mbesa jêaquiatu je a. Eaquiatuã je eã aico nguiã ã mbesa mbesa a. ²² ¿Aba chõ ichõĩñosa chã? “Dios chimondo eã ndei Jesús” ae i quia nae, ũquĩ ño ñene. Ae siqui sereãte quia Paba rui nae, Jesús abe rui nae, Cristo ucuãyãsa chõ ũquĩ nde. ²³ Ae siqui sereãte quia Dios riirĩ ndui nae, Dios abe rui eriqui âte ũquĩ. Ae Jesús isi turã nguia nae, eru abe eisi turã ño nguiã no. ²⁴ Ae rese jêingo jirandu beite nyii nae, ũquĩ ndese jêingo bei. ũquĩ ique tuchi mose jeñiangui re, jêingo bei ra Dios riirĩ ndese. Eru rese abe no. ²⁵ Taemingo bei, i que nande je ra.

²⁶ Ae jembĩrĩ irĩ serĩte quia nae, ũquĩ nii ño aico nguiã ã mbesa mbesa jêje. Jembĩrandu sacua. ²⁷ “¿Aba quiatu ra nandembaaquiatu quiatu re?” jenye aroneate quia ũquĩ. Espíritu Turã ndiqui tuchi jeñiangui re jembaaquiatu quiatu ũquĩ. Jesucristo que emondo jêje ra. Ae chõ jembaaquiatu quiatu nguiã mbae ja rĩ ũquĩ. Ñee ñooñoa tuchi chõ ñene. Cristo rese jêingo bei, Espíritu Turã ñee nguire.

²⁸ Seriirĩ, jêingo bei equia erese jê. Nandesiquicheã nda esi eru mose chã. Nandeireĩ nguiã nda eru mose no ña. ²⁹ Jesucristo quia rei eturã tuchi. Mbae raã turã ja bei. Ae mbae saã turã mbei quia nae, eriirĩ ño ũquĩ nde.

3

Seriirĩ, i Dios nande je

¹ Dios que nyesecua tuchite nanderese ra. Seriirĩ i tuchi que nande je ra. Nyebe mbia Dios quiatoã

ndiqui nandeicua eâte ã. Dios abe icua eâte equia ã. ² Dios riirĩ ndei nande, Sechesecua. Dios ra nandembuturã tuchi core. Ũquĩ nandeicua eâte raque quia ã. Jesucristo tu mose, nandemae tuchi ra erese cote. Erã si ra nandeico tuchi cote. ³ “Jesucristo ra tu sembuturã” ae i icuate quia uchiangui re nae, ũquĩ ndiqui siqui turã tuchi ũquĩ. Jesucristo rã sí.

⁴ Mbae icuã naa naasa rei Dios cheẽ mumbasa. Eicuãte Dios cheẽ mumba. ⁵ Jesucristo que tu mano nandeicua mbutiã nandesĩ ra. Mbae icuã ngue esaã jiri jiriã tuchi quia ra. Ũquĩ jẽicuate quia ã. ⁶ Ae siqui quia Jesucristo rese nae, ũquĩ nda mbae icuã mo saã eã. Ae siqui quia mbae icuã ndese, ũquĩ nguia eicua eâte nguia. ⁷ Seriirĩ, emo nda jembĩrĩ irĩchĩ ñee ñooño jẽje jẽ. Ae mbae turã saã saã nguia, eturã ño ũquĩ nde. Jesucristo rã sí chõ ũquĩ nde. ⁸ Ae mbae icuã saã saã nguia, diablo rimba chõ ũquĩ nde. Diablo riqui mbae icuã naa naa mbei co. Cose ndare bei. Diablo chiao mbuquiachã sacua ño ngue Dios riirĩ ndu ra. ⁹ Nande Dios riirĩ mose, mbae icuã nandesã aroneate. Dios quiatu ngue ngueco mee nguia nande je. Nyebe nandeico nguia mbae icuã naa aroneate ã. Eriirĩte quia nandre. ¹⁰ Ae Dios riirĩ nae, ae Dios riirĩã no nae, ũquĩ abe aba chiicuate. Emo nyesequa eã mose ngõngue rese, diablo riirĩ ño ũquĩ nde. Emo mbae turã naa naa eã mose, diablo riirĩ ño ũquĩ no nde.

Nandechesecua chõ nguia nandechiese

¹¹ Cose ndare bei que jẽingo ã andu ra: nandechesecua bei chõ nguia nandechiese. ¹² Caĩn na nda jẽingochĩ jẽ. Diablo resenda chõ ae re. Nyebe ngõngue iquua nguia. ¿Mbaerã ño ngõngue iquua chã? Echisaã saã icuãte quiatu

ngue eriqui nguuiã. Enongue chisaã nguiatu ngue eturãte riqui nguia. ¹³ Jesús quiatoã jẽucuãyã mose, jenyuruirate chĩ nda mae erese jẽ. ¹⁴ Nanderaaque rã eã ño nandeico nguia ã cote. Dios nandereco mingo tuchi quia co cote. Nandenongue rese nandeico nyesequa ã cote. Nyebe nandeico nguia “nanderaaque rã eã ño nandeico nguia ã cote,” i. Ae nyesequa eâte quia ngõngue rese, eraaque rã mbei tuchi chõ ũquĩ ndiqui nguia ũquĩ. ¹⁵ Emo ngõngue ucuãyã mose, mbia iquiasa rã tuchi chõ ũquĩ nde. Dios ra aba iquiasa mingo bei eã. ¹⁶ Jesús que mano nande je ra. Nyebe nandeico nguia “Jesús riqui nyesequate nanderese co” i. Eĩ nande quiatu quia nyesequa nandenongue rese. Nandeteã teã eã ño mano sacua nandenongue rã. ¹⁷ Nandequeteã tuchi aroneate nandembae rese mbaecha reã mo je. Emo ia eã eã mose mbaecha reã mo ndese, ¿mañi ño nda equia nyesequa Dios rese uchiangui re? ¹⁸ “Aico nyesequate mbia rese co” nande chooño chĩ nda equia jẽ. Mbae turã quiatu nandesã saã tuchi quia ee.

Nandeireĩ ireĩ eâte equia ñee Dios je ã

¹⁹ Nandechesecua mose mbia rese, Dios resendate quia nandre re. Nandechiã ngoi turãte. ²⁰ Nandechiangui renda nandemundua ndua mose nandeicua ndese, Dios quia rei equirãcuã tuchi ũquĩ si. Ae quia mbae icua jate nguia. ²¹ Nandechiangui renda nandemundua eã mose nandeicua mo ndese, nandeireĩ ireĩ eâte quia ñee Dios je ã. ²² “Mbae mo embu seje” nande mose Dios je, mondo ra nande je. Echeẽ nguia nandemumbayãte nguia ã. Nyebe ra emondo nande je. ²³ Ñ ndei Dios cheẽ ã, nande emumbayã sacua ã: “Serucucha jẽicua Jesucristo jẽ.

Jenyesequa chõ jenyiese Jesucristo cheẽ nguire jẽ”, i Dios quia nande je co. ²⁴ Nande echeẽ mumbayã mose, nandeico beite quia erese ã. Ae abe riqui beite nanderese co. Espíritu Turã Dios mondo quia nande je nae, aque chõ nandembirandu nguiã ùquĩ ndese. —Dios riqui beite jeñiangui re co, i Espíritu Turã nguia nande je co.

4

Eĩ nande ra Dios quiato icuã; Dios quiatoã abe icua

¹ —Aico Dios cheẽ nenei nenei co, i ja jate raque mbia quia ã. Nee ñooñote quiatu nguiã ã. Ûquĩ ñee nda jëisi chooñochĩ nguia jẽ. — ¿Ma Dios cheẽ nenei neneisa tuchi ma nde? jenye tuchi rã eicua nyii. ² “Jesucristo que tu ibate si mbiarã nda” i mose ùquĩ, Espíritu Turã ndiqui erese ùquĩ cote. Eĩ jenye ra eicua. ³ “Jesucristo que tu mbiarã nda” i eã mose, Espíritu Turã siqui eã tuchi chõ nguiã erese. Cristo ucuâyãsa chõ ùquĩ nde. Se rei Cristo, ichõiño ño nguiã ã. Cristo ucuayãsa ra tu, i jeñandu quia nyii nae, aque riqui a cote. ⁴ Dios resenda rei jẽ, Seriirĩ. Ae siqui jeñiangui re co nae, ae quia rei equirãcuã tuchi ibi jenda si. Ae Dios cheẽ senei ñooño nguia nae, jẽ quiatu que jëquirãcuã tuchi ùquĩ si ra. ⁵ Dios quiatoã ño ùquĩ nde. Ibi jendachõ ño ùquĩ nde. Ibi jendachõ ñi ño eriqui nguiã ñee mbia je. Mbia ibi jenda achõ ño echeẽ ñandu nguiã. ⁶ Nande quiatu Dios resenda tuchi re. Ae Dios icua quia nae, ùquĩ ndiqui nandechẽ andu ùquĩ. Ae Dios icua eãte quia nae, ùquĩ nguiatu nandechẽ andu sereãte nguiã ùquĩ. Eĩ nande ra Dios quiato icua. Dios quiatoã abe icua.

Dios nyesequa tuchi mbia rese

⁷ Sechesecua, nandechesecua ja chõ nandechiese jẽ. Dios

chõ nandembuchesecua nguiã nandechiese. Nandechesecua mose nandechiese, Dios ririĩ ño nande re. Ûquĩ mose chõ nandeico nguiã Dios icua ã. ⁸ Nandechesecua eã mose nandechiese, ã nguia nandeico nguiã Dios icua eãte ã. Dios quia siqui nguiã nyesequate nanderese co. ⁹ Dios que nguiirĩ mii mbu ibii ra. Nandemingo bei tuchi sacua erĩ. Nyebe nandeico nguiã “Dios riqui nyesequate nanderese co” i. ¹⁰ Dios ae nyesequa aquiature. Nande rane nguia nandechesecua eãte nguiã erese. Ae rane nguiatu ngue nyesequa nguiã nanderese. Nyebe nguiirĩ mondo nguiã nandeicuã ndiquicharõ sacua. ¹¹ Sechesecua, Dios nyesequa tuchite quia nanderese co resẽ. Nyebe nande abe quiatu nandechesecua nandechiese. ¹² Nandechesecua mose nandechiese, Dios riqui tuchi nandechiangui re co. Dios riqui nandembuchesecua tuchi nandechiese co. Aba mo mae eã ndaque erese.

¹³ ã nandeico tuchi Dios rese ã. Ae abe siqui tuchi quia nandechiangui re co. Espíritu Turã ngue Dios mondo nande je, ae chõ nandembirandu nguiã ùquĩ ndese co. ¹⁴ Dios que nguiirĩ mondo mbia rirõ ja sacua huicua si ra. Uremae ngue erese ra. ã ureico erenei nenei ja mbia je ã. ¹⁵ “Jesús rei Dio s ririĩ” nande i mose, Dios riqui tuchi nandechiangui re co. Ûquĩ mose nande abe nandeico tuchi erese ã. ¹⁶ Dios riqui nyesequa tuchite nanderese co. Ûquĩ nandeicua tuchi quia ã cote. Nandechesecua bei mose Dios rese, ã nandeico tuchi erese ã. Ae abe riqui tuchi nandechiangui re co. ¹⁷ Nandeico mose Dios rese, ae riqui nandembuchesecua uchiese co. Nandechesecua tuchi mose erese, nandeico siquicheãte esi ã. Nandesiquiche ãte ra esi mbia

icuã mbasi mose. Nandembasi âte ra mbia chabe. Jesucristo raâte quiatu nandeico nguiã nande ã. ¹⁸ Nandesiquiche mose Dios si, nandechesecua tuchi âte quiatu nguiã erese nandechiangui re ã. Nandechesecua tuchi mose erese, nandesiquicheã nda esi. Nandesiquiche mose Dios si, nandesiquiche chõ nda nandembasi. ¹⁹ Dios rane ngue nyesecua nanderese nyii ra. Nyebe nande abe nandeico nguiã nyesecua erese ã cote. ²⁰ “Achesecua quia Dios rese co” i mose emo, ngõngue ucuãyã mose, ñee ñooño je chõ ùquĩ nde. Nandechesecua eã mose nandenongue rese, Dios abe rese chõ nandeico nguiã nyesecua eã no. Dios rese quia nandeico nguiã mae aroneate. ²¹ ã i que ñee nande je ra: Ae nyesecua quia Dios rese nae, sã nyesecua ngõngue abe rese.

5

Jesús quiato “qui jẽ” i mbae icuã je

¹ “Dios chimondo rei Jesús” nande i mose, Dios ririĩ ño nande re. Emo ndese nandechesecua mose, eririĩ abe rese ra nandechesecua. ² Nandechesecua mose Dios rese, echeẽ nandemumba eã mose, Dios ririĩ ja rese abe chõ nandeico nguiã nyesecua ã. ³ Dios rese nandechesecua mose, echeẽ nandemumbayãte quia ã. Echeẽ mbaranguiatuã eãte riqui nande je co. ⁴ Dios ririĩ mose nande, ibi jenda icuã nandesiquisã quisã ño nguiã nandechesi ã. Nandeico Jesucristo icuate ã. Nyebe nandeico nguiã “qui jẽ” i mbae icuã ibi jenda je. ⁵ Jesús icuasa achõ nda “qui jẽ” i mbae icuã ibi jenda je. —Dios chimondo rei Jesús, i je ra “qui jẽ” i ibi jenda icuã je no.

Dios siqui ñee mbei Jesús quiato chianguí re

⁶ Jesucristo que tu íbii ra. I je que Juan bautizar i ee ra. Eruqui que

uchẽ emano mose ra. Ûquĩ Espíritu Turã senei senei nguia nande je ã. Ae ñee ñooño eãte quia co. ⁷⁻⁸ Tres riqui nandembairandu randu Jesús rĩ ã. Espíritu Turã nane. I abe no. Jesús ruqui abe no. Ûquĩ ja riqui nandembairandu randu Jesús rĩ ã. Hue rĩ ja chõ ùquĩ tres riqui nguiã ñee. ⁹ Eĩ sí que Dios ñee Jesús rĩ nande je ra. “Ae bei”, nande chõ nguia ee. Sã nandeico mbia cheẽ mo isi turã no. Dios cheẽ quiatu nandeisi turã tuchi. ¹⁰ Ae Dios ririĩ icua quia nae, ùquĩ je quia Dios riqui nguiã ñee mbei echiangui re Jesús rĩ. Ae “eno” i âte quia Dios cheẽ je nae, “ichõĩñosa chõ Dios cheẽ nde”, isa chõ ùquĩ nde. “Eno” i âte quiatu nguiã Dios ñee mose Jesús rĩ. ¹¹ Dios nandemingo bei quia co. Nguiirĩ nii ño eriqui nguiã nandemingo bei co. Ûquĩ nii ño Dios riqui nguiã ñee nande je. ¹² Ae chianguí re Dios ririĩ ndiqui nae, ùquĩ nda Dios mingo bei. Ae chianguí re eriqui eãte nae, ùquĩ quiatu ra emingo bei eã.

Juan embesa hui bei

¹³ A aico ã mbesa jẽje a. Dios ririĩ icuasa je a. “Dios ra semingo bei” jenyẽ sacuã eicua jeñiangui re. ¹⁴ Nandesiquicheã nguia ñee Dios je ã. “Mbae mo embu seje”, i mose ee, mondo ra nande je. Nandendua mose ae rã sí, mondo ra nande je. ¹⁵ Nande ache i mose ee ra nandeandu. “Aque embu seje”, i mose ra emondo nande je. Nandeico ùquĩ icuate ã. ¹⁶ Nandemae mose nandenongue rese mbae icuã naa naa mose, nandechẽ Dios je erĩ. Dios ra emingo turã cote. Aque mii mbae icuã ndiqui mbia mbuquiachã icuã mbei co. Emo aque icuã naa mose, “jeñee Dios je erĩ”, ae âte quia jẽje co. Ûquĩ nda quiachã mbei chõ. ¹⁷ Mbae icuã naa naa mose rei eicuã tuchi. Aque mii mbae icuã

nguiarei mbia mbuquiachã mbei
mondo tata cuásuu.

¹⁸ Dios riirĩ mose nande,
nandeico ãte quia mbae icuã
ndese ã. Jesús riqui nanderaarõ
mbeite mbae icuã si co. Satanás
nandembũicuã eã sacuã. ¹⁹ Nande
rei Dios resenda. Ũquĩ nandeicuate
quia ã. Mbia ataque quiarei
Satanás ndesenda tuchi. Eicuã
ndesenda tuchi. ²⁰ Dios riirĩ ngue
tu nandembaaquiatu sacuã Dios
riĩ nda. Dios ichõĩñoşa reã nĩ.
Ichõĩñoşa reã ño eriirĩ abe no nde.
Ae rese nandeico tuchit e quia ã.
Aba mingo beisa chõ ae re.

²¹ Seriirĩ, Dios aba reã ndese ra
jẽingochĩ. Amén.

SEGUNDA CARTA DEL APOSTOL SAN JUAN

Achesecuate jendese, i Juan

¹ Juan ndei se. Ameite se. A aico ã mbesa mbesa ndeje a, Ari. Dios chiirabo tuchi chõ nde re. Nderiirĩ je abe aico ã mbesa mbesa a. Co aico nyesequa tuchi jendese co. Dios rese quia jẽingo tuchite nguiã ãquĩ. Nyebe Dios quiato riqui nguiã nyesequa jate jendese ãquĩ. ² Achesecua tuchite quia jendese co. Dios cheẽ nguiatu siqui beite quia nandechiangui re co.

³ Dios rei nanderu. Jesucristo rei eririĩ. Sã ãquĩ ndiqui turã jendese. Sã ãquĩ ia eã tuchi riqui jendese. Sã ãquĩ ndiqui jembia bei tuchi. ãquĩ ndiqui nyesequa tuchi jendese ãquĩ. ãquĩ ñee ñooño eã tuchi quia ãquĩ.

⁴ Nderiirĩ mo ngue chi tuchi Dios cheẽ ndese seje ra. Seya tuchi que ãquĩ mose ra. ⁵ Nandechesecua ja chõ nguia nandechiese. Dios cheẽ yasu eã ño ã nde. Dios cheẽ ñiinda bei chõ ñene. ⁶ Nandechesecua mose nandechiese, nandeico Dios cheẽ ndui sí ã. —Jenyesequa chõ jenyiese, i quiatu ngue Dios nande je re. Cose ndare bei chõ jẽingo nguiã ãquĩ andu ã.

Aba mbĩrĩ irĩsa

⁷ Mbia tubiriã ndiqui aba mbĩrĩ irĩte ã cote. Jesucristo que tu ibate si mbiarã nda, i sereã nea. Cristo ucuayãsa, i chõ ãquĩ je re. Aba mbĩrĩ irĩsa, i abe que ãquĩ je ra. ⁸ Cochee chõ jẽingo. Mbae jẽsaã iru iru eã sacua Dios je. ãquĩ mose ra Dios jenyisaã sibishorõ turã tuchi jẽje. ⁹ Emo icha mose Cristo cheẽ si, Dios resenda eã ño ãquĩ nde. Emo siqui bei mose Cristo cheẽ ndese, Dios resenda tuchi chõ

ãquĩ nde. Cristo resenda abe no. ¹⁰ Emo mbia mbaaquiato quiatu mose Cristo cheẽ ndui si eã, ãquĩ jẽisi turã eã ño nguia jenyuchúaa. Jeñee turã turã aroneate ee. ¹¹ Ae ñee turã nguia ee ãquĩ ñi nae, ae abe chõ eicuã ndiqui nguiã erã sí.

Juan embesa hui bei

¹² Mbae tasenei ja tuchi jẽje, ae rei que se ra. Ambesa oco sereãte mondo jẽje. Tambuchecua tuchi chõ oso ñee jẽje, ae que se ra. Nandeya tuchi sacua nandechiese.

¹³ Dios chiirabo tuchi chõ nde-nongue re. Eriirĩ ja saludos mondo quia ndeje aque. Amén.

TERCERA CARTA DEL APOSTOL SAN JUAN

Gayo turâte que eriqui Dios je ra

¹ Juan ndei se. Ameite se. A aico â mbesa mbesa ndeje a, Gayo. Aico nyesequa tuchite nderese co. ² Sechesequa, acheẽ mbeite quia Dios je nderĩ co. Dios nemingo turã sacuã. Nderete abe mingo turã sacuã no. Sã ereico siqui tuchite Dios rese no. ³ Seya tuchi que jirandu mose nderese ra. Nanderesenda mo ngue ngaẽ sembiirandu nderese ra. —Gayo riqui tuchi Dios rese aque, i que sembiirandu ra. ⁴ —Nderiirĩ nyi tuchi Dios rese pee, i mose seje, sembia beite equia co. Ũquĩ nguiatu sembia tuchi nguiã mbae mo si co.

⁵ Sechesequa, ereico turã tuchi nanderesenda je huee. Ishonda je abe no. Mbae turã ere-saã saã mbeite quia ee huee. ⁶ Urechumunua mose que Dios quiato mo urembiirandu ndeturã ndese ra. —Nyesequa tuchi que urerese ra, i que ecuaẽ ñee ure je ra. Mbae turã emondo mondo bei ee, embucuata turã sacuã. Eĩ mose ra Dios ia tuchi nderese. ⁷ Jesús rĩ nguiatu ũquĩ ndiqui nguiã ngata mbia mbaaquiato quiatu. Mbae mo nda eisi chooño eã Jesús icuasa reã mo si. ⁸ Nyebe nande chõ mbae nandemee mee ee. Dios cheẽ nenei neneisate quia ũquĩ nde.

Diótfes ucuasu raã ñooño

⁹ Papel jua que ambesa rei mondo jeñumunua ji je ra. Diótfes quiatu seosei chiãte nguiã. —Se mĩ ño ererecuarã, ite. ¹⁰ Huee sešo mose ra Diótfes icuã asenei jẽ ja je. Ae icuã esaã ure je nae, ũquĩ. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe

je no. Mombo chõ nguiã hue si no. ¹¹ Sechesequa, ereicochĩ nda eicuã mo ndui. Eturã ndui chõ eico. Eturã nduinda quiarei Dios resenda. Ae siqui quia eicuã ndui, ũquĩ ndei Dios resenda eã.

Eturã tuchi, i Demetrio je

¹² Demetrio quiarei eturã tuchi. Co eriqui tuchi Dios rese co. Mbia ja abe ñee turâte quia erĩ ũquĩ. Se abe acheẽ turâte quia erĩ co. Acheẽ ñooño âte que se quia jẽje resẽ.

Juan embesa hui bei

¹³ Mbae tasenei ja tuchi ndeje, ae rei que se ra. Ambesa oco sereãte mondo ndeje. ¹⁴ Namo jiri ra amae nderese reae. Aque mose ra nandechẽ tuchi nandechue. ¹⁵ Sã Dios nembia turã mbei mingo. Nandequiato a jenda ja saludos mondo quia ndeje aque. Saludar ere sequiato hue jenda ja je.

LA CARTA DEL APOSTOL SAN JUDAS

Judas embesa Dios chiirabo je

¹ Judas rei se. Jesucristo rimba. Jacobo nongue rei se. Ñ ambesa quia jêje a. Dios chiirabo je. Dios que jêirabo ino icúe umbaerã nda. Dios riqui nyesequa tuchi jendese co. Dios riqui jenderecoquiato bei Jesucristo mbaerã co. ² Sã Dios riqui ndua bei jendese. Sã eriqui jembia bei. Sã eriqui nyesequa bei jendese.

Ae Jesús quiato saã ñooño nguia

³ Jesucristo nandemingo beisa rñi ñgue ambesa seese rei nguia jêjê. Ae mbia mbaa tambesa jêje. Jêingo eã nonde erese. Ûqui ñee icuã icuã mose Dios cheẽ nii, echeẽ jêibishorô. —Dios cheẽ tuchi chõ ñene, jenye tuchi quiato quia Dios cheẽ ndiquisã quisã mbia icuã si. Dios quiato ñgue ucheẽ mondo ja nguia ñguesenda ja je. ⁴ Dios quiato raã naasa mo ndiqui mbia mbaaquiato icuã icuãte Ûqui. Ûqui siquiã tuchi chõ nguia Dios rese Ûqui. —Sã Dios riqui aba icuã mbutiã uturã je c o no jê. Nyebe mbae icuã nandesã i i chõ jê, i chõchĩ nguia Ûqui. Jesucristo cheẽ ndui eã tuchi chõ Ûqui nde. Nandererequa cheẽ ndui eã. Cosete que Dios Ûqui mbicúe embasi sacua nda. Mbasi mbasi bei ra equia cote.

⁵ Mbae tasenei na jêje. Jêicuate raque. Taemunduabe erese. Dios ñgue judíos sirô ja rei nguia Egipto si cose. Mbiam hue jenda icuã icuã mose ee. Ûquinde que siqui sereã Dios rese cote ra. Nyebe Dios eiquia nguia. ⁶ Sã ángeles mo je Dios ñee ndei no jê. “Aa jêingo aa”, sã i rei ee no jê. Sã Dios cheẽ mumba chõ no jê. Sã Dios riqui

etarô nderequia itondaruqui re co no. Embasi mbasi bei sacua cote. ⁷ Sã Sodoma jenda no. Sã Gomorra jenda no. Sã Ûqui ndurubinda ja no. Siqui chooño eã. Mbae icuã naamba amba. Siqui siqui emo ninisi rese. Eruã mo ndese abe no. Nyebe que Dios Ûqui mombo tata cuásuu ra. Mbae rasi ra esaã mbei u huee cote. Mbiam mundua ndua sacua ño Ûqui nde.

⁸ Ae Dios quiato saã saã nguia nae, Ûqui ndiqui ndua icuã icuã mbei Ûqui. Nyebe eriqui nguia nguete mbicua Ûqui. Aba cheẽ mumba. Ñee icuã ángeles ibatenda abe rñi no. ⁹ Sã Miguel ángel rerecua no. Sã ñee así así nyue diablo rese no. Moisés rete rñi. —Mbae icuã tasaã ndeje, i eã ñgue diablo je ra. —Dios quiato ra mbae rasi saanguquia ndeje, i chõ ñgue ñee diablo je ra. ¹⁰ Ae Dios quiato saã saã nguia nae, Ûqui ndiqui ñee ñooño mbae uchicua yã nii ã. Ae eicuate quia mbae nae, Ûqui ndese siqui turã eã. Siqui chooño eã Ûqui ndese. Nyebe ra Dios embasi tuchi cote. Quiaa riinda quia mbae icua jiri nguia Ûqui si. ¹¹ Aba mbia eã tuchi chõ Ûqui nde. Caín na tuchi chõ eriqui nguia mbae icuã naa naa Ûqui. Balaam abe rã si chõ eriqui nguia icha Dios si Ûqui. Mbae isiquia achõ ndese siqui sacua. Aba cheẽ mumba mumba bei chõ nguia Coré rã Ûqui. Nyebe ra Dios mbae rasi saanguquia ee Coré rã si. ¹² Ae Jesús quiato saã saã nguia nae, aba ireingua tuchi chõ Ûqui nde. Jeñumunua nua mose quiaru sacua nyiese, Ûqui ndiqui quiaru chooño ño Ûqui. Mbae abe mbei chooño. Ico chooñoa abe mbiam mo je. Mbiam reaquiatusa mo na eã. Nguete mii ño Ûqui teaquiato nguia Ûqui. Sã ibei rondei riqui raque pã i mose no. Sã eriqui nyaquã no jê. Sã quirirã ndiqui ibei rondei rerao

no jê. Ũquĩ na ño Dios quiato raã naasa riqui nguiã ã. Mbae iabae je rã abe chõ eriqui nguiã ã. Ira shĩĩ rã abe no. Ira riqui ji rã abe no. ¹³ Ama ndebera rã abe chõ ũquĩ ndiqui nguiã ũquĩ. Mbia mbaaquiato quiato mose, i richoi rã ño ũquĩ nde. Sã nyasitata riqui oso ngũenda recha no. Eĩ si chõ ũquĩ nguiã ũquĩ. Nyebe ra mbae rasi raã tuchi itondaruiqui re.

¹⁴ Enoc abe que ñee ũquĩ icuã nii nda. Adán ndiĩrĩ nducucha rei ae. Eĩ ngue ñee nda: “Dios ra tu ngũimba tubiriã ndese. ¹⁵ Mbia icuã mbasi ja ra eu. Ae icuã mbia saã saã nguia nae, ũquĩ ndese ra mae ja. ‘Mbae icuã asaã áte resê’, i aroneate ra ũquĩ cote. Ae ñee icuã nguia Dios rĩĩ nae, Dios ra echeẽ icuã senei a e sí je cote. ‘Eĩ ere que equia ñee icuã serĩĩ nda’, i ra Dios ee. Echisaã icuã tuchi chõ ũquĩ nde”, i que Enoc ñee cose ra. ¹⁶ Echiichati tuchi chõ ũquĩ nde. Ñee icuã mbei equia emo nii ũquĩ. Ae rese eriqui sete nae, ũquĩ mĩĩ ndese chõ eriqui nguiã ndua ũquĩ. Ucuasu raã ñooño. Uchuru mondo chooño. Ñee turã abareã nea emo je. Mbĩrĩ irĩ ño nguiã ñee turã abareã nea ee.

Ã jêsaã saã, i Judas Jesús quiato je

¹⁷ Jê nguia rei Jesús quiato tuchi. Jesús chimbaaquiato cheẽ si jêtesarei eã. ã ndei echeẽ ã: ¹⁸ “Mbae ua ja nonde ra mbia iquia iquia Dios cheẽ je. Ae icuã ndese eriqui sete nae, ũquĩ mĩĩ ndese chõ nda eriqui nguiã ndua”, i que Jesús chimbaaquiato ñee cose ra. ¹⁹ Mbia mbuqueta quetasa tuchi chõ ũquĩ nde. Ae ebite mbae icuã nae, ũquĩ ndese achõ ño eriqui nguiã ndua. Espíritu Turã siquĩ áte echiangui re. ²⁰ Jê nguia jeñimbirãcuã tuchi quia Dios rui. Dios jêicua tuchi. Jeñee mbei Dios je. Sã Espíritu Turã ndiqui jembucheẽ mbei Dios je.

²¹ Jêingo bei quia Dios rese. † nda jeñee. —Nyesecua tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. Ũquĩ jêsaarõ mbei quia. ²² Ae Dios tiisu isu quia nae, ũquĩ jembuti mbuti quiato quia Dios cuti. ²³ Mbia icuã mo abe jemingo Dios rese. Tata si erirõ naanguia jemingo Dios rese. Eicuã tuchi raque. Jêingo tuchi quiato quia Dios rese. Ũquĩ icuã uba eã sacuã jendese.

Judas ñee turã Dios rĩĩ

²⁴ Dios mĩĩ ño jendeaquiato bei nguiã jembucha eã sacuã. Dios mĩĩ ño jeñiangui renda icuã mbuchicuabo nguiã jemingo sacuã uchiese. Dios mĩĩ ño jembia bei nguiã no. ²⁵ Dios mĩĩ ño mbae icua ja nguiã. Dios mĩĩ ño nandemingo bei nguiã Jesucristo rĩĩ no. Ae je ra mbia ñee turã mbei quia. Ae rei eturã tuchi. Ae rei ererecua tuchi. Ae rei equirãcuã tuchi. Eĩ mbei chõ ae re. Amén.

APOCALIPSIS O REVELACIÓN A SAN JUAN

Jesucristo mbae mbuchecua

¹ Juan ño se re. Mbae tasenei jêje. Ae ra nyecua namo nae, ùquĩ tasenei jêje. Dios rane ngue embuchecua Jesucristo je ra. Jesucristo que ángel mbu sembiirandu sacua ere se cote ra. Se jembiirandu sacua ere se cote. ² Nyebe aico nguiã Dios cheẽ mbuchecua checua jêje co. Ae Jesucristo senei senei nguiã seje nae, ùquĩ ño asenei senei nguiã jêje co. Ae rese semumae nae, ùquĩ abe chõ asenei senei nguiã jêje co. ³ Ae ra mae mae nguiã sechimbese rese nae, Dios turã tuchi ra eriqui ùquĩ je. Ae ra nyiisaquia turã sechimbese rese nae, Dios turã tuchi ra eriqui ùquĩ je no. Achite secheẽ ñi ique a cote.

Juan ucheẽ mbesa mondo siete iglesias je

⁴ Se rei Juan. Jê siete iglesias Asia jenda je aico ã mbesa a. Sã Dios riqui uturã ndeacuquia cuquia jêje. Sã Dios riqui jembiia bei mingo. Ae chõ siqui bei nguiã co. Ae siqui beite quia nyii no. Ae ra tu emo mose no. Sã Espíritu Turã abe riqui uturã ndeacuquia cuquia jêje. Ae chõ siqui nguiã mangue chooñoa ja co. Mbae raã naa Dios je. ⁵ Sã Jesucristo abe uturã mee jêje. Ae que nandembiirandu turã tuchi Dios rese ra. Ae rane ngue quera si manonde ra. Ae quia rei equiracuã tuchi mbia rerecua mo si. Ae riqui nyesecua tuchite nanderese co. Ae que nandembui nandeicuã si nguqui je ra. ⁶ Ae que nandemingo bei ngu res e erimbarã nda. Nande mbae raã naa sacua Dios je. Sã mbia riqui ñee turã turã mbei Jesucristo je. Ae ra ererecua bei. Amén. ⁷ Jesucristo ra tu ibei

si. Mbia ra mae ja tuchi equichi rese. Mangue jenda chooñoa tuchi ra mae ja ere se. Ae Jesús iquia nyii nae, ùquĩ abe ra mae ere se no. Mbia ra siquichete nyeseo mae mose ere se. Ae bei. Amén.

⁸ —Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Dios ra. Equiracuã mbeite riqui co. Ae chõ siqui bei nguiã co. Ae siqui beite quia nyii. Ae ra tu sí emo mose.

Juan mae Jesús rese cuu

⁹ Se rei Juan. Jendesenda chõ se re. Nandeico ñimbiiracuã jate mbia icuã icuã mose nande je ã. Jesucristo rã. Ae sí chõ nandembiiracuã nguiã co. Ae sí chõ nandererecua ja riqui nguiã co no. Ama ndisha joõ ngue mbia sereru aa ra. Aa semingo isho mbia si a. Se Dios cheẽ nenei nenei eã sacua. Mbia mbiirandu eã sacua Jesucristo rese. Patmos, i que a ejoõ acua je ra. ¹⁰ Aa sereco mose que Espíritu Turã mbae reacquia seje cuu ra. Domingo mo mose. Emo ngue ñeemombo seje sequite quitu cuu ra. Echeẽ ngue serasate ra. ¹¹ —Se ae que aico bei mbae eã mose nyii resẽ. Mbae ua ja mose abe ra aico bei no, i que seje ra. — Ae ra eretea cuu nae, ùquĩ embesa papel rese. Ndechimbese emondo rã siete iglesias Asia jenda je. Efeso, Esmirna, Pérgamo, Tiatira, Sardis, Filadelfia, Laodicea. Ùquĩ jenda ja je ndechimbese emondo, i que ñee seje cuu ra.

¹² —¿Aba ñee nguiã seje re? ae que uba mae nda. Siete candeleros oro ao ji rese que amae nda. ¹³ Ùquĩ ite re que mbia raanguia mo ñi juã nda. Dios riiĩ ño eriqui reaẽ. Huirao oco que ecunua nda. Eichuã ati tuchi que eirao ra. Oro ao ji chõ ngue eishia cuasa ra. ¹⁴ Eashĩ tuchi que ra. Tata rendi rã tuchi que eresa ra.

¹⁵ Ei nininyate que ra. Bronze rã. Ama ndieu rã ño ngue echeẽ nda. ¹⁶ Nyasitata siete que equereco oo ra. Uquiatocuti que ererequia ra. Espada que equereco uchũruu ra. Erimbe tuchi que ra. Erimbe chobei que ra. Eruba nininya tuchi que ra. Sã tenda nininyate riqui nandeite re mose no.

¹⁷ Semae mose erese que sesiquiche tuchi ra. Mbia raaque rã ngue aso ngoi ejii ra. Oco que serese oo uquiatocutinda je ra. Ñee ngue seja ra. — Eresiquichechĩ nguiã sesi. Ae siqui beite quia querabe nae, ae chõ se re. ¹⁸ Seraaque rei que nyii ra. Aico bei querab e co cote. Mbia mingo beisa chõ se re. Secheẽ mose ra mbia mano. Secheẽ mose ra mbia riqui bei querabe no. ¹⁹ Ae rese eremae nae, ùquĩ embesa rã. Ae ateacuquia cuquia quia ndeje namo nae, ùquĩ abe embesa no. Ae ra nyecua nyecua emo mose nae, ùquĩ nonde embesa jei rã. ²⁰ Siete candeleros rese que eremae namo, siete iglesias rã ño ùquĩ nde. Siete nyasitata rese que eremae séoo, siete iglesias rerecua rã ño ùquĩ no nde. Jesús quiato rerecua rã ño ùquĩ nde, i que ñee seja ra.

2

Cristo ucheẽ mondo uquiato Efeso jenda je

¹ Jesús que ñeembe seja ra. — Dios quiato rerecua Efeso jenda je ã embesa rã. ã embesa rã mondo ee: “Cristo que ñee jêje ra. Ae siete nyasitata quereco oo nae, aque. Ae ngata quia siete candelero ite rĩ nae, aque sí chõ ñee nguiã jêje aque. ² ã ngue Cristo ñee jêje ra: ‘Jenyisaã turã aicuate quia co. ã jẽingo quiei quiei tuchite seja ã. Jeñimbirãcuã tuchite quia mbae icuã si ã. ã jẽingo jiri jiriãte mbia icuã ndese ã. Ae

sequiato rerecua saã ñooño nguia nae, jê ngue ùquĩ jẽisiã nda. “Ma Jesús quiatote”, jenyete turã tuchi que ra. “Ichõĩñosa chõ ñene” jenyete chõ ngue erĩ nda. ³ Jeñimbirãcuã turãte que equia ra. Mbae rasi que jẽsaã nguia serĩ nda. Jẽquiei quiei tuchite que seja ra. Jẽhui eã mbeite equia sesi ã. Ùquĩ jẽsaã turã jate rei nguiã ã. ⁴ ã nguiatu sembia eãte nguiã ã. Jenyesecua eã jirichĩ equia serese jê nguiatu ã cote. Seicua ramo mose que jẽote serese nyii. Jenyesecuate que equia serese nyii. Eĩ jenyete eã ñochĩ equia ã cote. ⁵ Jendua rã ùquĩ ndese ae. Jenyesecuabe jiri serese ae. Jemba eã mose serese, jaembutiã nda u. Sequiato eã nda jê cote, jemba eã mose serese. ⁶ ã abe sembiante quia jendese ã. Ae siqui quia Nicolás rese nae, ùquĩ nyisaã jẽucuãyãtequia ùquĩ. Se abe aucuãyãte quia co no. Ùquĩ nyisaã icuãte riqui ùquĩ. ⁷ Jẽisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùquĩ jeñandu rã: Ae “qui jê” i beite quia Satanás quirãcuã je nae, ùquĩ nda amingo turã mbei ibate Dios rese’, i que Cristo jêje ra”, ere chõ embesa mondo sequiato Efeso jenda je.

Cristo ucheẽ mondo uquiato Esmirna jenda je

⁸ Dios quiato rerecua Esmirna jenda je ã embesa rã. ã embesa rã mondo ee: “Cristo que ñee jêje ra. Ae rane ño ngue siqui bei mbae eã mose nyii ra. Mbae ua ja mose abe ra eriqui bei no. Ae que mano ndei nyii ra. Manonde eriqui beit e co no. Aque sí chõ ñee nguiã jêje co. ⁹ ã ngue Cristo ñee jêje ra: ‘Jenyisaã turã aicuate quia co. Mbia icuã icuãte riqui jêje serĩ ùquĩ. Mbaecha reãte jẽingo ùquĩ. Dios quiato siqui tuchite nguiã jendese co. Ae Dios

chiirabo saã ñooño nguia nae, ũquí ndiqui ñee icuã mbeite jeni ũquí. Satanás chiirabochõ ño ũquí nde. ¹⁰ Ae ra jësaã saã mbae rasi nae, ũquí mo si ra jësiquichechĩ jë. Satanás nda jemo tarõ mii. “Ma nyao Dios si”, i sacua ño ũquí nde. Diez días ra jëingo mbae rasi raã naa. Ũquí mose, jëingo bei Dios rese. Mbia ra jëiquia serĩ. Ũquí mose nda jaemingo bei Dios rese cote chã. ¹¹ Jëisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquí jeñandu rã: Ae “qui jë” i beite quia Satanás quirãcuã je nae, ũquí nda Dios mondo eã tata cuásuu’, i que Cristo jëje ra”, ere chõ embesa mondo sequiato Esmirna jenda je.

Cristo ucheẽ mondo uquiato Pérgamo jenda je

¹² Dios quiato rerecua Pérgamo jenda je ã embesa rã. ã embesa rã mondo ee: “Cristo que ñee jëje ra. Ae espada rimbe chobei quereco nae, aque sí chõ ñee nguiã jëje co. ¹³ ã ngue Cristo ñee jëje ra: ‘Sucha tubiriã jendecua aicuate quia co. Mbia hue jenda siqui tuchite quia Satanás ndese ũquí. Jë ae chõ jëingo nguiã serese ũquí. Jëhui eãte equia sesi ũquí. Mbia icuã sequiato iquia raque huee jendécuaa. Antipas, i rei ngue aque sequiato je re. ¹⁴ ã nguiatu sembia eãte nguiã ã. Balaam na tuchi chõ jemo jemo ndiqui nguiã ũquí. Balaam nguiarei Balac mbaaquiato icuã icuã nyii. Balac Israel jenda mbiicuã icuã nonde. Nyebe Israel jenda riqui nguiã siqui tuchi cuña icuã ndese. Dios abareã ndese abe no. Jemo abe chõ mbia jembicuã icuã nguiã ũquí. ¹⁵ Ae siqui quia Nicolás rese nae, ũquí mo siqui chõchĩ nguiã jendese ũquí. Ũquí ñee aucuãya tuchi quia co. ¹⁶ Jendua si rã jëicuã ndese. Nicolás resenda

jemombo chõ. Jemombo eã mose ra achu icuãte ee. Co espada areco sechúruu co nae, aque ra areco reco tuchi erese. ¹⁷ Jëisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquí jeñandu rã: Ae “qui jë” i beite quia Satanás quirãcuã je nae, ũquí nda amingo tuchi Dios cheẽ ndese. Dios cheẽ nda ũquí mingo bei. Ũquí je ra sitashĩ ñetẽ mo amee. Sita ñetẽ ndese ra nombre yasu ambesa mii. Eme sacua ee. Emo nda sechimbesa icuayãte nombre yasu. Ae je ra amee, ũquí achõ nda eicua’, i que Cristo jëje ra”, ere chõ embesa mondo sequiato Pérgamo jenda je.

Cristo ucheẽ mondo uquiato Tiatira jenda je

¹⁸ Dios quiato rerecua Tiatira jenda je ã embesa rã. ã embesa rã mondo ee: “Dios rucucha que ñee jëje ra. Ae resa tata rendi saãte quia nae, aque. Ae i nininyate eriqui bronce rã nae, aque sí chõ ñee nguiã jëje co. ¹⁹ ã ngue Cristo ñee jëje ra: ‘Jenyisaã turã aicuate quia co. Jenyeseacuate quia mbia rese ũquí. Mbae jësaã saã turãte quia Dios je ũquí. Ũquí jëingo Dios icua tuchite ũquí. Jëñimbirãcuã turãte equia mbae icuã si ũquí no. Jenyisaã turã tuchite riqui cose ndare si ũquí. ²⁰ ã nguiatu sembia eãte nguiã ã. Jezabel naanguia siqui chõchĩ nguiã jendese ũquí. ¿Mbaerã aque cuña jëteachõ nde? Emombo rocoĩ jenyese. Dios cheẽ esenei senei ñooño ño nguiã aque. Sequiato mbaaquiato icuã icuã ño nguiã aque. Sequiato mingo chooño ño nguiã cuña icuã ndese aque. Sequiato mingo chooño ño nguiã dios aba reã ndese aque no. ²¹ Jezabel naanguia que atiisu isu chõ nyii ra. “Sã ndua sí huiacuã ndese. Sã eriqui chooñoa mbia rese”, ae rei que se nyii ra. Hui eã mbei chõ

equia ũquí si aque re. ²² Nyebe ra ambasi tuchi cote. Ae siqui siqui quia erese nae, ũquí abe ra mbae rasi saã tuchi cote, ndua si eã mose huiicua ndese. ²³ Ae siqui Jezabel icua ndui nae, ũquí abe ra aiquia. Ũquí mose ra sequiato jirandu ja sequirãcuã ndese. “Jesús mbia chiangui renda icua ja chõ nguia re. Mbia ndua ndua eicua ja chõ nguia re”, i ra sequiato serĩ cote. Jẽingo bei mose mbae icua ndese, se abe ra mbae icua amee jẽje. ²⁴ Ae siqui eã nguia Jezabel cheẽ ndui jemo nae, ũquí je chõ tacheẽ cote. Jẽ nguiau que jeñimee ãte Satanás je ra. Nyebe ra acheẽ tuchiã jẽje. “Mbae mo ndese ra jẽingochĩ jẽ”, ae eã nda jẽje mbae mo nũ cote. ²⁵ Ae jẽicuate quia serĩ nae, ũquí ndese jẽingo bei querabe. Achu chee nda jẽje chã. ²⁶⁻²⁷ Sã seru uquirãcuã me e seje no. Ae ra secheẽ mumbayã mbeite quia nae, ae ra “qui jẽ” i beite quia Satanás quirãcuã je nae, ũquí je ra sequirãcuã amee tuchi. Ũquí nda mbia rerecuarã cote. Ũquí nda mbia icua mbasi mbasi tuchi quia cote. Sã emo ñio iquia iquia ira je no. ²⁸ Nyasitata turã na nda aico ũquí je. ²⁹ Jẽisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquí jeñandu rã, i que Cristo jẽje ra”, ere chõ embesa mondo sequiato Tiatira jenda je.

3

Cristo ucheẽ mondo uquiato Sardis jenda je

¹ Dios quiato rerecuia Sardis jenda je ã embesa rã. ã embesa rã mondo ee: “Cristo que ñee jẽje ra. Ae siete nyasitata quereco oo nae, aque. Ae rese Espíritu Turã ndiqui nae, aque. ã ngue Cristo ñee jẽje ra: ‘Jenyisaã aicuate quia co. Mbia raaque raãte chõ jẽingochĩ nguia ũquí. Siqui eã Dios rese. Jẽingo

arõte raque equia Dios rese mbia je ũquí. ² Secheẽ ndese jenyiisaquia rã. Jeñimbirãcuã ño nguia siqui i Dios rese. Jẽhui serĩ serĩte chõchĩ nguia Dios si ũquí. Jenyisaã ndese aico mae maete co. Jenyisaã saã icuate riqui Dios je ũquí. ³ Jendua jiri mbae rese ae. Ae rese jeñimbaaquiato nae, ũquí ndui jẽingo tuchi jiri ae. Jẽicuã si jẽhui tuchi jiri ae. Jẽ secheẽ mumba mose, jaembuate ra ngasẽ jẽje. Jendua eã mose ra asochĩ jẽje re. Sã mbae mbuquiachãsa riqui aba mbuate no. ⁴ Jemo mĩ mĩ mbae icua saã saã eãte quia ũquí. Ũquí ño nda siqui bei serese. Eiraoshĩ nda amee ũquí je. Mbae icua ndese quiato que eriqui oco oco ãte ra. ⁵ Ae “qui jẽ” i beite quia Satanás quirãcuã je nae, ũquí nda huiiraoshĩ quereco quia serese. Ũquí nda siqui bei serese ibate. Ũquí mbae nombres ra achusi eã mbei. “Ã ndei sequiato tuchi ã”, ae ra Paba je. Angeles abe je. ⁶ Jẽisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquí jeñandu rã, i que Cristo jẽje ra”, ere chõ embesa mondo sequiato Sardis jenda je.

Cristo ucheẽ mondo uquiato Filadelfia jenda je

⁷ Dios quiato rerecuia Filadelfia jenda je ã embesa rã. ã embesa rã mondo ee: “Cristo que ñee jẽje ra. Ae ñee ñooño eãte quia querabe nae. Ae mbae icua saã eã mbeite quia nae. Ae ererecuia tuchi riqui David rã si nae. Cristo eiquesa mbuquiata mose, emo ematã aroneate. Cristo ematã mose, emo embuquiata aroneate no. ⁸ ã ngue Cristo ñee jẽje ra. ‘Jenyisaã aicuate quia co. Jẽquirãcuã mĩte jẽingo raque ũquí. Seisi teã eãte que equia ra. Ũquí jẽingo secheẽ mumbayãte ũquí. Nyebe que mbae ambuquiata

mii eiquesa rã jêje ra. Jêingo tuchi sacua serese. Emo nda ematã eã.
⁹ Judíos ñee ñooño je ra amumae turã nyee jendese. Ũquĩ ndiqui Dios chiirabo raã ñooñote ũquĩ. Ũquĩ eriqui tuchite Satanás rese ũquĩ. Ũquĩ nda ñee turã nyee seje jenii. “Dios nyesequa tuchi chõ nguia ã ndese re. Judíos eã ndaque”, i chee ra jenii. Ngoi turã nyee ra jendese ñee seje.
¹⁰ Jeñimbiracua turãte equia secheẽ nguire ũquĩ. Nyebe ra jaendeaquiato turãte serequia. Mbia mangue chooñoa jenda mbae rasi raã ja mose ra jaendeaquiato tuchi serequia.
¹¹ Achu jei ra se. Ae jêicuate quia serĩ nae, ũquĩ ndese jêingo bei querabe. † nda emo jembui eã Cristo si.
¹² Ae “qui jê” i beite quia Satanás quiracua je nae, ũquĩ nda amingo bei Dios récuã. Sembæ marca ra amii tuchi ũquĩ ndese. “Dios quiato” i tuchi ra mbia quia ũquĩ je. “Dios recua jenda” i tuchi ra mbia quia ũquĩ je no. “Jerusalén yasu”, i chõ nguia Dios recua je ã. Jerusalén yasu ra nguichi u ibate si.
¹³ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã’, i que Cristo jêje ra”, ere chõ embesa mondo sequiato Filadelfia jenda je.

Cristo ucheẽ mondo uquiato Laodicea jenda je

¹⁴ Dios quiato rerecua Laodicea jenda je ã embesa rã. ã embesa rã mondo ee: “Cristo que ñee jêje ra. Ae ñee ñooño eãte quia querabe nae. Ae rane siqui quia mbae eã mose nyii nae. Ae ucheẽ mbuchebiã mbeite quia nae.
¹⁵ ã ngue Cristo ñee jêje ra: ‘Jenyisaã aicuate quia co. Seya eãte aico jendese co. Jêhui tuchi ãte raque equia sesi ũquĩ. Jêingo tuchi eã ñochĩ equia serese ũquĩ no. Eĩ jenye jenyete chõchĩ equia ũquĩ. I ribebe rã ño jêingochĩ ũquĩ.
¹⁶ Sã emo

ndiqui i ribebe mbei aroneate no. Mombo chõ nda uchuru si. Eĩ ae ra jemombo sechuru si no.
¹⁷ “Ã ureico tuchite Dios rese ã”, jenye chooño ñochĩ equia ñimbĩĩrĩ irĩ ũquĩ. Aba mbia eã tuchi chõ jêingo nguia ũquĩ. Mbaecha reã na ño jêingochĩ nguia Dios je ũquĩ. Eresayã na ño jêingochĩ nguia Dios je ũquĩ. Jêirao eã na ño jêingochĩ nguia Dios je ũquĩ no.
¹⁸ Jêingo chõ nguia serese ae. † nda oro turã naanguia amee jêje. † nda mbae amee tuchi jêje. † nda tirushĩ naanguia amee tuchi jêje. † nda jêireĩ nguia jêirao eã si. † nda Dios cheẽ ambuchecua tuchi jêje.
¹⁹ Ae rese aico nyesequate nae, ũquĩ icua icua mose chõ aico nguia eiruã nua. Emundua si sacua mbae turã ndese. Jêicua si jêhui. Jendua sí Dios rese.
²⁰ Aico jêiquesa mbuu mbuu a. Jemo seandu mose, huiquesa mbuquiata mose seje, aique ra ee. Aico bei ra erese cote. Aquiaru quiaru ra se quia erese cote. Ũquĩ abe ra quiaru quiaru quia serese cote no.
²¹ Ae “qui jê” i bei quia Satanás quiracua je nae, ũquĩ nda siqui bei serese se ererecua tuchi mose. Ũquĩ abe ra amii mbia rerecuarã. Sã ñi aico “qui jê” i beite Satanás quiracua je nyii no. Sã ñi Paba semii mbia rerecuarã no.
²² Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã’, i que Cristo jêje ra”, ere chõ embesa mondo sequiato Laodicea jenda je, i que Cristo ñee seje ra.

4

Mbia ibatenda ñee turã ja Dios rĩ

¹ Aquere que amae ibate quti ra. Eiquesa raanguia que nyeequia mii seje ibei ra. Ae ñeemombo sequite quti serasate nyii nae, aque que ñee si seje cote ra. —Echu rã ibate. Mbae tateacuquia ndeje. Ae ra jêĩ

jeĩ mbia je nae, ũquĩ tateacuquia
rã ndeje, i que seje ra. ² Aque
mose tuchi que Espíritu Turã mbae
teacuquia seje cuu ra. Dios rese
que amae cuu ra. Huee que eñi
ngoi trono tose ibate ra. ³ Enininya
tuchi que seje ra. Sita rendi rã jaspe
rã. Cornalina na abe no. Ibei asa
que chĩ trono mama nda. Ibei asa
nininya tuchite que chĩ nda. Es-
meralda rã. ⁴ Veinticuatro tronos
que chĩ Dios mama nda. Veintic-
uatro amei ngue chĩ tronos tose ja
ja ra. Huĩraoshĩ ngue ecunui ja ja
ra. Coronas oro ao ji que chĩchi
ja eãquĩ ndese ra. ⁵ Ama ngue sieu
tuchi Dios mbae trónoo nda. Ama
ngue ñee tuchi trónoo nda. Pirirã
pirirã i tuchi que equia trónoo nda.
Siete tata rendi que chĩ Dios ruba
quti ra. Ũquĩ ndei Espíritu Turã
na ũquĩ. ⁶ Ama ndisa raanguia que
chĩ Dios ruba quti no nda. Eibera
tuchi que ra. Mbae reco cuatro
que chĩ Dios mama nda. Eresa ata
atate que ũquĩ nda. Eruba quti
que eresa ra. Equite quti abe que
eresas no nda. ⁷ Nyacua rã tuchi
que ũquĩ mo nda. Ticuasú rĩrĩ na
ngue enongue no nda. Mbia ruba
rã ngue enongue no nda. Ngura
risha rã ngue enongue no nda.
Aque que mbebe quia ra. ⁸ Seis ja ja
que ũquĩ jeo ra. Eresa ata ata tuchi
que ejeo rese ra. Ũquĩ cuatro que
ñee turã mbeite quia Dios rĩi nda.
Isa abe que eriquĩ ñee turãte Dios
rĩi nda. Eĩ ngue equia ñe e nda:

Ndeturãte. Ndeturãte. Nde-
quirãcuãte ereico co, Dios.

Co ereico beite co.

Nyii que ereico beite no nda.

Mbae ua ja mose abe ra ereico beite
no,

i que ũquĩ nguia ñee ñee Dios je ra.

⁹ Ũquĩ ndeco cuatro que ñee turã
mbeite quia Dios je ra. Ae siqui
beite quia co, aque je. ¹⁰ Amei vein-
ticuatro abe que ngoi ngoi quia
ngũĩã ndese ra. Ñee turã turã Dios

je. Umbae coronas que echono
chono ja Dios jii ra. ¹¹ Eĩ ngue equia
ñee ñee Dios je ra:

Urererecua turãt e ereico co, Dios.
Nyebe ureico nguĩã ñee turã mbeite
ndeje ã.

Mbae que erechao jate nembraerã
nda.

Erendua turãt e que mbae ao
nonde nyii no nda,

i que ũquĩ nguia ñee turã turãte Dios
je ra.

5

Emo libro equia aronea

¹ Dios que libro quereco quia oo
cuu ra. Uquiatocuti que enunui
trono tose ra. Libro mbesa ji. Equi-
tera quti abe que embesa ji ra. Si-
ete sellos je que ematã ji ra. ² Angel
quirãcuã mo ngue ñee nda. —¿Aba
ra sellos ndoso libro equia re? i que
ángel ñeemombo ra. ³ Mbia mo ngue
sellos ndoso aroneate ra. Ibatenda.
Ibi jenda. Ibiqui rĩnda. Ũquĩ
mo ngue sellos ndoso aroneate cuu
ra. Nyebe mbia riquĩ nguĩã mae
aroneate libro rese. ⁴ Nyebe que
acheseo tuchi cuu ra. Mbia ja libro
equia aronea mose. Mbia ja mae
aronea mose erese. ⁵ Ũquĩ amei mo
ngue ñee seje ra. —Erecheseochĩ
nguĩã. Jesucristo ra libro equia. Ae
quia equirãcuãte re. Ae quia Dios
chiirabo rerecua tuchi re. David
rĩrĩ tuchi chõ ae re. Ae quiatu
que mbae rasi saã tuchi mbia icuã
ndiquicharõ nda. Ae quia ra sellos
ndoso. Ae quia ra libro equia, i que
amei ñee seje cuu ra. ⁶ Jesucristo
que chĩ huee cuu ra. Oveja iquia
ji rã ngue eñi seje huee cuu ra.
Siete que erambashĩ nda. Siete
que eresa no nda. Siete eresa rei
Espíritu Turã. Sã Espíritu Turã mae
mbae ja rese no. Jesucristo que chĩ
Dios ruba quti ra. Mbae reco cua-
tro joõ ngue eñi nda. Amei abe joõ
ngue eñi no nda. ⁷ Dios que libro
mondo Jesucristo oo cote ra. Dios

chĩ mose trono tose. ⁸ Jesucristo libro isi mose que ũquĩ mbae cuatro ngoi ngũĩã ndese ejii ra. Amei veinticuatro rese. Arpas que amei quereco reco ja ra. Mbae riru oro ao ji abe no. Incienso resebe. Incienso, i que mbae mbushimbua oquiei mose ra. Dios quiato ñee mose Dios je, eĩ sí chõ incienso ee re. ⁹ Ũquĩ amei ngue irasei rasei canto yasu mo je ra. Ñ ño ngue irasei rasei nguiã:

Nd e que mbia ndeiquia ra.

Nde que mbia mangue chooñoa jenda ereisi Dios mbaerã nda.

Mbia cheemo ja ja eriqui nae, ũquĩ abe que ereisi ja Dios mbaerã no nda.

Mbia mbuae ja abe no.

Nyebe nde mii ño libro ereisi arõte nguiã co.

Nde mii ño sellos erendoso arõte nguiã co.

Libro rese mae sacua.

¹⁰ Nde que uremii Dios rimbarã nda.

Ure mbae raã naa sacua Dios je.

Mbia ibi jenda rerecuarã nda ureico cote,

i que amei irasei rasei Jesucristo je ra. ¹¹ Angeles cheẽ ngue achandu cot e ra. Angeles que chi ũquĩ mama tuchi cuu ra. Dios mama. Mbae reco cuatro abe mama. Amei veinticuatro abe mama no. Angeles tubiriã tuchi que ra. Millones y millones tuchi que ángeles ra. ¹² Ũquĩ ngue ñee nyecuate Jesucristo je re: Oveja ririĩ na ño ereico nguiã nde. Mbia que ndeiquia mbae icua ndiquicharõ nda.

Nyebe mbia riqui nguiã ñee turãte ndeje co cote.

Nyebe mbia riqui nguiã ñee turãte nderĩ co cote no.

Ndequirãcuã nii. Ndeaquiatu rii abe no,

i que ángeles ñee turã Jesucristo je cuu ra. ¹³ Mbae que ñee turã jate quia Jesucristo rii cuu ra. Ibatenda

ñee turã ja eriĩ. Ibi jenda abe no. Ibiqui riinda abe no. Ama ndisha riinda abe no. Eĩ ngue ũquĩ nguia ñee turã jate Jesucristo je ra. Dios abe je:

Jẽquirãcuã jẽingo beite ã.

Mbia rerecuã jẽingo beite ã no.

Mbae jenyiao ra ñee turã mbeite quia jẽje,

i que Dios chiao quia ñee jate ee cuu ra. ¹⁴ Ae beite, i que mbae reco cuatro ra. Amei veinticuatro abe que ngoi ja ngũĩã ndese ñee turã Dios je ra. Ae ereco siqui beite quia co, aque je.

6

Jesucristo sellos ndoso

¹ Jesucristo que chĩ oveja ririĩ na cuu ra. Ae que sello mo ndoso libro si cote ra. Ae mbae reco cuatro chi nae, ũquĩ mo ngue ñee cote ra.

—Echu, i que ñeemombo ra. Ama ndieu rã ngue echeẽ nda. ² Caballo shĩ mo ndese que amae cote ra. Ae chĩ eátoo nae, nguira mo ngue ecunui oo ra. Corona abe que emo mee ee ra. Oso que guerra raã naa cote ra. Equirãcuãte que eriqui mbia mo si ra.

³ Jesucristo que segundo sello ndoso cote ra. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra.

⁴ Caballo nongue gue usẽ u seje cote ra. Era ireĩ tuchi que aque ra. Ae chĩ eátoo nae, aque je que emo espada cuasu mee nda. Aque que mbia mbiicuã icuã jate nyue ra. Nyebe mbia riqui nguiã nyi quia iquã.

⁵ Jesucristo que sello nongue ndoso cote ra. Tercer sello. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra. Caballo rondei que usẽ u seje cote ra. Ae chĩ eátoo nae, aque que balanza mo cunui oo ra. Mbae mbuchecha. ⁶ Emo ngue chĩ ũquĩ mbae reco cuatro ite re ra. Aque que ñee nda: —Mbia chiu

ra ua jiri. Un kilo de trigo rei una jornada. Tres kilos quiata a rei una jornada no. Mbae quira quiatu ra ua eã. Vino ndese, i que ra.

⁷ Jesucristo que sello nongue ndoso cote ra. Cuarto sello. Aẽ mbae reco cuatro chi nae, ùquĩ mo ngue ñee nda: —Echu, i que ra. ⁸ Caballo nongue que usẽ u seje cote ra. Eracho que aque ra. Ae chĩ eátoo nae, ERAAQUE i que aque je ra. Emo ngue oso erui no nda. ERAAQUE TÃSA i que aque je no nda. Ûquĩ ngue mbia ibi jenda mbutiã tuchi la cuarta parte ra. Mbiam iquia iquia tuchi que equia guerra je ra. Mbae rasi je. Eriãcuã je. Quiaa riinda icuã je abe no.

⁹ Jesucristo que sello nongue ndoso cote ra. Quinto sello. Mbae rese que amae altar qui re cote ra. Mbiam chi iquia iquia aingue rese que amae nda. Ae mbiam iquia iquia Dios cheẽ nĩ nyii nae, ùquĩ aingue rese que amae nda. Ûquĩ ñimbirãcuã tuchi chõ nguia mbae rasi je Jesucristo riĩ nyii reaẽ. ¹⁰ Ûquĩ ngue tasẽ tasẽ ñee Dios je ra: —Mbae eresaã turã jate quia nde co, Dios. Mbae ja rerecua chõ nde re. ¿Manosete ra urerĩchare erembasi re no, Dios? i que ñee ja Dios je ra. ¹¹ Dios que tirushĩ mee mee ùquĩ ja je cote ra. Ñee ngue ee cote ra: —Mbarandiri. Mbiam icuã nda jẽataque abe iquia. Sã jẽiquia nyii no. Ûquĩ sacua jẽingo chombe jiri, i que Dios ñee e e ra.

¹² Jesucristo que sello nongue ndoso cote ra. Sexto sello. Ibi que nyere nyere tuchi aque mose cote ra. Tenda que ñimoo tuchi cote ra. Mbae ruqui rã tuchi que nyasi no nda. ¹³ Nyasitata que ngoi ngoi ngaẽ ibii cote ra. Sã ira a riqui uqui quiririã ñimbuqui no. ¹⁴ Ibei abe que ua cote ra. Sã emo ndiqui papel acua acua no. Sita ibate abe que siri siri ja nyesi ra. Ama ndisha joã abe que echoi siri siri ja ra. ¹⁵ Mbiam

que ñimĩ ñimĩ ja ibicua ye ra. Sita imĩ ye abe. Mbiam rerecua. Mbiam rimba abe. Mbaecha abe. Soldados rerecua abe. Mbiam que ñimĩ ñimĩ jate cuu ra. Esiquichete quia ñene. ¹⁶ Mbiam siquiche mose que ñee ñee jate sita ibate je cuu ra: —Jenyu ngoi urearõ ureiquia. I nda Dios mbae rasi saanguquia eã ure je. I nda Jesucristo mbae rasi saanguquia eã ure je no. ¹⁷ Dios riqui mbae rasi raanguquia uquiato eã je co. Aba quia ra ñimbirãcuã ã je, i que mbiam quia siquichete cuu ra.

7

Angeles Dios mbae marca mĩ mĩ mbiam je

¹ Aquere que cuatro ángeles atea cuu ra. Emo ngue chĩ juã tenda chuisa quti ra. Enongue que tenda sosa quti no nda. Enongue que sur quti no nda. Enongue que norte quti no nda. Ûquĩ ngue quiririã isi tuchi quia ra. I chu eã sacua. Mangu jenda choõñoa quitinda abe ichu eã sacua. Ama ndisha quti abe. I nda quiririã ira rãquiã mo ichu eã tuchi. ² Angel nongue mo ndese abe que amae no nda. Tenda chuisa quti que eru quia ra. Dios mbae marca que equereco ra. Ñeemombo que ùquĩ ángeles cuatro je ra. ³ —Mbae rasi ra jemondo jeichĩ ibi je jẽ. Ama ndisha abe je. Ira abe je. Dios rimba ruba rese Dios mbae marca uremĩ mĩ na nyii, i que ñeemombo ángeles cuatro je ra. ⁴ Ciento cuarenta y cuatro mil ndese que Dios mbae marca mĩ nda. Judíos chumumbara ja que ra.

⁵ Judá riirĩ ndei doce mil.

Rubén ndiirĩ ndei doce mil.

Gad ndiirĩ ndei doce mil.

⁶ Aser riirĩ ndei doce mil.

Neftalí riirĩ ndei doce mil.

Manasés riirĩ ndei doce mil.

⁷ Simeón ndiirĩ ndei doce mil.

Leví riirĩ ndei doce mil.

Isacar ndiirĩ ndei doce mil.

⁸ Zabulón ndiirĩ ndei doce mil.

José riirĩ ndei doce mil.

Benjamín ndiirĩ ndei doce mil. Ûquĩ ja rese que ángeles Dios mbae marca mĩ mĩ nda.

Mbia tubiriã iraoshĩ

⁹ Aquere que mbia cuabête atea cuu ra. Contar i ja aroneate que ee cuu ra. Ecuabête quiatu ngue re. Mbia chumumbarate que ra. Mangue chooñoa jenda abe tubiriãte que ra. Echeẽ ñumumbarate que ra. Dios ruba quti que ùquĩ chi jate juã nda. Cristo ruba quti abe no. Eiraoshĩ ja que chi ra. Sindo que equeru ja oo ra. ¹⁰ Ûquĩ ngue tasẽ tasẽte u ñee Dios je ra. Cristo abe je. ã i chõ ngue equia ñee nda:

Nde ae ereico nguĩã mbia rirõ eicuã si co.
Nde ereico trono tose mbia rere-
cuarã co.

Jesucristo rese chõ ereico nguĩã mbia rirõ ndirõ eicuã si co,
i que ùquĩ ja ñee Dios je ra.
¹¹ Angeles que ñumbui jate u Dios mama cuu ra. Mbae reco cuatro abe mama. Ae amei veinticuatro chi nae, ùquĩ abe mama no. Ûquĩ ángeles que ngoi jate nguĩã ndese Dios ruba quti ra. Nguĩã ndese que echi ñee turã jate Dio s je ra:

¹² Dios turã tuchite riqui mbia je co. Sã mbia riqui ñee turã mbei erĩ.

Dios aquiato tuchite riqui co.

Sã mbia riqui “gracias” i bei ee.

Dios quirãcuã tuchite riqui co,

i jate que ñee turã Dios je ra. ¹³ Ûquĩ amei mo ngue ñee seje cote ra: —

¿Aba ã nde? Ae eiraoshĩ chi a. ¿Ma si ecuaẽ a re no? i que ñee seje cuu ra. ¹⁴ —Ereicuate nde resẽ, Amei,

ae que ee ra. Ae que eicuã seje cote ra. —Ã ngue mbae rasi saã tuchi quia resẽ. Tiru irei ji rã ño ã ñia ndiqui nguĩã ã cote. Jesucristo echiã mbitirõ nguqui je resẽ.

¹⁵ Nyebe eriqui beite nguĩã Dios rese ã. Nyebe eriqui nguĩã mbae raã naa mbei Dios je echuchúaa ã. Dios ra siqui bei erese. Teaquiato bei ra mingo. ¹⁶ Ûquĩ nda nguĩacuã

irara eã mbei. Huĩsei abe ra eirara eã no. Tenda abe ra eiro eã. Huĩriei abe ra eucuayã eã cote. ¹⁷ Jesucristo quia ra eteaquiato bei mingo. Sã oveja raarõsa riqui oveja reaquiato no. Sã eriqui oveja rerao rao mbiu no. Eĩ si ra Jesucristo ùquĩ ndeaquiato mingo. Dios ra echeseo mbutiba bei cote, i que amei ñee seje ra.

8

Mbae rei ji shimbu turã ndetashĩ ngasẽ oso Dios je

¹ Jesucristo que sello nongue ndoso libro si cote ra. Séptimo sello. Mbae ibatenda que quiriri tuchi sello ndoso mose ra. Quiriri arete que ra. Media hora chee. ² Siete ángeles chi quia Dios ruba quti nae, ùquĩ ndese que amaembe cuu ra. Emo ngue trompeta mee ja ja ùquĩ je ra. Siete que trompetas ra.

³ Angel mo ngue tu incienso riru mo nderu ra. Oro ao ji. Tiba que uã altar jii ra. Emo ngue incienso tubiriã mondo ee cuu ra. Altar mo ngue chi oro ao ji ra. Aque arõ ngue ángel incienso ñono nda. Dios ruba quti. Ae Dios quiato ñee ñee nguia Dios je nae, ùquĩ ñee ngue ngasẽ nguia Dios je ra. Incienso rei ji shimbu turã ndese. ⁴ Incienso retashĩ ngue nyui oso quia ángel o si ra. Dios quiato cheẽ mbirõ ngue eriqui oso ngasẽ Dios je ra. ⁵ Angel que incienso riru mombisẽ tata reteĩ je ra. Altar jenda je. Ichusẽ ngue ibi quti cuu ra. Ama ngue sieu tuchi cote ra. Pirirã pirirã i tuchi que ra. Ibi abe que nyere cuu no nda.

Angeles trompetas mbucheẽ

⁶ Ae siete ángeles trompetas quereco nae, ùquĩ ngue icoquiato cote ra. Trompeta mbucheẽ sacuaã.

⁷ Emo ngue trompeta mbucheẽ cote ra. Iquitã ngue ngoi ngoi tuchi íbii cote ra. Tata abe que ngoi ngoi ra. I ireĩ tuchi que cote ra. Mbae

ruqui rã. Ibi tercera parte que oquiei tuchi ra. Ira tercera parte abe que oquiei ra. Mbae ruri abe que oquiei ja no nda.

⁸ Segundo ángel que trompeta mbucheẽ cote no nda. Aque mose tuchi que mbae mo ndu ngoi ama ndisha ye ra. Ecuasu tuchi que ra. Sita ibate rã. Sendi que u ama ndisha ite re ra. Ama ndisha tercera parte ireĩ tuchi que cote ra. Mbae ruqui rã. ⁹ Ama ndisha riinda tercera parte que mano ja ra. Ae ngata quia ama ndisha rui barcos nae, ũquĩ tercera parte abe que ñiimi imi ja no nda.

¹⁰ Tercer ángel que trompeta mbucheẽ cote no nda. Aque mose que nyasitata cuasu mo ndu ngoi ibii ra. Tata rendi rã ngue erendi ra. Ngoi que ama tercera parte ye ra. Eriecua tercera parte ye ja abe que ngoi no nda. Imbiicua tuchi que ra. ¹¹ Etei, i que equia aque nyasitata je ra. Nyasitata que ama tercera parte mbotei tuchi ra. Itei tuchi que cot e ra. Nyeb e mbia riqui nguiã mano mano tuchi iu mose cuu.

¹² Cuarto ángel que trompeta mbucheẽ cote no nda. Aque mose que mbae mo tenda mbuchecuayãte tercera parte ra. Nyasi tercera parte abe. Nyasitata tercera parte abe no. Nyebe mbae checuayã tuchi riqui nguiã mbia je nyaashĩ mose tercera parte. Isa mose abe nyasi mbae tesae eã tercera parte. Nyasitata abe no.

¹³ Ngaira risha rese que amae cuu cote ra. Mbebe que equia ibate tuchi searõ nda. Ñeemombo mombo que equia ra: —Aba mbia eã tuchi mbia ibi jenda. Mbae rasi ra esaã tuchi cote. Angeles ataque nyuihuĩ mose. Angeles tres trompetas mbucheẽ mose, mbia ra mbae rasi saã tuchi cote, i que ngaira risha ñee nda.

9

¹ Quinto ángel que trompeta

mbucheẽ cote no nda. Aque mose que nyasitata mo ngoi u ibii seje cuu ra. Mbia raãte que aque nyasitata ra. Nyasitata que ibicua atiquia jea ra. Abismo, i que hue ibicua je ra. ² Eequia mose que tatashĩ usẽ tuchi ra. Sã tata riqui nyuuta rosot e tetashĩ no. Tatashĩ ngue tenda choote ra. Mbae mbuchecuayã jate que ra. ³ Tatashĩ si que tucu mbuae ngaẽ tuchi usẽ cote ra. Tucu mbuae que ibi mboo ja tuchi nyoĩ manguie chooñoa nda. Mbia i i tuchi que equia ra. Quiraẽ ndasi rã tuchi que eriqui mbia je ra. ⁴ Emo ngue ñee tucu mbuae je ra: —Ira mo nda jẽuchĩ jẽ. Ira ruri j a abe. Mbae ruri ja abe no. Quiata abe no. Mbia Dios quiatoã achõ ño jembasi mbasi quia. Ae Dios mbae marca quereco eã nguia nguba rese nae, ũquĩ. ⁵ Ũquĩ je mbae rasi jẽsaanguquia tuchi cinco meses. Jẽiquia eã ño, i que ñee tucu mbuae je ra. Quiraẽ ndasi rã tuchi que tucu rasi riqui mbia je ra. ⁶ Aque mose ra mbia “nandemano” i tuchi rei nguiã nyue. Mano aroneate rae.

⁷ Caballo rã tuchi que tucu mbuae ra. Sã caballo riqui icoquiato guerra raã naa sacua no. Corona naanguia que siqui tucu mbuae aquĩ ndese ja ja ra. Oro ao ji ereae. Mbia ruba raãte que tucu mbuae ruba ra. ⁸ Cuña a raãte que ea ra. Nyacuareĩ naate que ereĩ nda. ⁹ Eishia atã tuchi que ra. Hierro rã. Mbia eiõ aronea. Guerra ndieu rã tuchi que ebebe mose ra. ¹⁰ Sã quiraẽ ndiqui mbia i ngocoi je no. Eĩ si que equia mbia i i ngocoi je ra. Mbia mbasi mbasi que equia cinco meses ra. ¹¹ Angel icuã mo ngue tucu mbuae rerecua ra. Ae ibicua atiquia jea nae, aque que ererecua ra. Abadón, i que hebreo cheẽ nguia ee ra. Apolión, i que griego cheẽ nguia ee no nda. —Mbia iquiasa, i chõ nguiã embae nombres je.

¹² Tucu mbuae que ua chee cote ra. Mbae rasi ñiinda chõ ñquĩ nde. Mbae rasi nyeremo tasenei jêje cote.

¹³ Sexto ángel que trompeta mbucheẽ cote no nda. Aque mose que emo ñee altar jii Dios mbae ra. Oro ao ji rei altar. ¹⁴ Ñee ngue ángel je ra. Ae trompeta mbucheẽ namo nae, aque je. — Cuatro ángeles embui rã mondo. Aecua jí chi Ama Eufates nae, ñquĩ embui rã mondo, i que ee ra. ¹⁵ Cuatro ángeles que embui mundo cote ra. Aque mose sacua ngue Dios ñquĩ nderecoquiato ra. Ñquĩ ngue mbia iquia iquia tuchi tercera parte cuu ra. ¹⁶ Soldados tubirã tuchi que ñquĩ ángeles nimba cuu ra. Doscientos millones tuchi que ra, i que achandu ra. ¹⁷ Caballo átoo que soldados chi ja ra. Eishia riquisã ja ja que mbae ãtã ñi nda. Eishia aosa mbiitã jí que ra. Eireĩ. Erubi. Echo. Nyacua ãquĩ na ngue caballos seje cuu ra. Tata que emombo mombo ja quia uchuru rĩ nda. Tatashĩ abe. Azufre abe no. ¹⁸ Ñquĩ tres que mbae rasi tuchi ra. Tata. Tatashĩ. Azufre. Ae caballos mombo mombo quia uchuru rĩ nae, ñquĩ. Ñquĩ ngue mbia iquia iquia tuchi quia tercera parte ra. ¹⁹ Ngocoi je que eriqui mbia mbasi mbasi tuchi ra. Mbei tasi je rã tuchi que erocoi ra. Uchuru je abe que eriqui mbia mbasi mbasi tuchi ra.

²⁰⁻²¹ Nyebe mbia riqui nguiã mano mano tuchi ñquĩ ndasi je. Mbua ataque quiato que siqui beite quia huiicua ndese ra. Eicuã icuã mbei nyue. Nyiiquia iquia. Brujería raã naa mbei. Siqui icuã icuã cuña mo ndese. Mbae mbuquiachã quiachã mbei. Uchisaã icuã si hui eã mbei. Siqui beite que equia aba checuayã ndese ra. Uchiao Dios abareã ndese abe no. Oro ao ji. Plata ao ji. Bronce ao ji. Sita ao ji. Ira ao ji abe no. Ñquĩ ja rese chõ

ngue eriqui ra. Ñquĩ mae aroneate raque Dios abareã. Mbae andu aroneate raque. Ngata aroneate raque no.

10

Angel libro mo quereco

¹ Angel mo ngue nguichi ibei si seje cuu ra. Equirãcuãte que ra. Ibeishĩ ngue equeru huiiraorã nda. Ibei asa que chĩ eãquĩ mama nda. Eruba nininyate que tenda rã sí ra. Etima abe nininyate que ra. Sã tata nininyate riqui no. ² Libro ñetẽ mo ngue equereco oo ra. Eequia ji que equereco ra. Utima ndibisho que emii ama ndisha ye ra. Utima ndibisho que emii íbii no nda. ³ Tasẽ tuchi que ra. Sã nyacua riqui curu curu no. Erasẽ mose que ama ñee siete veces ra. ⁴—Ae rese ama ndieu sembiirandu nae, aque tambesa rã, ae rei que se cote ra. Ibatenda mo ngue ñee ño seje ra. —Ae ama ñee erechandu nae, ñquĩ nda erembesachĩ. Eresenei seneichĩ nda emo je. Echeẽ emocoño ño, i que seje ra. ⁵ Ae ángel tima ndibisho chĩ ama ndisha ye nae, aque que oo uquiato cutinda mee ibate quitu ra. ⁶ Ñee ngue cote ra: —Dios que sembu ra. Ae siqui i beite quia co nae. Ae ibei chao nae. Ae ibi chao nae. Ae ama ndisha chao nae. Ae mbae chao ja tuchite nae. Aque que sembu co renei nenei sacua nda. Achite mbae ja ñi ua a cote. ⁷ Séptimo ángel nda nyuihuĩ cote. Trompeta mbucheẽ. Dios cheẽ ique ja mose r a nyuihuĩ cote. Ae Dios ñee uquiato ñiinda je nae, ñquĩ nda ique ja echeẽ cote. Mbua rerecuarã tuchi ra Jesús cote, i que ángel quirãcuã ñee seje cuu ra.

⁸ Ae cheẽ achandu ibatenda nyii nae, aque que ñeembe seje ra. —Eso rã libro ñetẽ isi. Ae tima chĩ ama ndisha ye nae, ae tima ndibisho chĩ íbii nae, aque si libro ñetẽ eisi rã. Eequia ji eisi, i que seje ra. ⁹ Ae

aso nguiã ñee ángel je. —Libro ñetê emee na seje, ae que ee ra. Ae emee nguiã ñee seje cote. —Co libro ñetê jê. Eu ja. Irao raâte raque ra eachã namo mose. Etei tuchite quiatu ra nderie je cote, i que seje ra. ¹⁰ Angel que libro ñetê mee seje cote ra. Au que se ra. Eturã tuchi que sechuru je ra. Irao rã. Se eu tuchi mose quiatu que eteite serie je cote ra. ¹¹ Emo ngue ñee seje cote ra. —Dios cheẽ nda eresenei senei sí mbia ja je. “Co ra Dios saã. ã nda Dios saã no”, ere ra mbia je. Ishonda abe je. Mangue chooñoa jenda abe je. Mbiam cheẽ ñumumbara abe je. Mbiam rerecua jate abe je, i que seje cuu ra.

11

Dios quiato nyeremo Dios cheẽ senei senei

¹ Dios que uu mo mondo séoo cuu ra. Ñee ngue seje ra. —Eso Dios chuchua mbuchechea checha. Altar abe embuchechea. Ae mbia chi huee ñee ñee Dios je nae, ùqui abe je contar ere rã. ² Itaicuee ra erembuchechechi jê. Patio ra erembuchechechi jê. Ùqui ngue amee mbia sequiatoã je ra. Sequiatoã nda irõ irõ Jerusalén ndese cuarenta y dos meses chee. ³ Sequiato nyeremo je ra sequirãcuã amee. Ùqui nda secheẽ senei senei tuchi quia mbia je 1,260 días chee. Tiru rondei ra ùqui quereco quia, i que seje ra.

⁴ Dios quiato nyeremo ndei olivos i nyeremo na sí. Candeleros nyeremo na sí no. Sã Dios mbae reaquiato ja no. Uquiato nyeremo abe ra etequiatio no. ⁵ Dios ra uquirãcuã mee ùqui nyeremo je. Emo embasi serí mose, tata ra embu embu uchuru si. Ucuâyãsa mbasi tuchi sacuã. Eĩ nda mbia mano mano, ùqui Dios quiato nyeremo ucuâyã mose. ⁶ Ùqui Dios quiato nyeremo ama mbuchaaqui

eã arôte, Dios cheẽ nenei nenei mbei mose mbia je. Mbae ruqui rã nda ama naa. Mbiam ra embasi mbasi arôte uquirãcuã je. Ibi jend a mbasise mose, mbasi tuchi rae. ⁷ Ùqui Dios quiato nyeremo Dios cheẽ nenei nenei ja mose mbia ja je, icuã nda tu icuâte ee cote. Ibicua yenda. Icuã nda Dios quiato nyeremo iquia cote. ⁸⁻⁹ Emo ùqui Dios quiato raaque nyati aroneate. Erete tiquia iriã nda chichõ itaicuee rĩ. Mbiam mangue chooñoa jenda abe tuchi r a mae ja eraaque rese. Tres días y medio chee rae. Jerusalén ndei ra ùqui. Ae mbiam Jesucristo mbucha ira rese nae, huee. Hue jenda quiarei eicuã tuchi mbiam. Sodoma jenda rã. Egipto jenda rã abe no. ¹⁰ Ae mbiam siqui quia ibi rĩ nae, ùqui ia tuchi rae. Dios quiato nyeremo mano mose. —Ae nandechiao icuã siquisã quisã nguia nae, ùqui ngue mano cote ra, i r a eyate ñee nyue. Nyebe ra eriqui mbae mondo mondo tuchi nyue. ¹¹ Dios quiato nyeremo ndaaque que chi tres días y medio cuu ra. Aquere que Dios embuquera sí seque re cuu ra. Júã ngue cuu ra. Mbiam que siquiche ja tuchi mae erese ra. ¹² Ibatenda que ñee nyecua ùqui Dios quiato nyeremo je cote ra. —Jenyu aa quiatu ibate, i que Dios ñee ee ra. Nyoĩ que ibate ibei ye cuu ra. Eucuâyãsa que mae mbeite u echui rese ra. ¹³ Aque mose tuchi que ibi nyere icuã nda. Sucha tubiriã ndibisho que ngoi ngoi jate ra. Mbiam tubiriãte que mano nda. Siete mil que mbiam mano nda. Mbiam ataque que siquichete ra. Ñee turã turãte que equia Dios ibatenda je cote ra. ¹⁴ Segundo mbae rasi chõ ã nde. Tercero quia tasenei jêje cote.

Séptima trompeta mbucheẽ cote

¹⁵ Séptimo ángel que trompeta mbucheẽ cote no nda. Ùqui mose

que mbia ñeemombo ja ja ibatenda ra. Eĩ ngue tasẽ tasẽ nda: Mbia mo ibi jenda mo nda siquĩã ererecuarã cote. Dios ae chõ nda siqui ererecuarã cote. Nguiĩ ndese. Ae ae chõ nda siqui ererecuarã mbei cote, i que ibatenda tasẽ tasẽ cuu ra.

¹⁶ Ae amei veinticuatro siqui beite quia Dios jii nae, ùquĩ ngue ngoi ngũĩã ndese ñee Dios je cuu ra. Eĩ ño ngue ñee nguiã:

¹⁷ Gracias ure tuchi quia ndeje co, Dios. Ndequirãcuã mbae saã ja arõte quia co.

Ereico beite que equia nyii ra. Namo abe no. Ereico beite ra eno.

Ereico ndequirãcuã naanguquiate mbia je co cote.

Ereico mbia rerecuarã tuchi co cote.

¹⁸ Mbia rerecua que paama ite ndeje ra.

Co mose ra ndequiatoã erembasi cote.

Ndequiatoã mano je abe ra erembasi cote.

Ndequiato abe ra erembuquera cote.

Mbae turã mee mee sacua ee.

Ae ndecheẽ senei senei mbeite quia mbia je nae.

Ae ñee turã turã nguia ndeje nae.

Ndequiato cuasu je. Ndequiato ñetẽ je abe no.

Ndequiato ja je ra mbae turã ere-mee mee cote.

Ae mbia mbũcuã icuã nguia nae, ùquĩ nda erembutiã co mose cote,

i que veinticuatro amei ñee turã Dios je cuu ra. ¹⁹ Dios chuchua ibatenda iquesa que quiata seje cuu ra. Caja Dios chuchua jenda que nyecua seje cuu ra. Aque rei contrato riru Dios mbae aque. Aquere que ama pirirã pirirã i ra. Ama ngue sieute ra. Ama ngue ñeete ra. Ibi que nyere ra. Iquitã abe que ngoi ngoi chee ra.

12

Dragón icuã icuã cuña je

¹ Mbia mae sayã mo ndese que amae ibate cuu ra. Cuña nguasu tuchi mo ngue ra. Tenda que eirao ra. Nyasi que chĩ ei quiti ra. Corona ngue equereco uãquĩ ndese ra. Nyasitata doce que chĩ corona ndese ra. ² Nañimbae que cuña nda. Tasẽ tasẽ tuchi que equia nguiĩ ndasi je ra. ³ Aquere que amae mbia mae sayã mo ndese ibate no nda. Dragón ireĩ mo ndese que amae nda. Siete que aque dragón ãquĩ cuu ra. Diez que erambashĩ nda. Corona ngue chĩ eãquĩ ja rese ra. ⁴ Dragón ngue nyasitata tubiriã si-ichã tuchi imbu ibii ngocoi je ra. Cuña ji que eñi eraarõ cote ra. — Sã nyaacuquia. Eriĩ tau, i que huĩ ejii ra. ⁵ Nyaacuquia que cote ra. Erãcoẽ ngue ra. Mbia ja rerecuarã tuchi ra aque. Emo ngue eriiĩ isi ra. Querao que Dios je ibátee ra. ⁶ Cuña ngue uchã oso turuquia ñi nda. Dios echuchua saã ño nguia huee reaẽ. Huee que eriqui 1,260 días ra. Huee que emo ndiqui embuquiaru quiaru ra.

⁷ Amae ngue guerra rese ibate cuu ra. Dragón icuã icuãte que ángeles je ra. Miguel nimba ángeles abe que ucu ucu a dragón nimba ángeles rese no nda. Nyiiquia serĩ jate que cuu ra. ⁸ Dragón ngue ganar i aroneate umbae ángeles rese ra. Nyebe eriqui aroneate nguiã ibate cote. ⁹ Dios que dragón mombo bei ibate si cote ra. Mbei ima ndei dragón. Diablo. Satanás, i abe que ee ra. Ae chõ mbia mangu chooñoa jenda mbũĩ irĩ mbeite nguiã co. Dios que ae mombo ibii cuu ra. Ngũimba rese. ¹⁰ Ibatenda ia tuchi que Dios emombo mose ra. Ibatenda mo ñee ngue achandu cuu ra: —Coche ñene. Dios riqui mbia rirõ mbei huĩcuã si co cote. Namo tuchi mbia riqui mae Dios quirãcuã ndese co. Cristo riqui

mbia rerecua tuchi co cote. Dios quiatu que diablo mombo nguiã. Ae Dios mbuqueta queta beite quia equiato rĩ nyii. ¹¹ Ũquĩ Dios quiato que diablo siquisãte quia Jesús ruqui je ra. Jesús cheẽ je abe no. Ae ũquĩ senei mbeite quia mbia je Jesús cheẽ nae, ũquĩ je chõ eriqui nguiã eriquisã quisã. Ũquĩ Dios quiato que siquicheãte quia umano si ra. “Tamano ndei Dios je”, i jate que equia ra. ¹² Mbia ibatenda ia tuchite cote. Mbia ibi jenda quiatuchi eya eãte. Mbia ama ndisha yenda abe no. Diablo quiatu que nguichichĩ u nguiã jẽje, ibi jenda. Paama i tuchite equia co. Achite quiatu Dios ñi nguiã embasi a cote, i que ibatenda mo ñee cuu ra.

¹³ Dios dragón mombo mose íbii, dragón icuã icuã ngue cuña je cote ra. Ae eriirĩ nacuẽ nyaacuquia nae, aque cuña je que dragón icuã icuã cote ra. ¹⁴ Emo ngue mbae jeo ny-eremo mondo cuña je ejeorã nda. Ngaira risha jeo raanguia. Cuña mbebe sacuã. Eso chee sacuã turuquia rĩ. Ae Dios saã echucharã turúquiaa nyii nae, huee eso chee sacuã diablo si. Mbei si. Emo embuquiaru sacuã tres años y medio huee. ¹⁵ Mbei que i mombo tuchi uchuru rĩ nda. Iãcuana. Cuña iquia sacuã ndaque chõ ũquĩ iãcuã nde. ¹⁶ Ibi ia eãte que cuña ndese ra. Nyebe ibi nyiequia nguiã i mocõ ja dragón nyuru jenda. ¹⁷⁻¹⁸ Nyebe dragón paama i tuchi nguiã cuña je. Eicuã icuã mbeite que eriqui cuña ndiirĩ ataque ja je cote ra. Ae Dios cheẽ mumba eãte quia nae, ũquĩ je chõ eriqui nguiã cuña ndiirĩ i. Ae siqui beite quia Jesús cheẽ ndui nae, ũquĩ je dragón icuã icuã mbeite riqui co.

13

Icuã nyeremo

¹ Ama ndisha rimia ndese que aĩ juã cuu ra. Mbae mo ndese abe

que amae huee ra. Icuã mo ngue usẽ u quia ama ndisha si seje cuu ra. Siete que eãquĩ nda. Diez que erambashĩ nda. Corona ngue chĩ erambashĩ ndese ja ra. Eãquĩ ndese que nombre mo mbesa ji ñi nda. Aque nombre icuãte que Dios je ra. ² Nyacua risha rã ngue icuã nda. Oso i rã tuchi que ei ra. Echuru que nyacua churu rã nda. Dragón ngue uquirãcuã mee tuchi icuã je ra. —Ererecuarã nde, i tuchi que dragón icuã je ra. ³ Icuã ãquĩ mo sia ji tuchi rei ngue re. Manombi chõ ndei ngue re. Nyerõ ñochĩ ngue re. Nyebe mbia mangu e chooñoa jenda nyuruira jate nguiã mae erese cote. Mbia que siqui jate erui cote ra. ⁴ Mbia que ñee turã turãte quia dragón je ra. Uquirãcuã mee mose icuã je. Icuã je abe que eriqui ñee turã turãte ra: —Co icuã turã na eãte mbia mo. Ae mĩ ño equirãcuã ndiqui nguiã mbia si co, i jate que mbia quia ee ra.

⁵ Icuã ngue ucuasu saã saã tuchi quia Dios je ra. —Dios tuchi chõ se re, i tuchi que equia mbia je ra. Dragón ngue emĩ mbia rerecuarã cuarenta y dos meses ra. ⁶ Aque mose bei que eriqui ñee icuã icuã Dios rĩ nda. Echuchua rĩ abe no. Dios rimba ibatenda rĩ abe no. ⁷ Dragón ngue uquirãcuã mee tuchi icuã je ra. Icuã icuã icuãte que eriqui Dios quiato je cote ra. Dios quiato iquia iquia cheete que equia ra. Icuã ngue mbia mangu chooñoa jenda rerecua tuchi cote ra. Mbia cheemo abe rerecua tuchi que cote ra. ⁸ Mbia Dios quiatoã ja tuchi que siqui icuã ndese ra. Ae embae nombre mbesa iriãte riqui Jesús mbae libro rese nae, ũquĩ ngue siqui jate icuã ndese ra. Dios quiato mbae nombre que Jesús mbesa mbae ao ja nond e coose ra. Jesús mano nonde eriĩ. ⁹ Jëisa mose, secheẽ jeñandu rã. ¹⁰ Dios mbae icua ja chõ nguiã, mbae tã i nonde equiato je. —Co sequiato ra

mbia iquia tiquise je, i mose Dios, mbia ra eiquia tiquise je. —Co sequiato ra mbia tarõ, i mose Dios, mbia ra etarõ no. Sã Jesucristo rimba ñimbirãcuã ño. Sã Jesucristo icua tuchi. Icuã icuã icuã mose ee. ¹¹ Aquere que amae icuã mo ndese no nda. Ibi si qu e co icuã ndu ra. Erambashĩ nyeremo ngue ra. Cordero nambashĩ na si que ra. Dragón ñee na si que echeẽ no nda. ¹² Equirãcuã tuchi que ra. Icuã ñiinda rã sí. —Icuã ñiinda rimbarã ño jẽingo, i tuchi que equia mbia mingõ ja icuã ñiinda rese ra. Ae ãquĩ sia ji nyerõ nguia nae, aque. ¹³ Mbia mae sayã ngue esaã saã tuchi quia ra. Tata que embucoi ibei si mbia resa rae ra. ¹⁴ Mbia mae sayã ngue esaã saã tuchi icuã ñiinda rese eico mose ra. Eĩ ngue equia mbia mbiĩrĩ irĩ tuchi ra. —Icuã ñiinda raanguia mo mbae mo jenyao jẽ, i que ñee mbia je ra. Mbia que echao ra. Ae ãquĩ sia ji tiquise je nae, ae nyerõ nguia nae, aque raanguia que mbia chao ra. ¹⁵ Icuã ngue ereco mee mbae ao ji je ra. Mbucuata que ra. Mbucheẽ ngue ra. Mbia rã ngue eriqui cote ra. Ae ngoi sereãte quia ngũĩã ndese mbae ao ji résaa nae, mbae ao ji que ãquĩ iquia cote ra. ¹⁶ Icuã ngue umbae marca mĩ jate mbia rese ra. Mbia ruba rese. Mbia o rese equiatocutinda. Mbia riirĩ ndese. Mbia cuasu rese. Mbaecha rese. Mbaecha reã abe rese. Mbia rimba rese. Mbia rimba eã ndese abe no. Icuã ngue marcar i ja mbia ja je cuu ra. ¹⁷ Mbia mo marcar iriã mose, ãquĩ mbae mo isi aroneate. Mbae mo je vender i aroneate no. Icuã mbae marca nderequia eã mose. Icuã mbae número abe rerequia eã mose no. ¹⁸ Ae ndua tuchi eãte quia nae, ãquĩ nda ã icua eã. Ae mbae icuate quia nae, sã ãquĩ icuã mbae número icua. Mbia mo ñi ño ñene. Embae número rei 666.

14

Mbia 144,000 irasei rasei Dios je

¹ Mbae mo ndese abe que amae cuu ra. Jesucristo que chĩ juã Ibi Ibate Sión seje cuu ra. Ae je eriqui Cordero i. Mbia cuabẽ tuchi que chi erese ra, 144-000 que mbia chi erese ra. ãquĩ nduba rese ja ja que Jesucristo mbae nombre mbesa ji ñiinda. Dios mbae nombre mbesa ji abe no. ² Mbae rieu que achandu bei quia ibatenda ra. Tororomba ata ata rieu raãte que ra. Ama ndieu abe raãte que ra. Sã mbia tubiriãte riqui arpas mbucheẽ ñee no jẽ, ãquĩ naate que erieu riqui ra. ³ ãquĩ mbia cuabẽte que irasei rasei quia Dios résaa ra. Mbae reco cuatro résaa abe no. Amei veiticuatro résaa abe que eriqui irasei rasei no nda. Eirasei rasei yasu que ra. Mbia mo ngue ñimbaaquiatsu aroneate quia eirasei rasei yasu je ra. Mbia 144,000 achõ ño ngue ñimbaaquiatsu aque irasei rasei yasu je ra. Dios ãquĩ sirõ nguiatsu quia mbae icuã si reaẽ. ⁴ ãquĩ ngue ñimbiicuã eãte quia mbae icuã je ra. Ñimbiicuã eã siqui cuña mo ndese no. Siqui turã mbei equia Jesucristo rese ãquĩ. Dios que esirõ mbei mbia ibi jenda si ra. Ofrenda turã na tuchi chõ ãquĩ Dios je re. Jesucristo abe je. ⁵ ãquĩ nguiarei ñee ñooño eã tuchi ãquĩ. ãquĩ turã tuchite eriqui Dios je ã.

Tres ángeles ñee mbia je

⁶ Amae ngue ángel nongue rese cuu ra. Mbebe mbebe que equia ibei rĩ cuu ra. Dios cheẽ turã ua eã je que equereco quia ra. Erenei nenei sacuã mbia ja je. Mangue chooñoa jenda ja je. Mbia cheẽ ñumumbara abe ja je. ⁷ Aque ángel que ñee nda: —Jẽireĩ ireĩ jiri Dios si. Jeñee turã turã jiri quia ee. Achite Dios ñi mae ja mbia rese a. Uquia-toã mbasi nonde. Dios quiatsu ngue

mbae chao ja nguiã. Ibei. Ibi. Ama ndisha. Ama ndicoĩ. Nyebe ra mbia ñee turã ee, i que ángel ñee cuu ra.

⁸ Angel nongue abe que siqui seje cuu ra. Aque que ñee cote ra: —Sucha tubiriã Babilonia ngue quiachâte cote ra. Babilonia nda mbia mbicuã eã cote. Mbiambicuã tuchi equia nyii, i que aque ángel ñee cuu ra.

⁹ Angel nongue abe rese que amae no nda. Ñee asite que ra: —Icuã ndese chõ nda jëingochĩ jë. Icuã naanguia mbae ao ji rese abe chõ nda jëingochĩ jë. Icuã mbae marca ra jemichĩ jenduba rese jë. Jëo abe rese ra jemichĩ jë. ¹⁰ Emo emi mose, Dios ra paama i tuchi ee. Emo emi mose, Dios ra embasi tuchi. Dios ra ñquĩ mbasi bei tata je. Azufre je abe no. Mbasi bei ra ángeles resa rae. Jesucristo resa rae abe no. ¹¹ Ñquĩ nda Dios mbasi bei. Mbae rasi ra eucua mbirĩ jiriã. Siqui quiatu que equia icuã ndui mbaerã nda. Icuã naanguia ao ji abe rese quiatu que eriqui ra. Icuã mbae marca abe rese quiatu que eriqui mbaerã no nda.

¹² Dios quiato tuchi ra ñquĩ saã eã. Sã eriqui beite Dios cheẽ ndui. Sã eriqui ñimbirãcuã mbeite, i que ángel ñee cuu ra.

¹³ Ibatenda mo ngue ñee seje cuu ra: —Ã embesa rã: “Jesús quiato mo mano mose, eyate riqui co”, ere chõ mi embesa. Espíritu Turã ñee abe chõ ñquĩ nde. Jesús quiato mo mano mose, uquenea nda eucua cote. Ae mbae turã esaã saã nguia nyii nae, ñquĩ si ra Dios tesareia mbei, i que ibatenda ñee seje ra.

Dios uquiatoã mbasi mose, mbae a riami ami na ño nda esaã ee

¹⁴ Ibeishĩ ndese que amae cuu cote ra. Emo ngue chĩ ngoi ibeishĩ tose ra. Jesucristo rã tuchi que ra. Corona ngue chĩ eãquĩ ndese

oro ao ji ra. Tiquise raanguia rimbete que equereco oo ra. Quiata a ucua ucua sacuã. ¹⁵ Angel mo ngue tu usẽ Dios chuchua si ra. Ñeemombo que Jesucristo raanguia je ra. —Mbae eucua ucua tiquise raanguia je cote. Mbae a quiche jate mangue chooñoa jenda ja, i que ee ra. ¹⁶ Ae chĩ ibeishĩ tose nae, aque que tiquise raanguia mee ibi quiti ra. Aque mose tuchi chõ ngue mbae a ibi jenda ishao ja tuchi cote ra.

¹⁷ Angel mo abe que usẽ u Dios chuchua ibatenda si ra. Tiquise raanguia rimbete que equereco no nda. Uvas ucua ucua sacuã. ¹⁸ Angel mo ngue tu altar si cot e ra. Tata raarõsa altar jend a rei aque ángel. Ñeemombo que tiquise raanguia rerequiasa je ra: —Uvas eucua ucua tiquise raanguia je cote. Mangue chooñoa jenda ja eucua ucua. Equiche jate, i que ra. ¹⁹ Angel que tiquise raanguia mee ibi arõ cote ra. Aque mose tuchi chõ ngue uvas ibi jenda ishao ja tuchi ra. Uvas ishao ji que emondo ja tuchua mo nda. Eriami ami sacuã. Dios uquiatoã mbasi mose, mbae a riami ami na ño ñquĩ nde. ²⁰ Isho jiri que eriqui uvas riami ami sucha tubiriã si ra. Dios uquiatoã mbasi mose, uvas riami ami na ño ñquĩ nde. Eruqui riquiraa tuchi que ra. Caballo mbuchecha tuchi que eruqui riquiraa ra. Trescientos kilómetros tuchi que eruqui seje cuu ra.

15

Angeles mbae rasi siete quereco ja eriru ye

¹ Aba siquichesa mo ndese que amae ibei rĩ cuu ra. Mbiambirandu sacuã. Siete angeles rese que amae nda. Mbae rasi chumumbarate que ecurucuaẽ caẽ nguia ibii ra. Siete que mbae rasi ra. Mbae rasi tuchi. Ñquĩ siete

mbae rasi ua mose, Dios ra mbae rasi mbu si eã cote.

² Ama ndisha icoi mo ndese que amae nda. Enininya tuchi que ra. Vidrio raanguia. Tata abe raanguia. Ae siquĩã mbei icuã ndui Jesús quiato nae, ũquĩ ndese que amae no nda. Icuã naanguia rese abe siquĩã. Icuã mbae número abe que equerecoã nda. Ũquĩ ndese que amae ama ndisha arõ nda. Arpas Dios mbae je que echi tocar i ra. ³ Ae Moisés irasei rasei nyii nae, ũquĩ sí je que echi irasei rasei ra. Ae mbia irasei rasei Jesús je nae, ũquĩ sí je que echi irasei rasei ra. ã ngue irasei rasei ra:

Ndechiao turã tuchite, Dios.

Ndequirãcuã tuchite ereico co.

Mbia erembuchiabi jiri jiriãte quia co.

Erecheẽ iru iru eãte quia co.

Mbia rerecua jate ereico co.

⁴ Mbia ra ireĩ ireĩ ja ndesi mae mose ndechiao rese.

Ñee turã ja ra nderĩ.

Nde mii ño ererecua tuchi re.

Mbia ra ngaẽ ja tuchi nderea. Ñee turã sacuaẽ ndeje.

Ndechiao turã ndese quiatu ngue mbia mae nguiã,

i que mbia irasei rasei ama ndisha arõ cuu ra.

⁵ Aquere que mbae mo abe atea cuu ra. Dios chuchua ibatenda eiquesa que quiata seje cuu ra.

⁶ Siete ángeles mbae rasi quereco quia nae, ũquĩ ngue usẽ nyoi Dios chuchua si cote ra. Eiraoshĩ tuchi que nyoi usẽ nda. Oro que equereco huĩshia ati ra. ⁷ Ae rese ama e mbae reco cuatro nyii nae, ũquĩ m o ngue mbae riru mee mee ja ũquĩ ángeles siete je ra. Oro ao ji rei mbae riru. Mbae rasi mbisẽte que chi eriru ja ye ra. Dios mbia mbasi tuchi sacuaẽ. ⁸ Dios nininya tuchi que seje cuu ra. Equirãcuã tuchi que ra. Nyebe que tatashĩ Dios chuchua mboo ja tuchi ra. Mbia mo ngue ique aroneate rã

huee ra. Ũquĩ ángeles mbae rasi icherẽ cherẽ ja eã mose.

16

Angeles mbae rasi icherẽ cherẽ ja

¹ Dios chuchua jenda mo ngue ñee asite ũquĩ ángeles je cuu ra. —Jẽso mbae rasi icherẽ cherẽ ibi jenda ja rese. Dios embasi sacuaẽ, i que ñee siete ángeles je ra.

² Angel ñiinda que oso umbae mbae riru yenda icherẽ ibii ja ra. Ae siquĩ quia icuã ndese nae, ae ngoi coi quia ngũĩã ndese icuã naanguia je nae, ũquĩ ire rasi rasi que cote ra. Mbae asi tubiriã ngue erese cote ra. Nyerõ aroneate que ra.

³ Segundo ángel que umbae mbae riru yenda icherẽ ama ndisha ja ye ra. Mbia raaque ruqui rã ngue ama ndisha cote ra. Ama ndisha rĩnda que mano ja tuchi mbae cote ra.

⁴ Tercer ángel que umbae mbae riru yenda icherẽ ama ñi nda. Ama ndiicoĩ ñi abe que eicherẽ no nda. Mbae ruqui rã tuchi que ama ja cote ra. ⁵ Angel ama ndaarõsa que ñee Dios je cuu ra. —Coche rei mbia icuã erembasi. Dios turã tuchi chõ nde re. Ndeturã mbeite que eriqui ra. ⁶ Ũquĩ mbia icuã nguiatu ngue ndequiato iquia iquiate nguiã nyii. Ndecheẽ nenei neneisa abe iquia iquia. Coche rei mbae rasi eresaanguquia ũquĩ je cote. Coche rei mbae ruqui eresaanguquia ee, i que ángel ñee turã Dios je ra. ⁷ Altar jenda mo abe que ñee Dios je cuu ra. —Ae bei. Coche mbia icuã erembasi nguiã cote. Ndeturã mbeite chõ ereico nguiã nde, i que Dios je ra.

⁸ Cuarto ángel que umbae mbae riru yenda icherẽ tenda rese ra. Nyebe tenda riqui nguiã mbia rei ja ngacu je cote. ⁹ Tenda que mbia sei tuchi quia embasi ra. Ũquĩ mose abe que mbia riqui ñee turã eãte

Dios je ra. Dios embasi raque. Mbia que uba eã mbei Dios rese ra. Ñee icuã icuã mbei chõ ngue equia eriñ nda.

¹⁰ Quinto ángel que umbae mbae riru yenda icherẽ icuã nenda rese ra. Itondaru tuchi que icuã nimba ja je mbia cote ra. Mbia que hueecõ shiu shiu tuchi quia mbae rasi mose ee ra. ¹¹ Ūquĩ mose abe que mbia uba eã Dios rese ra. Huñicuã ngue esecha eãte quia ra. Ñee icuã mbeite que equia Dios riñ nda. Ngasi rerequia mose abe que eriqui ñee icuã mbeite Dios riñ nda.

¹² Sexto ángel que umbae mbae riru yenda icherẽ Río Eufrates ye ra. Ama nguasu tuchi que aque ra. Aque ama ngu e iru cot e ra. Tenda chuisa quitinda soldados iasa sacuã. ¹³ Aba checuayã icuã tres rese que amae nda. Emo ngue tu usẽ dragón nyuru si ra. Enongue que tu usẽ icuã nyuru si ra. Enongue que tu usẽ Dios cheẽ nenei ñooñosa churu si no nda. Nyui rã tuchi que ũquĩ aba checuayã icuã nda. ¹⁴ Ūquĩ aba checuayã icuã ngue mbia mae sayã saã saã tuchi quia milagros ra. Ñee ja que mbia rerecua ja je ra. Ñumunua ja sacuã pelear i sacuã Dios rese. ¹⁵ Sã Jesús ñee no: “Mbia ndua eã mose serese ra achu. Jẽtesa tesa bei equia serese jẽ. Jẽingoquiato bei equia jẽ. 1 nda jẽireĩ nguĩã sechu mose”, sã Jesús i no. ¹⁶ Aba checuayã icuã ngue mbia rerecua munua ja huee ra. Pelear i sacuã Dios rese. Armagedón, i que hebreo cheẽ hue je ra.

¹⁷ Séptimo ángel que umbae mbae riru yenda icherẽ quiririãsa ra. Aque mose que Dios ñeemombo uchuchua ibatenda si ra. —Mbae rasi icherẽ ji jate cote, i que Dios ñeemombo ra. ¹⁸ Ama ngue pirirã pirirã i tuchite cote ra. Ama ngue sieu tuchi quia no nda. Ibei que ñee tuchi quia ra. Ibi abe que

nyere tuchi quia no nda. Emo mose rã eã tuchi que ra. ¹⁹ Sucha tubiriã Babilonia ngue obo obo nyibite riñ nda. Tres partes. Hue jenda tuchua que ngoi ja tuchi ra. Mbia chuchua que ngoi ngoi ja mangue chooñoa jenda aque mose ra. Dios quiatu ngue tesareiate nguĩã Babilonia jenda chisaã icuã si. Nyebe eriqui nguĩã paama i tuchi ee cote. Embasi mbasi uquiracuã je cote. ²⁰ Islas abe que quiachã quiachã ja ama jenda ra. Ibi ibate abe que quiachamba chamba ja no nda. ²¹ Iquitã nguasu que ngoi ngoi quia mbia iquia iquia ra. Cuarenta kilos ja ja que ũquĩ iquitã nda. Iquitã ngue mbia iquia iquia tuchi quia ra. Nyebe mbia riqui nguĩã ñee icuã icuã tuchi Dios riñ. Ñee turã ndocoĩ ee.

17

Cuña icuã mbae rasi saã tuchi

¹ Ae mbae riru quereco ángeles nae, ũquĩ mo ngue tu ñee seje ra. —Nyao serese. Mbae tateacuquia ndeje. Babilonia jenda ra mbae rasi saã tuchi cote. Ae cuña siqui chooñote quia mbia ja rese nae, aque ra mbae rasi saã tuchi cote. Ama ndisha jie eñi ngoi mar hue. ² Mbia rerecua que siqui siqui jate quia erese ra. Mbia ataque abe no. Ae que mbia mbñicuã jate quia ra, i que ángel ñee seje cuu ra. ³ Ángel que sererao turuquia ri cuu ra. Huee que amae cuña icuã ndese ra. Icuã ireĩ átoo que eñi nda. Embesa ji tubiriãte que chí icuã ndese ra. Nombres mbesa ji icuã tuchi que ũquĩ Dios je ra. Icuã ãquĩ atate que ra. Siete que eãquĩ nda. Diez que erambashĩ no nda. ⁴ Mbia rerecua irao raãte que cuña icuã irao ra. Eirao ireĩ turãte que ra. Oro tubiriãte que equereco adorno nda. Perlas abe no. Sita ñetẽ aba queteamba abe no. Mbae riru abe que quereco

oo ra. Oro ao ji. Huicua ñgue equereco ja quia aque mbae riru ye cuu ra. ⁵ Embesa ji que chí eruba rese ra. Aba chícuayã tuchi que ra. Ñ i chõ ñgue huí nguiã: “Babilonia ño co re. Sucha tubiriã icuã ño co re. Cuña icuã nderecua ja chõ co re. Mbae icuã nderecua ja chõ co re”, i chõ ñgue embesa ji huí nguiã eruba rese. ⁶ Quiacuate quia cuña icuã ndiqui reaẽ. Jesús quiato uninya ruqui quia embei quia quiacua nonde reaẽ. Achuruiã tuchi que mae erese cuu ra.

⁷ Angel que ñee seje cote ra. —¿Mbaerã ereico nyuruirate mae erese re? Tarembiirandu cuña icuã ndese. Ae átoo eñi nae, aque rese abe tarembiirandu. Ae siete eãquĩ ndiqui nae. Ae erambashĩ diez riqui nae. ⁸ Ae rese eremae icuã cuu nae, aque ñgue siqui rei nguiã cose. Emoate namo cote. Siquibe rae. Usẽ nda ibicua si. Aque icuã quera si mose, Jesús quiatoã nda nyuruiã tuchi mae erese. Ae embae nombre mbesa ji eãte Jesús mbae libro rese nae, ñquĩ. Icuã nda oso mbae rasi raã tuchi tata cuasu cote. ⁹ Earacua achõ nda ã secheẽ icua: Eãquĩ siete rã sí rei ibi ibate siete. Cuña icuã ñi ngoi ibi ibate siete tose hue. ¹⁰ Eãquĩ siete rã sí rei mbia rerecua siete no. Cinco que mano nda. Aque mii ndiqui namo co. Emo mii nda siqui emo mose cote. Aque ra siqui mbirĩ ño mbia rerecuarã. ¹¹ Ñquĩ siete mo ndei icuã ireĩ mo. Siqui que equia nyii ra. Emoate namo cote. Siqui i ra ñquĩ siete ua mose cote no. Mbia rerecua octavo ra ae cote. Ae ra oso bei tata cuasu aquere cote. ¹² Ae erambashĩ ndese eremae diez nae, mbia rerecua diez rã sí chõ ñquĩ nde. Mbia rerecua eã ño ñquĩ namo nde. Emo mose quia ra mbia rerecua cote. Ererecua mbirĩ ño ndae. Icuã ndese quiatu ra ererecua. ¹³ Hue rĩ sí

tuchi ra ñquĩ ererecua ndua ndua. —Ererecuarã ño icuã jẽ, i ja ra ñquĩ ererecua. Uquirãcuã nda emee ja icuã je. ¹⁴ Ñquĩ nda pelear i ja Cristo rese cote. Cristo quia ra i tuchi ñquĩ ja si. Ae quia mbia rerecua tuchi re. Ae quia equirãcuã tuchi mbia mo si re. Ae siqui Cristo rese nae, Cristo chiirabo chõ ñquĩ nde. Eturã tuchi chõ ñquĩ Cristo je re, i que ángel seje cuu ra.

¹⁵ Ñee si que seje ra. —Ae ama ndisha rese eremae mar nae, ae ji cuña icuã ñi ngoi nae, mbia chumumbara rã sí chõ ñquĩ nde. Mangue chooñoa jenda ja rã ño ñquĩ nde. Sucha tubiriã jenda ja rã ño ñquĩ nde. ¹⁶ Erambashĩ diez rese que eremae nae, mbia rerecua diez na sí chõ ñquĩ nde. Ñquĩ nda cuña icuã ucuãyãte cote. Ñquĩ nda cuña icuã secha icuã cote. Erete checua ra esecha cote. Eroo ra eu. Erete ra esei tata je cote. ¹⁷ Dios que ñee nyii ra. —Mbia rerecua icuã tuchi ra cuña icuã je, i que Dios nyii ra. Echeẽ ndui sí ra eicuã icuã cuña icuã je cote. Dios que eicua nyii ra. Hue rĩ sí ra ñquĩ ererecua diez ndua. Umbae ra emondo ja icuã je. Icuã mii nda mbia rerecuarã ja cote. Aque mose ra Dios cheẽ ique. ¹⁸ Cuña icuã ndese ereico mae nae, sucha tubiriã na si chõ aque cuña nde. Hue sucha rei ererecua tuchi sucha ataque si. Mangue chooñoa jenda rerecua ja rei hue sucha, i que ángel seje ra.

18

Babilonia jenda ra mbae rasi saã tuchi

¹ Aquere que amae ángel mo ndese ra. Nguichi que u quia ibei si ra. Equirãcuã tuchi que ra. Enininya tuchi que ra. Ibi resae tuchi qu e eu quia ra. ² Angel que ñeemombo mombo tuchi ra. —Sucha tubiriã Babilonia jenda que ngoi ja cote ra. Mbia tiãte que huee

cote ra. Aba checuayã icuã achõ ño chi nguiã hue cote. ³ Hue sucha tubiriã Babilonia jenda que mbia mbuicua jate quia ra. Mbia mbui mbui tuchi que equia Dios si ra. Ubi icuã achõ ndese chõ ngue eriqui ndua tuchi ra. “Ũqui na nda se chã” i ja ja que equia mbae ja je ra, i que ángel ñee cuu ra. ⁴ Ibatenda mo ngue ñee cuu ra. —Ae serimba jemo nae, hue si jenyao. ¹ nda hue jenda chisaã icuã jêsaã eã jê abe. ¹ nda mbae rasi jêsaã eã jê, hue jenda mbae rasi raã mose. ⁵ Hue jenda que mbae icuã saã saã tuchite quia ra. Dios tesareiãte quia hue jenda icuã si co. ⁶ Hue jenda que mbia ataque mbasi mbasi tuchi quia ra. Ũqui sí ra mbae rasi saã tuchi cote. Dios ra mbae rasi saanguquia i i tuchi quia ee cote. ⁷ Hue jenda que ucuasu saã saã tuchi quia ra. Ubi achõ ndese chõ ngue eriqui ndua ra. “Co ai aico turãte co. Mbae rasi tu aroneate seje”, i ja jate rei que equia ra. Nyebe ra Dios mbae rasi saanguquia tuchi ee cote. ⁸ Aque mose tuchi ra mbae icuã tu tuchi ũqui mbua cote. Mbae rasi icuã nda esaã tuchi. Eriãcuã ndasi tuchi ra cote. Echuchua ra oquiei ja. Mbia ra mano ja. Dios quiatu ra mbae icuã saanguquia tuchi mbia je eicuã ñii cote. Dios quiarei equirãcuã tuchi, i que ángel ñee cuu ra. ⁹ Ae ererecua mbae icuã saã nguia Babilonia jenda rese nae, ũqui ia eã tuchi ra erese cote. Nyeseo tuchi ra erese mbae rasi raã tuchi mose. Echuchua oquiei rese mae mose. ¹⁰ Isho chõ nda echí mae mbae rasi raã ndese. Esiquichete quia ñene. Ñee nda ee mbae rasi raã mose. —Ureya eãte riqui jendese ã. Babilonia sucha tubiriã jenda rei ngue jê nyii re. Sucha eã tuchite jenyuchua cote. Jêirao turã tubiriãt e rei ngue nyii re. Oro ao ji tubiriãte rei ngue adornos jembae nyii no nde. ¹¹ Comerciantes mangue chooñoa jenda ja abe ra eya eãte, Babilonia

jenda mbae rasi raã mose. Nyeseo tuchi ra erese. Mbia quia nda embae isi eãte nguiã cote. Nyebe ra eya eãte cote. ¹² ã je nda vender i nguiã ña:

oro
plata
sita ñetẽ aba quetamba huirã
perlas
tiru turã tuchi
tiru irei
tiru seda
ira simbu turã mo
marfil ao ji
ira turã ao ji
bronce ao ji
hierro ao ji
sitashí ao ji
¹³ canela
aba mbushimbusa
perfumes
tuchua mbusimbusa
vino
mbae quira
mbae cui
trigo
ovejas
caballos
ira nambacua
mbia nimba

Ũqui ja je nda vender i nguiã ee chã.

¹⁴ Mbia ra ñee Babilonia jenda je cote. —Ae mbae jenyoseite quia nae, ũqui mo nda tu ãte jêje cote. Jembae tubiriãte riqui nyii nae, ũqui mo nda jendecoã cote, i ra mbia ee cote. ¹⁵ Ae ã mondo mondo quia vender i Babilonia jenda je nyii nae, ũqui abe ra chí mae isho erese no. Esiquichete ra chí mae mbae rasi raã ndese. Nyeseo ra erese. ¹⁶ Ñee nda Babilonia jenda je. —Ureya eãte riqui jendese ã. Babilonia sucha tubiriã jenda rei ngue jê nyii re. Sucha eã tuchite jenyuchua cote. Jêirao turã tubiriãt e rei ngue nyii re. Oro ao ji tubiriãte rei ngue adornos jembae nyii no nde.

¹⁷ Jembae ua asi chõchĩ jê mbae rasi raã mose, i ra ee. Ae comerciantes nyoĩ choĩ quia canoa ye nae, ae nyoĩ choĩ quia barco ye

nae, ũquĩ nda chi isho mae Babilonia jenda mbae rasi raã ndese. ¹⁸ Babilonia sucha tubiriã oquiei mose ra ũquĩ nyĩ isho mae erese. —Sucha tubiriã tuchichĩ Babilonia. Babilonia na eãte emo, i ra nyeseo sucha tubiriã oquiei mose Babilonia jenda. ¹⁹ Ibi tuba ra emombo mombo uãquĩ ndese. Nyeseo tuchi rae. Sucha tubiriã oquiei mose Babilonia jenda. Ñeemombo mombo ra Babilonia jenda je. —Ureya eãte riqui jendese ã. Mbaechate que jẽingochĩ nyii ra. Ure abe que mbaechate ureico jeni nyii no nda. Mbae ua asi tuchi chõchĩ co mose cote, i ra ñee Babilonia jenda je. ²⁰ Babilonia sucha tubiriã ua mose ra ibatenda iate cote. Jesús chimbaaquiatu abe ra eya cote. Ae Dios cheẽ senei senei quia nae, ũquĩ abe ra eyate cote. Dios quia ra mbae rasi mondo tuchi Babilonia jenda je uquiato rĩ.

²¹ Angel quirãcuã mo ndese que amae cuu ra. Sita cuasu mo ngue esui mombo ama ndisha ye cuu ra. Ñee ngue cote ra. —Eĩ nda Dios sucha tubiriã Babilonia mombo. Sã sita amombo ama ndisha ye no. Sucha tubiriã eã mbei ra Babilonia cote. ²² Nyebe ra mbia música saã eã mbei huee cote. Mbía ra irasei rasei eã mbei huee cote no. Mbía ra nyuao eã mbei mbae rese huee cote. Mbía ra mbua tocho eã mbei huee cote no. ²³ Lamparina mo nda mbae tesae eã huĩ huee cote. Emo nda ngũinisirã isiã mbei huee cote. Mbía mbaecha hue jenda que aba chũcuate riqui nyii ra. Hue jenda que mbia ataque mbĩrĩ i rĩ jate rei quia brujería je nyii no nda. ²⁴ Hue jenda que Dios quiato iquia iquia bei quia ra. Dios cheẽ mbuchecuasa que eiquia iquia tuchi quia ra. Nyebe ra Dios mbae rasi raanguquia tuchi hue jenda je cote.

19

¹ Aquere que mbia cheẽ tubiriãte

achandu ibate cuu ra. Ñeemombo mombo que ñee turã Dios je ra.

Dios turã tuchite riqui mbia je co. Dios ae riqui mbia rirõ eicuã si co. Dios ae chõ equirãcuã ndiqui nguiã co.

² Ae siqui sereãte quia Dios rese nae, ũquĩ nda Dios mbasi.

Mae tuchi ra erese embasi nonde. Sã Dios mbae rasi saanguquia cuña icuã je namo no.

Aque que siqui siqui jate quia mbia rese ra. Mbía mbĩcuã icuã ja.

Ae que Dios quiato iquia iquia quia no nda. Nyebe Dios embasi nguiã cote,

i que ibatenda cheẽ tubiriãte cuu ra.

³ Aquere que ñee si ra. —Dios turã tuchi riqui mbia je co. Cuña icuã ndiqui oquiei beite hue, i que ñee nda. ⁴ Aquere que veinticuatro amei ñee turãte Dios je cote ra. Mbae reco cuatro rese. Ngoi que ngũĩã ndese Dios nonde ra. Dios chĩ mose ngoi umbae trono tose. Ñee turã ngue Dios je ra. —Amén. Dios turã tuchi riqui mbia je co, i que ñee turã Dios je ra. ⁵ Emo ñee ngue achandu ibate ra. —Ae Dios quiato jẽ nae, jeñee turã ja erĩ. Ae Dios cheẽ jemumba eãte quia jẽ nae, jeñee turã ja erĩ no. Ae ecuas nae, ae eñetẽ nae, jeñee turã ja chõ nguia erĩ, i que ibatenda mo ñee cuu ra.

Jesús quiato ra quiaru erese ibate

⁶ Mbae mo ndieu que achandu cote ra. Iãcuã ndieu rã. Ama sieu rã. Mbía tubiriã ñee ño ndei ngue re. Æ ño ngue mbia ñee nguiã: Dios turã tuchi riqui mbia je co. Equirãcuã tuchite riqui co.

Ae riqui mbia rerecua tuchi co cote.

⁷ Nandechĩmbia tuchi quia erese jẽ. Nandechẽ turã ño nguia erĩ jẽ.

Jesús ra uquiato isi bei cote.

Sã emo ndiqui ngũinisirã isi bei no. Sã eninisi icoquiato ngurã ndaarõ arõ no.

⁸ Sã eninisi tirushĩ turã mingue eru eisi bei nonde no.

Eĩ si ra Jesús uquiato isi cote, eru ngũinisirã isi rã,

i que ibatenda ñee cuu ra. Tirushĩ turã ndei Jesús quiato reco turã na.

⁹ Angel que ñee seje cote ra. — Co embesa rã: “Jesús ngũinisirã isi raanguia chõ nda esaã uquiato je ibate cote. Ae je ra ñee ‘jenyu serese quiaru’ i aque mose nae, Dios turã tuchi ra ũquĩ je”, ere embesa mi, i que ángel seje ra. —Dios cheẽ tuchi chõ ũquĩ nde, i que ángel seje ra. ¹⁰ Senia ndese que acoi rei ángel ndésaa ra. Adorar i sacua ee. Angel que ñee ño seje ra. —Adorar erechĩ nda seje jẽ. Dios rimba chõ se re. Nde rã sí. Ndequiato rã sí. Ae siqui tuchi quia Jesús rui nae, ũquĩ mo na ño se re. Dios mii je chõ adorar ere. Ae Dios cheẽ senei senei nguia mbia je nae, Jesús mbuchecua sacua mbia je chõ ũquĩ nde, i que ángel seje ra.

Ae siqui caballoshĩ átoo

¹¹ Ibei que obo seje cuu ra. Caballoshĩ mo ndese que amae huee ra. Emo ngue chĩ eátoo ra. “Ñee ñooñosa reã” i que aque je ra. Ererecua turãte que ae ra. Ae que guerra saã saã nguia mbae turã ndiquisã quisã nda. ¹² Tata rã tuchi que eresa ra. Corona tubiriãte que eãquĩ ndese ra. Embae nombre mbesa ji que chĩ ndei ra. Mbiamo ngue embae nombre icua eãte quia ra. ¹³ Eirao mondo ji eruquiyeyequereco ra. “Dios cheẽ” i que embae nombre ra. Jesús chõ eriqui reaẽ. ¹⁴ Ejército ibatenda que nyoĩ jate erui ra. Eiraoshĩ turã achõte que nyoĩ erui ra. Caballo átoo que echoĩ quia erui ra. ¹⁵ Ae rui ejército nyoĩ nae, aque que tiquise mo nguereco uchúruu ra. Ae teã teã nguia Dios je nae, ũquĩ mbasi sacua ño tiquise rerequia nguia uchúruu aque. Ae ra mbae rasi saanguquia

tuchi Dios quiato eã je cote. Dios ra paama i tuchi mbia je aque mose. Mbiamo quia siqui sereãte nguia Dios quirãcuã ndese. ¹⁶ Ae chĩ caballo átoo nae, aque irao rese que embesa ji ñi nda. Eu rese abe que embesa ji ñi nda. ERERECUA TUCHI i que embesa ji huĩ nda.

¹⁷ Angel mo ngue chĩ juã tenda re cuu ra. Urubu je que eñi ñeemombo mombo ra. Ae mbebe ja quia. —Jenyu ja quiaru. Dios ra jembuquiaru ja tuchi cote. ¹⁸ Mbiamo chumumbara roo ra jẽu cote. Mbiamo rerecua roo. Soldados rerecua roo. Mbiamo quirãcuã ndoo. Caballo roo abe no. Caballo ato jenda roo abe no. Mbiamo cuasu roo abe no. Mbiamo ririĩ ndoo abe no. Ae ererecua riqui nae, ũquĩ ndoo abe no. Ae ererecua eã ndiqui nae, ũquĩ ndoo abe no. ũquĩ ndoo ra jẽu ja cote, i que ángel urubu je ra. ¹⁹ Icuã ndese que amae cote ra. Mbiamo rerecua tubiriã ndese uquiato rese. Ejército tubiriãte que chi erese ra. ũquĩ ñumunu a ño nguia eicuã icuã nonde Jesús je reaẽ. Ae siqui caballoshĩ átoo, aque je. Jesús rimba soldados je abe no. ²⁰ Jesús que icuã isi tarõ nda. Dios cheẽ nenei ñooñosa abe no. Aque chõ mbia mae sayã saã saã ño nguia icuã ndeco mosenyii reaẽ. Aque chõ mbia mbiriĩ irĩ nguia reaẽ. Ae mbia marca quereco quia icuã mbae nae, ũquĩ mbiriĩ irĩ ño equia reaẽ. Ae adorar i quia icuã naanguia mbae aoji je nae, ũquĩ mbiriĩ irĩ ño equia reaẽ. Nyebe Jesús icuã mombo nguia tata cuásuu cote. Dios cheẽ nenei ñooñosa rese. Azufre rese eriqui sendi hue. ²¹ Jesús que icuã nimba i quia ja cote ra. Ae equereco quia tiquise uchúruu nae, aque je que equia ja cuu ra. Urubu ja que eroo u tuchi quia ra.

20

Dios ra Satanás tarõ mi mil años

¹ Aquere que amae ángel mo ndese cuu ra. Nguichi que u quia ibate si ra. Cadena cuasu que equereco ra. Llave abe que equereco ibicua mbuquiata sacua nda. Abismo i equia hue ibicua je. ² Angel que dragón isi nyucua ra. Satanás, i que equia dragón je ra. Mbei ima, i abe que equia ee ra. Diablo, i abe que equia ee no nda. Aque que ángel nyucua mil años cuu ra. ³ Angel que dragón mombo ibicua ye ra. Tarō ngue llave je huee ibicua ye ra. Eiquesa que ematā nda. † nda dragón mbia mangu chooñoa jend a mbĩĩrĩ irĩ si eā. Mil años ua mose, ángel nda embui mbĩrĩ na mondo.

⁴ Jesús quiato iquia ji rese que amae nda. Ae ãquĩ mbia nyisia sia quia Jesús rĩĩ. Mbia rerecuarã tuchi que ũquĩ cuu ra. Siqui eāte quiatu ngue icuā ndese re. Icuā naanguia mbae ao ji je abe que eriqui adorar i āte ra. Icuā mbae marca abe que equerecoāte quia nguba rese no nda. O abe rese. Ũquĩ ndaaque que quera si cuu ra. Cristo que emĩĩ ererecuarã mil años nda. ⁵ Ũquĩ ndei mbia quera je rane ũquĩ. Mbia raaque ataque que quera eā aque mose ra. —Mil años ua mose ra Dios mbia ataque mbuquera cote, i que seje cuu ra. ⁶ Ae rane nda Dios mbuquera nyii nae, ũquĩ ia tuchi rae. Dios quiato tuchi chō ũquĩ nde. Ũquĩ nda nyoĩ eā mbei tata cuasu. Siqui bei ra Dios rese. Cristo abe rese. Ererecuarã mbei ra eriqui Cristo rese mil años.

⁷ Mil años ua mose, Dios ra Satanás mbui sí mondo ibicua si. ⁸ Satanás nda mbia mangu chooñoa jenda mbĩrĩ irĩ ja quia cote. Gog abe mbĩrĩ irĩ. Magog abe mbĩrĩ irĩ no. Dios quiatoã ja mbĩrĩ irĩ. Etubiriã tuchite ũquĩ. Satanás nda ũquĩ munua nua ja quia. Guerra raã naa sacua Dios je. ⁹ Mbia tubiriã tuchi ra Satanás

munua nua nguia ibi jenda ja cote. Ũquĩ nda Jesús quiato mama tuchi cote. Jerusalén ab e mama tuchi rae. (Dios nduasa tuchi chō Jerusalén nde.) Dios ra tata mbu ibei si cote. Tata ra ũquĩ sei ja cote. ¹⁰ Diablo quiatu nda mbia mbĩrĩ irĩte nguia. Nyebe ra Dios emombo tata cuásuu cote. Ae eriqui icuā mombo. Ae eriqui icuā naanguia mbae ao ji abe mombo. Ũquĩ nda siqui bei huee tata cuásuu. Tata sendi quia azufre mumbara. Mbae rasi ra esaã saã mbei huee. Nyaashi mose. Isa abe chee. Usē eā mbei ra hue si.

Dios mbia uquiatoã mbasi mose

¹¹ Mbae mo ndese abe que amae cuu ra. Dios que chĩ ngoĩ trono tose ra. Trono cuasu tuchi que ra. Eshĩ ngue ra. Mbae que uchā ja Dios si aque mose ra. Ibi jenda. Ibei jenda abe no. —Tachĩmi Dios si, i rei que mbae ja ra. ¹² Amae ngue mbia raaque rese ra, ae mano ndei quia nyii. Mbia cuasu rese. Mbia rĩĩrĩ abe rese. Chi ja que júā Dios resa rae cuu ra. Emo ngue libros ata equia ra. Libro nongue abe que eequia ra. Ae mbia ra siqui bei nae, ũquĩ mbae nombres que chĩ aque libro rese ra. Ae mbia saã saã nguia mbae nyii nae, ũquĩ mbesa mbesa ji qu e chĩ ũquĩ libros rese ra. Dios que mbia chisaã mbuchecha checha cote ra. Embasi sacua. ¹³ Ae mbia mano ama ñi nae, ũquĩ ja que chi ra. Ae mbia mano íbii no nae, ũquĩ abe que chi ja no nda. Ae mano mano mangu e chooñoa jenda nae, ũquĩ abe que chi ja no nda. Dios que ũquĩ nyisaã mbuchecha checha ja cuu ra. Embasi sacua. ¹⁴ Aquere ra mbia mano eā mbei cote. Dios quiatoã nda siqui bei tata cuásuu no. ¹⁵ Ae embae nombre mbesa iriāte aque libro rese nae, ũquĩ ngue Dios mombo ja tata cuásuu seje cuu ra.

21

Dios ibi mbiasu, ibei abe

¹ Aquere que amae mbae yasu rese cuu ra. Ibei yasu rese. Ibi abe yasu rese. Ibei ñiinda quiachã ño nguia reaẽ. Ibi ñiinda abe no. Ama ndisha mo eãte que cote ra. ² Se rei Juan. Mbae que nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Mbae mbuturã ji jate que ra. Sã emo ninisirã quiche riqu i ngurã je no. ³ Ibatenda mo ngue ñee cuu ra: —Sã jẽ. Sã Dios riqui mbia mumbara co cote jẽ. Siqui bei ra equia erese. Mbia rerecua turãte ra eriqui ee. Erimbarã tuchi ra mbia cote. ⁴ Dios ra mbia mbia tuchi cote. Mbia mo nda manõã tuchi cote. Emo ndasiã nda cote. Emo nda nyeseo eã cote. Emo ia eã eã nda cote. Cose ndare rã eã nda mbae cote, i que ibatenda ñee cuu ra.

⁵ Dios que ñee cote ra: —Sã jẽ. Sã aico mbae mbiasu jate co jẽ, i que ra. —Ã secheẽ embesa ja rã. Ae rĩ aico ñee nae, ùquĩ nda asaã ja, i que ñee seje ra. ⁶ Ñeembe que seje ra: —Equiche que eno. Co aico beite querabe co. Mbae eã mose abe que aico se rane nyii ra. Mbae ua ja mose abe ra aico bei querabe no. Emo isei mose, i turã nda amondo ee. I mbia mingo beisa ra amondo ee. “Mbae embu i ribishorõ”, ae eã nda ee. ⁷ Ae “qui jẽ” i quia Satanás je nae, ùquĩ je ra mbae turã ja amondo. Ùquĩ nderecua tuchi ra se. Seriirĩ tuchi ra ùquĩ. ⁸ Ñ ja ra nyoĩ tata cuásuu: Esiquiche. Jesús icuasa reã. Mbia nyaba chaba reã. Mbia iquiasa. Ae siqui chooñote quia emo ninisi rese. Ae brujería saã saã nguia. Ae siqui quia Dios abareã ndese. Ae ñee ñooño nguia. Ùquĩ ja ra nyoĩ tata cuásuu. Huee ra tata rasi raã mbei. Asufre mumbara, i que ra.

Jerusalén yasu

⁹ Ae siete ángeles mbae rasi quereco mbae riru ye nae, ùquĩ mo ndese que amae cuu ra. Ñee ngue seje ra: —Quiatuchu. Mbae tateacuquia ndeje. Jesucristo ninisirã tateacuquia ndeje, i que seje cuu ra. ¹⁰ Aque ángel que sererao ibi ibátee mo cuu ra. Huee que mbae nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Sucha cuasu. ¹¹ Jerusalén yasu nininyate que ra. Dios nininya rã si. Sita rendi rã ño ngue eturã nda. Eibera turã ño ngue ra. ¹² Etaronda que sucha cuasu mama ja huĩ nda. Muralla, i que etaronda je ra. Eicoi tuchi que ra. Ibate tuchi que ra. Doce que eiquesa ra. Ángel mii ngue chi eiquesa raarõ ja ja ra. Embesa mbesa ji ja que eiquesa ra. Doce tribus mbae nombre que chĩ jaaja eiquesa rese ra. ¹³ Eiquesa tres que chi tenda chuisa quiti ra. Tenda sosa quiti tres no. Norte quiti tres no. Sur quiti tres no. ¹⁴ Doce sita cuasu que chi muralla qui ñi nda. Etaronda irã. Doce apóstoles mbae nombres mbesa ji que chĩ ùquĩ sita rese ra.

¹⁵ Ángel que uu mo nguereco oro ao ji ra. Dios recua mbuchecha sacua. Eiquesa abe mbuchecha sacua no. Etaronda abe mbuchecha sacua no. ¹⁶ Ángel que Dios recua mbuchecha uu je ra. Cuadrado tuchi que Dios recua ra. Eoco que 2,200 kilómetros ra. Eicoi que 2,200 kilómetros no nda. Ibate quitinda abe que 2,200 kilómetros no nda. ¹⁷ Ángel que muralla abe mbuchecha ra. Sesenta y cuatro metros que eicoi ra. Sã mbia riqui mbae mo mbuchecha no. Eĩ sí que ángel muralla mbuchecha no nda. ¹⁸ Oro ao ji rei sucha cuasu. Eibera tuchi que ra. Muralla rei sita ao ji. Jaspe ao ji. Aba queteamba tuchi rei jaspe. ¹⁹ Sita cuasu chi

quia muralla irã nae, ùquĩ arõ
ngue sita ñetẽ nininya chĩchi ja
ra. Embarõsa chõ ngue ùquĩ nde.
Jaspe mbitee ji rane ngue ra. Zafiro
mbitee ji que chĩ jaspe arõ cote
ra. Agata mbitee ji que chĩ cote
ra. Esmeralda abe no. ²⁰ Onice.
Cornalina. Cristólito. Berilo.
Topacio. Crisoprassa. Jacinto.
Amatista. Ùquĩ ja sita ñetẽ nininya
que chĩ ja ja sita cuasu arõ nda.
²¹ Eiquesa riquisã jate que perla
ao ji chĩ ra. Perla mĩ mĩ ja que chĩ
eiquesa riquisã nda. Oro ao ji que
calle mbite renda ra. Oro ao ji achõ
ngue ra.

²² Dios chuchua templo mo eãte
que huee ra. Mbia quiatu que ñee
mbei quia Dios je mangue chooñoa
nda. Jesucristo abe je. ²³ Tenda
eãte abe que eriqui Dios récuua seje
cuu ra. Nyasi eãte abe que seje cuu
ra. Dios nininya ae chõ ngue mbae
tesae ja quia ra. Jesucristo nininya
abe no. ²⁴ Dios nininya ra uquiato
tesae ja ino huee. Mangue chooñoa
jenda ja. Mbia rerecua ra ñee turã
turã ja Dios recua riĩ cote. ²⁵ Dios
recua chiquesa tarõ iriã mbei rae.
Itondaru eã mbei ra huee. ²⁶ Mbia
mangue chooñoa jenda ja ra ñee
turã turã Dios recua riĩ. Mbae turã
ja ra chĩ huee. ²⁷ Mbia icuã nda
iqueã mbei huee. Mbia mbĩrĩ irĩsa
abe ra ique eã mbei huee no. Ae
embae nombre mbesa ji Jesucristo
mba e libro rese nae, ùquĩ achõ ño
nda ique Dios récuua.

22

¹ Angel que ama mo abe
teacuquia seje cuu no nda. Mbia
mingo beisa que aque ama nda.
Ama ndiibera tuchi que ra. Dios
mbae que aque ama nda. Jesu-
cristo mbae abe no. Sucha tubĩrĩ
ite rĩ ngue iãcuã iratã mo ñi nda.
² Ama nimia nguiti ja que ira ñi
nda. Mbia mingo beisa que ùquĩ
ira ra. Ùquĩ ngue ia beite quia
doce veces en el año nda. Nyasi

mbuchecha quiatu bei que eriqui
ia ia bei ra. Ùquĩ iraro que mbia
chumumbara mbucherõ cherõ
tuchi quia ra. ³ Mbia rasi eã mbei
ra huee cote. Dios ra siqui tuchi
huee. Jesucristo rese. Cordero, i
equia ee. Erimba ra ñee turã mbei
quia ee huee. ⁴ Mae mae ja ra
Dios ruba rese. Dios mbae nombre
mbesa ji ra equereco nguba rese
ja ja. ⁵ Itondaru eã mbei ra huee.
Tenda aroneate huee. Tata abe
aroneate huee no. Dios nininya ae
chõ nda mbae tesae ja huĩ nguĩã
huee. Ererecua turã tuchi ra Dios
quiato ja huee.

Achite Jesús ñi tu a cote

⁶ Angel que ñee seje ra: —Acheẽ
ñooño eã ño nguĩã co. Ae riĩ aico ñee
nae, ùquĩ nda Dios saã ja. Sã Dios
ucheẽ mbuchecuaa mondo mbia
je cose no. Eĩ si que sembu namo
no nda. Ae ra nyecua namo jiri nae,
ùquĩ ndeacuquia sacua mbia je chõ
ngue sembu nguĩã. ⁷ “Se ra achu
jei”, i que Jesús ra, i que ángel ñee
seje ra. Ae ra ã mumba eã Dios cheẽ
mbesa ji nae, ùquĩ ia tuchi rae.

⁸ Se rei Juan. ã ndese que amae
nda. ã ngue achandu no nda.
Aque ángel ã teacuquia quia seje
nae, aque jii que acoi rei senia
ndese ra. Adorar i sacua ee. ⁹ Ñee
ngue seje ra. —¡Adorar erechĩ nda
seje jẽ! Dios mĩ je chõ adorar
ere. Dios rimba chõ se re. Nde rã
sí. Ndequiato rã sí. Ae Dios cheẽ
mbuchecua checua quia nae, ùquĩ
na si. Ae ã mbesa ji mumba eãte
quia nae, ùquĩ na sí, i que ángel ñee
seje ra.

¹⁰ Angel que ñee si seje no nda: —
Ae erembesa co libro nae, ùquĩ nda
erembuchecua yã cuayãchĩ mbia si
jẽ. Eteaquiatu ee. Ae riĩ erembesa
nae, achite eñi tu a cote. ¹¹ Sã mbia
icuã mbae icuã naa naa ño na. Ae
siqui quia mbae rondei rese nae,
sã eriqui rã erese. Ae siqui quia
mbae turã ndese nae, siqui i i tuchi

ra mbae turã ndese. Ae siqui Dios rese nae, siqui i tuchi ra erese cote, i que ángel seje ra.

¹² Jesús que ñee nda: —Achu jei ra se. Ae mbae turã saã saã nguia nae, ñquĩ je ra mbae turã aru. Echisaã na sí. ¹³ Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Jesús ra.

¹⁴ Ae echiaã irei ji Jesús ruqui je nae, ñquĩ ia bei ra eriqui. Eirao ituquia jí na ndei echiaã irei jí. Ñquĩ nda ique Dios récuua. Siqui turã mbei ra equia huee. ¹⁵ Dios quiatoã nda iqueã huee Dios récuua. Ae brujería saã saã nguia nae. Ae siqui chooñote quia cuña mo ndese nae. Ae mbia iquia nae. Ae siqui quia dios mbuae rese nae. Idolo rese nae. Ae mbia mbiĩrĩ irĩ nguia nae. Ñquĩ mo nda iqueã tuchi Dios récuua.

¹⁶ Jesús que ñee nda: —Ángel serimba que amondo ra. Ñ nenei nenei sacua iglesias ja je. David i

chõ se re. David nducucha chõ se no nde. Nyasitata nininya rã ño se re, i que Jesús ra.

¹⁷ Espíritu Turã ndiqui “quiatuchu” i co. Jesús ninisirã abe riqui “quiatuchu” i co no. Sã secheẽ andusa abe “quiatuchu” i. Emo isei mose, sã ecuaẽ i mbei Jesús mbae. Imbia mingo beisa ra Jesús mondo ee. Embei mose, siqui bei rae. —Mbae embu i ribishorõ seje, i eã nda Jesús ee.

¹⁸ Ae ã ñandu quia Dios cheẽ co libro resenda nae, ñquĩ je tacheẽ tuchi: Emo co libro resenda mbirõ mose emo ñee je, Dio s ra ñquĩ mbasi tuchi. Ae mbae rasi chi ja co libro rese a nae, ñquĩ nda esaã ja tuchi. ¹⁹ “Dios cheẽ eã ño co re”, i mose co libro resenda je, ñquĩ abe ra Dios mbasi tuchi. Ñquĩ nda Dios mingo bei eã nguécuaa.

²⁰ Jesucristo cheẽ ño ã nde: —Achu jei ra se, i equia co. Amén. Echu cote, Jesucristo.

²¹ Jesucristo rei nandererecua. Sã uturã mondo tuchi jẽje. Amén.